



# Tũpa Ñehengagüer

Guarayu New Testament

---

---

## Contents

Mateo Rembicuachia Jesus Recocuer Resendar	1
Marcos Rembicuachia Jesus Recocuer Resendar	55
Lucas Rembicuachia Jesus Recocuer Resendar	88
Juan Rembicuachia Jesus Recocuer Resendar	146
Apostol Rembiapo	186
Pablo Rembicuachia Roma Pendar Upe	238
Yipindar Pablo Rembicuachia Corinto Pendar Upe	261
Imoñuviosa Pablo Rembicuachia Corinto Pendar Upe	285
Pablo Rembicuachia Galacia Pendar Upe	300
Pablo Rembicuachia Efeso Pendar Upe	308
Pablo Rembicuachia Filipino Pendar Upe	315
Pablo Rembicuachia Colosa Pendar Upe	321
Pablo Rembicuachia Yipindar Vahe Tesalonica Pendar Upe	326
Pablo Rembicuachia Imoñuviriosa Tesalonica Pendar Upe	331
Pablo Rembicuachia Yipindar Vahe Timoteo Upe	334
Pablo Rembicuachia Imoñuviriosa Timoteo Upe	340
Pablo Rembicuachia Tito Upe	345
Pablo Rembicuachia Filemón Upe	348
Icuachiapri Hebreo Yuvirecoi Vahe Upe	350
Santiago Rembicuachia	366
Pedro Rembicuachia Yipindar Vahe	372
Imoñuviriosa Pedro Rembicuachia	379
Juan Rembicuachia Yipindar Vahe	383
Imoñuviriosa Juan Rembicuachia	388
Imombosapisa Juan Rembicuachia	389
Judas Rembicuachia	390
Tüpa Remimboyecua Juan Upe	392



## **Tūpa Ñehengagüer**

### **New Testament in Guarayu (BL:gyr:Guarayu)**

Language: Guarayu

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit [www.dbs.org](http://www.dbs.org) (USA), [www.bibleleague.ca](http://www.bibleleague.ca) (Canada), and [www.opendoors.org](http://www.opendoors.org) (Europe).

### **Copyright and Permission to Copy**

Copyright © 2011 Wycliffe Bible Translators, Inc.

Copyright © 2011 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society ([www.dbs.org](http://www.dbs.org)).

---

PDF generated on 2017-08-24 from source files dated 2017-08-24.

d33be647-5ca1-5194-a39a-bbd379705be8

ISBN: 978-1-5313-0276-4

*MATEO REMBICUACHIA  
JESUS RECOCUER RESENDAR*

**SAN MATEO**

**Ava eta oyesu vahe  
Jesucristo yesu renondeve**

**1** Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

<sup>2</sup>Abraham rahir Isaac, Isaac rahir evocoyase Jacob, ipare Jacob rahir ahe Judá ambuae tiqehir, tivireta reseve. <sup>3</sup>Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoyase Aram. <sup>4</sup>Aram rahir Aminadab, Aminadab rahir Naasón, Naasón rahir evocoyase Salmón, <sup>5</sup>Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí, <sup>6</sup>Isaí rahir mborerecuar guasu David, David rahir evocoyase Salomón, Urías rembirecocuer pipe oyesu vahe.

<sup>7</sup>Salomón rahir Roboam, Roboam rahir Abías, Abías rahir Asa. <sup>8</sup>Asa rahir Josafat, Josafat rahir Joram, Joram rahir evocoyase Uzías. <sup>9</sup>Uzías rahir Jotam, Jotam rahir Acáz, Acáz rahir ahe Ezequías. <sup>10</sup>Ezequías rahir Manasés, Manasés rahir Amón, Amón rahir evocoyase Josías. <sup>11</sup>Josías rahir Jeconías tivireta reseve, Babilonia ve mbiguai yuvirecoi vahecuer.

<sup>12</sup>Mbiguai yuvirecoire Jeconías omboyesu Salatiel, Salatiel rahir ahe Zorobabel. <sup>13</sup>Zorobabel rahir Abiud, Abiud rahir ahe Eliaquim, Eliaquim rahir evocoyase Azor. <sup>14</sup>Azor rahir Sadoc, Sadoc rahir ahe Aquim, Aquim rahir evocoyase Eliud. <sup>15</sup>Eliud rahir Eleazar, Eleazar rahir ahe Matán, Matán rahir evocoyase Jacob. <sup>16</sup>Jacob rahir José,

María mer, María evocoyase Jesús si secoi. Ahe imembri Tüpa Rembiporavo Poropísirosar.

<sup>17</sup>Evocoyase Abraham yesusa sui tupri oyepota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai sereco agüer pipe Babilonia ve; ahe omomba avei catorce yesu yoapi agüer. Mbiguai ava serecosa sui oyepota araviter Poropísirosar haragüer rupi, ahe omomba iri avei ambuae catorce yesu yoapi agüer.

**Jesucristo yesu agüer**

<sup>18</sup>Na ehi Jesucristo oyesu aracahe. María, ichi, ahe omenda pota vahe José rese. Oyese yuvirecoiêhi vite-seve rumo, Espíritu Santo pīratasa pipe imembi. <sup>19</sup>Evocoyase José, imevi, ahe ava seco catupri vahe, “Tapoiño ayase ava icuaêhisa pipe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa pipe. <sup>20</sup>Aipo opīhañemoñeta reseve oque. Iquerve rumo, Tüpa rembiguai oyemboyecua chupe aipo ehi: “José, David suindar, eresiquiyei rene María rese nde menda água. Esepia, Espíritu Santo sui ou imembirã. <sup>21</sup>María virecose omembri, pemondora sererguã Jesús. Esepia, ahe oipísirora omu judío eta yangaipa sui” ehi.

<sup>22</sup>Co rupi opa yaviye yande Yar remimombehugüer aipo ehi vahecuer ñehe mombehusar aracahe:

<sup>23</sup>“Cuña ndaseco marai vahe imembira. Ahe imembri rer-ra Emanuel” ehi (“Tüpa yande rese ité secoi’ oya aipo ehi).

<sup>24</sup>Omahese José, Tüpa rembiguai oyeupe ñehe agüer omboyeroya ité. Ichui omenda María rese cute. <sup>25</sup>Ndoyapo vitei eté rumo mbahe oyese yuvireco. Yipindar imembira rane ité, ahese José omondo Jesús sererguã.

**Ava yasitata rese oyembohe vahe ari sêsa cotindar yuviraso pītani repia**

**2** Herodes mborerecuar guasu recose, Jesús oha Judea ivi rupi tecua Belén ve. Coiye yugüeru ava yasitata rese oyembohe vahe ari sêsa coti sui Jerusalén ve. <sup>2</sup>Ahe oporandu Herodes upe yuvireco aipo ehi:

—¿Que vo aipo oha judío rerecuar guasu? Esepia niha, caharu coti yasitata orosepia. Sese oroyu ari sêsa coti sui imboetei ägua —ehi yuvireco chupe.

<sup>3</sup>Aipo ihese, mborerecuar Herodes oyembosiquiye tēi, ava Jerusalén pendar avei ägüe ehi pãve yuvireco. <sup>4</sup>Iyavei cūriteimi opa omonuha uca pahi rerecuareta, Moisés porocuaita rese oporombohe vahe avei. Ipare oporandu chupe:

—¿Que vo aipo ohara Poropīsirosar? —ehi.

<sup>5</sup>Ahe omboyeve yuvireco chupe:

—Ahe ohara Judea rupi Belén ve —ehi—. Esepia, Tüpa ñehe mombehugar Miqueas rembicuachiagüer pipe aipo ehi:

<sup>6</sup>‘Pe, tecua mini Belén pipendar, ndahei ivi coti tēi vahe ambuae tecua Judá pipendar sui peico.

Esepia, pe sui osêra mborerecuar che recua iguar Israel yocuai ägua’ ehi —ehi

yuvireco Herodes upe.

<sup>7</sup>Aipo hese, Herodes oñehe ñemi ava yasitata rese oyembohe vahe upe ‘toicua eme ava yuvireco’ oyapave oporandu: “¿Mbahe yasi pipe ité vo pesepia ramo aipo yasitata?” ehi. <sup>8</sup>Oyeupe mombehu pare, omondopa Belén ve aipo ehi chupe:

—Peso evocoyase, peseca pītani. Acoi peyosuse, co rupi avei peyevi cheu icua uca ägua. Che avei evocoyase tasomi imboetei —ehi angahu chupe.

<sup>9</sup>Aipo oyeupe he pare, yasitata rese oyembohe vahe osiriño voi yuviraso.

Ahe pipeve yasitata oyemboyecua iri senonera. Ichui pītani recosa rese tupri tecua Belén ve opita yasitata. <sup>10</sup>Sepiase, ovihareté yuvireco. <sup>11</sup>Ipare yuviroique oi pipe, osepia pītani ichi María reseve yuvireco. Ichui oñenopiha sovai imboeteisa pipe. Ipare opöhe ombahe riru pipe yuvireco oicuvãve vaheã oporecoca sepirusu vahe oro, itaisi, ambuae mbahe siacua vahe mirra serer vahe avei. <sup>12</sup>Yuviroyeveise güecuaive yuviraso, ndoyuviroyeve iri Jerusalén rupi mborerecuar Herodes upe imombehu. Esepia, Tüpa aipo omombehu iquerve chupe ambuae peri rupi iyevi ägua.

**Jesús pītani seroñemisa Egipto ve**

<sup>13</sup>Aipo ava yepepi pare, José upe oyemboyecua Tüpa rembiguai iquerve, aipo ehi chupe: “Eñarapuha, eroñemi pītani ichi reseve eraso Egipto ve. Aheve erepitara acoi che amombehuse voi nde yeve ägua. Esepia, mborerecuar Herodes oseca pītani yuca ägua oico” ehi chupe.

<sup>14</sup>Ahe pītu pipeve voi José viraso pītani ichi reseve Egipto ve. <sup>15</sup>Aheve yuvirecoi co mborerecuar Herodes mano rãro. Co rupi imboaviyesa Tüpa ñehe mombehugar remimombehugüer: “Egipto sui anose che Rahir” ehi vahe.

**Herodes oyuca uca chihivahe eta**

<sup>16</sup>Mborerecuar Herodes rumo oñemoiró iteanga yasitata rese oyembohe vahe ombopa tēisa rese. Sese, “Toyuviraso sundao tecua Belén ve, toyucapa chihivahe cuimbahemi yuvireco opacatu ñuvirío araviter ovireco vahe, chihivahemi catu vahe avei, ahe tecua ivirindar pipe avei no” ehi. Esepia, omoñetase yasitata rese oyembohe vahe yuvireco, oicua ahe araviter opa cūritei. <sup>17</sup>Ägüe ehi yaviye Tüpa ñehe mombehugar Jeremías remimombehugüer aipo ehi vahe:

<sup>18</sup>“Oyeendu ava Ramá ve. Ahe Raquel oyaseho ité omembireta manose; ndoyemboviha catui eté ipipe” ehi.

<sup>19</sup>Mborerecuar Herodes manore, Egipto ve José upe oñehe iri Tüpa rembiguai iquerve aipo ehi: <sup>20</sup>“Eñarapuha, eroyeve pītani ichi reseve Israel recuave. Esepia, opa omano pītani yuca potasar yuvireco” ehi.

<sup>21</sup>Aipo oyeupe hese, oñarapuha, viroyevi pītani ichi reseve Israel recuave. <sup>22–23</sup>Peri rupi oyanduse rumo Arquelao vu recoyar mborerecuar chinise, ahese oyembosiquiye aheve oso água. Coiyemi tēi iquerve Tüpa, “Peso Galilea ivi rese” ehi chupe. Ichui yuvirasos tecua Nazaret ve. Aheve opita yuvireco cute. Ēgüe ehi yaviye Tüpa ñehe mombehusar remimombehugüer: “Nazaret pendar’ ehira serecosa” ehi vahe.

### Juan Oporoãpiramo vahe ivi iporupirēhisa rupi secui

**3** Ipare Juan Oporoãpiramo vahe Tüpa recocuer rese oñehe oico Judea ivi rupi ava yemboerecuatēhisave <sup>2</sup>aipo ehi: “¡Pemboasi pe angaipa; peyeve Tüpa upe! Esepia, co Tüpa mborerecuasa cōimi secui yandeu” ehi.

<sup>3</sup>Co Juan rese niha oñehe yipive Tüpa ñehe mombehusar Isaías aipo ehi güembicuachiagüer pipe: “Oyeendu ñehesa ava yemboerecuatēhisave:

‘Pemoingatu yande Yar raperã; pemo-hivi tupri avei’ ehi” ehi aracahe.

<sup>4</sup>Juan turucuar ahese camello ragüer apopri, sumbicuasa mbahe pirer, sembihu evocoyase tucru, eiri caha pipendar avei. <sup>5</sup>Opacatu ava Jerusalén pendar, Judea rupindar tecua, iai Jordán rorevica pendar avei yuvirasos iñehe

rendu <sup>6</sup>oangaipagüer mombehu água. Ahese Juan oñapiramo iai Jordán pipe.

<sup>7</sup>Yugüeru atise rumo fariseo iyavei saduceo oñeapiramo uca água, Juan aipo ehi ahe ava upe: “¡Pe mboi mboetasa tēi peico! ¿Ava vo, ‘Pesera Tüpa ñemoirosa ou vaheṛá sui’ ehi tupri tēi pēu? <sup>8</sup>Yipindar toyecua tupri rane Tüpa upe pe yevisa pe angaipa mboasisa pipe. <sup>9</sup>Iyavei ndapeyeroyai chira ‘ore Abraham suindar orico’ pe hesa rese tēi pe ñepisiro água. Esepia, Tüpa oicatuño ité co ita sui Abraham suindar nungar tupri apo água oyeupe nara yepi. <sup>10</sup>Hacha niha imoingatusa voi eté opacatu ivira ndihai vahe sapo rupi yasia água. Ichui yasia pare imondosa tatave. <sup>11</sup>Che i pipe tēi opoãpiramo Tüpa upe pe yeve água. Oura rumo ambuae che raquicuei, ahe pe ãpiramora Espiritu Santo tata nungar pipe. Ahe seco pīrata catu vahe secui che sui. Sese cheu ndiyai eté ahe ipitaquisá yora água ichui. <sup>12</sup>Ahe oipehara mbahe rāhii ihigüer sui. Sāhii evocoyase oyapocatura, ihigüer rumo omondora tata apirēhi vahesave” ehi.

### Jesús ãpiramosa

<sup>13</sup>Ipare Jesús oso Galilea sui iai Jordán ve Juan recosave ‘tache ãpiramo’ oya. <sup>14</sup>Yipindar rumo Juan ndoipotai eté, aipo ehiño chupe:

—Nde rumo iya ité che ãpiramora eve viña, ¿nde rumo ereyu che nde ãpiramo água? —ehi.

<sup>15</sup>—Ēgüe tehiño aipo. Iyacatu yaya-pora Tüpa porocuita —ehi Juan upe.

Evocoyase Juan, “Aviye” ehi chupe. <sup>16</sup>Oãpiramo pare, osē ive sui. Ahe pipeve voi iva oyemboi tupri, aheseve avei osepia Tüpa Espiritu ogüeyise ou iharive apicasu nungar. <sup>17</sup>Iyavei oyeendu ñehesa iva suindar aipo ehi vahe: “Co che Rahir, che rembiaisu. Sese aviharete vichico” ehi.

### Jesús recoãhasa

**4** Ipare Tüpa Espiritu viraso Jesús ava yemboerecuaëhisave ‘tosecoãha Carugar’ ohesa pipe.

<sup>2</sup>Aheve cuarenta ari, cuarenta pïtu ndocarui. Sese ndasiepoi eté oico. <sup>3</sup>Evocoiyase oyemboya Carugar sese secoãha ägua, aipo ehi chupe:

—Tüpa Rahir ité nde recose, co ita sui eyapo pan cüritei —ehi.

<sup>4</sup>Jesús rumo omboyevi chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Ëgüe ehi rumo opacatu Tüpa Ñehen-gagüer reroya pipe ava yuvirecov-era yepi’ ehi —ehiño chupe.

<sup>5</sup>Ichui Carugar viraso Jesús Jerusalén maranehi pipendar tüparo torre apïterve. <sup>6</sup>Aheve aipo ehi chupe:

—Tüpa Rahir ité nde recose, eviapi cohave sui. Esepia niha, icuachiapri pipe: ‘Tüpa oyocuaïra güembigui eta nde rãro ägua.

Ahe nde mopuhara yuvireco que ñepeï ita nde momara rãgüer sui’ ehi —ehi Carugar chupe.

<sup>7</sup>Evocoiyase omboyevi Carugar upe:

—Icuachiapri pipe rumo aipo ehi aveï no: ‘Nderesecoãhai chira nde Yar Tüpa’ ehi —ehi chupe.

<sup>8</sup>Ipare Carugar viraso iri ivitri ivate vahe apïterve secoãha ägua. Aheve aipo opacatu ivi pipendar, tecua guasu pipendar mbahe porañete vahe yemboivate aisa omboyecua chupe, <sup>9</sup>aipo ehi:

—Che rovai ereñenopihase che mboeteisave, co opacatu mbahe nde rembiepia amondora nde mahera —ehi Carugar chupe.

<sup>10</sup>Aipo oyeupe hese:

—Eyepipi che sui cüritei, Carugar —ehi—. Esepia, icuachiapri: ‘Emboeteï nde Yar Tüpa, ahe güeraño tupri aveï

eremboyeroyara’ ehi —ehi Carugar upe.

<sup>11</sup>Ahese Carugar oyepepi ichui. Ipare Tüpa rembiguai yuvirogüeyi Jesús rese hañeco ägua yuvireco.

### Jesús omboipi oporombohe Galilea rupi

<sup>12</sup>Jesús oyanduse Juan roquendasa, oso Galilea ivi rese Nazaret ve. <sup>13</sup>Ndopitai rumo aheve. Osoño Capernaum ve, aheve opita. Ahe tecua ipa Galilea ivii, ivi Zabulón iyavei Neftalí rupi aveï. <sup>14</sup>Na ehi yaviye Tüpa ñehe mombehusar Isaías rembicuachiagüer aipo ehi vahe aracahe:

<sup>15</sup>“Co ava ivi Zabulón pendar, Neftalí pendar,

para guasu ivirindar, iai Jordán rovaindar iyavei Galilea pipendar ndahei vahe judío,

<sup>16</sup>ahe aviye pïtumimbisave yuvirecoï vahe,

osepia ramo vahe tesapesa yuvireco; iyavei mano rãgüer pipe yuvirecoï vahe upe aveï aviye oyecua ramo vahe tesapesa” ehi.

<sup>17</sup>Ahe ari suive Jesús omombehu Tüpa recocuer ava upe: “Pemboasi pe angaïpa; peyevi Tüpa upe. Esepia, cöimi eté Tüpa mborerecuasa secoï” ehi.

### Jesús, “Perio che rupi” ehi irungatu pira mbohasar upe

<sup>18</sup>Coiye ipa Galilea ivii oguatase, Jesús osepia mbïa Simón Pedro serer vahe tivri Andrés reseve. Ahe pira omboha yuvireco. <sup>19</sup>Evocoiyase:

—Pe pira recasar peico. Perio che rupi. Na peye aveïra ava reca ägua cheu nara —ehi chupe.

<sup>20</sup>Aipo he ramoseve, opoi opira mbohasa sui yuvireco, yuviraso supï.

<sup>21</sup>Coi coti catu aipo Jesús osepia ambuae mbïa Santiago tivri Juan reseve, ahe oguapi yuvinoï carite pipe oyesupa

Zebedeo piri; omoingatu opira mbohasa yuvinoi. <sup>22</sup>“Perio che rupi” he ramoseve, opaño oporaviquisa sui opoi yuvireco, oseyaña oyesupa, yuviraso supi.

### Jesús ombohe ava rehii

<sup>23</sup>Jesús evocoyase oguata opacatu Galilea ivi rupi, judío tūparo yacatu rupi oporombohe oico. Aheve ñehesa aviye vahe omombehu Tūpa mborerecuasa re-sendar. Oporombogüera avei opacatu-catu tēi mbaherasisa ava vireco vahe sui. <sup>24</sup>Oyepotase rumo serācua opacatu Siria ivi rupindar upe, ahese güeru opacatu iparaisu vahe yuvireco chupe: imbaheasi vahe, carugar vireco vahe, que nañaca pōrai vahe iyavei ndoguatai vahe. Ahe opa tupri ombogüera.

<sup>25</sup>Ēgüe ehi ava rehii oguata yuvireco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, iai Jordán rovindar avei no.

### Jesús oporombohe ivitrive

**5** Ñepeí ari pipe, ava rehii repi-ase, Jesús oyeupi ivitri rese. Aheve uguapi oí. Ahese semimbohe oyemboya yuvireco sese. <sup>2</sup>Ichui omboipi imbohe aipo ehi:

<sup>3</sup>“Sorivete catura acoi ava oicuse mbahe ipane vahe Tūpa rese ité güeco tupri āgua. Esepia niha, chupe nara ité Tūpa mborerecuasa.

<sup>4</sup>“Sorivete catura acoi ava oyaseho vahe oviharēhisa pipe. Esepia niha, Tūpa omboura vīharetasa chupe coiye.

<sup>5</sup>“Sorivete catura ndaseco asiimi vahe. Esepia, ahe chupe imondosara co ivi imahera curi.

<sup>6</sup>“Sorivete catura ava oipota vahe teco catuprisa Tūpa suindar. Esepia, chupe ité ahe imondosara.

<sup>7</sup>“Sorivete catura acoi ava oporoparaisuereco vahe. Esepia, ahe Tūpa oiparaisuerecora.

<sup>8</sup>“Sorivete catura acoi ava ipihañemoñeta tupri vahe. Esepia niha, ahe osepiaira Tūpa yuvireco curi.

<sup>9</sup>“Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tūpa.

<sup>10</sup>“Sorivete catura acoi ava seco catupri rese imombaraisupri. Esepia, ahe chupe nara Tūpa mborerecuasa.

<sup>11</sup>“Perorivete catura pe acoi ava ñeñe-ñeñe tēise pēu, iyavei pe mombaraisuse, acoi oyapo-yapo tēise güemira-mira tēi pipe mbahe pe rese che recocuer sui tēi yuvireco. <sup>12</sup>Pe rumo peyembovihanora. Esepia, ivave tuvichá vahe porerecosa peipsisira curi. Ēgüe ehi avei niha yipindar evocoi ava ramoi Tūpa ñeñe mombehusareta mombaraisu yuvireco aracahe” ehi.

### Jesús reroyasar aviye yucrí iyavei tesapesa yuvirecoi ava upe

<sup>13</sup>“Co ivi pipe pe aviye yucrí peico opacatu ava upe. Yucrí rumo nasehe irise, ndayaicatui imoehe iri āgua, ndiporusai chietera; imombopasara ava pirunga āgua yuvireco.

<sup>14</sup>“Iyavei pe tesapesa nungar peico opacatu ava upe co ivi pipe inungar que tecua guasu yapopri ivitri rese. Ahe ndayaicatui ñomi āgua.

<sup>15</sup>Iyavei ndayamoendii chira tataendi mbahevriye tēi. Iyacatu rumo yasupi ivate sendave opacatu oi pipendar ava resape āgua. <sup>16</sup>Pe Ēgüe peye aveira pemboyecua ava eta upe pe recocuer aviye vahe. Ipípe sui tomoetei yande Ru Tūpa iva pendar yuvireco” ehi ava rehii upe.

### Jesús oporombohe Moisés porocuita rese

<sup>17</sup>“Aní chira, ‘Co mbia revo oporombohe Tūpa ñeñe mombehusar rembicuachía mboyeroyaēhi āgua iyavei Moisés porocuita cuachiapri



mboyeroyaēhi āgua avei no' peye tēi cheu. Ēgüe ehi rumo che ayu imboaviye āgua. <sup>18</sup>Supi eté co iva, ivi avei yandeu oime vitemiseve, ndipoi chietera que ñepei yepe Moisés porocuita, que ambuae Tūpa ñehe mombehusar rembicuachiagiuer ocañi tēi vaheṛā; ñepei-peī porocuita imombehupri imboaviyesaño itera. <sup>19</sup>Sese acoi ava ndoviroyai vahe que ñepei mborocuitamira viña, ombohe avei ava seroyaēhi āgua, ahe evocoiyase ivi coti catu vahe aveira Tūpa mborerecuasave yuvirecoi. Acoi viroya vahe rumo Tūpa porocuita yuvireco iyavei oporombohe vahe yuvireco sese, ahe evocoiyase Tūpa osecomboivate catura omborerecuasave curi. <sup>20</sup>Iyavei amombehu pēu: acoi pe reco īvi tuprisa ndaheise aviye catu vahe fariseo recocuer sui iyavei ndaheise aviye catu vahe Moisés porocuita rese oporombohe vahe recocuer sui avei, ahesē ndapeiquei chietera Tūpa mborerecuasave" ehi.

### **Jesús oporombohe ñemoiroēhi āgua rese**

<sup>21</sup>"Pe peicua acoi pe ramoī araca-hendar upe aipo ehi vahe: 'Peporoyuca rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirā' ehi. <sup>22</sup>Che rumo aipo ahe pēu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi 'nde ēgüe ere tēi vahe eico' ehi vahe ambuae ava upe, ahe serasosara porandu āgua mborerecuar ivate catu vahe rovai. Acoi ava rumo oñehe marase seroīrosave ambuae ava upe, ahe iyacatu imondosa ité tata guasuve.

<sup>23</sup>"Sese Tūpa upe pe porerecosa reropovēhesave tūparo pipe pemahenduhase ava pe amotarēhimbar rese, <sup>24</sup>peseya rane pe porerecosa

aheve; peyevi rane pe amotarēhimbar upe pēu iñero āgua rese. Acoi peñerose oyeupe, ahesē voi peyevi, tapeicuavēhe pe porerecosa Tūpa upe.

<sup>25</sup>"Iyavei peyeamotarēhise, peñero voi oyeupe peyoepiase. Anise, aviyeter-amo coiye catu tēise pe mombehu tēira pe amotarēhimbar mborerecuar upe pe reraso āgua. Ichui aviyeteramo ahe pe roquenda ucara. <sup>26</sup>Supi eté aipo ahe pēu: Ndapesēi chietera acoi peyem-boepipase voi eté pesēra ichui" ehi.

### **Jesús oporombohe yemboaguasaēhi āgua rese**

<sup>27</sup>"Peicua niha Moisés porocuita yipindar: 'Peaguasai rene ambuae ava rebireco rese' ehi vahe. <sup>28</sup>Che rumo aipo ahe pēu: Acoi ava omahese cuña rese ipotasa pipe, ahe inungar oyapo vahe ité mbahe sese opīha pipe yepi.

<sup>29</sup>"Iyavei inungar que pe resa pe acato cotindar oipota rai ucasa mbahe pēu pe mboangaipa āgua tēi, iya penose ité, pemombo amombri peyesui. Aní pe mondo uca opacatu pe recocuer tata guasuve. <sup>30</sup>Iyavei inungar que pe po pe acato cotindar pe mboangaipa ucasa, iya peyasia ité imombo amombri peyesui. Aní pe mondo uca opacatu pe recocuer tata guasuve" ehi.

### **Jesús oporombohe ava mendasa sui poiēhi āgua rese**

<sup>31</sup>"Iyavei aipo ehi Moisés aracahe: 'Opoi potase que omenda vahe oyesuí, iyacatu cuachiar imondosa poisa resendar mborerecuar rovai yuvireco chupe' ehi. <sup>32</sup>Che rumo aipo ahe pēu: ava opoise güembireco sui, cuña ndoyaviise mbahe, ahesē ombopihañemoñeta tiētera güembireco mboaguasa uca āgua. Iyavei cuimbahe omendase cuña omenda vahecuer rese, oyemboaguasa tēi avei sese" ehi.

### Jesús oporombohe Vu Tūpa rer poru tēlēhi āgua rese

<sup>33</sup>“Iyavei peicua acoi aipo ehi vahe pe ramoi upe aracahe: ‘Pemboaviye itera pemoingatu tuprise Tūpa rer pipe mbahe pemombehu vahe yepi’ ehi. <sup>34</sup>Che rumo, ‘Ndapeñehei chira que mbahe rer pipe, iva rer pipe tēi avei’ ahe pēu. Esepia, ahe niha Tūpa renda; <sup>35</sup>ivi rer pipe tēi avei ndapeñehei chira. Esepia, ahe Tūpa pirunga; Jerusalén rer pipe avei ndapeñehei chira. Esepia, ahe niha mborerecuar ivate catu vahe recua. <sup>36</sup>Pe āca rer pipe avei ndapeñehei chira. Esepia, ndapeicatui chira que ñepepe ha momorochi āgua, imou āgua avei. <sup>37</sup>Sese niha peñehese, ñepepe reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe tēi” ehi.

### Jesús oporombohe yande amotarēhisar upe mbahe tēi mboyeviēhi āgua

<sup>38</sup>“Peicua acoi Moisés porocuita aracahendar aipo ehi vahe: ‘Que ava vinose vahe ambuae ava resa ichui, ahe sesa avei senosesara. Iyavei vinose vahe sāi ichui, sāi avei senosesara’ ehi vahe. <sup>39</sup>Che rumo aipo ahe pēu: Aní chira pemboyevi pēu mbahe tēi aposar upe. Acoi que pe amotarēhisar pe rovapetese yuvireco, ambuae coti pe rova avei pemoporēhiñora chupe. <sup>40</sup>Porandusave pe rerasose pe camisa rerocua āgua yuvireco pe sui, pe saco avei pemondoñora chupe. <sup>41</sup>Ñepepe legua rupi evosii co mbahe rese cheu’ ehise que ava pēu, pe rumo perasoñora ñuvirío legua rupi chupe. <sup>42</sup>Iyavei oporanduse que pe mbahe rese yuvireco pēu, pemondoño avei chupe. Aní chira perecatēhi sese” ehi.

### Pesaisu pe amotarēhimbar

<sup>43</sup>“Iyavei pesendu ñehesa yipindar: ‘Pesepia potai rene pe amotarēhimbar, pe mboripar güeraño pesaisu’ ehi vahe. <sup>44</sup>Che rumo aipo ahe pēu: Pesaisu catu pe amotarēhimbar iyavei peyeroqui pe momara potasar rese. <sup>45</sup>Evocoi nungar apo pipe pe Ru Tūpa iva pendar rahir ité peicora. Ahe niha osesape uca ari ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco pōrai vahe upe avei. <sup>46</sup>Pe raisupar güeraño pesaisu catu tēise, ndapeipisii chietera porerecosa evocoi nungar sui. Esepia niha, ava guarepochi rerocuasar ndipihai vahe guaisupar tēi osaisu yuvireco yepi. <sup>47</sup>Ndahei yande mboripar upe güeraño yayapora ‘avirave’. Esepia, ava ndoicuai vahe avei Tūpa oyapo ‘avirave’ omboripar upe yuvireco yepi. <sup>48</sup>Sese pe recocuer perecora pe Ru Tūpa iva pendar seco catupri vahe nungar” ehi.

### Jesús oporombohe mbahe aviye vahe apo āgua rese

**6**“Tūpa upe mbahe peyapo potase, ‘Tache repia ava yuvireco’ ndapeyei chira. Esepia, ēgüe peyese, ndapeipisii chietera pe Ru Tūpa iva pendar porerecosa. <sup>2</sup>Evocoiyase iparaisu vahe rese peporerecose, ‘Tamombehupa ava upe vichico’ ndapeyei chira inungar ava Tūpa reroyasar angahu tēi yuvireco yepi. Tūparove iyavei ocar rupi mimi omoñehe yuvireco ‘Co ava aviye ité yuvirecoi, tehi angahu yuvireco yandeu’ oya tēi. Supi eté aipo ahe pēu: Ēgüe ehi vahe rumo opa voi oipisii porerecosa co ivi pipe tēi yuvireco. <sup>3</sup>Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña. <sup>4</sup>Pe porerecose catu ava pe repiaēhisa pipe; pe Ru Tūpa niha mbahe ndoyecuai vahe osepia. Ahe om-

boura porerecosa pëu opacatu ava rembiepiave curi” ehi.

### **Jesús oporombohe yerure ãgua rese**

<sup>5</sup>“Acoi peyerurese, peicoi rene acoi ava ‘tosepia che yeruresa yuvireco’ ehi vahe nungar. Esepia, ahe opüha-püha catu tûparo pipe oyerouqui yuvireco cupiha yacatu avei ‘tayande repia angahu ava’ ohesa pipe tõi. Supi eté che aipo ahe pëu: Ëgüe ehi vahe opa voi eté co ivi pipeve tõi oipisi porerecosa yuvireco. <sup>6</sup>Iyacatu rumo pe, peyeroqui potase, peiquera pe rëta pipe peyeoquendara pe ae pe yeroqui ãgua pe Ru Tûpa upe. Evo-coiyase pe Ru Tûpa oicua vahe mbahe pe rembiapo, iporerecora pe rese.

<sup>7</sup>“Iyavei peyeroquise, ndapemboye-  
yevii chira pe ñehe pe poranduse  
mbahe rese Tûpa upe inungar ava  
Tûpa ndoicuai vahe. Ahe omboye-  
yevi oyeruresa ‘Tûpa revo co rupi  
yande mboyeroya voira’ ohesave yu-  
vireco viña. <sup>8</sup>Aní chira inungar tõi peico.  
Esepia, pe Ru Tûpa oicua pe porandu  
renondeve mbahe ipane vahe pëu. <sup>9</sup>Sese  
aipo peyera peyeroqui:

‘Ore Ru Tûpa, ivave ereico vahe, im-  
boeteipri nde rer tasecoi.

<sup>10</sup>Tou nde mborerecuasa oreu.

Tayaposa nde remimbotar co ivi pipe, in-  
ungar ivave yaposa.

<sup>11</sup>Embou ore rembihu ari yacatundar  
oreu co ari pipe.

<sup>12</sup>Iyavei ndeñero ore angaipa rese  
oreu inungar ore oreñero ore  
amotarëhimbar upe.

<sup>13</sup>Ore mboangaipa ucai rene eve; eipeha  
mbahe naporai vahe ore sui’ peyera.

<sup>14</sup>“Esepia, pe amotarëhimbar upe  
peñerose, pe Ru iva pendar avei iñerora  
pëu; <sup>15</sup>ndapeñeroise rumo, ahe avei  
niñeroi chietera pëu” ehi.

### **Jesús oporombohe yecuacusa rese**

<sup>16</sup>“Acoi peyecuacuse, ndapemboye-  
cuai chira pe viharëhisa, inungar acoi  
Tûpa reroyasar angahu tõi yuvireco  
yepi. Esepia, ahe opa oyeerecomeguapa  
tupri yuvireco, ‘Co oyeacuacua vahe, tehi  
ava yande repiasar yuvireco yandeu’  
ohesa pipe tõi. Supi eté aipo ahe pëu:  
Ëgüe ehi vahe opa voi oipisi porerecosa  
ava güepia pipe tõi yuvireco. <sup>17</sup>Pe rumo  
peyecuacuse, peñeaca mondoro tupri-  
peyovai tupri aveira. <sup>18</sup>Evocoyase, ‘Co  
oyecuacu vahe’ ndehi chira ava yuvireco  
pëu. Pe Ru Tûpa, ndayasepiai vahe,  
güeraño oicuara pe yecuacusa. Ahe evo-  
coiyase iporerecora pe rese curi” ehi.

### **Mbahe porañeté vahe oime ivave**

<sup>19</sup>“Ndapemonuha atii chietera mbahe  
pe rembiereco co ivi pipe. Esepia, ahe  
mbahe pe rembiereco mbahe rasoi om-  
boaso ati-ati imocañipa, iyavei sãve-sãve  
tõi opochi ati-ati oapocatusave, imonda  
vahe avei evocoyase imondaño sese  
pëu. <sup>20</sup>Iya peseca catu tecocuer aviye  
vahe ivave nara. Aheve niha ndipoi chira  
co ivi pipendar nungar pe reco mocañi  
ãgua. <sup>21</sup>Esepia, pe mbahe pe rembiereco  
setá catu vahesa rupi-rupi pe pihanë-  
moñeta yepi, yepera que co ivi pipe,  
anise que ivave avei” ehi.

### **Yande resa inungar tataendi yande recocuer uve**

<sup>22</sup>“Iyavei yande resa inungar tataendi  
yande retecuer upe. Evocoyase yande  
resa aviyesa, opacatu yande retecuer upe  
osesape; <sup>23</sup>acoi imarase rumo, opacatu  
yande retecuer pītumimbisave tõi secoi.  
Tesapesa oime vahe yande rese, ahe  
ogüese rumo yande sui, mbahe tõi eté,  
pītumimbi nungar opacatu yande re-  
cocuer upe” ehi.

**Guarepochi pota raisa;  
Tūpa mboyeroyaēhisa**

<sup>24</sup>“Iyavei ndipoi chiera que ava ñu-virío güereciar omboyeroya vahe. Esepia, ñepei oyamotarēhira imboyeroya potaēhisa pipe, ambuae evocoyase osaisu catura imboyeroya pipe. Ēgüe peye avei, ndapeicatui Tūpa mboyeroya guarepochi pota raisa pipe” ehi.

**Tūpa osāro guahireta**

<sup>25</sup>“Iyavei ndapeyemomahenduha guasu ai chira mbahe pe remihura rese pe recove āgua, pe ihu āgua rese, pe turucuarā rese tēi avei no. Esepia, yande recovesa aviye catu vahe tembihu sui, yande retecuer avei aviye catu turucuar sui no. <sup>26</sup>Pesepia vīrai eta oveve vahe: nomahetii vahe, nomonuhai avei, ndoyapocatui avei mbahe yuvireco. Pe Ru Tūpa iva pendar ité niha omoime mbahe itohu. ¡Pe rumo ivate catu vahe ité peico vīrai sui! <sup>27</sup>Ndipoi que ñepei pe pāhu pendar oicatu vahe opihañemoñetasa pipe tēi güecocuer mopucu iri āgua.

<sup>28</sup>“Ndahei chira pe turucuarā rese tēi peyemomahenduha guasu ai. Pemahecia ru mbahe potri caha pipendar rese: ndoporaviquii eté iyavei ndoipiai oturucuarā. <sup>29</sup>Iyavei yepe mborerecuar guasu Salomón vireco setá ombahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. <sup>30</sup>Tūpa niha omboporañete raimi tēi mbahe potri caha pipendar, moviro ari tēi yasepia, ichui sapisapaño horno pipe. ¡Ahe rumo omondo catura turucuar pēu, pe ava nimbahe reroya tuprii vahe! <sup>31</sup>Sese, ‘¿Mbahe pīha yahura, yaihura?’ Iyavei, ¿mbahe pīha yamondera?’ ndapeyei chira pe yemomahenduha guasu aisa pipe. <sup>32</sup>Ava Tūpa reroyasarēhi aipo nungar reseño tēi ipihañemoñeta yu-

vireco yepi. Pe Ru Tūpa iva pendar rumo oicua ité pēu mbahe ipane vahe. <sup>33</sup>Pemahenduha rane Tūpa rese pe recocuer tupri pipe ipovrive mbahe pe yapo āgua semimbotar rupi, ahese omboura opacatu co mbahe ipane vahe pēu. <sup>34</sup>Peyemomahenduha guasa ai eme mbahe peyapo vahe rā rese. Iyacatu rumo ahe ari oyepotase voi, peyemomahenduhara sese. Esepia, ari yacatu rupi oime mbahe pemoinatu vahe rā yepi.

**Aní, “Oyavi mbahe”  
peye voi ambuae upe**

**7** “Ndiyai, ‘Oyavi ité mbahe’ peye voño tēi ambuae ava upe; evocoyase Tūpa, ‘Oyavi mbahe’ ndehi chira pēu. <sup>2</sup>Esepia, inungar pe ambuae ava upe peico, ēgüe ehi aveira niha Tūpa pēu. <sup>3</sup>¡Mahera ambuae ava rembiavimi rese tēi pemahe! ¡Iya rumo peyese rane mbahe tuvichá catu vahe pesepia! <sup>4</sup>Ndiyai pēu, ‘Che toropitívii mbahe nde rembiavi rese’ peye vahe rā chupe. Esepia, ¡pe peyavi guasu catu mbahe ichui! <sup>5</sup>¡Pe Tūpa reroyasar angahu tēi peico vahe! Penose uca rane mbahe pe rembiavi tuvichá catu vahe peyesuí, ahese ramo ambuae ava rembiavi tahimi vahe moingatu peicatura.

<sup>6</sup>“Pemondo eme mbahe maranehi ava cave nungar tēi upe, iyavei ndapemondo chira mbahe porañete vahe ava cuchi nungar tēi upe. Aviyeteramo oyemboyerera mbahe-mbahe tēi apo yuvireco pēu” ehi.

**Peporandu Tūpa upe pēu  
mbahe ipane vahe rese**

<sup>7</sup>“Peporandu mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ēgüe peyera pe yeroquisa pipe Tūpa upe, ahese imbousara pe porandusa pēu. <sup>8</sup>Esepia, acoi oporandu vahe mbahe rese, ahe mbahe oipisira;

acoi mbahe oseca vahe, oyosura, iyavei acoi oyoeriquisa pipe omota vahe oquenda Tūpa upe, chupe imboisara.

<sup>9</sup>“Ndipoi eté revo que ñepei pe pāhu pendar omondo vaheṛā ita tēi guahir upe pan rese oyeupe poranduse. <sup>10</sup>Que pira rese oyeupe poranduse revo, ndomondoi chiveira mboi tēi chupe. <sup>11</sup>Yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar oipota catu mbahe aviye vahe mondo āgua acoi ava mbahe rese oporandu vahe upe!

<sup>12</sup>“Acoi mbahe peipota vahe ambuae ava oyapo vaheṛā pēu, ahe tupri avei peyapora chupe. Ahe niha Moisés porocuita iyavei Tūpa ñehe mombehusareta porombohesa” ehi.

### Oime peri icāhimi vahe ava recocuer upe nara

<sup>13</sup>“Peique oquendipi icāhimi vahe rupi. Esepia, oquendipi guasu iyavei peri guasu cañi tēisave oso vahe. Ahe supi setá catu ava yuviraso; <sup>14</sup>teco apirēhisave oso vahe rumo oquendipi, peri reseve icāhimi. Supi guata āgua yavai eté; moviromi tēi ava oseca yuvireco” ehi.

### Ívira aviye vahe icuasa iha rese

<sup>15</sup>“Coiye yugüerura ava Tūpa Ñehengagüer mombehusar angahu tēi pe pāhuve. Ahe ndoyavii chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evocoi nungar sui. <sup>16</sup>Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ivira sāchi ati vahe sui. <sup>17</sup>Evocoiyase ivira aviye vahe, iha aviye avei; ivira naporai vahe, iha naporai avei no. <sup>18</sup>Esepia, ivira aviye vahe ndovirecoi oha naporai vahe, iyavei ivira naporai

vahe ndovirecoi oha aviye vahe. <sup>19</sup>Sese opacatu ivira iha naporai vahe yasiasa yepi. Ichui imondosapa tatave. <sup>20</sup>Na peyera ava recocuer cua sembiapo rese” ehi.

### Ndahei chira opacatu ava yuviroique Tūpa mborerecuasave

<sup>21</sup>“Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru iva pendar remibotar aposar año tupri rumo yuviroiquera aheve. <sup>22</sup>Ari cañi pipe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo carugar ava sui nde rer pipe, setá poromondiisa oroyapo’ ehi tēira yuvireco cheu. <sup>23</sup>Che rumo, ‘¡Aní, ndopocuai! ¡Pe mbahe tēi peico vahe, peyepipi che sui!’ aheñora aipo nungar upe” ehi.

### Ñuvirío oi apopri

<sup>24</sup>“Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güetarā. <sup>25</sup>Yepe ahe oi upe oyepota tēi ivitu ai, amarusu reseve, ichui oyeapo tēi avei iai chupe, oi rumo ndoviapi eté. Esepia, ita harive ité yaposa. <sup>26</sup>Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriehisa pipe omopuha vahe ivi cuhi harive tēi güetarā. <sup>27</sup>Ípare rumo oyepotase ivitu ai amarusu reseve chupe, ndaracaheimi ahe oi omondurupa” ehi Jesús ava rehii upe.

<sup>28</sup>Iñehe renduse ava rehii, “¿Mara ehi rutei?” ehi tēi yuvireco chupe. <sup>29</sup>Esepia, ndahei Moisés porocuita rese oporombohe vahe nungar; ahe rumo oporombohe güeco pīratasa pipe.

### Jesús ombogüera ava lepra vireco vahe

**8** Ivitri sui ogüeyise Jesús, ava rehii avei yuvirecoi supi. <sup>2</sup>Ahese ava lepra vireco vahe ou, oñenopiha sovai aipo ehi chupe:

—Che Yar, ereipotase, che mbogüerami eve co mbaherasi sui —ehi.

<sup>3</sup>Aipo ihese, Jesús opoco sese aipo ehi:

—Taa, aipota. ¡Ecuera cüritei! —ehi.

Aipo ihe ramoseve, ocuera voi eté.

<sup>4</sup>—Nde cuerasa eremombehu eme ambuae ava upe —ehi—. Nde poyavaño eso, eyemboyecua judío pahi upe. Ipare eicuavêhe nde porrecosa nde cuera agüer resendar Moisés porocuita rupi. Ipipe sui toicua ava nde cuerasa yuvireco —ehi.

### Jesús ombogüera sundao rerecuar remimboacua

<sup>5</sup>Ipare Jesús oguataño, ëgüe ehi tecua Capernaum ve oyepota oso. Aheve oime sundao rerecuar Roma iguar. Ahe ou chupe <sup>6</sup>aipo ehi:

—Che Yar, che remimboacua imbaheasi guasv vupave ou. Ndoguata catui, oiporara tēi ombaheasisa ou —ehi.

<sup>7</sup>—Aviye, cüritei evocoyase asora imbogüera —ehi.

<sup>8</sup>—Aní, che Yar, ndiyai eté che rēta pipe nde reique ägua; iyacatu niha cohapeve ereñeheño tēi icuera ägua. Evocoyase nde ñehe pipe tēi che remimboacua ocuerara. <sup>9</sup>Esepia, che niha serecua vahe avei no, areco avei sundao che voya. Ahe chupe, “Eso peve” ahese, cüritei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

<sup>10</sup>“¡Too!” ehi Jesús aipo oyeupe hese. Ichui aipo ehi oyeupindar ava rehii upe:

—Yepe ahe ndahei vahe judío viña, opacatu Israel recua pipendar rumo ndasepiái eté ava imbahe reroya vahe yuvireco yepi co ava nungar. <sup>11</sup>Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rerecuar. Iyavei opacatu ava ivi rupindar oguapira yuvireco Tüpa mborerecuasave Abraham, Isaac iyavei Jacob piri coiye. <sup>12</sup>Judío eta rumo, oyeupe ñehesa reroyaēhi pipe setá pītumimbisave ocañi tēira yuvireco. Aheve oyaseho tēira yuvireco iyavei oñeaimbotere-tere tēira mbaheasicuer rereco yuvireco —ehi oñehe.

<sup>13</sup>Evocoyase sundao rerecuar upe aipo ehi:

—Eso, nde mbahe reroya pipe yaposa nde remimbotar ndeu —ehi.

Ahe pipeve semimboacua ocuera tupri ité.

### Jesús ombogüera Pedro rembireco si

<sup>14</sup>Ipare Jesús oso Pedro rētave. Aheve osepia Pedro rembireco si sohí iteangase vupave ou. <sup>15</sup>Opocose ipo rese, ahe ramoseve sohí opituhu ichui. Ocuerare, oñarapuha ava rese ohañeco ägua.

### Jesús ombogüera setá ava imbaheasi vahe

<sup>16</sup>Ipare pītu ramose setá carugar vireco vahe ogüeru yuvireco chupe. Jesús rumo ñepeí reseve oñehe pipe tēi omombopa carugar ava rehii sui, iyavei opacatu imbaheasi vahe ombogüera avei no. <sup>17</sup>Ëgüe ehi omboaviye Tüpa ñehe mombehusar Isaías rembicuachiagüer aipo ehi vahe aracahe: “Ahe ae virocua opacatu yande mbaheasisa yande sui iyavei oiporara opacatu mbahe tasi vahe yande rese” ehi.

### Oguata pota tēi vahe ava Jesús rupi yuvireco

<sup>18</sup> Jesús osepiase ava rehii oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so āgua” ehi. <sup>19</sup> Ahese Moisés porocuita rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi —ehi.

<sup>20</sup> Jesús rumo aipo ehi imboyeve chupe:

—Yavaira rumo ndeu. Esepia, vīrai vireco guaiti, iyavei aguara vireco oquesa; che rumo, Ava Riquehir, ndarecoi que che rēta ité che pituhu āgua yepi —ehi.

<sup>21</sup> Ipare ñepe i voya aipo ehi chupe:

—Che Yar, che ru manore voi che nde rupiño ité aicora —ehi.

<sup>22</sup> —Aní, cūrítei voi eyu che rupi —ehi—. Ēgüe tehiño ava secocuer omano vahe nungar, ahe ae toñeñeti yuvireco —ehi chupe.

### Jesús omombituhu ivitu ai, ohitu vahe avei

<sup>23</sup> Ipare Jesús yuviroha güemimbohe reseve yuviraso carite pipe. <sup>24</sup> Ipa pipe yuviraso pucu ramosave Jesús oque ou. Ahese aviyeteramo tēi ivitu ai opūha ipa pipe; i ohitu vahe ndiguayii eté, seni-seni carite oyopi. <sup>25</sup> Evocoyase semimbohe yuviraso voi imomahe:

—¡Ore Yar, yande rerasora mo co carite ipive! ¡Yande pīsiro eve! —ehi yuvireco chupe.

<sup>26</sup> Evocoyase aipo ehi:

—¡Mahera pesiquiye! ¡Ndapeyeroyai eté che rese! —ehi güemimbohe upe.

Ahese oñarapuha aipo ehi itu guasu upe, ivitu ai upe avei no: “Pepituhupa” ehi. Aheseve voi opa tupri opituhu yuvireco.

<sup>27</sup> —¿Mara ehi rutei pīha co? —ehi tēi semimbohe yuvireco chupe—. ¿Mara ehi vahe pīha co ava secoci?

Esepia niha, ivitu, para guasu avei omboyeroya yuvireco no —ehi.

### Jesús omboyepepipa carugar Gadara pendar sui

<sup>28</sup> Jesús oguataño güemimbohe eta reseve oyepota ipa rovai Gadara ivi rese yuviraso. Aheve ñuvirío ava carugar vireco vahe yugüeru sovaichi. Ahe ava tehögüer ruvípa rupi tēi yuvirecoi vahe, iyavei ndiporomboetei vahe yuvireco. Ichui osiquiyepave ava ndoguata potai ahe perí rupi yuvireco yepi. <sup>29</sup> Jesús repia ramosave rumo, oñehe pīrata yuvireco chupe aipo ehi:

—¡Jesús, Tūpa Rahir, eyepepi ore sui! Esepia niha, ndoyepota vītei ari nde ore mombaraisu āgua oreu —ehi tēi yuvireco.

<sup>30</sup> Namombriimi cuchi rehii yuvirecoi ichui. <sup>31</sup> Carugar evocoyase aipo ehi yuvireco chupe:

—Ore mombopaño tēi eve evocoi cuchi rese —ehi.

<sup>32</sup> —Aviye, peso —ehi carugareta upe.

Aipo hese, carugar opa yuvínose ava sui, yuviroique cuchi rehii aviterve. Ipare rumo cuchi ndayaracua iri yuvireco; iivi socuer rupi yuvinoña yuviraso, opa ipa pipe ocañi tēi yuvireco.

<sup>33</sup> Yuvinoña evocoyase cuchi rārosar tecuave yuviraso opacatu mbahe güembiepia mombehu ava upe yuvireco.

<sup>34</sup> Ichui opacatu ava tecua pendar yuvínose atí Jesús upe, “¡Eso cohava sui!” ehi yuvireco chupe.

### Jesús ombogüera ava ndoguatai vahe

**9** Ipare Jesús oha carite pipe osasa iri ipa rovai oso güecua Capernaum ve. <sup>2</sup> Aheve, ava ndoguatai vahe omboyoai seraso imbaheasi vahe riru pipe yu-

vireco chupe. Ahe oicuase co ava yuvirecoi vahe oyese yeroya, aipo ehi imbaheasi vahe upe:

—Che rahir, eyemopoase, che ñero nde angaipa rese ndeu —ehi.

<sup>3</sup>“¿Co mbia oyemboivate ai tēi vahe, Tūpa ñehe nungar pipe tēi oñehe!” ehi Moisés porocuaita rese oporombohe vahe yuvireco chupe. <sup>4</sup>Jesús rumo oicua ipihañemoñetasa, sese aipo ehi chupe:

—¿Mahera pepihañemoñeta rai pe yapisacasa rereco! <sup>5</sup>¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pīha, anise, ‘Epūha, eguata’ hesa tie? <sup>6</sup>Tapeicua ru che, Ava Riquehir, areco mborerecuasa co ivi pipe ava angaipa upe che ñero ãgua —ehi.

Evocoyase aipo ehi imbaheasi vahe upe:

—Epūha, esupi nde rupa seraso nde rē-tave —ehi.

<sup>7</sup>Ahese opūha voi, oso güētave. <sup>8</sup>“¿Too! ¿Mara ehi rutei vo?” ehi ava rehii yuvireco imboeteisave. “Esepia, ahe niha ombou opiratasa ava upe” ehi yuvireco chupe.

### **Jesús, “Erio che rupi” ehi Mateo upe**

<sup>9</sup>Ichui oose Jesús, che repia, che Roma pendar mborerecuar guasu upe guarepochi roerocuaa mesave che rēise. Ipare aipo ehi cheu:

—Erio che rupi —ehi.

Evocoyase apūha, aso voi supi.

<sup>10</sup>Ahe arí pipeve Jesús güemimbohe reseve yuviroique che rētave. Ambocarú setá ambuae ava guarepochi Roma pendar mborerecuar guasu upe monuhasar reseve, ava angaipa viyar yuvirecoi vahe reseve avei. <sup>11</sup>Co nungar repiase, fariseo oporandu semimbohe upe yuvireco:

—¿Mahera ru pe mbohesar ocaru evocoi nungar ava angaipa viyar pāhuve tēi? —ehi seroñrosa pipe yuvireco chupe.

<sup>12</sup>Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopōsano vahe; imbaheasi vaheño rumo oseca yuvireco. <sup>13</sup>Peyapisaca icuachiapri aracahendar aipo ehi vahe rese: ‘Poroparaisuerecosa aipota; ndaipotai mbahe cheu serocuavēhepri tēi’ ehi. Esepia, ndayui ava seco catupri vahe reca, ěgüe ehi rumo ayu ava angaipa viyar reca —ehi Jesús ava eta upe.

### **Yecuacu rese ñehesa**

<sup>14</sup>Ipare Juan Oporoāpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoyase nde remimbohe eta ndoyecuacui yuvireco yepi? —ehi yuvireco chupe.

<sup>15</sup>Ahe rumo omboyeveí ahe ava upe:

—¿Ndiyai eté ichohopri mendasave ndoyembovīhai yuvireco imer oicovese ipāhuve! Oimera rumo arí imer reraso ãgua ichui curi. Ahese ramo oyecuacura yuvireco cute —ehi.

<sup>16</sup>“Ndipoi chietera revo que ava oturucuar cuacua oyapete vahe turucuar ipiasu vahe pipe. Esepia niha, yapetesa ipiasu vahe oichohoño turucuar cuacua imondoro. Ichorosa evocoyase tuvicha catu-catuño ité. <sup>17</sup>Iyavei ndiyai ava uva ricuer piasu oyapocatu siru mbahe pírer cuacua vahe pipe. Ěgüe ehise, mbahe pírer opura viña, ocañi tēira, uva ricuer avei evocoyase ocañi tēi aveira viña no. Acoi uva ricuer ipiasu vahe mbahe pírer ipiasu vahe pipe yapocatupri rumo oyoya ndoyemomaraí yuvireco” ehi.

### **Jairo rayri iyavei cuña Jesús turucuar rese opoco vahe**

<sup>18</sup>Jesús oporombohe vitesese, ou mborerecuar oñenopiha sovai aipo ehi chupe:

—Che rayri mo cūrítei omano pota ité. Yaso, nde eremondose rumo nde po sese oicovera —ehi chupe.



<sup>19</sup>“Aviye” ehi. Evocoyase opūha yu-  
viraso güemimbohe reseve supi. <sup>20</sup>Ahe  
pipeve cuña doce araviter rupi suvi  
ndopai vahe opoco saquicuei coti ituru-  
cuar popi rese. <sup>21</sup>Esepia, ahe aipo ehi  
opiha pipe: “Yepe que iturucuar popi re-  
semi tēi apocora, acuerara rumo” ehi.  
<sup>22</sup>Jesús evocoyase oyemboyere cuña  
rese aipo ehi chupe:

—Che rayri, eyemopase, erecuera  
cūrítei nde yeroyasa pipe —ehi.

Aipo ihe ramoseve, cuña ocuera voi  
eté.

<sup>23</sup>Oyepotase Jesús mborerecuar rē-  
tave, osepia omimbi vahe iyemoingatu-  
pase omano vahe tī āgua, ava yaseho  
atise avei no. <sup>24</sup>Ahese aipo ehi ava oy-  
aseho vahe upe:

—Pesēpa cohave sui. Co cuñatai no-  
manoi; oque tēi ou —ehi.

Ahe ava rumo opucaete atiño seroy-  
aēhisave yuvireco. <sup>25</sup>Ichui opa ava  
omose, ahese oique oi pipe oipopisi  
cuñatai. Evocoyase ahe oñarapuha voi.  
<sup>26</sup>Co sembiapo evocoyase oyandupa voi  
opacatu tecua rupi yuvireco.

### **Jesús ombogüera ñuvirío ava ndasesapisoi vahe**

<sup>27</sup>Acoi osēse evocoi oi sui Jesús, ah-  
ese ñuvirío ndasesapisoi vahe osaquicue  
moña, osapucaí yuvireco chupe aipo ehi:

—¡Jesús, David suindar, ore parai-  
suerecomi tēi eve! —ehi pucu-pucu yu-  
vireco chupe.

<sup>28</sup>Oi pipe seiquese, oyemboya ndas-  
esapisoi vahe yuvireco sese. Ahese Jesús  
oporandu chupe:

—¿Che reroya ité vo pe mbogüera  
āgua rese peye? —ehi.

—Nde reroyasa ité, ore Yar —ehi  
yuvireco.

<sup>29</sup>Aipo oyeupe hese, opoco sesa rese,  
aipo ehi chupe:

—Tayapo pe che reroyasa pipe mbahe  
pēu —ehi.

<sup>30</sup>Aipo ihe ramoseve osareco tupri voi  
yuvireco. Ipare,

—Peicua catu. Peicua ucai rene am-  
buae ava upe —ehi chupe viña.

<sup>31</sup>Ahe rumo ichui oyepepi pare, yu-  
viraso opacatu tecua rupi, “Jesús ore  
mbogüera” ehi-ehiño ité yuvireco.

### **Jesús ombogüera niñehengatui vahe**

<sup>32</sup>Ichiri ramoseve rumo, ambuae  
ava viroyepota ava niñehengatui vahe  
carugar rerecosar Jesús upe yuvireco.

<sup>33</sup>Ichui omosese carugar, iñehengatu  
cute. Sepiase opacatu ava,

—¡Too! —ehi—. ¡Ndasepiasai vahe ité  
co nungar mbahe yande recua pipe yepi!  
—ehi tēi yuvireco.

<sup>34</sup>Fariseo eta rumo aipo ehiño  
yuvireco:

—Carugar rerecuar pīratasa pipe co  
mbia omose carugar ava sui —ehi tupri  
tēi yuvireco chupe viña.

### **Jesús oiparaisuereco ava**

<sup>35</sup>Ichui opacatu tecua rupi Jesús  
oguata oporombohe tūparo yacatu.  
Omombehu tecovesa aviye vahe  
Vu mborerecuasa resendar iyavei  
oporombogüera opacatu-catu tēi  
mbaherasisa sui avei no. <sup>36</sup>Osepiase ava  
rehii, oiparaisuereco yuvireco. Esepia,  
ahe oñemosañō tēi mbahe rasicuer  
pāhuve inungar ovesa ndovirecoi vahe  
guārosar yuvireco <sup>37</sup>Evocoyase aipo  
ehi güemimbohe upe:

—Supi eté mbahe miti imonuhapirā  
setá iteanga; sese oporaviqui vahe rumo  
moviromi tēi. <sup>38</sup>Sese peporandu mbahe  
miti Yar upe, ahe tomondo ava imonuha  
āgua —ehi güemimbohe eta upe.

### **Jesús oiporavo doce tupri apóstol**

**10** Evocoyase, “Perio” ehi Jesús  
doce güemimbohe upe. Chupe  
omondo güeco pīratasa carugar ava sui

imboyepepi āgua iyavei iporombogüera āgua opacatu-catu tēi mbaherasisa sui.

<sup>2</sup>Ahe ava doce tupri apóstol yuvirecoi vahe: yipindar Simón Pedro, ahe tivri Andrés; ambuae Santiago, Zebedeo rahir, ahe tivri Juan; <sup>3</sup>Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo; <sup>4</sup>iyavei Simón, güecua rese secatēhi vahe pāhu pendarer; ipa vahe Judas Iscariote, ahe Jesús omondo vahe yamotarēhimbar upe.

### Jesús oyocuai güemimbohe Vu mborerecuasa mombehu āgua

<sup>5-6</sup>Ipare oyocuai güemimbohe imondo aipo ehi chupe: “Pesora yipindar judío recua rupi. Esepia, inungar ovesa ocañi vahe, ěgüe ehi tēi secocuer yuvireco. Evocoiyase pesoi rene ndahei vahe judío recua rupi iyavei ndapeiquei chira tecua Samaria ve” ehi. <sup>7</sup>“Judío recua rupi pesoseve, ‘Cōimi Tūpa mborerecuasa seci yandeu’ peyera imombehu. <sup>8</sup>Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei carugar pemboyepepi serecosar sui. Esepia niha, peipisi pīratasa ndasepii vahe. Sese peyapoño evocoi mbahe guarepochi pisiēhisa pipe.

<sup>9-10</sup>“Ava oporaviqui pipe sui ocaru yepi. Sese ndaperasoi chira guarepochi peyese. Ndaperasoi chiaveira pe mbahe riru, iyavei ambuae pe turucuar, pe pitaqui; peyesendar güeraño tupri perasora. Pe pococa avei ndaperasoi chira” ehi.

<sup>11</sup>“Iyavei que tecuave peyepotase, peseca rane ava imboyeroyapri. Ahe sētave pepitami ranera. Pemboaviyese pe cuaita, ahese ramo pesora ichui” ehi. <sup>12</sup>“Evocoiyase peique ramoseve oi pipe, peyapora, ‘Avirave, Tūpa tape

rovasa’ peyera chupe. <sup>13</sup>Acoi aviyesee oi pipendar ava pēu, ahe oipisira Tūpa porovasasa; acoi ndahaviyese rumo ava, ndoipisii chira Tūpa porovasasa yuvireco. <sup>14</sup>Acoi ndosendu potaise pe ñehe, ndape pisi potaise avei yuvireco, ahese pesēño ahe oi pipe sui, anise tecua sui. Peipipetera pe pi ivi rātachigüer sui, pesē pecua ichui ‘toipisi Tūpa ñemoirosa yuvireco’ pe yapave. <sup>15</sup>Evocoiyase supi eté ari cañi oyepotase co tecua upe, ivate catura Tūpa ñemoirosa ava Sodoma, Gomorra iguar upendar sui curi” ehi.

### Yamotarēhiprira Jesús reroyasar

<sup>16</sup>“¡Pesendu tupri che ñehe! Che opomondo ovesa nungar ava mbahe mimba oñaro ai vahe nungar pāhuve. Sese peresaeté tuprira peyese mboi nungar, iyavei inungar apicasu seco tupri vahe peicora. <sup>17</sup>Iyavei peicua catu peamotarēhimbar sui. Esepia, mborerecuar rovai pe rerasora iyavei pe nupara otūparo pipe yuvireco, <sup>18</sup>ichui pe reraso aveira mborerecuareta ivate catu vahe rovai yuvireco che recocuer sui tēi, ěgüe peyera peñehe che recocuer rese chupe iyavei ava ndahei vahe judío upe avei. <sup>19</sup>Acoi pe rerasose mborerecuar upe yuvireco, ‘¿Mbahe piha amombehura chupe?’ ndapeyei chira; acoi peñehe potase rumo, Tūpa omondora pe ñehe āgua pēu. <sup>20</sup>Esepia, ndahei chira peyesui tēi peñehe, pe Ru Tūpa Espiritu pemoñehe ucara.

<sup>21</sup>“Ipare rumo ava vivri omondora oamotarēhisar upe ‘toyuca yuvireco’ oya. ěgüe ehi aveira ava guahir upe; tahir avei oyamotarēhira oyesupa yuca uca āgua yuvireco che recocuer rese. <sup>22</sup>Iyavei opacatu ava ndape ambotai chira che recocuer sui tēi yuvireco. Acoi oyemoviracua vaheño rumo ari ipa vahe rupi, ahe ipisiropri yuvirecoira curi. <sup>23</sup>Iyavei acoi pe mañeco tēise ñepe tecuave yuvireco, ahese peyepēpiñora

ichui ambuae tecua pipendar upe che recocuer mombehu āgua. Supi eté Ava Riquehir oura ndapemboaviye vîteiseve pe guatasa judío recua rupi.

<sup>24</sup>“Ñepei yepe niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecur sui. <sup>25</sup>Iyavei semimbohe, ‘Aviye ité’ ehiñora ombohesar osecupitise. Ēgüe ehi aveira mbiguai güerecur upe. Acoi oi yar upe: ‘Carugar rerecur Beelzebú’ ehise, aipo ehi aveira niha oi pipendar upe yuvireco no” ehi.

### ¿Uma sui pīha siquiyesara?

<sup>26</sup>“Sese ndapesiquiyei chira ava pe amotarēhimbar sui. Esepia, yaposa vahe imombehupirēhi cūrteitē, icuasaño itera curi; iyavei mbahe ñomipri, icuasaño aveira no. <sup>27</sup>Acoi che amombehu vahe pītumimbisave pēu, pemombehu ari pipe coiye, iyavei acoi amombehu vahe pēuñomi, perosapucaí pe rēta harive imombehu opacatu ava upe. <sup>28</sup>Iyavei ndapesiquiyei chira acoi ava peyuca potasar sui. Esepia, ndoicatui niha ava hā mocañi āgua yuvireco. Tūpa sui rumo pesiquiye catura. Esepia, ahe oicatu yande reteducer, yande hā reseve imocañi āgua tata guasu pipe” ehi.

<sup>29</sup>“Yamondo niha ñuvirío vīraimi repirā ñepeimi guarepochi yepi. Yande Ru Tūpa ndoipotaise rumo, ndoviapi chietera que ñepeí vīraimi” ehi. <sup>30-31</sup>“Sese pesiquiye eme. Esepia, pe niha ivate catu vahe ité peico opacatu vīrai sui. Supi eté Tūpa niha oicua opacatu ñepeí-peí pe ha retacuer” ehi.

### “Che aicua Jesucristo” ehi vahe opacatu ava rovaque

<sup>32</sup>“Acoi ava ‘che aicua Jesucristo’ ehi vahe opacatu ava rovaque, che avei evocoyase: ‘Co ava che rupindar secoi’

ahera che Ru iva pendar upe. <sup>33</sup>Acoi ava ‘che ndahei Cristo rese aico’ ehi vahe rumo cheu ava rovaque, che avei evocoyase, ‘Ndahei co che rupindar secoi’ ahera che Ru iva pendar upe.

### Jesús reroyasa pipe sui oimera yeamotarēhisa

<sup>34</sup>“Mbahe tupri ai revo güeru co ivi pipe’ ndapeyei chira cheu. Ēgüe ehi rumo che yusa omoime ucara yeamotarēhisa. <sup>35-36</sup>Sese ava oñemu ae oyeamotarēhi-rēhira yuvireco; ava oyesupa oyamotarēhira, iyavei cuña membri osi oyamotarēhira, cuña vovayar oyamotarēhi aveira.

<sup>37</sup>“Iyavei acoi oyesupa tēi osaisu catu vahe che sui, ahe ndiyai eté secoi che voyarā; inungar avei osaisu catu vahe guahir, anise guayri che sui. <sup>38</sup>Iyavei acoi noñemosai vahe mbahe rasicuer upe, inungar-ra curusu rese ovosii vahe ité viña che rupi oguata pipe, ahe chupe ndiyai eté che voya seco āgua. <sup>39</sup>Acoi ava oipisiro pota vahe güecocuer tēi, ahe ocañi tēira; acoi omocañi vahe rumo güecocuer che recocuer rese, ahe oñepisirora” ehi Jesús güemimbohe eta upe.

### Porrecosa resendar ñehesa

<sup>40</sup>“Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar. <sup>41</sup>Acoi ava oipisi tupri vahe ambuae ava Tūpa ñehesa mombehusar secosa rese, ahe oipisi aveira porrecosa inungar tupri. Iyavei acoi ava oipisi tupri vahe ava seco catuprisa rese, ahe oipisi aveira porrecosa inungar tupri. <sup>42</sup>Iyavei acoi omondo vahe que chīhi i sōhisa vahe que ñepeí seco mbegüemi catu vahe toihu che reroyasar seco rese, ahe oipisi aveira Tūpa suindar porrecosa” ehi.

**Juan Oporoāpiramo vahe ovoya omondo Jesús recocuer cua uca āgua**

**11** Opase Jesús oyocuai doce güemimbohe, ahese yuviraso oporombohe Tūpa Ñehengagüer rese judío recua rupi yuvireco.

<sup>2</sup>Ahese Juan Oporoāpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese <sup>3</sup>imboporandu āgua: “¿Nde ité vo Tūpa Rembiporavo aipo sārombrī ereico? anise, ¿oime tie ambuae orosāro vaherā?” ehi yuvireco chupe.

<sup>4</sup>Ipare omboyevi chupe aipo ehi: “Peso, pemombehupa Juan upe mbahe pe rembiepia iyavei pesendu vahe.

<sup>5</sup>‘Ndasesapisoi vahe osareco tupri cūrīteī yuvireco, ipāri-pāri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pīsīrosa resendar ñehesa’ peyera chupe. <sup>6</sup>‘Oviharetera acoi ava oyeroyaño vahe che rese!’ ehi Juan rupindar upe.

<sup>7</sup>Juan rupindar yuviraso pare, Jesús omboipi imombehua ava upe Juan recocuer: “¿Pesepiase Juan recocuer ava porēhisave capiliata ivitu ombova-mbova vahe nungar pīha?

<sup>8</sup>Anise, ¿pesepia tie iturucuar porañete ai vahe iyemboteise? ¡Aní! Ēgüe ehi vahe rumo secoi mborerecuar guasu rētave yepi. <sup>9</sup>Evocoyase pesepiase, ¿‘Ava’ peye vo pe chupe? ¿Tūpa ñehē mombehúsar ité pīha? Taa, ahe ité. Evocoi niha ivate catu vahe Tūpa ñehē mombehúsar sui. <sup>10</sup>Ahe chupe ité Tūpa icuachiapri aracahendar pipe aipo ehi:

‘Che amondora nde renondeve che ñehē mombehúsar nde raperā moingatu āgua’ ehi.

<sup>11</sup>Supi eté ndipoi que ñepeī ava seco ivate catu vahe Juan Oporoāpiramo vahe sui. Yepe ahe ivate catu vahe viña, Tūpa mborerecuasave rumo ava seco mbegüemi catu vahe ivate catu ichui.

<sup>12</sup>“Juan yusa suive tupri Tūpa povri pendar oiporara mbahe tēi yuvireco. Osāha-sāha ava opīratasa pipe imocañi āgua. <sup>13</sup>Opacatu Tūpa ñehē mombehúsar rembicuachía pipe, Moisés porocuita icuachiapri pipe avei imombehusa Juan yusa rupive co Tūpa mborerecuasa resendar. <sup>14</sup>Yepe yavaira seroya āgua pēu viña, Juan rumo, Tūpa ñehē mombehúsar Elías. Ahe imombehupri ou vahe. <sup>15</sup>Acoi ava osendu pota vahe che ñehē, toyapisacaño sese” ehi.

<sup>16</sup>“¿Mbahe rese pīha amboyoyara ava recocuer cūrīteīndar? Esepia, co ava inungar acoi chīhivahe iguayī tēi vahe ocar rupi. Ipare oñehē pucu-pucu omboripar upe yuvireco aipo ehi: <sup>17</sup>‘Oromoñehē tēi mimbī pēu, ndapepivoi eté rumo iyavei orosapucaī tēi sapucaisa viharēhisa resendar pēu, pe rumo ndapeyasehoi eté’ ehi. <sup>18</sup>Esepia, ouse Juan Oporoāpiramo vahe, ahe ndohui tembihu sepīrusu ai vahe iyavei ndoīhui uva ricuer ipīrata vahe, sese, ‘Co mbia carugar víreco vahe oyese’ peye tupri tēi chupe. <sup>19</sup>Coiye che ayu, Ava Riquehir, acarū, aīhu tupri avei. Ipare, ‘Co icaru guasu ai vahe secoi, iihu guasu ai vahe avei’ peye cheu; ‘Ava angaipa viyar mboripar tēi iyavei guarepochi rerochasar mboripar tēi’ peye avei cheu. Acoi ava supi eté víreco vahe Tūpa mbahecuasa, ahe icuasara sembiapo rese yepi” ehi.

**Tecua ndiporeroyai vahe**

<sup>20</sup>Ahese Jesús oñehē pīrata moviro tecua pendar upe. Esepia, aheve acoi oyapo atī catu mbahe poromondiisa viña. Ahe pendar ava rumo ndosecuñaro

potai eté güecocueraí Tüpa upe nara yuvireco. Evocoyase aipo ehi chupe: <sup>21</sup>“¡Peparaisu, ava tecua Corazín pendar! ¡Pe avei peparaisu tecua Betsaida pendar! Esepia, acoi poromondiisa pe pãhuve yapopri, yaposara yipive tecua Tiro, Sidón ve viña, co tecua pendar aracaheve anga omondera turucuar viharêhisa resendar, tanimbu avei omondora oãca rese oangaipa mboasisa pipe yuvireco viña no. <sup>22</sup>Pe rumo peipisira ivate catu vahe Tüpa ñemoirosa ava Tiro, Sidón pendar sui ari cañi pipe coiye. <sup>23</sup>Pe avei no, tecua Capernaum pendar pemoha co ivave pe reco ãgua viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondiisa yapopri vahe pe pãhuve yaposara viña, cūrītei oime vitera ahe tecua viña. <sup>24</sup>Sese, pe peipisira ivate catu Tüpa ñemoirosa ava Sodoma iguar sui ari cañi pipe coiye” ehi.

### **Peyu cheu mbituhusa reca**

<sup>25</sup>Iyavei ahe ari pipe Jesús oyerure: “Che Ru, aviye ndeu. Nde niha iva pendar, ivi pipendar Yar ereico. Esepia, nde ereñomi co ñehesa supi tupri vahe ava imbahecua vai vahe sui; eremboyecua rumo ava seco mbegüemi vahe upe. <sup>26</sup>Ëgüe ere niha mbahe nde remimbotar apo, che Ru” ehi.

<sup>27</sup>“Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoi nungar upe aicua uca tuprira. <sup>28</sup>Peyu cheu opacatu icuerai vahe. Che amondora pe pituhu ãgua. <sup>29-30</sup>Peico che povrive, peyembohe avei che sui. Esepia, che ndache reco asii, iyavei che povrive pe recosa ndayavaimi eté. Ahe se ramo oimera mbituhusa pëu” ehi.

### **Mbituhusa ari pipe Jesús remimbohe oipoho trigo yuvireco**

**12** Mbituhusa ari pipe Jesús yuviraso güemimbohe rese, uguata mbahe miti pãhu rupi. Ahe se semimbohe ndasiepoi. Evocoyase trigo rãhii oipoho-pohomi güemihura yuvireco. <sup>2</sup>Fariseo yuvirecoi vahe osepiase, aipo ehi Jesús upe:

—Esepia nde remimbohe. Oporaviquiño mbituhusa ari pipe yuvireco —ehi yuvireco chupe.

<sup>3</sup>Ahe rumo omboyevi ahe fariseo upe:

—Peicua tēi niha icuachiapri araca-hendar mborerecuar guasu David rembiapogüer resendar ñehesa ondugüer reseve ndasiepoise yuvireco. <sup>4</sup>Ahe niha yuviroique ité tūparo pipe pan imboeteipri Tüpa upendar hu ãgua ondugüer reseve. Ahe chupe acoi ndipotasai ihu ãgua yuvireco viña. Judío pahi yuvirecoi vahe upeño ité niha ipotasa ihu ãgua yepi. <sup>5</sup>¿Ndapeyeroqui vo Moisés porocuaite resendar pipe? Esepia, judío pahi tūparo rese hañecosar ndopituhui eté tūparo pipe yuvireco mbituhusa ari pipe yepi. Ndahei rumo oyemboangaipa ipipe yuvireco. <sup>6</sup>Cūrītei cohava oime ava ivate catu vahe tūparo sui. <sup>7</sup>Evocoyase pe ndapesenducuai eté Tüpa Ñhengagüer aipo ehi vahe: ‘Che aipota peporoparaisuereco, aní chira peropovêhepa porerecosa mbahe mimba tēi cheu’ ehi vahe. Pesenducuae viña, ahese, “Oyavi mbahe” ndapeye voi chira che remimbohe mbahe ndoyavii vahe upe viña. <sup>8</sup>Esepia, Ava Riquehir mbituhusa ari rerecuar ité secoi —ehi fariseo eta upe.

### **Mbia ipo nomii vahe Jesús ombogüera**

<sup>9</sup>Ichui oose Jesús, oique judío tūparove. <sup>10</sup>Aheve oime mbia ipo co cotigüer nomii vahe. Aheve avei fariseo,

“Yaiñhengapo angahu Jesús” ehi yuvireco viña. Sese,

—¿Iyaño pīha mbituhusa ari pipe ava imbogüerasa yepi’ —ehi yuvireco chupe.

<sup>11</sup> Evocoiyase Jesús aipo ehi imboyevi:

—¿Ava vo pe pāhu pendar acoi mbituhusa ari pipe oviapise seimba ovesa ivicuarve ndosivi chira senose viña?

<sup>12</sup> ¡Ava niha asviye catu ovesa sui! Sese iyacatu yande yayapo mbahe aviye vahe mbituhusa ari pipe yepi —ehi.

<sup>13</sup> Ahese aipo ehi aipo mbia upe:

—Eichoho nde yiva —ehi.

Evocoiyase oichohose oyiva, ocuera tupri voi inungar ambuae iyiva. <sup>14</sup> Evocoiyase fariseo opa yuvinose yuviraso oyemoingatu Jesús yuca āgua yuvireco.

### **Yaviye aracahendar imombehupri Jesús recocuer resendar**

<sup>15</sup> Evocoiyase Jesús oicuase fariseo pīhañemoñetasa, osē oso, ava rehii avei yuviraso supi. Setá avei imbaheasi vahe ombogüera, <sup>16</sup> iyavei, “Che mombehui rene ava upe peyé” ehi. <sup>17</sup> Ēgüe ehi yaviyepa Tūpa ñehe mombehugar Isaiás remimombehugüer:

<sup>18</sup> “Co ité che mboyeroyasar che rembiporavo.

Ahe asaisu etepri.

Sese ité ayemboviha.

Amondora che Espiritu chupe.

Ahe omombehu aveira mbahe ihīvi vahe opacatu ava ivi pipendar upe.

<sup>19</sup> Noiñhepeopi-epii chira ava, nasasesasei téi chiveira; iyavei ndosendui chietera ava ñehe ocar rupi.

<sup>20</sup> Iyavei nomopei chietera que ñepei pataviimi oyeapa vahe; nombogüei chiveira tataendī sātachiñomi téi vahe.

Ēgüe ehira mbahe ihīvi vahe pipe opacatu secopipa.

<sup>21</sup> Evocoiyase opacatu tecua pendar ava ndahei vahe judío oyeroyara yuvireco sese’ ehi

Isaiás aracahe.

### **“Jesús vireco carugar pīratasa oyese” ehi tēi ava yuvireco**

<sup>22</sup> Ichui ava ndasesapisoi vahe, noñehi vahe carugar rerecosar viraso Jesús upe yuvireco. Evocoiyase Jesús ombogüera. Ahese osareco, oñehe avei. <sup>23</sup> Evocoiyase opacatu ava oyepihamondiisave aipo ehi yuvireco: “¿Tūpa Rembiporavo David suindar pīha co?” ehi yuvireco chupe.

<sup>24</sup> Osenduse rumo fariseo, “Co mbia carugar rerecuar Beelzebú pīratasa pipe tēi omboyepepi carugar ava sui” ehi yuvireco.

<sup>25</sup> Oicuaño rumo ipīhañemoñetasa. Sese aipo ehi: “Que mborerecuar guasu povri pendar ovava-vavase oyeupe oyeamotarēhisave yuvireco, ahese evocoi mborerecuar pīratasa ocañi tēira. Iyavei que tecua pendar, anise, que ava omu rese ovavase oyeupe, oyoya oyemocañi tēira yuvireco. <sup>26</sup> Ēgüe ehi avei carugar. Esepia, serecuar omboyepepi opovri pendar, ovavara oyeupe yuvireco viña. Evocoiyase ahe oyemocañi tēira yuvireco. <sup>27</sup> Iyavei pe, ‘Beelzebú pīratasa pipe sui tēi omboyepepi carugar ava sui’ peye tēi cheu. Evocoiyase, ¿ava pīratasa pipe vo pe voya eta omboyepepi carugar ava sui yuvireco? Tūpa pīratasa pipese, che avei evocoiyase ayapo evocoi nungar ipīratasa pipe. Pe voya ae omboyecua pe ñehe pe rembiavi yuvireco pēu. <sup>28</sup> Che rumo Tūpa Espiritu pīratasa pipe amboyepepi carugar ava sui. Sese cūrtei pesepia ité Tūpa mborerecuasa.

<sup>29</sup> “Iyavei no, que ava oi que potase ambuae ava ipīrata etepri vahe rētave imbahe rerocua āgua ichui viña, yipindar opa rane itera oñapichi-pichi. Ipape voi opara vírocua imbahe ichui.

<sup>30</sup> “Iyavei acoi ava ndache mboyoyai vahe, ahe che amotarēhimbar yuvirecoi;

acoi ava ndosecai vahe ava cheu nara, ahe omosai tēi yuvireco che sui.

<sup>31</sup>“Sese ava upe oimera ñeroisa opacatu angaipa rese iyavei ñehe mara-mara tēi vahe upe avei. Co catu acoi ñehe-ñehe tēi vahe Tūpa Espiritu upe, ahe chupe ndipoi chietera ñeroisa. <sup>32</sup>Iyavei acoi ava oñehe-ñehe tēi vahe che, Ava Riquehir rese, ahe chupe oimeño ñeroisa; acoi oñehe-ñehe tēi vahe rumo Espiritu amotarēhisave, ahe chupe ndipoi chira ñeroisa co ivi pipe iyavei ivave” ehi Jesús fariseo eta upe.

#### **Ava recocuer icuasa sembiapo rese**

<sup>33</sup>“Emoatiro tupri ivira, ahe iha aviya-  
era; nderemoatiro tupriise ivira, ahe  
evocoyase virecora oha naporai vahe.  
Esepia, ivira icuasa iha rese. <sup>34</sup>¡Evo-  
coiyase pe, mboi nungar tēi peico vahe,  
pe recocuer naporaise, ndapeicatuī chira  
mbahe aviye vahe rese pe ñehe āgua!  
Esepia, pe piha pipe sui tēi osē pe  
ñehe āgua. <sup>35</sup>Iyavei acoi ava aviye vahe  
oñehe tupri opihañemoñeta catuprisa  
pipe; acoi ava recocuer naporai vahe  
rumo, opihañemoñeta raisa pipe tēi  
oñehe. <sup>36</sup>Sese ari cañi pipe opacatu ava  
opara omombehu oñehe-ñehe tēisa Tūpa  
rovai yuvireco. <sup>37</sup>Esepia, pe ñehe aviye  
vahe repri peipisira, pe ñehe naporai  
vahe repri peipisi aveira” ehi Jesús.

#### **Ava eta ndaseco pōrai vahe oporandu poromondiisa rese yuvireco**

<sup>38</sup>Evocoyase fariseo iyavei Moisés  
porocuita rese oporombohe vahe aipo  
ehi yuvireco Jesús upe:

—Porombohesar, ore orosepia pota  
mbahe nde rembiapo poromondiisa nde  
recocuer cua āgua —ehi yuvireco.

<sup>39</sup>Jesús rumo omboyevi ñehe:

—Pe ava ndaseco pōrai vahe,  
ndiporeroyai vahe, peporandu tēi  
poromondiisa tecocuer cua āgua rese.  
Che rumo namboyecuai chira ambuae

poromondiisa; Jonás recocuer rese  
güeraño opomomahenduhara. <sup>40</sup>Esepia,  
inungar Jonás secoi mbosapi ari pira  
guasu aviterve aracahe, ēgüe ehi aveira  
Ava Riquehir mbosapi ari ivivrive tuiara  
omano vahe pāhuve. <sup>41</sup>Evocoyase  
ari cañi pipe ava tecua Nínive pendar  
porandusave omombehura ava  
cūrteindar cañipa āgua. Esepia, Nínive  
pendar niha omboasise oangaipa, oyevi  
Tūpa upe yuvireco Jonás omombehuse  
Tūpa Ñehengagüer chupe. Cūrtei  
rumo oime Jonás sui aviye catu vahe  
pe pāhuve. <sup>42</sup>Iyavei ari cañi pipe  
cuña mborerecur guasu irohi coti  
secua vahe porandusave, omombehura  
cūrteindar ava cañipa āgua. Esepia, ahe  
ou amombri sui Salomón mbahecua  
rendu āgua. Cūrtei rumo oime ivate  
catu vahe Salomón sui —ehi fariseo eta  
upe.

#### **Carugar oyevi iri ava güeco agüerve**

<sup>43</sup>“Iyavei carugar osēse ava sui,  
oguata tēi ivi ipiru vahe rupi opi-  
tuhu āgua reca. Ipore rumo ndoyosu-  
ise, ipihañemoñeta, <sup>44</sup>‘Ayevi irira che  
reco agüerve vicho’ ehi. Aheve oyevise,  
osepia iri secocuer inungar oi ndiporu-  
sai vahe, sahuvapri tupri. <sup>45</sup>Sepiase, oso  
siete carugar naporai catu vahe reca.  
Ichui güeruse, oyoya guasu yuviroique  
co mbia piha pipe. Sese mbahe tēi catu  
ité secocuer yipindar güeco agüer sui.  
Ēgüe ehi aveira ava cūrteindar ndaseco  
pōrai vahe upe” ehi.

#### **Jesús si, tivireta avei**

<sup>46</sup>Jesús oñehe viteseve ava upe, ahese  
ichi, tivireta reseve ocarve yuvinoai.  
Ahe oñehe pota yuvireco chupe. <sup>47</sup>Evo-  
coiyase mbia omombehu Jesús upe:

—Nde si, nde rivireta reseve co ocarve  
yuvinoai. Ahe oñehe pota yuvireco  
nde —ehi.

<sup>48</sup>Ahe rumo,

—¿Ava pīha che si; ava pīha che rivri?  
—ehi ahe mbia upe.

<sup>49</sup> Evocoyase omboyecua opo pipe güemimbohe eta aipo ehi:

—Co che si eta, co che rivireta. <sup>50</sup> Esepia, acoi che Ru iva pendar remimbotar oyapo vahe, ahe che rivri, che reindri iyavei ahe che si yuvirecoi —ehi.

### Mbahe miti sui yembohesa

**13** Ahe ari pipe Jesús osē oi sui oso, oguapi ipa popive oī. <sup>2</sup> Aheve ava oñemonuha atise yuvireco, oha carite pipe oguapi oī, evocoyase opacatu ava opita ipa popi rupi yuvireco. <sup>3</sup> Ahese omboyoya-yoya oporombohesa setá mbahe rese aipo ehi:

“Ñepei mbia osē omaheti oico. <sup>4</sup> Ahe otiapi-apiise mbahe rāhii oso, moviro oiti peri rupi. Vīrai ogüeyise rumo sese, opaño yuvirohu. <sup>5</sup> Iyavei moviro oiti ivi nayanai vahesave ita pāhuve. Sese cūrteimi sorí; <sup>6</sup> ari tasise rumo, opaño ipiru. Esepia, ndasapoi niha. <sup>7</sup> Iyavei ambuae mbahe rāhii oiti yu pāhuve. Ahe yu rumo sorí poyava catu yuvireco ichui. Sese opaño oyopi. <sup>8</sup> Ambuae rumo oiti ivi aviye vahesave, ahe setá iha imonuhasa; ñepei ihí sui osē cién iha, ambuae sui osē sesenta, ambuae sui treinta. <sup>9</sup> Acoi ava osenducua pota vahe che ñehe, toyapisacaño sese” ehi Jesús ava eta upe.

### ¿Mahera pīha co yembohesa imboyoyasa ambuae mbahe rese?

<sup>10</sup> Ichui semimbohe eta oyemboya Jesús rese yuvireco mbahe rese oporandu āgua chupe: “¿Mahera vo eremboyoya-yoya mbahe rese nde porombohesa ava upe yepi?” ehi. <sup>11</sup> Jesús aipo ehi: “Pēu rumo Tūpa oicua uca ité mbahe ndicuasai vahe omborerecuasa resendar; ambuae ava upe rumo ndoicua ucai eté. <sup>12</sup> Esepia, acoi vireco vahe upe, imondosa catura;

acoi ndovirecoi vahe evocoi osenducua raimi vahe serocuasañora ichui. <sup>13</sup> Sese añehese chupe, amboyoya-yoya aipo nungar mbahe yavai vahe ambuae mbahe rese yepi. Esepia, ahe osepia tēi, ndosepiacuai rumo yuvireco iyavei osendu tēi, ndosenducuai avei yuvireco no. <sup>14</sup> Na ehi yaviye Tūpa Ñehengagüer Isaías remimombehu:

‘Pe niha pesendu tēira, ndapeicuai chira rumo; iyavei pesepia tēira, ndapepiacuai chira rumo.

<sup>15</sup> Esepia, evocoi ava eta upe yavai eté ipiha pipe imbahe reroya āgua, ndayapisai eté sendu potaēhisave; ndoyemboesapisoi avei sepia potaēhisave.

Esepia, ndosenducua potai opiha pipe yuvireco cheu oyevi potaēhisave ombogüera āgua’ ehi

Isaías aracahe.

<sup>16</sup> “Pe rumo perorivete ité sepiacuase, pesenducua avei no. <sup>17</sup> Supi eté setá Tūpa ñehe mombehusar iyavei ava seco catupri vahe aracahendar osepia pota tēi mbahe pe rembiepia, ahe rumo ndosepiai eté yuvireco; iyavei osendu pota tēi co pe remiendu, ahe rumo ndosendui avei yuvireco” ehi Jesús güemimbohe eta upe.

### Jesús omombehu yembohesa mbahe miti resendar

<sup>18</sup> Ipare aipo ehi: “Peyapisaca omaheti vahe recocuer rese. <sup>19</sup> Acoi osendu tēi vahe Tūpa Ñehengagüer imborerecuasa resendar, ipare rumo ndosenducuai, ahe inungar acoi mbahe rāhii oviapi vahe peri rupi. Ipare rumo carugar ou chupe. Ahe ipiha pipe osendu vahe Tūpa Ñehengagüer opa tupriño omocañi ichui. <sup>20</sup> Iyavei acoi mbahe rāhii seitipri ita pāhuve, ahe inungar ava recocuer yipiño osendu vahe, oipisi vahe avei vorivetes pipe Tūpa Ñehengagüer. <sup>21</sup> Ipare rumo inungar co mbahe miti ndovirecoi vahe



guapo ovīracua āgua, ēgüe ehi avei evocoi nungar ava oimese mbahe-mbahe tēi Tūpa Ñehengagüer sui chupe, cūrteimi seroyaēhisave oyepepi ichui. <sup>22</sup> Acoi mbahe rāhii seitipri yu pāhuve, ahe inungar ava osendu vahe Tūpa ñehe. Ipare rumo ahe ipihañemoñeta catu saiskusave opacatu ombahe eta co ivi pipendar rese. Ipipe sui oyembopa uca ombahe eta upe. Ichui ndoguata iriño Tūpa Ñehengagüer rupi. Sese secocuer ndaviye iri eté, inungar mbahe miti ndihai vahe. <sup>23</sup> Acoi itisa vahe mbahe rāhii ivi aviye vahe rese, ahe inungar ava osenducua vahe Tūpa Ñehengagüer. Iyavei inungar acoi co mbahe miti ihá iteanga vahe, ēgüe ehi avei ava secocuer aviye vahe inungar ñepepepepe sāhii sui osē que cien iha, sesenta iha, anise que treinta” ehi Jesús güemimbohe eta upe.

### **Trigo pāhuve caha naporai vahe sui yembohesa**

<sup>24</sup> Jesús omombehu iri co ambuae mbahe rese yembohesa oyoya vahe: “Tūpa mborecuasa oyoya tupri ava oivi pipe mbahe rāhii oñoti vahe rese. <sup>25</sup> Opacatu ava queseve rumo oyepota yamotarēhisar, caha tēi rāhii oñoti trigo pāhuve oso. <sup>26</sup> Acoi trigo iha potase, supive avei sorí caha. <sup>27</sup> Evocoiyase oporaviquí vahe yuviraso, omombehu iyar upe aipo ehi yuvireco: ‘Ore rerecuar, ¿ndahei vo acoi mbahe rāhii aviye vahe ereñoti nde ivi pipe? ¿Que sui ru caha sori ipāhuve?’ ehi yuvireco chupe. <sup>28</sup> Iyar rumo aipo ehi chupe: ‘Oime revo que che amotarēhisar’ ehi. Evocoiyase oporaviquí vahe oporandu yuvireco chupe: ‘¿Ndiyai pīha caha tēi orosapohopara ichui viña?’ ehi. <sup>29</sup> Ahe rumo aipo ehi chupe: ‘Aní, aviyeteramo caha rupive pesapoho tiētera trigo’ ehi. <sup>30</sup> Evocoiyase peseya, tocuacuaño oyoya yuvireco. Yaviyese voi mbahe miti, ahese che ayocuaira oporaviquí vahe

caha tēi rane rerocua āgua imboapuha uca sapi. Ipare oyapocatura trigo rāhii che mbahe apocatusave yuvireco’ ehi ivi yar” ehi Jesús.

### **Yembohesa mostaza rāhii suindar**

<sup>31</sup> Jesús omombehu iri co ambuae mbahe rese yembohesa oyoya vahe: “Tūpa povri pendar oyoya tupri mostaza rāhii rese. Ahe mbia oñoti vahe oivi pipe. <sup>32</sup> Supi eté co mostaza rāhii tahimi catu opacatu ambuae mbahe rāhii sui. Ipare rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sāca rese vīrai rehii oyapo guaitirā” ehi oporombohe.

### **Yembohesa pan mboapeposa sui**

<sup>33</sup> Ipare Jesús oporombohe iri ambuae mbahe rese aipo ehi: “Tūpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo āgua yepi” ehi oporombohe.

### **Jesús oiporu oporombohe āgua mbahe rese mboyoyasa yepi**

<sup>34</sup> Jesús omombehu opacatu evocoi nungar mbahe omboyoya-yoyase oporombohesa ambuae mbahe rese opacatu ava upe. <sup>35</sup> Co rumo na ehi Tūpa ñehe mombehusar rembicuachiagüer aviye āgua: “Che añehese, amboyoyara che porombohesa ambuae mbahe rese. Iyavei amombehura Tūpa ivi apo suive mbahe niporēhii vahe” ehi.

### **Jesús omombehu tupri oporombohesa caha tēi resendar**

<sup>36</sup> Ahese Jesús, “Aviye” ehi ava upe. Ipare oi que oi pipe. Aheve semimbohe oyemboyapa yuvireco sese ‘tomombehu trigo pāhuve caha oime vahe resendar yandeu’ oya. <sup>37</sup> Evocoiyase omboyevi chupe: “Acoi ava mbahe rāhii aviye

vahe oñoti vahe, ahe che, Ava Riquehir. <sup>38</sup>Ivi mbahe miti rupa, ahe ava co ivi pipendar. Iyavei mbahe rāhii aviye vahe, ahe ava Tūpa povri pendar; caha naporai vahe, ahe ava carugar suindar yuvirecoi vahe. <sup>39</sup>Acoi yamotarēhimbar, oñoti vahe caha, ahe niha Carugar ité. Evocoiyase ari mbahe miti pohosa, ahe ari cañisa; acoi omonuha vahe mbahe miti, ahe Tūpa rembiguai iva pendar yuvireco. <sup>40</sup>Iyavei inungar acoi caha tēi imonuhapri sapi āgua, ěgüe ehi aveira ari cañi pipe coiye. <sup>41</sup>Evocoiyase che, Ava Riquehir, che rembiguai iva pendar amondora opacatu ava ambuae omboangaipa uca vahe, mbahe-mbahe tēi aposar avei rerocua āgua che povrive yuvirecoi vahe pāhu sui. <sup>42</sup>Ichui omondopara tata guasuve. Aheve oyaseho tēira iyavei ombotere-tere tēira guāi yuvireco. <sup>43</sup>Ahesese voi ava Tūpa reroyasar seco tupri vahe, ari nungar sendi yaira Vu mborerecuasave yuvireco. Que ava osendu pota vahe che ñehe, toyapisacaño sese” ehi.

#### **Mbahe repirusu ñomimbri sui yembohesa**

<sup>44</sup>“Evocoiyase Tūpa mborerecuasa oyoya tupri mbahe sepirusu vahe que ivi pipe ñomipri rese. Ipare ava aviyeteramo tēi oyosura viña. Ahe rumo aheve avei oñomi. Ipare vorivetes pipe opacatu ombahe omondopa co ivi rerocua āgua mbahe sepirusu vahe pota raisa pipe” ehi.

#### **Mbohir sepirusu catu vahe sui yembohesa**

<sup>45</sup>“Iyavei Tūpa mborerecuasa inungar ava mbahe rerocusar oseca vahe mbohir icatupri vahe yepi. <sup>46</sup>Ahe oyosuse mbohir sepi catu vahe, oso opacatu ombahe mondo co sepi catu vahe rerocua āgua.

#### **Pira mbohasa sui yembohesa**

<sup>47</sup>“Iyavei Tūpa mborerecuasa inungar pira mbohasa. Imondopri ipive. Ipare omboha opacatu-catu tēi pira. <sup>48</sup>Acoi savapipose pira mbohasa, vinose ivi ātasave yuvireco. Aheve oiporavo pira aviye vahe oñoñapa ombahe riruve yuvinoi, naporai vahe rumo opaño omombo yuvireco. <sup>49</sup>Ěgüe ehi aveira ari cañi pipe: ahesese Tūpa rembiguai iva pendar yuvinosera opacatu ava ndaseco pōrai vahe mboyepepi āgua ava seco catupri vahe sui. <sup>50</sup>Evocoiyase ava ndaseco pōrai vahe imondosara tata guasuve. Aheve oyaseho tēira iyavei ombotere-tere tēira guāi yuvireco” ehi.

#### **Mbahe ipiasu vahe iyavei ocuacua vahe sui yembohesa**

<sup>51</sup>Evocoiyase oporandu güemimbohe eta upe:  
—¿Pesenducua vo aipo opacatu? — ehi.

—Taa —ehi yuvireco chupe.

<sup>52</sup>Evocoiyase ahe aipo ehi:

—Acoi ava oporombohe vahe porocuita rese, oyembohe vahe avei che Ru mborerecuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi güemimbohe eta upe.

#### **Jesús Nazaret ve secoi**

<sup>53</sup>Oñehe pare, Jesús osē ichui <sup>54</sup>oyepota güecuave oso. Aheve ombohe ava judío tūparo pipe oico. Evocoiyase ahe pendar ava oyepihamondii tēi:

—¿Que pīha co ava oyembohe catu ombahecua āgua? iyavei, ¿mara ehi pīha co mbahe poromondiisa apo? —ehi yuvireco—. <sup>55</sup>¿Ndahei vo acoi carpintero rahir tēi? Ichi niha acoi María, iyavei yuvirecove tivri, ahe Santiago, José, Simón, Judas. <sup>56</sup>Seindri avei niha yuvirecove yande pāhuve. Evocoiyase,

¿que pīha oyembohera viña? —ehi tēi yuvireco chupe.

<sup>57</sup> Ipīpe sui ndoviroyai yuvireco. Ahe rumo aipo ehi chupe:

—Tūpa ñehe mombehúsar niha omboetei opacatu rupi yuvireco yepi. Secua pipendar, sēta pipendar ae rumo nomboetei yuvireco —ehi.

<sup>58</sup> Evocoiyase, ahe ava viroyaēhisa rese, moviro tēi oyapo mbahe poromondiisa ipāhuve.

### Juan Oporoāpiramo vahe mano agüer

**14** Ahe ari rupi Herodes, mborerecuar guasu Galilea pendar, oyandu Jesús rerācua. <sup>2</sup> Evocoiyase aipo ehi opitiviisar upe: “Juan Oporoāpiramo vahe revo ocuerayevi. Sese oyapo poromondiisa ipīrata vahe” ehi.

<sup>3</sup> Esepia niha, yipindar Herodes Juan oipisi, oñapichi carena pipe soquenda āgua vivri Felipe rembireco Herodías sui tēi, <sup>4</sup> “Ndiyai eté nde rembireco nungar ererectora” oyeupe hese.

<sup>5</sup> Herodes oyuca pota Juan viña, osiquiyeño rumo ava eta sui. Esepia, ahe, “Tūpa ñehe mombehúsar secoi” ehi yuvireco chupe. <sup>6</sup> Acoi Herodes haragüer mboeteisa pipe rumo aipo cuña Herodías membrí osē opivoi ava rehii rembiepiave. Herodes upe evocoiyase aviye ai eté. <sup>7</sup> Sese ahe oyemoingatu ñepeí reseve que mbahe oyeupe oporanduse imondo āgua chupe. <sup>8</sup> Evocoiyase ahe cuñatai oyeupe osi remimombehu rupi, aipo ehi Herodes upe:

—Embou Juan Oporoāpiramo vahe āca poratu pipe cheu —ehi.

<sup>9</sup> Aipo ñehesa nombovihai eté Herodes; ndiya iri rumo, “Aní” ohe āgua. Esepia, opacatu ava güemimbori eta rovaque aipo ehi. Sese, “Taperu chupe” ehiño. <sup>10</sup> Ahese oporocuai Juan āca hasia āgua soquendasave. <sup>11</sup> Ipare víraso poratu pipe cuñatai upe yuvireco. Evocoiyase ahe omondo osi upe.

<sup>12</sup> Ahese Juan remimbohe oyepota yugüeru, víraso sete ñoti yuvireco. Ipare yuvíraso Jesús upe imombehu.

### Jesús oyopoi cinco mil cuimbahe

<sup>13</sup> Jesús oyanduse Juan manosa, ahese ahe ae oso ava porēhisave carite pipe. Ava rehii rumo oyanduse, yuvínose voi güecua sui, ivi rupi yuvíraso osupiti secosave yuvireco. <sup>14</sup> Evocoiyase osēse carite pipe sui, osepia ava rehii. Ahese oiparaisuereco ava eta. Sese opa ombogüera imbaheasi vahe serasopri. <sup>15</sup> Evocoiyase caharuse semimbohe oyemboya yuvireco sese aipo ehi:

—Caharú ité moco cute iyavei ndipoi oi co rupivemi vahe. ¿Ndiyai vo eremondopa ava tecua-tecuami rupi, ahe supi tovírocua mbahe güemihura yuvireco? —ehi yuvireco chupe.

<sup>16</sup> —Aní, ndiyai yuvíraso. Pe pemondora mbahe semihura yuvireco —ehiño chupe.

<sup>17</sup> —Poyandepomi tēi rumo pan orovireco iyavei ñuviriomi tēi avei pira —ehiño semimbohe yuvireco chupe.

<sup>18</sup> —Peruño ave cheu —ehi güemimbohe upe.

<sup>19</sup> Ipare aipo ehi ava rehii upe: “Peguapi capihí harive” ehi. Evocoiyase oipisi poyandepomi vahe pan, ñuviriomi vahe pira. Ichui omahese iva rese, “Aviye ndeu, che Ru” ehi. Ichui omombite-mbite pan imondo güemimbohe upe. Ahe evocoiyase omboyaho-yaho ava eta upe semihura yuvireco. <sup>20</sup> Evocoiyase opacatu ava ocaru vahe ihitaropa tēi yuvireco. Ipare semimbohe omboapipopa doce tupri iruova sembihu rumbírer yuvireco. <sup>21</sup> Ahe cuimbahe ocaru vahe retacuer cinco mil. Cuña rumo iyavei chíhivahe ndipapasai yuvireco.

### Jesús oguata i hari rupi

<sup>22</sup> Ipare Jesús, “Peha pe rane carite pipe, pesasa ipa peso che renondeve. ‘Aviye’ tahe rane ava eta upe” ehi güemimbohe upe. <sup>23</sup> “Aviye” ohe pare ava upe, oyeupi oso ahe ae ivitri rese oyerogui ägua. Pütuse chupe, opitaño aheve. <sup>24</sup> Aheseve carite oso pucuse ipa popi sui, ivitu ipirata vahe osovaichi yuvireco. Sese ohitu vahe nambegüembegüei ocua sese. <sup>25</sup> Cöhe potase, oguata i hari rupi oso güemimbohe coti. <sup>26</sup> Semimbohe i hari rupi iguatase, oyembosiquiye yuvireco ichui. Sese,

—¡Ndahei vo evocoi hägüer secoi! — ehi yuvireco chupe.

<sup>27</sup> Güemimbohe upe rumo aipo ehi:

—¡Peyemoviracuaño, che tēi! ¡Pesiquiye eme che sui! —ehi.

<sup>28</sup> —Che Yar —ehi Pedro—. Nde ité ereicose, taguata i hari rupi vicho nde piri —ehi.

<sup>29</sup> —Erio ru —ehi chupe.

Evocoiyase Pedro ogüeyi carite pipe sui, oguata i hari rupi. Osora ipiri viña.

<sup>30</sup> Ivitu pīrata repiase rumo, osiquiye ichui. Oso senise rumo ipive,

—¡Che Yar! ¡Che pīsiromi eve! —ehi.

<sup>31</sup> Ahese cūrteimi voi oipīsi Pedro po rese, aipo ehi chupe:

—¡Chīhi tēi ereyeroya che rese! ¡Mahera ndereyeroya tuprii che rese! —ehi.

<sup>32</sup> Oyuvirohase rumo carite pipe, opituhu voi ivitu. <sup>33</sup> Evocoiyase carite pipe yuvirecoi vahe oñenopiha sovai,

—¡Supi eté catu nde Tūpa Rahir ereico! —ehi yuvireco chupe.

### Jesús ombogüera imbaheasi vahe Genesaret pendar

<sup>34</sup> Osasase ipa, oyepota Genesaret ivi rese yuviraso. <sup>35</sup> Opacatu ahe pendar ava oicuaese Jesús yepota, ahese opacatu tecuami rupi omombehu-mbehu ava upe yuvireco. Evocoiyase viraso imba-

heasi vahe chupe, <sup>36</sup> aipo ehi yuvireco: “Topocomi tēi nde turucuar popi rese yuvireco” ehi; evocoiyase opacatu sese opoco vahe, ocuerapa voi eté yuvireco.

### Porombohesa yande mboangaipa vahe resendar

**15** Oyembohe Jesús rese moviro fariseo iyavei Moisés porocuita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

<sup>2</sup> —¿Mahera vo nde remimbohe ndoguatai yande ramoi aracadendar aracuasa rupi yuvireco? ¿Mahera vo yande porocuita mboaviyeēhisa pipe ndoyepoi ocaru ägua yuvireco yepi? —ehi.

<sup>3</sup> Jesús omboyeve i aipo ehi chupe:

—Pe no, ¡mahera ndapemboyeroyai Tūpa porocuita pe ramoi aracadendar aracuasa rupi tēi pe guata ägua! <sup>4</sup> Esepia, Tūpa aipo ehi: “Pemboyeroyara iyavei peipītiviira pe ru, pe si avei no. Acoi iñehe mara vahe oyesupa upe, ahe tomanoño” ehi aracahe. <sup>5</sup> Pe rumo aipo peye tēi: “Acoi ava aipo ehi vahe vu upe, osi upe avei no: ‘Ndiyai chira mbahe mondo ägua pēu. Esepia, che opacatu mbahe areco vahe imondopri Tūpa upe’ ehise, <sup>6</sup> ahese ndiyai eté ipītivii ägua chupe” peye. Ēgüe peye pe aracua raisa pipe pemocañi Tūpa porocuita peyesui. <sup>7</sup> ¡Pe Tūpa reroyasar angahu tēi peico vahe! Supi tupri ité Tūpa ñehe mombehusar Isaías rembicuachía aracadendar omombehu pe recouer:

<sup>8</sup> ‘Co tecua pendar ava oyuru pipe tēi che mboetei yuvireco; ipihañemoñetasa rumo amombri tēi che sui.

<sup>9</sup> Oyerure tupri tēi yuvireco cheu.

Esepia, iporombohesa ava porocuita tēi’

ehi Isaías rembicuachiagüer pipe aracahe —ehi Jesús imombehu.

<sup>10</sup> Ipare,

—Perio —ehi ava rehii upe—. Peyapisaca, pesenducua tupri che ñehe: <sup>11</sup> mbahe oi que vahe ava yuru rupi nomboangaipa ucai. Mbahe osē vahe ava yuru pipe sui, ahe rumo omboangaipa uca —ehi.

<sup>12</sup> Evocoyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe renduse yuvireco? —ehi.

<sup>13</sup> Ahe rumo aipo ehi chupe:

—Opacatu mbahe miti ndahei vahe che Ru iva pendar remiti, opara sapohosa curi —ehi—. <sup>14</sup> Ëgüe tehiño yuvireco. Esepia, evocoi inungar ndasapisoi vahe viroguata ambuae ava ndasapisoi vahe yuvireco. Ahe evocoyase oyoya voira oviapi ivicuar pipe yuviraso —ehi.

<sup>15</sup> Evocoyase Pedro oporandu chupe aipo ehi:

—Emombehu tupri catu iri mbahe erembehu vahe oreu —ehi.

<sup>16</sup> —¿Ndapesenducua vitei avei catu pe co ñehesa? <sup>17</sup> ¿Ndapeicuai vo opacatu mbahe acoi ava yuru rupi oi que vahe oso yaviterve, ipare osē setecuer sui? <sup>18</sup> Ava pihanemoñetasa sui osē vahe rumo iyuru rupi, ahe ava omboangaipa. <sup>19</sup> Esepia, ava pihanemoñetasa sui osē pihanemoñeta raisa, porapichisa, mendasa sui yemboaguasasa, nomendai vahe yemboaguasa tēisa, mondasa, temira iyavei ava rese ñemoñeta tēisa. <sup>20</sup> Evocoi nungar mbahe rumo omboangaipa ava; ndahei angaipa acoi yande caru renonde yande yepoiēhisa nungar —ehi.

### **Cuña ndahei vahe judía viroya Jesús**

<sup>21</sup> Ichui osē Jesús oso, oguata Tiro ivi rupi, Sidón ivi rupi avei. <sup>22</sup> Cuña cananea, Tiro, Sidón ivi rese secoi vahe oyemboya Jesús rese aipo ehi:

—¿Che Yar, David suindar, che paraisuerecomi eve! ¿Che membri vireco

carugar oyese! —ehi pucu-pucu ou chupe.

<sup>23</sup> Ahe rumo nomboevii eté chupe. Evocoyase semimbohe oyemboya yuvireco sese aipo ehi:

—Emboyepepi co cuña yande sui. Esepia, sãse pucu-pucu ou yande raquicuei —ehi yuvireco chupe.

<sup>24</sup> Evocoyase aipo ehi güemimbohe upe:

—Che Ru Tüpa rumo che mbou Israel recua pendar upeño. Esepia, ahe ovesa ocañi tēi vahe nungar yuvireco —ehi.

<sup>25</sup> Ahe cuña rumo oñenopiha sovai, aipo ehi chupe:

—¿Che Yar, che pītivīimi eve! —ehi.

<sup>26</sup> Ahe rumo aipo ehi chupe:

—Naporai rumo yarocua pan tahir sui cave tohu yamondo vaheṛā —ehi.

<sup>27</sup> —Supi eté, che Yar, cave avei rumo ohuño ité pan rahicuer oviapi vahe yepi —ehiño chupe.

<sup>28</sup> —¿Cuña, tuvichá nde yeroyasa! Aviye, ēgüe tehi eté nde remimbotar rupi —ehi.

Aipo ihe ramoseve, ocuera voi eté imembri.

### **Jesús setá ombogüera ava imbaheasi vahe**

<sup>29</sup> Ichui Jesús osē oso ipa Galilea ivii. Ipare oyeupi ivitri rese oguapi oĩ.

<sup>30</sup> Aheve setá ava oyepota, güeru ati imbaheasi vahe yuvireco chupe: ndipindugüei vahe, ndasapisoi vahe, ipāripāri vahe, niñhengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera.

<sup>31</sup> Ichui ava niñhengatui vahe oñehe; ipāri-pāri vahe ocuera tupri; ndoguatai vahe oguata avei iyavei ndasapisoi vahe osareco yuvireco. Sepiase ava rehii oyepihamondii aipo ehi: “Imboeteipri Israel Tüpa tasecoi” ehi yuvireco.

### Jesús oyopoi cuatro mil cuimbahe

<sup>32</sup> Evocoyase Jesús oñehe güemimbohe upe aipo ehi:

—Iparaisu catu co ava yuvireco cheu. Esepia, mbosapí ari yuvirecoi yande piri iyavei ndipoi eté mbahe semihura. Ndiyai sètave sie porêhi reseve amondo. Aviyeteramo oviroviapi-api tiêtera tieporêhi perí rupi yuvireco viña —ehi.

<sup>33</sup> Evocoyase semimbohe aipo ehi yuvireco chupe:

—¿Que sui pîha orosecara tembilu ava rehii upe nara cohava ava porêhisave viña? —ehi yuvireco.

<sup>34</sup> —¿Mbovi vo pan pereco? —ehi.

—Orovirecomi siete pan iyavei moviromi tēi pirami —ehi semimbohe yuvireco chupe.

<sup>35</sup> Evocoyase, “Peguapi ivi harive” ehi ava rehii upe. <sup>36</sup> Ahese oipisi siete pan, pirami reseve, “Aviye ndeu” ehi Vu upe. Ichui omboyaho-yaho güemimbohe upe imondo. Ahe evocoyase omondopa ava rehii upe yuvireco. <sup>37</sup> Opacatu ava ocaru vahe ihîtaru yuvireco. Ipare semimbohe omboapîpo iri rane sumbirer siete iruova yuvireco. <sup>38</sup> Cuimbahe ocaru vahe retacuer cuatro mil. Cuña, chîhivahe retacuer rumo ndicuasai. <sup>39</sup> Ipare Jesús, “Aviye” ehi ava upe, ahese oha carite pipe oso ivi Magadán rupi.

### Fariseo iyavei saduceo oporandu poromondiisa rese yuvireco

**16** Fariseo iyavei saduceo yuviraso Jesús repia secoãha ãgua yuvireco viña. “Emoporêhi Tûpa suindar nde recosa poromondiisa pipe oreu” ehi yuvireco chupe.

<sup>2</sup> Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, iva rese pîrá iteanga’; <sup>3</sup> iyavei añihivei: ‘Co pipe ari naporai chira. Esepia, iva rese pîra vai anga, pîtu

guasu-guasú avei’ peye. Pe niha peicua mbahe iva resendar tēi oyecua vahe mombehu; ndapeicuai rumo mara oya-pave co poromondiisa cûriteindar ava upe imombehu. <sup>4</sup> Co ava ndaseco pōrai vahe oyepepi vahe Tûpa sui oporandu poromondiisa rese ‘¿Tûpa suindar ité pîha?’ oyapave. Che rumo namboyecuai chira ambuae poromondiisa chupe; acoi poromondiisa Tûpa oyapo Jonás upe güeraño tupri asevara chupe” ehi.

Ichui oseypañu ava rehii oso.

### Fariseo iyavei saduceo porombohesa inungar pan mboapeposa

<sup>5</sup> Evocoyase semimbohe oyepota ipa rovai yuviraso. Pan sui rumo sesarai eté yuvireco. <sup>6</sup> Evocoyase Jesús aipo ehi chupe:

—Peicua catu fariseo iyavei saduceo pan mboapeposa sui —ehi.

<sup>7</sup> Iñehe renduse, semimbohe aipo ehi oyeupe yuvireco:

—¿Ndayarui eté rumo pan! —ehi-ehi tēi oyeupe yuvireco.

<sup>8</sup> Ahe rumo oicua güemimbohe pihañemoñetasa. Sese aipo ehi chupe:

—¿Mahera, “Ndayarui pan” peye! ¿Pe ndapeyeroya tuprii che rese!

<sup>9</sup> ¿Ndapeicua vitei vo che rembiapo? ¿Ndapeyemomahenduha vitei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapîpo sumbirer imonuhase? <sup>10</sup> ¿Ndapeyemomahenduha vitei avei vo acoi amboyaho vahe siete pan ava cuatro mil vahe upe, iyavei mbovi iruova pemboapîpo sumbirer? <sup>11</sup> ¿Too, mara peye rutei pe aipo senducuaëhi! Ndahei mo pan rese ité añehe. Peicua catu fariseo iyavei saduceo pan mboapeposa sui —ehi.

<sup>12</sup> Ahese ramo oicua yuvireco cute, ndahei pan mboapeposa rese ité oñehe, Jesús rumo oñehe fariseo iyavei saduceo eta porombohesa rese tēi.

**Pedro oicua uca Jesús Tūpa  
Rembiporavo secose**

<sup>13</sup> Oyepotase Jesús, oso tecua Cesarea coti Filipo ivi rese, aheve oporandu güemimbohe upe aipo ehi:

—¿Mara ehi vo ava oñeche yuvireco che rese, Ava Riquehir che recose? — ehi.

<sup>14</sup> Semimbohe evocoyase aipo ehi yuvireco chupe:

—Amove ava: “Juan Oporoãpiramo vahe” ehi yuvireco ndeu; ambuae aipo ehi yuvireco: “Elías”; ambuae ava aipo ehi avei yuvireco: “Jeremías”; anise ambuae ava, “Tūpa ñehe mombehúsar mboetasá” ehi yuvireco ndeu —ehi.

<sup>15</sup> —Pe no, ¿‘Ava co secoi’ peye ru pe cheu no? —ehi güemimbohe upe.

<sup>16</sup> —Nde niha Tūpa supi eté vahe Rembiporavo imombepuri; Tahír ité ereico —ehi Simón Pedro.

<sup>17</sup> —Nde sovasapri ereico Simón, Jonás rahír. Esepia, ndahei ava tēi omboyecua co mbahe ndeu, che Ru iva pendar teieté omboyecua ndeu —ehi—.

<sup>18</sup> Nde Pedro ereico, co ita guasu harive amopuhara che tūparoguã. Ñepeí yepe manosa ndosecoreroyii chietera opíratasa pipe. <sup>19</sup> Evocoyase che amondo Tūpa mborerecuasa resendar mboisa ndeu; acoi, “Aviye” erese que mbahe uve co ivi pipe, ěgüe ehi aveira ivave; iyavei, “Aní” erese que mbahe uve co ivi pipe, ěgüe ehi aveira ivave —ehi.

<sup>20</sup> Ipare Jesús aipo ehi güemimbohe upe: “Co Tūpa Rembiporavo Poropĩsirosar’ peye eme ava upe cheu” ehi.

**Jesús omombehu omano āgua**

<sup>21</sup> Ichuive tupri Jesús omboipi imombehu güemimbohe upe oico: “Iya niha cheu che so āgua tecua guasu Jerusalén ve. Aheve judío rerecuar, pahi

rerecuar ivate catu vahe iyavei Moisés porocuaita rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari pipe acuerayevira” ehi. <sup>22</sup> Pedro rumo viraso co cotimi chupe oñehengata āgua:

—¿Tūpa ndoipotai eté evocoi nungar nde reco āgua, che Yar! ¡Ndipoi chietera mbahe ndeu! —ehi Pedro chupe viña.

<sup>23</sup> —¿Esiri che sui, Carugar! —ehi Pedro upe—. Nde che reiti pota eve mbahe tēi pipe. Esepia, nandepihañemoñetai mbahe Tūpa upendar rese, ava nungar tēi nde pihañemoñeta eico —ehi.

<sup>24</sup> Ipare aipo ehi güemimbohe upe:

—Acoi oguata pota vahe che rupi, tasesarai mbahe güemimbotar aposa sui iyavei inungar-ra curusu rese ovosiira viña, toyemoingatu voi che recocuer rese oparaisu āgua iyavei toguata tupri che rupi. <sup>25</sup> Esepia, acoi ava güetecuer tēi raisupar, ocañi tēi etera; acoi ava omocañi tēi vahe rumo güetecuer che recocuer rese, ahe oñepisirora. <sup>26</sup> Esepia, ¿aviye ai angahu piha ava upe opacatu mbahe co ivi pipendar pisi āgua, ahe ae tēi omocañise güecocuer yuvireco viña? ¿Mboví piha omondora ava güecocuer repirā viña? <sup>27</sup> Esepia che, Ava Riquehir, ahevira che Ru reco píratasa pipe che rembiguai iva pendar reseve curi. Che evocoyase aicua ñepeí-peí ava rembiapo agüer rupi chupe. <sup>28</sup> Supi eté oimera amove cohava ava nomano vitei chivaherā, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

**Jesús ñecuñaro agüer**

**17** Seis ari pare Jesús viraso Pedro, Santiago, tivri Juan reseve co coti ivitri ivate vahesave oyeupi. <sup>2</sup> Aheve, aviyeteramo tēi oñecuñaro güemimbohe rovai. Evocoyase sendi sova inungar ari,

iturucuar morochí, sendi avei. <sup>3</sup>Aheseve voi oyemboyecua Moisés, Elías reseve yuvireco chupe. Ahe oñemoñeta oyeupe yuvinoha. <sup>4</sup>Ahese Pedro aipo ehi chupe:

—Che Yar, ¡aviye ai eté cohave yaico! Ereipotase, ayapora mbosapi teyupami: ñepeí ndeu nara, ambuae Moisés upe, ambuae evocoiyase Elías upe nara —ehi.

<sup>5</sup>Aviyeteramo tēi iva quiha rese osesapé ogüeyi ou oyopipa tupri ité. Ipáhuve oyeendu ñehesa aipo ehi: “Co che Rahir, che rembiaisu. Che mboviharete; peyapisaca catu ñehe rese” ehi vahe.

<sup>6</sup>Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui. <sup>7</sup>Ahese oyemboya oso güemimbohe rese, oñatoi aipo ehi chupe:

—Pepüha; pesiquiyei rene —ehi.

<sup>8</sup>Evocoiyase omahe yuvireco sese, ahese ahe güeraño osepia imoha yuvireco.

<sup>9</sup>Ipare yuvirogüeyi ivitri sui aipo ehi evocoi mbosapi güemimbohe upe:

—Ndapemombehui chietera que ñepeí ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

<sup>10</sup>Evocoiyase semimbohe oporandu yuvireco:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

<sup>11</sup>Evocoiyase omboyevi güemimbohe upe aipo ehi:

—Elías rane ité niha oura opacatu mbahe moingatu água curi. <sup>12</sup>Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Ëgüe ahe aveira niha cheparaisura ahe ava povrive vichico —ehi.

<sup>13</sup>Evocoiyase semimbohe osenducua ramo ñehe yuvireco. Ëgüe ehi Jesús oñehe Juan Oporoãpiramo vahe rese.

### Jesús ombogüera chíhivahe carugar rerecosar

<sup>14</sup>Viroyepota Jesús güemimbohe ava rehiisave seraso. Aheve mbia oyemboya oso sese, oñenopiha sovai aipo ehi chupe:

<sup>15</sup>—Che Yar, ereiparaisuerecomi tēira che rahir cheu viña. Esepia, ahe ipiha mbaheasi vahe, oyemombaraisú iteanga. Setá yupagüer oviapi tatave, ive avei no.

<sup>16</sup>Sese aru tēi nde remimbohe upe. Nombogüera catui rumo yuvireco —ehi.

<sup>17</sup>—¡Too, ndapeyeroya tupri viteí eté che rese! ¡Co coti tēi vite pe pihañemoñetasa! ¡Mbovi rupi rutei vo aico vitera pe páhuve che ñemosasa pipe! Peru evocoi chíhivahe cheu —ehi.

<sup>18</sup>Ahese oñehe pírata carugar upe chíhivahe sui imose. Aheseve ocuera tupri voi eté.

<sup>19</sup>Ipare semimbohe oporandu co cotimi yuvireco chupe:

—¿Mahera piha ndoromose catui eté carugar ichui? —ehi yuvireco.

<sup>20</sup>—Esepia, ndapeyeroya tuprii Tüpa rese. Supi eté sese pe yeroyasa, yepe ndoyavii chira mostaza ráhii tahimi vahe viña, aipo peyera co ivitri upe: ‘Es-iri, eso coi coti’ peyera. Evocoiyase ivitri osiriño itera. Ahese ndapemboavaimi chira mbahe. <sup>21</sup>Evocoi nungar carugar imosesa yayerurese yande yecuacusa pipe —ehi.

### Jesús omombehu iri omano água

<sup>22</sup>Jesús oguata vitesese Galilea ivi rupi, aipo ehi güemimbohe upe oico:

—Che, Ava Riquehir, imondopri aicora che amotarëhimbar povrive. <sup>23</sup>Che yuca aveira yuvireco. Acuerayevira rumo imombosapisa ari pipe —ehi.

Osenduse semimbohe aipo ihe, ndovihai tēi yuvireco.



**Jesús omondo guarepochi tūparo uve nara oyeupe oporandu vahe upe**

<sup>24</sup>Oyepotase Jesús güemimbohe reseve tecua Capernaum ve, aheve guarepochi rerocuasar tūparo upe nara yuviraso Pedro upe, oporandu yuvireco chupe:

—¿Supi eté pe rerecuar ndomondo guarepochi tūparo upe nara? —ehi.

<sup>25</sup>—Omboepi niha —ehi Pedro chupe.

Evocoyase oiquese Pedro oi pipe, aheve Jesús rane oñehe chupe aipo ehi:

—¿Mara ehi nde pihañemoñeta, Simón? ¿Ava sui vo virocua guarepochi mborerecuar guasu co ivi pipe yepi? ¿Omu sui pīha, ambuae ava sui tie? —ehi.

<sup>26</sup>Pedro evocoyase omboyeve chupe:

—Ambuae ava sui —ehi.

—¡Taa! —ehi—. Evocoyase mborerecuar povri pendar nomboepii chira yuvireco —ehi—. <sup>27</sup>Guarepochi rerocuasar moñemoiroñehi āgua rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepe guarepochi. Ahe eraso chupe. Ipipe iyacatura imboepi āgua yandeu —ehi Jesús Pedro upe.

**¿Ava vo seco ivate catu vahe?**

**18** Ahe arí pipeve semimbohe oyemboya Jesús rese yuvireco mbahe rese oporandu āgua chupe:

—¿Uma vo seco ivate catu vahe Tūpa mborerecuasa pipendar? —ehi.

<sup>2</sup>Evocoyase Jesús: “Erio” ehi ñepe chihivahemi upe, omondo güemimbohe pāhuve imoha, <sup>3</sup>aipo ehi:

—Supi eté, acoi ndapeñecuñaroise iyavei ndapeicoise chihivahemi nungar, ahese ndapeiquei chira Tūpa mborerecuasa pipe. <sup>4</sup>Acoi oñemomini vahe rumo inungar co chihivahemi, evocoi nungar seco ivate catura Tūpa mborerecuasave. <sup>5</sup>Acoi ava oipisi vahe co chihivahemi

nungar che rer pipe sereco, che ité che pisi yuvireco —ehi.

**Iparaisu itera ava oporomboangaipa uca vahe**

<sup>6</sup>“Acoi que ava rumo omboangaipa uca vahe co chihivahemi nungar che reroyasar, iyacatu evocoi nungar ava ñapichisa ita guasu iyesho rese para guasu pipe imombo āgua. <sup>7</sup>¡Iparaisu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroātoisa yepi, ¡ahe imboangaipa ucasar rumo iparaisu itera!

<sup>8</sup>“Sese inungar pe po, anise que pe pi avei pemboangaipa uca vahe, peyasia, pemombora amombri peyesui viña. Esepia, aviye catu peiquera tecove apirēhisave ñepe pe pi, pe po rese, peso rāgüer sui tata guasu apirēhisave ñuvirío pe po, que ñuvirío pe pi reseve. <sup>9</sup>Iyavei pe resa pe mboangaipa ucase, penose, pemombo amombri peyesui. Esepia niha, aviye catu peiquera ñepeimi pe resa rese tecove apirēhisave, ñuvirío pe resa rese tata guasu apirēhisave pe reique rāgüer sui.

**Porombohesa ovesa ocañi tēi vahe resendar**

<sup>10</sup>“Peroñroi rene que ñepe chihivahemi che reroyasar. Esepia, ivave sembiguai che Ru pirindar ité yuvirecoi yepi” ehi. <sup>11</sup>“Che niha, Ava Riquehir, ayu ava ocañi tēi vahe pīsiro āgua.

<sup>12</sup>“¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepe ichui viña, evocoyase oseya ranera noventa y nueve tēi vahe ovesa ivitri rese. Oyevira ocañi vahe reca oso. <sup>13</sup>Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui. <sup>14</sup>Ēgüe ehi avei che Ru ivave secoi vahe, ndoipotai eté que ñepe ava

che reroyasar chíhivahemi nungar cañi ãgua” ehi.

### Porombohesa yande ñero ãgua rese

<sup>15</sup>“Acoi nde mboetasa Tüpa reroyasar oyapose que mbahe tēi ndeu, eresora nde ae, eñehe mbahe ndeu oyavi vahe rese chupe. Nde ñehe viroyase, ahese peñero oyeupe cute. <sup>16</sup>Nande reroyaise rumo, ahese ereñehera ñepei, anise ñuvirío ava upe nde pítivii ãgua rese. Ahe avei tosendu pe ñehe. Ahese oimera que ñuvirío, anise mbosapí sendusar. <sup>17</sup>Acoi ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoyase Tüpa ndoicuai vahe nungar pereco iyavei inungar mbahe-mbahe tēi aposar, ãgüe peye sereco” ehi.

<sup>18</sup>“Supi eté acoi, ‘Aviye’ peyese que mbahe upe co ivi pipe; ãgüe ehi aveira ivave. Iyavei co ivi pipe, ‘Aní’ peyese que mbahe upe, ãgüe ehi aveira ivave.

<sup>19</sup>“Iyavei co amombehu potami avei pēu: Acoi ñuvirío co ivi pipe pe pihañemoñetasa oyoya tuprise que mbahe rese peporandu ãgua pe yeruresa pipe, evocoyase che Ru iva pendar omondora pe porandusa pēu. <sup>20</sup>Esepia, acoi ava ñuvirío, que mbosapí oñemonuhase che rer pipe yuvireco, aheve che aico ipāhuvē” ehi.

<sup>21</sup>Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tēi cheu oyapose? ¿Siete yupagüer rupi pīha? —ehi.

<sup>22</sup>—¡Aní! —ehi—. ¡Setenta rupi siete oyupagüer! —ehi Pedro upe.

### Yembohesa ava niñero potai vahe resendar

<sup>23</sup>“Tüpa mborerecuasa inungar mborerecuar guasu omoingatu pota vahe güembigui revesa chupe. <sup>24</sup>Evocoyase omboipi imoingatu

ãgua, ahese ipítiviisar güeru ireve ati catu vahe guarepochi rese chupe. <sup>25</sup>Ahe rumo ndovirecoi imboepi ãgua. Sese co mborerecuar oyocuai opítiviisar aipo ehi: ‘Timondopasa co che rembiguai sembireco reseve, tahir iyavei opacatu mbahe vireco vahe reseve irevesa mboepipa ãgua cheu’ ehi. <sup>26</sup>Evocoyase sembiguai oñenopiha sovai aipo ehi chupe: ‘¡Too! Che rerecuar, eñemosañomi tēi cheu. Opara niha amboepi ndeu’ ehi chupe. <sup>27</sup>Ahese oiparaisuereco, opoi irevesa sui.

<sup>28</sup>“Aheseve voi rumo sembiguai osēse, osepia ambuae ondugüer oyeupe ndaseta tuprii vahe ireve. Ahe chupe aipo ehi iyeseho pisi: ‘¡Emboepipa acoi nde revesa cheu!’ ehi. <sup>29</sup>‘¡Aní!’ ehi oñenopiha oso sovai, ‘Eñemosañomi tēi cheu’ ehi, ‘amboepipara niha acoi che revesa ndeu’ ehi. <sup>30</sup>Niñero potai eté rumo. ‘Tomboepipa rane ité orevesa cheu’ ehi soquenda uca. <sup>31</sup>Osepia rumo ambuae imboetasa, tasí iteanga ipiha pipe. Ahese yuviraso omombehu güerecuar uve opacatu sembiapocuer yuvireco. <sup>32</sup>Evocoyase ahe serecuar güeru uca aipo ehi chupe: ‘¡Mbahe tēi eté nde rembiapo! Che apoiño opacatu nde revesa sui. Esepia, ereyemombaraisu catumi ereporandu cheu. <sup>33</sup>¡Ndiyai vo nde avei ereiparaisuereco nde mboetasa viña, inungar che oroparaisuereco!’ ehi. <sup>34</sup>Ichui serecuar oñemoirosave oyocuai imombaraisu ãgua ‘tomboepipa rane ité orevesa cheu’ oyapave.

<sup>35</sup>“Indó, evocoyase ãgüe ehi aveira che Ru iva pendar pēu ndapeñeroise ité peyeupe” ehi Jesús güemimbohe upe.

### Jesús oporombohe mendasa sui poiēhi ãgua

**19** Ipare Jesús osē Galilea sui, oso Judea ivi rupi ari sēsa coti iai Jordán rovai. <sup>2</sup>Ava rehii yuviraso

saquicuei. Aheve setá imbaheasi vahe ombogüera.

<sup>3</sup> Evocoiyase oyemboya fariseo Jesús rese yuvireco; secoãhasave oporandu yuvireco chupe:

—¿Aviye pîha opoi cuimbahe güembireco sui que mbahe tēi oyapose? — aipo ehi yuvireco chupe.

<sup>4</sup> Ahe rumo omboyeví fariseo upe:

—¿Ndapesenducuaimi vo ñehesa icuachiapri pipe peyeroquise: ‘Yipindar yande Aposar oyapo cuimbahe, cuña avei’ ehi? <sup>5</sup> Iyavei aipo ehi: ‘Sese niha cuimbahe omendase, oyepepira oyesupa sui güembireco rese ité yuvirecoi água. Evocoiyase ñuvirío yuvirecoira ñepeí ava nungar’ ehi. <sup>6</sup> Sese ndahe iri ñuvirío, ñepeí vahe ité yuvirecoira. Evocoiyase ava Tüpa omomenda vahe oyese, ndiyai ava tēi omboyepipi yuvireco oyesui —ehi.

<sup>7</sup> Evocoiyase fariseo oporandu yuvireco chupe:

—¿Mahera ru oyocuai Moisés cuimbahe omondo vaheṛá güembireco upe cuachiar poisa resendar opoi água ichui? —ehi.

<sup>8</sup> —Pe poreroyaēhisa pipe niha Moisés ēgüe ehi pēu. Yipisuive ité rumo Tüpa ndoipotai oyesui opoi água yuvireco. <sup>9</sup> Esepia, acoi opoi vahe güembireco mbahe ndoyavii vahe sui omendase ambuae cuña rese, ahe oyemboaguasa tēi vahe —ehi fariseo upe.

<sup>10</sup> Ipare semimbohe aipo ehi yuvireco chupe:

—Ēgüe ehise cuimbahe güembireco rese, evocoiyase aviye catu ndayamendai chira —ehi.

<sup>11</sup> —Ndahei chira rumo opacatu osenducua che aipo ahe vahe yuvireco. Tüpa ombou vahe sembiaporá, ahe güeraño osenducua yuvireco —ehi güemimbohe upe—. <sup>12</sup> Esepia, oime pihãñemoñetasa ava mendaēhi água: amove ohasa suive ndatahii vahe, ambuae nom-

boahi ucai ava yuvireco, ambuae evocoiyase nimendasei. Esepia, ahe oporaviqui pota Tüpa mborerecuasa reseño ité. Acoi oicatu vahe co ñehesa reroya água, toviroyaño —ehi.

### Jesús osovasa chíhivahe

<sup>13</sup> Ipare ahe pendar güeru moviro chíhivahe Jesús upe yuvireco ‘tomondo opo iharive; toyerure avei sese no’ oyapave; semimbohe rumo, “¿Mahera vo peruño tēi chíhivahe?” ehiño serusar upe yuvireco. <sup>14</sup> Jesús rumo aipo ehi:

—¿Mahera ndapeipotai iyu água! Toyugüeruño chíhivahe cheu. Esepia, co chíhivahe nungar ava yuviroiquera che Ru povrive —ehi.

<sup>15</sup> Ipare omondo opo chíhivahe harive osovasa. Ichui osē oso.

### Mbia chíhivahe imbahe eta vahe omoñeta Jesús

<sup>16</sup> Mbia chíhivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirēhi vahe rereco água? —ehi.

<sup>17</sup> —¿Mahera ereporandu cheu mbahe aviye vahe rese! —ehi—. Nepeño ité aviye vahe oime. Erereco potase rumo tecovesa apirēhi vahe, emboyeroya mborocuita —ehi.

<sup>18</sup> —¿Uma vo aipo mborocuita? —ehi.

Ahese omboyeví chupe:

—‘Ndereporoyucaí chira, nandeaguasai chira, nandemondai chira, nanderemirai chiaveira ambuae ava rese, <sup>19</sup> eremboyeroyara nde ru, nde si avei, eresaísura ambuae ava nde yeaisu nungar eico’ ehi icuachiapri pipe —ehi mbahe yar upe.

<sup>20</sup> —Co rumo mborocuita opacatu amboaviye ité yepi. ¿Mbahe vo evocoiyase ipane vite che ayapo vaheṛá? —ehi.

<sup>21</sup>—Ereipotase mbahe tupri pipe nde reco āgua, emondopa rane nde mbahe; ahe sepri evocoyase eremondora ava iparaisu vahe upe. Ichui ererectora mbahe aviye vahe ivave. Ipare ereguatarā che rupi —ehi chupe.

<sup>22</sup>Aipo oyeupe hese rumo, ahe mbia oyepepiño ichui oviharēhisave oso. Espia, mbahe yar ité secoi.

<sup>23</sup>Evocoyase aipo ehi güemimbohe upe:

—Supi eté yavai eteanga imbahe eta vahe upe oi que vahe rā che Ru mborerecuasave. <sup>24</sup>Aipo ahe iri: Yavai rai camello upe yucuar rupi seique āgua; ava imbahe eta vahe upe rumo yavai catu che Ru mborerecuasave seique āgua —ehi.

<sup>25</sup>Aipo iñehesa renduse, semimbohe oyepehamondii aipo ehi:

—¡Ava angahu piña evocoyase oñepisirora yuvireco viña! —ehi yuvireco.

<sup>26</sup>Omahe güemimbohe rese, aipo ehi:

—Ava tēi upe yavai aipo nungar mbahe apo. Tūpa upe rumo mbahe opacatú ndayavaimi eté —ehi.

<sup>27</sup>Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata āgua. ¿Mbahe evocoyase oimera oreu? —ehi.

<sup>28</sup>—Oime itera niha mbahe pēu. Espia, acoi ari oyepotase opacatu mbahe recuñaro āgua, ahese che, Ava Riquehír, aguapira che rendave che mborerecu guasusave. Pe avei, che rupindar, peguapira doce tenda harive. Ahese opacatu judío acoi doce imar Israel suindar recocuer rese peporandura curi.

<sup>29</sup>Acoi opacatu ava oseya vahe güēta, anise que viquehír, anise vivri, güeindri, que vu, anise osi, guahír, que oivi avei che raisusa pipe, ahe oipisira omahera cien yupagüer rupi mbahe oseya vahe iyavei virecora tecovesa apirēhi vahe.

<sup>30</sup>Seta vai rumo cūrítei yipindar vahe,

ipa tēira yuvirecoi; setá aveira cūrítei ipa tēi vahe, yipindar yuvirecoira curi —ehi.

### Yembohesa oporaviqui vahe resendar

**20**“Tūpa mborerecuasa inungar acoi ava ivi yar osē añihiveive oyeupe nara oporaviqui vahe reca ‘toporaviqui che uva tive yuvireco’ oyapave. <sup>2</sup>Oyosuse ava, ahese omoingatu oyeupe oporaviqui vahe rā upe ñepeí ari mboraviqui repri imboepi āgua. Ahese opa omondo ocove imboporaviqui. <sup>3</sup>Ipare osē, oso añihivei, arivate catumi osepia ocarusu pipe ambuae ava oporaviquisa ndovirecoi vahe, <sup>4</sup>aipo ehi chupe: ‘Peso, tapeporaviqui che uva tive. Amboepi tuprira niha pēu’ ehi. Ahe evocoyase yuviraso oporaviqui āgua icove. <sup>5</sup>Ipare oso iri mbiter ari rupi oyeupe oporaviqui vahe reca, ēgüe ehi tupri avei caharuse, las tres rupi. <sup>6</sup>Ipa osē iri las cinco pipe, aheve avei osepia ambuae ava ndovirecoi vahe oporaviquisa yuvinoha. Chupe aipo ehi: ‘¿Mahera peyembohi tēi ari momba cohava pehā?’ <sup>7</sup>‘¡Aní!’ ehi yuvireco, ‘Esepia, ndipoi eté ava, tapeporaviquimi, ehi vahe oreu’ ehi. Evocoyase, ‘Peso, pe avei peporaviqui tive’ ehi. <sup>8</sup>“Pitu ramose, cove yar aipo ehi oporaviqui vahe rese yangarecuar upe: ‘Eñehépa ava oporaviqui vahe upe. Emboepi ipa yugüeru vahe upe rane iporaviqui yuvireco chupe. Ipare tenonendar uve’ ehi. <sup>9</sup>Evocoyase las cinco pipe yuviroique vahe oporaviqui, ahe rane tenonde yugüeru. Oyacatu ñepeí-peí ñepeí ari rupindar oipisi guarepochi yuvireco. <sup>10</sup>Ipare tenonde catu yuviroique vahe oporaviqui, ahe chupe ipa tēi imboepisa. Ahe ipiñañemoñeta, ‘Yaipisi catura revo guarepochi’ ehi oyeupe yuvireco viña. Ipare rumo ahe tupriño avei oipisi ñepeí ari rupindar yuvireco.

<sup>11</sup>Guarepochi pisire rumo oñemoiro cove yar upe yuvireco, <sup>12</sup>aipo ehi: ‘Co ava yugüeru ipa tēi vahe, ñepei horami tēi oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemosañño tēi oroporaviqui ari momba sacucuer upe oroico’ ehi. <sup>13</sup>Cove yar rumo aipo ehi ñepei ipāhu pendar upe: ‘Mbori, ndahei mbahe tēi ayapo ndeu. Esepia, amboepi guarepochi ñepei ari resendar ndeu acoi, Aviye, peye vahecuer rese cheu’ ehi. <sup>14</sup>‘Evocoiyase ndo co, eipisi nde guarepochi, eraso. Che rumo amondo pota co ava ipa tēi oi que vahe upe inungar tupri ndeu amboepi. <sup>15</sup>Esepia, cheu iyacatu ité che remimbotar rupi mbahe ayapo che guarepochi rese. Nderecatēhi tie ambuae ava mbahe rese che ayapose mbahe aviye vahe chupe’ ehi.

<sup>16</sup>“Indó, ěgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tēi vaherã yuvireco curi” ehi güemimbohe upe.

### Jesús omombehu iri omano água

<sup>17</sup>Jesús oguata oso tecua Jerusalén piar rupi. Ahese co cotimi oi peha güemimbohe doce vahe oyeupe aipo ehi chupe:

<sup>18</sup>—Peyapisaca tupri che ñehe rese: yasora tecua Jerusalén ve. Aheve che, Ava Riquehir, che pisira, che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, “Tomano” ehira yuvireco cheu. <sup>19</sup>Ipare che mondora ava ndahei vahe yande mu upe mara-mara tēi che rereco água che reroĩrosa pipe. Ipipe che yucara curusu rese yuvireco. Imombosapisa ari pipe rumo acuerayevira —ehi.

### Santiago, Juan si oporandu Jesús upe mbahe rese omembri upe nara

<sup>20</sup>Ipare Zebedeo rembireco ñuvirío omembri reseve, oyemboya Jesús rese yuvireco. Ahese oñenopiha sovai oporandu água mbahe rese. <sup>21</sup>Evocoiyase,

—¿Mbahe vo ereipotami? —aipo ehi ichi upe.

—Che aipota che membri eremboguapira ndeyepiri ñepei nde mbahe rese pocosa coti, ambuae nde mbahe rese pocoẽhisa coti nde mborerecuasave —ehi chupe.

<sup>22</sup>—Pe ndapeicuai mbahe rese peporandu. ¿Peiporara catura piha co mbahe-mbahe tēi aiporara vaherã, inungar-ra que igua iro vahe aihu vaherã viña? —ehi.

—Taa, oroicatuño itera —ehi yuvireco.

<sup>23</sup>—Supi eté peiporarara mbahe-mbahe tēi. Co rumo ndiyai cheu, che piri opomboguapi água che mbahe rese pocosa coti, ambuae che mbahe rese pocoẽhisa coti avei. Che Ru rumo omoingatu güembiporavo upe nara oguapi vaherã che ipive —ehi.

<sup>24</sup>Aipo iñehesa renduse ore ambuae diez semimbohe, oroñemoiro Santiago, Juan upe avei. <sup>25</sup>Evocoiyase, “Perio” ehi oreu.

—Peicua niha acoi mborerecuar guasu yuvirecoi vahe Tüpa cuaparēhi oporocuai oporoyuca ai tēisa pipe, iyavei acoi ivate catu vahe oyeecoapirasá omborerecuasa pipe yepi. <sup>26</sup>Pe rumo ěgüe ndapeyei chira peico. Iyacatu rumo acoi ava oipota vahe ivate catu güeco água pe pāhuve, ihañeco rane itera opacatu ambuae ava rese. <sup>27</sup>Iyavei acoi pe pāhu pendar oipota vahe tenonde catu güeco água, ihañeco tupri ranera opacatu pe pāhu pendar rese. <sup>28</sup>Esepia, che, Ava Riquehir, ayu ndahei ava che rese

ihañeco āgua, che rumo ayu ava rese che hañeco āgua iyavei amano vaherā ava eta repirā Carugar povri sui senose āgua —ehi.

### Jesús ombogüera ñuvirío ndasesapisoi vahe

<sup>29</sup> Ipore Jesús, güemimbohe reseve oñocuase tecua Jericó yuvireco, ahese ava rehii yuviraso saquicuei. <sup>30</sup> Aheve peri popive ñuvirío ava ndasesapisoi vahe oguapí yuvinoi. Evocoiyase osenduse Jesús ocuase supí, osapucaí pírata yuvireco chupe aipo ehi:

—¡Ore Yar, mborerecuar guasu David suindar, ore paraisuerecomi tēi eve! —ehi yuvinoi.

<sup>31</sup> Ahe ava oyaca-yacaño: “Quiriri” ehi yuvireco chupe. Ahe rumo osapucaí pírata catuño ité yuvireco aipo ehi:

—¡Ore Yar, David suindar, ore paraisuerecomi tēira eve viña! —ehi iriño ité yuvireco.

<sup>32</sup> Evocoiyase osendu iñehe, opita, “Perio” ehi chupe. Ipore,

—¿Mbahe vo peipota ayapo vaherā pēu? —ehi.

<sup>33</sup> —¡Ore Yar, ore mbosarecomi tēi eve! —ehi.

<sup>34</sup> Evocoiyase saiskusave opoco sesa rese. Ahe ramoseve ndasesapisoi vahe osareco tupri ai eté yuvireco. Ipore yuvirasoño ité supí.

### Jesús oique Jerusalén pipe

**21** Acoi orovirovise Jerusalén, oroyepota tecuami Betfagé popive, ivitri Olivo serer vahe ñipiimi. Aheve omondo ñuvirío güemimbohe <sup>2</sup> aipo ehi chupe:

—Peso co tecuami yande rovaingarve. Aheve pesepiara guaricu imembri reseve ñapichimbri imoha. Ahe peyorañora seru cheu. <sup>3</sup> Acoi que ava oporanduse yuvireco pēu sese, “Yar oiporu pota, ipare

niha ombovevi voiñora” peyera chupe —ehi güemimbohe upe.

<sup>4</sup> Co ēgüe ehi chupe aracahendar Tüpa ñehe mombehusar ñehengagüer mboaviye āgua, aipo ehi vahe:

<sup>5</sup> “Pemombehu Sión pendar upe: ‘Pesepia, pe rerecuar guasu ou oico güeco mbegüesa pipe pēu guaricu harive imembri reseve’ peyera” ehi.

<sup>6</sup> Evocoiyase evocoi semimbohe yuviraso, oyapo ité ocuasia yuvireco.

<sup>7</sup> Güeru guaricu imembri reseve yuvireco chupe. Omondo oturucuar icupeao āgua yuvireco. Ipore Jesús oyeupi iharive. <sup>8</sup> Iyavei ava rehii oipipira oturucuar peri rupi imboetei guasusa pipe. Ambuae evocoiyase oyasia pindo omondo peri rupi yuvireco saperā. <sup>9</sup> Ava rehii senonde, saquicuei avei oguata vahe osapucaí yuvireco aipo ehi:

—¡Co mborerecuar guasu David suindar, imboeteipri tasecoi! —ehi—. ¡Sovasapri secoi ou vahe yande Yar rer pipe! ¡Ivave imboeteipri tasecoi! —ehi yuvireco.

<sup>10</sup> Oiquese Jerusalén pipe, opacatu co tecua pipendar oyepihamondii yuvireco. Iyavei setá oporandu-randu yuvireco:

—¿Ava piha co mbia? —ehi tēi yuvireco.

<sup>11</sup> Ava rehii oguata vahe Jesús rupi aipo ehi yuvireco chupe:

—Co niha Jesús, Tüpa ñehe mombehusar, ivi Galilea rupindar, Nazaret pendar —ehi yuvireco chupe.

### Jesús omombopa ava mbahe mboepisar tūparo pipe sui

<sup>12</sup> Ipore Jesús oique judío tūparo guasu pipe. Ipipendar opa omombo ichui ava mbahe mondosar, mbahe reroctuar. Iyavei ava guarepochi recuñarosar mesa opa omboviapi ichui; apicasu mondosar renda avei omboviapi imondo. <sup>13</sup> Ipore aipo ehi chupe:

—Icuachiapri aracahendar pipe aipo ehi: ‘Che rēta yeruresa rētarā’ ehi. Pe rumo imonda rai vahe rēta nungar tēi pereco —ehi.

<sup>14</sup>Aheve oyemboya Jesús rese yugüeru ava ndasesapisoi vahe, ipāri-pāri vahe avei. Ahe opa ombogüera. <sup>15</sup>Osepiase rumo pahi rerecuar guasu iyavei judío porocuita rese oporombohe vahe yuvireco mbahe ndayasepiai vahe sembiapo, iyavei tūparo pipe osenduse chīhivahe sapucaisa: “¡Imboeteipri David suindar tasecoi!” ehise, ahese oñemoiro yuvireco <sup>16</sup>aipo ehi chupe:

—¡Eresendu vo aipo ehi tēi vahe chīhivahe yuvireco! —ehi.

—Taa, asendu ité —ehi—. Pe no, ¿ndapeyeroquii vo sesendar ñehesa icuachiapri pipe:

‘Chīhivahemi, pītanimi avei osapucaira nde mboeteisa pipe yuvireco’ ehi vahe? —ehi.

<sup>17</sup>Ipare opaño oseya ava oso tecua Betania ve. Aheve ñepei pītu oque.

### **Jesús omomara ivira higuera ndihai vahe oñehe pipe**

<sup>18</sup>Ahere ayihive añihiveive, oyevise tecua Jerusalén ve, Jesús ndasiepoi oico. <sup>19</sup>Aheve peri popive osepia ivira higuera. Ahe sese oyemboya oso ‘¿iha pīha?’ oya viña. So güeraño tēi rumo osepia. Evocoyase ahe aipo ehi chupe:

—¡Co pipe suive nandehai chietera! —ehi.

Aheseve voi opa ipiru. <sup>20</sup>Ahe mbahe repiase, ore,

—¡Too, mara ehi rutei pīha co cūrteimi opa voi ipiru! —orohe tēi chupe.

<sup>21</sup>Ahese omboyeve oreu:

—Acoi peyeroyase ité Tūpa rese, ahese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu pipe’ peyese, ahe evocoyase

osiriño itera. <sup>22</sup>Indó, acoi peyerurese mbahe pe porandusa rese Tūpa rese pe yeroyasa pipe, peipisi itera ahe mbahe —ehi.

### **Jesús mborerecuasa**

<sup>23</sup>Ichui Jesús oi que iri judío tūparo guasu pipe oporombohe. Ahese pahi eta rerecuar, judío rerecuar avei oyemboya sese, oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarā ndeu? —ehi.

<sup>24</sup>Evocoyase ahe aipo ehi chupe:

—Che avei aporandura mbahe rese pēu. Pemboyevise che porandusa, ahese che avei amombehura ava porocuita rupi eté pīha ayapo co mbahe vichico.

<sup>25</sup>¿Ava vo Juan ombou ava āpiramo āgua? ¿Tūpa pīha, ava tēi tie? —ehi.

Evocoyase oñemoñeta aipo ehi oyeupe yuvireco: “‘Tūpa ombou’ yahese chupe, ahe evocoyase omboyevira yandeu: ‘¿Mahera ru evocoyase ndaperoyai?’ ehira. <sup>26</sup>Anise, ‘Ava tēi remimbou’ yahese rumo, aviyeteramo opacatu ava yande amotarēhira yuvireco. Esepia, opacatu: ‘Juan omombehu vahe ñehesa Tūpa suindar’ ehi eté yuvireco chupe” ehi. <sup>27</sup>Sese,

—Ndroicouai eté Juan mbousar —ehiño yuvireco.

Ahese ahe aipo ehi:

—Evocoyase che avei, “Ahe iporocuita pipe co mbahe ayapo” ndahei chietera pēu —ehi mborerecuar guasu upe.

### **Ñuvirío ava rahir recocuer sui yembohesa**

<sup>28</sup>Iyavei Jesús aipo ehi judío rerecuareta upe:

—¿Mara ehi pe pihañemoñetasa co rese? Oime mbia vireco vahe ñuvirío guahir. Ahe aipo ehi ocuacua catu vahe upe: ‘Che rahir, co pipe eresora, epo-

raviquí cove' ehi. <sup>29</sup> '¡Nachequerēhii!' ehi voño. Coiye rumo, '¿Mahera ēgüe ahe?' ehi. Ipare osoño ité, oporaviquí. <sup>30</sup> Ipare oso ambuae guahir upe: 'Eresora, eporaviquí cove' ehi tupri avei. Evocoiyase, 'Asora, che ru' ehi angahu. Ipare rumo ndosoi eté. <sup>31</sup> ¿Uma vo co ñu-virío yuvirecoi vahe oyapo vu remimbotar? —ehi.

—Co yipindar vahe —ehi yuvireco.

—Supi eté. Esepia, co angaipa vi-yar mbahe-mbahe tēi aposar, cuña oyemondo-mondo tēi vahe avei, ahe rane yuviroiquera Tūpa mborerecuasave pe sui. <sup>32</sup> Esepia, Juan Oporoāpiramo vahe ou co tecocuer ihīvi vahe mboye-cua āgua pēu pe reco tupri āgua viña. Pe rumo ndaperoyai eté. Co angaipa vi-yar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoi mbahe viña, ipare rumo ndapeñe-cuñaroi pe recocuerai sui seroya āgua —ehi mborerecuar guasu yuvirecoi vahe upe.

### **Ava mbahe tēi oporaviquí vahe recocuer sui yembohesa**

<sup>33</sup> "Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri sereco, oyapo uva riavii āgua; oyapo avei oi ivate vahe ahe sese mahemoha āgua. Ipare os-eya oivi ava oporaviquí vahe upe iporu āgua. Ichui osē oso amombri vahesa rupi. <sup>34</sup> Coiye oyepotase ari uva pohosa, ahese omondo güembigui oporaviquí vahe upe imboporandu āgua 'taipisi uva pohopri cheundar cute' oyapave viña. <sup>35</sup> Ipare rumo oporaviquí vahe oipisi sembiguai yuvireco: amove oinupa-nupa yuvireco, amove oyuca, oyapi-yapi avei amove ita pipe yuvireco. <sup>36</sup> Ipare rumo ivi yar setá catu omondo iri güembigui. Oporaviquí vahe rumo mara-mara tēiño avei vireco yuvireco.

<sup>37</sup> "Coiye rumo guahir teieté omondo chupe cute. Ahe ipihañemoñeta: 'Om-boyeroya catura revo che rahir yuvireco' ehi viña. <sup>38</sup> Evocoiyase ahe ava tahir repiase, 'Co aipo oipisira vu mbahe; yayucaño, evocoiyase co ivi opitara yandeu nara' ehi oyeupe yuvireco. <sup>39</sup> Evocoiyase oipisi, vinose miti pāhu sui, oyuca ité yuvireco" ehi.

<sup>40</sup> "Acoi ouse ivi yar, ¿mbahe vo oyapora oporaviquí vahe upe?" ehi oñehe rendusar upe.

<sup>41</sup> Ahe evocoiyase,

—Opara revo oyuca saisuēhisa pipe ité co ava ndipihai vahe yuvireco. Ipare revo omondora oivi ambuae ava oporaviquí vahe uve iporu āgua 'ahe tombou voimi uva ipohopirer cheundar cheu curi' ohesa pipe —ehi yuvireco.

<sup>42</sup> Aipo ihe pare, aipo ehi oñehe rendusar upe:

—¿Ndapeyeroqui vo co aipo ehi vahe icuachiapri pipe?

'Co ita oi aposar opaño omombo yuvireco.

Ahe ita rumo aviye catu vahe oi moviracua tupri āgua.

Ēgüe ehi niha Yar yapo yande mohapisi ai eté

ehi icuachiapri pipe. <sup>43</sup> Sese che Ru Tūpa mborerecuasa serocuasara pe sui. Ambuae ava upe rumo imondosara. Ahe virasora che Ru mombahesa chupe.

<sup>44</sup> Acoi que oviapi vahe evocoi ita harive, opa tēira ahe ae oyemomara; iyavei acoi oviapise evocoi ita que ava harive, ahese opa tupri aveira omocañi —ehi Jesús oñehe oyese.

<sup>45</sup> Acoi osenduse pahi rerecuar iyavei fariseo yuvirecoi vahe, osenducua oyesendar ñehesa yuvireco. <sup>46</sup> Aheseve oipisi pota voi yuvireco viña. Osiquiyeño rumo ava rehii sui yuvireco. Esepia, opacatu ava ipihañemoñeta: "Co ité Tūpa pīratasa pipe oñehe" ehi yuvireco chupe.



**Jesús oporombohe carusa  
mendasa resendar rese**

**22** Ipare Jesús oporombohe iri ambuae ava recocuer rese aipo ehi:

<sup>2</sup>“Tüpa omborerecuasave inungar mborerecuar guasu guahir mendase oyapo pieta. <sup>3</sup>Ipare oyocuai güembiguai eta ‘ava ichohopri upe toyugüeru cute’ oya. Ichohopri rumo niquerêhi iri yugüeru aheve. <sup>4</sup>Ipare oyocuai iri ambuae güembiguai eta aipo ehi: ‘Aipo peyera ichohopri upe: ¡Toyugüeruño ité! Esepia, opa ité oingatu tembihu iyavei ayuca uca tivi iyavei ambuae mbahe mimba iquira vahe. Che opacatu amoingatu. Sese toyugüeruño ité mendasave, ehi, peyera chupe’ ehi güembiguai upe. <sup>5</sup>Ichohopri rumo ndoviroyai eté yuvireco. Evocoiyase ñepeí osoño ocove, ambuae oso ombahe movendesave, <sup>6</sup>ambuae rumo oipisi sembiguai mara-mara tēi sereco ãgua. Ahe ipipe oyuca yuvireco. <sup>7</sup>Evocoiyase mborerecuar guasu oñemoiro eteprisave omondo osundao eta co ava oporapichi vahe yuca uca ãgua, iyavei secua rapipa ãgua. <sup>8</sup>Ipare aipo ehi ambuae güembiguai eta upe: ‘Opa oingatu tembihu mendasave. Co rumo yipindar ichohopri, ndiya iri chira yugüeru vakerã cohava. <sup>9</sup>Sese peso opacatu ava guata catusa rupi, peñehe mendasave yugüeru vakerã opacatu pe rovaichisar upe’ ehi. <sup>10</sup>Evocoiyase sembiguai eta yuvinosépa yuviraso ocar rupi. Ahe osovaiichi vahe setá omonuha yuvireco que seco tupri vahe, seco rai vahe avei; êgüe ehi ava savapipo tupri oi guasu mendasave yuvireco.

<sup>11</sup>“Evocoiyase acoi mborerecuar oique ava ichohopri repia. Ipare omahecua tupri ñepeí ava ipãhu pendar rese. Ahe rumo ndomondei turucuar mendasa resendar. <sup>12</sup>Evocoiyase aipo ehi chupe: ‘Che mboripar, ¿mara ere

eique ave co turucuar mendasa resendar porêhi?’ ehi. Ahe rumo noñeheiño ité chupe. <sup>13</sup>Evocoiyase, ‘Peipisi co mbia, peñapichi ipi, ipo avei, pemose ocarve pítumimbisave. Aheve oyaseho tēira, sãitere-tere tēira mbaherasicuer rereco’ ehi ichohopri rese hañecosar upe. <sup>14</sup>Esepia, setá tēi ichohopri, moviromi tēi rumo iporavopri ipãhu sui” ehi mborerecuareta uve.

**Fariseo osecoña iri tēi Jesús  
guarepochi rese yuvireco**

<sup>15</sup>Ipare fariseo oñemonuha, ipihañemoñeta yuvireco oyeupe Jesús ñehe yavi uca ãgua mborerecuar rovai imomara-mara tēi ãgua. <sup>16</sup>Ahe evocoiyase omondo moviro ovoya yuvireco mborerecuar Herodes rupindar reseve Jesús upe. Ahese aipo ehi angahu chupe:

—Porombohesar, ore oroicua nde supi eté vahe mbahe eremombehu eico iyavei ereporombohe mbahe supi tupri vahe Tüpa recocuer rese. Nde niha ndereroyai vahe ava ñehesa tēi. Esepia, ava pihanemoñeta rupi ndereicoi vahe; nde pihanemoñeta rumo ñepeí reseve erereco. <sup>17</sup>¿Mara ehi nde pihanemoñeta? ¿Aviyera piha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

<sup>18</sup>Oicua rumo fariseo pihanemoñeta raisa. Sese aipo ehi chupe:

—Pe seco tupri angahu tēi vahe peico. ¡Mahera che moingue pota mbahe tēi pipe peye! <sup>19</sup>Pemboyecua ru ñepeí guarepochi mborerecuar guasu upendar cheu —ehi.

Evocoiyase güeru yuvireco chupe.

<sup>20</sup>—¿Ava rahanga vo co guarepochi rese chini iyavei ava rer vo co chini sese no? —ehi.

<sup>21</sup>—Roma pendar mborerecuar guasu —ehiño fariseo yuvireco chupe.

—Pemondora evocoiyase mborerecuar upe mbahe chupendar, Tūpa upendar mbahe evocoiyase pemondora Tūpa upe —ehi fariseo upe.

<sup>22</sup> Osenduse, oyepīhamondii tēi yuvireco. Evocoiyase yuvinose yuviraso ichui.

### Saduceo oporandu Jesús upe cuerayevisa rese secoãhasave

<sup>23</sup> Ahe ari pipe saduceo “ndipoi eté cuerayevisa” ehi vahe yugüeru Jesús upe, oporandu tēi angahu yuvireco chupe:

<sup>24</sup> —Porombohesar, Moisés aipo ehi aracahe:

‘Que cuimbahe omanose guahiēhiseve, ahese tivri omendara sembirecocuer rese ahe viquehir omano vahecuer upe nara tahirã oico’ ehi —ehi yuvireco chupe—.

<sup>25</sup> Cohave, ore pāhuve, oime siete tupri oyesuindar pāve yuvirecoi vahe. Yipīndar vahe omenda. Ipare omanoño guahiēhiseve. Evocoiyase tivri omenda sembirecocuer rese. <sup>26</sup> Ahe omano guahiēhiseve avei no. Ēgüe ehi avei opacatu ambuae tivri, omano avei guahiēhiseve yuvireco. <sup>27</sup> Opacatu imano pare, cuña avei omano cute. <sup>28</sup> Evocoiyase opase ocuerayevi yuvireco, ¿uma rese ité pīha opitara ahe cuña? Esepia, opacatu niha omenda yuvireco sese —ehi saduceo yuvireco chupe.

<sup>29</sup> —Pe pīhañemoñetasa co coti tēi eté. Esepia, ndapeicuai eté Tūpa ñehe icuachiapri aracahendar, ndapeicuai avei Tūpa pīratasa —ehi—. <sup>30</sup> Esepia, acoi omano vahe ocuerayevise, chupe ndipo iri chira mendasa. Ahe rumo Tūpa rembiguai iva pendar nungar yuvirecoira ivave —ehi—.

<sup>31</sup> Co cuerayevisa resendar rumo amombehura pēu. Aviye ndapeyeroquii anga vahe acoi Tūpa omombehu

vahecuer rese. Supi eté ahe aipo ehi aracahe: <sup>32</sup> ‘Che Abraham, Isaac iyavei Jacob Tūpa aico’ ehi. ¡Tūpa ndahei omano vahecuer Tūpa, ahe rumo oicove vahe ité Tūpa secoi! —ehi.

<sup>33</sup> “¡Too!” ehi ava rehii. “¡Mara ehi rutei iporombohesa!” ehi tēi yuvireco.

### Porocuita aviye catu vahe

<sup>34</sup> Ipare fariseo oyanduse yuvireco Jesús omonguiriripañose saduceo oyesui, ahese oñemonuha yuvireco. <sup>35</sup> Ñepe ipāhu pendar Moisés porocuita rese oporombohe vahe, ahe oyemboya oso Jesús rese oporandu ‘toyavi oñehe Moisés porocuita sui yandeu’ oyapave viña:

<sup>36</sup> —Porombohesar, ¿uma ité vo porocuita aviye catu vahe opacatu ambuae porocuita sui? —ehi.

<sup>37</sup> Evocoiyase ahe aipo ehi chupe:

—‘Eresaisura nde Yar Tūpa opacatu nde pīhañemoñetasa pipe, opacatu nde recocuer pipe, nde yapisacasa pipe avei’ ehi. <sup>38</sup> Co porocuita aviye catu vahe ambuae porocuita sui. <sup>39</sup> Imoñuviriosa inungar tupri avei aipo ehi no: ‘Eresaisura ambuae ava nde yeaisu nungar’ ehi. <sup>40</sup> Co ñuvirio porocuita rupi oguata opacatu Moisés porocuita icuachiapri, opacatu Tūpa ñehe mombehular rembicuachía avei —ehi.

### ¿Ava suindar pīha Poropīsirosar?

<sup>41</sup> Fariseo ñemonuha viteseve, <sup>42</sup> Jesús oporandu chupe:

—¿Mara ehi pepīhañemoñeta acoi Tūpa Rembiporavo ou vāherã ava pīsiro āgua rese? ¿Ava suindar-ra pīha secoi? —ehi.

—Ahe niha David suindar secoira —ehi fariseo yuvireco chupe.

<sup>43</sup> Ahese aipo ehi fariseo upe:

—¿Mahera pīha evocoiyase David oñehese Espiritu pīratasa pipe aracahe,

“Che Yar” ehi chupe? Esepia, ahe aipo ehi:

<sup>44</sup> ‘Yar aipo ehi che Yar upe:

Eguapi che acato coti acoi che amon- dose voi eté nde amotarêhimbar nde povrive yuvireco’

ehi David aracahe. <sup>45</sup> Evocoiyase, ¿ma- hera ru: “Poropîsrosar David suindar secoira” peye, David teieté, “Che Yar” ehise chupe? —ehi fariseo upe.

<sup>46</sup> Evocoiyase ndoicatu iri imboyevi âgua yuvireco cute. Ahe ari pipe sui ndîpo iri que ñepe iquerêhi vahe ñehe avi uca âgua oñehe pipe yuvireco.

**Jesús oicua uca fariseo iyavei  
Moisés porocuaita rese  
oporombohe vahe recocuera**

**23** Ipare Jesús aipo ehi ava eta upe, oreu avei no: <sup>2</sup> “Co Moisés porocuaita rese oporombohe vahe iyavei fariseo eta, ahe icuaita Moisés porocuaita mombehu tupri âgua yuvireco. <sup>3</sup> Sese iya peroyaño ité iyavei peyapo opacatu mbahe semimombehu; aní chira rumo peyapo mbahe sembiapo ai. Esepia, omombehu tupri tēi mbahe viña, ipare rumo co coti tēi mbahe oyapo yuvireco. <sup>4</sup> Iyavei omondo porocuaita inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepe oporocuaita yuvireco no. <sup>5</sup> Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tēi. Osiva rese, oyiva rese avei ipe guasu vahe vireco-reco tēi oturucuar rese Tūpa Ñehengagüer cuachiapri yuvireco. Iyavei ipi catu vahe oturucuar popi moaro âgua omondo yuvireco. <sup>6</sup> Oipota carusa rupi güenara aviye catu vahe yuvireco, oseca avei tenda porañete catu vahe güenara otūparo pipe yuvireco no. <sup>7</sup> Oipota avei ava oyeupe ‘avirave’ apo âgua omboetisave ocar

rupi iyavei oipota, ‘Porombohesar’ oyeupe he yuvireco.

<sup>8</sup> “Pe rumo, ‘Porombohesar’ ndapembohe ucai chira ava peyeupe. Esepia, pe opacatu guasu peyeivri peico, iyavei ñepeño ité pereco pe Mbohesar. <sup>9</sup> Iyavei, ‘Che ru’ ndapeyei chira que ava co ivi pipendar tēi upe. Esepia, ñepeño ité pe Ru pereco, ahe niha íva pendar. <sup>10</sup> Ndiyai avei, ‘Mborerecur’ pembohe uca ava peyeupe. Esepia, Poropîsrosar güeraño ité pe rerecur secoi. <sup>11</sup> Acoi ava seco ivate catu vahe, ahe toporopîtívii güeco mbegüesa pipe. <sup>12</sup> Esepia, acoi oyemboivate ai vahe opara seco reroyisa, iyavei acoi ava seco mbegüe vahe, ahe seco mboivate catusara curi.

<sup>13</sup> “¡Peparaisu catu itera pe Moisés porocuaita rese oporombohe vahe iyavei pe fariseo peico vahe, pe seco tupri angahu tēi vahe peico! Pemombitaño ava Tūpa povrive seique rägüer sui peico yepi. Pe avei eté ndapeiquei ipovrive, iyavei acoi yuviroique pota vahe pemombitaño seique rägüer sui.

<sup>14</sup> “¡Peparaisu catu itera pe Moisés porocuaita rese oporombohe vahe iyavei pe fariseo peico vahe, pe seco tupri angahu tēi vahe peico! Esepia, perocua- rocuano tēi cuña imer mano vahecuer rēta ichui, ipare peyeroqui tupri tēi angahu ava rembiepiave. Sese peipisira Tūpa ñemoirosa ipirata catu vahe curi.

<sup>15</sup> “¡Peparaisu catu itera pe Moisés porocuaita rese oporombohe vahe, pe avei fariseo, pe guata tēi angahu vahe Tūpa rese! Peguata opacatu ivi rupi iyavei para guasu rovai rupi ava mbohe. Ipare rumo pe remimbohecuer mbahe tēi catu pe sui. Pe nungar caruguar ratave nara tēi pereco uca.

<sup>16</sup> “¡Peparaisu catu itera, pe ava mbo- hesar ndasesapisoí vahe nungar pe- ico! Pe aipo peye tēi vahe: ‘Yamombe- huse mbahe tūparo rer pipe yande

ñehe mboaviye āgua, ēgüe yahe tēi eté; co rumo yamombehuse mbahe oro tūparo pendar rer pipe, ahese iya itera yamboaviye yepi' aipo peye tēi. <sup>17</sup>¡Pe ndapembahecuaí vahe nungar, ndasesapisoi vahe nungar avei peico! ¿Uma vo aviye catu vahe: oro pīha, anise tūparo tie? Tūparo pipe niha oro rovasasa yepi. <sup>18</sup>Iyavei co uve avei aipo peye tēi peico: 'Yamombehuse mbahe seropovēhepri renda rer pipe yande ñehe mboaviye āgua, ēgüe yahe tēi eté; co rumo mbahe yamombehuse mbahe seropovēhepri renda hari pendar rer pipe yande ñehe mboaviye āgua, ahese iya ité yamboaviyera yande ñehe yepi' aipo peye tēi. <sup>19</sup>¡Pe ndasesapisoi vahe nungar peico yepi! ¿Uma vo aviye catu vahe? ¿Evocoi porerecosa seropovēhepri pīha, anise mbahe seropovēhepri renda tie? Ahe tenda harive niha porerecosa sovasasa yepi. <sup>20</sup>Sese acoi mbahe omombehu vahe mbahe seropovēhepri renda rer pipe oñehe mboaviye āgua, ndahei serer pipe güeraño, omombehu avei opacatu ihari pendar mbahe seropovēhepri rer pipe, <sup>21</sup>iyavei acoi ava omombehu vahe mbahe tūparo rer pipe oñehe mboaviye āgua, ahe omombehu ipipendar rer pipe avei. Ahe niha Tūpa secói. <sup>22</sup>Iyavei acoi omombehu vahe mbahe que ambuae ava upe iva resendar rer pipe oñehe mboaviye āgua, omombehu avei Tūpa recua rer pipe, Tūpa rer pipe avei. Esepia, Tūpa aheve ité secói.

<sup>23</sup>“¡Peparaisu catu itera, pe Moisés porocuaita rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepeipei diez pe remiti menta, anis, camino pereco vahe sui ñepeipei Tūpa uve nara viña, pe rumo pepoi co porombohesa aviye catu vahe porocuaita resendar sui. Ahe peyapora mbahe ihīvi vahe, peporoparai-

suerecora iyavei pemboaviye tuprira pe cuaita yepi. Iyacatu rumo ahe pemboaviye aveira viña. <sup>24</sup>¡Pe ava mbohesar ndasesapisoi vahe nungar peico! Pe pembogua rutei mbahe rahicuer sui pe igua; mbahe tuvicha vahe rumo pemocoño ité evocoiyase. Ēgüe peye co mborocuaíta upe.

<sup>25</sup>“¡Peparaisu itera pe Moisés porocuaita rese oporombohe vahe iyavei pe fariseo peico vahe, pe seco tupri angahu tēi vahe! Esepia, inungar igua riru iyavei tembihu riru icupe rupi tēi yoseipri. Ipipe rumo iquiha opitaño ité. Ēgüe ehi tēi pe recocuer pe monda raisave, mbahe pota-pota tēisave avei. <sup>26</sup>¡Pe fariseo peico vahe, ndapepihañemoñetai vahe mbahe pe rembiapo ai rese, pemoatiro rane pe piha pipe mbahe yavaeté vahe sui! Ahese ramo pe rembiapo icatuprira cute.

<sup>27</sup>“¡Peparaisu catu itera, pe Moisés porocuaita rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvipa imomorochimbri tēi. Iharive tēi icatupri chupe. Ipipe rumo tehögüer cangüer iyavei opacatu mbahe yavaeté vahe ovireco oyese. <sup>28</sup>Ēgüe peye: ava rembiepiave aviye pe reco ihīvi vahe viña, pe piha pipe rumo oime pe porombopasa iyavei opacatu mbahe-mbahe tēi.

<sup>29</sup>“¡Peparaisu catu itera pe Moisés porocuaita rese oporombohe vahe, pe fariseo peico vahe, pe reco tupri angahu tēi vahe! Esepia, pemoingatu Tūpa ñehe mombehusar ruvipagüer peico sese pe yemomahenduha āgua iyavei pemoporañete ai tēi ava seco ihīvi vahe ruvipagüer yepi viña. <sup>30</sup>Ipare aipo: 'Yande yaicose revo aracahe yande ramoi recose, ndayaipitīvivi chietera Tūpa ñehe mombehusar yuca āgua yuvireco viña'

peye tupri tēi. <sup>31</sup>Aipo peyese rumo, pemboyecua Tūpa ñehe mombehuserer yucasar suindar pe yesusa. <sup>32</sup>¡Pemboyepi iriño evocoyase pe ramo rembiapocuerai!

<sup>33</sup>“¡Pe mboi vai suindar tēi peico! Ndapesoyepi chira rumo Tūpa ñemoirosa sui, pesora rumo tata guasuve. <sup>34</sup>Evocoyase che amboura pēu Tūpa ñehe mombehuser ava yaracua vahe iyavei ava pe mbohe āgua yuvireco viña. Amove rumo ipāhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei ambuae peseca-secara peico tecua yacatu rupi. <sup>35</sup>Sese pēuño ité oura Tūpa ñemoirosa opacatu ava aviye vahe yuca agüer rese co ivi pipe; Abel seco ñvi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahir Zacarías sui avei, ahe peyuca vahe tūparo pipe mbahe seropovēhepri renda rovai. <sup>36</sup>Supi eté opacatu co mbahe tēi oura pe recove viteseve” ehi.

### Jesús oyaseho Jerusalén pendar rese

<sup>37</sup>“¡Too rutei, pe Jerusalén pendar, peyuca vahe Tūpa ñehe mombehuser, ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive! Ēgüe ahe pota tēi pe rereco viña, pe rumo ndapeipotai eté evocoi nungar pe rereco āgua. <sup>38</sup>Sese seyapirā tēi peicora. <sup>39</sup>Esepia, ndache repiai chira peye acoi, ‘¡Imboeteipri Yar remimbou tasecoi!’ peyese voi che repia irira peye” ehi Jesús ava eta upe.

### Jesús omombehu judío tūparo guasu mocañi āgua

**24** Ipare Jesús osē judío tūparo pipe sui oso. Aheseve ore semimbohe oroyemboya sese aipo orohe chupe:

“¡Ore Yar, esepia co tūparo!” orohe. <sup>2</sup>Ahe rumo:

—Supi eté amombehu pēu: co opacatu pesepia vahe, ndipoi chietera que ñepei ita oyeha vite vahe. Opacatu ité imondurusara curi —ehi oreu.

### Jesús omombehu mbahe oime vaherā ari cañi renonde

<sup>3</sup>Ipare Jesús oso ivitri Olivo ve oguapi oī. Aheve ore güeraño tupri oroso chupe mbahe rese ore porandu āgua:

—Emombehu catu oreu: ¿Mbahese vo aipo mbahe yaviyera? ¿Mbahe poromondiisa rese rane vo icuasara nde yu āgua iyavei ari cañi āgua? —orohe chupe.

<sup>4</sup>—Peicua catu, peyembopa ucai rene ambuae ava upe peico. <sup>5</sup>Esepia, setá ava yugüerura, ‘Che aico Tūpa remimbou ava pīsiro āgua’ ehi tēira ava eta mbopa yuvireco. <sup>6</sup>Iyavei pesendura ñehesa vavasa resendar cohava iyavei que rupi. Ndapeyembosiquiyei chira rumo ichui. Esepia, ēgüe ehi rane itera niha; ndehi vitei chira rumo ari cañisa. <sup>7</sup>Esepia, ñepei ivi pipendar ovavara ambuae ivi pipendar rese oyeupe yuvireco. Ahese oimera tiavor, ivi ririi opacatu-catu tēi tecua rupi. <sup>8</sup>Opacatu evocoi mbahe rumo omboipi ramomi vahe mbahe tēi porarasa.

<sup>9</sup>“Ahese pe pisira yuvireco mara-mara tēi pe rereco āgua, pe yuca āgua avei. Iyavei opacatu ava-ava tēi ndape ambotai chira che recocuer sui tēi yuvireco. <sup>10</sup>Ahe ari rupi evocoyase setá ava ndache reroya iri chira yuvireco. Ahe oyeamotarēhira iyavei omondora ambuae omboetasagüer yamotarēhimbar povrive yuvireco. <sup>11</sup>Iyavei setá Tūpa ñehe mombehuser angahu tēi oimera, ahe ava ombopa-mbopa tēira yuvireco. <sup>12</sup>Ombouvicha catura mbahe-mbahe tēi naporai vahe. Ipipe sui ndoyeaisu tupri iri chira ava yuvireco. <sup>13</sup>Acoi ava oye-

moviracua vahaño rumo ari ipa vahe rupi, ipĩsiropri yuvirecoira. <sup>14</sup>Iyavei co ñehesa icatupri vahe Tũpa mborerecuasa resendar imombehusapa ranera opacatu ivi rupi icua uca āgua. Ahese ramo oimera cañisa co ivi pipe” ehi oreu.

<sup>15</sup>“Tũpa ñehes mombehusar Daniel oicuachía mbahe-mbahe tẽi aposa resendar oime vaheřa tũparo guasu maranehi vahe pipe aracahe. Ahe pesepiase oi maranehi pipe —acoi oyoeroqui vahe, ahe tosenducua tupri yuvireco—, <sup>16</sup>evocoyase Judea ve yuvirecoi vahe toñemipa poyava ivitri rese yuvireco ichui; <sup>17</sup>iyavei acoi gũeta harive yuvirecoi vahe ogũeyise, toique iri eme gũetave ombahe reca; <sup>18</sup>iyavei acoi que rupi tẽi yuvirecoi vahe, toyevi iri eme gũetave que oyeaosa renose āgua yuvireco. <sup>19</sup>¡Iparaisu itera cuña ipuruha vahe, imembi pĩtani vahe avei yuvireco! <sup>20</sup>Peoporandu Tũpa upe pe recua pipe sui pe sẽehi āgua irohi pipe, mbituhusa ari pipe avei. <sup>21</sup>Esepiā, ahe ari pipe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chietera evocoi nungar. <sup>22</sup>Iyavei nomombituhise Tũpa co ari naporai vahe, ndipoi chietera ava oñepĩsiro vahe yuvireco viña. Ahe rumo gũembiporavo raisusa pipe omombituhura” ehi.

<sup>23</sup>“Iyavei que ava, ‘Esepiā co Poropĩsirosar secoi’; anise, ‘Peve secoi’ ehise yuvireco pẽu, anĩ chira peroya aipo ehi vahe. <sup>24</sup>Esepiā, yugũerura ava ‘che Poropĩsirosar aico’ ehi tẽi vahe iyavei ‘che amombehu vahe Tũpa Ñehengagũer’ ehi angahu tẽi vahe; iyavei oyapora mbahe ava ndoyapoi vahe poromondiisa gũeco pĩratasa mboyecua āgua yuvireco. Ipipe osecoāhara Tũpa rembiporavo imbopa āgua yuvireco. <sup>25</sup>Opa aipo co senondeve amombehu pẽu. <sup>26</sup>Sese que ava pẽu: ‘Pesepiā pe ivi

iporupirẽhisave secoi’ ehise, pesoi rene aheve seroyasave, anĩ chiveira peroya acoi ‘pesepiā co secoi oi pipe’ ehi vahe yuvireco. <sup>27</sup>Che rumo inungar overa vahe sendi añihivei sui caharu coti ocua iva rese, ěgũe ahera che, Ava Riquehir, opacatu ava rembiepiave ayevi irise vitu curi. <sup>28</sup>Esepiā, mbahe rehõgũer reimesave, uruvu oñemonuha atĩ yuvireco yepi” ehi gũemimbohe eta upe.

### Jesús yevi āgua resendar

<sup>29</sup>“Ahe ari pipe mbahe-mbahe tẽi pare cũriteimi ndoyecua iri chira ari, yasi avei ndosesape iri chira, yasitata avei opara oviapi iva sui iyavei iva resendar mbahe oririira yuvireco. <sup>30</sup>Ahese oimera iva rese iporẽhi vahe che, Ava Riquehir, yu āgua resendar. Evocoyase opacatu ava-ava tẽi co ivi pipendar oyaseho tẽira osiquiyepave yuvireco. Che repiā aveira yuvireco agũeyise iva quihā rese che pĩratasa rendigũer porañetesa pipe. <sup>31</sup>Iyavei amboura che rembiguai eta iva pendar. Ahe evocoyase gũemimbi omoñehes pĩratara opacatu che rembiporavo co ivi rupindar que amombri rupi yuvirecoi vahe monuha āgua” ehi.

<sup>32</sup>“Peyembohera ivira higuera recocuer sui: Co ivira soqui ramose, yaicua cõimi ari sacu vahe yepota āgua yandeu yepi. <sup>33</sup>Na ehi aveira pẽu che ñehes rupi tupri mbahe pesepiase, sese picuara cõimi eté che yevi āgua. <sup>34</sup>Supi eté yuvirecove viterā ava osepiā vahe co mbahe opase yaviye. <sup>35</sup>Iva, ivi opara ocañi, che ñehengagũer rumo imboaviyesa rane itera.

<sup>36</sup>“Ndipoi eté rumo ava oicua vahe ari iyavei hora che yevi āgua. Iva pendar che Ru rembiguai avei ndoicuai yuvireco. Che avei ndaicuai eté. Che Ru gũeraño ité rumo oicua.

<sup>37</sup>“Inungar ava Noé recose yuvirecoi aracahe, ěgũe ehi tupri aveira che, Ava

Riquehír, yevi āgua renonde. <sup>38</sup>Yípive amarusu renonde, ahese ava ocaru, oihu; guahír, guayrí avei omomendaño yuvireco. Noé arca pipe seiquese, ēgüe ehi vite yuvireco. <sup>39</sup>Nomohai eté rumo amarusu viapi āgua yuvireco oyeupe viña, ēgüe ehi rumo aviyeteramo tēi amaroviapi imocañipa. Ēgüe ahe aveira che, Ava Riquehír, ayevi aviyeteramo tēi. <sup>40</sup>Evocoi ari pipe oimera ñuvirío ava amombri güecua sui yuvirecoi vahe: ñepeí serasosara, indugüer rumo opítara. <sup>41</sup>Ēgüe ehi aveira ñuvirío cuña ohicho vahe upe: ñepeí serasosara, indugüer rumo opítara.

<sup>42</sup>“Sese pemahemoha yepi. Esepia, ndapeicuai mbahe ari pipe che, pe Yar, ayevira iva sui. <sup>43</sup>Iyavei peyapisaca tupri co rese: inungar acoi oi yar oicuaese revo que hora pítu pipe imonda vahe yepota āgua, ahese imahemohara sese güēta pipe seiqueēhi āgua viña. <sup>44</sup>Ēgüe peye aveira peyemoingatu che yevi āgua rese. Esepia niha, che, Ava Riquehír, aporoesapiha tēira vitu curi” ehi.

### **Mbiguai omboaviye vahe ocuaita, nomboaviyei vahe avei**

<sup>45</sup>“Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarā güēta pipendar rese hañeco āgua ‘tembihu tomondo che rēta pipendar upe che porocuita rupi’ ohe-save. <sup>46</sup>Acoi omboaviyese ocuaita, ahese oviharetera güerecuar yevise. <sup>47</sup>Supi eté niha serecuar oyocuíra opacatu ombahe rese hañeco āgua. <sup>48</sup>Ahe mbiguai rumo ndipihaise ‘ndoyepota vitei chira revo che rerecuar’ oya, <sup>49</sup>omboetas omboipi mara-mara tēi sereco iyavei oyemboya caguar tēi rese ipiri ocaru iyavei oihu tēi āgua. <sup>50</sup>Ipare rumo serecuar oyepotara imahemohaēhiseve. <sup>51</sup>Ahese omombaraisu catura, “Tinu-pasa, ava seco tupri ai angahu tēi vahe

nupasa nungar pipe’ ehira chupe. Ahese oyaseho tēira, oyemoaitere-tere tēi aveira” ehi güemimbohe upe.

### **Diez cuñatai ndaseco marai vahe resendar ñehesa**

**25** “Evocoi ari pipe Tūpa mborere-cuasa inungar-ra mendasave diez cuñatai ndaseco marai vahe virasora tataendi ambuae cuña mevi pisi āgua yuvireco. <sup>2</sup>Ipāhuve yuvirecove cinco ndipihañemoñetai vahe, ambuae cinco rumo ipihañemoñeta tupri vahe yuvireco. <sup>3</sup>Ipare ndipihañemoñetai vahe oipisi guataendirā yuvireco, ndovirasoi rumo yandi guataendi riru mboapipo iri āgua yuvireco; <sup>4</sup>evocoi ipihañemoñeta tupri vahe rumo viraso yandi siru pipe guataendi reseve yuvireco. <sup>5</sup>Acoi ndoyepota apihaise cuña mevi, ahese sopesii tēi yuvireco. Coiye opaño yuviroque yuvireco ichui. <sup>6</sup>Pítu mbiter senise rumo, osendu ñehesa aipo ehi vahe yuvireco: ‘¡Coi imevi turi! ¡Pesé ipisi āgua cute!’ ehi. <sup>7</sup>Evocoiyase opacatu evocoi cuñatai oñarapuha voi iyavei omoin-gatu guataendi yuvireco. <sup>8</sup>Ahese nima-hemohai vahe aipo ehi ambuae imahe-moha vahe upe yuvireco: ‘Pemboumi tēi chíhi pe yandi oreu. Esepia, ogüe pota ité ore rataendi’ ehi tēi yuvireco. <sup>9</sup>‘Aní, ndiyai chira revo oromondo vaherā pēu. Iyacatu revo peso imboepisave serocua peyeupe nara’ ehi. <sup>10</sup>Imboepi yuvirasoi vite-seve, ou cuña mevi cute. Oyemoingatu vahe rumo yuviroique supi mendasave. Evocoiyase saquicuerive voi omboya oquenda rārosar. <sup>11</sup>Ipare oye-potase ambuae cinco cuñatai yugüero aipo ehi yuvireco oi yar upe: ‘¡Em-boimi tēi oreu!’ ehi tēi yuvinoha. <sup>12</sup>‘Aní, ndopocuai vahe ité’ ehiño chupe.

<sup>13</sup>“Pe evocoiyase pemahemohara. Esepia, ndapeicuai mbahe ari pipe, mbahe hora pipe che, Ava Riquehír, ayevira” ehi Jesús oreu.

**Ñehesa guarepochi  
mondosa resendar**

<sup>14</sup>“Iyavei Tūpa omborerecuasave inungar-ra ava mbahe yar oso āgua renonde ivi amombrisave omonuha güembiguaí oguarepochi rāro āgua viña. <sup>15</sup>Yipindar ñepeí upe omondo cinco mil guarepochi, ambuae upe omondo dos mil, iyavei imombosapisa upe omondo mil tēi: ahe omondo ñepeí-peí upe seco etegüer rupi-rupi. Ipare voi oso cute. <sup>16</sup>Evocoiyase evocoi mbiguai oipisi vahe cinco mil guarepochi, ahe oporaviquí co guarepochi rese. Ipipe sui coiye oipisi catu iri ambuae cinco. <sup>17</sup>Inungar avei ambuae oipisi vahe dos mil, ichui oipisi catu iri ambuae dos mil. <sup>18</sup>Ambuae oipisi vahe rumo ñepeí guarepochi, ahe oyoho ivicuar. Aheve oñoti güerecuar guarepochi.

<sup>19</sup>“Ipare coiye oyevisse serecuar, ahese oñeche güembiguaí upe oguarepochi retacuer cua āgua. <sup>20</sup>Yipindar cinco mil guarepochi oipisi vahe ranengatu oyemboya güerecuar rese aipo ehi: ‘Ndo co acoi erembou vahe cinco mil cheu, ichui co ambuae cinco aipisi irimi ndeu’ ehi. <sup>21</sup>‘Aviye ité, nde mbiguai seco aviye vahe ereico iyavei eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese’ ehi chupe. <sup>22</sup>Ipare ambuae sembiguai oipisi vahe dos mil guarepochi, oyemboya güerecuar rese aipo ehi chupe: ‘Ndo co erembou vahe dos mil cheu. Ipipe sui co ambuae aipisi irimi dos mil avei ndeu’ ehi. <sup>23</sup>‘Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique

che piri, yayembovihara che rese’ ehi avei chupe.

<sup>24</sup>“Ipare acoi oyepotase ambuae mbiguai oipisi vahe mil guarepochi, ahe aipo ehi güerecuar upe: ‘Che aicua nde reco; nde acoi ndihavai vahe ereico. Esepia, ava remitigüer tēi eremonuha iyavei imbovepírer tēi avei ereipisi ndeyeupe nara. <sup>25</sup>Sese che siquiyesa pipe añomi ivivrive nde guarepochi. Ndo co nde mbahe’ ehi chupe. <sup>26</sup>‘Nde mbiguai ndaseco pōrai vahe, yangaipa vai vahe avei ereico. Nde niha ereicua che recocuer aipisise mbahe nañotii vahe sui. <sup>27</sup>Ereyapocatumira che guarepochi guarepochi apocatusave cuese rahe viña che yevise voi senose āgua cheu imboyeví catumi āgua viña’ ehi. <sup>28</sup>Ipare aipo ehi: ‘Perocua guarepochi ichui, pemondora evocoi diez rupi guarepochi omboeta vahe upe’ ehi. <sup>29</sup>‘Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembierecomi ichui. <sup>30</sup>Sese pemose co mbiguai ēgüe ehi tēi vahe ocarve pītumimbisave. Aheve toyaseho, tasāitere tēi oī’ ehira serecuar chupe’ ehi Jesús oreu.

**Jesús oura opacatu ava recocuer  
rese porandu āgua**

<sup>31</sup>“Che, Ava Riquehir, ayevisse, opacatu che Ru rembiguai iva pendar reseve che reco ivategüer pipe, ahese aguapira che renda porañete vahesave ava recocuer rese porandu āgua. <sup>32</sup>Evocoiyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rārosar oipeha vahe ovesa cavara sui. <sup>33</sup>Che evocoiyase ovesa aipehara mbahe rese che pocosa coti, cavara mbahe rese che pocoñehisa coti. <sup>34</sup>Ahese che mborerecuar ivate



catu vahe aipo ahera che acato cotindar upe: ‘Perio pe opacatu che Ru sui sovasapri peico vahe, peique che Ru mborerecuasa pipe; ahe acoi yipive ivi apo ramo suive imoingatupri pëu nara. <sup>35</sup> Esepia, ndacheriepoise, pe evocoiyase pembou mbahe che remihura; iyavei che huseise, pe evocoiyase pembou taihu; che aguata tēise pe recua rupi vichico, pe avei oi pembou che que āgua. <sup>36</sup> Turucuar cheu ipanese, pe avei pembou che turucuarā; chembaheasise, peso avei che piri; che roquendasave peso avei che repia no’ ehi. <sup>37</sup> Evocoiyase evocoi seco catupri vahe aipo ehira yuvireco cheu: ‘Ore Yar, ¿mbahese vo nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu? <sup>38</sup> ¿Mbahese vo nde repiasa nde guatase ore recua rupi, ipare nde monguesa ore piri, ipanese nde turucuarā, ore aipo evocoiyase oromondo ndeu? <sup>39</sup> Iyavei, ¿mbahese vo aipo nde repiasa nembraheasise, anise que nde roquendasave, aheve aipo oroso nde repia yepi?’ ehira yuvireco cheu. <sup>40</sup> Evocoiyase che, mborerecuar ivate vahe, amboyevira yuvireco chupe aipo ahera: ‘Supi eté, opacatu mbahe peyapose que ñepeí seco mbegüemi vahe che reroyasar pāhu pendar upe viña, cheu rumo ēgüie peye’ ahera.

<sup>41</sup> “Ahe se aipo ahera cute che mbahe rese pocoēhisa cotindar upe: ‘Pesiri che sui. Esepia, pe peico Tūpa ñemoirosavri pendar. Pesopa tata guasu apirēhisave, evocoi imoingatupri opacatu caruguar upe nara serecuar reseve. <sup>42</sup> Esepia, ndacheriepoise, pe evocoiyase: Yamondomi icaru āgua, ndapeyei eté cheu; che huseise, ahese, Yamondomi toihu, ndapeyei avei cheu; <sup>43</sup> ambuae tecua pipe aguata tēise vichico, ahese, Eique che rēlave che piri, ndapeyei eté cheu. Ipanese che turucuarā, pe

rumo ndapembou cheu, chembaheasise vichico, iyavei che roquendasave, Yasomi tēi sepia, ndapeyei eté cheu’ ahera. <sup>44</sup> ‘Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarā ndeu no, nembraheasise, anise nde roquendasave, marase vo mbahe rese nande pītiviisai?’ ehi tēira yuvireco cheu. <sup>45</sup> ‘Supi eté acoi amove mbahe ndapeyapose que seco mbegüemi vahe upe viña. Ipise rumo cheu avei mbahe ndapeyapoi eté’ ahera. <sup>46</sup> Ahe ava yuvirasora Tūpa ñemoirosa apirēhi vahesave. Seco ivi vahe rumo teco ori opaēhisave yuvirasora” ehi Jesús oreu.

### Jesús yamotarēhimbar omboguai yuca āgua yuvireco

**26** Ipare Jesús aipo ehi oreu: <sup>2</sup>—Pe peicua ñuvirío ari tēi ipane vite co Pascua pieta yepota āgua yandeu. Ahese che, Ava Riquehir, imondopri aicora che atica āgua curusu rese yuvireco —ehi.

<sup>3</sup> Ahe pipeve avei Jerusalén ve, co pahi rerecuareta, iyavei judío rerecuareta oñemonuha yuvireco pahi rerecuar ivate catu vahe Caifás rēlave. <sup>4</sup> Aheve oñemoñeta: ‘Yambopa ipisi yuca āgua’ ehi yuvireco oyeupe. <sup>5</sup> Ahe rumo:

—Ndiyai pieta pipe ité yaipisi ava rehii yemondii guasuēhi āgua yandeu —ehi.

### Cuña oipiyere Jesús āca rese mbahe siacuá vahe

<sup>6</sup> Jesús tecua Betania ve secoi, Simón lepra vireco vahecuer rēlave. <sup>7</sup> Aheve mesave chiniseve, cuña vireco vahe mbahe siacuá vahe siru reseve viroyepota chupe. Ahe oipiyere Jesús āca rese. <sup>8</sup> Orosepiase rumo oroñemoiro aipo orohe oreyeupe:

—¿Mahera vo co omocañi tēi!  
<sup>9</sup> Omondo vahe ité tie co setá

guarepochi rupi ava iparaisu vahe pītīvīi āgua viña —orohe tēi chupe.

<sup>10</sup> Jesús rumo oicua ore pīhañemoñe-tasa. Sese aipo ehi oreu:

—¡Mahera vo co cuña pemañeco tēi! Esepia, co mbahe oyapo vahe aviye ité cheu.

<sup>11</sup> Ava iparaisu vahe niha yuvire-coiño itera pe pāhuve. Che rumo ēgüe ndahe viteñoi chira vichico pe pāhuve.

<sup>12</sup> Esepia, co cuña oipiyere mbahe sīacua vahe che rese che tī āgua renondeve.

<sup>13</sup> Supi eté aipo ahe pēu: co ñehesa pīsirosa resendar mombehuse opacatu tecua rupi, imombehusa aveira co cuña rembiapo sese mahenduha āgua —ehi.

**Judas Iscariote oyemoingatu  
Jesús mondo āgua  
yamotarēhimbar povrive**

<sup>14</sup> Ipare ñepepe ore pāhu pendar, Judas Iscariote, oso, oñehe pahi eta rerecuar yuvirecoi vahe upe <sup>15</sup> aipo ehi:

—¿Mbovi rupi vo pemboepira cheu amondose Jesús pēu viña? —ehi.

“Treinta guarepochi rupi” ehi yuvireco chupe. <sup>16</sup> Ahesa reseve voi oseca Jesús mondo āgua yamotarēhimbar upe.

**Jesús caru agüer ipa  
vahe güemimbohe rese**

<sup>17</sup> Ari yipindar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yandeu? —orohe chupe.

<sup>18</sup> Evocoyase,

—Peso tecua guasuve che cua vahe rētave aipo peyera chupe: ‘Ore Mbohesar aipo ehi: Cōimi che mano āgua, sese ayapo potami sētave Pascua pieta che remimbohe reseve, ehi ndeu’ peyera chupe —ehi.

<sup>19</sup> Evocoyase oyapo semimombehu rupi tupri ité yuvireco, omoingatu

carusa Pascua pieta resendar yuvireco aheve.

<sup>20</sup> Pītu ramomise, opacatu oroguari mesave Jesús piri ore caru āgua. <sup>21</sup> Ore carusave aipo ehi oreu:

—Supi eté aipo ahe pēu: ñepepe pe pāhu pendar che mondora che amotarēhisar upe —ehi.

<sup>22</sup> —Che Yar, ¿che pīha? —orohe-rohe tēi ñepepepe ore yacatu ore viharēhisa pipe chupe.

<sup>23</sup> —Omodo vahe opo che caro pipe, ahe che mondora che amotarēhisar upe —ehi—. <sup>24</sup> Imboaviyesa itera che, Ava Riquehir, rese ñehesa icuachiapri. ¡Iparaisu catura rumo acoi mbia che mondosar! Aviye catura ndoyesuisse viña —ehi.

<sup>25</sup> Ahese Judas imondosavi oporandu: —Ore Mbohesar, ¿che tie? —ehi.

—Taa, ¡nde ité niha ēgüe erera! —ehi chupe.

<sup>26</sup> Ore caru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi oreu imondo, aipo ehi:

—Ndo co, pehu co che rete —ehi.

<sup>27</sup> Ipare oipisi igua riru, “Aviye ndeu” ehi Vu upe. Aipo ohe pare ombou oreu aipo ehi:

—Peihu peyacatu co sui. <sup>28</sup> Esepia, co che ruvi, ahe omoimera che Ru remimbotar ipiasu vahe pēu, ahe oyepiyerera ava rehii angaipa rese ñero āgua. <sup>29</sup> Ndaihu iri chira uva ricuer cheu ari oyepotase voi che Ru mborerecuasave aihura pe rese ambuae uva ricuer ipiasu vahe —ehi oreu.

**Jesús, “Ndaicuai vahe ité aipo mbia’  
erera cheu” ehi Pedro upe**

<sup>30</sup> Ore sapucaire, oroso ivitri Olivo ve. <sup>31</sup> Evocoyase Jesús aipo ehi oreu:

—Opara pemocañi che rese yeroyasa peyesui co pītu pipe. Esepia, acoi icuachiapri pipe aipo ehi: ‘Ayucara ovesa rārosar, ahese oñemosai tēira

ovesa opacatu rupi yuvireco' ehi vahe.  
<sup>32</sup>Che cuerayevire rumo, aso voi etera pe renonera Galilea ve —ehi.

<sup>33</sup>Pedro rumo,

—Yepe ambuae opacatu nande reroya iri chira yuvireco, che rumo ndayepepii chietera nde sui —ehi chupe.

<sup>34</sup>—Che rumo supi eté aipo ahe ndeu: co p̄itu pipeve voi eté tacura ñehe renondeve, “Ndaicuai vahe ité aipo mbia” erera mbosapi oyupagüer rupi cheu —ehi Pedro upe.

<sup>35</sup>Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahei chietera —ehi-ehi catuño ité chupe.

Aipo orohe p̄ave tupri t̄ei chupe.

### Jesús oyerocui Getsemaní ve

<sup>36</sup>Ipare Jesús rupi orosoño Getsemaní ve. Aheve aipo ehi oreu:

—Peguapi cohavé; che aso ranera peve catumi, ayeroqui —ehi.

<sup>37</sup>Aheve viraso Pedro oyeupi iyavei ñuvirío Zebedeo rahir. Ahese oyandu ovihar̄ehisa oico. <sup>38</sup>Evocoiyase ahe aipo ehi chupe:

—Ndavihai eté. Esepia, che h̄a oyandu ité manosa. Pepita rane cohavé iyavei pemahemohara pe yeroqui pipe che rese —ehi.

<sup>39</sup>Evocoiyase oso tenonde catumi. Aheve oñenopiha ovapi ivi rese oyerocui Vu upe aipo ehi: “Che Ru, iyase ndeu che renose mbahe-mbahe t̄ei sui eve; tayapo eme ru che remimbotar t̄ei, nde remimbotar rupi catu tayapo” ehi.

<sup>40</sup>Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—¡Ndapeñemosai eté vo pe ropesii upe che r̄aro ñgua que ñepeí hora che mondugüe ñgua peye! <sup>41</sup>Pemahemoha, peyerocui mbahe t̄ei pipe pe viapīehi ñgua. Supi eté pequer̄ehi ité viña, pe retecuer t̄ei niha nipiratai p̄eu —ehi.

<sup>42</sup>Ichui imoñuviriosa rupi oso iri oyerocui aipo ehi: “Che Ru, ereipotase che reique ñgua co mbahe t̄ei pipe, eyapo nde remimbotar che rese” ehi.

<sup>43</sup>Ipare oyeveise, osesapiha iri ique-seve ou. Esepia, sopesii nomboyeroyai eté yuvireco. <sup>44</sup>Evocoiyase oseyapa iri oso oyerocui ñgua imombosapisa rupi. Aipo ehi tupriño avei oyerocui Vu upe.

<sup>45</sup>Ipare oyevi iri güemimbohe upe aipo ehi chupe no:

—¡Pequeño vite vo peyu! Osupiti che, Ava Riquehir, mondo ñgua ava yangaipa vahe povrive. <sup>46</sup>Pepüha, yaso. Esepia, c̄oimi eté che amotar̄ehisar upe che mondo vaher̄a secoi —ehi.

### Jesús oipisi yuvireco

<sup>47</sup>Jesús ñehe viteseve, Judas oyepota oso chupe. Ahe ñepeí semimbohe ore p̄ahu pendar, iyavei setá iteanga ava yugüeru quise pucu, ivira reseve-seve supi. Ahe pahi eta rerecuar yuvirecoi vahe judío rerecuareta porocuaíta rupi oyapo yuvireco. <sup>48</sup>Yipindar rumo imondosar Judas aipo ehi: “Asovaupitese, ahese peicuara; ahe peipisira” ehi. <sup>49</sup>Ipare oyemboya voi oso sese.

—¡Avirave, Porombohesar! —ehi sovaupite.

<sup>50</sup>—Che mboripar —ehi Jesús—, eyapoño mbahe nde remimbotar cheu —ehi.

Aheseve voi oipisi yuvireco.

<sup>51</sup>Evocoiyase semimbohe secoi vahe supi vinose oquise pucu, oyasia pahi rerecuar ivate catu vahe rembiguai nambi.

<sup>52</sup>—¡Aní! —ehi güemimbohe upe—. Emoingue siru pipe nde quise pucu. Esepia, acoi ava opacatu ovava vahe oquise pipe yuvireco, ipipe avei opara yucasa yuvireco. <sup>53</sup>¿Ndereicuai vo aporanduse che Ru uve viña, ahe evocoiyase c̄uritei voi omboura doce mil sui setá catu vahe güembiguai che repi ñgua

viña? <sup>54</sup> Ēgüe ehise rumo Tūpa Ñehen-gagüer icuachiapri ndayaviyei chietera viña, ahe co cūrītei osupiti —ehi.

<sup>55</sup> Ahese aipo ehi ava rehii upe:

—Pe quise pucu, ivira reseve-seve rutei co peyu che ropeña che pisi āgua imonda rai vahe nungar che rereco peye. Che ari yacatu rupi aguapise pe pāhuve pe mbohe āgua tūparo pipe, ndapeyapoi eté co nungar cheu. <sup>56</sup> Co rumo opacatu ēgüe peye Tūpa ñehe mombehusar rembicuachiagüer mboaviye āgua cute —ehi ava rehii upe.

Ahese voi opacatu oroñemosaiapa, oroseya ahe aetemi Jesús ava rehii upe imoha.

### **Jesús serasosa pahi rerecuar ivate catu vahe rovai**

<sup>57</sup> Ahese Jesús pīsarisar vīraso Caifás rē-tave yuvireco, ahe pahi rerecuar ivate catu vahe seci. Aheve oñemonuha Moisés porocuita rese oporombohe vahe, judío rerecuar yuvirecoi vahe avei no. <sup>58</sup> Pedro rumo amombri rupive tēi osaquicue moña oso. Ēgüe ehi oyepota pahi rerecuar ivate catu vahe rēta ro-car āchisave. Aheve oi que ipipe, iyavei oguapi oī sundao pāhuve ‘¿mara ehi etera piha sereco yuvireco?’ oya.

<sup>59</sup> Ahese pahi eta rerecuar iyavei opacatu porandusa ivate catu vahe pendar, ahe oñhengapo-ngapo uca tēi ava Jesús amotarēhisave yuca uca āgua yuvireco, <sup>60</sup> yepe oyemboyecua setá iteanga yamotarēhisar semira-mira tēi vahe yuvireco viña, ndoyosui eté rumo mbahe sembiapo naporai vahe yuca uca āgua yuvireco. Aheseve yugüeru ñuvirío yamotarēhisar oporombopa-mbopa tēi vahe yuvireco cute.

<sup>61</sup> —Co mbia aipo ehi: ‘Che aicatu co tūparo monduru; aicatu aveira imopuha iri mbosapi ari rupi’ ehi —ehi tēi yuvireco chupe.

<sup>62</sup> Ahese pahi rerecuar ivate catu vahe opūha, oporandu Jesús upe:

—¿Mahera vo nderemboyevii eté iñehe yuvireco chupe? ¿Mbahe ehi vo aipo nde amotarēhisar nde rese oñehe? —ehi.

<sup>63</sup> Noñehei eté rumo. Ahese,

—Che orocuai Tūpa supi eté vahe rer pipe emombehu oreu: ¿Poropīsīrosar ité nde ereico, Tūpa Rahir? —ehi pahi rerecuar ivate catu vahe chupe.

<sup>64</sup> —Taa, supi eté niha aipo aipo ere cheu, co catu amombehura pēu, che repiara niha peye che, Ava Riquehir, aguapise Tūpa mbahe mboavaisarēhi acato coti, ayevise avei iva quiha rese curi —ehi.

<sup>65</sup> Evocoiyase pahi rerecuar ivate catu vahe imboasipave omondo oturucuar aipo ehi:

—¿Indó, mbahe tēi eté iñehe Tūpa upe! ¿Mbahe iri vo yaipota vite yaico! Yasendupa niha aipo Tūpa upe iñehe-ñehe tēisa cūrītei. <sup>66</sup> ¿Mara ehi aipo pe pihave? —ehi.

—Supi eté, oyavi mbahe. ¿Tomanono ité! —ehiño ivoya eta yuvireco chupe.

<sup>67</sup> Ahese ondivi-ndivi sova rese iyavei yuvirocua-rocua yuvireco sese. Ambuae osovapete-pete, <sup>68</sup> aipo ehi yuvireco chupe:

—Nde niha aipo ereico Tūpa remimbou Poropīsīrosar, ¿icua ité ru, ava evocoi ocua nde rese? —ehi yoyai catu-catu yuvireco.

### **Pedro, “Ndaicuai vahe evocoi mbia” ehi Jesús upe**

<sup>69</sup> Pedro evocoiyase oguapi sāro ocarve ñachimbrī pipe oī. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

<sup>70</sup> Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

<sup>71</sup>Ichui oso oquendipive. Aheve om-  
ahe ambuae cuña sese. Ahe sepiase aipo  
ehi ava ahe pendar yuvirecoi vahe upe  
imombehu:

—Co ava avei acoi secoi Jesús Nazaret  
pendar rupi yepi —ehi ava upe.

<sup>72</sup>—¡Aní! —ehi iri ahe cuña upe—  
. ¡Tüpa oicua, supi eté ndaicuai aipo  
mbia! —ehi angahu tēi.

<sup>73</sup>Iparemi tēi aheve yuvirecoi vahe,  
oyemboya sese aipo ehi yuvirecoi chupe:

—Nde avei eté niha supindar ere-  
ico. Esepia, nde ñehes pārigüer rese nde  
cuasaño —ehi yuvirecoi.

<sup>74</sup>Ahe evocoyase,

¡Tüpa niha oicua ndopombopai eté  
niha! ¡Che ndaicuai vahe ité evocoi  
mbia, ahe mo aipo pēu! —ehi angahu tēi  
chupe.

Aipo iheseve, tacura oñehes. <sup>75</sup>Ahese  
Pedro oyemomahenduha Jesús oyeupe,  
'Acoi tacura ñehes renondeve mbosapi  
oyupagüer rupi: Ndaicuai vahe ité aipo  
mbia, erera cheu' ihe agüer rese. Ahese  
osē, oyasehó iteanga oso.

### Jesús serasosa Pilato rovai

**27** Cōhe ramose, ahese opacatu  
pahi eta rerecuar, judío rerecuar  
avei oñemonuha ati oyemboyoya  
guasu 'Jesús tayucasa ité' oyapave  
yuvireco. <sup>2</sup>Ipare oipocua-pocua seraso  
mborerecuar guasu Pilato upe yuvireco.

### Judas yeyuca agüer

<sup>3</sup>Judas, acoi Jesús omondo vahe  
yamotarēhisar uve oicua, "Jesús tayu-  
casa cute" ehise, ahese tasí iteanga  
chupe. Evocoyase oso voi tēi tüparo  
guasuve pahi eta rerecuar yuvirecoi  
vahe upe iyavei judío rerecuareta upe  
treinta guarepochi mboyevi āgua aipo  
ehi:

<sup>4</sup>—Che ayemboangaipa tiēte vichico.  
Esepia, amondoño tēi mbia secoi catupri  
vahe pēu yuca uca āgua —ehi mborere-  
cuareta upe.

—Mara etemo ore orovireco. ¡Nde  
remimbotar niha! —ehiño yuvireco  
chupe.

<sup>5</sup>Evocoyase opaño guarepochi  
omombó tüparo pipe. Ichui voi oso  
oyemboyaseco, oyeyuca.

<sup>6</sup>Pahi eta rerecuar rumo omonuhase  
guarepochi aipo ehi yuvireco oyeupe:

—Ndiyai rumo yamondo co guare-  
pochi porerecosa riru pipe. Esepia, ava  
yucapirā repri tēi —ehi yuvireco.

<sup>7</sup>Ipare oyoya guasu ipihañemoñeta  
yuvireco co guarepochi rese ñaihu  
rese oporaviqui vahe ivi rerocua āgua  
'toime ava secua ambuae vahe re-  
hōgüer tī āgua' oyapave yuvireco. <sup>8</sup>Sese  
cūrteitē co ivi upe, "Ava ruvi repri tēi"  
ehi yuvireco yepi. <sup>9</sup>Ēgüe ehi co im-  
boaviye ité Tüpa ñehes mombehusar  
Jeremías remimombehugüer aipo ehi  
vahe: "Oipisipa treinta guarepochi yu-  
vireco, ahe ava Israel suindar mborere-  
cuar remimombehugüer rupi eté evo-  
coi mbia pisi āgua. <sup>10</sup>Ipipe virocua  
ñaihu rese oporaviqui vahe ivi yuvireco.  
Cheu che Yar omombehu vahecuer rupi  
tupri ité oyapo yuvireco" ehi Tüpa ñehes  
mombehusar arachendar.

### Jesús serasosa mborerecuar Pilato rovai

<sup>11</sup>Jesús serasosa mborerecuar Pilato  
upe, ahese Pilato oporandu chupe:

—¿Nde ité vo judío rerecuar ivate catu  
vahe ereico? —ehi.

—Nde niha aipo, 'Ahe ereico' ere cheu  
—ehiño imboyevi Pilato upe.

<sup>12</sup>Evocoyase acoi pahi eta rerecuar  
iyavei judío rerecuareta oñemonuha  
vahe eipeve oiñehengapo-ngapo tēi yu-  
vireco. Nomboyevi eté rumo iñehes  
chupe oyeepi āgua. <sup>13</sup>Evocoyase:

—¿Nderesendui vo aipo co opacatu ndeu ñehe-ñehe tēisa? —ehi Pilato chupe.

<sup>14</sup>Nomboyevii eté rumo que ñepeí an-gara ñehesa chupe viña. “¡Too, mara ehi rutei vo co!” ehi-ehi tēi mborerecuar chupe.

**“¡Tayaticasa!” ehi Jesús  
upe ava yuvireco**

<sup>15</sup>Mborerecuar guasu recosa ité ñepeí ava soquendapri renose āgua Pascua pieta pīpe ava rehii remimbotar rupi yepi. <sup>16</sup>Aheve oime soquendapri mbia icuapri vahe ité Barrabás serer vahe; <sup>17</sup>evocoyase ava rehii oñemonuha atise, Pilato oporandu chupe yuvireco:

—¿Uma peipota che amose ucara pēu: Barrabás pīha, anise Jesús “Poropīsirosar” ehi vahe yuvireco chupe tie? —ehi.

<sup>18</sup>Esepia, ahe oicuaño ité ava rese yemoecatēhisa pīpe sui imondopri secoise.

<sup>19</sup>Pilato güendave chini viteseve, sem-bireco omondo oñehe chupe aipo ehi: “Ereyapoi rene mbahe evocoi ava seco catupri vahe upe. Esepia, che querve asepia mbahe tēi eté sesendar” ehi.

<sup>20</sup>Evocoi pahi eta rerecuar iyavei judío rerecuareta rumo ava rehii omonguerēhi, “Barrabás tosē; Jesús evocoyase tomano” he āgua yuvireco.

<sup>21</sup>Evocoyase Pilato oporandu iri ava rehii upe:

—¿Uma peipota catu co ñuvirío yuvirecoi vahe sui amose vaherã pēu? —ehi.

—¡Barrabás tosē! —ehi yuvireco.

<sup>22</sup>—¿Mbahe vo evocoyase che ayapora Jesús rese chupe acoi ava, “Poropīsirosar” ehi yuvireco? —ehi.

—¡Tayaticasa curusu rese! —ehi ati-atño yuvireco chupe.

<sup>23</sup>—¿Mbahe ité vo oyapo naporai vahe? —ehi tēi ava rehii upe.

Ahe rumo:

—¡Tayaticasa ité curusu rese! —ehi ati-atño iriño yuvireco chupe.

<sup>24</sup>Evocoyase Pilato: “Ndaicaturi mbahe moingatu sepi āgua” ehi tēi oyeupe. Sese ava yaivu guasu catu-catu irise, ogüeru uca i. Ipipe oyepoi opacatu ava rehii rovaque aipo ehi:

—Ndahei che remimbotar rupi co mbia yucasara; pe remimbotar rupi eté —ehi.

<sup>25</sup>—¡Ore rese ité, ore rahir rese avei toviapi que mbahe tēi co mbia mano sui! —ehi atiño ité yuvireco.

<sup>26</sup>Ahese Pilato omose uca Barrabás; Jesús rumo oinupá iteanga uca tucumbo tupeicha nungar pīpe imondo curusu rese yatica āgua.

<sup>27</sup>Evocoyase mborerecuar sundao viroique Jesús ambuae oi pīpe. Aheve opacatu omboetasa omboyere tupri uca sese yuvireco. <sup>28</sup>Ahese osequiipa iturucuar ichui. Ipare omonde turucuar pīra vahe yuvireco sese <sup>29</sup>iyavei omonde ñaca rese yu piapri, omondo avei ñepeí tacuarmi mbahe rese ipocosa coti ipove yuvireco. Ipare oñenopiha angahu sovai yuvireco aipo ehi:

—¡Imboeteipri judío rerecuar tasecoi! —ehi angahu sese oguayí tēisa pīpe yuvireco.

<sup>30</sup>Iyavei ondivi-ndivi yuvireco sese. Ipare yuvirocua-rocua ipo pendar tacuarmi pīpe ñaca rese yuvireco. <sup>31</sup>Ēgüe ehi yoyai catu-catu yuvireco. Ipare virocuae turucuar pīra vahe ichui, ahese omonde iturucuar ité yuvireco sese. Ichui viraso curusu rese yatica āgua yuvireco cute.

**Jesús yaticasa curusu rese**

<sup>32</sup>Acoi yuvinosese yuviraso, osepia mbia Cirene pendar, Simón serer vahe. Ahe chupe, “Erio, terevosii co curusu Jesús vireco vahe rese” ehi voiño tēi yuvireco.

<sup>33</sup>Oyepotase yuviraso Gólgota serer vahesave, ahe ‘ava ācagüer’ oya aipo ehi chupe, <sup>34</sup>aheve uva ricuer imboyesehapri mbahe pihapiar rese omondo tēi yuvireco Jesús toihi. Osāha tēi, ndoihu potai rumo.

<sup>35</sup>Ipare oyatica curusu rese yuvireco. Ahese sundao iguayaiño oyeupe iturucuar mboyaho-yaho āgua rese. <sup>36</sup>Ipare aheve oguapī yuvinoi sāro. <sup>37</sup>Iyavei omombehu ivate curusu rese ñaca harive mbahe sui oyuca yuvireco: “Co Jesús judío rerecurar guasu” ehi icuachiapri oī.

<sup>38</sup>Ñuvirío imonda rai vahe yaticasa avei curusu rese supive yuvireco, ñepe mbahe rese ipocosa coti, ambuae evocoyase mbahe rese ipocoēhisa coti yuvireco. <sup>39</sup>Acoi ava ñocuasar iñehe-ñehe tēi, oñeaca mbovava, <sup>40</sup>aipo ehi yuvireco chupe:

—Nde acoi, “Opara tūparo amonduru. Ipare mbosapī ari rupi opa irira amopuha” ere acoi cuese. ¡Eñepisiro ru nde ae cute! ¡Tūpa Rahir nde recose, egüeyi curusu sui! —ehi tēi yuvireco chupe.

<sup>41</sup>Aipo ehi avei pahi eta rerecurar, Moisés porocuita rese oporombohe vahe iyavei judío rerecuareta avei; ahe iñehe mara-mara tēi yuvireco chupe aipo ehi:

<sup>42</sup>—Oipisiro ambuae, ahe ae rumo ndoicatui oñepisiro. Israel rerecurar guasu secoise, ¡togüeyi curusu sui cūritei, ahese voi seroyasara! <sup>43</sup>Ahe oyeroya Tūpa rese, Tūpa evocoyase oipotase, toipisiro cūritei. Esepia, ahe, “Che Tūpa Rahir aico” ehi yandeu cuese —ehi yuvireco.

<sup>44</sup>Imonda rai vahe avei rumo acoi yaticapri supive, ahe avei mara ehi-ehi tēi chupe.

### Jesús mano agüer

<sup>45</sup>Ahese mbiter ari pipe, opa tupri pītu ivi rupi. Ēgüe ehi las tres rupi. <sup>46</sup>Ahese tupri avei Jesús oñehe pīrata aipo ehi:

“Elí, Elí, ¿lema sabactani?” ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

<sup>47</sup>Ava aheve yuvirecoi vahe osenduse iñehe, aipo ehi yuvireco:

—Esendu co mbia, Tūpa ñehe mombehusar Elías upe oñehe —ehi yuvireco chupe.

<sup>48</sup>Aheseve voi imboetasa oña, oso mbahe saviyu vahe reca, omoaqui vinagre pipe imondo ivira apri rese chupe ‘toihi’ oya. <sup>49</sup>Ambuae rumo aipo ehiño yuvireco:

—Ēgüe tehiño rane, ¿oura pīha Elías ipisiro āgua? —ehi yuvireco.

<sup>50</sup>Ahese Jesús sāse pīrata iri, omano.

<sup>51</sup>Ahe pipeve voi tūparo guasu turucuar ivate coti sui ovo tupri. Aheseve avei ivi oririi iyavei ita guasu-guasu oyeca.

<sup>52</sup>Tehögüer ruvipa ita apopri avei oyemboi yuvireco iyavei setá Tūpa reroyasar omano vahecuer, ahe avei opa ocuerayevi yuvireco. <sup>53</sup>Ēgüe ehi Jesús cuerayevire, ahe opa yuvinose tehögüer ruvipa sui. Ipare yuviroique Jerusalén maranehi pipe. Aheve setá ava upe oyemboyecua yuvireco.

<sup>54</sup>Evocoyase co sundao rerecurar iyavei Jesús rārosareta, ahe oyanduse ivi ririi yuvireco iyavei ambuae mbahe Ēgüe ehi vahecuer repiase, ahese oyembosiquiye guasu aipo ehi yuvireco:

—¡Supi eté catu co mbia Tūpa Rahir ité secoi! —ehi tēi yuvireco.

<sup>55</sup>Iyavei setá cuña aheve amombrive osepia catu yuvinoha, ahe acoi Galilea sui yugüeru vahecuer Jesús rupi iyavei setá rupi oipitívii yuvireco yepi. <sup>56</sup>Ahe ipāhuve María Magdalena secoi, iyavei ambuae María ahe Santiago, José si, Zebedeo rahir si avei supi secoi.

### Jesús apocatu agüer tuvīpa pipe

<sup>57</sup>Pītu potase, ou mbia mbahe yar José serer vahe, ahe Jesús reroyasar tecua Arimatea pendar. <sup>58</sup>Evocoyase ahe oso

Pilato upe oporandu Jesús rehögüer rese. Evocoiyase Pilato aipo ehi: “Aviye, timondosaño chupe” ehi. <sup>59</sup>José evocoiyase viraso sehögüer. Ipare oimama tupri turucuar secose vahe ndiquihai vahe pipe. <sup>60</sup>Ichui omoingue ombahe tuvipa ipiasu vahe, ita oyoho uca vahe pipe. Ipare osovapi ita guasu yapayere vahe pipe oso. <sup>61</sup>Aheve María Magdalena ambuae María rese suvipa rovai uguapi yuvinoi.

### Jesús ruvipa osãro sundao yuvireco

<sup>62</sup>Ahere ayihive mbituhusa ari pipe, yuviraso pahi eta rerecuar iyavei fariseo Pilato upe mbahe rese oporandu água <sup>63</sup>aipo ehi yuvireco:

—Ore rerecuar, ore oroyemomahenduha acoi iporombopa serai vahe ñehe agüer rese: “Acuerayevira mbosapi ari pare omano vahe pãhu sui” ehi acoi cuese oicove vitesese —ehi yuvireco—. <sup>64</sup>Sese emondo sundao sehögüer ruvipa rãro tupri água mbosapi ari rupi semimbohe ñomiëhi água pïtu pipe yuvireco. Aviyeteramo, “Ocueraivei omano vahe pãhu sui” aipo ehi tupri tãtiëtera ava upe yuvireco. Aipo ehise yuvireco, yipindar semira tãti vahe sui ivate catura serecosa —ehi yuvireco.

<sup>65</sup>Pilato evocoiyase aipo ehi chupe yuvireco:

—Aviye —ehi—. Amondora sundao pãu. Peraso, pemoviracua tupri itã sãro água —ehi.

<sup>66</sup>Evocoiyase yuviraso tehögüer ruvipa rãro tupri água yuvireco. Ahese omondo tehögüer rovapisa ita guasu rese mbahe imomiisa cua água yuvireco. Ipare oseya aheve sundao sãro água yuvireco cute.

### Jesús ocuerayevi

**28** Cõhe ramomise, domingu pipe, María Magdalena iyavei ambuae María yuviraso tehögüer ruvipa repia

yuvireco. <sup>2</sup>Aviyeteramo tãti oririi pãratã ivi Tũpa rembiguai iva sui igüeyise. Ègüe ehi oyepota tehögüer ruvãpave ou, ahe virocua itape guasu sovapisa ichui. Ipare iharive uguapi oi. <sup>3</sup>Ègüe ehi sendã iteanga aviye acoi overa vahe. Iturucuar evocoiyase morochã etã. <sup>4</sup>Osepiase sundao, oririi eteanga osiquiyepave yuvireco ichui, opa oyuca pucu-pucu tãti yuvireco. <sup>5</sup>Tũpa rembiguai rumo aipo ehi voi etã cuña upe:

—Pesiquiyevi rene. Esepia, che aicua pe pesca Jesús yaticapirer. <sup>6</sup>Ndipoi etã cohave. Esepia, ahe ocuerayevi güemimombehu rupi etã. Tapesepia ru su-pagüer —ehi.

Ipare aipo ehi:

<sup>7</sup>—Peso poyava voi, tapemombehu semimbohe eta upe: ‘Ocueraivei omano vahe pãhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu água pãu —ehi Tũpa rembiguai cuña upe.

<sup>8</sup>Evocoiyase cuña yuviraso poyava voi suvipa sui, osiquiyevi pãhuve rumo ovihãno yuvireco; ègüe ehi yuvinoñã iteanga imombehu yugüeru oreu. <sup>9</sup>Ahese Jesús oyemboyecua cuña upe cute omboavirave. Ahe cuña evocoiyase oyemboya sese oñenopiha ipicuhaguã imboetisave yuvireco. <sup>10</sup>Evocoiyase ahe aipo ehi chupe:

—Pesiquiyevi rene che sui. Pesoño, tapemombehu che reroysareta upe. Ahe toyuviraso Galilea ve. Aheve che repiara yuvireco —ehi cuña upe.

### Sundao omombehu mbahe güembiepia yuvireco

<sup>11</sup>Cuña yuviraso vitesese, ahese moviro sundao yuviroique tecua guasu Jerusalãn pipe yuvireco. Ahe omombehupa pahi eta rerecuar upe opacatu mbahe osepiã vahecuer yuvireco. <sup>12</sup>Evocoiyase pahi rerecureta



oñemoñeta judío rerecuar rese opihañemoñeta mboyoya água. Ichui omondo setá guarepochi sundao upe yuvireco, <sup>13</sup> aipo ehiño yuvireco chupe:

—Aipo peyera ava uve: “Oroque vite-seve pĩtu pipe, ahese revo Jesús remimbohe yugüeru sehögüer ñomi água ore sui” peyera —ehi mborerecuar yuvireco chupe—. <sup>14</sup> Acoi oyanduse rumo mborerecuar guasu curi, ahese opoviroya ucara chupe. Evocoyase ndipoi chira mbahe pe rese —ehiño pahi eta rerecuar sundao upe yuvireco.

<sup>15</sup> Evocoyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Ēgüe ehi vite cūrítei judío Jesús cuerayevisa reroyaēhi yuvireco yepi.

**Jesús omondo güemimbohe ivi  
yacatu rupi oñehengagüer  
mombehu água**

<sup>16</sup> Evocoyase ēgüe orohe oroso semimbohe once oroico vahe Jesús

remimombehu ivi Galilea pendar ivitrive. <sup>17</sup> Acoi orosepiase rumo Jesús, ahese oromboetei oroico, yepe moviro tēi ore pāhu pendar ndoviroya tupri vitei yuvireco viña. <sup>18</sup> Evocoyase ahe oyemboya ore rese aipo ehi oreu:

—Tüpa che mbou mborerecuar ivate catu vahe che reco água ivave, ivive nara avei no —ehi—. <sup>19</sup> Peso ava upe opacatú ivi rupi iyavei pembohe che recocuer rupi eté yuvirecoi vaheṛā; peñapiramo avei che Ru rer pipe, che rer pipe, Espíritu Santo rer pipe avei no. <sup>20</sup> Iyavei pembohe che opacatu pe mbohe agüer reroya água rese —ehi—. Peicuañora che aicovera pe reseve ari yacatu rupi yepi, acoi ari ipa vahe rupi —ehi Jesús oreu.

Aviye, aipo rupive.

*MARCOS REMBICUACHIA  
JESUS RECOCUER RESENDAR*

**San Marcos**

**Juan Oporoãpiramo vahe  
ivi iporupirêhisa rupi secoi**

**1** Co yipindar aviye vahe ñehesa Jesucristo, Tüpa Rahir, recocuer resendar amombehu potami pëu. <sup>2</sup>Yipiindar Tüpa aipo ehi imombehu oñehemombehusar Isaiás rembicuachía pipe aracahe:

“Amondora che ñehemombehusar nderenonera, ndeu peri moatiro água” ehi.

<sup>3</sup>“Oyeendu ñehesa ipírata vahe avaporêhisave: ‘Pemoingatu yande Yar raperã; pemohivi tupri avei’ ehi” ehi aracahe.

<sup>4</sup>Ëgüe ehi Juan ou ava ápiramo ivi iporupirêhisa rupi oico, aipo ehi: “Pemboasi pe angaipa, peyevi Tüpa upe, ahese opoãpiramora Tüpa pëu ñero água pe angaipa rese” ehi ava upe. <sup>5</sup>Opacatu ava oyugüeru iñehere ndu água ivi Judea rupindar, iyavei tecua Jerusalén pendar oangaipagüer mombehu água. Ahese Juan oñapiramo iai Jordán pipe.

<sup>6</sup>Juan turucuar camello ragüer apopri, sumbicuasa mbahe pirer, sembihu evocoyase tucru, eiri caha pipendar avei. <sup>7</sup>Ahe aipo ehi oñehemombehu ava upe oico: “Cheraquicuei oura seco pírata catu vahe che sui, sese cheu ndiyai chira ayeaivi ipitaquisã yora água. <sup>8</sup>Chesupi eté opoãpiramo i pipe tãi; ahe rumo pe ápiramora Espíritu Santo pipe” ehi.

**Jesús ápiramo agüer**

<sup>9</sup>Ipare Jesús osê tecua Nazaret sui oso Galilea rupi. Aheve Juan oñapiramo iai Jordán pipe. <sup>10</sup>Osê ramoseve i sui, Jesús osepiá iva oyemboi tupri, ahese Espíritu

ogüeyi iharive apicasu nungar. <sup>11</sup>Ahese oyeendu ñehesa iva sui aipo ehi: “Nde che Rahir ereico, che rembiaisu, aviha etepri nde rese” ehi vahe.

**Jesús recoãhasa**

<sup>12</sup>Ipare voi, Espíritu Santo viroguata Jesús ava porêhisa rupi. <sup>13</sup>Aheve Jesús secoi cuarenta ari mbahe mimba vai páhuve. Aheve avei Carugar osecoãha; Tüpa rembiguai iva pendareta rumo ihañecoño yuvireco sese.

**Jesús omboipi  
oporaviqui Galilea rupi**

<sup>14</sup>Juan roquenda pare, Jesús oso ivi Galilea rupi, omombehu ñehesa aviye vahe Vu recocuer resendar ava upe oico <sup>15</sup>aipo ehi: “Oyepota ari iyavei cõimi eté Tüpa mborerecuasa yandeu. Sese, pemboasi pe angaipa, peyevi Tüpa upe, iyavei peroya co ñehesa aviye vahe Tüpa suindar” ehi.

**Jesús, “Perio che rupi” ehi  
irungatu pira mbohasar upe**

<sup>16</sup>Ñepe ari Jesús uguata ipa Galilea ivii. Ahese osepiá Simón, tivri Andrés avei, ahe pira omboha yuvireco. <sup>17</sup>Ahese Jesús aipo ehi chupe:

—Pe pira recasar peico, perio che rupi, na peye aveira ava reca água cheu nara —ehi.

<sup>18</sup>Aipo he ramoseve voi, opoi opira mbohasa sui yuvireco, yuviraso supi.

<sup>19</sup>Ipare chíhi uguata irimise, ahese osepiá Santiago, Zebedeo rahir, tivri Juan reseve carite pipe omoingatu opira mbohasa yuvinoi vu píri. <sup>20</sup>Ahe chupe avei: “Perio che rupi” ehi, evocoyase vu oseya carite pipe ipãtiviisar reseve, yuviraso supi.

**Mbia carugar vireco vahe oyese**

<sup>21</sup>Oyepotase tecua Capernaum ve yuvireco mbituhusa ari pipe, Jesús

oique oporombohe tūparove. <sup>22</sup> Evocoyase ava osenduse iporombohesa, “¿Mara ehi rutei?” ehi tēi yuvireco chupe. Esepia, ahe oporombohe güeco pīratasa pipe, ndahei Moisés porocuita rese oporombohe vahe nungar. <sup>23</sup> Aheve mbia ahe tecua pendar vireco vahe carugar oyese, ñehe pīrata chupe aipo ehi:

<sup>24</sup> —¿Mahera vo ereyuño tēi cohave oreu, Jesús Nazaret pendar? ¿Ereyu vo ore mocañi āgua tēi? Che orocua ité, nde Tūpa suindar ndaseco marai vahe ereico —ehi chupe.

<sup>25</sup> Ñehe pīrata rumo carugar upe aipo ehi: —¡Quiriri, esē co mbia sui! —ehi chupe.

<sup>26</sup> Evocoyase carugar mbia rese secui vahe omoehoha seiti ivive, sāsē, osē oso ichui. <sup>27</sup> Opacatu ava ombosiquiye, ichui oporandu-randu oyeupe yuvireco aipo ehi:

—¿Mbahe pīha co? ¡Iporombohesa ipiasu vahe ité! ¡Co mbia vireco ité omborecuasa! ¡Carugar avei eté omboyeroya oyeupe ñehese! —ehi tēi ava yuvireco.

<sup>28</sup> Cūrteimi voi yandusa serācua opacatu ivi Galilea rupi.

### **Jesús ombogüera Pedro rembireco si**

<sup>29</sup> Jesús yuvinosese tūparo sui, yuviraso Santiago, Juan rese Simón, Andrés rētave. <sup>30</sup> Aheve Simón rembireco si sohí iteanga vupave ou. Evocoyase omombehu Jesús upe imbaherasisa yuvireco. <sup>31</sup> Ahese oso chupe oipisi ipo rese imopuha, ahe ramoseve, sohi opituhu ichui. Ipare voi ahe cuña ihañeco semi-hura rese.

### **Jesús setá ombogüera ava imbaheasi vahe**

<sup>32</sup> Pītu ramose opacatu imbaheasi vahe iyavei carugar vireco vahe viraso yuvireco chupe imbogüera

āgua. <sup>33</sup> Opacatu ava ahe tecua pendar ñemonuha oquendipive yuvireco. <sup>34</sup> Evocoyase setá ombogüera mbaherasi-rasi tēi vireco vahe, iyavei omboyepipi setá carugar ava sui. Ndoipotai rumo carugar ñehe. Esepia, ahe oicua ité evocoyase seco yuvireco.

### **Jesús Vu Tūpa Ñehengagüer omombehu judío tūparo rupi**

<sup>35</sup> Ayihiteve Jesús ñarapuha oso ava porēhisave oyoerqui āgua. <sup>36</sup> Evocoyase Simón ondugüer reseve yuviraso seca.

<sup>37</sup> Osepia,

—Opacatu ava nde reca tēi yuvireco —ehi yuvireco chupe.

<sup>38</sup> Ahe rumo,

—Yaso ambuae tecua namombrii va-hesa rupi Tūpa Ñehengagüer mombehu āgua aheve; evocoi nungar apo āgua niha che ayu —ehi.

<sup>39</sup> Ēgüe ehi oguata opacatu Galilea ivi rupi, omombehu Vu Tūpa Ñehengagüer judío tūparo yacatu rupi oico, iyavei setá omose carugar ava sui.

### **Jesús ombogüera mbia lepra vireco vahe**

<sup>40</sup> Ñepe mbia lepra rerecosar oyem-boya Jesús rese, ñenopiha sovai aipo ehi:

—Ereipotase, iya nde che mbogüerami eve —ehi.

<sup>41</sup> Iparaisuerecosave opoco sese.

—Aipota. ¡Erecuerara cūrtei! —ehi chupe.

<sup>42</sup> Aipo ihe ramoseve, ocuera voi eté. <sup>43</sup> Ahese aipo ehi iri chupe icho renondeve:

<sup>44</sup> —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porerecosa nde cuerasa resendar Moisés porocuita rupi. Evocoyase to-icua opacatu ava yuvireco nde cuerasa —ehi chupe viña.

<sup>45</sup>Ahe mbia rumo oso omombehu-mbehu opacatú ava upe. Sese Jesús ndoicatu iri güeique água güecocuer mombese tecua rupi; secoiño tēi tecua popi rupi ava porēhisave. Ava rumo yugüeruño ité opacatu tecua rupindar sepia.

### Jesús ombogüera ava ndoguatai vahe

**2** Ñepeí ari pipe Jesús oyeví ou tecua Capernaum ve, ahese opacatu oyandu ñepeí oive secoise yuvireco. <sup>2</sup>Cūrteimi voi eté setá ava oñemonuha yuvireco secosave. Sese ndipoi eté ava reique iri água oí pipe oquendipi rupi. Ahe rumo omombehuño ité Vu Ñehengagüer. <sup>3</sup>Aheseve irungatu mbia viroyepota ndoguatai vahe yuvireco chupe. <sup>4</sup>Ahe rumo ndiyai seroique água Jesús uve ava rehisave yuvireco. Sese viroyepi oi harive seraso yuvireco. Aheve teca virocua oí sui yuvireco; supi viroyi supa reseve imondo Jesús rovai tupri yuvireco. <sup>5</sup>Ahe oicuase co mbia yuvirecoi vahe oyese yeroya, aipo ehi imbaheasi vahe upe:

—Che rahir, che ñero nde angaipa rese ndeu —ehi.

<sup>6</sup>Moisés porocuita rese oporombohe vahe rumo ipihañemoñeta aheve yuvinoi: <sup>7</sup>“¿Mahera co mbia aipo ehiño tēi oñehe? Ahe oyemboivate ai tēi vahe Tūpa ñehe nungar pipe tēi oñehe. Tūpaño ité niha oicatu ava angaipa upe oñeroi água” ehi. <sup>8</sup>Ahe rumo oicuano ipihañemoñetasa, sese aipo ehi:

—¿Mahera vo pepihañemoñeta rai tēi che rese? <sup>9</sup>¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa pīha, anise: “Eñarapuha, esupi nde rupa, eguata” hesa tie? <sup>10</sup>Tapeicua ru che, Ava Riquehir, areco mborerecuasa co ivi pipe ava angaipa upe che ñero água —ehi.

Evocoyase aipo ehi imbaheasi vahe upe:

<sup>11</sup>—Eñarapuha, esupi nde rupa, eso nde rētave —ehi.

<sup>12</sup>Imbaheasi vahe aipo ihe ramoseve, oñarapuha, osupi vupagüer, osē oso ichui opacatu ava rembiepiave. Sese opacatu oyepihamondii yuvireco, omboetei Tūpa yuvireco aipo ehi:

—Yipisuive ndayasepiái vahe ité co nungar mbahe —ehi tēi yuvireco.

### Jesús oñehe mbia Leví serer vahe upe

<sup>13</sup>Ipare Jesús oso iri ipa ivii. Aheve oporombohe oyese ava rehii yemboyase. <sup>14</sup>Ichui oguata vitesa, osepiá Leví, Alfeo rahir, guarepochi rerocuasave chinise, aipo ehi chupe:

—Erio che rupi —ehi.

Evocoyase Leví opūha, oso voi supi.

<sup>15</sup>Ipare ocaru Leví rētave güemimbohe reseve yuvireco, ava sui guarepochi rerocuar iyavei ava yangaipa vahe pāhuve. Esepia, setá ava osaquicue moñaño ité yuvireco. <sup>16</sup>Evocoyase Jesús ocaruse ipāhuve, fariseo eta, oporombohe vahe Moisés porocuita rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi rerocuar iyavei yangaipa guasu vahe pāhuve tēi? —ehi.

<sup>17</sup>Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui ava seco tupri vahe reca; che rumo ayu ava yangaipa guasu vahe reca —ehi.

### Yecuacusa rese ñehesa

<sup>18</sup>Ñepeí ari pipe Juan Oporoāpiramo vahe remimbohe oyecuacu yuvireco, fariseo eta avei oyecuacu yuvireco no. Evocoyase moviro mbia ipāhu pendar yuviraso, oporandu Jesús upe:

—¿Mahera ru nde remimbohe ndoyecuacui eté yuvireco? Esepia, Juan

remimbohe iyavei fariseo eta oyecuacu yuvireco yepi —ehi yuvireco chupe.

<sup>19</sup> Evocoiyase omboyevi ahe ava upe:

—¡Ndiyai eté ichohopri mendasave iyecuacu āgua imer oicove vitesse ipāhuve! <sup>20</sup> Oimera rumo ari imer reraso āgua ichui curi, ahese ramo oyecuacura yuvireco cute —ehi.

<sup>21</sup> “Ndiyai yayapete turucuar cuacua turucuar ipiasu vahe pipe. Esepia niha, ipiasu vahe oichohó turucuar cuacua imondoro iri āgua, ichorosa evocoiyase tuvicha catu-catuño ité. <sup>22</sup> Iyavei uva ricuer ipiasu vahe ndiyai inasa mbahe pিরer cuacua pipe. Esepia, uva ricuer ipiasu vahe oose mbahe pিরer cuacua vahe pipe, ombopuñora, uva ricuer evocoiyase ocañipa tēira, iyavei mbahe pিরer ocañi tēi aveira. Sese uva ricuer ipiasu vahe ñoñasara mbahe pিরer ipiasu vahe pipe yepi” ehi.

### **Jesús remimbohe oipoho trigo mbituhusa ari pipe yuvireco**

<sup>23</sup> Ñepeí mbituhusa ari pipe, Jesús oguata güemimbohe rese trigo pāhu rupi fariseo rembiepiave yuvireco. Ahese semimbohe oipoho-poho sāhii yuvireco. <sup>24</sup> Evocoiyase fariseo aipo ehi:

—¡Mahera nde remimbohe mbituhusa ari pipe oporaviquiño yuvireco! —ehi yuvireco chupe.

<sup>25</sup> Ahe rumo aipo ehi:

—Peyeroquí niha icuachiapri araca-hendar pipe mborerecuar guasu David rembiapogüer rese acoi ndasiepoise ondugüer reseve yuvireco aracahe. <sup>26</sup> Pahi rerecuar ivate catu vahe Abiatar serer vahe recose, ahese David oique Tüpa rēta pipe pan imboeteipri Tüpa upendar reca ondugüer reseve yuvirohu āgua. Ahe chupe acoi ndipotasai ihu āgua yuvireco viña; judío pahi yuvirecoi vahe upeño ité niha ipotasa ihu āgua yepi. Ahe rumo ohuño, omondo avei ava oye-upindar tohu aracahe —ehi.

<sup>27</sup> Iyavei aipo ehi:

—Mbituhusa ari yaposa ava upe nara, ndahei ava yaposa mbituhusa ari upe nara. <sup>28</sup> Sese Ava Riquehir mbituhusa ari rerecuar secoi —ehi Jesús fariseo upe.

### **Mbia ipo nomii vahe Jesús ombogüera**

**3** Jesús oique iri judío tūparove. Aheve oime mbia ipo co cotigüer nomii vahe. <sup>2</sup> Aheve avei fariseo ‘¿ombogüerara pīha mbituhusa ari pipe?’ oya omahengatu yuvireco sese ‘yaiñhengapo angahu’ oyapave tēi. <sup>3</sup> Evocoiyase Jesús aipo ehi co mbia ipo nomii vahe upe:

—Epūha ore mbiterve —ehi.

<sup>4</sup> Ipare oporandu ambuae upe:

—¿Mbahe vo yaposara mbituhusa ari pipe yepi: mbahe aviye vahe pīha, mbahe naporai vahe tie? ¿Yaipīsiro pīha ava recocuer, yamocañi uca tēi tie? —ehi chupe.

Ahe rumo opaño iquiriri tupri yuvireco. <sup>5</sup> Evocoiyase omahe ava oyese oyere tupri vahe rese voriehisave iyavei ndovihai ava ndosenducua catuise yuvireco. Sese aipo ehi ipo nomii vahe uve:

—Eichoho nde yiva —ehi.

Evocoiyase oichoho oyiva, ocuera tupri ité. <sup>6</sup> Ahese fariseo opa yuvinoso yuviraso oyemoingatu Herodes rupindar rese Jesús yuca āgua yuvireco.

### **Ava rehii ipa popi rupi yuvirecoi**

<sup>7</sup> Ipare Jesús yuviraso güemimbohe reseve ipa popi rupi, ava rehii avei ivi Galilea rupindar yuviraso supi. <sup>8</sup> Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, iai Jordán cotindar avei, opacatu ava Tiro, Sidón pendar yugüeru sepia āgua. <sup>9</sup> Sese oyocuai güemimbohe vireco voi vaherā ñepeí carite yuvireco ava ombotí etepriēhi āgua yuvireco. <sup>10</sup> Esepia, setá imbaheasi vahe ombogüera.

Sese opacatu ambuae imbaheasi vahe yuviraso chupe sese opoco āgua.

<sup>11</sup>Iyavei ava carugar vireco vahe sepiase, oñenopiha sovai, oñehe pucu-pucu yuvireco:

—¡Nde Tūpa Rahir ereico! —ehi.

<sup>12</sup>Jesús rumo oñehe pīrata chupe: “Che mombehui rene ava rovaque peye” ehiño imondo.

### **Jesús oiporavo doce tupri güemimboherā**

<sup>13</sup>Ipare Jesús oyeupi ivitri rese oso. Aheve ava viroyasar upe oñehe iporavo āgua güemimbotar rupi. Ichui oyugüeru yuvireco chupe. <sup>14</sup>Ahe ipāhu pendar osenoi doce tupri güemimboherā ‘toguataño che rupi, tomombehu Tūpa Ñehengagüer opacatu ivi rupi’ oya. Ahe osero “apóstol” <sup>15</sup>‘toipisi avei mborerecuasa carugar ava sui imboyepipi āgua yuvireco’ oyapave. <sup>16</sup>Evocoi doce yuvirecoi vahe, ahe: Simón (sererguā acoi omondo Pedro), <sup>17</sup>Santiago iyavei tivri Juan Zebedeo rahir, ahe avei omondo sererguā Boanerges (‘osunu vahe rahir’ oya aipo ehi); <sup>18</sup>iyavei Andrés, Felipe, Bartolomé, Mateo, Tomás, Santiago Alfeo rahir; Tadeo, Simón, ava güecua rese secatēhi vahe pāhu pendarer; <sup>19</sup>iyavei Judas Iscariote, ahe omondo vaheerā Jesús yamotarēhisar upe.

### **“Jesús carugar pīratasa vireco oyese” ehi tēi ava yuvireco**

<sup>20</sup>Ipare Jesús oique oi pipe güemimbohe reseve. Aheve oñemonuha ati irise ava yuvireco sese, ndiyai icaru āgua yuvireco. <sup>21</sup>Oyanduse imu secocuer yuvireco, oyugüeru seraso āgua ‘ndayaracua iri revo’ oya.

<sup>22</sup>Iyavei oporombohe vahe Moisés porocuita rese oyugüeru vahe Jerusalén sui aipo ehi: “Co mbia carugar rerecuar Beelzebú oyocuai

vahe, ipīratasa pipe tēi omboyepipi carugar ava sui” ehi yuvireco.

<sup>23</sup>Evocoiyase Jesús omombehu carugar recocuer aipo ehi: “¿Mara ehira aipo carugar ahe ae oyeenose ava sui viña? <sup>24</sup>Acoi mborerecuar guasu povri pendar, ahe ovava-vavase oyeupe; evocoi nungar mborerecuar pīratasa ocañi tēira. <sup>25</sup>Acoi oñemu oyease ae oyeamotarēhise, oyemboyahose yuvireco viña, ahe ndipocopii chiaveira yuvireco. <sup>26</sup>Acoi carugar oyemboyahose ovava āgua oyeupe ae yuvireco, ndipocopii chiaveira yuvireco, ahe evocoiyase secocuer ocañi tēi vaheerā ité yuvireco.

<sup>27</sup>“Ndipoi eté niha ava oique vahe que ava ipīrata etepri vahe rēta pipe imbahe rerocuapa āgua ichui; oñapichi rane itera. Ipare voi opara imbahe virocua ichui.

<sup>28</sup>“Supi eté aipo ahe pēu: Acoi ava yangaipa vahe upe Tūpa inērorra opacatu yangaipa rese, inēhe-ñehe tēisa rese avei. <sup>29</sup>Acoi inēhe-ñehe tēi vahe rumo Espiritu Santo rese, ahe chupe ndipo iri chietera ñerosa apirēhi vaheerā ité” ehi.

<sup>30</sup>Aipo ehi Jesús imboyevi ava upe. Esepia, “Carugar tēi erereco” ehiño ava yuvireco chupe.

### **Jesús si, tivireta avei**

<sup>31</sup>Coiye opa oyepota Jesús rivireta iyavei ichi; ahe rumo opitaño ocarve yuvireco. Ichui omondo oñehe yuvireco chupe oyeupe ichē āgua. <sup>32</sup>Yivii yuvinoi vahe oñehe yuvireco chupe:

—Nde si, nde rivireta, nde reindri reseve ocarve nde reca tēi yuvireco —ehi.

<sup>33</sup>Ahe rumo,

—¿Ava pīha che si; ava pīha che rivireta yuvirecoi? —ehi.

<sup>34</sup>Evocoiyase omahe ava oivirindar yuvinoi vahe rese aipo ehi iri chupe:

—Co che si eta; co che rivireta. <sup>35</sup>Esepia, acoi Tūpa remimbotar oyapo vahe

yuvireco, ahe che rivri, che reindri, che si avei yuvirecoi —ehi.

### Mbahe miti sui yembohesa

**4** Jesús oporombohe iri ipa popi rupi. Aheve ava rehii oyemboya yuvireco sese. Ipare oha carite imbehive tui vahe pipe. Aheve oguapi oī oñehe. Ava rumo opacatu ivi ātasa rupi opitaño yuvireco. <sup>2</sup>Evocoyase ava mbohe āgua omboyoya tecocuer mbahe tisa rese aipo ehi:

<sup>3</sup>“Pesendu co ñehesa: Ñepei mbia osē omaheti. <sup>4</sup>Ahe otiapi-apiise mbahe rāhii oso, moviro oviapi peri rupi. Vīrai yugüeruse rumo, opaño yuvirohu. <sup>5</sup>Iyavei moviro oiti ivi nayanai vahesave, ita pāhuve. Sese cūrteimi sori. <sup>6</sup>Ari tasise rumo, opaño ipiru. Esepia, ndasapoi niha. <sup>7</sup>Iyavei ambuae mbahe rāhii oiti yu pāhuve; ahe yu rumo sori poyava catu. Sese opaño oyopi. Evocoyase ahe miti ndihai eté. <sup>8</sup>Ambuae mbahe rāhii oiti ivi aviye vahesave. Ahe opa ocuacua miti, iha tupri ai yuvireco: amove iha treinta tupri ohi rese, amove sesenta, amove cien tupri ité oha vireco” ehi.

<sup>9</sup>Evocoyase, “Acoi osendu pota vahe che ñehe, toyapisacaño sese” ehi Jesús ava rehii upe.

### ¿Mahera pīha co yembohesa imboyoyasa ambuae mbahe rese?

<sup>10</sup>Ipare Jesús opita ahe ae. Ava opita vite vahe semimbohe eta reseve oyemboya yuviraso sese oporandu yuvireco chupe, “¿Mara oya vo co yembohesa aipo ehi?” ehi yuvireco chupe. <sup>11</sup>Ahe aipo ehi: “Pēu niha Tūpa oicua uca mbahe ndicuasai vahe omborerecuasa resendar. Ndache reroya potai vahe upe rumo imboyoyasa mbahe ambuae mbahe rese yepi. <sup>12</sup>Yepe osepia tēira, ndosepiacuai chietera rumo yuvireco. Iyavei yepe osendu tēira, ahe rumo ndosenducuai chietera yuvireco, Tūpa

upe oyevei potaēhisave, ipipe sui ndipoi chira ñeroisa yuvireco chupe” ehi.

### Jesús omombehu tupri yembohesa mbahe tisa resendar

<sup>13</sup>Iyavei aipo ehi: “¿Ndapesenducuaimi vo aipo porombohesa? ¿Mara peyera ru opacatu ambuae che porombohesa cua tupri āgua? <sup>14</sup>Evocoi mbahe rāhii oñoti vahe, Tūpa Ñehengagüer mombehular nungar. <sup>15</sup>Amove ava recocuer inungar co mbahe rāhii seitipri peri rupi: osendu angahu Tūpa Ñehengagüer. Sendu pare rumo, ou Carugar ovirocuapaño oique vahe ipiha pipe ichui. <sup>16</sup>Ambuae ava recocuer inungar mbahe rāhii seitipri ita pāhu rupi: osendu Tūpa Ñehengagüer, oipisi tupri angahu oyeupe nara vorivetesa pipe; <sup>17</sup>ndovirecoi rumo guapo oyese opirata āgua. Evocoyase yuvirecoise mbahe-mbahe tēi pipe Tūpa Ñehengagüer sui tēi, cūrteimi seroyaēhisave, ‘Apoira ichui’ ehi yuvireco. <sup>18</sup>Ambuae ava recocuer inungar mbahe rāhii ñotimbri yu pāhu rupi: osenduse ñehesa Tūpa suindar, <sup>19</sup>ahe rumo ipihañemoñeta catu opacatu ombahe eta co ivi pipendar rese saiusave. Oyembopa uca rumo ombahe eta upe. ‘Opacatu ité mbahe tareco’ ehi tiēte viña. Ipipe sui omocañi tēi Tūpa Ñehengagüer. Ndoypa ucai avei mbahe eta aviye vahe evocoi nungar ava upe. <sup>20</sup>Ambuae ava rumo osendu vahe Tūpa Ñehengagüer seroyasa pipe, oyapoño ité mbahe aviye vahe. Ahe inungar mbahe rāhii ñotimbri ivi aviye vahe rese: amove vireco ohi rese treinta, ambuae sesenta, ambuae cien” ehi.

### Tataendi resendar porombohesa

<sup>21</sup>Iyavei aipo ehi: “¿Serecosa vo tataendi mbahe riruvrive nara tēi iyavei yande rupavrive nara tēi no? Aní, tataendi imondosa ivate poroesape

āgua. <sup>22</sup>Ndipoi chietera mbahe ñomipri ndayasepiai vaheṛā curi. <sup>23</sup>Acoi osendu pota vahe che ñehe, toyapisacaño yuvireco sese” ehi.

<sup>24</sup>Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua ucara che ñehe pēu. Iharive amondo iri catura pēu. <sup>25</sup>Vireco tupri vahe upe, imondosa catura. Acoi ndovireco tuprii vahe sui, serocuasañora” ehi.

### **Yembohesa mbahe rāhii rorisa resendar**

<sup>26</sup>Aipo ehi iri avei Jesús: “Tūpa mborrecuasa co ivi pipe inungar que ava oñoti vahe mbahe rāhii. <sup>27</sup>Omaheti pare, oso oque. Ipare coiye catu oñarapuha. Ahe oñocua pītu, ari avei, evocoyase mbahe rāhii sori poyava yuvireco. Itāsar rumo ndoicuai mara ehi vori. <sup>28</sup>Ivi rese niha oyesu miti: yipindar sori, ipare iha, ipare sāhii yuvinose sese. <sup>29</sup>Evocoyase co mbia mbahe ha yaviyese, oipoho. Esepia, oyepota ari ipoho āgua chupe” ehi.

### **Yembohesa mostaza rāhii suindar**

<sup>30</sup>Iyavei aipo ehi: “¿Mara ehi vo Tūpa povri pendar co ivi pipe pēu; mbahe rese pīha iyacatu imboyoyasa icua āgua? <sup>31</sup>Ahe oyoya tupri mostaza rāhii rese. Ahe tahimi catu opacatu ambuae mbahe rāhii sui. <sup>32</sup>Ñoti pare rumo, sori, ocuacuase tuvichá catu ambuae mbahe miti sui. Sāca tuvichá ité, sese vīrai oyemboaiti sovri rupi yuvireco” ehi.

### **Jesús omboyoya ambuae mbahe rese oporombohe yepi**

<sup>33</sup>Ēgüe ehi Jesús oporombohe Tūpa Ñehengagüer rese, omboyoya-yoya ñepe mbahe ambuae mbahe rese ava mbahecuagüer rupi. <sup>34</sup>Nomombehu ité mbahe ambuae mbahe rese

imboyoyaēhi pipe. Ahe rumo omombehu tupri güemimbohe upe ahe aemi yuvirecoise.

### **Jesús omombituhu i ohitu vahe, ivitu ai reseve**

<sup>35</sup>Ahe ari pipe pītu ramomise, aipo ehi güemimbohe upe:

—Yaso ipa rovai —ehi.

<sup>36</sup>Evocoyase ava sui osiri yuvireco, yuviraso carite pipe. Ambuae carite pipendar avei yuviraso supi. <sup>37</sup>Oyepotase rumo ivitu ai ipīrata vahe, i ohitu vahe oha guasu-guas carite pipe, omboapipo seni yuvireco chupe. <sup>38</sup>Jesús rumo oyecatocoño, oque ou supita coti. Evocoyase omomahe voi yuvireco, aipo ehi chupe:

—¿Porombohesar! ¿Nandemahemo-haimi rutei vo yande rese? ¿Opara moco yaso ipive! —ehi.

<sup>39</sup>Evocoyase aipo hese, omahe, oñehe pīrata ivitu ai upe, ipa upe avei:

—¿Pepituhu! —ehi.

Aheseve voi opituhu tupri. <sup>40</sup>Ipare aipo ehi güemimbohe upe:

—¿Mahera pesiquiyé iteanga? ¿Ndapeyeroya vitei vo che rese? —ehi.

<sup>41</sup>Ahe rumo osiquiyepave oporandurandu oyeupe yuvireco:

—¿Ava pīha co mbia secoi? Esepia niha, ivitu ai, ipa avei omboyeroya —ehi tēi yuvireco chupe.

### **Mbia Gerasa iguar vireco vahe carugar oyese**

**5** Jesús güemimbohe reseve oyepota ipa rovai Gerasa ivi rese yuviraso. <sup>2</sup>Yuvinose pare carite pipe sui, ahese mbia carugar rerecosar tuvipa pāhu rupi secoi vahe oso Jesús upe. <sup>3</sup>Co mbia tuvipa pāhu rupi secoi vahe yepi. Ndipoi eté ava secopisar, carena avei eté opa-opaño omondoso. <sup>4</sup>Setá yupagüer rupi tēi ñapichisa carena pipe ipi, ipo rupi avei yepi. Ahe rumo opa-opaño ité



omondoso carena yepi. Ndipoi eté ava osecoreroyi vahe. <sup>5</sup>Ari, p̄itu rupi uguata, osapucaí oico iv̄itri mahuḡuer rupi, tuv̄ipa mahuḡuer rupi avei; ocua-ocua ita pipe oyese yepi. <sup>6</sup>Amombri Jesús repia ramoseve, oña senonde oñenopiha voi sovai, <sup>7</sup>oñehe p̄irata chupe:

—¡Eyepepi che sui Jesús, T̄upa seco ivate catu vahe Rahir! ¡Aporandu T̄upa rer pipe che mombaraisuēhi āgua eve! —ehi.

<sup>8</sup>Aipo ehi, esepia, yipindar Jesús aipo ehi chupe:

—¡Carugar mbahe t̄ei vahe, es̄e co mbia sui! —ehi chupe.

<sup>9</sup>Aheve oporandu chupe:

—¿Mara vo nde rer? —ehi.

Ahe omboyeve chupe:

—Che rer Legión. Esepia, ore rehii eté —ehi.

<sup>10</sup>Oporandũ chupe omondopaēhi āgua co iv̄i sui. <sup>11</sup>Ichui namombriimi setá cuchi ocaru vahe iv̄itri rese yuvireco. <sup>12</sup>Sese carugar oporandu yuvireco chupe:

—Ore mondopaño cuchi aviterve eve —ehi yuvireco.

<sup>13</sup>Evocoyase Jesús omondo carugar s̄e āgua ahe mbia sui. Ahe opa yuviroique cuchi aviterve. Ahe cuchi retacuer dos mil tupri vahe, ahe yuvinoña yuviraso iv̄ivate sui ipa pipe ocañipa.

<sup>14</sup>Evocoyase cuchi r̄arosar yuvinoña osiquiyepave yuviraso imombehu āgua tecuave, caha pipe rupi yuvirecoi vahe upe avei. Sese ava opa yuḡueru sepia ‘¿mbahe p̄iha?’ oya yuvireco. <sup>15</sup>Oyepotase Jesús recosave, aheve osepia mbia carugar vireco vahecuer yuvireco oyemonde tuprise oĩ, yaracua tuprise avei. Ahese oyembosiquiye t̄ei yuvireco. <sup>16</sup>Mbahe oime vahe carugar vireco vahe rese, cuchi rese avei, ahe sepiasar omombehupa ambuae ava upe yuvireco. <sup>17</sup>Evocoyase ava Jesús upe: “Es̄e cohave sui” ehi yuvireco.

<sup>18</sup>Oha irise Jesús carite pipe, co mbia carugar rerecosarer oporandu chupe supi oso āgua. <sup>19</sup>Ahe rumo,

—Esoño nde r̄etave, nde mu p̄iri. Aheve emombehupa Yar oporoaisusa pipe mbahe oyapo vahecuer nde rese —ehiño chupe.

<sup>20</sup>Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoyase ava opacatu, “¡Mara ehi rutei!” ehi t̄ei yuvireco.

### **Jesús ombogüera Jairo rayri, iyavei cuña opoco vahe iturucuar rese ombogüera**

<sup>21</sup>Oyevise Jesús carite pipe ipa rovai oso, aheve oñemonuha at̄i ava yuvireco chupe. Ahe evocoyase opitaño ipa pop̄ive. <sup>22</sup>Evocoyase oyepota mbia mborerecuar t̄uparo pendar, ahe serer Jairo. Jesús repiase, oñenopiha sovai, <sup>23</sup>aipo ehi chupe:

—Che rayri omano pota. Yaso, tere-mondomi t̄ei nde po iharive imbogüera āgua —ehi.

<sup>24</sup>Evocoyase oso supi. Ava rehii avei yuviraso supi. <sup>25</sup>Ip̄ahuve avei oime cuña doce araviter rupi suvi yepiyere-yere vahe. <sup>26</sup>Iparaisú iteanga, setá oporoposano vahe ndoicatui imbogüera yuvireco omomandaivete catu iposanosa pipe yuvireco. Opa tupri t̄ei omondo mbahe vireco vahe, ivate catuño rumo imbaherasisa chupe. <sup>27</sup>Co cuña osenduse Jesús rese ñehesa, uguata saquicuei oso ava rehii p̄ahuve, iturucuar rese opoco. <sup>28</sup>Aipo ehi oyeupe oico: “Iturucuar rese apocose rumo, acuerara” ehi. <sup>29</sup>Ahe ramoseve voi ndasuvi yepiyere iri. Ip̄are oyandu güietecuer yemoingatu tuprisa, ocuerase ombaherasisa sui. <sup>30</sup>Jesús rumo oyandu os̄ese op̄iratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? — ehi.

<sup>31</sup> Semimbohe omboyeve yuvireco chupe:

—¿Nderemahei vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

<sup>32</sup> Ahe rumo omaheño vite ité ava oiviindar rese ‘¿uma ité pīha opoco che turucuar rese?’ oya. <sup>33</sup> Evocoiyase co cuña oicuae mbahe oyesendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe. <sup>34</sup> Evocoiyase Jesús aipo ehi chupe:

—Che rayri, erecuera cūrítei nde yeroyasa pipe. Eso tupri. Esepia niha, erecuera nde mbaherasisa sui —ehi chupe.

<sup>35</sup> Ñehe viteseve, oyepota moviro Jairo rēta pendar tayri mano mombehu yuvireco:

—Omano ité nde rayri. Aní eremañeco tēi vite Porombohesar —ehi yuvireco chupe.

<sup>36</sup> Ahe rumo Jairo upe aipo ehi:

—Aní eresiquiye. Eyeroya catuño —ehi.

<sup>37</sup> Ndoipotai rumo ambuae ava oyeupi icho āgua; Pedro, Santiago, Juan güeraño oipota. <sup>38</sup> Oyepotase Jairo rē-tave, osepiā ava yemondii oyaseho vahe.

<sup>39</sup> Ichui oiquese oi pipe, aipo ehi:

—¿Mahera vo perāse guasu tēi peyaseho peyu? Co cuñatai nomanoi, oque tēi ou —ehi ava upe.

<sup>40</sup> Ava rumo opucaete-eteño seroy-aēhisave yuvireco. Evocoiyase omose opacatu ava. Ipare omoingue iyesupa, ichi, oyeupindar reseve cuñatai rehögüersave. <sup>41</sup> Ipare oipopisi aipo ehi:

—Talita, cum —ehi chupe (‘cuñatai, eñarapuha, ahe ndeu’ ohesave aipo ehi).

<sup>42</sup> Ahe ramoseve voi cuñatai doce araviter vahe oñarapuha, ipare oguata.

Sepiase ava, oyembosiquiye guasu yuvireco. <sup>43</sup> Jesús rumo oyocuai imombehuēhi āgua ambuae ava upe. Ipare,

—Pembocarú co cuñatai —ehi.

### Jesús Nazaret ve secoi

**6** Jesús osē co tecua sui oso güecuave; semimbohe avei yuviraso supi. <sup>2</sup> Oyepotase mbituhusa ari, ahese oporombohe tūparo pipe. Setá ava ñehe rendusar oyepihamondiisave oporandurandu yuvireco:

—¿Que sui vo co ava oicuapa opacatu mbahe? ¿Que sui pīha vinose co mbahecuasa co poromondiisa apo āgua? —ehi yuvireco oyeupe—. <sup>3</sup> Co niha carpintero, María membri; Santiago, José, Judas iyavei Simón riquehir, seindri avei yuvirecove yande pāhuve —ehi.

Sese ndoviroyai yuvireco. <sup>4</sup> Jesús rumo aipo ehi ahe ava eta upe:

—Tūpa ñehe mombehusar avei niha ava omboetei opacatu rupi yuvireco yepi, imu sēta pipendar ae rumo nomboetei yuvireco —ehi.

<sup>5</sup> Ndoicatu mbahe oporomondii vahe apo āgua ava viroyaēhisa pipe, sese moviro tēi imbaheasi vahe harive omondo opo imbogüera āgua.

<sup>6</sup> Ndoyembovīhai ava viroyaēhisa rese.

### Jesús oyocuai güemimbohe Tūpa mborerecuasa mombehu āgua

Ipare Jesús oso, oguata tecua-tecuami namombrii vahe rupi oporombohe oico.

<sup>7</sup> Evocoiyase, “Perio” ehi güemimbohe doce vahe upe. Ipare oyocuai ñuvirío-río, iyavei omondo güeco pīratasa carugar mboyepepi āgua chupe.

<sup>8</sup> —Ndaperasoi chira rumo mbahe peguatasa rupi, pe pococa güeraño ité perasora —ehi—. Ndiyai avei peraso mbahe riru, pan, guarepochi avei.

<sup>9</sup> Iyavei pemondera pitaqui güeraño.

Ndapemondugüei chaveira pe camisa seraso.

<sup>10</sup>—Que pesosave peiquese oi pipe, pepitaño ipipe, ichuive tupriño ité pesëra pecua. <sup>11</sup>Acoi ambuae tecua pendar ndape pisi potaise, ndosendu potaise avei pe ñehe yuvireco, peyepipiñora ichui. Peipipeteño aveira pe pi ivi rãtachigüer sui. Ëgüe pe hesa omboyecuara cañisa apirëhi yuvireco chupe — ehi.

<sup>12</sup>Evocoyase semimbohe eta yuviraso, “Pemboasi pe angaipa, peyevi Tüpa upe” ohe ãgua yuvireco. <sup>13</sup>Iyavei setá omboyepipi carugar ava sui, setá avei omondo mbahe quira ava imbaheasi vahe rese imbogüera ãgua yuvireco.

### Juan Oporoãpiramo vahe mano agüer

<sup>14</sup>Mborerecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:

—Juan Oporoãpiramo vahe revo ocuerayevi. Sese oyapo poromondiisa ipirata vahe —ehi.

<sup>15</sup>Ambuae rumo,

—Tüpa ñehe mombehusar Elías mo evocoi —ehi yuvireco.

Ambuae evocoyase,

—Tüpa ñehe mombehusar aracahendar mo evocoi —ehi yuvireco.

<sup>16</sup>Osenduse Herodes co nungar ñehesa, aipo ehi:

—Juan ité niha evocoi che añaca asia uca vahecuer, ahe cüritei ocuerayevi — ehi.

<sup>17</sup>Herodías recocuer sui tēi niha Herodes Juan oñapichi uca carena pipe soquenda. Esepia, co cuña Herodías yipindar Felipe rembireco, co Felipe Herodes rivri viña. Herodes rumo omen-daño vivri rembireco rese. <sup>18</sup>Juan aipo ehi Herodes upe: “Ndiyai eté nde ererocora nde rivri rembireco” ehi.

<sup>19</sup>Herodías evocoyase oyuca pota Juan yamotarēhisave; ndoicatu rumo yuca. <sup>20</sup>Esepia, Herodes osiquiyeño ichui oicua co mbia reco tupri aisa iyavei seco maranehise. Sese osepi ité; yepe ndoyembohe catui osenduse iñehe viña, ahe rumo osendu pota raiño ité. <sup>21</sup>Coixe rumo osupiti ari Herodías remibotar apo ãgua, ahese Herodes oharagüer pipe oyapo carusa guasu mborerecuareta rese, ava Galilea pendar icuapri ivate catu yuvirecoi vahe rese avei. <sup>22</sup>Herodías membri cuñatai oique carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remibotar rese cheu, che evocoyase amondora ndeu —ehi.

<sup>23</sup>Ipare aipo ehi iri opacatu ava rovaque chupe: “Amondora nde remibotar ndeu, anise, che mbahe eta amboyahora ndeu” ehi. <sup>24</sup>Ahe cuñatai osē oso, osi upe oporandu:

—¿Mbahe rese piha aporandura chupe? —ehi.

Ichu aipo ehi chupe:

—Eporandu Juan Oporoãpiramo vahe ãca rese —ehi chupe.

<sup>25</sup>Ipare cuñatai oña, oique oso mborerecuar guapisave, aipo ehi chupe:

—Che aipota co pipeve voi eremboura Juan Oporoãpiramo vahe ãca poratu pipe cheu —ehi.

<sup>26</sup>Mborerecuar rumo ndoyembovihal tēi. Esepia, ava ichohopri rovaque ité yipindar oñehe. Sese ndoicatu, “Aní” ohe ãgua. <sup>27</sup>Evocoyase ipare voi mborerecuar oyocuai sundao Juan ãca reru ãgua. <sup>28</sup>Sundao oso soquendasave, oyasia Juan ãca, seru poratu pipe. Mborerecuar omondo co cuñatai upe, evocoyase cuñatai omondo osi upe.

<sup>29</sup>Oyanduse Juan remimbohe, yuviraso setecuer reca. Ipare viraso yuvireco tuvípave yapocatu.

### Jesús oyopoi cinco mil cuimbahe

<sup>30</sup>Co pare, apóstol oñemonuha Jesús piri yuvireco. Ipare omombehu mbahe güembiapogüer, oporombohe agüer avei yuvireco chupe. <sup>31</sup>Ahese aipo ehi oapóstol upe:

—Perio cohave, yaso, yapituhumi rane co coti —ehi.

Esepia, oyepindecuaño ité ava yugüeru chupe, sese ndiyai icaru ägua yuvireco. <sup>32</sup>Evocoyase ahe güeraño apóstol reseve yuviraso carite pipe co coti ava sui. <sup>33</sup>Setá rumo ava osepia ichose. Ichui opacatu ava tecua rupindar osaquicue moñaño; ahe ranengatu oyepotapa yuvireco ichui. <sup>34</sup>Ogüeyise rumo carite pipe sui, osepia ava rehii, ahese iparaisu ava eta chupe, inungar ovesa ndovirecoi vahe guärosar. Ipare ombohe opacatu mbahe rese. <sup>35</sup>Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe. <sup>36</sup>¿Ndiyai vo eremondopa ava tecua-tecuami cõi vahesa rupi? Aheve tovirocu ocaru ägua yuvireco —ehi yuvireco chupe.

<sup>37</sup>Ahe rumo omboyevi:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura pîha oreu dosciento denario pan repirã ava mbocarü ägua? —ehi.

<sup>38</sup>Jesús aipo ehi:

—¿Mbovi vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

<sup>39</sup>Evocoyase omboyaho-yaho ava imboguapi capihi hari rupi. <sup>40</sup>Cincuenta, cien rupi-rupi oyemboyaho yuvireco.

<sup>41</sup>Ichui Jesús oipisi poyandepo pan, ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe imondo ägua yuvireco. Pira ñuvirío vahe avei omboyaho-yaho opacatu ava upe. <sup>42</sup>Evocoyase opacatu ava ocaru vahe ihitaropa tēi yuvireco. <sup>43</sup>Ipare semimbohe omboapipopa doce tupri iruova pan iyavei pira rumbirer yuvireco. <sup>44</sup>Cuimbahe ocaru vahe retacuer cinco mil tupri.

### Jesús oguata i hari rupi

<sup>45</sup>Ipare Jesús, “Peha pe rane carite pipe, pesasa ipa Betsaida ve peso che renondeve. ‘Aviye’ tahe rane ava eta upe” ehi güemimbohe upe. <sup>46</sup>“Aviye” ohe pare ava upe, oyeupi oso ivitri rese oyeroqui ägua. <sup>47</sup>Pituse carite ipa mbiterve ité secoi. Jesús rumo ahe ae opitaño ivive. <sup>48</sup>Ahese omahe güemimbohe rese iyeapicui catuēhise. Esepia, ivitu ipirata vahe osovaichi yuvireco. Cõhe potase, oguata i hari rupi güemimbohe coti oso. Aviye ité acoi oñocuaño vahe rã oso. <sup>49</sup>Sepiase rumo ‘hägüer tēi revo’ oya, sãse pucu-pucu i hari rupi iguatase semimbohe yuvireco. <sup>50</sup>Esepia, opacatu osepiase osiquiye yuvireco ichui. Ahe rumo aipo ehi:

—¡Peyemoviracuaño, che tēi!  
¡Pesiquire eme che sui! —ehi güemimbohe upe.

<sup>51</sup>Ahe ohase carite pipe, opituhu voi ivitu. Evocoyase, “¡Mara ehi rutei!” ehi tēi yuvireco. <sup>52</sup>Esepia, ndoicua vitei eté pan apo ati agüer yuvireco, yavai vite seroya ägua yuvireco chupe.

### Jesús ombogüera ava imbaheasi vahe Genesaret pendar

<sup>53</sup> Osasase ipa, oyepota Genesaret ivi rese yuviraso, ahe imbehive oñapichiño carite yuvireco. <sup>54</sup> Yuvinosepa ramomiseve, ava oicua voi Jesús yuvireco. <sup>55</sup> Ichui opacatu ahe ivi pipendar güeru imbaheasi vahe Jesús upe yuvireco. <sup>56</sup> Oyepotase que tecuamive, anise tecua guasuve, caha pipe oi-oimi rupi, ahe supi imbaheasi vahe ocar rupi vinosepa voi yuvireco. “Topocomi tēi nde turucuar popi rese” ehi yuvireco chupe. Evocoyase opacatu sese opoco vahe, ocuerapa voi eté yuvireco.

### Mbahe omonguiha vahe ava recocuer

**7** Evocoyase fariseo eta, Moisés porocuita rese oporombohe vahe avei yugüeru Jerusalén sui oyemboya Jesús rese yuvireco. <sup>2</sup> Ahese ahe osepia Jesús remimbohe ocaru água iyepoiēhise porocuita mboaviyēhise yuvireco, sese oñemoiro yuvireco chupe. <sup>3</sup> (Esepia, fariseo iyavei opacatu judío eta aracahendar recocuer sui ndipoisai eté yuvireco, sese oyepoiēhise ndocarui eté yuvireco yepi. <sup>4</sup> Mbahe rero cuasa sui oyeveise, ndocarui oyepoiēhi vitesese yuvireco. Iyavei tecocuer aracahendar tēi oyapo vite yuvireco inungar igua riru piisa, mbahe riru guarepochi apopri iyavei vupa moatiro tuprisa.) <sup>5</sup> Sese fariseo eta iyavei Moisés porocuita rese oporombohe vahe oporandu Jesús upe yuvireco:

—¿Mahera vo nde remimbohe yande ramoi aracahendar recocuer ndoviroya iri yuvireco? Esepia ru, ahe ocaruño opo guíha reseve yuvireco —ehi.

<sup>6</sup> Jesús rumo aipo ehi chupe:

—Pe Tüpa rero yasar angahu tēi peico vahe, supi tupri ité Tüpa ñehe mombe-

husar Isafas rembicuachía aracahendar aipo ehi:

‘Co tecua pendar ava oyuru pipe tēi che mboetei yuvireco; ipihañemoñeta rumo amombri tēi che sui.

<sup>7</sup> Oyerure tupri tēi yuvireco cheu.

Esepia, iporombohesa ava porocuita tēi’ ehi.

<sup>8</sup> Ëgüe peye pepoipa Tüpa porocuita sui ava recocuer aracahendar rupi tēi pe guata água —ehi.

<sup>9</sup> Iyavei aipo ehi iri chupe:

—Pe ramoi recocuer aracahendar pipe tēi peseyaño co coti Tüpa porocuita.

<sup>10</sup> Esepia, Moisés aipo ehi: ‘Pemboyero yara iyavei peipitiviira pe ru, pe si avei no. Acoi ñehe mara vahe oyesupa upe ahe, Tomanño, ehi’ ehi aracahe. <sup>11</sup> Pe rumo aipo peye tēi: ‘Acoi ava aipo ehi vahe vu upe, osi upe avei no: Ndiyai chira mbahe mondo água pēu. Esepia, che opacatu mbahe areco vahe Tüpa upe imondopri, ahe Corbán, ehi’ peye; <sup>12</sup> pe evocoyase, aipo ehi vahe upe, ‘Ndiyai eté oyesupa pītivii água’ peye. <sup>13</sup> Co nungar apo pipe Tüpa porocuita ndaperoyai. Esepia, ndapepoi potai ava recocuer aracahendar sui. Setá mbahe co nungar peyapo vite —ehi.

<sup>14</sup> Ipare, “Perio” ehi iri ava rehii upe.

—Peyapisaca, pesenducua tupri che ñehe: <sup>15</sup> Ndahei ocar sui tēi ou ava recocuer monguiha água. Ahe rumo osē ipiha sui. <sup>16</sup> Acoi osendu pota vahe che ñehe, toyapisacaño sese —ehi.

<sup>17</sup> Ipare oseyapase ava, oique oi pipe. Aheve semimbohe eta oporandu yuvireco co porombohesa omombehu vahe rese chupe. <sup>18</sup> Ahe evocoyase aipo ehi güemimbohe upe:

—Evocoyase pe avei no, ¿ndapesenducuai? ¿Ndapeicuai vo acoi ocar sui oique vahe ava aviterve nomboangaipai eté? <sup>19</sup> Esepia niha, ndahei ipihave oso, ahe rumo oso yaviterve. Ipare osē ichui

—ehi ‘opacatu tembihu aviyeño ité’ oyapave aipo ehi.

<sup>20</sup> Ipare aipo ehi:

—Ava piha sui osē vahe rumo mbahe, ahe omonguiha ava recouer. <sup>21</sup> Esepia, ava pihañemoñetasa sui osē pihañemoñeta raisa, yemboaguasasa, mondasa, porapichisa, <sup>22</sup> mendasa sui yemboaguasasa, mbahe pota raisa, teco raisa, porombopasa, mbahe tēi pota raisa, mbahe rese ñemoirosa, ava rese ñemoñeta tēisa, teco ivate aisa, pihañemoñetasa nihivi vahe. <sup>23</sup> Co mbahe opacatu naporai vahe yuvinose ava sui imboangaipa uca āgua —ehi.

### **Cuña ndahei vahe judía viroya Jesús**

<sup>24</sup> Ichui Jesús osē oso tecua Tiro coti. Aheve oi que oi pipe, ndoyecua uca potai ava upe viña; ndoicatu rumo ava sui oñemi. <sup>25</sup> Oime cuña viresco vahe omembri cuñatai, ahe viresco carugar oyese; ahe cuña oicua se Jesús recosa, oso voi sovai oñenopiha. <sup>26</sup> Ahe rumo ndahei judía, sirofenicia iguar ité. Ahe aipo ehi Jesús upe: “Enose che membri sui carugar” ehi. <sup>27</sup> Jesús rumo aipo ehi chupe:

—Tahir judío rane toipisi mbahe yuviresco. Esepia, naporai yarocua pan tahir sui cave tohu imondo āgua —ehi.

<sup>28</sup> Co cuña aipo ehi:

—Supi eté, che Yar, cave avei rumo ohuño ité pan rahicuer oviapi vahe tahir mesavri pendar —ehi.

<sup>29</sup> Aipo ihese, aipo ehi:

—Aviye ité nde ñehe. Eyevi eso. Carugar osē nde membri sui —ehi chupe.

<sup>30</sup> Co cuña oyepotase güetave, osepia omembri supave; yipive rumo osē carugar ichui.

### **Jesús omboguera mbia ndayapisai, ñehe ipiti-piti vahe**

<sup>31</sup> Jesús oyevi oso Tiro ivi sui. Ipare osasa Sidón rupi oso, ambuae tecua eta Decápolis ivi rupi avei. Ichui oyepota ipa Galilea ve. <sup>32</sup> Aheve mbia ndayapisai, ñehe ipiti-piti vahe rerasosar: “Emondomi tēi nde po iharive” ehi yuviresco chupe. <sup>33</sup> Ichui Jesús viraso coi cotimi ava sui. Aheve ocuā omonde yapisa pipe. Ipare omondo güendi ñapecu rese. <sup>34</sup> Ipare omahe iva rese, ipituhu pucu aipo ehi: “¡Efasta!” ehi (‘timboisa’ ohe save aipo ehi).

<sup>35</sup> Ahe pipeve voi yapisa tupri, oñehe tupri avei. <sup>36</sup> “Ndapemombehui chira ambuae upe” ehi ahe mbia upe. Ahe rumo oicua ucaño ité ambuae ava upe yuviresco. <sup>37</sup> Evocoyase ava oyemboviha guasusave, aipo ehi yuviresco: “Aviye ité rumo mbahe sembiapo. ¡Esepia, ndayapisai vahe omboapisa, ñehe ipiti-piti vahe avei omoñhengatu tupri!” ehi yuviresco.

### **Jesús oyopoi cuatro mil cuimbahe**

**8** Ñepepi ari pipe setá ava oyemboya iri Jesús rese yuviresco. Ndipoi rumo mbahe icaru āgua. Sese oñehe güemimbohe eta upe aipo ehi:

<sup>2</sup> —Iparaisu catu co ava yuviresco cheu. Esepia, mbosapi ari yuvirescoi yande piri, iyavei ndipoi eté mbahe semihura. <sup>3</sup> Amondopase sētave sieporēhi reseve, viroviapi-api tiētera tieporēhi perirupi yuviresco viña. Esepia, setami ava yugüeru amombri sui —ehi.

<sup>4</sup> Semibohe aipo ehi yuviresco chupe:

—¿Mara yahera vo ava tohu mbahe mondo cohava ava porēhisave? —ehi.

<sup>5</sup> Ahe oporandu:

—¿Mbovi vo pan pereco? —ehi.

—Oroviresco siete pan —ehi semimbohe yuviresco chupe.

<sup>6</sup>Evocoiyase, “Peguapi ivi harive” ehi ava rehii upe. Ahese oipisi siete pan, “Aviye ndeu” ehi Tūpa upe. Ichui omboyaho-yaho pan imondo güemimbohe upe, semimbohe evocoiyase omondo ava rehii upe yuvireco. <sup>7</sup>Iyavei vireco moviro pirami yuvireco, sese avei, “Aviye ndeu” ehi iri Tūpa upe. Ichui güemimbohe upe, “Pemboyaho-yaho ava upe” ehi. <sup>8</sup>Opacatu ité ava ocaru vahe ihitaro yuvireco. Ipare rumo semimbohe omboapipo iri rane sumbirer siete iruova yuvireco. <sup>9</sup>Ava rehii ocaru vahe retacuer cuatro mil tupri. Ipare Jesús, “Aviye, peso tupri” ehi ava upe. <sup>10</sup>Ipare voi eté yuviraso güemimbohe eta reseve carite pipe Dalmanuta ivi rese.

#### **Fariseo eta oporandu poromondiisa rese yuvireco**

<sup>11</sup>Ipare fariseo eta oyepota Jesús ñehe poepi-epi água yuvireco. Jesús recoãha água, oporandu iva pendar poromondiisa rese ‘¿Tūpa sui eté pīha ou?’ oya yuvireco chupe. <sup>12</sup>Sese Jesús ipītuhe pucu, aipo ehi:

—¿Mahera vo co ava oipota iva pendar poromondiisa che recocuer cua água yuvireco! Namboyecuai chietera rumo que ñepeí evocoi nungar mbahe pēu —ehi.

<sup>13</sup>Ipare oseypañō ava. Ichui yuviroha iri carite pipe, osasapa ipa yuviraso sovai.

#### **Fariseo prombohesa inungar pan mboapeposa**

<sup>14</sup>Jesús remimbohe sesarai pan sui yuvireco, ñepeimi tēi pan viraso güemihura yuvireco. <sup>15</sup>Evocoiyase Jesús aipo ehi:

—Peicua catu fariseo iyavei Herodes pan mboapeposa sui —ehi güemimbohe upe.

<sup>16</sup>Aipo ehise, semimbohe: “Pan ndayaruisse revo aipo ehi yandeu” ehi-ehi tēi oyeupe yuvireco.

<sup>17</sup>Ahe rumo oicua güemimbohe pīhañemoñetasa, aipo ehi:

—¿Mahera, “Pan ndayarui” peye? ¿Ndapeicua vitei vo che rembiapo? ¿Yavai vite tie seroya água pēu? <sup>18</sup>Oime tēi pe resa, ndapesepiai rumo; oime tēi pe nambi, ndapesendui rumo mbahe. ¿Ndapeyemomahenduha iri vo <sup>19</sup>acoi amboyaho-yahose cinco pan sui ava cinco mil vahe tohu? ¿Mbovi iruova vo acoi sumbirer pemonuha iri? —ehi.

—Doce iruova —ehi yuvireco chupe.

<sup>20</sup>—Iyavei acoi amboyaho-yahose siete pan sui ava cuatro mil vahe tohu, ¿mbovi iruova vo acoi pemonuha sumbirer no? —ehi.

—Siete iruova —ehi yuvireco chupe.

<sup>21</sup>Ipare aipo ehi:

—¿Ndapesenducua vitei vo? —ehi güemimbohe upe.

#### **Jesús ombogüera ava ndasesapisoi vahe tecua Betsaida ve**

<sup>22</sup>Oyepotase Jesús tecua Betsaida ve, ahe ramoseve voi ogüeru ndasesapisoi vahe yuvireco chupe ‘epocomi tēi sese’ oya yuvireco. <sup>23</sup>Evocoiyase oipopisi ndasesapisoi vahe seraso co cotimi tecua sui. Aheve omondo güendi sesa rese, omondo avei opo iharive. Ipare oporandu chupe: “¿Eresepia vo mbahe?” ehi. <sup>24</sup>Ndasesapisoi vahe omahese, aipo ehi:

—Asepia ava inungar ivira uguata vahe yuvireco —ehi.

<sup>25</sup>Evocoiyase omondo iri opo sesa rese. Ipare co mbia omahe tupri ité cute, ocuera ité, opacatu mbahe osepia tupri. <sup>26</sup>Ichui Jesús omondo sētave aipo ehi chupe:

—Ereyevi iri eme tecuave —ehi.

### Pedro oicua uca Jesús Tūpa Rembiporavo seco rese

<sup>27</sup> Ipare yuviraso Jesús güemimbohe reseve ivi Galilea sui tecua Cesarea coti, Filipo ivi rese. Peri rupi oporandu güemimbohe upe:

—¿Mara ehi vo ava oñhe yuvireco che rese? —ehi.

<sup>28</sup> Semimbohe evocoyase omboyevi yuvireco chupe:

—Amove ava, “Juan Oporoãpiramo vahe” ehi yuvireco ndeu; ambuae evocoyase, “Elías” ehi; ambuae, “Tūpa ñehe mombehusar mboetasa” ehi yuvireco ndeu —ehi.

<sup>29</sup> Evocoyase oporandu iri güemimbohe upe:

—Pe no, ¿ava, “Co secoi” peye ru pe cheu no? —ehi.

Pedro evocoyase aipo ehi chupe:

—Nde niha Tūpa Rembiporavo Poropĩsiosar ereico —ehi.

<sup>30</sup> Jesús rumo, “Pemombehui rene que ñepei ava upe” ehi.

### Jesús omombehu omano ãgua

<sup>31</sup> Evocoyase Jesús omboipi oporombohe: “Che, Ava Riquehir, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuita rese oporombohe vahe remiamotarēhi aicora. Ahe avei che yuca uca yuvireco. Acuerayevira rumo mbosapi ari rupi” ehi. <sup>32</sup> Ahe omboyecua tupri ité chupe. Evocoyase Pedro viraso co cotimi chupe oñhengata ãgua. <sup>33</sup> Oyemboyere rumo, omahe güemimbohe eta rese, oñhengata Pedro upe aipo ehi:

—¡Esiri che sui, Carugar! Esepia, nde nandepihañemoñetai mbahe Tūpa upendar rese; ava nungar tēi nde pihañemoñeta eico —ehi.

<sup>34</sup> Evocoyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupi, topoi mbahe güemimbotar tēi aposa sui, iyavei inungar-ra curusu rese ovosiira viña, toyemoingatu voi che recocuer rese oparaisu ãgua iyavei toguata tupri che rupi. <sup>35</sup> Esepia, acoi ava güetecuer tēi raĩsupar, ocañi tēi etera. Acoi ava omocañi tēi vahe rumo güetecuer che recocuer rese, ñehesa ñepisirosa sui avei, ahe oñepisiora. <sup>36</sup> ¿Aviye ai angahu pīha ava upe opacatu mbahe ivi pipendar pisi ãgua tēi, ahe ae tēi omocañi güecocuer yuvireco viña? <sup>37</sup> ¿Mbovi pīha omondora ava güecocuer repirã viña? <sup>38</sup> Esepia, acoi ava yuvinochi ai vahe che sui iyavei che ñehengagüer sui ava angaipa viyar ndaseco tuprii vahe rovai, che avei, Ava Riquehir, ãgüe ahera acoi ayevisa che Ru reco pĩrata porañetesa pipe, sembiguai rehii iva pendar maranehi reseve curi —ehi.

**9** Ipare Jesús aipo ehi iri:

—Supi eté, oimera amove cohava ava nomano vitei chivaherã, osepia rane itera ouse Tūpa mborerecuasa ipiratasa pipe yuvireco curi —ehi.

### Jesús ñecuñaro agüer

<sup>2</sup> Seis ari pare, Jesús viraso Pedro, Santiago, Juan reseve ivitri ivate vahesave oyeupi. Aheve aviyeteramo tēi oñecuñaro güemimbohe rovai. <sup>3</sup> Iturucuar sendí, morochí eteanga. Ndipoi eté que ava co nungar co ivi pipe turucuar oyo-sei vahe. <sup>4</sup> Iyavei aviyeteramo tēi oyemboyecua Elías, Moisés reseve Jesús rese oñemoñeta yuvinocha. <sup>5</sup> Ipare Pedro aipo ehi chupe:

—Ore mbohesar, javiye ai eté cohava yaico! Toroyapo mbosapi teyupami: ñepei ndeu nara, ambuae Moisés upe, ambuae evocoyase Elías upe nara —ehi.



<sup>6</sup>Osiq̄iye t̄i semimbohe yuvireco. Sese Pedro ndoicuaise oñehe ãgua, aipo ehiño t̄i. <sup>7</sup>Ahe ramoseve avei oḡüeyi iva quiha iharive, oyopipa tupri yuvireco. Ahe ip̄ahuve oyeendu ñehesa aipo ehi vahe: “Co che Rahir, che rembiaisu; peyapisaca catu iñehe rese” ehi vahe. <sup>8</sup>Ahe ramoseve avei omahese oivii yuvireco, ndosepiai et̄e que ambuae ava, Jesús güeraño tupri it̄e osepia op̄ahuve yuvireco.

<sup>9</sup>Ipare oḡüeyi ivitri sui yuvireco, aipo ehi güemimbohe upe ou: “Ndape-mombehui chietera que ñepe i ava upe co mbahe pesepia vahe, pemombehura rumo acoi che, Ava Riquehir, acuer-ayevise voi” ehi. <sup>10</sup>Oyeupeñomi t̄i vireco aipo ñehesa yuvireco, ahe rumo oporandu-randu oyeupe: “¿Mara oya p̄iha aipo, ‘Acuerayevira’ ehise?” ehi t̄i yuvireco. <sup>11</sup>Evocoyase semimbohe oporandu chupe:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

<sup>12</sup>Evocoyase aipo ehi chupe:

—Elías rane it̄e niha oura opacatu mbahe moingatu ãgua. ¿Mahera arachendar icuachiapri pipe aipo ehi: “Ava Riquehir oiporarara mbahe, yamotar̄himbri avei secoira” ehi? <sup>13</sup>Che niha aipo ahe p̄eũ: Elías rumo ou it̄e, ava evocoyase opacatu güemimbotar t̄i oyapo yuvireco sese. Ëḡüe ehi opacatu yaviye arachendar icuachiapirer sese —ehi.

### **Jesús ombogüera ch̄ihivahe carugar rerecosar**

<sup>14</sup>Ipare oyeve yuvireco güemimbohe recosave. Aheve osepia ava rehii oyere guasuse yuvireco sese, iyavei oime aheve Moisés porocuita rese oporombohe vahe oiñehepoepi-epi semimbohe yuvireco. <sup>15</sup>Ichui Jesús repiase, opacatu

yuvinoña yuviraso chupe “avirave” apo.

<sup>16</sup>Evocoyase ahe oporandu ava eta upe:

—¿Mbahe rese vo peporandu-randu peyeupe? —ehi.

<sup>17</sup>Ñepe i ip̄ahu pendar omboyeve chupe:

—Porombohesar, co aru che rahir ndeu, vireco vahe carugar oyese, nomoñehengatu ucai vahe yepi.

<sup>18</sup>Iyavei que iguatasa rupi co carugar aviyeteramo t̄i opocose sese, oiti voi ivive iyavei sendiriyuiyusu, säitere-tere avei; sese c̄uritei nipirata iri et̄e. “Penosemi carugar ichui” ahe t̄i nde remimbohe eta upe. Ahe rumo ndoicatui et̄e yuvireco —ehi.

<sup>19</sup>Jesús omboyeve chupe:

—¿Too, ndapeyeroya tupri vitei et̄e che rese! ¿Mbovi rupi rutei vo aico vitera pe p̄ahuve che ñemosasa pipe? Peru evocoi ch̄ihivahe cheu —ehi.

<sup>20</sup>Evocoyase oḡüeru yuvireco chupe.

Osepiase carugar Jesús, oiti uca iri ch̄ihivahe ivive. Omboapayere-yere iyavei sendiriyui guasu-guas. <sup>21</sup>Sese oporandu tu upe:

—¿Mbahese vo na ehi chupe? —ehi.

Tu evocoyase aipo ehi:

—Ich̄ihivahemi suive it̄e. <sup>22</sup>Amove co carugar oiti uca tatave, ive avei yuca pota uca ãgua yepi. Sese ereicatuse, ore p̄itiviiñomi t̄i catu eve ore paraisuere-cosave —ehi.

<sup>23</sup>Jesús aipo ehi chupe:

—¿Mahera, “Ereicatuse” ere cheu! Acoi che rese oyeroya vahe upe opacatu mbahe yaposa —ehi.

<sup>24</sup>Aipo hese tu,

—¿Oroviroya niha, che p̄itivii ru eve nde reroya catu ãgua! —ehi p̄irata chupe.

<sup>25</sup>Osepiase Jesús ava rehii, oyemboyase sese, oñehe p̄irata carugar upe aipo ehi:

—Caruguar noñehi vahe, ndayapisai vahe, che orocuai, epoi co chihivahe sui, ereique iri eme secocuer rese —ehi.

<sup>26</sup> Caruguar sãse pucu chihivahe yuca tupri oso. “Omano ité co chihivahe” ehi ambuae ava yuvireco. <sup>27</sup> Jesús rumo oipopisi imopuha; evocoyase chihivahe opüha tupri voi eté.

<sup>28</sup> Ichui oi que oi pipe. Aheve semimbohe ahe aemi oporandu yuvireco chupe:

—¿Mahera pïha ndoromose catui eté caruguar ichui? —ehi yuvireco.

<sup>29</sup> Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar caruguar yaicatu imombo —ehi.

### Jesús omombehu iri omano água

<sup>30</sup> Ichui yuvinosepase, yuviraso ivi Galilea rupi. Jesús rumo ndoyemboye-cua uca potai eté que ambuae ava upe.

<sup>31</sup> Esepia, güemimbohe güeraño ité ombohe aipo ehi:

—Che, Ava Riquehir, imondopri aicora che amotarêhimbar povrive, che yuca aveira yuvireco, mbosapi ari rupi rumo acuerayevira —ehi.

<sup>32</sup> Semimbohe rumo ndosenducuai eté oyeupe ñehesa yuvireco iyavei osiquiye chupe porandu água yuvireco yepi.

### ¿Ava vo seco ivate catu vahe?

<sup>33</sup> Ipare oyepota tecua Capernaum ve yuvireco. Yuviroiquese oi pipe,

—¿Mbahe rese vo acoi peyeaca-aca peico peri rupi? —ehi güemimbohe upe.

<sup>34</sup> Ahe rumo noñehi tupri yuvireco chupe. Esepia, peri rupi, “¿Ava pïha ivate catu vahe?” ehi asi-asi oyeupe yuvireco. <sup>35</sup> Evocoyase oguapisave, “Peri-opa” ehi güemimbohe upe, aipo ehi avei:

—Oimese pe pãhu pendar oyemboi-vate ai vahe, ahe rumo seco ivi coti

catura opacatu sui ava eta pïtivii água —ehi.

<sup>36</sup> Ipare oipisi chihivahe güemimbohe pãhuve senoha aipo ehi:

<sup>37</sup> —Acoi ava oipisi vahe co chihiva-hemi nungar che rer pipe sereco, che ité che pisi yuvireco; iyavei acoi ava che pisi vahe, ndahei che güeraño che pisi, oipisi aveira che mbousar —ehi.

### Acoi ndahei vahe yande amotarêhimbar, ahe yande mboyoyasar secoi

<sup>38</sup> Evocoyase Juan aipo ehi chupe:

—Ore mbohesar, orosepia mbia nde rer pipe omombo vahe caruguar. Ahe rumo ndoguatai cüritei ore rupi; ore ité ndoroipotai chupe —ehi.

<sup>39</sup> Jesús rumo,

—Aní êgüe peye —ehi—. Esepia, ndipoi eté que ambuae oyapo vahe poromondiisa che rer pipe, oicatu vaherã oñehi rai che rese. <sup>40</sup> Sese ndayande amotarêhii vahe, ahe yande mboyoyasar secoi. <sup>41</sup> Acoi que omondo vahe i vaso pipe che rupi pe recosa pipe pëu, evocoi nungar oipisi itera porerecosa oyeupe nara —ehi.

### Yaicua catura mbahe tõi apoëhi água

<sup>42</sup> “Acoi que ava omboangaipa uca vahe co chihivahemi nungar che reroy-asar, iyacatu evocoi nungar ñapichisa ita mbahe mbocuhisa iyesho rese para guasu pipe imombo água. <sup>43</sup> Sese pe po pe mboangaipa uca vahe peyasia ité peyesui. Esepia, aviye catu peiquera tecove apirêhisave ñepeï pe po rese, peso rãgüer sui que ñuvirío pe po rese tata guasu apirêhisave. <sup>44</sup> Aheve acoi uru no-manoi vahe, tata ndogüei vahe avei. <sup>45</sup> Pe pi pe mboangaipa ucase, peyasia avei peyesui. Esepia, aviye catu ndape pindugüei peique tecovesave, que ñuvirío pe pi rese peique rãgüer sui tata guasu ndopai vahesave. <sup>46</sup> Aheve acoi

uru nomanoi vahe, tata ndogüei vahe avei. <sup>47</sup>Pe resa avei pe mboangaipa ucase, penose ité peyesui. Esepia, aviye catu peique ñepeí pe resa rese Tüpa mborerecuasave que ñuvirío pe resa rese tata guasu apirêhisave pe reique rägüer sui. <sup>48</sup>Aheve acoi uru nomanoi vahe, tata ndogüei vahe avei.

<sup>49</sup>“Esepia, opacatu ava imoehesara tata nungar pipe. <sup>50</sup>Sese yucrí aviye ai eté. Nasehe irise rumo, ndayaicatuí chira imoehé iri ägua. Peico catu yucrí nungar mbahe tuprí pipe peyeupe nara” ehi.

### **Jesús oporombohe mendasa sui poiêhi ägua**

**10** Ipare Jesús osê tecua Capernaum sui, oso Judea ivi rupi iai Jordán rovai ari sêsa coti. Aheve ava rehii oñemonuha iri yuvireco sese. Iyavei omböhe iri ava güecocuer rupi tuprí. <sup>2</sup>Evocoyase fariseo oyemboya seco rãha ägua tēi yuvireco sese, “¿Aviye píha cuimbahe omenda vahe opoi güembireco sui?” ehi yuvireco chupe. <sup>3</sup>Ahe rumo omboyeveí chupe:

—¿Mara ehi vo acoi Moisés porocuita pipe? —ehi.

<sup>4</sup>Ahe evocoyase omboyeveí yuvireco chupe:

—Moisés remimombehu aipo ehi: “Pemonдора pe rembireco upe cuachiar poisa resendar pe poi ägua pe rembireco sui” ehi —ehi fariseo yuvireco chupe.

<sup>5</sup>Evocoyase fariseo upe aipo ehi:

—Moisés omondo co porocuita pe poreroyaêhisa pipe sui pēu. <sup>6</sup>Yipi-suive ité niha, “Tüpa oyapo opacatu mbahe, oyapo avei cuimbahe, cuña reseve. <sup>7</sup>Sese niha cuimbahe omendase, oyepipira oyesupa sui güembireco rese ité yuvirecoi ägua. <sup>8</sup>Evocoyase ñuvirío yuvirecoira ñepeí ava nungar.’ Sese ndahe iri ñuvirío, ñepeí nungar ité yuvirecoira. <sup>9</sup>Evocoyase ava Tüpa omo-

menda vahe oyese, ndiyai ava tēi omboyeveí yuvireco oyesui —ehi.

<sup>10</sup>Oíve yuvirecoi vitese, semimbohe oporandu iri co mbahe rese yuvireco chupe. <sup>11</sup>Evocoyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa tēi vahe güembireco sui. <sup>12</sup>Acoi cuña opoise omer sui omendase ambuae cuimbahe rese, ahe oyemboaguasa tēi vahe avei —ehi güemimbohe upe.

### **Jesús osovasa chíhivahe**

<sup>13</sup>Ipare ogüeru chíhivahe Jesús upe yuvireco sese ipoco ägua. Semimbohe rumo, “¿Mahera vo peruño tēi chíhivahe?” ehi opíha vīracuasa pipe serusar upe yuvireco. <sup>14</sup>Evocoyase Jesús osepiase, ndasorii güemimbohe upe aipo ehi:

—¿Mahera ndapeipotai iyu ägua! Toyugüeruño chíhivahe cheu. Esepia, co chíhivahe nungar ava yuviroiquera che Ru Tüpa mborerecuasave. <sup>15</sup>Supi eté, acoi ndoipisii vahe che Ru Tüpa mborerecuasa chíhivahe nungar yuvireco, ahe evocoyase ndoyuviroiquei chietera ipipe —ehi.

<sup>16</sup>Evocoyase oipisi, omondo opo iharive osovasa.

### **Ñepeí mbia chíhivahe imbahe eta vahe oñehe Jesús upe**

<sup>17</sup>Oguata vitese Jesús yuvireco, aheseve mbia chíhivahe oña oso sovai, oñenopiha, oporandu chupe:

—Porombohesar aviye vahe, ¿mbahe vo ayapora tecovesa apirêhi vahe rereco ägua? —ehi.

<sup>18</sup>Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepeí aviye vahe ité, ahe Tüpa secoi. <sup>19</sup>Ereicua niha Tüpa porocuita: ‘Ndereporoyucaí chira, nan-

deaguasai chira, nandemondai chira, nanderemirai chira ambuae ava rese, ndereporombopai chira, eremboyeroyara nde ru, nde si avei' ehi vahe —ehi.

<sup>20</sup> Ahe mbia rumo,

—Porombohesar, che aipo nungar opacatu amboaviye ité che chíhivahe suive —ehi.

<sup>21</sup> Evocoiyase omahe saisusave sese, aipo ehi chupe:

—Ñepei mbahe rumo ipane vite ndeu: eso, emondopa rane nde mbahe; ahe sepi evocoiyase emondo ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

<sup>22</sup> Aipo oyeupe hese rumo, ahe mbia oyepepiño ichui oviharēhisave oso. Esepia, ahe mbahe yar ité secoi.

<sup>23</sup> Evocoiyase omahe oiviindar güemimbohe rese, aipo ehi:

—¡Yavai eté rumo ava mbahe yar reique água che Ru Tüpa mborerecuasave! —ehi.

<sup>24</sup> Semimbohe evocoiyase, “¡Mara ehi rutei!” ehi tēi ñehe renduse yuvireco. Ahe rumo omombehu iri:

—Che rahireta, ¡yavai eté Tüpa mborerecuasave imbahe eta vahe reique água ombahe eta rese tēi ipihañemoñeta vahe upe! <sup>25</sup> Yavai rai camello upe yucuar rupi seique água, ava imbahe eta vahe upe rumo yavai catu che Ru mborerecuasave seique água —ehi.

<sup>26</sup> Aipo nungar renduse oyepihamondii guasu yuvireco. Oporandu-randu tēi oyeupe yuvireco: “¿Ava angahu piha oñepisirora yuvireco viña?” ehi.

<sup>27</sup> Evocoiyase omahe güemimbohe rese aipo ehi:

—Ava tēi upe rumo yavai aipo nungar mbahe apo água; Tüpa upe rumo ndayavaimi eté. Esepia, Tüpa opacatu mbahe mboavaisarēhi secoi —ehi.

<sup>28</sup> Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata água —ehi chupe.

<sup>29</sup> Omboyevi rumo Pedro upe:

—Supi eté co aipo ahe pēu: acoi che raisusa pipe iyavei ñehesa ñepisirosa raisusa pipe oseypa vahe güēta, viquehir, vivri, güeindri, vu, osi, guahir iyavei oivi, <sup>30</sup> ahe oipisira omahera co ivi pipe cien yupagüer rupi avei oi, vivri, güeindri, osi, guahir iyavei ivi. Yepe oiporarara mbahe-mbahe tēi viña. Ipare rumo tecua ambuaeve oipisi aveira tecovesa apirēhi vahe curi. <sup>31</sup> Setá vai rumo cūrítei yipindar vahe; ipa tēira yuvirecoi. Setá aveira cūrítei ipa tēi vahe, yipindar yuvirecoira curi —ehi.

### **Jesús omombehu imombosapisa rupi omano água**

<sup>32</sup> Yuvirasose Jerusalén ve, Jesús tenonde secoi güemimbohe upe. Semimbohe rumo ndoyembovīhai iyavei saquicuerindar osiquiye yuvireco. Aheve Jesús oñehe iri co cotimi güemimbohe doce yuvirecoi vahe upe. Ichui omboipi imombehu co mbahe-mbahe tēi reime água chupe aipo ehi: <sup>33</sup> “Peicua niha, yasora tecua Jerusalén ve, aheve rumo che, Ava Riquehir, che pisira che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, ‘Tomanó’ ehira yuvireco cheu. Ipare che mondo aveira ava ndahei vahe yande mu upe yuvireco. <sup>34</sup> Mara ehi-ehi tēira yuvireco cheu, ondivi-ndivira, oyuvirocua-rocuara che rese, che yuca aveira yuvireco. Mbosapi ari rupi rumo acuerayevira” ehi güemimbohe upe.

### **Mbahe aviye vahe rese oporandu Santiago, Juan reseve yuvireco**

<sup>35</sup> Ipare oyemboyase Zebedeo rahir Santiago, Juan Jesús rese aipo ehi yuvireco chupe:

—Ore mbohesar, oroipota ereyapo mbahe aviye vahe oreu —ehi.

<sup>36</sup> Ahe evocoiyase,

—¿Mbahe vo peipota ayapo vaherã pëu? —ehi chupe.

<sup>37</sup> —Ore oroipota nde mborerecua porañetesave ore mboguapira ndeyepiri eve, ñepei nde mbahe rese pocosa coti, ambuae nde mbahe rese pocoehisa coti —ehi yuvireco chupe.

<sup>38</sup> Evocoiyase omboveyi:

—Pe ndapeicuai mbahe rese pe porandu. ¿Peiporara catura pïha che co mbahe-mbahe tēi aiporara vaherã, inungar-ra que ñgua iro vahe aihu vaherã viña? Iyavei, ¿peicatura pïha che ãpiramosa aipisi vaherã pisi? —ehi.

<sup>39</sup> —Taa, oroicatuño itera —ehi yuvireco.

Evocoiyase ahe aipo ehi chupe:

—Supi eté peihura co mbahe iro vahe, peipisi aveira ãpiramosa che aipisi va-herã nungar. <sup>40</sup> Co rumo ndiyai cheu che piri pe guapí ñgua, che mbahe rese pocosa coti, ambuae che mbahe rese pocoehisa coti. Che Ru Tüpa omoingatu güembiporavo upe nara oguapí vaherã che ipive —ehi.

<sup>41</sup> Evocoiyase ambuae semimbohe diez yuvirecoi vahe ñnehe renduse, oñemoiro Santiago, Juan upe yuvireco.

<sup>42</sup> Ahe rumo, “Perio” ehi opacatu upe. Ipape aipo ehi:

—Peicua niha acoi mborerecuar guasu yuvirecoi vahe Tüpa cuaparēhi oporocuai oporoyuca ai tēisa pïpe. Iyavei acoi ivate catu vahe oyecoapirasá iteanga omborerecuasa pïpe yepi. <sup>43</sup> Pe rumo ěgüe ndapeyei chira pe yeereco. Iyacatu rumo acoi ava oipota vahe ivate catu güeco ñgua pe pãhuve, ihañeco rane itera opacatu ambuae ava rese. <sup>44</sup> Iyavei acoi pe pãhu pendar oipota vahe tenonde catu güeco ñgua, ihañeco tupri ranera opacatu pe pãhu pendar rese. <sup>45</sup> Aherã niha che,

Ava Riquehir, ayu ndahei ava che rese ihañeco ñgua; che rumo ayu ava rese che hañeco ñgua, iyavei amondo vaherã che recocuer manosave ava eta repirã Carugar povri sui senose ñgua —ehi.

### Jesús ombogüera Bartimeo sesapisoehisa sui

<sup>46</sup> Ipape oyepota tecua Jericó ve yuvireco. Ahe tecua sui yuvinosese güemimbohe reseve, ava rehii avei, aheve peri popive mbia ndasesapiso vahe Bartimeo serer vahe, Timoteo rahir, oguapí oí. <sup>47</sup> Osenduse, “Jesús Nazaret pendar” hesa, osapucái pïrata:

—¡Jesús, David suindar, che paraisuerecomi tēi eve! —ehi chupe.

<sup>48</sup> Ava rumo oyaca-yacaño, “¡Quiriri!” ehi yuvireco chupe. Ahe rumo,

—¡David suindar, che paraisuerecomi tēi eve! —ehi pïrataño ité chupe.

<sup>49</sup> Evocoiyase osenduse ñnehe, opita,

—Peñehe chupe —ehi.

Ichui oñehe yuvireco chupe:

—Eyemonguerēhi, epüha. Esepia, oñehe aipo ndeu —ehi.

<sup>50</sup> Aipo oyeupe he ramoseve, omom-boño oturucuar guasu, opüha yesapiha oso chupe. <sup>51</sup> Evocoiyase oporandu ndasesapiso vahe upe:

—¿Mbahe vo ereipota ayapo vaherã ndeu? —ehi.

Ahe evocoiyase,

—Porombohesar, che mbosarecomi tēira eve viña —ehi.

<sup>52</sup> Evocoiyase aipo ehi ahe mbia upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramoseve ndasesapiso vahe osareco tupri ité. Ipape osoño ité Jesús raquicuei peri rupi.

### Jesús oique Jerusalén pïpe

**11** Ovirovise tecua Jerusalén yu-viraso, serovicave oime ñuvirío tecuami: Betfagé, Betania avei ivitri

Olivo ñpiimi. Aheve Jesús omondo ñuvírío güemimbohe, <sup>2</sup> aipo ehi chupe:

—Peso evocoi tecuami yande rovaingarve. Peyepotase aheve, pesepiara guaricu ñapichimbri imoha, ava ndoyeupi vitei vahe yuvireco sese, ahe peyorañora seru. <sup>3</sup> Acoi que ava: “¿Mahera vo ãgüe peye?” ehise pëu, “Ore Yar oiporu pota, ipare niha omboyevi voiñora” peyera chupe —ehi.

<sup>4</sup> Evocoiyase ahe yuviraso peri rupi. Aheve guaricu ñapichimbri osepia imoha yuvireco oquendipive. Ichui oyoraño seru yuvireco.

<sup>5</sup> Evocoiyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

<sup>6</sup> Ahe rumo Jesús ombohosa rupi tupri ité omboyevi yuvireco chupe. Evocoiyase, “Tovirasoño” ehi yuvireco chupe. <sup>7</sup> Ipore viraso guaricu Jesús upe, iyavei oturucuar omondo iharive yuvireco. Ahese Jesús oyeupi iharive. <sup>8</sup> Setá ava oipipira oturucuar peri rupi, ambuae ava evocoiyase oyasia pindo omondo peri rupi saperã yuvireco. <sup>9</sup> Ava senonendar, saquicuerindar avei,

—¡Imboeteipri, sovasapri tasecoi ou vahe yande Yar rer pipe! —ehi pírata yuvireco chupe—. <sup>10</sup> ¡Sovasapri yande ramoi David mborerecuasa tasecoi ou vahe oico! ¡Vave imboeteipri tasecoi! —ehi yuvireco chupe.

<sup>11</sup> Ëgüe ehi Jesús oiqueste Jerusalén ve. Ipore oiqueste tũparo pipe. Aheve opacatu rupi mbahe osepia. Ipore yuviraso Betania ve caharuse ité doce güemimbohe rese.

### **Jesús vireco megua higuera ndihai vahe**

<sup>12</sup> Ahere ayihive, yuvinosese Jesús tecua Betania sui, ndasiëpoi oico. <sup>13</sup> Osepia amombri ivira higuera so ati vahe, oso chupe ‘¿iha pñha?’ oyapave. Ahe rumo osepia so pãve tãi sese. Esepia,

ahe ivira upe ndosupiti vitei iha ãgua. <sup>14</sup> Evocoiyase aipo ehi ahe ivira upe:

—¡Co pipe suive ndipo iri chira ava nde ha yuvirohu vaheñã! —ehi.

Semimbohe osendu ñhehe yuvireco.

### **Jesús omombopa ava mbahe mboepisar tũparo pipe sui**

<sup>15</sup> Ipore oyepota Jerusalén ve yuvireco. Aheve Jesús oiqueste judío tũparo guasu pipe, omboipi ava mbahe mondosar, mbahe rerocuasar mombopa tupri ocarve oico iyavei ava guarepochi recuñarosar opa ombovapi mesa imondo, apicasu mondosar renda avei omboviapi imondo. <sup>16</sup> Ndoipotai eté que ambuae mbahe seroiquepirã tũparo pipe. <sup>17</sup> Ipore oporombohe aipo ehi:

—Icuachiapri aracahendar pipe aipo ehi: ‘Co che rãta yeruresa rãtarã opacatu ava ivi pipendar uve nara’ ehi. Pe rumo imonda rai vahe rãta nungar tãi pereco —ehi.

<sup>18</sup> Pahi eta rerecuar iyavei oporombohe vahe Moisés porocuita rese osenduse, “¿Mara yahera pñha sereco yuca uca ãgua?” ehi voi yuvireco chupe. Osiquiye rumo opacatu ava sui. Esepia, ahe ndoyembovihai iporombohosa rese yuvireco. <sup>19</sup> Pitu ramomise, Jesús yuvinosë güemimbohe eta reseve yuviraso ahe tecua sui.

### **Ivira higuera ndihai vahe ipiru**

<sup>20</sup> Ahere ayihive, añihiveive yuviraso, osepia ivira higuera sapo suive ipirupa vahe yuvireco. <sup>21</sup> Evocoiyase Pedro oyemomahenduha voi ñhehe agüer rese, sese aipo ehi Jesús upe:

—Ore mbohesar, esepia co ivira higuera upe ereñhe rai vahecuer, opa ité ipiru —ehi.

<sup>22</sup> Jesús evocoiyase,

—Peyeroya Tũpa rese —ehi—. <sup>23</sup> Supi eté aipo ahe pëu: acoi que ava ivitri upe: ‘Esiri ave sui, eso para guasu pipe’

ehi vahe oyeroya tuprise ité aipo hesa rese, êgüe ehi etera chupe. <sup>24</sup>Sese aipo ahe pëu: opacatu que mbahe rese peporanduse pe yeroquisa pipe, peyeroya itera mbahe oime vaheṛā rese pëu, ahese peipisi itera. <sup>25</sup>Acoi peyerouquise, yipindar peñero rane que pe amotarêhimbar upe, ahese êgüe ehi aveira pe Ru iva pendar iñero pe angaipa rese pëu. <sup>26</sup>Êgüe ndapeyeise, pe Ru iva pendar avei niñeroi chira pe angaipa rese pëu —ehi.

### Jesús mborerecuasa

<sup>27</sup>Ipare oyeve Jerusalén ve yuvireco. Aheve Jesús secoise judío tūparo guasu pipe, pahi eta rerecuar, Moisés porocuita rese oporombohe vahe, ava rerecuar guasu avei oyemboya yuvireco sese. <sup>28</sup>Aheve oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarā ndeu co nungar apo āgua? —ehi yuvireco chupe.

<sup>29-30</sup>Evocoyase omboyeve chupe:

—Che avei aporandura mbahe rese pëu: ¿Ava vo Juan ombou ava āpiramo āgua; Tūpa pīha, ava tēi tie? Pemboyeve cheu, ahese che avei amombe-hura pëu ava porocuita rupi eté pīha ayapo co mbahe vichico —ehi.

<sup>31</sup>Evocoyase oñemoñeta aipo ehi oyeupe yuvireco: “‘Tūpa ombou’ yahese chupe viña, ahe evocoyase: ‘¿Mahera ru ndaperoyai?’ ehira yandeu. <sup>32</sup>‘Ava tēi remimbou’ ndayahei chiaveira chupe’ ehi. Ahe osiquiye tēi ambuae ava sui yuvireco. Esepia, opacatu ité oicua Juan oñehe Tūpa suindar ñehesa rese yepi. <sup>33</sup>Evocoyase omboyeve chupe yuvireco:

—Ndoroi cuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuita pipe co mbahe ayapo” ndahei chietera pëu —ehi mborerecuar guasu upe.

### Ava mbahe tēi oporaviqui vahe recocuer sui yembohesa

**12** Evocoyase Jesús omboyoa tecocuer ambuae ava recocuer rese aipo ehi: “Oime mbia oñoti vahe uva oivi pipe, ahe oñachi tupri sereco iyavei oyapo mbahe uva ricuer renose āgua. Oyapo avei oi ivate vahe opacatu mbahe moha āgua. Ipare oseya oivi ava oporaviqui vahe upe iporu āgua. Ichui osē, oso amombri vahesa rupi. <sup>2</sup>Oyepotase arí uva pohosa, ahese omondo güembigui oporaviqui vahe upe imboporandu ‘tomboumi uva pohopri cheundar cheu cute’ oyapave viña. <sup>3</sup>Ahe rumo oipisiño, inupa-nupa imboyeve tupri tēi yuvireco. <sup>4</sup>Evocoyase ahe ivi yar omondo iri ambuae güembigui. Ahe oyapicha-pichaño ñaca rupi, iñehe mara-mara tēiño avei yuvireco chupe. <sup>5</sup>Ipare omondo iri ambuae. Ahe oyucaño yuvireco. Ichui omondo ati iri tēi. Ahe ipāhu pendar rese yuvirocua-rocuano yuvireco, oyucaño avei ambuae yuvireco.

<sup>6</sup>‘Iyavei ñepeí opita vite, tahir ité, sembiaisu. Ahe omondo ipa ‘co omboyeroyara yuvireco’ oyapave viña. <sup>7</sup>Oporaviqui vahe rumo aipo ehi oyeupe yuvireco: ‘Co aipo oipisira vu mbahe. Yayucaño, yandeu nara pāve topita co ivi’ ehi yuvireco. <sup>8</sup>Ichui oipisi, oyucaño yuvireco. Ipare ovinose sehögüer ahe miti sui co coti yuvireco.

<sup>9</sup>‘¿Mbahe vo evocoyase oyapora ivi yar? Osora chupe, opara oyuca oporaviqui vahe, iyavei omondopara oivi ambuae ava upe.

<sup>10</sup>‘¿Ndapeyeroqui vo pe co icuachi-apri pipe? Aipo ehi niha acoi:

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri āgua.

<sup>11</sup> Ēgüe ehi niha yande Yar yapo. ¡Mara ehi rutei revol! ehi icuachiapri pipe” ehi.

<sup>12</sup> Evocoiyase oviraso pota voi Jesús soquenda āgua yuvireco. Esepia, ahe osenducua ité oyesendar iporombohesa yuvireco. Ava sui osiquiyepave rumo opoiño yuvireco ichui.

### **Fariseo osecoña iri tēi Jesús guarepochi rese yuvireco**

<sup>13</sup> Ipare mborerecuar omondo fariseo iyavei mborerecuar Herodes rupindar avei Jesús upe ‘toyavi angahu oñehe’ oya yuvireco chupe. <sup>14</sup> Ahe yuviraso chupe aipo ehi:

—Porombohesar, ore oroicua nde supi eté vahe mbahe eremombehu eico, nde niha ndereroyai vahe ava ñehesa tēi. Esepia, “Ēgüe ehi co mbia” nderei eté ava upe iyavei ereporombohe mbahe supi tupri vahe Tūpa remimbotar apo āgua rese. ¿Aviyera pīha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

<sup>15</sup> Oicua ité rumo fariseo pihaēhisa, sese aipo ehi voi chupe:

—¿Mahera che moingue pota mbahe tēi pipe peye? Peru evocoiyase ñepe guarepochi cheu, tasepia —ehi.

<sup>16</sup> Ipare fariseo güeru yuvireco chupe, ahe guarepochi repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

<sup>17</sup> Evocoiyase aipo ehi fariseo upe:

—Pemondora mborerecuar upe mbahe chupendar; Tūpa upendar mbahe evocoiyase pemondora Tūpa upe —ehi.

Evocoiyase oyepihamondii tēi aipo oyeupe hese yuvireco.

### **Saduceo oporandu Jesús upe cuerayevisa rese secoñasave**

<sup>18</sup> Evocoiyase saduceo “ndipoi eté cuerayevisa” ehi vahe yugüeru Jesús upe. Oporandu tēi angahu yuvireco chupe:

<sup>19</sup> —Porombohesar, Moisés niha oseya güembicuachiagüer yandeu aipo ehi: “Que cuimbahe omenda vahe omanose guahiēhiseve, tivri evocoiyase omen-dara sembirecocuer rese ahe viquehir omano vahecuer upe nara tahira oico.” <sup>20</sup> Oime siete tupri oyesuindar pāve yuvirecoi vahe. Yipindar vahe omenda. Ichui omanoño, ndatahii eté rumo. <sup>21</sup> Ipare tivri omenda viquehir rebirecocuer rese. Ahe rumo omanoño, ndatahii avei rumo. Ēgüe ehi tupri avei tivri imombosapisa. <sup>22</sup> Ēgüe ehi co siete tupri omenda ahe cuña rese, ndatahii eté rumo yuvireco. Coiye rumo cuña omano avei no. <sup>23</sup> Evocoiyase opase ocuerayeivi yuvireco, ¿uma rebireco itera pīha? Esepia niha, siete tupri ité omenda tēi yuvireco sese —ehi yuvireco chupe.

<sup>24</sup> Evocoiyase Jesús omboyeivi chupe:

—Pe pihañemoñeta pipe peyavi. Esepia, ndapeicuai eté Tūpa ñehe icuachiapri arachendar, ndapeicuai avei Tūpa pīratasa. <sup>25</sup> Supi eté omano vahe ocuerayeise, chupe ndipo iri chira mendasa. Ahe rumo Tūpa rembiguai iva pendar nungar yuvirecoira ivave. <sup>26</sup> Co cuerayevisa resendar rumo amombe-hura pēu: aviye ndapeyeroquii anga vahe Moisés rebicuachiagüer pipe, acoi caha rese sendi guasu vahe aviterve Tūpa aipo ehise chupe: ‘Che Abraham, Isaac, iyavei Jacob Tūpa aico’ ehi vahe. <sup>27</sup> ¡Tūpa ndahei omano vahecuer Tūpa! ¡Ahe rumo oicove vahe Tūpa secoi! Sese pe pihañemoñeta pipe peyavi —ehi saduceo yuvirecoi vahe upe.



### Porocuita aviye catu vahe

<sup>28</sup> Ñepei Moisés porocuita rese oporombohe vahe osendu ñehe pīratase oyeupe yuvireco, oicua avei Jesús omboyeve tuprise ñehe yuvireco chupe, evocoiyase oyemboya sese oporandu chupe:

—¿Uma vo porocuita aviye catu vahe opacatu sui? —ehi.

<sup>29</sup> Jesús omboyeve chupe:

—Yīpīndar mborocuita aviye catu vahe aipo ehi: ‘Pesendu Israel: yande Yar Tūpa aheño ité ñepei yande Yar secoi.

<sup>30</sup> Eresaisura nde Yar Tūpa opacatu nde pihá pipe, opacatu nde recocuer pipe, opacatu nde yapisacasa pipe iyavei opacatu nde pīratasa pipe’ ehi. <sup>31</sup> Iyavei imoñuviriosa porocuita ahe co: ‘Eresaisura ambuae ava nde yeaisu nungar’ ehi. Ndipo iri ambuae porocuita aviye catu vahe co sui —ehi.

<sup>32</sup> Evocoiyase porocuita rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepei Tūpa iyavei ndipoi eté ambuae.

<sup>33</sup> Iyavei yasaisura Tūpa opacatu yande pihá pipe, opacatu yande yapisacasa pipe, opacatu yande pīratasa pipe, iyavei yasaisura ava yande yeaisu nungar. Ahe ité aviye catu mbahe seropovēhepri sui iyavei opacatu porerecosa sapīpri tēi sui —ehi.

<sup>34</sup> Evocoiyase Jesús icuase co ava pīhañemoñeta tuprisa, aipo ehi chupe:

—Namombriimi ereico Tūpa mborerecuasa sui —ehi.

Ipare ndipo iri oyemonguerēhi vahe oporandu vaheṛā mbahe rese yuvireco chupe.

### ¿Ava suindar pīha Poropīsīrosar?

<sup>35</sup> Jesús oporombohese tūparo pipe aipo ehi:

—¿Mahera ru Moisés porocuita rese oporombohe vahe: “Poropīsīrosar David suindar ité” ehi yuvireco? <sup>36</sup> Esepia, David ité aipo ehi Espīritu Santo pīratasa pipe:

‘Yar aipo ehi che Yar upe:

Eguapī che acato coti, acoi che amonodose voi eté nde amotarēhimbar nde povrive yuvireco’

ehi David aracahe. <sup>37</sup> ¿Mahera ru, “Poropīsīrosar David suindar secoira” peye, David teieté, “Che Yar” ehise chupe? —ehi.

Ava rehīi oquerēhisave ité osendu Jesús ñehe yuvireco.

### Jesús oicua uca Moisés porocuita rese oporombohe vahe recocuerai

<sup>38</sup> Jesús aipo ehi oporombohesave: “Peicua catu Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo āgua ocar rupi omboeteisa pipe yuvireco. <sup>39</sup> Oseca avei tenda porañete catu vahe güenara otūparo pipe yuvireco yepi, iyavei carusave tenda aviye catu vahesave oguapī yuvireco yepi no. <sup>40</sup> Iyavei cuña imer mano vahecuer rēta virocua-rocuā tēi ichui. Oarondaguā tēi avei oyerokuī pucupucu yuvireco. Ahe rumo oipisira Tūpa ñemoirosa ipīrata catu vahe yuvireco curi” ehi.

### Cuña imer mano vahecuer porerecosa

<sup>41</sup> Ñepei ari Jesús oguapī oī porerecosa riru rovai ava repia āgua mara ehi oporerecosa imondo ipipe yuvireco. Aheve setá mbahe yar omondoño ité guarepochi yuvireco. <sup>42</sup> Ahe pipeve oyepota cuña imer mano vahecuer iparaisu vahe. Ahe avei omondo ñuviriomi guarepochi oporerecosa ipipe. <sup>43</sup> Evocoiyase Jesús oñehe güemimbohe upe aipo ehi:

—Supi eté che aipo ahe pêu: co cuña imer mano vahecuer iparaisu vahe setá catu guarepochi oporerecosa omondo ambuae ava eta sui co guarepochi riru pipe. <sup>44</sup> Ambuae ava eta rumo oguarepochi rumbirermi tēi omondo oporereco água yuvireco; co cuña rumo oparaisusa pipe opa ité omondo oguarepochi —ehi güemimbohe upe.

### “Imondurusara tūparo guasu” ehi Jesús

**13** Jesús osēse tūparo guasu pipe sui, ahese ñepeí semimbohe aipo ehi chupe:

—Ore mbohesar, jesepia oi ita imopuhapri, icatupri ai! —ehi.

<sup>2</sup> Jesús rumo omboyeveí chupe:

—¿Pesepia co oi tuvichá vahe ité? Ndipoi chietera rumo que ñepeí ita oyeha vite vahe; opacatu ité imondurusara curi —ehi.

### Cañi renonde mbahe oime vaherã

<sup>3</sup> Evocoiyase Jesús yuviraso ivitri Olivo ve, ahe ivitri tūparo guasu rovai tupri. Aheve Jesús oguapise oi, Pedro, Santiago, Juan iyavei Andrés oporandu co cotimi mbahe rese yuvireco chupe: <sup>4</sup> “¿Mbahese vo aipo mbahe yaviyera? ¿Mbahe poromondiisa rese rane vo icuasara?” ehi.

<sup>5</sup> Jesús rumo omboyeveí chupe: “Peicua catu, peymbopa ucai rene ambuae ava upe. <sup>6</sup> Esepia, setá ava yugüerura, ‘Che niha Poropãsirosar aico’ ehi tēira ava eta mbopa yuvireco.

<sup>7</sup> “Pesenduse rumo ñehesa vavasa resendar cohave, iyavei que rupi, ndapeyembosiquiyei chietera. Esepia niha, ēgüe ehi rane itera; ndehi vitei chira rumo ari cañi. <sup>8</sup> Esepia, ñepeí ivi pipendar ovavara ambuae ivi pipendar rese oyeupe yuvireco; iyavei oimera ivi riríi opacatu-catu tēi tecua rupi,

tiavor avei. Co rumo omboipi ramomira mbahe tēi porarasa.

<sup>9</sup> “Peñearo catu. Esepia, pe rerasora mborerecuar rovai yuvireco, iyavei pe nupara tūparove yuvireco. Pe reraso aveira mborerecuareta rovai, iyavei mborerecuar ivate catu vahe rovai che recocuer sui tēi yuvireco. Ēgüe peyera peñehe che recocuer rese chupe. <sup>10</sup> Cañi renonde rumo co ñehesa písirosa resendar opacatu rane ité ava upe icua ucasara ivi rupi. <sup>11</sup> Iyavei, ‘¿Mbahe pīha amombehura chupe?’ ndapeyei chira pe mondose mborerecuar rovai yuvireco. Aheve voi eté omboyeuara Tūpa pe ñehe água pêu. Esepia, ndahei chira peyesui tēi peñehe, Espiritu Santo ité oñehera. <sup>12</sup> Ipare rumo ava omondoñora vivri yamotarēhisar upe ‘toyuca yuvireco’ oya. Ēgüe ehi aveira ava guahir upe; tahir avei oyamotarēhiñora oyesupa yuca uca água yuvireco che recocuer rese. <sup>13</sup> Opacatu avei ava ndape ambotai chira che recocuer sui tēi yuvireco. Acoi ava oyemoviracua vaneño rumo ari ipa vahe rupi, ahe ipĩsiropri yuvirecoira.

<sup>14</sup> “Tūparo guasu maranehi pipe pesepiase mbahe-mbahe tēi aposa —acoi oyerouqui vahe, ahe tosenducua tupri yuvireco—, evocoiyase acoi yuvirecoi vahe ivi Judea rupi, toñemipa poyava ivitri rese yuvireco. <sup>15</sup> Acoi güēta harive secoi vahe, ahe ari toique iri eme güētave mbahe renose água. <sup>16</sup> Acoi que rupi tēi secoi vahe, toyeví eme avei güētave oyeaosa renose água. <sup>17</sup> ¡Iparaisu itera cuña ipuruha vahe ahe ari pipe, imembi pītani vahe avei! <sup>18</sup> Peoporandu Tūpa upe, toime eme co nungar mbahe sōhisa vahe pipe pêu. <sup>19</sup> Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui; ipare ndipo iri chietera evocoi nungar. <sup>20</sup> Iyavei yande Yar nomombituhise ari naporai vahe, ndipoi chietera oñepisiro

vahe yuvireco viña; ahe rumo güembi-poravo raisusa pipe omombituhura.

<sup>21</sup>“Que oimese aipo ehi vahe: ‘Esepia, co Poropīsīrosar secoi’ ehi, anise, ‘Peve secoi’ ehise yuvireco pēu, aní chira peroya aipo ehi vahe. <sup>22</sup>Esepia, yugüerura ava, ‘Che Poropīsīrosar aico’ ehi tēi vahe, iyavei, ‘Che amombehu vahe Tūpa Ñehengagüer’ ehi angahu tēi vahe, iyavei oyapora mbahe ava ndoyapoi vahe poromondiisa güeco pīratasa mboyecua āgua yuvireco. Aviyeteramo ombopa aveira ava Tūpa reroysar. <sup>23</sup>¡Peicua catura! opa aipo co senondeve amombehu pēu” ehi.

### Mara ehira Tūpa Rahir oyevisē

<sup>24</sup>“Ahe ari pipe rumo co mbahe-mbahe tēi pare ndoyecua iri chira ari, yasi avei ndosesape iri chira, <sup>25</sup>yasitata avei opara oviapi iva sui, iyavei iva re-sendar mbahe oririira yuvireco. <sup>26</sup>Ahese che, Ava Riquehir, iva quiha rese ayecua itera vitu che pīratasa pipe che rendigüer porañetesa pipe avei. <sup>27</sup>Ipare amboura che rembiguai eta iva pendar. Ahe evocoiyase omonuhara opacatu ivi rupindar che rembiporavo yuvireco, que amombri rupi yuvirecoi vahe, que iva rese yuvirecoi vahe avei.

<sup>28</sup>“Peyembohera ivira higuera recocuer sui: co ivira soqui ramose, yaicua cōimi ari sacu vahe yepota āgua yandeu yepi. <sup>29</sup>Na ehi aveira niha pēu che ñehe rupi tupri mbahe pesepiase. Sese peicuara che, Ava Riquehir, cōimi eté che yevi āgua. <sup>30</sup>Supi eté yuvirecove vitera ava osepia vahe, co mbahe opase yaviye. <sup>31</sup>Iva, ivi opara ocañi; che ñehengagüer rumo imboaviyesa rane itera.

<sup>32</sup>“Ndipoi eté rumo ava oicua vahe ari iyavei hora che yevi āgua yuvireco, che Ru rembiguai iva pendar avei ndoicuai yuvireco, che avei ndaicuai eté. Che Ru güeraño ité rumo oicua.

<sup>33</sup>“Sese niha pemahemohara yepi, che rārora peye. Esepia niha, ndicuasai che yevi āgua. <sup>34</sup>Inungar que mbia amombri oso pota āgua renonde, güembiguai oseypa güeta rāro āgua, omondo avei ñepeipei upe iporaviqui āgua, iyavei omondo güeta roquendipi rāro āgua. <sup>35</sup>Pe evocoiyase pemahemohara. Esepia, ndapeicuai marase che oi yar ayevira pēu, aviyeteramo pītu ramose, pītu mbiter, tacura ñehese, anise añihivei. <sup>36</sup>Ndaipotai pemahemohaēhiseve tēi ayevira. <sup>37</sup>Che aipo ahe pēu, opacatu upe avei: ¡Pemahemohaño ité yepi!” ehi güemimbohe eta upe.

### Oyemomborandu Jesús yuca āgua rese yuvireco

**14** Ipare ñuvirío ari judío Pascua pieta āgua ipane, ahe pieta pipe yuvirohu pan ndayapepoi vahe yepi, pahi rerecuareta, Moisés porocuita rese oporombohe vahe avei oyemomborandu: “¿Mara yahera Jesús mbopa ipisi yuca āgua?” ehi yuvireco. <sup>2</sup>Ambuae rumo aipo ehi yuvireco:

—Ndiyai pieta pipe ité yaipisi ava rehii yemondiiēhi āgua yandeu —ehi.

### Cuña Jesús rese mbahe sīacua vahe oipiyere

<sup>3</sup>Ahese Jesús secoi Betania ve Simón lepra vireco vahecuer rētave. Aheve mesave chiniseve, cuña güeru mbahe sīacua vahe siru reseve sepí iteanga vahe. Ahe osovapisa rerocua, ipare oipiyere Jesús āca rese. <sup>4</sup>Ambuae ava aheve yuvinoi vahe rumo oñemoiro tēi aipo ehi yuvireco oyeupe:

—¿Mahera vo co omocañi tēi mbahe sīacua vahe? <sup>5</sup>Omondo vahe ité tie co tresciento ari rupindar mboraviqui repri rupi ava iparaisu vahe pītivii āgua viña —ehi yuvireco.

Omañeco tēi avei ahe cuña yuvireco.

<sup>6</sup>Jesús rumo aipo ehi ahe ava upe:

—Teheni, ěgüe tehiño, ¿mahera vo pemañeco tēi? Co mbahe oyapo vahe rumo cheu aviye ité. <sup>7</sup>Ava iparaisu vahe niha yuvirecoiño itera pe pāhuve, iyavei peyapoño itera mbahe aviye vahe peyapo potase chupe; che rumo ěgüe ndahe viteñoi chira vichico pe pāhuve. <sup>8</sup>Iyavei co cuña oyapo mbahe ocatugüer rupi; opa voi omoiacia che rete che manoēhi viteseve. <sup>9</sup>Supi eté aipo ahe pēu: ñehesa pīsirosa resendar mombe-huse opacatu tecua rupi, imombehusa aveira co cuña rembiapo sese mahenduha āgua —ehi.

### **Judas oyemoingatu Jesús mondo āgua yamotarēhimbar upe**

<sup>10</sup>Evocoyase Judas Iscariote, semimbohe doce vahe pāhu pendar, oso pahi eta rerecuar upe imoñeta Jesús mondo āgua. <sup>11</sup>Senduse, oyemboviharete: “Yamondo guarepochi chupe” ehi voi eté yuvireco. Evocoyase Judas oseca voi Jesús mondo āgua yamotarēhimbar upe.

### **Jesús caru agüer ipa vahe güemimbohe rese**

<sup>12</sup>Yipindar ari pan ndayapepoi vahe husa pipe, ahese avei ovesa Pascua resendar yucapri seropovēhesa yepi, ahe ari pipe semimbohe oporandu Jesús upe yuvireco:

—¿Que vo ereipota oromoingatura carusa Pascua pieta resendar yandeu? —ehi.

<sup>13</sup>Aipo oyeupe hese, omondo ñuvirío güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pipe i. Supi pectora, <sup>14</sup>seiquesave aipo peyera sēta vahe upe: ‘Ore mbohesar oporandu: ¿Uma oi pipe vo Pascua pieta resendar orohura che remimbohe reseve? ehi’ peyera. <sup>15</sup>Evocoyase ahe omboyecuara oi guasu

ivatendar imoingatupri pēu. Aheve pe-moingatu mbahe yahu vaheṛā —ehi güemimbohe upe.

<sup>16</sup>Evocoyase semimbohe yuviraso tecuave. Aheve semimombehu rupi tupri osepia mbahe yuvireco. Ichui omoingatu carusa Pascua pieta resendar yuvireco.

<sup>17</sup>Pītu ramomise, Jesús doce güemimbohe rese aheve oyepota yuviraso.

<sup>18</sup>Iyavei ocaruse ité mesave yuvinoi, güemimbohe upe aipo ehi:

—Supi eté aipo ahe pēu: ñepepe pe pāhu pendar yande piri ocaru vahe che mon-dora che amotarēhimbar upe —ehi.

<sup>19</sup>Evocoyase semimbohe ndoyembovihai tēi yuvireco, iyavei oporandu-randu tēi ñepepepe chupe yuvireco:

—¿Che pīha? —ehi yuvireco.

<sup>20</sup>Omboyevi rumo güemimbohe upe:

—Ñepepe eté pe pāhu pendar ahe co omoaqui pan che caro pipe. <sup>21</sup>Supi eté che, Ava Riquehir, amboaviyera icuachiapri; iparaisu catura rumo acoi mbia che mondosar! Aviye catura ahe mbia ndoyesuise viña —ehi.

<sup>22</sup>Yuvirocaru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi imondo güemimbohe upe aipo ehi:

—Peipisi; co che rete —ehi.

<sup>23</sup>Ipare oipisi igua riru, “Aviye ndeu” ehi Vu upe. Aipo ohe pare omondo güemimbohe upe, ipare opacatu yuviroihu. <sup>24</sup>Ahese aipo ehi:

—Co che ruvi, ahe che Ru remimbotar ipiasu vahe pēu nara. Oyepiyerera ava rehii recocuer rese nara. <sup>25</sup>Supi eté aipo ahe pēu: ndaihu iri chietera uva ricuer cheu ari oyepotase voi che Ru Tūpa mborerecuasave aihura uva ricuer ipiasu vahe —ehi.

**“Pedro, ‘Ndaicuai vahe evocoi mbia’  
erera cheu” ehi Jesús Pedro upe**

<sup>26</sup> Osapucaire, opa yuviraso ivitri Olivo ve. <sup>27</sup> Ahese Jesús aipo ehi:

—Opara pemocañi che rese yeroyasa peyesui. Esepia, acoi icuachiapri pipe aipo ehi: ‘Ayucara ovesa rārosar, ahese oñemosai tēira ovesa opacatu rupi yuvireco’ ehi. <sup>28</sup> Che cuerayevire rumo aso voi etera pe renonera Galilea ve —ehi.

<sup>29</sup> Evocoiyase Pedro aipo ehi chupe:

—Yepe ambuae opacatu nande roroya iri chira yuvireco, che rumo ēgüe ndahei chietera —ehi.

<sup>30</sup> Aipo ehi rumo Pedro upe:

—Che rumo supi eté aipo ahe ndeu: co pītu pipeve voi eté tacura ñehe yu-pagüe renondeve, “Ndaicuai vahe evocoi mbia” erera mbosapi oyupagüer rupi cheu —ehi.

<sup>31</sup> Ahe rumo,

—Yepe che amano tēira nde rupi viña, che rumo, “Ndaicuai vahe evocoi mbia” ndahei chietera —ehi-ehi catuño ité chupe.

Ambuae opacatu aipo ehi tupri tēi avei yuvireco chupe.

**Jesús oyoeroquí Getsemaní ve**

<sup>32</sup> Ipare yuviraso Getsemaní ve yuvireco. Aheve Jesús aipo ehi güemimbohe upe:

—Peguapi cohava, che aso ranera ayoeroquí peve —ehi.

<sup>33</sup> Aheve viraso Pedro, Santiago, Juan oyeupi. Ahese ndoyepihambovihai eté oico <sup>34</sup> aipo ehi:

—Che cūrítei ndavihai eté. Esepia, che hã oyandu ité manosa. Pepita rane cohava, iyavei pemahemohara pe yeroquí pipe —ehi güemimbohe viraso vahe upe.

<sup>35</sup> Evocoiyase oso tenonde catumi. Aheve oyaivi ivi rese oso, oporandu Tüpa upe mbahe tasi vahe reimeēhi āgua oyeupe. <sup>36</sup> Oyoeroquí pipe aipo ehi: “Che

Ru, che rembiaisu, ndeu niha mbahe ndayavai vahe ité: che renose co mbahe-mbahe tēi sui eve; tayapo eme che remimbotar tēi, nde remimbotar rupi catu tayapo” ehi.

<sup>37</sup> Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—Simón, ¿ereque? ¿Ndereñemosai eté vo que ñepeí hora nde ropesii upe?

<sup>38</sup> Pemahemoha, peyoeroquí mbahe tēi pipe pe viapiēhi āgua. Pe niha pequerēhi ité viña, pe retecuer tēi rumo nipiratai pēu —ehi.

<sup>39</sup> Ichui oso iri oyoeroquí, aipo ehi tupri avei oñehe. <sup>40</sup> Ipare oyevise, osesapiha iri iqueseve tēi avei. Esepia, sopesii nomboyeroyai eté yuvireco, ahese ndoicatu eté iñehe mboyevi yuvireco. <sup>41</sup> Imombosapisa rupi oso irise aipo ehi chupe:

—¡Pequeño vite vo peyu! Aviye revo peque. Osupiti ité che, Ava Riquehír, mondo āgua ava yangaipa vahe povrive. <sup>42</sup> Pepūha, yaso. Esepia, cōimi eté che amotarēhisar upe che mondo vaherā secoi —ehi.

**Jesús ipisisa**

<sup>43</sup> Jesús oñehe viteseve ohã, Judas oyeputa oso chupe, ahe doce pāhu pendar semimbohe, iyavei setá ava yugüeru quise pucu, ivira reseve-seve supi. Ahe pahí eta rerecuar, Moisés porocuita rese oporombohe vahe, judío rerecuareta porocuita rupi oyapo yuvireco. <sup>44</sup> Yipindar rumo imondosar Judas aipo ehi: “Asovaupite vahe rese picuara. Ahe peipisi tupri itera seraso” ehi. <sup>45</sup> Oyoepotase Jesús upe, oyemboya voi oso sese aipo ehi chupe:

—¡Porombohesar! —ehi sovaupite.

<sup>46</sup> Ahese oipisi Jesús yuvireco.

<sup>47</sup> Semimbohe secoi vahe supi ovinose oquise pucu. Ipipe oyasia pahí rerecuar ivate catu vahe rembiguai nambi. <sup>48</sup> Ahese Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisi āgua. Imonda rai vahe nungar che rereco peye. <sup>49</sup> Ari yacatu rupi niha pe pāhuve aporombohese tūparove vichico, na ndapeyei eté cheu. Co rumo ēgüe peye icuachiapri mboaviye āgua cute —ehi.

<sup>50</sup> Ahese semimbohe oñemosaipe os-eya Jesús ahe ae tupri imoha yuvireco. <sup>51</sup> Mbia chíhivahe rumo turucuar pipe güerañomi oñemama vahe supive secói viña; <sup>52</sup> ahe avei oipisi yuvireco. Oipoe-quiñño rumo oturucuar reya oso nani tupri.

### **Jesús serasosa pahi rerecuar ivate catu vahe rovai**

<sup>53</sup> Evocoyase Jesús víraso pahi rerecuar ivate catu vahe rovai yuvireco. Aheve oñemonuha pahi eta rerecuar, judío rerecuar, Moisés porocuaíta rese oporombohe vahe avei no. <sup>54</sup> Pedro avei amombri rupive tēi oi que ité oso pahi rerecuar ivate catu vahe rēta āchisa pipe. Aheve oguapiño mbia sundao pāhuve tata ipive oyephe oi.

<sup>55</sup> Pahi eta rerecuar rumo iyavei opacatu porandusa ivate catu vahe pendar oseca-seca tēi ava oñehe-ñehe tēi vahe rā Jesús rese yamotarēhisave yuca uca āgua yuvireco; ndoicatu ité rumo yuvireco. <sup>56</sup> Iyavei setá iteanga tēi semira yuvireco sese; oyecopi-copi tēi rumo güemira pipe. <sup>57</sup> Amove aipo ehi tēi yuvireco seco momara āgua:

<sup>58</sup> —Ore orendu iñehe aipo ehise: ‘Che opara amonduru co tūparo ava tēi rembiapo. Ipare rumo mbosapi ari rupi opara amopuha. Ndahe iri chira evocoyase ava tēi rembiapo’ ehi —ehi tēi yuvireco chupe.

<sup>59</sup> Ndahoyoyai rumo ambuae imombe-husa rese.

<sup>60</sup> Ahese pahi rerecuar ivate catu vahe opūha oporandu Jesús upe:

—¿Nderemboyeví chira vo iñehe yuvireco chupe? ¿Mbahe vo aipo nde amotarēhimbar oñehe nde rese? —ehi chupe.

<sup>61</sup> Noñeheiño ité rumo chupe. Pahi rerecuar ivate catu vahe rumo oporandu iri chupe:

—¿Poropīsīrosar ité vo nde ereico, Tūpa imboeteipri Rahir? —ehi.

<sup>62</sup> —Taa, ahe ité niha che aico. Pe niha che repiara peye che, Ava Riquehīr, aguapise che Ru mbahe mboavaisarēhi acato coti; ayevisave avei iva quiha rese curi —ehi chupe.

<sup>63</sup> Evocoyase pahi rerecuar ivate catu vahe omondo oturucuar aipo ehi:

—¿Mbahe iri vo yande yaipota vite yaico? <sup>64</sup> Yasendupa niha aipo Tūpa upe iñehe-ñehe tēisa, ¿mara ehi aipo evocoyase pe pihave? —ehi.

Ipare opacatu guasu ava, “¡Tomanoño ité!” ehi yuvireco chupe.

<sup>65</sup> Ahese amove ava ondivi-ndivi sese iyavei osesacua, ipare yuvirocua-rocua sese aipo ehi yuvireco:

—¡Eicua ité ru, ava evocoi ocua nde rese! —ehi-ehi yuvireco chupe.

Sundao tūparo rārosar avei osovapete-pete yuvireco.

### **Pedro, “Ndaicuai vahe evocoi mbia” ehi Jesús upe**

<sup>66</sup> Pedro ivive ñachimbri pipe secói. Aheve cuña oyepota ou pahi mborerecuar ivate catu vahe rembiguai chupe. <sup>67</sup> Osepiase Pedro iyepese tata ipive, omahengatu ohā sese aipo ehi chupe:

—Nde avei acoi Jesús Nazaret pendar rupindar ereico —ehi.

<sup>68</sup> Ahe rumo aipo ehiño:

—Ndaicuai vahe ité rumo aipo mbia; ndaicuai avei aipo nde ñehesa —ehiño chupe.

Ichui osēse oquendipive ohā, ahese oñehe tacura. <sup>69</sup> Omahe irise co cuña

mbuguai sese, ahe aipo ehi ahe pendar  
ava yuvirecoi vahe upe:

—Co ava niha supindar ité —ehi.

<sup>70</sup> Pedro rumo, “Ndahei eté che”  
ehiño. Iparemi tēi ambuae ava aheve yu-  
virecoi vahe aipo ehi iri yuvireco chupe:

—Nde ité niha supindar ereico. Es-  
epia, nde Galilea iguar ité ereico —ehi  
chupe.

<sup>71</sup> Pedro evocoyase,

—¡Tüpa niha oicua, ndopombopai eté  
niha aipo, ndaicuai eté aipo mbia pe ñe-  
hesa! —ehi.

<sup>72</sup> Aipo iheseve, tacura oñehe  
imoñuviriosa rupi. Ahese Pedro  
oyemomahenduha, “Tacura ñehe  
yupagüesa renondeve, mbosapi  
oyupagüer rupi, ‘Ndaicuai vahe evocoi  
mbia’ erera cheu” ihe agüer rese. Sese  
oyasehó iteanga.

### Jesús serasosa Pilato rovai

**15** Cõhe potase, pahi eta rerecuar,  
judío rerecuar, Moisés  
porocuita rese oporombohe vahe  
iyavei opacatu ava porandusa ivate  
catu vahe pendar oñemonuha yuvireco.  
Ipare oipocua-pocua Jesús seraso Pilato  
upe yuvireco. <sup>2</sup> Pilato aheve oporandu  
chupe:

—¿Nde ité vo judío rerecuar ivate catu  
vahe ereico? —ehi.

—Nde niha aipo, “Ahe ereico” ere  
cheu —ehi.

<sup>3</sup> Pahi eta rerecuar rumo omombehu-  
mbehu tēi mbahe sembiaviēhi yuvireco  
chupe. <sup>4</sup> Evocoyase Pilato oporandu iri  
chupe aipo ehi:

—¿Mahera vo ndereñehei eté? Esepia,  
setá mbahe nde rembiavi omombehu yu-  
vireco —ehi.

<sup>5</sup> Nomboyevii eté rumo Pilato upe.  
Evocoyase, “¿Mara ehi rutei pīha?” ehi  
tēi.

### “¡Tayaticasa!” ehi ava Jesús upe yuvireco

<sup>6</sup> Mborerecuar guasu recosa ité ñepei  
ava soquendapri renose āgua Pascua  
pieta pipe ava rehii porandusa rupi yepi.

<sup>7</sup> Mbia Barrabás serer vahe, ahe pipeve  
avei soquendasa yuvireco ambuae opo-  
rapichi vahe reseve. <sup>8</sup> Ava yugüeru Pi-  
lato upe ‘tayaposa pieta pipe yaposa  
vahe yepi’ oyapave yuvireco. <sup>9</sup> Pilato  
rumo aipo ehi:

—¿Peipota amose vaheṛā judío rere-  
cuar? —ehi.

<sup>10</sup> Esepia, Pilato oicuaño ité ava rese  
yemocatēhisa pipe sui pahi eta rerecuar  
remimondo secoise. <sup>11</sup> Pahi eta rerecuar  
rumo ‘Barrabás tosē’ ombohe ati-ati uca  
ava yuvireco. <sup>12</sup> Evocoyase Pilato opo-  
randu ahe ava upe:

—¿Mbahe vo peipota ayapora co mbia  
chupe acoi, ‘Judío rerecuar’ peye vahe  
rese? —ehi.

<sup>13</sup> Ahe rumo omboyevi Pilato upe:

—¡Tayaticasa curusu rese! —ehi ati-  
atiño yuvireco.

<sup>14</sup> Pilato rumo aipo ehi ava upe:

—¿Mbahe ité vo oyapo naporai vahe?  
—ehi.

Ahe rumo,

—¡Tayaticasa ité curusu rese! —ehi  
ati-ati iriño yuvireco.

<sup>15</sup> Evocoyase Pilato, mbahe tupri  
opita āgua ava rese, omose uca  
Barrabás. Ipare oinupá iteanga uca  
Jesús tucumbo tupeicha nungar pipe,  
imondo curusu rese yatica āgua.

<sup>16</sup> Ahese sundao viraso mborerecuar  
rēta sui ambuae oi pipe, aheve opacatu  
omboetasa omonuha yuvireco. <sup>17</sup> Aheve  
omboyemonde turucuar pīraumbi vahe  
pipe yuvireco, ipare yu piapri omonde  
ñaca rese. <sup>18</sup> Sāse avei yuvireco:

—¡Imboeteipri judío rerecuar tasecoi!  
—ehi angahu yuvireco chupe.

<sup>19</sup>Iyavei yuvirocua-rocua ivira pipe ñaca rupi yuvireco sese, ondivi-ndivi avei oñenopiha-piha avei sovai yuvireco imboetisave angahu. <sup>20</sup>Maramara tēi sereco pare, ovirocua iturucuar pīraumbi vahe yuvireco ichui, ahese omonde iturucuar ité yuvireco sese. Ichui vinose ocarve yatica āgua yuvireco.

### Jesús yaticasa curusu rese

<sup>21</sup>Ñepe mbia Simón serer vahe Cirene pendar, Alejandro, Rufo yesupa, ahe pipe avei oyepota chupe que co coti rupi sui ou. Oñocua potase ocua viña: “Erio, terevosii curusu co Jesús vireco vahe rese” ehi voñño tēi yuvireco chupe.

<sup>22</sup>Jesús oviraso Gólgota serer vahe-save yuvireco (‘Ava Āca Cangüer’ oyapave aipo ehi). <sup>23</sup>Iyavei uva ricuer oyeseha vahe mirra rese omondo tēi yuvireco chupe. Ahe rumo ndoihui eté. <sup>24</sup>Evocoyase oyatica yuvireco. Ipare sundao iguayño Jesús turucuar rese ‘¿uma pīha virasora oyeupe’ oyapave yuvireco.

<sup>25</sup>Ahe oyatica añihivei la nueve rupi yuvireco. <sup>26</sup>Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oī. <sup>27</sup>Supive avei yaticasa ñuvirío imonda rai vahe ñepe mbahe rese ipocosa coti, ambuae mbahe rese ipocohisa coti. <sup>28</sup>Ēgüe ehi imboaviye icuachiapri aipo ehi vahe: “Ava mbahe-mbahe tēi aposar nungar ipāhuve serecosa” ehi.

<sup>29</sup>Acoi ava ñocuasar iñehe-ñehe tēi, oñeaca mbovava aipo ehi yuvireco chupe:

—Nde acoi, “Opara tūparo amonduru. Ipare mbosapī ari rupi opa irira amopuha” ere acoi cuese. <sup>30</sup>¡Eñepisiro ru nde ae cute; egüeyi curusu sui! —ehi yuvireco chupe.

<sup>31</sup>Ēgüe ehi avei pahi eta rerecuar, oporombohe vahe avei Moisés porocuita rese iñehe mara-mara tēi yuvireco chupe, aipo ehi yuvireco oyeupe:

—Oipisiro ambuae. Ahe ae rumo ndoicatui oñepisiro. <sup>32</sup>¡Poropisirosar Israel rerecuar guasu, toyeeroyi ahe ae curusu sui cūrítei, ahese voi seroyasara —ehi.

Iyavei supive yaticapri mara ehi-ehi tēi avei chupe.

### Jesús mano agüer

<sup>33</sup>Osupitise rumo mbiter ari, opa tupri pītu ivi rupi. Ēgüe ehi las tres rupi. <sup>34</sup>Ahese tupri avei Jesús oñehe pīrata aipo ehi: “Eloi, Eloi, ¿lema sabactani?” ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

<sup>35</sup>Aheve ava yuvirecoi vahe rumo osenduse iñehe, aipo ehi yuvireco:

—Pesendu aipo Tūpa ñehe mombehusar Elías upe oñehe —ehi yuvireco chupe.

<sup>36</sup>Evocoyase ñepe imboetasa oña oso mbahe saviyu vahe reca. Ahe omoaqui vinagre pipe imondo ivira apri rese chupe ‘toihu’ oya:

—Ēgüe tehiño rane, ¿oura pīha Elías seroyi āgua curusu sui? —ehi.

<sup>37</sup>Ahese Jesús sāse pīrata. Ipare omano. <sup>38</sup>Aheseve tūparo asiasa turucuar ivate coti sui ovo tupri. <sup>39</sup>Iyavei sundao rerecuar Roma iguar, ahe Jesús rehögüer rese omahengatu ohā. Osenduse Jesús rāse iyavei osepiase imano, aipo ehi:

—Supi eté catu, co mbia Tūpa Rahir ité —ehi.

<sup>40</sup>Iyavei cuña aheve amombrive osepia catu yuvinoha; ahe yuvirecoi María Magdalena, José si María, ahe avei Santiago chíhivahe catu vahe si iyavei ambuae cuña Salomé. <sup>41</sup>Co cuña eta yuvirecoiño vahe ité Jesús rupi, oipitívii



vahe avei Galilea ve yuvirecoise. Setá avei ambuae ava supi yugüeru vahe Jerusalén ve yuvirecoi.

### Jesús apocatu agüer tuvipa pipe

<sup>42</sup> Pïtu ramosé, ahe arí pipe oyemoin-gatu ava yuvireco arí mbituhusa upe nara yepi, <sup>43</sup> ahese José, tecua Arimatea pendar, porandusa ivate catu vahe pendar, acoi Túpa mborerecuasa osáro vahe oico, oquerêhisa pipe ité oi que oso Pilato upe oporandu água Jesús rehögüer rese. <sup>44</sup> Pilato rumo oyepihamondii tēi, “Omano” hese. Oñhe sundao rerecuar upe oporandu água ‘¿marase vo êgüe ehi?’ <sup>45</sup> Sundao rerecuar omombehuse chupe, ahese omondo sehögüer José upe. <sup>46</sup> Evocoyase José virocua turucuar secose vahe. Curusu sui seroyi pare, oimama voi eté ipipe. Ipare omoingue tuvipa ita yohopri pipe. Ichui ita yapayere vahe pipe osovapi. <sup>47</sup> María Magdalena iyavei María, José si, osepiáno yapocatuse yuvireco.

### Jesús ocuerayevi

**16** Mbituhusa arí pare, María Magdalena, María, Santiago si, Salomé avei, ahe virocua mbahe síacua vahe Jesús rehögüer rese nara yuvireco. <sup>2</sup> Iyavei añihiveive, yípindar arí semana pipe, oyepota Jesús ruvipave icatu ramosé yuviraso. <sup>3</sup> Aheve aipo ehi oyeupe yuvireco:

—¿Ava pïha co tehögüer rovapisa virocua yuvireco yandeu? —ehi.

<sup>4</sup> Osepiase rumo ita guasu yuvireco, ndahe irise güendave ihái, <sup>5</sup> yuviroiquese tehögüer ruvipave yuvireco, aheve osepia ombahe rese pocosa coti mbia chíhivahe, iturucuar pucu morochi vahe oguapise oí. Ahese cuña oyembosiquiye yuvireco. <sup>6</sup> Ahe rumo aipo ehi chupe:

—Pesiquiye eme. Pe peseca Jesús Nazaret pendar, yaticapri. Ahe rumo

ocuerayevi; ndipoi eté cohave. Pesepia ru supagüer. <sup>7</sup> Peso, tapemombehu semimbohe eta upe iyavei pemombehu Pedro upe: ‘Jesús rane osora pe renonera Galilea ve. Aheve pesepiara mbahe che remimombehu rupi tupri’ peyera —ehi.

<sup>8</sup> Evocoyase ahe cuña yuvinosese tuvipa sui, yuvinoña yuviraso, oririi avei osiquiyepave. Iyavei nomombehui eté ambuae ava upe osiquiyepave yuvireco.

### Jesús oyemboyecua María Magdalena upe

<sup>9</sup> Jesús ocuerayevire añihiveive domingu pipe, oyemboyecua yípindar María Magdalena upe, ahe ichui acoi siete tupri caruguar opa omboyepipi. <sup>10</sup> Ahe oso imombehu supindar upe. Ahe rumo oyaseho vite oviharêhisave yuvireco. <sup>11</sup> Osenduse cuña ñehe: “Jesús ocuerayevi, che ité asepia” ehise, ndoviroyai eté yuvireco.

### Jesús oyemboyecua ñuvirío güemimbohe upe

<sup>12</sup> Ipare Jesús oyemboyecua iri ñuvirío güemimbohe upe ambuae güepiaca pipe peri rupi. <sup>13</sup> Ahe avei yuviraso omboetasa upe imombehu; ndoviroya viteño avei rumo yuvireco.

### Jesús oyocuai güemimbohe

<sup>14</sup> Coiye catumi tēi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñhengata ahe oyese yeroyaêhisa rese chupe, iyavei ocuerayevisa mombhusar reroyaêhi rese avei. <sup>15</sup> Ipare aipo ehi güemimbohe upe: “Peso opacatu ivi rupi, pemombehu co ñehesa pīsirosa resendar peico. <sup>16</sup> Acoi viroya vahe, iyavei oñeapiramo vahe, ahe oñepisiora yuvireco; acoi ndoviroyai vahe rumo, ahe imocañipirā tēi yuvirecoira. <sup>17</sup> Co

mbahe poromondiisa omboyecuara che reroyasar yuvireco: Che rer pipe omboyepipira carugar ava sui. Oñehe aveira ñehesa ndicuasai vahe pipe yuvireco. <sup>18</sup>Oipisi aveira mboi yuvireco, yuviroihuse mosa oporoyuca vahe, ndoyapoi chietera mbahe yuvireco chupe; iyavei omondose opo ava imbaheasi vahe harive, ombogüera aveira yuvireco” ehi.

### Jesús oso ivave

<sup>19</sup>Oñehe pare, yande Yar Jesús oso ivave. Aheve uguapi Vu Tūpa acato coti oĩ. <sup>20</sup>Semimbohe evocoyase opa yuviraso opacatu ivi rupi ñehesa písirora resendar mombehu. Yande Yar avei oipitivii, iyavei mbahe poromondiisa pipe omboyecua uca ité ñehesa písirora resendar supi eté vahe. Aipo rupive.

LUCAS REMBICUACHIA JESUS  
RECOCUER RESENDAR

SAN LUCAS

Lucas oicuachía Teófilo upe

**1**<sup>1-2</sup> Imboeteipri Teófilo, setá ava oicuachía yuvireco opacatu aracahendar mbahe imombheupri mboaviyesa cūrítei yande pāhuve co Jesucristo recocuer resendar. Acoi ava yipisuive osepia vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu.<sup>3</sup> Sese che avei opa aseca tupri yipisuive opacatu co mbahe cua tupri āgua, Teófilo. Ichui che amoingatu tupri pota icuachiapri sesendar ndeu nara avei sereco.<sup>4</sup> Evocoyase nde ereicua tuprira co porombohesa supi eté vahe acoi nde mbohe agüer.

Tūpa rembiguai omombehu Juan  
Oporoāpiramo vahe ha āgua

<sup>5</sup> Yipindar Jesús ha renondeve, Herodes mborerecuar ivi Judea rupindar recose aracahe, ahese aipo judío pahi secoi Zacarías serer vahe. Ahe pahi Abías rupindar secoi. Sembireco aipo pahi Aarón suindar, ahe serer Isabel.<sup>6</sup> Co ñuvirío secocuer aviye tupri Tūpa upe; viroya tupri opacatu Yar porocuaíta yuvireco. Evocoyase ndipoi eté que ava “mara” ehi vahe yuvireco chupe.<sup>7</sup> Zacarías rumo yipisuive ndatahii vahe. Esepia, sembireco ndimembii vahe ité, iyavei oyoya ité ocuacua-cuacuami yuvireco.

<sup>8</sup> Ñepeí ari aipo osupiti icuaita tūparo pipe imboetasa reseve iporaviqui āgua Tūpa rovaque yuvireco.<sup>9</sup> Pahi recosa ité ēgüe ehi aracahe suive, ahese iporavosa Zacarías yipindar yasiapri tūparo maranehi pipe oique vaheṛā itaisi rapi

āgua.<sup>10</sup> Itaisi rapi viteseve aipo, opacatu ava oyerure yuvireco ocarve.<sup>11</sup> Aheseve aipo oyemboyecua yande Yar rembiguai itaisi renda maranehi ique coti chupe.<sup>12</sup> Tūpa rembiguai repiase aipo, oyembosiquiyé iteanga.<sup>13</sup> Tūpa rembiguai rumo aipo ehiño chupe:

—Zacarías —ehi—, eresiquiye eme. Tūpa osendu nde yeruresa. Sese nde rembireco Isabel imembira ndeu. Ahe nde rahir rer-ra Juan.<sup>14</sup> Ereviharetera sese, iyavei oyemboviharetera opacatu ava yuvireco nde rahir ohase.<sup>15</sup> Esepia niha, nde rahir secocuer tuvichara oico Tūpa rovaque. Ndoihiu chietera uva ricuer sai vahe, iyavei que ambuae mbahe sai vahe; secoira rumo Espíritu Santo rese ohaēhi viteseve.<sup>16</sup> Ēgüe ehira omonguerēhi setá ava judío Yar Tūpa reroya iri āgua oico.<sup>17</sup> Ahe virecora espíritu pīratasa oyese oyoyara Tūpa ñehe mombehusar Elías rese ‘ava guahir rese tiñero yuvireco oyeupe’ oya, ‘toyembohe avei ava ndiporeroyai vahe yuvireco seco catupri vahe aracuasa mboyeroya āgua rese’ oyapave. Ēgüe ehira ava mbohe imoingatu yande Yar pisi āgua sereco —ehi chupe.

<sup>18</sup> Evocoyase,

—¿Mara ahera pīha aipo reroya? Che rumo acuacuami eté vichico, iyavei che rembireco ocuacuami avei no —ehi Tūpa rembiguai upe.

<sup>19</sup>—Aní —ehi chupe—. Che aico Tūpa rembiguai Gabriel, Tūpa rovaindar. Ahe niha che mbou ndeu che ñehe āgua iyavei co ñehesa aviye vahe mombehu āgua.<sup>20</sup> Nde rumo ndereroyai acoi amombehu vahe ndeu. Sese co pipe suive ité nandēhengatui chira eico. Osupitise voi che remimombhegüer, acoi ohase nde rahir, ahese ramo ndeñehengatura —ehi aipo Tūpa rembiguai chupe.

<sup>21</sup> Osāro pucu tēi aipo ocarve ambuae imboetasa eta yuvireco. “¿Mahera

pīha nose vītei tūparo pīpe sui?” ehi tēi yuvireco chupe. <sup>22</sup> Osēse aipo tūparo pīpe sui, niñehengatui voi eté. “Naro osepia mbahe tūparo pīpe” ehiño ité aipo imboetasa eta yuvireco chupe. Ipo āta-āta tēi aipo oñehengatuēhise mbahe mombehu oico.

<sup>23</sup> Ipare omboaviyese ocuaita tūparo pīpe, oyevei oso güētave. <sup>24</sup> Coiye aipo sembireco Isabel ipuruha oico. Judío porocuaita mboyeroyasave nose iri eté ambuae ava piri poyandepo yasi rupi. Ipihañemoñeta: <sup>25</sup> “Yar Tūpa ité ēgüe ehi cheu ava che rese ñeheēhi iri āgua yuvireco” ehi vorivetsa pīpe aracahe.

### **Tūpa rembiguai Jesús yesu āgua omombehu**

<sup>26</sup> Coiye seis yasi pīpe Tūpa omondo güembiguai Gabriel tecua Nazaret ve ivi Galilea rupi <sup>27</sup> cuñatai ndaseco marai vahe upe iñehe āgua; ahe serer María. Ahe omenda pota vahe cuimbahe mborerecuar guasu David suindar José serer vahe rese. <sup>28</sup> Tūpa rembiguai oi que co cuña rētave aipo ehi chupe:

—¡María, Tūpa nde rovasa, erereco mbahe icatupri vahe pītiviisa Yar Tūpa suindar! Tūpa nde rese ité secoi; nde rovasa catu opacatu cuña sui —ehi chupe.

<sup>29</sup> Tūpa rembiguai repiase, “¿Mara oya pīha co aipo ehi cheu?” ehi tēi osiquiyepave opihañemoñeta rereco. <sup>30</sup> Evocoiyase Tūpa rembiguai aipo ehi chupe:

—María, eresiquiye eme. Esepia niha, Tūpa ité nde poravo nde rovasa āgua. <sup>31</sup> Cūrītei vaira rumo ndemembira: ererecora nde membri; ahe serer-ra Jesús. <sup>32</sup> Ahe niha secouvicha catu vahe rā secoira; “Tūpa seco ivate vahe Rahir secoi” ehira yuvireco chupe. Iyavei niha Yar Tūpa ité omoinguera mborerecuar guasu seco āgua inungar tamoi David aracahe. <sup>33</sup> Mborerecuar guasu secoira judío re-

cua rupi apirēhi vahe rā; imborerecuasa niha apirēhi vahe rā ité secoira —ehi.

<sup>34</sup> Evocoiyase ahe aipo ehi:

—¿Mara ahera vo aipo che membri viña? Esepia niha, ndaico vītei vahe cuimbahe rese —ehi Tūpa rembiguai upe.

<sup>35</sup> —Espíritu Santo ogüeyira nde harive iva quilha nungar; Tūpa güeco pīratasa pīpe nde momembira. Sese acoi ohasa nde membri seco maranehi vahe, “Tūpa Rahir” hesara chupe. <sup>36</sup> Cūrītei nde mu Isabel avei ocuacuami pīpe imembi oico; ahe niha ndimembii vahe yipīndar viña, cūrītei rumo vireco seis yasi omembri vie pīpe. <sup>37</sup> Esepia niha, Tūpa upe ndipoi eté mbahe yavai vahe —ehi.

<sup>38</sup> Evocoiyase María aipo ehi:

—Che Yar rembiguai aico, tayaviye ayase Tūpa remimbotar cheu nde ñehe rupi —ehi.

Aipo ihe pare, Tūpa rembiguai oyepepi oso ichui.

### **María oso omu Isabel piri**

<sup>39</sup> Ahese María oso voi eté ivitri rupi tecua ivi Judea ve. <sup>40</sup> Aheve aipo Zacarías rēta pīpe oi que se oso, oyapo “avirave” omu Isabel upe. <sup>41</sup> Evocoiyase Isabel rie pīpe omii imembri iñehe renduse. Ahese Espiritu Santo oi que Isabel aviterve. <sup>42</sup> Ipare osapucaí pīrata aipo ehi chupe vorivetsave:

—¡Tūpa nde rovasa cuña opacatu sui, iyavei osovasa nde membri! <sup>43</sup> Noromohai eté che piri ereyu vahe rā viña, che Yar si. <sup>44</sup> Esepia, cheu “avirave” ereyapose, che membri omii voi vorivetsave che rie pīpe. <sup>45</sup> ¡Sovasapri erico! Esepia, ereroya ité ñehesa ndeundar. Iyavei Tūpa omboaviyera güemimombehu nde rese —ehi Isabel chupe.

<sup>46</sup> Evocoiyase aipo ihese,

“Che niha amboetei che Yar vichico;

<sup>47</sup> cheroriveté Tūpa che Pīsīrosar rese.

<sup>48</sup>Esepia, ahe omahe che rese che reco yemominisa pipe seroyasar che recosave.

Co pipe suive, ‘Sovasapri seci’ ehira opacatu ava yuvireco cheu.

<sup>49</sup>Esepia niha, Tūpa mbahe mboavais-arēhi, oyapo mbahe tuvichá vahe cheu.

¡Tūpa imboeteipri catu tasecoi yepi!

<sup>50</sup>Ahe oiparaisuereco opacatu omboeteisar yepi.

<sup>51</sup>Nomboavai eté mbahe yapo.

Osecoreroyi ava oyemboivate ai tēi vahe.

<sup>52</sup>Viroyi mborerecuar seco pīrata vahe pīratasa sui; ava seco mbegüemi vahe rumo osecomboivate.

<sup>53</sup>Ava yaracua pota vahe, omboaracua; ava ‘che aracua vai’ ehi vahe rumo, nomboaracuai eté.

<sup>54</sup>Oipītivii niha opacatu viroyasareta judío yuvirecoi vahe.

Esepia, ndasesarai eté poroparaisuere-cosa mondo āgua <sup>55</sup>güemimombe-hugüer rupi yande ramoi aracahendar Abraham upe, ichuindar upe avei yepi no” ehi vorivetesá pipe omu

Isabel upe.

<sup>56</sup>Ipare María opita Isabel piri mbosapí yasi rupi. Ichui oyevi oso güëtave.

### Juan Oporoãpiramo vahe haragüer

<sup>57</sup>Osupitise ari Isabel upe, imembira. Ahe imembri cuimbahemi. <sup>58</sup>Imu iyavei icotindar oyanduse Tūpa rembi-apo mbahe aviye vahe, aipo ehi yuvireco chupe: “Aviye ai catu Yar Tūpa seci co cuña rese” ehi vorivetesave yuvireco.

<sup>59</sup>Ocho ari pipe aipo, ahe pītani ombocircuncida yuvireco judío porocuaita mboyeroyasa pipe. Ipare aipo omondo pota iyepi Zacarías rer yuvireco sese viña, <sup>60</sup>ichi rumo,

—Aní —ehiño—. Juan itera rumo serer —ehi.

<sup>61</sup>—¿Mahera vo? Ndipoi eté rumo nde mu rer aipo nungar —ehi yuvireco chupe.

<sup>62</sup>Evocoiyase aipo omahe pītani yesupa rese yuvireco ‘¿mbahe pīha ahe omondo pota sererguā viña?’ oyapave yuvireco. <sup>63</sup>Evocoiyase aipo iyepi oporandu ivirapemi rese sese serer oicuachía vahe. Ahe serer oicuachía: ‘Juan sererguā’ ehi imoi. Ahese aipo opacatu ava: “¿Mara ehi rutei pīha co?” ehi tēi oyeupe yuvireco. <sup>64</sup>Ahese ramo Zacarías ñehengatu, omboipi Tūpa upe osapucái oico. <sup>65</sup>Opacatu aipo sēta cotindar oyembosiquiye tēi yuvireco, iyavei aipo opacatu Judea recua rupi omombehu-mbehu mbahe osepia vahecuer yuvireco. <sup>66</sup>Mbahe osendu vahecuer rese avei aipo oporandu-randu oyeupe yuvireco: “¿Mbahe pīha aipo pītani oyapora curi?” ehi. Esepia niha, supi eté Tūpa osovasa.

### Zacarías sapucái agüer

<sup>67</sup>Zacarías, Espiritu Santo pīratasa pipe, oñehe Tūpa oyeupe ñehesa pipe aipo ehi:

<sup>68</sup>“¡Yande Yar Tūpa imboeteipri tasecoi! ¡Esepia niha, ahe ou yande judío yaico vahe písiro āgua!

<sup>69</sup>Ombou niha Poropīsiosar güembiguai David suindar yandeu.

<sup>70</sup>Ēgüe ehi imombehu opacatu oñehengagüer mombehúsar seco maranehi vahe upe aracahe.

<sup>71</sup>Ahe yande pīsiora yande amotarēhimbar sui.

<sup>72</sup>Ēgüe ehi Tūpa imbou oporoparaisuerecosa yande ramoi aracahendar upe, iyavei iyemomahenduha āgua güemimbotar maranehi mombehu agüer rese.

<sup>73</sup> Evocoiyase, ‘Che supi eté ayapora evocoi mbahe’ ehi yande ramoi Abraham upe aracahe

<sup>74</sup> yande renose āgua yande amotarēhimbar povri sui ‘tache mboetei osiquiyēhisa pipe yuvireco’ oya;

<sup>75</sup> ‘toyuvirecoi che rembiepiave güeco ivisa pipe iyavei güeco maranehisa pipe ari yacatu rupi’ oyapave.

<sup>76</sup> Nde, che rahir, ‘Co Tüpa ivate vahe ñehe mombehisar secói’ ehira ava yuvireco ndeu.

Esepia, nde eremoingatura ava recocuer Yar pisi āgua senondeve eico.

<sup>77</sup> Supi eté nde niha eremboyecuar opacatu ava Tüpa upendar yuvirecoi vahe upe angaipa sui ñeroisa pisi āgua inēpisiro āgua.

<sup>78</sup> Esepia, yande Ru Tüpa, oporoparaisuerecosa pipe ombou oporoesapesa iva pendar yandeu yande reco mbopiasu āgua

<sup>79</sup> iyavei ava Tüpa cuaparēhi resape āgua ‘toyuvirecoi mbahe tupri pipe’ oyapave.

Esepia, ahe inungar ava pītumimbisave yuvirecoi vahe, ocañi tēi vaherā yuvireco”

ehi Zacarías.

<sup>80</sup> Ichui pītani ocuacua iyavei vireco pīratasa EspírITU suindar oyese. Ipare rumo oso oyemboerecua ivi iporupirēhi rupi. Coiye oyemboyecua omu Israel pendar upe oico.

### Jesús yesu agüer

**2** Yipindar mborerecuar guasu Augusto oporocuai oico, “Tayecuachiasa opacatu tecua rupi” ehi. <sup>2</sup> Ahe yipindar yecuachiasa mborerecuar Cirenio, Siria pendar rēise. <sup>3</sup> Opacatu ava yuviraso güecua yacatu rupi oyecuachía āgua yuvireco.

<sup>4</sup> Sese José avei osē Nazaret, Galilea ivi rupi sui oso ivi Judea rupindar

tecua Belén ve. Esepia niha, aracahendar mborerecuar guasu David aheve oha vahecuer, iyavei José ichuindar avei secói. <sup>5</sup> Ēgüe ehi oyoya yuviraso güembirecovi María rese oyecuachía āgua. María rumo imembira pota ité oico. <sup>6</sup> Aheve oyepota ramose, osupiti ari imembira āgua. <sup>7</sup> Aheve oha imembri yipindar vahe cuimbahemi. Aheve María oyao omembri turucuar pipe, ēgüe ehi imoñeno imondo mbahe mimba rembihi riru pipe. Esepia niha, ndoyosui eté oque āgua aheve yuvireco.

### Tüpa rembiguai eta omombehu Jesús haragüer ovesa rārosar upe yuvireco

<sup>8</sup> Namombriimi Belén sui ovesa rārosar yuvirecoi. Aheve osāro ovesa pītu pipe yuvireco. <sup>9</sup> Aviyeteramo tēi oyemboyecua Tüpa rembiguai iva pendar chupe. Tüpa porañetesa avei sendi yivii chupe yuvireco. Ahe sepiase, oyembosiquiyé iteanga tēi yuvireco ichui. <sup>10</sup> Ahe rumo aipo ehi chupe: “Pesiquiye eme. Esepia, che ayu mbahe icatupri vahe mombehu āgua pēu pe mboviharete āgua iyavei opacatu ava mboviharete āgua avei no. <sup>11</sup> Co pipe oha David recua Belén ve Poropīsirosar pēu nara. Ahe niha Tüpa Rembiporavo, pe Yarguā secói. <sup>12</sup> Icuā āgua peyosura pītani yaopri tuprimi vahe tui mbahe mimba rembihi riru pipe” ehi.

<sup>13</sup> Aviyeteramo tēi oyemboyecua ambuae setá Tüpa rembiguai iva pendar yivii yuvireco. Tüpa upe osapucaí yuvireco aipo ehi:

<sup>14</sup> “¡Imboeteipri tasecoi Tüpa ivave! ¡Ivive ava Tüpa rembiāisu toyuvirecoi tupri oyeaisusa pipe!” ehi osapucaí yuvireco.

<sup>15</sup> Opase oyevi Tüpa rembiguai ivave yuviraso, aheve ovesa rārosar aipo ehi oyeupe yuvireco:

—Yaso ru Belén ve; yasepiara aipo mbahe, acoi oicua uca vahe Yar oico yandeu —ehi yuvireco.

<sup>16</sup> Evocoyase ipoyava yuviraso. Ipare osepia María, José, Jesús pītani avei yuvireco cute. Ahe pītani omoñenomi mbahe mimba rembihi riru pipe ino. <sup>17</sup> Ipare yuvinose omombehu-mbehu ambuae ava upe Tūpa rembiguai remimombehugüer pītani resendar ñehesa yuvireco. <sup>18</sup> Evocoyase opacatu ava oyepihamondii co ñehesa renduse yuvireco. <sup>19</sup> María rumo opacatu co mbahe rese oyapisacaño; ahe ehiño ité ipihañemoñetasa. <sup>20</sup> Oyevise ovesa rārosar yuviraso, omboetei iyavei osapucaí Tūpa upe yuvireco. Esepia niha, opacatu mbahe osendu vahe, osepia vahecuer yuvireco imombepuri rupi tupri ité.

### **Jesús pītani seropovēhesa Tūpa upe tūparo pipe**

<sup>21</sup> Ocho ari pipe ahe pītani ombo-circuncida yuvireco; omondo sererguā Jesús yuvireco, ahe terer tupri avei acoi Tūpa rembiguai omombehu María upe imembiēhi viteseve.

<sup>22</sup> Ipare omboaviyese ohari güetave oñemoatiro āgua, ahe aipo ēgüe ehi Moisés porocuaíta rupi yuvireco yepi, ahese vinose pītani seraso tecua guasu Jerusalén tūparo pipe seropovēhe āgua Yar upe yuvireco. <sup>23</sup> Ēgüe ehi yuvireco. Esepia, Yar porocuaíta aipo ehi icuachi-apri pipe aracahe: “Opacatu yipindar pītani cuimbahe mini yuviroha vahe iphasara Tūpa upe nara yepi” ehi. <sup>24</sup> Yuviraso oporerocosa reropovēhe āgua yuvireco yande Yar porocuaíta rupi: “Ñepeí oyovaichor reseve picuhi, anise ñuvirío apicasu peropovēhera” ehi vahe.

<sup>25</sup> Ahe pipe mbia Jerusalén ve secói Simeón serer vahe. Ahe mbia aviye etepri vahe. Oyerure vahe Tūpa upe,

osāro vahe avei Israel recua pendar Pīsirosar imombepuri. Ahe secói vahe ité Espiritu Santo rese. <sup>26</sup> Ahe chupe Espiritu Santo opa uca oicua “eresepia rane itera Poropīsirosar Tūpa remimbou nde mano renondeva” ehi vahe. <sup>27</sup> Ahe ari pipe Espiritu Santo viroguata tūparove. Oyepotase José, María reseve yuvireco tūparove Jesús pītani reropovēhe āgua Tūpa porocuaíta rupi tupri, <sup>28</sup> ahese Simeón oyemboya oso sese, osupi ichi sui, viroyeroqui Tūpa upe señoa aipo ehi:

<sup>29</sup> “Che Yar, cūrítei che, nde rembiguai, amano tupriño itera.

Esepia niha, nde remimombehugüer eremboaviye ité cheu.

<sup>30</sup> Asepia ité niha Poropīsirosar vichico cute.

<sup>31</sup> Nde niha erembou opacatu ava rembiepiave.

<sup>32</sup> Ahe niha poroesapesa ité secói.

Esepia, omboyecuará mbahe supí eté vahe ava ndahei vahe judío yuvirecoi vahe upe,

iyavei omondara poromboeteisa nde recua Israel pendar judío yuvirecoi vahe upe”

ehi oyerokuí.

<sup>33</sup> José iyavei María ndoyembovīhai tēi yuvireco pītani rese Simeón yeroqui renduse. <sup>34</sup> Evocoyase Simeón osovasa ahe pītani iyésupa reseve. Ipare aipo ehi ichi María upe:

—Esendu, co pītani reroyaēhisa pipe setá yande mu judío oviapira mbahe tēi pipe yuvireco; ambuae rumo seroya pipe sovasapri yuvirecoira. Ahe avei omboyecuará mbahe ava upe. Amove rumo viroñoñora yuvireco. <sup>35</sup> Ipipe sui ava pihanemoñetasa icuasara curi. Iyavei co opacatu mbahe tasira nde piha pipe inungar quise pucu osasara nde piha viña —ehi chupe.

<sup>36</sup> Aheve avei cuña cuacuami yaracua vahe secói, ahe serer Ana, Fanuel rayri,

Aser suindar. Ocuñataimiseve rumo omenda, iyavei secoi raimi tēi omer rese siete araviter rupive.<sup>37</sup> Cūrītei secoi omer mano pare ochenta y cuatro araviter. Nosei eté tūparo pipe sui oico. Ēgüe ehi yande Yar mboetei pītu, ari rupi oyecuacusa pipe iyavei oyeruresa pipe avei oico no.<sup>38</sup> Ahe evocoiyase ahesa reseve avei ou pītani upe, “Aviye ndeu” ehi Tūpa upe. Ipape oñehe secouer rese opacatu ava Jerusalén pendar osāro vahe güecua pīsīro āgua upe oico.

### Jesús pītani reroyevi agüer Nazaret ve

<sup>39</sup> Evocoiyase opacatu Moisés porocuaita mboaviyere, opa oyeve Galilea pendar güecua Nazaret ve yuvireco.<sup>40</sup> Ahese pītani ocuacua catumi imbahecua-ecua irimi eté oico iyavei ipīrata catu irimi. Esepia, Tūpa osovasa ité sereco no.

### Jesús chíhivahe tūparo pipe secoi

<sup>41</sup> Iyesupa yuviraso araviter yacatu Jerusalén ve Pascua pieta repia yepi.<sup>42</sup> Jesús doce araviter vírecese, ahese víraso iyesupa Jerusalén ve oyeupi pieta repia yuvireco. Esepia, ēgüe ehi eté judío recocuer pietase yuvireco yepi.<sup>43</sup> Ahe pieta pare voi, oyevíse yuvireco güecosave, ahese Jesús opitaño Jerusalén ve; ichi rumo iyavei tu José ndoicuai eté ipitase yuvireco.<sup>44</sup> “Oño revo ava pāhu rupi” ehi yuvireco chupe viña; aipo ehiño ité ñepeí ari pipe yuvireco chupe. Oseca tēise rumo omu pāhu rupi, iyavei omboripar pāhu rupi avei no,<sup>45</sup> ndoyosui eté yuvireco. Ahese oyeve iri tēi Jerusalén ve seca yuvireco.

<sup>46</sup> Imombosapisa ari pipe oyosu ramo tūparo pipe yuvireco. Aheve oguapi ava Tūpa porocuaita rese oporombohe vahe pāhuve oī; oyapisaca iñehe rese iyavei oporandu-randu ahe ava upe Tūpa Ñehengagüer rese oī.<sup>47</sup> Evocoiyase

opacatu ava ndoyembovihai tēi imbahecua vaisa rese yuvireco. Esepia, oporanduse mbahe rese yuvireco chupe, omboyeveí tupri voi-voiño ité ñehesa.<sup>48</sup> Oyosuse iyesupa, oyepihamondii yuvireco. Ahese ichi aipo ehi chupe:

—Che membri, ¿mahera vo ēgüe ere eico oreu? Nde recasa tēi opacatu rupi, ore mopihañemoñeta ati uca eve —ehi.

<sup>49</sup> Evocoiyase,

—¿Mahera vo che reca co coti rupi tēi peye peico? ¿Ndapecuai vo che Ru rēta pipe aico vaherā? —ehi osi upe.

<sup>50</sup> Iyesupa rumo ndosenducuai eté aipo oyeupe hesa yuvireco.

<sup>51</sup> Evocoiyase oyeve Nazaret ve oso supi. Aheve omboyeroñaño ité oyesupa. Ichi niha opacatu co mbahe rese oyapisacaño ité.<sup>52</sup> Ahese Jesús ocuacua-cuacua iri, iyetei catu avei imbahecua catu iri avei oico no. Secoi tupri ai eté Tūpa upe iyavei ava eta upe avei no.

### Juan Oporoāpiramo vahe secoi ivi iporupirēhisa rupi

**3** Quince araviter pipe mborerecuar guasu Tiberio recose, Poncio Pilato evocoiyase mborerecuar secoi Judea rupi, Herodes avei mborerecuar secoi Galilea ve, tivri Felipe evocoiyase mborerecuar secoi Iturea ve iyavei Traconite ve, Lisánias avei mborerecuar secoi Abilinia ve.<sup>2</sup> Anás iyavei Caifás ahe pahí rerecuar ivate catu vahe yuvirecoi. Ahese Tūpa, “Emombehu che ñehe ava upe cute” ehi Zacarías rahir Juan upe oico ivi iporupirēhiseve.<sup>3</sup> Juan evocoiyase oso opacatu iai Jordán ivi oico, supi aipo ehi ava upe: “Pemboasi pe angaipa, peyevi Tūpa upe, ahese opoāpiramora Tūpa pēu ñero āgua pe angaipa rese” ehi.<sup>4</sup> Co yaviye ité Tūpa ñehe mombehusar Isaías rembicuachiagüer pipendar aipo ehi vahe:

“Sendusa ivi iporupirēhiseve ava sapucaisa aipo ehi vahe:



‘Pemoingatu yande Yar raperã, pemo-hivi tupri avei’ ehi.

<sup>5</sup> Evocoyase opacatu ivisocuer opara imboapiposa chupe, opacatu ivitri ivate vahe iyavei ivitri mini opara imboyoyasa tupri no.

Acoi peri ipãri vahe, ahe imohivisapara; peri ipicucu ati vahe opara imboapiposa tupri chupe.

<sup>6</sup> Iyavei opacatu ava osendura ñehesa písirosa resendar Tūpa remimbou yuvireco cute’ ehi vahe” ehi.

<sup>7</sup> Ava rehii yuvinosepa chupe ‘tayande āpiramo’ oyapave yuvireco viña. Ahe rumo aipo ehi: “¡Pe mboi mboetasa tēi peico! ¿Ava vo, ‘Pesēra Tūpa ñemoirosa ou vaheṛã sui’ ehi tupri tēi pēu? <sup>8</sup> Yipindar toyecua tupri rane yande Yar upe peyevisa pe angaipa mboasisa pipe. Iyavei ndapeyeroyai chira ‘ore Abraham suindar oroico’ pe hesa rese tēi peñepisiro āgua. Esepia, Tūpa oicatuño ité co ita sui Abraham suindar nungar tupri apo āgua oyeupe nara yepi. <sup>9</sup> Hacha niha imoingatusa voi eté opacatu ivira iha naporai vahe sapo rupi yasia āgua yepi. Yasiapri evocoyase imondosapara tatave” ehi.

<sup>10</sup> —¿Mbahe piha evocoyase oroyapora ore recocuer recuñaro āgua oroico? —ehi ava rehii oporandu yuvireco chupe.

<sup>11</sup> —Pe pereco vahe ñuvirío pe camisa, ñepeí pemondo ava ndovirecoi vahe upe; iyavei pe pereco vahe tembihu, pemboyahomi tēi ambuae ava ndovirecoi vahe upe —ehi imboyevi ava upe.

<sup>12</sup> Yugüeru avei moviro ava sui guarepochi reroquasar ‘tayande āpiramo’ oyapave yuvireco. Ipare oporandu Juan upe mbahe rese yuvireco:

—Porombohesar, ¿mbahe vo ore oroyapora Tūpa rupi ore guata āgua oroico? —ehi yuvireco chupe.

<sup>13</sup> Evocoyase aipo ehi ahe ava yuvirecoi vahe upe:

—Aní perocua catu iri guarepochi pēu imombehusa sui —ehi.

<sup>14</sup> Iyavei amove sundao oporandu mbahe rese yuvireco chupe:

—Ore no, ¿mbahe vo ore oroyapora? —ehi.

—Ndaperocuai chietera que mbahe ambuae ava sui, ndapeñehe-ñehe tēi chira ava upe sembiapoēhi rese, iyavei peyembovihañora pe poraviqui repri rese —ehi sundao upe.

<sup>15</sup> Ava rumo, “¿Ndahei piha co Poropísirosar sãrombri secoi?” ehi tēi Juan upe yuvireco. <sup>16</sup> Juan rumo aipo ehi opacatu ava upe: “Che opoāpiramo i pipe tēi; oura rumo ambuae che raquicuei, ahe pe āpiramora Espiritu Santo tata nungar pipe. Ahe seco pĩrata catu vahe secoi che sui. Sese cheu ndiyai eté ahe ipitaquisã yora āgua ichui” ehi. <sup>17</sup> “Ahe güeru trigo mbovevesa ihigüer sui ipeha āgua. Sãhii evocoyase yapocatusa, ihigüer rumo imondosa tata apirēhi vahesave” ehi ava upe.

<sup>18</sup> Omombehu-mbehu vite ñehesa aviye vahe ava upe ‘toyemonguerēhi güecocuer recuñaro āgua yuvireco’ oya. <sup>19</sup> Ipare rumo Juan oñehe pĩrata mborerecuar Herodes upe secocuerai rese. Esepia, vivri Felipe rembireco Herodías rese secoi, iyavei setá ambuae mbahe naporai vahe sembiapo. <sup>20</sup> Sese Herodes oyapoño ambuae mbahe tēi: seroyaēhisa pipe osoquenda ucaño Juan sereco.

### Jesús āpiramosa

<sup>21</sup> Yipindar rumo voquenda viteēhi-seve Juan oñapiramo setá ava oico, ahe-seve avei oñapiramo Jesús. Jesús yerure viteseve, avieteramo tēi oyemboi tupri iva. <sup>22</sup> Ipare Espiritu Santo ogüeyi ou iharive apicasu nungar, iyavei oyeendu ñehesa iva sui aipo ehi vahe:

—Nde che Rahir ereico, che rembi-  
aisu; sese aviha ité nde rese —ehi.

**Ava eta oyesu vahe  
Jesucristo yesu renondeve**

<sup>23</sup> Jesús virecose treinta araviter, ahese ramo omboipi oporombohe. Ahe icuapri vahe ité José rahir secose viña. José Elí rahir secoi, <sup>24</sup> Elí evocoyase Matat rahir, ahe Matat evocoyase Leví rahir, Leví evocoyase Melqui rahir, ahe Melqui evocoyase Jana rahir, Jana evocoyase José rahir, <sup>25</sup> ahe José Matatías rahir, Matatías evocoyase Amós rahir, ahe Amós evocoyase Nahúm rahir, Nahúm evocoyase Esli rahir, ahe Esli Nagai rahir, <sup>26</sup> Nagai evocoyase Maat rahir, ahe Maat Matatías rahir, Matatías evocoyase Semei rahir, ahe Semei evocoyase Josec rahir, Josec evocoyase Judá rahir, <sup>27</sup> ahe Judá Joanán rahir, Joanán evocoyase Resa rahir, ahe Resa evocoyase Zorobabel rahir, Zorobabel evocoyase Salatiel rahir, ahe Salatiel Neri rahir, <sup>28</sup> Neri evocoyase Melqui rahir, ahe Melqui Adi rahir, Adi evocoyase Cosam rahir, Cosam evocoyase Elmadam rahir, Elmadam evocoyase Er rahir, <sup>29</sup> ahe Er Jesús rahir, Jesús evocoyase Eliezer rahir, ahe Eliezer Jorim rahir, Jorim evocoyase Matat rahir, <sup>30</sup> ahe Matat Leví rahir, Leví evocoyase Simeón rahir, ahe Simeón evocoyase Judá rahir, Judá evocoyase José rahir, ahe José Jonam rahir, Jonam evocoyase Eliaquim rahir, <sup>31</sup> Eliaquim Melea rahir, ahe Melea Mena rahir, Mena evocoyase Matata rahir, ahe Matata evocoyase Natán rahir, <sup>32</sup> Natán David rahir, ahe David evocoyase Isaí rahir, Isaí Obed rahir, ahe Obed evocoyase Booz rahir, Booz Sala rahir, ahe Sala evocoyase Naasón rahir, <sup>33</sup> Naasón Aminadab rahir, ahe Aminadab evocoyase Admin rahir, Admin evocoyase Arni rahir, Arni evocoyase Esrom rahir, ahe Esrom evocoyase

Fares rahir, Fares evocoyase Judá rahir, <sup>34</sup> ahe Judá Jacob rahir, Jacob evocoyase Isaac rahir, ahe Isaac Abraham rahir, Abraham evocoyase Taré rahir, Taré evocoyase Nacor rahir, <sup>35</sup> ahe Nacor Serug rahir, Serug evocoyase Ragau rahir, ahe Ragau evocoyase Peleg rahir, Peleg Heber rahir, ahe Heber evocoyase Sala rahir, <sup>36</sup> Sala Cainán rahir, ahe Cainán evocoyase Arfaxad rahir, Arfaxad evocoyase Sem rahir, ahe Sem evocoyase Noé rahir, Noé evocoyase Lamec rahir, <sup>37</sup> ahe Lamec Matusalén rahir, Matusalén evocoyase Enoc rahir, Enoc evocoyase Jared rahir, ahe Jared Mahalaleel rahir, Mahalaleel evocoyase Cainán rahir, <sup>38</sup> ahe Cainán evocoyase Enós rahir, Enós evocoyase Set rahir, ahe Set Adán rahir, Adán evocoyase Tüpa rahir.

**Jesús recoãhasa**

**4** Jesús Espíritu Santo rese ité secoi. Ahe osê iai Jordán sui oso. Ipare Espíritu viroguata ivi iporupirêhisa rupi. <sup>2</sup> Aheve cuarenta ari secoise Carugar osecoãha. Ndocarui avei oico. Sese ndasiepoi eté. <sup>3</sup> Carugar evocoyase aipo ehi chupe:

—Tüpa Rahir ité nde recose, co ita sui eyapo pan cüritei —ehi.

<sup>4</sup> Evocoyase Jesús omboyevi chupe:

—Che Ru ñehe rumo icuachiapri pipe aipo ehi: ‘Ndahei chira pan suiño ava yuvirecovera’ ehi —ehi Carugar upe.

<sup>5</sup> Ipare Carugar viraso ivate vahe-save. Aheve ñepeí reseve opacatu avava têi mborerecuasa ivi pipendar omboyecua chupe. <sup>6</sup> Ipare aipo ehi chupe:

—Che amondora opacatu ivi rupindar mborerecuar pĩratasa iyavei mbahe porañete vahe nde povrive. Esepia niha, co opacatu cheu imbouprĩ; iya ité amondo vaherã ava upe che remimbotar rupi.

<sup>7</sup> Acoi ereñenopihase cheu che mboetei

ãgua, ahese opacatu co mbahe ereipisira nde mahera —ehi tēi Carugar chupe.

<sup>8</sup>—Icuachiapri pipe rumo: ‘Emboetei nde Yar Tūpa, ahe güeraño tupri avei eremboyeroyara’ ehi —ehi Carugar upe.

<sup>9</sup>Ipare Carugar víraso oyeupi tecua guasu Jerusalén ve. Aheve ovíroyeupi tūparo apíterve. Aheve Carugar aipo ehi chupe:

—Tūpa Rahir ité nde recose, eviapi cohava sui. <sup>10</sup>Esepia niha, icuachiapri pipe:

‘Tūpa oyocuirai güembigui eta nde rãro ãgua.

<sup>11</sup>Ahe nde mopuhara yuvireco que ñepeí ita nde momara rãgüer sui’ ehi —ehi Carugar chupe.

<sup>12</sup>Evocoyase omboyeví Carugar upe:

—¡Aní! Icuachiapri pipe niha aipo ehi avei: ‘Ndereseoãhai chira nde Yar Tūpa’ ehi —ehi chupe.

<sup>13</sup>Ahese Carugar ndoicatu iri eté Jesús recoãha ãgua oico. Ipare oyepepiño raimi tēi oso ichui.

### **Jesús omboipi oporombohe Galilea rupi**

<sup>14</sup>Jesús, Espíritu Santo reco pīratasa pipe, oyeví oso Galilea ve. Ipare serãcua oguata opacatu tecua-tecuami rupi.

<sup>15</sup>Esepia, ahe oporombohe judío tūparo pipe oico. Ahese opacatu ava omboetei yuvireco.

### **Jesús oyeví Nazaret ve**

<sup>16</sup>Ichui Jesús oyeví Nazaret ve opuacua agüerve. Aheve judío mbituhusa ari pipe oi que tūparove inungar oyapo yepi. Ahese opūha ‘tayeroquí icuachiapri maranehi pipe’ oya. <sup>17</sup>Evocoyase tūparo rese ñangarecuar pītiviisar omondo Tūpa ñehe mombehusar Isafás rembicuachía

chupe. Oyorase ahe cuachiar, oyoeroquí icuachiapri aipo ehi vahe pipe ohã:

<sup>18</sup>—“Yar Espíritu secoi che rese.

Esepia niha, ahe ombou che cuaitarã cheu co ñehesa aviye vahe mombehu ãgua ava iparaisu vahe upe.

Che cuaita avei ava mbahe-mbahe tēivriye yuvirecoi vahe senose ãgua ichui, iyavei ava ndasesapisoi vahe ambosarecora; iyavei che cuaita ava mbahe-mbahe tēi rasicuer oiporara vahe sui senose ãgua,

<sup>19</sup>iyavei ‘cūrítei Yar oyemoingatu oporovasasa mondo ãgua pēu’ he ãgua” ehi icuachiapri pipe —ehi oyoeroquí.

<sup>20</sup>Sese oyoeroquí pare, oyapoapipa cuachiar imondo tūparo rese ñangarecuar pītiviisar upe. Ipare oguapi oĩ ava rembiepiave. Ahese opacatu tūparo pipendar omahe ati yuvireco sese.

<sup>21</sup>Evocoyase ahe oñehe aipo ehi:

—Cūrítei yaviye co icuachiapri pipendar opacatu pe rovaque —ehi.

<sup>22</sup>Opacatu ava oñehe tupriño ité yuvireco sese. Ndoyembovihai tēi iñehe tupri renduse yuvireco. Oporandu-randu rumo yuvireco oyeupe:

—¿Ndaheí vo acoi co José rahir tēi? —ehi yuvireco chupe.

<sup>23</sup>Ahe rumo aipo ehi ava upe:

—Pe aipo peyera cheu: ‘Oporombogüera vahe, eñeposano nde ae eico’ peyera. Ipare aipo peyera cheu: ‘Acoi orosendu vahe nde rembiapogüer Capernaum pipe, ãgüe ere avei eyapo cohava nde recua pipe ité’ peyera cheu —ehi.

<sup>24</sup>—Supi eté, ndipoi eté niha que ñepeí yepe Tūpa ñehe mombehusar oipisi tupri vahe güecua pipe yuvireco yepi. <sup>25</sup>Supi tupri ité Tūpa ñehe mombehusar Elías recose, iñehe rupi tupri ndoquí eté mbosapi aravíter yemombitesa rupi oico. Sese oime tiavor opacatu Israel ivi rupi aracahe. Ahese setá etepri

cuña imer mano vahecuer oime Israel recua rupi viña, <sup>26</sup>Tūpa rumo nomon-doi Elías cuña imer mano vahecuer Israel pendar upe ipītivii āgua. Ēgüe ehi rumo omondo cuña ndahei vahe Israel pendar ipītivii āgua. Ahe cuña tecua Sarepta pendar, ahe Sarepta Sidón ĩpiimindar. <sup>27</sup>Iyavei setá ava oime Israel recua pipendar imbaheasi vahe lepra rerecosar yuvireco evocoi Tūpa ñehe mombehusar Eliseo recose. Evocoi ava yuvirecoi vahe rumo ndipoi eté que ñepeí ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

<sup>28</sup>Ahese opacatu ava judío tūparo pipendar oñemoiró iteanga yuvireco sese aipo mbahe renduse. <sup>29</sup>Sese opa voi eté opūha Jesús reraso āgua tecua pipe sui ivitri ivi socuerve yuvireco, ahe iharive tecua yaposa. Ahe ichui oiti pota yuvireco viña. <sup>30</sup>Jesús rumo ipāhu sui osē tupriño oso.

### **Jesús ombogüera mbia carugar vireco vahe oyese**

<sup>31</sup>Ichui Jesús oso Capernaum ve, ahe tecua Galilea rupindar. Aheve ombohe ava oico mbituhusa ari pipe. <sup>32</sup>Ipare opacatu ava, “¡Mara ehi rutei!” ehi tēi iporombohesa renduse yuvireco. Esepia niha, ahe oñehe güeco pīratasa pipe.

<sup>33</sup>Aheve judío tūparo pipe oime mbia vireco vahe carugar oyese, ahe oñehe pīrata Jesús upe:

<sup>34</sup>—¡Ore mañeco tēi eme eve! ¡Maha-hera ereyuño tēi cohove oreu, nde, Jesús Nazaret pendar! ¿Ereyu vo ore mocañi āgua tēi? Che orocua ité. Nde niha seco maranehi vahe ereico Tūpa suindar —ehi chupe.

<sup>35</sup>Evocoiyase,  
—¡Quiriri, esē co mbia sui! —ehi oñehe pīrata carugar upe.

Ahese carugar omboviapi ahe mbia ava rovai, osē ocua ichui; nomomaraí eté rumo. <sup>36</sup>Opacatu ava oyembosiquiye, iyavei oporandu-randu tēi mbahe rese oyeupe yuvireco:

—¿Mara ehi vo aipo oñehe oico? ¡Esepia, co mbia opīratasa pipe oyocuai carugar ava sui imose āgua! —ehi yuvireco.

<sup>37</sup>Sese Jesús rerācua oyandu opacatu tecua-tecuami ivirindar yuvireco.

### **Jesús ombogüera Simón Pedro rembireco si**

<sup>38</sup>Evocoiyase Jesús osē judío tūparo pipe sui oso, oique Simón Pedro rētave. Simón rembireco si sohi iteanga ou. Evocoiyase oñehe ahe pendar sese Jesús upe ‘tombogüerami tēi’ oyapave yuvireco.

<sup>39</sup>Evocoiyase Jesús oyeaivi oso chupe sohi sui imbogüera āgua. Ocuera pare voi ahe cuña oñarapuha; ohañeco ahe ava yuvirecoi vahe rese.

### **Jesús ombogüera setá ava imbaheasi vahe**

<sup>40</sup>Ari so ramomise opacatu ava imbaherasisa ambuae tēi vahe güeru Jesús upe yuvireco. Ahe evocoiyase opo omondo iyacatu iharive ñepeipei imbogüera. <sup>41</sup>Iyavei setá ava sui opa omose carugar. Evocoiyase carugar osapucái tēi aipo ehi yuvireco:

—¡Nde acoi Tūpa Rahir ité ereico! —ehi.

Ahe rumo oñehe pīrata carugar upe, nomoñehe iri. Esepia niha, carugar oicua ité ahe Tūpa Rembiporavo seco rese yuvireco.

### **Jesús oporombohe judío tūparo rupi oico**

<sup>42</sup>Ahere ayihive cōhe ramomise, Jesús osē tecua pipe sui, oso ivi iporupirēhisave. Ava rumo oseca-secaño ité yuvireco; osupitiño ité secosave

yuvireco. Oipota ahe oyesui ichoēhi āgua ité yuvireco vinā. <sup>43</sup>Ahe rumo aipo ehi ava eta upe:

—Tamombehu rane catu ambuae tecuave avei ñehesa aviye vahe Tūpa mborerecuasa resendar ava upe. Esepia, aherā niha che mbousa —ehi.

<sup>44</sup>Ēgiue ehi Jesús oguata oporombohe Judea tūparo rupi oico.

### Pira mboha ati agüer

**5** Ñepeí ari Jesús secoi ipa Genesaret popi rupi. Aheve ava rehii oyepota yuvireco chupe, oyere ati yuvireco sese. Esepia niha, ahe osendu pota ité Tūpa Ñehengagüer yuvireco. <sup>2</sup>Aheve oime ñuvirío carite imbehi popive. Ahe ava pira mbohasar opa yuvínose evocoi carite pipe sui yuvireco. Ipare opira mbohasa oyosei yuvínoi. <sup>3</sup>Evocoiyase Jesús osepiase, oha Simón carite pipe iyavei aipo ehi chupe: “Tosiri catumi tēi chíhi coi coti iai popi sui” ehi. Ipare oguapi oí carite pipe. Aheve ombohe ava cute. <sup>4</sup>Oñehe pare aipo ehi Simón upe:

—Yaso ipa tipí catu vahesave. Aheve erembohara pira —ehi.

<sup>5</sup>Simón rumo omboyeví chupe:

—Porombohesar, orosāha tēi niha pītu momba pira mboha oroico. Nde porocuita pipe rumo amondo irira pira mbohasa ive —ehi.

<sup>6</sup>Ēgiue ehise, pira rehii omondoromi ombohasa yuvireco. <sup>7</sup>Ahese oyaiti yuvireco omboetasa evocoi ambuae carite pipe yuvirecoi vahe upe ‘toyugüerumi yande pītívii’ oyapave yuvireco chupe. Ahe yugüeru chupe. Ipare opa ñuvirío carite omboapipo tupri yuvireco; seni iri rumo omondo ipive. <sup>8</sup>Co mbahe repiase, Simón Pedro oñenopiha oso sovai aipo ehi chupe:

—¡Eyepémi tēi che sui, che Yar! ¡Esepia, che yangaipa vahe tēi aico! —ehi.

<sup>9</sup>Esepia, Simón iyavei opacatu ava yuvirecoi vahe supi osiquiyé iteanga

co pira rehii repiase yuvireco. <sup>10</sup>Iyavei Simón mboetasa ambuae carite pipendar ahe Santiago, Juan Zebedeo rahir yuvirecoi. Jesús rumo aipo ehiño Simón upe:

—Eresiquiye eme; co pipe suive inungar pira eremboha, ēgiue ere aveira ava reca cheu nara —ehi.

<sup>11</sup>Evocoiyase opa vínose carite ivi ātasave yuvireco, oseyapaño opacatu mbahe. Ipare yuviraso supi.

### Jesús ombogüera ava lepra rerecosar

<sup>12</sup>Ñepeí ari Jesús secoise tecua pipe, aheve oime mbia lepra vireco vahe opacatu güetecuer rese. Jesús repiase, oñenopiha oyeaivi oso chupe. Ipare oporandu aipo ehi:

—Che Yar, ereipotase, iya nde che mbogüerami eve —ehi chupe.

<sup>13</sup>Evocoiyase, opocose sese,

—Aipota. ¡Erecuerara cūrítei! —ehi chupe.

Aipo ihe ramoseve voi eté ocuera.

<sup>14</sup>Ipare oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahí upe. Ipare eicuavēhe nde porerecosa nde cuerasa resendar Moisés porocuita rupi. Ipípe sui toicua opacatu ava nde cuerasa yuvireco —ehi chupe.

<sup>15</sup>Jesús rerācua rumo oyembouvicha catu-catu iri eté. Evocoiyase setá ava oyemboya yuvireco sese ñehe rendu āgua ‘tayande mbogüerami tēi yande mbaherasisa sui’ oyapave yuvireco. <sup>16</sup>Ava rehii sui rumo amove Jesús oyepepiño ahe aemi oyerure āgua yepi.

### Jesús ombogüera ava ndoguatai vahe

<sup>17</sup>Ñepeí ari Jesús oporombohe oico. Yar Tūpa pīratasa vireco oyese ava mbogüera āgua. Aheve avei oguapi yuvínoi fariseo, Moisés porocuita rese oporombohe vahe avei ipiri yuvireco. Ahe yugüeru opacatu Galilea tecua-

tecuami rupi sui yuvireco. Ivi Judea rupi sui, tecua Jerusalén sui avei yugüeru no. <sup>18</sup> Ahese ava ndoguatai vahe güeru supa pipe yuvireco. Viroique pota oi pipe sovai eté seroyi água yuvireco viña; <sup>19</sup> ndoicatuí eté rumo seroique yuvireco ava rehii pāhu rupi. Evocoiyase viroye-upi yeupisa rupi ahe oi ipe vahe harive yuvireco. Aheve virocua teca ichui. Supi viroyi imbaheasi vahe supa pipe imondo yuvireco opacatu ava rembiepiave sovai. <sup>20</sup> Ahe oicuaase co mbia yuvirecoi vahe oyese yeroyasa, ahese aipo ehi imbaheasi vahe upe:

—Che mboripar, che ñero nde angaipa rese ndeu —ehi.

<sup>21</sup> Ichui oporombohe vahe Moisés porocuita rese iyavei fariseo ipihañemoñeta ati voi tēi yuvireco: “Co mbia oyemboivate ai tēi vahe Tūpa ñehe nungar pipe tēi; Tūpaño ité niha oicatu ava angaipa upe oñero água” ehi tēi oyeupe yuvireco.

<sup>22</sup> Ahe rumo oicuaño ité ahe ava pihanemoñetasa. Evocoiyase aipo ehi chupe:

—¡Mahera vo pepihañemoñeta rai tēi che rese! <sup>23</sup> ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa piha, anise: ‘Epūha, eguata’ hesa tie? <sup>24</sup> Tapeicua ru che, Ava Riquehir, areco ité mborerecuasa co ivi pipe ava angaipa upe che ñero água —ehi.

Evocoiyase,

—Eñarapuha, esupi nde rupa, eso nde rētave —ehi imbaheasi vahe upe.

<sup>25</sup> Ahese opūha voi ava rovaque, osupi vupagüer. Ipare osapucaí oso güētave Tūpa upe. <sup>26</sup> Ahese opacatu tupri ité ava, “¡Too! ¿Mara ehi rutei piha co?” ehi tēi imboetisave yuvireco. Iyavei osiqiyepave aipo ehi yuvireco:

—Co pipe yasepia mbahe ndayasepiái vahe ité —ehi.

### Jesús oñehe Leví upe

<sup>27</sup> Ichui osēse Jesús, osepia mbia Roma ve nara guarepochi rerocuar Leví serer vahe, ahe guarepochi rerocuasave chini. Sepiase,

—Erio che rupi —ehi chupe.

<sup>28</sup> Evocoiyase Leví opūha. Oseyapa oporaviquisa, oso supi.

<sup>29</sup> Ipare Leví oyapo pieta guasu chupe nara güētave. Aheve iyemborisave setá imboetasa ava guarepochi rerocuar iyavei ambuae ava ocaru yuvinoi ipiri.

<sup>30</sup> Pieta repiasar fariseo yuvirecoi vahe rumo iyavei ipāhu pendar Moisés porocuita rese oporombohe vahe avei, ahe omboipi semimbohe upe oñehe mara aipo ehi yuvireco chupe:

—¡Mahera ru pecaru iyavei pecahu guarepochi rerocuar rese iyavei ambuae ava yangaipa guasu vahe rese tēi avei no! —ehi.

<sup>31</sup> Jesús rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco. <sup>32</sup> Esepia, che ndayui ava seco catupri vahe reca; che rumo ayu ava yangaipa vahe reca Tūpa uve iyeveí água yuvireco —ehi.

### Yecuacusa rese ñehesa

<sup>33</sup> Ipare ava oporandu yuvireco chupe:

—¿Mahera vo oyecuacu serai iyavei oyerure Juan Oporoāpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

<sup>34</sup> Ahe rumo omboyevi chupe aipo ehi:

—Ndiyái eté ichohopri mboyecuacu mendasave imer oicove viteseve ipāhuve. <sup>35</sup> Oimera rumo ari imer reraso água ichui, ahese ramo oyecuacura yuvireco cute —ehi.

<sup>36</sup> Iyavei ambuae mbahe rese oporombohe imboyevi água:

—Ndiyai eté ava upe virocua vaherã turucuar ipiasu vahe sui ambuae turucuar cuacuami vahe apete ãgua. Esepia niha, êgüe ehise evocoyase turucuar ipiasu vahe omomara; iyavei turucuar ipiasu vahe apirer naporai chira turucuar cuacua vahe rese —ehi—. <sup>37</sup>Iyavei no, ndiyai eté ñoñasa uva ricuer piasu mbahe pিরer cuacua pipe no. Esepia niha, êgüe ehise, uva ricuer piasu evocoyase opara ombopu mbahe pিরer cuacua viña, êgüe ehira oyepiyerepa, mbahe pিরer avei evocoyase ocañi tẽira viña. <sup>38</sup>Uva ricuer piasu rumo yamondora mbahe pিরer piasu pipe. <sup>39</sup>Iyavei ndipoi eté que ava oiñu vahe uva ricuer ipiasu vahe yuvireco uva ricuer cuacua vahe yusei ai pare. Esepia niha, ava aipo, ‘Co uva ricuer cuacua vahe aviye catu vahe yepi’ ehi yuvireco —ehi ava upe.

### **Jesús remimbohe oipoho trigo mbituhusa ari pipe yuvireco**

**6** Ñepeí mbituhusa ari pipe Jesús viroguata güemimbohe mbahe miti pãhu rupi. Semimbohe evocoyase oipoho-poho yuviraso trigo rãhii. Ipape oyequii opo pipe sãhii yuvireco igua. <sup>2</sup>Evocoyase fariseo osepiase, aipo ehi yuvireco semimbohe eta upe:

—¡Mahera peporaviquiño tẽi co mbituhusa ari pipe peico! —ehi.

<sup>3</sup>Jesús rumo omboyeveí chupe:

—Peicua tẽi niha icuachiapri arachendar mborerecuar guasu David rembiapogüer resendar ñehesa ondugüer reseve ndasiepoise yuvireco. <sup>4</sup>Ahe niha oique ité Tũpa rẽta pipe, opoco pan imboeteipri Tũpa upendar rese evocoi pahi upe güeraño ipotasa vahe ihu ãgua yepi. Ahe rumo ohu, ondugüer tohu avei omondo —ehi.

<sup>5</sup>Iyavei aipo ehi chupe:

—Ava Riquehir mbituhusa ari rerecuar ité secoi —ehi fariseo upe.

### **Jesús ombogüera mbia ipo nomii vahe**

<sup>6</sup>Ambuae mbituhusa ari pipe, Jesús oique judío tũparo pipe oporombohe oico. Aheve mbia yasu coti ipo nomii vahe secoi. <sup>7</sup>Moisés porocuita rese oporombohe vahe, fariseo avei omahengatu Jesús rese yuvireco ‘¿ombogüerara piha co mbia mbituhusa ari pipe?’ oya; ‘yaiñhengapo angahu’ oyapave tẽi yuvireco. <sup>8</sup>Ahe rumo oicuano ité ipihañemoñetasa oico. Ipape aipo ehi evocoi mbia ipo nomii vahe upe:

—Epũha cohava terehã ava pãhuve —ehi.

Ahe mbia evocoyase opũha, opita aheve ohã <sup>9</sup>Ahese Jesús oporandu ahe ava upe:

—Aporandura mbahe rese pẽu —ehi—. ¿Mbahe vo yaposara mbituhusa ari pipe yepi, mbahe tupri piha, anise mbahe naporai vahe tie? ¿Yaipĩsiro piha ava recouer; yamocañi uca tẽi tie? —ehi.

<sup>10</sup>Evocoyase omahengatu oyese ava oyere tupri vahe rese. Ipape aipo ehi ava ipo nomii vahe upe:

—Eichoho nde yiva —ehi.

Ahe mbia evocoyase oichoho oyiva; evocoyase ipo ocuera tupri ité. <sup>11</sup>Evocoyase oñemoiro catuño ité yuvireco sese, iyavei oporandu-randu oyeupe yuvireco ‘¿mara yahera piha imomara ãgua?’ oya.

### **Jesús oiporavo doce tupri güemimboherã**

<sup>12</sup>Ahe ari rupi Jesús oso ivitrive, oyerure pĩtu momba tupri Vu upe oico. <sup>13</sup>Cõhese, “Perió” ehi güemimbohe eta upe. Ipãhu sui oiporavo doce tupri, ahe chupe, “Apóstol” ehi. <sup>14</sup>Co ahe yuvirecoi: Simón, ahe acoi Pedro avei serer; Andrés Simón rivri; Santiago, Juan, Felipe, iyavei Bartolomé; <sup>15</sup>Mateo, Tomás,

Santiago Alfeo rahir; Simón, ava güecua rese secatēhí vahe pāhu pendarer; <sup>16</sup> Judas Santiago rivri; iyavei Judas Iscariote, ahe omondo vahe Jesús yamotarēhimbar uve.

### Jesús ombohe ava rehii

<sup>17</sup> Ipare Jesús ogüeyi ivitri sui yugüeru co doce güemimbohe reseve. Ipare opita ivi yoya tuprisave. Aheve ambuae semimbohe eta oyemboya ati yuvireco sese iyavei setá ava yuvirecoi opacatu tecua Judea rupindar, Jerusalén rupindar iyavei yemboyasa Tiro, Sidón cotindar, ahe oyemboya avei yuvireco sese. Ahe ava ēgüe ehi ñehe rendu potasave yuvireco ‘tayande mbogüerami tēi yande mbaherasisa sui’ oyapave yuvireco. <sup>18</sup> Acoi espíritu naporai vahe remimombaraisu avei ocuera tupri yuvireco. <sup>19</sup> Evocoyase opacatu ava opoco pota ité sese yuvireco. Esepia niha, ahe oporombogüera opacatu güeco pīratasa pipe oico.

### Ava sorivete vahe iyavei ava ndoyembovīhai vahe

<sup>20</sup> Ipare omahe Jesús güemimbohe rese aipo ehi chupe:

“Perorivete catu pe iparaisu vahe. Esepia niha, Tūpa mborerecuasa pēu nara ité secōi.

<sup>21</sup> “Perorivete catu cūríteindar ndasiepoi vahe. Esepia niha, pehītarora peico curi.

“Perorivete catu pe acoi ava cūrítei oyaseho vahe. Esepia niha, peviharetera coiye peico.

<sup>22</sup> “Perorivete catu pe acoi ava pe amotarēhise, pe mboypepiñose avei oyesui yuvireco, ñehe-ñehe tēise yuvireco pēu pe amotarēhisave, iyavei acoi viroñose pe rer mbahe tēi pipe che, Ava Riquehīr, recocuer sui tēi yuvireco. <sup>23</sup> Peyembovīhaño iyavei perorivete catuñora ahe ari pipe peico. Esepia niha, ipare

peipsisira porerecosa tuvichá vahe ivave. Ēgüe ehi tupri avei evocoi ava ramoi aracahendar mara-mara tēi Tūpa ñehe mombehusar sereco yuvireco” ehi.

<sup>24</sup> “¡Peparaisu catu rumo cūrítei mbahe yar peico vahe! ¡Esepia niha, pemboaviye pe rorivetesá peico!

<sup>25</sup> “¡Peparaisu catu acoi pe ihītarō vahe cūrítei! ¡Esepia niha, ndaperiepoi chira peico coiye!

“¡Peparaisu catu acoi peviha vahe pe pietase cūrítei! ¡Esepia, peyasehora pe viharēhisa pipe peico coiye!

<sup>26</sup> “¡Peparaisu catu acoi peipisi vahe pe mboeteisa opacatu co ivi pipendar ava tēi sui! ¡Esepia niha, ēgüe ehi tupri tamoi Tūpa ñehe mombehusar angahu tēi vahe upe yuvireco aracahe!” ehi.

### Iyacatu yasaisu yande amotarēhimbar

<sup>27</sup> “Pe che ñehe rese peyapisaca vahe upe rumo aipo ahe: Pesaisu ava pe amotarēhimbar; peyapo tupri mbahe aviye vahe ava nape ambotai vahe upe. <sup>28</sup> Pe porandu Tūpa porovasasa rese ava pēu ñehe-ñehe tēi vahe upe nara; peyerure Tūpa upe pēu mbahe tēi oyapo vahe recocuer rese. <sup>29</sup> Acoi que pe amotarēhimbar pe rovapetese, co cotindar avei pemoporēhiñora chupe. Iyavei acoi que ava virocuaño tēise pe yeasa pe sui, toviraso avei pe yemondesa güemimbotar rupi” ehi. <sup>30</sup> “Acoi oporanduse que pe mbahe rese yuvireco pēu, pemondoño avei chupe. Iyavei acoi que ava virocuaño tēise pe mbahe pe sui, ndapeporandui chira pēu imboyevi āgua rese. <sup>31</sup> Acoi mbahe peipota vahe ambuae ava oyapo vaherā pēu, ahe tupri avei peyapora chupe.

<sup>32</sup> “Acoi ava pe raisupar güeraño pesaisu catu tēise, ndipoi eté mbahe aviye vahe ipipe. Esepia niha, ava naporai vahe ēgüe ehi yuvireco yepi. <sup>33</sup> Anise, acoi ava mbahe tupri ai oyapo vahe



pëu, chupe güeraño mbahe tupri peyapose, ¿mbahe vo evocoyase oime aviye vahe ipipe? Esepia niha, ava angaipa viyar avei ëgüe ehi yuvireco yepi. <sup>34</sup>Acoi pemondoño tēise mbahe ava upe ‘tomboyevi mbahe cheu’ pe hesave, ¿mbahe vo evocoyase oime aviye vahe ipipe? Esepia niha, ava angaipa viyar ëgüe ehi avei yuvireco. <sup>35</sup>Pe rumo pesaisu catura ava pe amotarēhisar, peyapoñora mbahe aviye vahe chupe. Iyavei pemondoño itera mbahe chupe, ‘Tasároño rane mbahe cheu imboyevi ägua vichico’ ndapeyei chietera. Ahese oimera porerecosu aviye catu vahe pëu. Pe evocoyase Tüpa seco ivate catu vahe rahir peicora. Esepia niha, ahe aviye etepri vahe ava ‘aviye ndeu’ ndehi vahe upe iyavei ava yangaipa guasu vahe upe avei. <sup>36</sup>Pe peporoparaisuereco inungar pe Ru Tüpa oporoparaisuereco yepi” ehi.

#### **Ndiyai ambuae ava seroñrosa**

<sup>37</sup>“Ndiyai, ‘Oyavi ité mbahe’ peye voño tēi ambuae ava upe. Evocoyase Tüpa, ‘Oyavi mbahe’ ndehi chira pëu. Pemocañi uca tēi eme ambuae ava. Evocoyase Tüpa ndape mocañi tēi chira. Peñeroño catu ambuae ava upe, ahese Tüpa iñero itera pëu. <sup>38</sup>Pemondose mbahe ava upe, evocoyase Tüpa omondoño itera mbahe aviye vahe pëu inungar-ra omondo pe mbahe riru pipe pëu sähambri tupri aviye vahe viña. Ëgüe ehira mbahe imondo pëu. Tüpa oicua tupri itera pëu inungar pe mbahe pemondo ambuae ava upe” ehi.

<sup>39</sup>Ipare Jesús omombehu co ambuae porombohesa: “¿Oicatu piña ñepe ndasesapisoi vahe ambuae ndasesapisoi vahe reroguata? ¡Aní eté! Esepia, oyoya voi oviapira que ivicuar pipe yuvireco viña. <sup>40</sup>Ñepe yepe niha ava oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osupitira ombohesar” ehi.

<sup>41</sup>“¿Mahera ambuae ava rembiavimi rese tēi pemahe? Iya rumo peyese rane mbahe tuvicha catu vahe pesepiara. <sup>42</sup>Ndiyai pëu, ‘Che toropñivii mbahe nde rembiavi rese’ peye vaheerā chupe. Esepia, pe peyavi guasu catu mbahe. ¡Pe Tüpaeroyasar angahu tēi peico vahe! Penose uca rane pe rembiavi tuvicha catu vahe peyesui, ahese ramo ambuae ava rembiavi tahimi vahe moingatu peicatura” ehi oporombohe.

#### **Ava recocuer icuasa sembiapo rese**

<sup>43-44</sup>“Ívira aviye vahe icuasa iha rese. Esepia, ivira aviye vahe, iha aviye avei; ivira naporai vahe, iha naporai avei no. Supi eté ndipohosai ivira sächi ati vahe sui higuera ha, iyavei ndahipohosai uva, yu pāhu sui. <sup>45</sup>Ëgüe ehi avei ava upe. Ava aviye vahe oyapo mbahe tupri. Esepia, ahe vireco mbahe tupri opíha pipe yepi. Iyavei acoi ava ndaseco pōrai vahe oyapo mbahe tēi. Esepia niha, ahe vireco mbahe tēi eté opíha pipe yepi. Esepia niha, pe piha pipe sui tēi osë pe ñehe ägua” ehi.

#### **Ava oyemoviracua vahe iyavei ndoyemoviracuai vahe Jesús roroyasave**

<sup>46</sup>“¿Mahera vo, ‘Che Yar, che Yar’ peye tēi peico cheu; ipare ndapeyapoi eté mbahe che remimombehu? <sup>47</sup>Amombehura rumo mbahe pëu uma nungar tupri ité acoi ava ou vahe cheu che ñehe rese oyapisaca vahe, iyavei oyapo ité vahe mbahe che remimombehu. <sup>48</sup>ahe inungar tupri ité acoi ava oyapo vahe güëtara ita harive yepi. Yipindar rumo oyoho picucu rane ité ita harive imopuha ägua. Yepe ahe oi upe oyepota tēi ivitu ai, amarusu reseve oinupa pñrata tēi, nomboyerocuai eté rumo. Esepia niha, vireco ité ovñracuasa. <sup>49</sup>Acoi ava che ñehengagüer rese ndoyapisacai

vahe rumo, ahe ndoyavii acoi ava oyapo vahe güetara ivi cuhi harive tēi, ndovirecoi eté ovīracuasa. Ipare amar, ivitu ai reseve oinupa pīratá, opaño omonduru; ocañi tēi eté evocoiyase” ehi Jesús ava mbohe.

### Jesús ombogüera chíhivahe sundao rerecuar Roma iguar remimboacua

**7** Jesús oñehepase ava upe oico, oso Capernaum ve. <sup>2</sup>Ahe tecua pipe sundao rerecuar ndahei vahe judío secoi vireco vahe güemimboacua güembiaisu. Ahe imbaheasi guasu ité ou; omano pota ité. <sup>3</sup>Jesús rerācua anduse rumo, oyocuai moviro tēi omboripar judío imboeteipri chupe iñehe āgua ‘toumi tēi che remimboacua mbogüera’ oyapave. <sup>4</sup>Ahe judío evocoiyase oyemboya Jesús rese yuvireco iyavei oporandu yuvireco chupe aipo ehi:

—Ore mboripar sundao rerecuar oipota nde ereyapomi tēira mbahe icatupri vahe chupe viña. <sup>5</sup>Esepia niha, ore raisu iyavei ahe teieté oyapo uca tūparo oreu nara —ehi yuvireco chupe.

<sup>6</sup>Evocoiyase oso ahe yuvirecoi vahe rupi. Virovise rumo sēta yuvireco, ahese sundao rerecuar omondo ambuae omboripar chupe. Imboripar evocoiyase omombehu iñehe aipo ehi vahe: “Che Yar, ereyemañecoi rene. Esepia niha, ndiyai eté che rēta pipe nde reique āgua. <sup>7</sup>Sese niha che teieté ndasoi nde reca. Nde ñehe pipe tēi rumo che remimboacua erembogüerara. <sup>8</sup>Esepia, che avei niha areco che cuaita. Iyavei areco sundao che voya. Eso peve, ahese ñepei upe, ahe evocoiyase oso voi eté; ambuae upe: Erio, ahese, ou voñio ité cheu. Ipare, Ereyapora co mbahe, ahese che rembiguai upe, ahe evocoiyase che reroyaño voi’ ehi ore mboripar” ehi Jesús upe yuvireco.

<sup>9</sup>Aipo oyeupe hese Jesús, “¡Too!” ehi. Ipare aipo ehi vupindareta upe:

—Supi eté ndasepiyai vahe ité co mbia che reroya tupri vahe nungar judío eta pāhuve —ehi.

<sup>10</sup>Yuviroyevipase sundao rerecuar mboripar sētave yuvireco, aheve osepia evocoi semimboacua yuvireco ocuera tuprise.

### Jesús ombogüerayevi cuña imer mano vahecuer membri cuimbahe

<sup>11</sup>Ipare voi Jesús oso tecua Naín ve, iyavei semimbohe yuvirasoño ité supi ava rehii reseve avei no. <sup>12</sup>Virovise tecua oso, osepia tehögüer ava virocuase yuvireco ñoti āgua. Ahe cuña imer mano vahecuer membri ñepei vahe ité viña. Tecua pipendar setá iteanga ava yuviraso supi. <sup>13</sup>Cuña repiase rumo, oiparaisuereco. Ipare aipo ehi chupe:

—Ereyaseho eme —ehi.

<sup>14</sup>Evocoiyase oyemboya oso, opoco tehögüer riru rese. Sese ovosii vahe evocoiyase viropitaño yuvireco chupe. Ipare aipo ehi tehögüer upe:

—Mbia chíhivahe, che aipo ahe ndeu: ¡Eñarapuha! —ehi.

<sup>15</sup>Evocoiyase omano vahecuer oñarapuha oñi iyavei oñehe no. Ichui Jesús omondo ichi upe. <sup>16</sup>Opacatu tupri ité ava oyembosiquiye sepiase yuvireco:

—Cūrítei oyemboyecua Tūpa ñehe mombehusar seco ivate vahe yande pāhuve cute —ehi yuvireco.

Iyavei,

—Tūpa niha ou güecua pītívii āgua oico —ehi avei yuvireco.

<sup>17</sup>Ipare co Jesús rerācua yandusa opacatu Judea rupi, yivirindar rupi avei no.

### Juan Oporoāpiramo vahe omondo vupindar Jesús recocuer cua uca āgua

<sup>18</sup>Juan avei oyandu opacatu co mbahe oico. Esepia niha, supindareta omombehupa co mbahe yuvireco chupe. <sup>19</sup>Evocoiyase omondo ñuvirío vupindar Jesús

upe mbahe rese porandu āgua ‘¿nde ité vo Tūpa Rembiporavo aipo sārombri ereico, anise oime tie ambuae orosāro vaheṛā?’ oyapave.<sup>20</sup> Evocoiyase oyepota yuviraso Jesús upe aipo ehi yuvireco chupe:

—Juan Oporoāpiramo vahe ore mbou ndeu co mbahe rese porandu āgua: ¿Nde ité vo Tūpa Rembiporavo ereico imombepri ereyu vaheṛā, anise ambuae piha orosāro oroico? —ehi yuvireco chupe.

<sup>21</sup> Ahe ari pipeve voi Jesús ombogüera setá ava imbaherasisa sui oico, ava carugar rerecosar sui avei no. Iyavei ava ndasesapisoi vahe setá ombogüera.

<sup>22</sup> Ahese ramo aipo ehi chupe cute:

—Peso, pemombehupa Juan upe mbahe pe rembiepia iyavei pesendu vahe: “Ndasesapisoi vahe osareco tupri cūritei yuvireco, ipāri-pāri vahe uguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pīsirosa resendar ñehesa” peyera chupe.<sup>23</sup> ¿Oviharetera acoi ava oyeroyaño vahe che rese! —ehi Juan rupindar upe.

<sup>24</sup> Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave, capihiata ivitu ombova-mbova vahe nungar piha? <sup>25</sup> Anise, ¿pesepia tie iturucuar porañete ai vahe iyemboeteise? Ēgüe ehi vahe rumo secoi mborecuar guasu guapisave yepi.<sup>26</sup> ¿‘Mara ehi secocuer’ peye vo chupe? ¿Tūpa ñehe mombehusar ité piha? Ahe ité, iyavei evocoi niha ivate catu vahe Tūpa ñehe mombehusar sui.<sup>27</sup> Ahe chupe ité Tūpa icuachiapri aracahendar pipe aipo ehi: ‘Amondora che ñehe mombehusar nde renondeve nde raperā moingatu āgua’ ehi.

<sup>28</sup> Aracahe suive ndipoi eté ivate catu vahe Juan sui. Yepe ahe ivate catu vahe viña, Tūpa mborecuarave rumo ava seco mbegüemi catu vahe ivate catu ichui.

<sup>29</sup> “Co ñehe renduse opacatu ava, opacatu guarepochi reroquasar yuvirecoi vahe avei oñeapiramo uca vahecuer Juan upe yuvireco: ‘Supi eté Tūpa aviye vahe ité’ ehi eté yuvireco cute.<sup>30</sup> Fariseo eta rumo iyavei Moisés porocuaita rese oporombohe vahe ahe noñeapiramo uca potai vahe Juan upe yuvireco, ahe viroño Tūpa remimbotar oyeupendar yuvireco.

<sup>31</sup> “¿Mbahe rese piha amboyoyara ava recocuer cūriteindar? ¿Mara ehi piha secocuer? <sup>32</sup> Ahe inungar chíhivahe iguayi tēi vahe ocar rupi. Ipare oñehe pucu-pucu omboripar upe yuvireco aipo ehi: ‘Oromoñehe tēi mimbí pēu, ndapepivoi eté rumo; iyavei orosapucái tēi sapucaisa viharēhisa resendar pēu, ndapeyasehoi avei’ ehi.<sup>33</sup> Esepia, ou Juan Oporoāpiramo vahe oico. Ahe ndohui vahe pan iyavei ndoihui vahe uva ricuer. Pe evocoiyase, ‘Co mbia carugar vireco vahe’ peye tupri tēi chupe no.<sup>34</sup> Coiye che ayu, Ava Riquehir, acaru iyavei aihu tupri avei. Ipare, ‘Co mbia icaru guasu ai vahe secoi, iihu guasu ai vahe avei no’ peye cheu; ‘Ava angaipa viyar mboripar tēi iyavei ava guarepochi reroquasar mboripar tēi’ peye avei cheu.<sup>35</sup> Ava Tūpa mbahecuasa vireco vahe rumo icuasara sembiapo rese” ehi.

### **Fariseo Simón serer vahe rētave Jesús secoi**

<sup>36</sup> Fariseo Simón serer vahe oñehe Jesús upe: “Terecarumi che piri” ehi. Jesús evocoiyase oso sētave uguapi oī mesave.<sup>37</sup> Ahese cuña angaipa viyar evocoi tecua pendar secoi vahe oyandu ichose Simón rētave icaru āgua.

Sese viroyepota aheve mbahe sīacua vahe siru pipe seraso sepīrusu vahe chupe. <sup>38</sup> Aheve oyasehó ite oñenopiha Jesús pive iyavei güesai pipe opa tupri omoaqui ipi. Ipare opaño omombiru oha apri pipe ichui, iyavei oipirupite, oipiyere avei mbahe sīacua vahe ipi rese. <sup>39</sup> Sepiase fariseo, ipihañemoñeta tēi: “Co mbia Tūpa ñehe mombehusar itese, oicuaño itera co cuña opoco vahe oyese ndipihai vahe viña” ehi tēi fariseo chupe. <sup>40</sup> Evocoyase aipo ehi fariseo upe:

—Simón, amombehu potami mbahe ndeu —ehi.

—Aviye Porombohesar, emombehu ru cheu —ehi.

<sup>41</sup> Evocoyase Jesús aipo ehi chupe:

—Ñuvirío mbia oime virocua guarepochi mbia guarepochi mondosar sui yuvireco. Ñepe virocua guarepochi quiniento tupri mboraviqui repirã ichui. Ambuae evocoyase cincuenta rupive virocua. <sup>42</sup> Ipare ndoicatu irise ité imboyeve ãgua yuvireco chupe, evocoi mbia guarepochi mondosar iñeroño chupe yuvireco —ehi—. Esãha, emombehu cheu, ¿uma evocoyase osaisu catura mbia guarepochi mondosar? —ehi fariseo upe.

<sup>43</sup> —Cheu ndoyavii guarepochi virocua catu vahe ichui —ehi Simón.

—Taa, supi eté aipo ere —ehi Simón upe.

<sup>44</sup> Evocoyase omahe cuña rese aipo ehi Simón upe:

—¡Emahe co cuña rese! Aiquesse acoi nde rēta pipe, nde nderembouimi eté i che pisei ãgua cheu; co cuña rumo güesai pipe oyosei che pi. Ipare omombiru oha apri pipe ae no. <sup>45</sup> Iyavei nde ndache rovarupitei eve; co cuña rumo, acoi nde rēta pipe che reique ramomiseve che pirupite voi eté.

<sup>46</sup> “Nde nderemondo mbahe sīacua vahe che ãca rese; co cuña rumo opa

tupri voi oipichi mbahe sīacua vahe che pi rese. <sup>47</sup> Sese co cuña opa oipisi ñerosa oangaipa guasu rese. Esepia, che raisú iteanga. Acoi ava upe nañerosa tuprii vahe rumo, ahe ndoporoaisu tuprii avei” ehi.

<sup>48</sup> Ahese aipo ehi cuña upe:

—Oime nde angaipa upe ñerosa ndeu —ehi.

<sup>49</sup> Evocoyase ambuae ava ichohopri uguapi vahe yuvinoi aheve, ahe aipo ehi oyeupe yuvireco:

—¡Uma pīha co mbia iñero vahe ité angaipa upe! —ehi.

<sup>50</sup> Jesús rumo aipo ehiño cuña upe:

—Nde yeroyasa pipe erepisi pīsirosa. Sese eso tupriño eico —ehi.

### Cuña oipitívii vahe Jesús yuvireco

**8** Ipare Jesús uguata opacatu tecua rupi, omombehu ñehesa aviye vahe Tūpa mborerecuasa resendar oico. Doce vahe apóstol supive yuvirecoi. <sup>2</sup> Cuña avei yuviraso supi, ahe ombogüera vahecuer carugar rerecosa sui imbaherasisa sui avei no. Ahe ipãhuve avei María seci, Magdalena serer yoapisa vahe, ahe ichui osē vahecuer siete tupri carugar; <sup>3</sup> iyavei Juana Cuza rembireco, ahe mbia Herodes mbahe rese ñangarecuar; Susana iyavei ambuae setá cuña oipitívii mbahe güembiereco pipe yuvireco.

### Yembohesa mbahe miti rese tecocuer mboyoyasa

<sup>4</sup> Setá ava yuvinose tecua yacatu rupi pipe sui Jesús repia ãgua yuvireco. Ipare oñemonuha guasuse yuvireco, ahese Jesús setá mbahe rese omboyoyayoya oporombohe aipo ehi: <sup>5</sup> “Ñepe mbia osē omaheti oico. Ahe otiapi-apiise mbahe rãhii oso, moviro oiti peri rupi. Ahe opa tēi oicambe yuvireco, iyavei vírai opa tēi yuvirohu. <sup>6</sup> Iyavei moviro tēi oiti ivi nayanai vahesave ita pãhuve.

Sese cūrítei sori; opaño rumo ipiru. Esepia niha, ivi nañaquii chupe. <sup>7</sup>Iyavei ambuae oiti yu pāhuve. Ipare oyoya tupri sori yuvireco; yu rumo opaño oyopi. <sup>8</sup>Ambuae rumo oiti ivi aviye vahe-save. Ipare sorise, iha vai eté yuvireco; ahe iha retacuer amove cien tupri ité ñepeipei mbahe miti sui osē” ehi.

Aipo ohe pare, Jesús oñehe pīratá iteanga aipo ehi: “¡Acoi ava osenducua pota vahe che ñehe, toyapisacaño sese!” ehi ava rehii upe.

### **¿Mahera pīha co yembohesa imboyoyasa ambuae mbahe rese?**

<sup>9</sup>Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi. <sup>10</sup>Evocoiyase omboyevi chupe: “Pēu Tūpa oicua uca ité mbahe ndicuasai vahe omborerecuasa resendar; ambuae ava rumo ambohe tēi ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvireco’ viya” ehi.

### **Jesús omombehu tupri yembohesa mbahe tīsa resendar**

<sup>11</sup>“Co yembohesa resendar aipo oyapave aipo ehi: Mbahe rāhii ahe inungar Tūpa Ñehengagüer; <sup>12</sup>iyavei mbahe rāhii peri rupi seitipri, ahe inungar acoi ava osendu tēi vahe Tūpa Ñehengagüer yuvireco oyapave. Ipare rumo ou vīrai chupe, ahe inungar caruguar ou vahe chupe opaño oyaracua mocañi Tūpa Ñehengagüer sui ‘toviroya eme iyavei toñepisiro eme yuvireco’ oyapave tēi. <sup>13</sup>Acoi mbahe rāhii seitipri ita mahugüer rupi, ahe inungar acoi ava osendu tēi vahe Tūpa Ñehengagüer yuvireco iyavei oipisi tupri oviharetasa pipe yuvireco viña no. Ahe rumo inungar co mbahe miti ndovirecoi vahe guapo ovīracua āgua; viroya raimi tēi yuvireco. Oyepotase rumo mbahe tēi

chupe, oyepepi voñño yuvireco ichui. <sup>14</sup>Acoi mbahe rāhii seitipri yu pāhu rupi, ahe inungar acoi osendu tēi vahe. Ipare rumo oyemboyepepi uca mbegüeño ambuae mbahe rese opihañemoñetá iteangasa pipe tēi, ombahe eta rese iyavei güemimbotarai mbahe tēi potasa pipe avei. Ēgüe ehi ahe ava inungar mbahe miti ndihai vahe ité. <sup>15</sup>Acoi mbahe rāhii seitipri rumo ivi aviye vahe-save, ahe inungar ava vireco vahe opihañemoñetasa aviye vahe iyavei oye-moingatu voi Tūpa Ñehengagüer rese oyapisaca āgua yepi; viroya tupri ité no; yuvirecoiño ité sese. Ēgüe ehise, oyapo mbahe aviye vahe yuvireco” ehi.

### **Yembohesa tataendi resendar**

<sup>16</sup>“Ndiyai eté ava upe guataendi omoendise omoha vahe que mbahe pipe, ‘Tamondo che rupavrive’ ndehi eté chupe; osupiño ivate imoi opacatu oi pipe yuviroique vahe resape āgua. <sup>17</sup>Esepia, ndipoi eté mbahe ñomipri, ndayasepiai vahe rā curi. Iyavei yaposa vahe imombehupirēhi, icuasano itera curi.

<sup>18</sup>“Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroya oyese, ichui serocuasano itera” ehi oporombohe.

### **Jesús si, tivireta avei**

<sup>19</sup>Ichui Jesús si iyavei tivireta oye-pota secosave yuviraso. Ndiyai eté rumo chupe yuviraso vahe rā yuvireco ava rehii sui. <sup>20</sup>Oime rumo ambuae ava imombehusar chupe,

—Nde si, nde rivireta reseve nde repia pota tēi ocarve yuvireco —ehi chupe.

<sup>21</sup>Ahe rumo aipo ehi chupe:

—Acoi ava osendu vahe che Ru Ñehengagüer yuvireco, viroya tupri vahe

avei, ahe che si, che rivri yuvirecoi — ehiño Jesús chupe.

**Jesús omombituhu i ohitu  
vahe, ivitu ai reseve**

<sup>22</sup>Ñepei ari Jesús oha carite pipe güemimbohe eta reseve. Ipare aipo ehi: —Yaso peve ipa rovai —ehi.

Evocoyase ahe yuvirasos. <sup>23</sup>Yuviroguata viteseve, oqueño Jesús ou. Ahese ipa pipe aviyeteramo tēi ivitu ai omboha guasu-guasus carite pipe i, omondo pota ité ipive viña.

<sup>24</sup>Evocoyase semimbohe yuvirasos imomba aipo ehi chupe:

—¡Porombohesar! ¡Porombohesar!  
¡Yande rerasora moco carite ipive!  
—ehi yuvireco.

Ahese omahe. Ipare oñehe pīrata ivitu ai upe iyavei i ohitu vahe upe: “¡Pepituhu!” ehi. Aheseve voi opituhu tupri.

<sup>25</sup>Evocoyase aipo ehi güemimbohe eta upe:

—¿Mahera vo ndapeyeroyai che rese?  
—ehi.

Ahe rumo osiquiyeño, ndoyembovihaiño iyavei oporandu-randu tēi oyeupe yuvireco:

—¡Mara ehi vahe pīha co mbia! Esepia niha, ivitu ai, para guasu avei omboyeroa —ehi tēi oyeupe yuvireco.

**Mbia Gerasa iguar vireco  
vahe carugar oyese**

<sup>26</sup>Coiye oyepota yuvirasos Gerasa ivi rese cute, ahe ambuae ipa coti ivi Galilea rovai. <sup>27-29</sup>Aheve mbia tecua iguar carugar vireco vahe secoi. Aracahe suive nani tupri ité secoi iyavei ndopitai vahe ité oi pipe yepi; ěgüe ehi rumo ahe tehögüer ruvipa rupindar tēi secoi. Setá rupi carugar ombohe ité sereco yepi. Yepe ava oipocuhacua-acua carena pipe sereco, ipi rupi avei no ‘tovirasos iri eme carugar’ oyapave yuvireco chupe viña, ahe rumo ombosando-sandoño ité

iyavei carugar omoñemi ucaño ava porēhisa rupi sereco. Evocoyase Jesús osēse carite pipe sui, osovañichi ahe mbia. Sepiase rumo, ahe mbia oñenopiha voi oso sovai oñehe pīrata chupe:

—¡Eyepēpi che sui, Jesús, Tūpa seco ivate catu vahe Rahir! ¡Che mombarai-sui rene eve! —ehi. Esepia, Jesús opa oyocuai carugar sereco ‘tosē ichui’ oyapave.

<sup>30</sup>—¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri carugar yuviroique yaviterve.

<sup>31-32</sup>Oimese rumo cuchi setá ocaru vahe ivitri ruambesave, carugar evocoyase oporandu chupe aipo ehi: “Toroiqueñomi tēi co cuchi aviterve” ehi yuvireco chupe ‘tayande mondo eme cañi tēisa apirēhi vahe pipe’ oyapave viña. “Peiqueño sese” ehi carugar upe. <sup>33</sup>Ahese opa yuvinoses mbia sui yuviroique cuchi aviterve cute. Aheseve voi cuchi opa yuvinoña yuvirasos ivivate sui ipa pipe. Aheve ipive opa tēi eté ocañi yuvireco.

<sup>34</sup>Cuchi rārosar osepiase ahe mbahe yuvireco, opa yuvinoña yuvirasos co mbahe mombehu tecua pipe ava upe, cove rupi avei no. <sup>35</sup>Ipare setá ava yugüeru aipo mbahe oime vahecuer repia. Oyepotase rumo secosave yuvirasos, aheve osepiase ahe mbia carugar rerecosarer oguapi oñ ñipiimi, oyemondes tupri, yaracua tupri avei oico. Ahese oyembosiquiye tēi yuvireco. <sup>36</sup>Acoi ava osepiase vahecuer, ahe opa mbahe omombehu yuvireco co mbia carugar rerecosar cuera agüer. <sup>37</sup>Ahese opacatu ava Gerasa pendar, yivirindar avei Jesús upe, “Esiri cohaves sui” ehi yuvireco. Esepia niha, osiquiyē iteanga yuvireco ichui. Evocoyase oha carite pipe. Ipare osoño. <sup>38</sup>Yipindar rumo evocoi mbia carugar vireco vahecuer, “Tasomi tēi

nde rupi” ehi viña. Ahe rumo, “Epitaño” ehi.

<sup>39</sup>—Eyevi nde rêtave, emombehu opacatu mbahe Tüpa oyapo vahecuer nde rese —ehi.

Ahe mbia evocoyase oso opacatu tecua rupi, Jesús oyeupe mbahe apo agüer mombehu.

**Jesús ombogüera Jairo rayri iyavei  
cuña iturucuar rese opoco vahe**

<sup>40</sup>Oyevise Jesús ipa rovai oso, aheve ava rehii oviharetesa pipe oipisi tupri yuvireco. Esepia niha, ava opacatu ité osãro yuvireco. <sup>41</sup>Ahese Jairo serer vahe oyepota oso Jesús upe, evocoi judío tûparo rese yangarecuar secoi vahe. Ahe mbia oñenopiha sovai oso, oporandu chupe ‘tosomi tēi che rêtave che rayri mbogüera’ oyapave. <sup>42</sup>Esepia niha, vireco guayri ñepeimi vahe ité, doce araviter vireco vahe. Ahe omano potami eté ou.

Osose Jairo rêtave, aheve peri rupi ava rehii yuvirasoño supi; oyemboti tupri ité yuvireco. <sup>43</sup>Ahe ipāhu rupi oime cuña doce araviter rupi suvi yepiyereyere vahe. Opa-opa tēi omondo ombahe ocuera āgua repirā yepi; ndocuerai eté rumo. <sup>44</sup>Ahe cuña evocoyase oyemboya oso saquicuei coti opoco iturucuar popi rese. Ipare ahe pipeve voi opituhu suvi ichui. <sup>45</sup>Evocoyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoyase aipo ehi chupe:

—Porombohesar, ava rehii mo oyemboya nde rese iyavei nde moañi-añii yuvireco opacatu rupi —ehi.

<sup>46</sup>—Che rumo aicua oime ava opoco vahe che turucuar rese. Esepia, ayandu che pīratasa osēse che sui —ehi Pedro upe.

<sup>47</sup>Ahe cuña ndoicatu oñemi. Sese oririi oñenopiha sovai. Oyemombehu chupe opacatu ava rovaque: “Che apoco nde turucuar rese. Esepia, ‘Acuera tuprira apocose iturucuar rese’ ahe ndeu” ehi. <sup>48</sup>Ahese aipo ehi cuña upe:

—Che rayri, erecuera tupri ité. Esepia niha, che rese ereyeroya ité. Sese eso tupriño —ehi cuña upe.

<sup>49</sup>Jesús ñeche viteseve, aheve oyepota aheve mbia Jairo rēta sui aipo ehi Jairo upe oso:

—Omano nde rayri cute. Eremañeco tēi iri rene Porombohesar —ehiño Jairo upe.

<sup>50</sup>Evocoyase ñeche renduse aipo ehi Jairo upe:

—Aní eresiquiye; nde che rese yeroyasa pipe ité nde rayri ocuerayevira —ehi.

<sup>51</sup>Oyepotase Jairo rêtave oso, aheve ndomoingue uca potai eté ava oyeupi. Pedro, Santiago, Juan iyavei cuñatai yesupa upeño oipota seique āgua. <sup>52</sup>Aheseve opacatu ava oyaseho atí, ndoyembovihal tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

<sup>53</sup>Ava rumo opuca ete-eteño seroy aēhisave yuvireco. Esepia niha, ahe oicua ité imanose yuvireco viña. <sup>54</sup>Evocoyase oipopisi cuñatai. Ipare aipo ehi chupe:

—¡Cuñatai, eñarapuha! —ehi.

<sup>55</sup>Ahe evocoyase oñarapuha voi eté ocuerayevi. Ipare Jesús, “Pembocarui” ehi iyepota upe. <sup>56</sup>Iyepota evocoyase, “¿Mara ehi rutei piha co?” ehi tēi yuvireco chupe. Jesús rumo omombehu chupe: “Ndapemombehui chietera que ñepeí ava upe” ehi.

**Jesús doce güemimbohe omondo Vu  
Tüpa mborerecuasa  
resendar mombehu ägua**

**9** Jesús opa omonuha güemimbohe doce vahe oyeupe. Ipare omondo opíratasa opacatu upe carugar ambuae-ae tēi vahe imboyepepi ägua ava sui iyavei ava mbogüera ägua imbaherasisa sui. <sup>2</sup>Opa omondo Vu Tüpa mborerecuasa resendar mombehu ägua, ava imbaheasi vahe mbogüera ägua avei. <sup>3</sup>Yipindar rumo aipo ehi chupe:

—Ndaperasoi chira mbahe pe guatasa rupi: que mbococa, mbahe riru, tembihu, que guarepochi avei no. Perasora rumo ñepegi güeraño pe turucuar; ndahei chira ñuvirío peraso. <sup>4</sup>Pepitami ranera ñepegi oi pipe güeraño tecua yacatu peico. <sup>5</sup>Accoi ava ndape moingue uca potaise güeta pipe yuvireco, peyepipiñora ichui iyavei peipipetera pe pi sui ivi cuhi ‘toicua Tüpa ñemoirosa oyeupendar yuvireco’ pe hesave —ehi güemimbohe eta mondo.

<sup>6</sup>Evocoyase opa yuvinose yuviraso, iyavei oñemosai opacatu tecua rupi omombehu Tüpa Ñehengagüer pīsirosa resendar yuvireco iyavei ombogüera-güera ité ava imbaherasisa sui opacatu oguatasa rupi yuvireco.

**Herodes, “¿Mara ehi  
pīha?” ehi Jesús upe**

<sup>7</sup>Co mborerecuar guasu Herodes oyandu opacatu mbahe Jesús rembiapo. Evocoyase, “¿Mara ahera pīha?” ehi tēi. Esepia niha, aipo, “Juan ocuerayevi” ehi yuvireco chupe. <sup>8</sup>Ambuae aipo ehi: “Tüpa ñehe mombehusar Elías, ahe tēi oñemoporēhi iri” ehi yuvireco. Ambuae aipo ehi: “Que ñepegi Tüpa ñehe mombehusar aracahendar revo, ahe tēi ocuerayevi” ehi yuvireco viña. <sup>9</sup>Herodes rumo aipo ehi:

—Che niha ayasia uca Juan āca —ehi—. ¿Uma rerācua pīha evocoyase ayandu? —ehi tēi.

Sese Herodes osepia pota ité Jesús.

**Jesús oyopoi cinco mil cuimbahe**

<sup>10</sup>Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepipi ava rehii sui, viraso ivi iporupirēhisave tecua Betsaida cotive. <sup>11</sup>Ahe ava rehii rumo oyanduse yuvireco, yuvirasoño saquicuei. Evocoyase, “Perioño” ehi chupe. Ipare oñehe Vu Tüpa mborerecuasa rese ava upe iyavei ombogüerapa ava imbaherasisa sui.

<sup>12</sup>Caharuse co doce semimbohe oyemboya yuvireco sese aipo ehi chupe:

—¿Ndiyai vo eremondopa ava, topituhu yuvireco iyavei toseca mbahe güemihura tecua-tecuami cōi vahesa rupi? Esepia niha, cohava ndipoi eté mbahe —ehi yuvireco chupe.

<sup>13</sup>Ahe rumo aipo ehi güemimbohe eta upe:

—Pe pemondora mbahe semihura yuvireco —ehi.

Semimbohe aipo ehi yuvireco chupe:

—Poyandepomi tēi rumo pan orovireco, ñuviriomi tēi avei pira, toroso ayase co ava opacatu remihura rerocua —ehi yuvireco chupe.

<sup>14</sup>Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi —ehiño.

<sup>15</sup>Ēgüe ehi semimbohe yuvireco chupe. Ipare oguapi opacatu ava yuvireco. <sup>16</sup>Evocoyase oipisi poyandepo pan iyavei ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe imondo ägua yuvireco.



<sup>17</sup> Evocoyase opacatu ava ocaru vahe ihītaropa tēi yuvireco. Ipare semimbohe omboapipopa doce tupri iruova sembihu rumbirer yuvireco.

**Pedro, “Jesús, Tūpa Rembiporavo Poropīsiosar secoi” ehi**

<sup>18</sup> Ñepeí ari pipe Jesús oyeruqui ahe ae güemimbohe pāhuve. Ahese oporandu güemimbohe upe:

—¿Mara ehi vo ava oñehe yuvireco che rese? —ehi.

<sup>19</sup> —Amove ava, “Juan Oporoāpiramo vahe” ehi yuvireco ndeu; ambuae, “Elías” ehi yuvireco ndeu, iyavei ambuae, “Aviyeteramo que ambuae Tūpa ñehe mombehusar aracahendar ocuerayeví” ehi yuvireco ndeu —ehi.

<sup>20</sup> Evocoyase oporandu güemimbohe upe:

—Pe no, ¿“Ava co secoi” peye ru pe cheu no? —ehi.

—Nde niha Tūpa Rembiporavo Poropīsiosar ereico —ehi Pedro imboyeví chupe.

**Jesús omombehu omano āgua**

<sup>21</sup> Ahe rumo aipo ehi güemimbohe eta upe: “Pemombehui rene Tūpa Rembiporavo che recosa ava upe” ehi. <sup>22</sup> Iyavei aipo ehi chupe:

—Che, Ava Riquehír, che paraisu itera, iyavei opacatu judío rerecuareta, pahí rerecuar ivate catu vahe iyavei Moisés porocuita rese oporombohe vahe remiamotarēhi aicora. Ahe avei che yuca ucara yuvireco; mbosapí ari rupi rumo acuerayevira —ehi.

<sup>23</sup> Ipare aipo ehi opacatu upe:

—Acoi oguata pota vahe che rupi, topoi mbahe güemimbotar tēi aposa sui iyavei inungar-ra curusu rese ovosiira viña, toyemoingatu voi che recocuer rese oparaisu āgua ari yacatu rupi iyavei toguata tupri che rupi. <sup>24</sup> Esepia, acoi ava güetecuer tēi raisupar ocañi tēi itera;

acoi ava omocañi tēi vahe rumo güetecuer che recocuer rese, ahe oñepisirora. <sup>25</sup> Esepia, ¿aviye ai angahu piña ava upe opacatu mbahe co ivi pipendar pisi āgua tēi, ahe ae tēi omocañise güetecuer yuvireco viña? <sup>26</sup> Esepia, acoi ava yuvinochi ai vahe che sui iyavei che ñehen-gagüer sui avei no, che avei, Ava Riquehír, ēgüe ahera ichui acoi ayevice che reco pīratasa pipe, che Ru reco pīrata porañetesa pipe avei sembiguai rehíi íva pendar maranehi reseve curi. <sup>27</sup> Supi eté, oimera amove cohava ava nomano vitei chivaherā, osepia rane itera ouse Tūpa mborerecuasa yuvireco curi —ehi.

**Jesús ñecuñaro agüer**

<sup>28</sup> Ocho ari pare Jesús oyeupi ivitri rese oso oyerure āgua. Pedro, Santiago iyavei Juan ahe viraso oyeupi. <sup>29</sup> Oyerure vitesese, oñecuñaro sepiaca. Iturucuar evocoyase sendí, morochí eteanga. <sup>30</sup> Ahese ñuvirío ava oyemboyecua yívii imoñeta yuvinocha. Evocoi ava yuvirecoi vahe ahe Moisés, Elías avei. <sup>31</sup> Oyere tupri sendigüer iporañetesa yuvireco sese, iyavei co ñuvirío mbia oñehe imano āgua rese yuvireco chupe: “Nde niha ereyemomborara nde mano āgua Jerusalén pipe eico” ehi yuvireco chupe. <sup>32</sup> Yepe Pedro, ondugüer reseve sopesí eteanga yuvireco viña. Aviyeteramo tēi opa sopesíi yuvireco ichui. Ahese osepia Jesús porañetesa yuvireco iyavei co ñuvirío mbia yuvinocha vahe yívii no. <sup>33</sup> Evocoi mbia oyepepise ichui yuvireco, ahese Pedro aipo ehi chupe:

—Ore mbohesar, javiye ai eté cohava yaico! Toroyapo mbosapí teyupami: ñepeí ndeu nara, ambuae Moisés upe, ambuae evocoyase Elías upe nara —ehi.

Pedro rumo ndoicuai eté aipo ohesa. <sup>34</sup> Iyavei ñehe vitesese, aviyeteramo tēi iporēhi íva quiha, oyopipa tupri ité. Evo-

coiyase osiquiye tēi yuvireco. <sup>35</sup> Ipāhuve oyeendu ñehesa aipo ehi vahe: “Co che Rahir, che Rembiporavo ité; peyapisaca catu ñehe rese” ehi.

<sup>36</sup> Opase osendu co ñehesa yuvireco, ahese osepia Jesús, ahe ae ihāise yuvireco. Semimbohe rumo oyeupe tēi ovireco yuvireco; ndomombehu vitei eté ava upe mbahe osepia vahecuer yuvireco.

### **Jesús ombogüera chihivahe carugar rerecosar**

<sup>37</sup> Ahere ayihive, ogüeyise ivitri sui yuvireco, setá ava oyugüeru Jesús rovaichi yuvireco. <sup>38</sup> Ahese mbia ava pāhuve aipo ehi pīrata voi eté:

—Porombohesar, ereyapomira mbahe icatupri vahe cheu viña. Esepia, che rahir ñepeimí vahe ité; <sup>39</sup> carugar rumo opoco sese, omoase pucu-pucu uca yepi iyavei omoēōha-ōha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui. <sup>40</sup> Amombehu tēi niha nde remimbohe upe ‘tomboyepemí tēi carugar ichui’ che yapave viña; nomboyepemí eté rumo ichui yuvireco —ehi.

<sup>41</sup> Ahe omboyeví:

—¡Too, ndapeyeroya tupri vitei eté che rese, co coti tēi vite pe pīhañemoñetasa! ¿Mbovi rupi rutei vo aico vitera pe pāhuve che ñemosasa pipe? Eru nde rahir cohove cheu —ehi ahe mbia upe.

<sup>42</sup> Chihivahe oyemboyase rumo sese, carugar omboviapi voi imondo ivive, imoēōha iri. Jesús rumo oñehe pīrata carugar upe imose āgua chihivahe sui. Ahese chihivahe ocuera tupri ité. Ipore omboyeví tu upe. <sup>43</sup> Ahese opacatu ava, “¡Mara ehi rutei!” ehi tēi yuvireco Tūpa pīratasa rembiapo aviye vahe repiase.

### **Jesús omombehu iri omano āgua**

Opacatu ava ndoyembovīhai viteseve yuvireco, ahese aipo ehi güemimbohe upe:

<sup>44</sup> —Pesendu tupri che ñehe; peresarai eme ichui: che, Ava Riquehir, imondopri aicora che amotarēhimbar povrive —ehi.

<sup>45</sup> Semimbohe rumo ndosenducuai eté oyeupe ñehesa yuvireco. Esepia niha, Tūpa ndoipotai eté senducua āgua chupe; osiquiye chupe oporandu āgua yuvireco yepi.

### **¿Ava vo seco ivate catu vahe?**

<sup>46</sup> Coiye semimbohe eta omboipi oyeecopi-copi yuvireco ‘¿ava ité pīha ivate catu vahe rā curi?’ oyapave.

<sup>47</sup> Jesús rumo oicuaño ipihañemoñetasa yuvireco. Evocoyase oipisi chihivahemi seru oipive imoha. <sup>48</sup> Ipore aipo ehi güemimbohe eta upe:

—Acoi ava oipisi vahe co chihivahemi nungar che rer pipe sereco, che ité che pisi yuvireco; iyavei acoi ava che pisi vahe, oipisi aveira che mbousar. Esepia, acoi ava seco mbegüemi catu vahe pe pāhu pendar, ahe aviye catu vahe —ehi.

### **Acoi yande mboyoyasar, ahe ndahei yande amotarēhisar**

<sup>49</sup> Evocoyase Juan aipo ehi chupe:

—Ore mbohesar, orosepia niha mbia ombogüera vahe carugar pīratasa sui ava nde rer pipe oico; ore rumo ndoroipotai chupe evocoiya seco āgua. Esepia niha, ndahei yande rupindar secoi —ehi.

<sup>50</sup> Jesús rumo,

—¡Aní ndapeipotai chupe! —ehi—. Esepia niha, evocoi nungar ava ndahei yande amotarēhisar; ahe rumo yande mboyoyasar —ehi güemimbohe eta upe.

**Jesús oñehengata Santiago  
upe, Juan upe avei**

<sup>51</sup> Virovise rumo ari ivave Jesús so água, ahese ahe aipo ehi: “Yaso ru Jerusalén ve cūrīteī” ehi. <sup>52</sup> Evocoiyase omondo ava güenonera. Ahe yuvirasotecua Samaria ivi rupi ipituhu água moingatu viña; <sup>53</sup> Samaria iguar rumo nomoingue potai eté güētave yuvireco. Esepia, oicua Jerusalén ve ichose yuvireco. <sup>54</sup> Co mbahe naporai vahe repiase rumo, semimbohe Santiago iyavei Juan operandu yuvireco chupe:

—Ore Yar, toromboumi tata iva sui co ava mocañi água —ehi yuvireco chupe viña.

<sup>55</sup> “¡Aní!” ehi oyemboyere chupe.

<sup>56</sup> Ipare yuvirasos ambuae tecuave.

**Oguata pota vahe Jesús rupi**

<sup>57</sup> Yuvirasose peri rupi aipo ehi mbia Jesús upe:

—Che Yar, che nde rupi aso pota opacatu nde guatas rupi —ehi.

<sup>58</sup> Ahe rumo aipo ehi:

—Aguara vireco güētara, vīrai avei vireco guaiti; che rumo, Ava Riquehir, ndarecoi que che rēta che pituhu água —ehi chupe.

<sup>59</sup> Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatara nde rupi —ehi.

<sup>60</sup> —Aní —ehi—. Acoi omano vahe nungar ahe ae toñeñetiño yuvireco; nde rumo eso, emombehuño ñehesa Tūpa mborerecuasa resendar ava upe —ehi.

<sup>61</sup> Evocoiyase ambuae aipo ehi chupe no:

—Che Yar, che aguata pota nde rupi; yipindar rumo aso ranera che rētave mbahe moingatu che so água —ehi.

<sup>62</sup> —¡Aní! —ehi ahe mbia upe—. Esepia, inungar acoi oipisi vahe ivi mboyeresa imohivi tupri água, omahese rumo

guaquicuei coti, evocoi nungar naporai Tūpa mborerecuasave yuviroique va-herã —ehi.

**Jesús oyocuai setenta  
y dos tupri güemimbohe**

**10** Ipare yande Yar oiporavo setenta y dos ava ñepeipei tecua rupi ñuvirío-río güenonera.

<sup>2</sup> Yipindar rumo aipo ehi: “Supi eté mbahe imonuhapirã setá iteanga; sese oporaviqui vahe rumo moviromi tēi. Sese peporandu mbahe miti Yar upe, tombou ava imonuha água” ehi. <sup>3</sup> “Peso, opomondo ovesami nungar ava mbahe mimba oñaro vahe nungar pāhuve. <sup>4</sup> Perasoi rene mbahe riru iyavei guarepochi siru reseve. Ndapemondu güei chiveira pe pitaqui; iyavei aní pepita ‘avirave’ apo ava upe peri rupi. <sup>5</sup> Acoi peiquese que oi pipe, yipindar rumo peyapo ranera: ‘Avirave. Tūpa tape rovasa’ peyera. <sup>6</sup> Acoi aheve oimese ava aviye vahe, ahe oipisira Tūpa porovasasa; anise evocoiyase ndipoi chira porovasasa chupe nara. <sup>7</sup> Acoi pe pise, aheve ité pepitañora; pecarura iyavei peihura ahe sembiereco. Esepia, ava poraviquise imboepisa chupe. Sese ndapeguatai chira ambuae ava rēta rupi-rupi tēi. Ñepeipei oi pipe güeraño pepitañora. <sup>8</sup> Acoi que tecuave peyepotase, ahe pendar pe repia potañose yuvireco, acoi ahe ombouse mbahe yuvireco tapehu, pehuñora ichui. <sup>9</sup> Ahe pendar imbaheasi vahe evocoiyase pembogüerara, iyavei aipo peyera chupe: ‘Tūpa mborerecuasa namombriimi pe sui’ peyera. <sup>10</sup> Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera: <sup>11</sup> ‘¡Co pe recua pipendar ivi chimborer oya vahe ore pi rese oroipipete oreyesui, peicua catu, ore hesa pipe. Peicua tupri rumo Tūpa mborerecuasa namombriimi pe sui’ pey-

era chupe. <sup>12</sup>Supi eté acoi ari cañi oyepotase, oimera Tūpa ñemoirosa ahe tecua pendar upe ivate catu vahe ava tecua Sodoma pendar sui” ehi güemimbohe eta upe.

### **Opacatu tecua ndiporeroyai vahe**

<sup>13</sup>“¡Peparaisu ava tecua Corazín pendar, pe avei peparaisu tecua Betsaida pendar! Esepia, acoi poromondiisa pe pãhuve yapopri yaposara yipive tecua Tiro, Sidón ve viña, ahe tecua pendar aracaheve anga omondera turucuar viharêhisa resendar, tanimbu avei omondora oãca rese oangaipa mboasisa pipe yuvireco viña no. <sup>14</sup>Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pipe coiye. <sup>15</sup>Pe avei no tecua Capernaum pendar, ¡pemoha co ivave pe reco ãgua viña! ¡Pe mombosapara rumo ivicuar ipicucu catu vahesave!

<sup>16</sup>“Acoi ava oyapisaca vahe pe ñehe rese yuvireco, ahe evocoyase oyapisaca avei che ñehe rese. Iyavei acoi ava pe mboyepepiño vahe oyesui, ahe evocoyase che avei che mboyepepi oyesui yuvireco. Acoi ava rumo che mboyepepiño vahe oyesui, ahe evocoyase che mbousar avei omboyepepiño oyesui” ehi güemimbohe upe.

### **Oyevipa iri ava setenta y dos vahe**

<sup>17</sup>Oyevipase ava setenta y dos vahe, oviharetessave aipo ehi yuvireco chupe:

—¡Ore Yar, caruguar avei eté niha ore mboyeroya etepri yuvireco nde rer pipe! —ehi.

<sup>18</sup>Evocoyase aipo ehi güemimbohe eta upe:

—Taa, asepia ité niha caruguar rerecuar oviapise iva sui overa vahe nungar. <sup>19</sup>Che niha amondo pĩratasa pẽu peguata vagherã mboi

iyavei mbahe rumbiquĩape hari rupi opacatu pe amotarêhisar pĩratasa reroyi ãgua, que mbahe pe momaraẽhi ãgua avei. <sup>20</sup>Peyemboviharetei rene carugareta pe mboyeroyase. Iya rumo peyemboviha pe rer iva pendar icuachiapri rese —ehi güemimbohe eta upe.

### **Jesús oviharete**

<sup>21</sup>Ahe pipeve voi Jesús, Espíritu Santo rese, vorivetesava pipe aipo ehi: “Che Ru, che oromboetei. Nde niha iva Yar, ivi Yar avei no. Esepia niha, ereñomi co mbahe ava oyesui tẽi mbahe oicua vahe sui iyavei co ivi pipendar ava imbahe-cua vai vahe sui avei no. Eremboyecua rumo co mbahe ava ndoyembohe tuprii vahe upe nde rese oyeroyase. Ahe niha ereipota ité, che Ru” ehi.

<sup>22</sup>“Opacatu mbahe che Ru ombou cheu. Iyavei ndipoi ava che cua vahe tahir che recose; che Ru güeraño ité rumo che cua. Ndipoi avei che Ru oicua tupri vahe yuvireco no; che güeraño ité aicua. Iyavei acoi que ava upe aicua uca potase, aicua uca tupri aveira” ehi ava eta upe.

<sup>23</sup>Evocoyase omahe güemimbohe eta rese, chupe güeraño aipo ehi: “Perorivete catu co mbahe pesepia vahe rese. <sup>24</sup>Esepia niha, setã etepri ava Tūpa ñehe mombehusar yuvirecoi vahe iyavei mborerecuar guasu eta araca-hendar osepia pota tẽi mbahe pe rembiepia; ndosepia eté rumo yuvireco. Osendu pota tẽi co pe remiendu yuvireco; ahe rumo ndosendui avei yuvireco” ehi güemimbohe upe.

### **Jesús porombohesa**

#### **Samaria iguar recocuer sui**

<sup>25</sup>Iyavei no Tūpa porocuita rese oporombohe vahe oso Jesús upe secoãha ãgua, mbahe rese oporandu:

—Porombohesar, ¿mara ahera vo vichico teco apirēhi vahe rereco āgua? —ehi chupe.

<sup>26</sup> Ahe omboyevi:

—¿Mara ehi vo Moisés porocuita icuachiapri pipe? ¿Mara ehi vo ereyero- quise ipipe? —ehi oporombohe vahe upe.

<sup>27</sup> Evocoyase oporombohe vahe omboyevi:

—“Eresaisura nde Yar Tūpa opacatu nde pihá pipe, opacatu nde recocuer pipe, opacatu nde pīratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuita —ehi chupe.

<sup>28</sup> —Supi eté —ehi—. Eremboyevi tupri ndeyeupe porandusa cheu. Eremboaviyese evocoi, ahese ererecora tecovesa apirēhi vahe —ehi co mbia upe.

<sup>29</sup> Co mbia rumo oyeepi pota. Sese aipo ehi chupe:

—¿Ava vo aipo che cotindar secoi? —ehi.

<sup>30</sup> Evocoyase omboyevi chupe:

—Oime mbia Jerusalén sui oso vahe Jericó ve. Ahe peri rupi yuvinose ava ndipihai vahe yuvireco chupe. Ahe virocuapa imbahe yuvireco ichui, iturucuar opacatu reseve; iyavei yuvirocuarocua yuvireco sese. Ipare oyuca seni seya peri rupi yuviraso. <sup>31</sup> Ahese judío pahi ou ahe peri rupi. Evocoi mbia repiase rumo, co coti rupi oñacuasaño oso. <sup>32</sup> Ēgüe ehi tupri avei ambuae mbia pahi pītīviisar levita, osepiase, oñacuasa tupriño avei oso no. <sup>33</sup> Ipare rumo mbia sepia potapirēhi Samaria iguar oso ahe peri rupi avei. Ahe osepiase, oiparaisuereco. <sup>34</sup> Evocoyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipare osupi güeimba harive oaprive, viraso ava quesave. Aheve ihañeco

sese. <sup>35</sup> Ahere ayihive Samaria iguar ose, omondo guarepochi ahe pendar oi yar upe. Ipare aipo ehi chupe: “Esāro tuprimi tēi co ava cheu. Acoi ndehañeco catuse sese, amboepi catu irira che yevise ndeu” ehi sēta vahe upe. <sup>36</sup> Indó, ¿uma vo co evocoyase mbosapi yuvirecoi vahe oyemboava acoi ava ndipihai vahe remimombaraisu upe? —ehi.

<sup>37</sup> Evocoyase ahe mbia aipo ehi:

—Acoi mbia oiparaisuereco vahe iparaisu vahecuer —ehi.

—Supi eté —ehi chupe—. Eyapo tupri avei nde co nungar eico —ehi Jesús co Moisés porocuita rese oporombohe vahe upe.

### Jesús oso Marta iyavei María rētave

<sup>38</sup> Ipare Jesús güemimbohe eta reseve oguata vite oyepota cuña recosave yuviraso, ahe cuña rer Marta. Ahe omoingue tupri güēta pipe. <sup>39</sup> Icupihir evocoyase María serer. Ahe oguapi Jesús pive iñehe rendu oī. <sup>40</sup> Marta rumo oyembopihavīracua opacatu mbahe rese oico. Ipare oyemboya oso Jesús rese opihavīracuasa pipe aipo ehi chupe:

—Che Yar, ¿aviye ai vo evocoi che cupihir chini tēi nde piri che poraviqui viteseve? Emombehu chupe, tou, tache pītivii rane —ehi chupe.

<sup>41</sup> Omboyevi rumo Marta upe aipo ehi:

—Marta, Marta, ¿mahera vo ereyemañeco etepri tēi setá mbahe apo āgua eico? <sup>42</sup> Iya rumo ñepeí mbahe yaposa. Co nde cupihir oiporavo ahe mbahe aviye catu vahe oyeupe che ñehe renduse; ndipoi chietera que ava virocuva va- herā ichui —ehi Jesús Marta upe.

### Jesús ombohe güemimbohe eta yerure āgua rese

**11** Ñepeí ari Jesús oyerure. Iyerure pare semimbohe aipo ehi chupe:

—Ore Yar, ore mbohemi tēi ore yerure āgua rese eve inungar Juan om-

bohe güemimbohe eta sereco yepi —ehi chupe.

<sup>2</sup>—Aviye —ehi—. Peyeroquise, aipo peyera:

‘Ore Ru Tüpa, ivave ereico vahe, imboeteipri nde rer tasecoi.

Tou nde mborerecuasa oreu.

Tayaposa nde remimbotar co ivi pipe, iva pendar nungar.

<sup>3</sup>Embou ore rembihu ari yacatundar oreu.

<sup>4</sup>Iyavei ndeñero ore angaipa rese oreu.

Esepia niha, ore oreñero opacatu ore amotarêhimbar upe.

Ore mboangaipa ucai rene eve, ore renose catu mbahe tēi sui eve’ peyera —ehi

<sup>5</sup>Iyavei aipo ehi no:

—Inungar co perecora pe mboripar viña. Ipare pesora ahe sētave pītu mbīter rupi aipo peyera chupe: ‘Che mboripar, emboumi tēi mbosapi pan cheu tamboevire ndeu. <sup>6</sup>Esepia, ambuae che mboripar oyepota ou che rētave; ndarecoi eté rumo mbahe amondomi vaherā chupe’ peyera chupe. <sup>7</sup>Ipare ahe, ‘Che mañeco tēi rene eve. Esepia, opa ayoquenda, iyavei co che rahir opa aropituhu seru. Sese ndiyai apūha mbahe mondo ndeu’ ehiñora pēu viña. <sup>8</sup>Supi eté, yepe nopuhai chietera mbahe mondo pēu pe mboripar secose viña, opūhaño itera rumo ‘tache mañeco iri eme’ oyapave. Ipare omondño itera opacatu mbahe pe porandusa pēu. <sup>9</sup>Sese aipo ahe pēu: Peporandura mbahe rese Tüpa upe, ahese omboura pēu; peseca ahe mbahe, ahese peyosura; inungar pemota oquenda, êgüe peyera peyeroquisa pipe Tüpa upe, ahese imboisara mbahe mbou água pēu. <sup>10</sup>Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyerokuva

pipe omota vahe oquenda Tüpa upe, chupe imboisara.

<sup>11</sup>“Oimese tahi vahe pe pāhuve, tahir oporanduse pira rese vu upe, ¿omondora pīha mboi tēi guahir upe viña? <sup>12</sup>anise, ¿omondora pīha oporanduse mbahe rupiha rese, mbahe rumbiquiāpe tēi chupe viña? <sup>13</sup>¡Aní! Esepia, pe yepe ava ndaseco pōrai vahe peico viña, pe rahir upe rumo pemondño ité mbahe aviye vahe. ¡Tahetru pe Ru iva pendar omondo catura Espiritu Santo acoi ava oyeupe porandusar upe!” ehi güemimbohe eta upe.

### “Jesús vireco carugar pīratasa oyese” ehi tupri tēi ava yuvireco

<sup>14</sup>Ambuae ari pipe, Jesús osepia mbia carugar nomoñehengatui vahe. Evo-coiyase omose carugar ichui. Ahe-seve voi iñehengatu. Ipare ava rehii sepia, ndoyembovīhai tēi yuvireco. <sup>15</sup>Amove rumo ava aipo ehi tēi yuvireco: “Beelzebú, carugar rerecur pīratasa pipe revo omboyepepi carugar oico” ehi tēi yuvireco chupe.

<sup>16</sup>Ambuae ava secoãhasa pipe oporandu yuvireco chupe: “Eyapo ru mbahe nde rembiapo iva pendar nde recocuer cua água” ehi tēi. <sup>17</sup>Ahe rumo oicuãño ipihañemoñetas. Evocoyase aipo ehi chupe:

“Que mborerecur guasu povri pendar ovava-vavase oyeupe oyeamotarêhisave yuvireco, ahese evocoi mborerecur pīratasa ocañi tēira. Iyavei ava omu rese ae oyeamotarêhi vahe, oyemocañi aveira yuvireco no. <sup>18</sup>Êgüe ehi avei niha carugar. Esepia, serecur omboyepepise opovri pendar, ovavara oyeupe yuvireco viña. Ahese oyemocañi tēira yuvireco. Co ñehesa aipo ahe pēu. Esepia pe, ‘Beelzebú pīratasa pipe tēi opa omose carugar ava sui oico’ peye tēi cheu. <sup>19</sup>Êgüe ahese rumo viña, ¿ava pīratasa pipe ru evocoyase pe voya om-

boyepepi carugar ava sui? Pe voya ae omboyeuara pe ñehe pe rembiavi yuvireco pëu. <sup>20</sup>Che rumo Tüpa pīratasa pipe carugar amboyepepi ava sui. Sese cūrītei Tüpa mborerecuasa oyepota ité pëu.

<sup>21</sup>“Inungar oime ava ipīrata etepri vahe, iyavei vireco oyeroyasa. Ipipe osāro güēta opacatu mbahe ipipendar avei icañiēhi āgua. <sup>22</sup>Acoi ouse rumo ambuae ipīrata catu vahe chupe, ahe osecoreroyise, opa virocua iyeroyasa ichui. Evocoyase güembierocua ahe opa viraso oyeupe.

<sup>23</sup>“Acoi ava ndache mboyoyai vahe, ahe che amotarēhimbar yuvirecoi; iyavei acoi ava ndosecai vahe ava cheu, ahe omosai tēi yuvireco che sui” ehi.

### **Carugar oyevi iri güeco agüerve**

<sup>24</sup>“Acoi osēse carugar ava sui, oguata tēi ivi ipiru vahe rupi opituhu āgua reca. Ipare rumo ndoyosuise, ipihañemoñeta oyeupe, ‘Ayevi irira che reco agüerve vicho’ ehi. <sup>25</sup>Aheve oyevice, osepia iri secocuer inungar oi sahuvapri tupri. <sup>26</sup>Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui” ehi Jesús ava rehii upe.

### **Tüpa Ñehengagüer viroya vahe sovasapri secoira**

<sup>27</sup>Oñehe viteseve aipo mbahe rese, cuña ava rehii pāhu pendar oñehe pīrata aipo ehi:

—¡Evocoi mbia sui ereha vahe iyavei nde mboacua vahe, ahe sovasapri tasecoi! —ehi chupe.

<sup>28</sup>Ahe rumo aipo ehi:

—¡Acoi osendu vahe ité che Ru Tüpa Ñehengagüer iyavei viroya vahe ité, ahe sovasapri secoira che Ru Tüpa rovaque! —ehi ahe cuña upe.

### **Ava eta ndaseco pōrai vahe oporandu poromondiisa rese yuvireco**

<sup>29</sup>Ava rehii oyere ati vitese Jesús rese yuvireco, ahe aipo ehi: “Pe cūrīteindar ava ndaseco pōrai vahe, peporandu tēi poromondiisa che recocuer cua āgua rese. Che rumo namboyeucai chira ambuae poromondiisa pëu. Jonás recocuer rese güeraño opomomahenduhara. <sup>30</sup>Inungar Jonás poromondiisa secoi ava Nínive pendar upe, ēgüe ehi aveira niha Ava Riquehīr reco pipe oimera poromondiisa ava cūrīteindar upe. <sup>31</sup>Acoi ari cañi pipe cuña mborerecuar guasu irohi coti secua vahe porandusave omombehura co ava cūrīteindar cañipa āgua. Esepia, ahe ou amombri ivi sui Salomón mbahecuasa rendu āgua; cūrītei rumo oime ivate catu vahe cohave Salomón sui. <sup>32</sup>Iyavei ari cañi pipe ava tecua Nínive pendar porandusave omombehura ava cūrīteindar cañipa āgua. Esepia niha, omboasise oangaipa, oyevi Tüpa upe yuvireco Jonás omombehuse Tüpa Ñehengagüer chupe; cūrītei rumo oime ivate catu vahe Jonás sui pe pāhuve” ehi.

### **Tesapesa yande retecuer resendar**

<sup>33</sup>“Ndayañomi chira tataendi que imoendi imoi; ndayamondoī chiaveira que mbahevrive. Iyacatu rumo yamondora ivate tataendi rendave ‘tosesape opacatu ava oi que vahe oi pipe’ yande yapave. <sup>34</sup>Iyavei pe resa inungar tataendi pe retecuer upe. Esepia, aviyese pe resa, opacatu pe retecuer upe osesape. Acoi imarase rumo, pe retecuer pītumimbi vahe nungar tēi. <sup>35</sup>Sese peicua catu co poroesapesa pereco vahe, tape rereco eme pītumimbi vahe nungar. <sup>36</sup>Co supi eté vahe osesape tuprise opacatu pe pihave, ndipoise que pītumimbisa nungar mbahe ipipe, evocoyase ahe

inungar tataendi osesape vahe opacatu pe recocuer pipe. Ahese ndipoi que p̄itu vahe p̄eu” ehi.

**Jesús omombehu fariseo  
iyavei Moisés porocuita rese  
oporombohe vahe recocuerai**

<sup>37</sup> Opase oñehe Jesús, fariseo viraso giētave imbocarú. Oiqese s̄etave oso, oguapi mesave oĩ. <sup>38</sup> Ocaru renondeve ndoyemboise rumo, ahese fariseo ndoyembovihai t̄ei nomboaviyeise judío porocuita. <sup>39</sup> Ahe rumo aipo ehi fariseo upe:

—Inungar igua riru iyavei tembihu riru icupe rupi t̄ei yoseipri, ipipe rumo iquihá opitaño ité, ãgüe ehi tupri avei pe recocuer pe monda raisave mbahe-mbahe t̄ei pe reco pipe. <sup>40</sup> ¡Pe ndayaracuái vahe peico! ¿Ndapeicuái vo pe rete aposar, pe piha aposar avei? <sup>41</sup> Sese pemondo porerecosa ava iparaisu vahe upe pe recat̄ehīhisa pipe. Evocoyase ipipe sui opacatu imoatirombri peicora.

<sup>42</sup> “¡Peparaisu pe fariseo! Esepia, yepe pe remití sui pemondo peyacatu ñepeipei diez vahe sui T̄upa upe viña, pe rumo ndaperoyai teco ñvisa iyavei peseyaño t̄ei T̄upa poroaisusa. Iyacatu rumo peyapora evocoi mbahe pe porerecosa sui pe poīhisa pipe viña.

<sup>43</sup> “¡Peparaisu pe fariseo! Esepia, peipota pe renda porañete catu vahe pe guapi ãgua t̄uparo pipe, iyavei peipota p̄eu opacatu ‘avirave’ oyapora ava pe mboeteisave ocar rupi yuvireco.

<sup>44</sup> “¡Peparaisu! Esepia, pe recocuerai inungar tehõgüer ruvípa icuaẽhise ava oguata ihari rupi yuvireco” ehi chupe.

<sup>45</sup> Evocoyase Moisés porocuita rese oporombohe vahe,

—Porombohesar —ehi—, aipo eremombehu vahe pipe niha ava ore amotar̄ehiño yuvireco —ehi.

<sup>46</sup> Ahe rumo aipo ehi:

—¡Peparaisu avei pe Moisés porocuita rese oporombohe vahe! Esepia, pemondo porocuita yavai vahe ava upe; pe rumo evocoyase ndapeip̄it̄iviimi eté ahe ava imboaviye ãgua rese yuvireco.

<sup>47</sup> “¡Peparaisu! Esepia, pemoingatu T̄upa ñehe mombehusar ruvípagüer peico T̄upa mboeteisa angahu pipe t̄ei. Pe ramoi teieté rumo oyuca yuvireco. <sup>48</sup> Evocoyase pemboyecua co pe ramoi eta pihañemoñeta agüer secocuer moña pipe peico. Esepia, ahe oyuca T̄upa ñehe mombehusar yuvireco. Pe evocoyase c̄uritei pemoingatu vite suvípagüer peico.

<sup>49</sup> “Sese T̄upa ombahecuasa pipe aipo ehi: ‘Amondora che ñehe mombehusar, apóstol avei ndiporeroyai vahe upe. Ahe ip̄ahu pendar oyucara yuvireco. Iyavei ambuae mara-mara t̄ei virecora yuvireco’ ehi. <sup>50</sup> Esepia, ava ndiporeroyai vahe c̄uriteindar upe ité omondora oñemoirosa opacatu oñehe mombehusar yucagüer rese aracahe suive, c̄uriteindar avei oyucase yuvireco. <sup>51</sup> Abel yuca agüer suive oyepotara Zacarías yuca agüerve oso. Ahe oyuca t̄uparo marañehi rocar mbahe reropov̄ehesa rovai. Supi eté aipo ahe p̄eu: T̄upa opara omondo oñemoirosa ahe yuca agüer rese ava ndiporeroyai vahe c̄uriteindar upe curi.

<sup>52</sup> “¡Peparaisu pe Moisés porocuita rese oporombohe t̄ei vahe! Esepia, pe mbahecuasa aviye soquendapri pereco ava sui. Pe niha ndaperoyai, iyavei ambuae ava upe ndapeipotai seroya ãgua” ehi chupe.

<sup>53</sup> Ipare Jesús os̄e oso ichui. Ahese Moisés porocuita rese oporombohe vahe iyavei fariseo eta oñemoiró iteanga yuvireco sese. Ahe omañeco t̄ei, oporandu-randu mbahe rese yuvireco chupe, <sup>54</sup> osecoãha-ãha t̄ei mbahe pipe ‘toyavi angahu oñehe yandeu’ ohesa pipe yuvireco.



### Fariseo recocuer rese Jesús oñehe

**12** Ahe pipeve avei ava oñemonuha atí iteanga oyembotí tuprí oye-mombo guasu-guasú yuvireco. Yipindar Jesús güemimbohe upe rane omboiپی oñehe: “Peñearo tuprí fariseo pan mboapeposa nungar sui. Esepia, ahe ndoyavii supí tuprí vahe viña; ndahei eté rumo. <sup>2</sup>Esepia, yaposa vahe imombehipirēhi cūritei icuasaño itera curi. Iyavei mbahe ñomipri icuasaño aveira no. <sup>3</sup>Supi eté opacatu mbahe pemombehu vahe pītumimbisave, ahe sendusa tuprira arí pipe coiye; iyavei acoi mbahe pemombehu vahe peyuepeñomi ‘tosendu eme ambuae ava’ pe hesa pipe, serosapucaisara oi harive opacatú ava rovaque” ehi.

### ¿Uma sui pīha siquiyesara?

<sup>4</sup>“Iyavei aipo ahe pēu, che mboripareta: ndapesiquiyei chira acoi ava pe yuca potasar sui. Esepia, ipare ndoicatu iri ambuae mbahe apo āgua pēu. <sup>5</sup>Che rumo amombehura pēu uma sui pesiquiyera: acoi oicatu vahe omborerecuasa pipe pe yuca pare pemondo tata guasuve. Ahe ichui eté pesiquiyera.

<sup>6</sup>“Pe pemondo poyandepo vīrai ñuvirío guarepochi rupivemi tēi yepi. Tūpa rumo ndasesarai eté que ñepeí sui. <sup>7</sup>Tūpa niha oicua ñepeí-peí yande ha retacuer. Sese, pesiquiye eme; pe niha ivate catu vahe ité peico opacatu vīrai sui” ehi.

### “Che aroya ité Jesucristo” ehi vahe opacatu ava rovaque

<sup>8</sup>“Acoi ava ‘che aroya Jesús’ ehi vahe opacatu ava rovaque, che avei, Ava Riquehir, ‘Co che reroyasar secói’ aipo ahera che Ru upe sembiguai rovaque. <sup>9</sup>Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoiyase, ‘Co ndahei che reroy-

asar secói’ ahe aveira che Ru Tūpa upe sembiguai rovaque” ehi.

<sup>10</sup>“Iyavei opacatu oñehe-ñehe tēi vahe che, Ava Riquehir, rese, ahe chupe oimeño ñeroisa. Acoi que ava ñehe-ñehe tēi vahe rumo Espíritu Santo amotarēhisave, ahe chupe ndipoi chietera ñeroisa” ehi.

<sup>11</sup>“Acoi pe amotarēhisar che recocuer sui tēi pe rerasose porandusave pe recoāha āgua yuvireco, anise mborerecuar mbahe moingatusar rovai, que ambuae mborerecuareta upe avei no, ‘¿Mbahe pīha amombehura?’ ndapeyei chira. <sup>12</sup>Esepia niha, ahe pipeve voi Espíritu Santo pe mbohera aviyeteramo tēi mbahe mombehu āgua rese” ehi güemimbohe eta upe.

### Ñearosa mbahe pota raisa sui

<sup>13</sup>Ñepeí mbia ava rehii pāhu pendar aipo ehi Jesús upe:

—Porombohesar, emombehumi che riquehir upe, tomboyahomi tēi mbahe che mombahesa cheu —ehi.

<sup>14</sup>Ahe rumo omboyeveí chupe:

—Che mboripar, che ndachecuaítai mbahe moingatu āgua, mbahe mboyaho-yaho āgua avei —ehi ahe mbia upe.

<sup>15</sup>Ipare aipo ehi:

—Peñearo tuprí opacatu mbahe pota raisa sui. Esepia niha, ndahei mbahe rereco atí āgua pe recocuer —ehi.

<sup>16</sup>Ipare omboyoya ambuae mbahe rese imbohe: “Oime mbia mbahe yar, iha tuprí ai eté semiti. <sup>17</sup>Ahese ipihañemoñeta oico oyeupe: ‘¿Mara ahera pīha che rembipoho rereco?’ ehi tēi. ‘Ndareco iri eté yapocatu āgua’ ehi. <sup>18</sup>Ipare ipihañemoñeta cute: ‘Aicua mbahe che rembiaporā. Opara aroyi tembihu rēta. Ichui ayapo irira ambuae tuvichá catu vahe. Aheve ayapocatura che remiti rāhii opacatu mbahe areco vahe avei no. <sup>19</sup>Evocoiyase aipo ahera cheyeupe:

Che mboripar, oime setá mbahe cheu ar-aviter momba-momba água; sese cūrítei apituhura vichico, acarura, acahura iyavei ayemboviaharetera no, ahera' ehi. <sup>20</sup>Tūpa rumo aipo ehira chupe: 'Mbia, nandearacuai eté eico, co pītu pipeve voi eté eremanora. Co mbahe nde rembi-apocatu, ¿ava mahera pīha evocoyase?' ehira chupe. <sup>21</sup>Ēgüe ehi eté niha que ava oyeupeñomi tēi mbahe omonuha ati vahe, iparaisu rumo Tūpa rovaque" ehi ahe mbia upe.

### Tūpa osāro opacatu guahir

<sup>22</sup>Ipare aipo ehi Jesús güemimbohe upe: "Co amombehura pēu: Ndapeyemomahenduha guasu ai chira pe remihura rese pe recove água, pe turucuarā rese tēi avei no. <sup>23</sup>Yande recovesa rumo aviye catu vahe tembihu sui; yande retecuer avei aviye catu turucuar sui no. <sup>24</sup>Pesepia vīrai: nomahetii vahe, nomonuhai vahe avei, ndovirecoi vahe avei mbahe rāhii rēta yuvireco. Tūpa rumo omoime mbahe itohu. ¡Pe rumo ivate catu vahe ité peico vīrai sui! <sup>25</sup>Ndipoi eté que ñepei pe pāhu pendar oicatu vahe opihañemoñetá iteangasa pipe tēi güecocuer mbosasaviño água. <sup>26</sup>Supi eté ndapeicatuise yapo, ndiyai peyemomahenduha guasu ai mbahe rese.

<sup>27</sup>"Pemahecua ru mbahe potri caha pipendar rese: ndoporaviquii eté iyavei ndoipiai oturucuarā. Iyavei no yepe mborerecuar guasu Salomón vireco setá mbahe iporañete vahe aracahe viña, iturucuar catupri güer rumo ndahoyoyai mbahe potri catupri güer rese. <sup>28</sup>Tūpa niha omboporañete raimi tēi mbahe potri caha pipendar. Ichui sapisapaño horno pipe. ¡Ahe rumo omondo catura turucuar pēu, pe ava nimbahe reroya tuprii vahe! <sup>29</sup>Sese, '¿Mbahe pīha yahura, mbahe pīha yamondera?' ndapeyei chira pe yemomahenduha

guasu aisa pipe. <sup>30</sup>Esepia, ava Tūpa reroyasarēhi co ivi pipendar aipo nungar mbahe reseño tēi ipihañemoñeta yuvireco yepi. Pe Ru Tūpa rumo oicua ité pēu mbahe ipane vahe. <sup>31</sup>Aviye catu rumo pesecara pe Yar Tūpa povrive pe reco água, ahese omboura que mbahe ipane vahe pēu" ehi.

### Ivave mbahe eta oime vahe yandeu

<sup>32</sup>"Aní pesiquiye, che ovesa nungar, yepe pe moviromi tēi peico viña, pe Ru rumo oporoaisusa pipe oipota opovrive pe rereco água. <sup>33</sup>Pemondopa mbahe pereco vahe ava oipota vahe upe. Ipare pemondo sepri avei iparaisu vahe upe. Ahe yapocatusa ivave mbahe riru ndituyui vahe nungar pipe. Aheve ava imonda rai vahe ndoiqueei chira ñomi água pe sui iyavei mbahe rasoi nomomaraí chiaveira. <sup>34</sup>Esepia, pe mbahe pe rembiereco setá catu vahesa rupi-rupi pe pihañemoñeta yepi" ehi.

### Peyemoingatu Tūpa Rahir yevi água

<sup>35</sup>"Peyemoingatu tupri che yevi água. Inungar tataendi ndogüei vahe, pemboyecua tupriño ité che recocuer pe recocuer pipe ava upe. <sup>36</sup>Peico imboacuapri güerecuar osāro vahe nungar mendasa sui iyeveise, oquenda imotase, omboi voi vahe yuvireco chupe. <sup>37</sup>Aviye itera serecuar upe osepiase iyemoingatu voi; evocoyase serecuar ae niha ihañecora sese, omboguapira mesave imbocarú. <sup>38</sup>Yepe serecuar oyeopotara pītu mbiter ou viña, anise añihiveive, ahe rumo osāroño itera chupe imboi água yuvireco. Evocoyase serecuar aviye ai etera chupe. <sup>39</sup>Peyapisaca tupri co rese: acoi oi yar oicuase mbahe hora imonda vahe yepota água, ahese opitara imonda vahe rāro güēta pipe sui mbahe renoseēhi água. <sup>40</sup>Ēgüe peye aveira peyemoingatu che yevi água. Esepia niha, che, Ava Riquehir, aporo-

sapiha tēira vitu curi” ehi Jesús viroy-  
asareta upe.

**Mbiguai omboaviye vahe ocuaita  
iyavei nomboaviyei vahe**

<sup>41</sup> Evocoyase Pedro oporandu Jesús  
upe aipo ehi:

—Che Yar, ¿oreuñomi pīha  
erembobehu co porombohesa  
eremboyoya vahe ambuae mbahe rese,  
opacatu upe tie? —ehi.

<sup>42</sup> Evocoyase ombovevi Pedro upe  
aipo ehi: “Acoi ava mbahe rese ñan-  
garecuar omboaviye tupri vahe ocuaita,  
yaracua vahe avei, ahe chupe sere-  
cuar oseya icuaitarã güëta pipendar  
rese hañeco ãgua ‘tembihu tomondo che  
rēta pipendar upe che porocuita rupi’  
ohesave. <sup>43</sup> Acoi omboaviyese ocuaita,  
ahese oviharetera güerecuar yevise.

<sup>44</sup> Supi eté niha, serecuar oyocuiria  
opacatu ombahe rese hañeco ãgua.

<sup>45</sup> Ahe mbiguai rumo ‘ndoyepota vitei  
chira revo che rerecuar’ oya omboetasa  
cuimbahe iyavei cuña omboipi mara-  
mara tēi sereco iyavei ocaru, oiñu tēi  
osavaipo-ipoño avei oico. <sup>46</sup> Ipare rumo  
serecuar oyepotara imahemohaēhiseve;  
ahese omombaraisu catura inupa sereco,  
inungar acoi ndiporeroyai vahe rerecosa  
yepi” ehi.

<sup>47</sup> “Acoi mbiguai oicua tēise  
mbahe güerecuar remimbotar,  
noyemoingatuise rumo iyavei  
ndoviroyaise oico, ahe evocoyase  
serecuar oinupara. <sup>48</sup> Acoi mbiguai  
nomboaviyei vahe ocuaita icua  
tupriēhisa pipe, nañemoirosa rutei chira  
chupe. Esepia niha, acoi imondosa catu  
vahe icuaitarã, porandusa catura chupe.  
Acoi oyeroya catu vahe, oporandu catu  
aveira sese” ehi.

**Jesús reroyasa pipe  
sui oimera yeamotarēhisa**

<sup>49</sup> “Che ayu tata nungar yavai vahe  
reru ãgua co ivi pipendar upe ‘joyandu  
tarahu yuvireco cute viña!’ viya.

<sup>50</sup> Aique ranera rumo mbahe tēi che  
recoāhasa pipe, jēgüe ahera che paraisú  
itera imboaviye ãgua! <sup>51</sup> ‘Mbahe tupri  
ai revo güeru co ivi pipe’ ndapeyei  
chira cheu. Ēgüe ehi rumo che ayu che  
sui ava yeamotarēhi ãgua. <sup>52</sup> Esepia  
niha, co pipe suive ité que poyandepo  
tupri revo oñemu yuvirecoi vahe  
amove oyeamotarēhira yuvireco che  
recocuer sui: mbosapi oyamotarēhira  
ñuvirío vahe, ñuvirío vahe evocoyase  
oyamotarēhira mbosapi vahe yuvireco.

<sup>53</sup> Que ava oyamotarēhira guahir,  
anise tahir evocoyase oyamotarēhira  
vu; cuña oyamotarēhira omembri,  
imembri evocoyase oyamotarēhira osi;  
sovayar oyamotarēhira vovayar” ehi  
güemimbohe upe.

**Iva pendar poromondiisa  
mboyecuaa**

<sup>54</sup> Ipare Jesús aipo ehi ava rehii upe:  
“Pe pesepiase mbahe pītu ari sosa coti  
sui opūhase, ahese, ‘Oquira’ peye. Ēgüe  
ehi eté oqui. <sup>55</sup> Iyavei acoi ivitu oipeyuse  
irohi coti sui, ahese, ‘Sacú iteangara’  
peye. Ipare Ēgüe ehi eté. <sup>56</sup> ¡Pe Tüpa  
reroyasar angahu tēi peico vahe! Pe  
niha peicua mbahe iva rese oyecua  
vahe tēi iyavei ivi rese mbahe oyecua  
vahe tēi mombehu, ¡mahera ru ndape-  
icuai peyeupe mbahe cūrítei oime va-  
herã mombehu peico!” ehi.

**Peñero pe amotarēhimbar upe**

<sup>57</sup> “¿Mahera napesāha ranei pe ae ité  
co mbahe supi eté vahe? <sup>58</sup> Acoi que ava  
nde amotarēhisar nde soho ucuse nde  
mondo ãgua mborecuar rovai, emoin-  
gatu tupri voi mbahe eico chupe tenon-

deve nde rerasoēhi āgua sovai; anise, mborerecuar nde mondora ava naporai vahe rarōsar upe. Ahe evocoiyase nde roquendara. <sup>59</sup>Supi eté nderesēi chitera acoi eremboepipase voi eté eresēra ichui” ehi ava rehii upe.

### Aviye catu ité yañecuñaro

**13** Ahe pipeve avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovēhese mbahe mimba yucapri yuvireco chupe. Ahe suvi oye-seha mbahe mimba ruvi rese.

<sup>2</sup>Ipare Jesús aipo ehi chupe: “Pemoha co pe: Mbahe tēi oime vahe evocoi mbia Galilea pendar upe, yangaipa guasu catu rese ambuae güecua pendar sui ēgüe ehi mbahe chupe viña. <sup>3</sup>¡Aní rumo! Acoi ndapemboasiise pe angaipa Tūpa upe pe yevi āgua, pe avei opara pecañi tēi. <sup>4</sup>Peroya avei acoi ava dieciocho tupri yuvirecoi vahe omanopase Siloé torre oviapise iharive, ‘Ahe yangaipa catu yuvireco ambuae ava Jerusalén pipendar sui’ peye viña no. <sup>5</sup>Aní rumo; acoi ndapemboasiise pe angaipa Tūpa upe peyevi āgua, pe avei opara pecañi tēi” ehi.

### Yembohesa ivira higuera ndihai vahe resendar

<sup>6</sup>Evocoiyase Jesús omombehu mbahe omboyoya oporombohe ambuae mbahe rese aipo ehi: “Oime mbia vireco vahe ivira higuera oco pipe. Setá ari ahe oso sepia ‘¿iha pīha?’ oyapave. Ndosecai eté rumo iha sese. <sup>7</sup>Ahese aipo ehi mbia oco rārosar upe: ‘Esendu, che ayu pīhi tēi higuera ha reca mbosapī araviter rupi. Ndasepiai eté rumo que ñepe iha sese yepi’ ehi. ‘Eyasiapa; ndiyai ihāi tupri tēi cohave’ ehi. <sup>8</sup>Ico rarōsar rumo omboyevi chupe aipo ehi: ‘Che rerecuar, ēgüe tehiño vite tēi rane co araviter; amonguhira ivi chupe. Ipare amondora

ivi sū vahe mbahe repochi resendar sese. <sup>9</sup>Ahese revo ambuae araviter ihara cute; anise ité rumo, ereyasia ucaño itera’ ehi ico rārosar güerecuar upe” ehi Jesús ava mbohe.

### Jesús ombogüera cuña oyecuhapami vahe mbituhusa ari pipe

<sup>10</sup>Ñepe mbituhusa ari pipe Jesús oporombohe judío tūparo pipe. <sup>11</sup>Aheve oime cuña imbaheasi vahe, dieciocho araviter rupi ahe mbaherasisa vireco, carugar tēi omboyepami uca sereco. Sese ndoicatu opūha tupri oguata. <sup>12</sup>Osepiase rumo Jesús, “Erio” ehi chupe.

—Cuña, cūrítei nanembaheasi iri eico cute —ehi.

<sup>13</sup>Evocoiyase omondose opo sese, aheseve voi cuña oyemohivi. Ipare omboetei Tūpa oico. <sup>14</sup>Judío tūparo rerecuar rumo oñemoiro ahe cuña mbogüerasa rese mbituhusa ari pipe. Sese aipo ehi ava eta upe:

—Oime niha seis ari mboraviqui āgua; ahe ari pipe peyura peposano āgua, ndahei chira mbituhusa ari pipe —ehi.

<sup>15</sup>Evocoiyase ahe mbia upe omboyevi aipo ehi:

—Pe Tūpa reroyasar angahu tēi peico vahe, ¿nomboihui vo pe pāhu pendar acoi güeimba tivi iyavei guaricu mbituhusa ari pipe yuvireco yepi no? <sup>16</sup>Co rumo cuña, Abraham suindar Carugar omombaheasi vahe dieciocho araviter suive sereco, ¿ndiyai eté pīha evocoiyase imbogüerasa mbituhusa ari pipe? —ehi tūparo pendar rerecuar upe.

<sup>17</sup>Aipo ehise, opacatu yamotarēhisar yuvinochi tēi yuvireco ichui. Ambuae ava rumo oyembovihanō opacatu Jesús rembiapo osepiase yuvireco.

### Yembohesa mostaza rāhii suindar

<sup>18</sup>Evocoiyase Jesús aipo ehi avei: “¿Mbahe nungar pīha Tūpa povri pendar, iyavei mbahe rese vo amboyoyara?

<sup>19</sup>Oyoya tupri ité mostaza rāhii rese, inungar acoi mbia oñoti vahe oco pipe. Ichui ocuacua, tuvichá iteanga. Ahe sāca rese vīrai rehii oyapo guaitirā” ehi oporombohe.

### **Yembohesa pan mboapeposa sui**

<sup>20</sup>Evocoiyase Jesús aipo ehi iri: “¿Mbahe rese pīha amboyoyara Tūpa povri pendar? <sup>21</sup>Oyoya tupri co pan mboapeposa rese, acoi cuña comboyeseha tupri vahe mboasapi sāhambri trigo cuhi rese opacatu imboapepo āgua yepi” ehi oporombohe.

### **Jesús peri icāhimi vahe nungar**

<sup>22</sup>Ipare Jesús osoño Jerusalén ve, opīta-pīta tecua yacatu rupi oporombohe oico. <sup>23</sup>Ahe supi ichose, ñepe mbia oporandu chupe aipo ehi:

—Che Yar, ¿supi eté pīha moviromi tēi ava oñepisirora yuvireco? —ehi.

Ahe evocoiyase omboyeve chupe:

<sup>24</sup>—Peyemoviracua tupri catu peique āgua oquendipi cāhimi rupi. Esepia niha, supi eté setá ava osāha tēira yuviroique vahe rā ahe oquenda rupi yuvireco viña, ndoyuviroique catui chira rumo yuvireco. <sup>25</sup>Supi eté ahe inungar oi yar ouse oquenda mboya viña. Amove ava evocoiyase ocarve yuvirecoi vite vahe omota tēira oquenda, ‘Ore yar, emboimi tēi oreu’ ehi tēira yuvireco. Ahe rumo aipo ehiñora chupe: ‘Aní, ndopocuai vahe rumo pe’ ehiñora chupe. <sup>26</sup>Evocoiyase ahe aipo ehi tēira yuvireco: ‘Ore niha orocarua vahe, oroihu vahe nde piri, iyavei ore mbohe ore rocar rupi eve yepi’ ehi tēira yuvireco chupe. <sup>27</sup>Ahe rumo aipo ehira: ‘Ñepe reseve niha acoi, Ndopocuai vahe, ahe pēu. ¡Pesiri che sui, pe opacatu mbahe-mbahe tēi aposar!’ ehiñora chupe. <sup>28</sup>Pe rumo imombopri pe recocuer Tūpa povri sui, sese peyaseho tēira, peyemoaitere tēira peico pesepiase Abra-

ham, Isaac, Jacob iyavei opacatu Tūpa ñehe mombehusareta yuvirecoise Tūpa povri ve iyave. <sup>29</sup>Iyavei ava yugierura añihivei coti sui, caharu coti sui, norte coti sui iyavei irohi coti sui, ahe evocoiyase yuviroguapira ocaru Tūpa mborerecuasave ipiri yuvireco. <sup>30</sup>Supi eté amove ava ndoyavii ipa tēi vahe seique āgua ivave Tūpa piri viña, ahe ranengatu rumo yuviroiqueño itera ipipe iyavei amove ava tenonde catu vahe ndoyavii ahe rane oique vahe rā ivave viña. Ahe rumo ipa tēi yuviroiquera —ehi Jesús ava rehii upe.

### **Jesús oyaseho Jerusalén pendar rese**

<sup>31</sup>Ahe ari pipe oyepota moviro fariseo aipo ehi tēi Jesús upe yuvireco:

—Eyepipiño ave sui. Esepia, Herodes niha nde yuca pota oico —ehi tēi yuvireco chupe.

<sup>32</sup>Ahe rumo,

—Peso, tapemombehu aipo mbia aguara nungar tēi upe: ‘Esepia, co pipe iyavei ayihive amboyepepiñora ava sui carugareta vichico, ambogüerañora ava imbaherasisa sui, curi ayihive evocoiyase amombara che cuaita’ peyera. <sup>33</sup>Che rumo aporaviquiño itera co pipe, ayihive iyavei curi ayihive vichico. Ipare asora Jerusalén ve. Esepia niha, ndiyai Tūpa ñehe mombehusar omano co coti tēi Jerusalén sui yuvireco —ehi.

<sup>34</sup>“¡Too rutei pe Jerusalén pendar, peyuca vahe Tūpa ñehe mombehusar, iyavei ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovri, ēgüe ahe pota tēi pe rereco viña, pe rumo ndapeipotai eté! <sup>35</sup>Sese seyapirā tēi peicora. Iyavei ndache repiai chiaveira peye acoi, ‘Imboetepri Yar remimbou tasecoi’ peyese voi che

repia irira peye” ehi Jerusalén pendar upe.

### Jesús ombogüera mbia iruru sui

**14** Ñepeí mbituhusa ari pipe Jesús oso ocaru mborerecuar fariseo rêtave. Aheve ambuae fariseo eta oiviro yuvireco. <sup>2</sup> Aheve avei mbia iruru vahe secoi. <sup>3</sup> Evocoiyase Jesús oporandu Moisés porocuita rese oporombohe vahe upe iyavei fariseo eta upe avei aipo ehi:

—¿Ipotasa vo mbituhusa ari pipe imbaheasi vahe mbogüera ägua; aní tie? — ehi.

<sup>4</sup> Ahe rumo noñeheño yuvireco chupe. Aheve ahe opoco imbaheasi vahe rese, ombogüera. Ipare, “Eso tupriño” ehi chupe. <sup>5</sup> Fariseo eta upe evocoiyase aipo ehi:

—¿Ava pîha pe pâhu pendar novinose voi chira güeimba guaricu, anise tiví oviapise ivicuar pipe mbituhusa ari pipe viña? — ehi.

<sup>6</sup> Aheve nomboyeveí catuí eté ñeñe yuvireco chupe.

### Jesús ombohe mendasave ichohopri yuvireco

<sup>7</sup> Ava ichohopri oiporavo-ravo güenara imboyeroyapri catu vahe mesave oyeupe nara yuvireco. Ahe sepiase aipo ehi Jesús imboaracua:

<sup>8</sup> —Acoi que yande soho ucase mendasa pietasave yuvireco, ndayaguapí chira ava imboeteipri catu vahe renda harive. Esepia, aviyeteramo que ambuae ava ichohopri oyepotara yande sui imboeteipri catu vahe yuvireco. <sup>9</sup> Ipare yande soho ucasar aipo ehira yandeu: ‘Epûha evocoi sui, co mbia toguapí eipeve’ ehira yandeu. Evocoiyase yande yachí tēira yaso ipami tēi yaguapí. <sup>10</sup> Yande soho ucase rumo yuvireco, yaguapira evocoiyase ipa; yande soho ucasar ouse, aipo ehira yandeu: ‘Mbori,

erio cohave tenda imboeteipri catu vahe save ore piri’ ehira. Ëgüe yahera imboeteipri yaico acoi ava yuviroguapí vahe rovaque yande piri. <sup>11</sup> Esepia niha, acoi ava oyemboivate ai vahe opara seco reroyisa; acoi ava seco mbegüe vahe rumo, ahe seco mboivate catusara curi — ehi.

<sup>12</sup> Ipare aipo ehi avei ichohosar upe:

—Ereyapo potase pieta, ndereichoho ucai chira nde mboripar, que nde rivri, que nde mu iyavei que nde rēta cotindar imbahe eta vahe. Esepia niha, ahe omboyeveí ndeu, nde soho ucara oyepiri yuvireco; Ëgüe ehira evocoiyase mbahe imboyeveí yuvireco ndeu. <sup>13</sup> Ereyapose rumo pieta, ereichoho ucara ava iparaisu vahe, ava ipo ichutu vahe, anise ipi chutu vahe, ipāri-pāri vahe, ndasesapiso vahe avei. <sup>14</sup> Esepia niha, ahe ndoicatu mbahe mboyeveí yuvireco ndeu. Opase rumo ocuerayevi ava seco catupri vahe yuvireco, aheve ereviharera eico. Esepia, erepisira mbahe aviye vahe Tūpa suindar — ehi.

### Jesús oporombohe carusa rese

<sup>15</sup> Ñeñe renduse rumo, ñepeí mbia yuviroguapí vahe mesave, ahe aipo ehi Jesús upe:

—¿Sovasapri catu ava Tūpa piri ocaru vahe imborerecuasave! — ehi.

<sup>16</sup> Evocoiyase aipo ehi ahe mbia upe:

—Oime mbia oyapo vahe carusa guasu, oichoho uca ava setá oyepiri. <sup>17</sup> Ipare oyepotase ari caru ägua, aheve aipo ehi güembiguai mondo: ‘Toyugüerupa che piri ichohopri. Esepia niha, mbahe opa oingatu cute’ ehi. <sup>18</sup> Opacatu rumo ava, ‘Eñemosañomi tēi cheu’ ehi pāve yuvireco. Yipindar mbia aipo ehi: ‘Che rumo arocuá ivi; iya ité aso sepia. Sese eñemosañomi cheu’ ehi chupe. <sup>19</sup> Ambuae mbia aipo ehi: ‘Che arocuá ramo diez tupri tiví, ahe asāha ranera. Sese eñemosañomi

cheu' ehi chupe. <sup>20</sup>Ambuae aipo ehi no: 'Che amenda ramomi vichico. Sese tēi ndasoi chira' ehi. <sup>21</sup>Oyevise mbiguai, opa tupri omombehu mbahe güerecuar upe. Ahese serecuar aipo ehi oñemoirosa pipe güembiguai upe: 'Eso voi evocoyase opacatu ocar rupi. Supi sui eru ava iparaisumi vahe, que ava ipo chutu vahe, anise ipi chutu vahe, que ndasesapisoi vahe, anise que ava ipāri-pāri vahe avei no' ehi. <sup>22</sup>Coixe ava reru pare aipo ehi mbiguai güerecuar upe: 'Che rerecuar, aroya ité nde che cuaita; ipane vite rumo ava' ehi. <sup>23</sup>Evocoyase aipo ehi güembiguai upe: 'Eguata iri ambuae peri tecua ivirindar rupi avei toyugüerumi che rētave yuvireco che piri, toamboapipopa ité che rēta yuvireco' ehi. <sup>24</sup>'Esepia niha, acoi yipindar ava aichoho uca vahe ndipoi chietera que ñepe ocaru vahe rā che piri' ehi güembiguai upe —ehi Jesús ahe mbia mbohe.

### Yavai Cristo rupi guata āgua

<sup>25</sup>Ava rehii Jesús raquicuei uguata yuvireco. Sese ahe oyemboyere aipo ehi ava upe: <sup>26</sup>"Acoi oimese que ava oipota vahe che rupi uguata āgua, tache raisu catu que ambuae ava sui, que oyesupa, osi, güembireco, guahireta, vivireta iyavei güeindireta sui, oyesui avei. Ēgüe ndehise, evocoyase ndiyai chupe che remimbohe seco āgua. <sup>27</sup>Iyavei que ava noñemosañoi vahe mbahe-mbahe tēi upe oiporarase ari yacatu rupi inungar-ra ocurusu rese ovosii vahe viña che rupi uguata āgua, ahe chupe ndiyai che remimbohe seco āgua" ehi. <sup>28</sup>"Que ava pe pāhu pendar omopuha potase oi, ¿ndoyapisaca ranei chira '¿amomba angara pīha?' oyapave? <sup>29</sup>Esepia niha, omondose oi renara yipindar. Ipare rumo nomboaviye catuise, ahese opacatu ava sepiase viroñora <sup>30</sup>aipo ehira yuvireco: 'Aye evocoi mbia omop-

uha pota tēi oi viña, ndoicatu eté rumo imboaviye' ehira yuvireco chupe. <sup>31</sup>Iyavei que mborerecuar guasu diez mil sundao vireco vahe oyepi potase ambuae mborerecuar veinte mil ava vireco vahe sui, oyapisaca ranera yipindar icua tupri āgua '¿yaicatura pīha setá catu vahe rese yavava?' ohesave. <sup>32</sup>Esepia, ndoicatuise, evocoyase ambuae mborerecuar guasu amombri vite secoise, omondora mbahe mombehusar mbahe tupri rese porandu āgua chupe. <sup>33</sup>Ēgüe ehi avei pe recouer ndapeseya potaise pe mbahe opacatu, ěgüe ehi vahe ndahei eté che remimbohe" ehi.

### Yande recouer inungar yucrí

<sup>34</sup>"Yucrí aviye vahe ité yandeu; nasehe irise rumo, ndayaicatu chietera imoehe iri āgua. <sup>35</sup>Naporai eté ivi upe nara; ndiyai avei ivi mbahe repochi resendar rese oyeseha vahe rā. Evocoyase ahe imombopri tēi vahe rā. Sese aipo ahe acoi ava oyapisaca pota vahe, toyapisacañoi" ehi.

### Porombohesa ovesa ocañi tēi vahe resendar

**15** Opacatu ava sui guarepochi re- rocuasar yuvirecoi vahe iyavei ava eta yangaipa guasu vahe, oyemboya Jesús rese iñehe rendu āgua yuvireco. <sup>2</sup>Sese fariseo yuvirecoi vahe iyavei Moisés porocuita rese opombohe vahe yuvireco, ahe oviroñora tēi yuvireco aipo ehi:

—Co mbia ombori pota rai ava yangaipa guasu vahe tēi oico yepi, ocaru avei ipāhuve no —ehi.

<sup>3</sup>Evocoyase Jesús omombehu ovesa resendar yembohesa: <sup>4</sup>"Que ñepe pe pāhuve virecose cien ovesa güeimba, ipare co ocañira ñepe ichui viña, osey ranera evocoyase evocoi noventa y nueve tēi aviye vahesave seco āgua. Ipare oyevira ocañi vahe reca oso,

oyosu rane itera viña. <sup>5</sup>Oyosuse, osupira oachihive vorivetesu pipe. <sup>6</sup>Ipare oyepotase güetave, omonuhara omboripareta, ocotindareta avei no. Ipare aipo ehira chupe: ‘Yayembovihara che piri. Esepia niha, ayosu ité ovesa ocañi vahecuer cute’ ehira. <sup>7</sup>Supi eté égüe ehi aveira oime torivetesu guasu catu ivave acoi ñepeí ava yangaipa guasu vahe oñecuñarose güecocueraí sui noventa y nueve yuvirecoi tupri vahe sui yuvireco” ehi.

### **Yembohesa guarepochi ocañi vahe resendar**

<sup>8</sup>“Acoi que cuña omocañise ñepeí guarepochi diez tupri vireco vahe sui, omoendira tataendi. Ipare osahuvara oi, oseca mbegüera, oyosu rane itera. <sup>9</sup>Evocoyase oyosuse, omonuhara omboripareta, ocotindareta avei no chupe aipo ehira: ‘Yayembovihara che piri. Esepia niha, ayosu guarepochi che sui ocañi vahecuer cute’ ehira. <sup>10</sup>Supi eté égüe ehi aveira oime torivetesu Tüpa rembiguai iva pendar rehíi upe que ñepeí ava yangaipa guasu vahe oñecuñarose güecocueraí sui” ehi.

### **Yembohesa mbia rahir ocañi vahe resendar**

<sup>11</sup>Aipo ehi avei oporombohe: “Oime mbia vireco vahe ñuvirío guahir. <sup>12</sup>Chihivahe catu vahe aipo ehi oyesupa upe: ‘Che ru, embou mbahe che mombahesa cheu’ ehi. Iyesupa evocoyase omboyaho ombahe imondo chupe. <sup>13</sup>Ipare coiye catumi, omonuhapa opacatu ombahe. Ichui oso amombri ambuae tecuave. Aheve oguarepochi oiporupa tēi ombahe pota raisa pipe. <sup>14</sup>Acoi oiporupa tēise rumo opacatu ombahe, ahese oime tiavor ahe ivi rupi. Ahe evocoyase ndasiepoi tēi oico. <sup>15</sup>Evocoyase oso mboraviqui reca mbia piri aheve. Ahe mbia evocoyase

omondo ocove güeimba cuchi rāro āgua. <sup>16</sup>Aheve oyemohitaro pota tēi cuchi rembihu pipe oico viña. Ndipoi eté rumo omondo vahe chupe. <sup>17</sup>Evocoyase oyemomahenduha tēi güeta pendar oporaviqui vahe rese: ‘¡Che ru rētave oporaviqui vahe rumo co omombire guasu-guasú tēi güembihu yuvireco! ¡Che rumo che yuca pota tēi che rieporehi che rereco cohavel <sup>18</sup>Sese ayevira che ru rētave. Aipo ahera chupe: Ayemboangaipa Tüpa rese, nde rese avei no. <sup>19</sup>Ahese che ndahe iri chira nde rahir nungar aico; iyacatu revo ndeu, oporaviqui vahe nungar tēi che rerecoñora eve, ahera’ ehi. <sup>20</sup>Evocoyase oyeví iri oso vu rētave cute.

“Amombri vitemi tahir recose rumo iparaisu catu chupe, oña voi oso guahir rovaichi, oyaco osovaupite avei. <sup>21</sup>Ahese tahir aipo ehi chupe: ‘Che ru, ayemboangaipa Tüpa rese, nde rese avei; ndiya iri nde rahir che reco āgua’ ehi. <sup>22</sup>Tu rumo aipo ehi güembigui upe: ‘Peso, taperumi aviye catu vahe turucuar pemboyemonde, pemonde avei cuā penda sese, pitaqui avei. <sup>23</sup>Iyavei guaca iquirá catu vahe peyuca. ¡Yayapora pieta guasu!’ ehi. <sup>24</sup>‘Esepia, co che rahir aviye omano vahe secoi viña, cüritei rumo oyeví iri cheu’ ehi. Égüe ehi opacatu sorivete yuvireco pieta apo.

<sup>25</sup>“Tahir cuacua catu vahe rumo ocove vite secoi. Oyevisé ou güeta rerovicave, osendu voi ipieta guasu vahe yuvireco. <sup>26</sup>Evocoyase oporandu mbigui upe mbahe oime vahe rese. <sup>27</sup>‘Nde rivri mo co oyeví tupri iri ou. Sese nde ru oyuca uca guaca iquirá vahe iyevisa resendar’ ehiño. <sup>28</sup>Evocoyase tiqehir oñemoirosa pipe, ndoique potai oyesupa uve oi pipe; tu rumo osēño ité ocarve ‘eique’ oya chupe. <sup>29</sup>Evocoyase tahir omboyeví chupe aipo ehi: ‘Che niha setá araviter rupi oropitivi vichico



nde mboyeroyasave viña, nderemboumi eté rumo que mbahe cheu, que mbahe mímba angara viña che mboripar rese ore pieta água' ehi vu upe. <sup>30</sup>Indó, cūrítei oyepota ndeu nde rahir, omocañi tēi vahe nde guarepochi cuña ndipihai vahe rese tēi. Ahe eremboetei catú che sui; ereyuca uca rutei guaca iquira vahe chupe' ehi.

<sup>31</sup>“Evocoiyase tu: ‘Eyapisacaño, che rahir, nde niha nderesiríi vahe che sui. Opacatu che arco vahe rumo nde mbahe ité yepi. <sup>32</sup>Cūrítei rumo iyacatu ité yande rorivetesave yayapora pieta. Esepia, co nde rivri ocañi tēi vahecuer rese yamahe iri’ ehi guahir upe” ehi Jesús ava eta mbohe.

**Mbahe yar mbahe rese  
ñangarecuar ndoyemboaracuai  
vahe resendar yembohesa**

**16** Jesús aipo ehi avei güemimbohe eta upe: “Oime mbía imbahe eta vahe. Ahe vireco mbía ombahe eta rese ñangarecuar. Ahe chupe ava yugüeru mbahe mocañi tēi agüer mombehu. <sup>2</sup>Evocoiyase serecuar ñepeí opítiviisar omondo seca, ahe güeruse, ‘¿Mbahe vo aipo ereyapo eico; ayandu cūrítei nde rerācua? Emoingatupa tuprí voíño nde poraviquisa resendar cheu’ ehi, ‘Nandehañeco iri chira cohava mbahe rese cheu’ ehi, ‘Nandehañeco iri chira cohava mbahe rese cheu’ ehi chupe. <sup>3</sup>Evocoiyase mbahe rese ñangarecuar: ‘¿Mara ahera pīha co evocoiyase vichico imombopri che recose che poraviquisa sui? Ndareco iri rumo pīratasa cheyese ivi rese che poraviqui água. Achī eteanga aveira rumo mbahe rese che porandu água’ ehi tēi. <sup>4</sup>‘Aicua rumo cute mara ahera vichico: che poraviquisa sui opa che momboise, oimera che pisi tuprí vaherā oyepiri’ ehi. <sup>5</sup>Evocoiyase oñhe ñepeí-peí güerrecuar sui mbahe vīnose tēi vahe rese chupe. Yipindar vahe upe

oporandu: ‘¿Mboví mbahe erenose tēi yande rerecuar sui?’ ehi. <sup>6</sup>‘Cien tuprí chereve aceite siru tuvichagüe vahe rese’ ehi. Evocoiyase, ‘Eguapi ru, co oime cuachiar sesendar nde yecuachía agüer. Emondo, eyapo iri ambuae cincuenta rupindar año’ ehi chupe. <sup>7</sup>Ichui ambuae mbahe vīnose tēi vahe upe oporandu no: ‘¿Mboví mbahe vo erenose tēi yande rerecuar sui?’ ‘Cuatro ciento quintar rupindar’ ehi. Evocoiyase, ‘Co oime cuachiar sesendar. Yaicuachiar rumo tresciento veinte quintar rupindar’ ehi. <sup>8</sup>Evocoiyase serecuar oyanduse, ‘Too, oicua ité mbahe apo’ ehi ombopasa rese ombahe rese ñangarecuarer ndipihai vahe upe. Esepia, ahe oyemoin-gatu voi oyeupe mbahe moingatu água. Supi eté ava ndoicuai vahe Tūpa oicua catu mbahe moingatu água oyeupe Tūpa reroyasar sui.

<sup>9</sup>“Sese che aipo ahe pēu: peiporu pe guarepochi pereco vahe co ivi pipe pe mboripar reime água. Ichui opa tēise pe guarepochi, oimera pe pisi vaherā teco apirēhisave.

<sup>10</sup>“Acoi ava mbahe tuprí chíhi oyapo vahe, ahe oyapo tuprí catura mbahe tuvichá vahe. Iyavei acoi égüe ndehi vahe chíhi vahe rese, égüe ndehi chiaveira mbahe tuvichá vahe rese. <sup>11</sup>Evocoiyase ndapemboaviyeise co ivi pipendar pe cuaita guarepochi rese, ahese ndaperecoi chira ivave mbahe rese hañeco água. <sup>12</sup>Iyavei acoi ndapemboaviye tupriise pe cuaita ambuae ava mbahe rāro pipe, ¿ava pīha evocoiyase omondora pe mbahe ité pēu viña?

<sup>13</sup>“Iyavei ndipoi chietera ñepeí mbiguai omboyeroya vahe ñuvirío güerrecuar. Esepia, ñepeí osaisu catura imboyeroyasa pipe, ambuae evocoiyase ndoyambotai chira imboyeroya potaēhisa pipe. Ēgüe peye avei ndapeicatui Tūpa mboyeroya

guarepochi pota raisa pipe” ehi güemimbohe eta upe.

<sup>14</sup>Aipo ñehesa renduse, fariseo yuvirecoi vahe oguarepochi raisusa pipe oviroïro yuvireco. <sup>15</sup>Evocoiyase aipo ehi fariseo eta upe: “Pe co ava rembiepiave pe recouer aviye angahu pe reco viña. Tüpa rumo oicua opacatu pe pihañemoñetasa. Esepia, yepe ava rovaque ndoyavii aviye ai vahe pe recouer viña, Tüpa uve rumo mbahe tēi eté” ehi.

### **Mborocuita iyavei Tüpa mborecuasa rese ñehesa**

<sup>16</sup>“Yipisuive Moisés porocuita iyavei Tüpa ñehes mombehusar porombohesa Juan recosa rupive opa. Ichuive tupri ité rumo imombehusa ñehesa aviye vahe Tüpa mborecuasa resendar, sese ava iquerēhi catu cūrítei aheve yuviroique vaherā.

<sup>17</sup>“Yavai catura que ñepeï Tüpa porocuita mboaviyeēhi āgua co iva, ivi opa vaherā sui” ehi.

### **Jesús oporombohe mendasa sui poiēhi āgua**

<sup>18</sup>“Acoi opoi vahe güembireco sui, omendase ambuae cuña rese, ahe oyemboaguasa tēi vahe. Iyavei acoi omendase cuña omenda vahecuer rese tēi, oyemboaguasa tēi vahe avei” ehi Jesús.

### **Ava mbahe yar iyavei Lázaro**

<sup>19</sup>“Iyavei oime mbia mbahe yar, ahe oyemonde turucuar aviye vahe pipe oyemboetei eteanga, iyavei ari yacatu oyapo pieta opacatu mbahe rese oyemboetei aisa pipe. <sup>20</sup>Oime avei mbia iparaisu ité vahe Lázaro serer vahe. Ahe mbia icaracha ati vahe imboguapisa ivive imoi mbahe yar roquendipive. <sup>21</sup>Co mbia iparaisu catu vahe aipo ehi oyeupe, ‘Tomboumi tēi que güembihu rahicuer oviapi vahe mesa sui’ ehi mbahe yar upe viña. Aheve mbahe yar

reimba cave oyemboya sese, icaracha osere yuvireco. <sup>22</sup>Omanose co mbia iparaisu vahe, aheve Tüpa rembiguai eta oviraso yuvireco Abraham piri ivave. Mbahe yar avei omano, opa oñoti yuvireco.

<sup>23</sup>“Aheve oso Tüpa ñemoirosave. Aheve oparaisuse, omahe ivate coti, osepia amombri aracahendar Abraham Lázaro reseve. <sup>24</sup>Evocoiyase osapucui pīrata: ‘¡Che ramoï Abraham, che paraisuerecomi tēi eve! Emboumi tēi Lázaro che āpecu morohisa āgua ive ocuā pipe. Esepia, che paraisu etepri co tata pīratagüer pipe vitu’ ehi. <sup>25</sup>Evocoiyase Abraham omboyevi aipo ehi chupe: ‘Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaisumi tēi oico’ ehi. ‘Cūrítei rumo Lázaro oviharete oico cohava, nde evocoiyase nde paraisu eipeve eico. <sup>26</sup>Iyavei oime co ivicuar ipicucu vahe rasaēhi āgua oreu iyavei pēu no’ ehi.

<sup>27</sup>“Ahe mbia aipo ehi: ‘Che ramoï Abraham, emondomi tēi Lázaro <sup>28</sup>che rivri poyandepo vahe upe, chupe iñehes āgua. Ahe tosecuñaro güecocuer yugüeruēhi āgua co tecocuer mbahe tēisave’ ehi. <sup>29</sup>Abraham rumo, ‘Vireco niha Moisés porocuita iyavei Tüpa ñehes mombehusar rembicuachiagüer yuvireco. ¡Ahe toviroya yuvireco!’ ehiño chupe. <sup>30</sup>Evocoiyase, ‘Taa, che ramoï Abraham, que omano vahecuer pāhu pendar rumo yuvirasose chupe, ahe evocoiyase omoingatura güecocuer yuvireco viña’ ehi. <sup>31</sup>Abraham rumo aipo ehi chupe: ‘Acoi ndoyapisaca potaise Moisés porocuita rese iyavei ambuae Tüpa ñehes mombehusar remimombehu rese no, ndoviroyai chiveira que ava omano vahecuer ocueraveise yuvireco’ ehi Abraham ava mbahe yar upe” ehi.

**Iparaisu itera ava  
oporomboangaipa uca vahe**

**17** Jesús aipo ehi güemimbohe eta upe: “Oimeño itera poroãtoisa che reroyasar reiti ãgua. ¡Ahe imboangaipa ucasar rumo iparaisu itera! <sup>2</sup>Iyacatu evocoi nungar ava ñapichisa ita mbahe mbocuhisa iyesho rese para guasu pipe imombo ãgua chihivahemi nungar mboangaipa uca rãgüer sui. <sup>3</sup>¡Sese peñearo tupri!

“Acoi nde mboetasa Tüpa reroyasar oyemboangaipase, pemboaracuara. Omboasi pare oyevisse güecocuer tupri pipe, ahese peñerora chupe. <sup>4</sup>Supi eté acoi que ambuae ava pe amotarëhi vitese rumo siete yupagüer ñepe ari pipe, acoi ouse pëu siete yupagüer avei, ‘Ëgüe ndahe iri chira’ ehise, peñero chupe” ehi Jesús güemimbohe upe.

**Yayeroyase Tüpa rese oime pĩratasa**

<sup>5</sup>Co doce tupri apóstol aipo ehi chupe: —Emboumi oreu Tüpa rese ore yeroya catu ãgua —ehi yuvireco chupe.

<sup>6</sup>Evocoyase yande Yar omboyevi chupe:

—Supi eté, Tüpa rese pe yeroyasa, yepe ndoyavii chira mostaza rãhii tahimi vahe viña, co ivira tuvicha vahe upe rumo, ‘Eyeapoho ave sui. Eso eñeñeti para guasu aviterve’ peyese Tüpa rese pe yeroyasa pipe, ahe evocoyase pe mboyeroya itera —ehi.

**Ambuae ava rese hañecosar cuaita**

<sup>7</sup>“Inungar que pe pãhu pendar virecora güembiguai oporaviqui vahe ivi mboyere cove, anise que guaca rãro yuvi rupi viña; ichui iyevisse, ¿‘Eique, eguapi terocar’ ehira pĩha sereciar chupe? <sup>8</sup>Aní eté, ahe rumo aipo ehiñora chupe: ‘Emoingatu voi mbahe che tohu, che toihurã avei. Ipare nde erecarura, ereihura’ ehira chupe.

<sup>9</sup>‘Aviye ndeu’ ndehi chietera icuai pare chupe. <sup>10</sup>Ëgüe peye avei mbiguai nungar pe opacatu Tüpa pe cuaitarã ombou vahe mboaviyere, ‘Yande niha mbiguai tēi yaico. Esepia, yande cuaita mboaviyesar tēi yaico’ peyeñora” ehi.

**Jesús ombogüera diez tupri ava  
lepra pipe imbaheasi vahe**

<sup>11</sup>Osose Jesús Jerusalén ve, oguata ivi Samaria iyavei ivi Galilea rupi. <sup>12</sup>Oyepotase tecuamive oso, ahese yuvinosse diez ava lepra pipe imbaheasi vahe yuvireco chupe. Amombrive rumo opitaño yuvireco ichui. <sup>13</sup>Osapucái yuvireco chupe aipo ehi:

—¡Jesús, Porombohesar, ore paraisuerecomi tēi eve! —ehi.

<sup>14</sup>Sepiase aipo ehi lepra vireco vahe upe:

—Peyevi, peso, tapeyemboyecua pahi eta yuvirecoi vahe upe —ehi.

Oyevisse rumo yuviraso, opa ocuera tupri ombaherasisa sui yuvireco. <sup>15-16</sup>Evocoyase ñepe ipãhu pendar, Samaria pendar, osepiase ocuerasa, oyevi chupe osapucái pĩrata Tüpa upe imboetisave. Oñenopiha oso sovai, oyaivi, “Aviye ndeu” ehi Jesús upe. <sup>17</sup>Evocoyase ahe aipo ehi:

—¿Ndaheí vo acoi diez tupri opa ocuera ombaherasisa sui yuvireco? ¿Aique que ru ambuae nueve yuvirecoi vahe? <sup>18</sup>¡Co mbia ambuae ivi pendar güeraño rumo oyevi ‘aviye ndeu’ ohesave Tüpa uve! —ehi.

<sup>19</sup>Evocoyase aipo ehi ahe mbia upe:

—Eñarapuha, eso tupriño. Nde poreroyasa pipe niha erecuera eico —ehi Jesús chupe.

**Tüpa mborerecuasa  
yande pãhuve secoi**

<sup>20</sup>Ñepe ari pipe fariseo eta, “¿Marase vo aipo oura Tüpa omborerecuasa pipe

mbahe moingatu āgua?” ehi Jesús upe yuvireco. Ahe omboyeve chupe:

—Tūpa mborerecuasa ndahei acoi yasepia vahe. <sup>21</sup>‘Co secoi, aheve secoi’ ndapeyei chira chupe. Esepia, ahe oicove ité pe pāhuve —ehi fariseo eta upe.

<sup>22</sup>Ipare aipo ehi güemimbohe eta upe:

—Oimera ari pe peipota tēira aico vahe herā pe piri que ñepe ari rupi che, Ava Riquehir, che recosa pipe; ndache repiai chira rumo peye. <sup>23</sup>Iyavei ava, ‘Co secoi, aheve aipo secoi’ ehi tēira yuvireco cheu. Ndapesaquicue moñai chira rumo. <sup>24</sup>Esepia, inungar acoi overa vahe osesape guasu iva rese ocua yepi, ēgüe ahera che, Ava Riquehir, vitu ari osupitise che yevi āgua curi. <sup>25</sup>Yipindar rumo co ivi pipe che paraisu ranera ava cūrteindar mara-mara tēi che rerecose yuvireco che repia potaēhisave. <sup>26</sup>Inungar ava Noé recose yuvirecoi aracahe, ēgüe ehi tupri aveira che, Ava Riquehir, yevi āgua renonde. <sup>27</sup>Esepia, ocaru, oiuhu, omendaño avei yuvireco. Oyepotase rumo ari ipapapri amarusu viapi āgua, ahese Noé yuviroique arca pipe. Ambuae ava rumo opa ocañi tēi yuvireco. <sup>28</sup>Ēgüe ehi avei aracahe Lot recose, ava ocaru tēi, oiuhu tēi, virocua tēi mbahe omahera yuvireco iyavei mbahe mondosar tēi, mbahe tisar tēi, oi aposar tēi avei yuvirecoi oyapisacaēhisa pipe. <sup>29</sup>Osēse rumo Lot tecua Sodoma sui, aviyeteramo tēi oviapi tata amar nungar iva sui. Opa tupri oyuca ava rehii aracahe. <sup>30</sup>Ēgüe ahe aveira aviyeteramo tēi che, Ava Riquehir, ayemboyecura curi.

<sup>31</sup>“Ahe ari pipe acoi ava güēta harive secoi vahe, ahe toique iri eme güēta pipe ombahe renose. Iyavei ava que rupi tēi secoi vahe, toyeve iri eme güētave. <sup>32</sup>Sese peyemomahenduha co aracaendar Lot rembireco rese. <sup>33</sup>Opacatu güecocuer osaisu vahe, ahe ocañi tēira.

Iyavei setecuer tēi ocañi vahe, ahe rumo oñepisirora” ehi.

<sup>34</sup>“Ahe pītu pipe oimera que ñuvirío ava vupave yuviroque vahe yugüeru: ñepe acoi che reroyasar serasosara, ambuae rumo opitara. <sup>35</sup>Ahese avei ñuvirío cuña ohichora yuvireco: ñepe serasosara, indugüer rumo opitara. <sup>36</sup>Ēgüe ehi aveira ñuvirío ava amombri güecua sui yuvirecoi vahe: ñepe serasosara, indugüer rumo opitara” ehi.

<sup>37</sup>Aipo ñehesa renduse, oporandu yuvireco chupe:

—Ore Yar, ¿que vo aipo ēgüe ehira mbahe curi? —ehi.

Ahe evocoiyase,

—Mbahe rehögüer reimesave uruvu oñemonuha atira yuvireco —ehi güemimbohe eta upe.

### Jesús omboyoya yeruresa cuña imer mano vahecuer iyavei mborerecuar mbahe moingatusar recocuer rese

**18** Jesús omboyoya ambuae ava recocuer sui querēhisa pipe yerureño āgua ari yacatu rupi <sup>2</sup>aipo ehi: “Ñepe tecuave oime mbia mborerecuar mbahe moingatusar ndosiquiyei vahe Tūpa sui, ambuae ava sui avei. <sup>3</sup>Ahe tecuave avei oime cuña imer mano vahecuer. Ahe oso co mborerecuar rētave, ‘Oime ava oyapo mbahe tēi eté cheu, tomboepi cheu’ ehi chupe. <sup>4</sup>Yipindar rumo noipitivii potai. Coiye catu rumo cuña ombopihaviracia tēise, ipihañemoñeta iri: ‘Yepe che ndasiquiyei vahe Tūpa sui, ava sui avei ndasiquiyei vahe ité, <sup>5</sup>amoingatuñora rumo mbahe co cuña che mañeco tēisar upe. Ayapoñora semimbotar cheu iyu pihiehī āgua’ ehi opihañemoñetasave” ehi.

<sup>6</sup>Ipare yande Yar aipo ehi: “Peyapisaca aipo mborerecuar naporai vahe ñehere rese. <sup>7</sup>Tūpa avei niha omoingatura mbahe güembiporavo

oyeupe yeruresar ari, p̄itu rupindar upe yepi. Nosaro tēi chiranera op̄itivii āgua yuvireco. <sup>8</sup>Supi eté Tūpa omoingatu voira mbahe aviye vahe yande porandusa pipe yandeu. Co rumo che, Ava Riquehir, ayevisé co ivi pipe vitu, oimera ava moviromi tēi oyeroya vite vahe che rese yuvireco” ehi Jesús.

### **Yembohesa fariseo sui iyavei guarepochi rerocuasar sui**

<sup>9</sup>Ichui Jesús oporombohe iri ambuae ava recocuer rese. Esepia, oime amove ava aviye ai angahu seci oyeupe viña, iharive rumo viroño ambuae ava. <sup>10</sup>“Ñuvirío ava yuviraso tūparove oyerogui. Ñepeí ava fariseo, ambuae evocoyase ava sui guarepochi rerocuasar. <sup>11</sup>Evocoyase fariseo oso tenonde ava rembiepiave oyerogui aipo ehi: ‘Tūpa, aviye ndeu, che ndahei ambuae ava nungar che recocuer; ndachemondai vahe, ndachereco rai vahe, ndacheaguasaguasa tēi vahe. Iyavei ndahei eté che recocuer co mbia ava sui guarepochi rerocuasar nungar tēi aico no. <sup>12</sup>Iyavei ñuvirío yupagüer ñepeí semana pipe ayecuacu ité nde recocuer rese, iyavei ñepeí-peí cien guarepochi che poraviqui repri aipisi vahe sui amboyaho diez che porerecosa ndeu’ ehi. <sup>13</sup>Ava sui guarepochi rerocuasar rumo opitaño amombri ichui. Aheve nomahei iva rese oyerogui āgua oangaipa mboasisa pipe. Oyepochihanupa-nupa aipo ehi: ‘¡Tūpa, che paraisuerecomi eve, che angaipa viyar aico!’ ehi oyerogui” ehi. <sup>14</sup>“Sese aipo ahe p̄eu: co mbia ava sui guarepochi rerocuasar opa oipisi ñerosa Tūpa suindar güētave oso. Fariseo rumo aní eté. Esepia niha, opacatu acoi oyemboivate ai vahe, opara seco reroyisa. Acoi ava seco mbegüe vahe rumo seco mboivate catusara curi” ehi.

### **Jesús osovasa chíhivahe eta**

<sup>15</sup>Iyavei chíhivahe güeru Jesús uve yuvireco sovasapirā. Evocoyase semimbohe osepiase yuvireco, “¿Mahera vo peruño tēi chíhivahe?” ehi opihaviracuasa pipe serusar upe yuvireco. <sup>16</sup>Jesús rumo aipo ehi:

—¡Mahera ndapeipotai iyu āgua! Toyugüeruño chíhivahe cheu. Esepia, co chíhivahe nungar ava yuviroiquera che Ru Tūpa povrive. <sup>17</sup>Supi eté acoi ndoipisii vahe che Ru Tūpa mborerecuasa chíhivahe nungar yuvireco, ahe evocoyase ndoyuviroiquei chietera ipipe —ehi.

### **Ñepeí mbia mborerecuar imbahe eta vahe omoñeta Jesús**

<sup>18</sup>Ñepeí mbia mborerecuar oporandu Jesús upe:

—Porombohesar aviye vahe, ¿mbahe vo ayapora tecovesa apirēhi vahe rereco āgua? —ehi.

<sup>19</sup>Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepeí aviye vahe ité, ahe Tūpa seci. <sup>20</sup>Ereicua niha co porocuita aipo ehi vahe: ‘Nandeaguasai chira, ndereporoyucaí chira, nandemondai chira, nanderemirai chira ambuae ava rese, eremboyeroyara nde ru, nde si avei’ ehi vahe —ehi chupe.

<sup>21</sup>Ahe mbia rumo,

—Che aipo nungar opacatu amboaviye ité che chíhivahemi suive —ehiño chupe

<sup>22</sup>Aipo ihese rumo,

—Ipane vite mbahe ndeu —ehi—. Emondopa rane nde mbahe, ahe sepi evocoyase eremondora ava iparaisu vahe upe. Ichui ererecora mbahe aviye vahe ivave cute. Ipare ereguatara che rupi —ehi chupe.

<sup>23</sup> Aipo oyeupe hese rumo, ahe mbia ndoyembovîhai tēi. Esepia niha, mbahe yar ité seci. <sup>24</sup> Sese omahe aipo ehi:

—¡Yavai eté rumo ava mbahe yar reique āgua che Ru Tūpa mborerecuasave! —ehi—. <sup>25</sup> Yavai rai camello upe yucuar rupi seique āgua; ava imbahe eta vahe upe rumo yavai catu che Ru mborerecuasave seique āgua —ehi.

<sup>26</sup> —¿Ava angahu pîha evocoiyase oñepisîrora yuvireco viña? —ehi sendusar chupe.

<sup>27</sup> Evocoiyase ahe chupe aipo ehi:

—Ava tēi upe mbahe yavai eté, Tūpa upe rumo ndayavaimi eté —ehi.

<sup>28</sup> Evocoiyase Pedro aipo ehi:

—Che Yar, ore rumo opa oroseya ore mbahe nde rupi ore guata āgua —ehi chupe.

<sup>29</sup> Evocoiyase aipo ehi güemimbohe upe:

—Supi eté acoi oseya vahe que güêta, güembireco, viquehir, vivri, oyesupa, que guahir Tūpa mborerecuasa rese, <sup>30</sup> ahe setá iteanga catu oipisira mbahe aviye catu vahe co ivi pipe oseya vahe sui. Ipare rumo tecua ambuaeve oipisi aveira tecovesa apirêhi vahe curi —ehi.

### Jesús omombehu iri omano āgua

<sup>31</sup> Evocoiyase yande Yar opa viraso co cotimi doce güemimbohe. Aheve aipo ehi: “Cûritei yasora tecua Jerusalén ve yaico, aheve omboaviyera co Tūpa ñehe mombehusar rembicuachiagüer co che, Ava Riquehir, resendar ñehesa. <sup>32</sup> Che imondopri aicora ndahei vahe yande mu upe mara-mara tēi che rereco āgua. Che roeroïro-ïrora iyavei ondivi-ndivira yuvireco che rese” ehi. <sup>33</sup> “Iyavei che nupa-nupara. Ipare che yucara yuvireco. Imombosapisa ari pipe rumo acuerayevira omano vahe pāhu sui” ehi.

<sup>34</sup> Semimbohe rumo ndosenducuai eté iñehe yuvireco. Esepia niha, yavai eté senducua āgua yuvireco chupe.

### Jesús ombogüera ñepi mbia ndasesapisoi vahe

<sup>35</sup> Evocoiyase Jesús ovirovise tecua Jericó oso, aheve mbia ndasesapisoi vahe oguapi oï peri popive porerecosa oyeupe mondo āgua rese. <sup>36</sup> Osenduse ahe ndasesapisoi vahe ava rehii piambu, ahese, “¿Mbahe vo pēu?” ehi ava upe. <sup>37</sup> Ahe evocoiyase, “Jesús, Nazaret pendar, ocuara co rupi” ehi yuvireco chupe. <sup>38</sup> Evocoiyase ahe güendapeve oñehe pîrata:

—¡Jesús, David suindar, che paraisuerecomi tēi eve! —ehi chupe.

<sup>39</sup> Evocoiyase ava tenonde oguata vahe oyaca-yacaño, “Quiriri” ehi yuvireco chupe. Ahe rumo,

—¡David suindar, che paraisuerecomi tēi eve! —ehi pîrataño ité chupe.

<sup>40</sup> Evocoiyase Jesús opitase aheve, oyocuai ava seru āgua. Ovirovise seru yuvireco, aipo ehi ndasesapisoi vahe upe:

<sup>41</sup> —¿Mbahe vo ereipota ayapo vaheherā ndeu? —ehi.

—Che Yar, che mbosarecomi tēira eve viña —ehi chupe.

<sup>42</sup> —¡Esareco, erecuera niha! Esepia, ereyeroya ité che rese —ehi chupe.

<sup>43</sup> Ahe ramoseve ndasesapisoi vahe, osareco tupri ité; osoño ité Jesús rupi imboetisave. Opacatu ava osepia vahe avei omboetei Tūpa yuvireco.

### Zaqueo osepia pota Jesús

**19** Ichui Jesús oi que tecua Jericó pipe oguata oico. <sup>2</sup> Aheve mbia mbahe yar Zaqueo serer vahe seci. Ahe ava sui guarepochi rerocuasar rerecuar. <sup>3</sup> Osepia pota tēi Jesús ‘taicua ité’ oya viña. Ndoicatu rumo opucueñise ava rehii pāhuve sepia āgua. <sup>4</sup> Evocoiyase ahe oña tenonde oso ‘tasepia ité’ oyapave, oyeupi ivira rese ivate oï senonera. <sup>5</sup> Evocoiyase oyepotase, omahe Zaqueo rese ivate chinise, aipo ehi chupe:

—Zaqueo, egüeyi poyava. Esepia, asora nde rêtave nde piri —ehi.

<sup>6</sup>Aipo oyeupe he ramoseve, Zaqueo ogüeyi voi vorivetesa pipe oipisi. <sup>7</sup>Sepiase rumo opacatu ava, “Yangai pa guasu vahe rêtave tēi oso” ehi yuvireco chupe. <sup>8</sup>Evocoiyase Zaqueo opūha aipo ehi chupe:

—Che Yar, esendu rane, amboyaho tupri ra che mbahe eta ava iparaisu vahe upe; mbahe añomi vahecuer avei, ayapirasa catu-catura irungatu rupi imboyeve ãgua —ehi chupe.

<sup>9</sup>—Co pipe Tūpa oipisiro ité co mbia. Esepia, ahe niha Abraham suindar avei secói. <sup>10</sup>Esepia, che, Ava Riquehir, ayu co ivi pipe ava ocañi tēi vahe pīsiro ãgua —ehi Jesús Zaqueo upe.

### Guarepochi sui yembohesa

<sup>11</sup>Aipo ñehesa rendu viteseve, Jesús oporombohe ambuae tecocuer resendar rese. Esepia, viroví Jerusalén, “Oyepota voi etera revo Tūpa mborerecuasa” ehi ava yuvireco viña.

<sup>12</sup>Ahe rumo aipo ehi ava upe imbohe: “Oime mbia imboyeroyapri, ahe senoipri oso vahe rã amombri oivi pendareta rerecuarã oyevise. <sup>13</sup>Oso ãgua renonde oichohopa uca diez tupri güembigui. Ahese opa omondo ñepeipei upe guarepochi sepirusu vahe, aipo ehi chupe: ‘Peporaviquí co guarepochi rese imboeta ãgua che yevise nara’ ehi. Ipare oso. <sup>14</sup>Setá ava rumo secua pendar saquicuei tēi viroño yuvireco. Sese omondo moviro ava ‘tomombehu: Ore rumo ndoroipotai ore rerecuarã secói ãgua, tehi yuvireco’ oya viña.

<sup>15</sup>“Ahe rumo mborerecuar guasu güecosa pipe oyeve ou cute. Opa uca oichoho oguarepochi pisisarer ‘¿mbovi-mbovi pīha oipisi oyacatu yuvireco?’ oya. <sup>16</sup>Evocoiyase yipindar mbia guarepochi oipisi vahe ou voi

chupe, ‘Che rerecuar, nde guarepochi oyemboeta diez rupi cheu’ ehi. <sup>17</sup>Evocoiyase mborerecuar guasu omboyeve chupe: ‘Mbiguai aviye vahe ereico, nde cuaita co nde poraviquisa chíhimi vahe eremboaviye ité. Sese ereicora diez tecua guasu pendar rese hañeco ãgua’ ehi chupe. <sup>18</sup>Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe. <sup>19</sup>Aipo ehi tupri avei ahe chupe: ‘Nde evocoiyase ereicora cinco tecua pendar rese hañeco ãgua’ ehi.

<sup>20</sup>“Ipare voi ambuae ou chupe, ‘Che rerecuar, ndo co nde guarepochi aipoqueño turucuar mi pipe sereco. <sup>21</sup>Esepia, che asiquiye nde sui. Nderecatēhi mete ai vahe mbahe rese. Ambuae ava poraviquí sui tēi iyavei acoi ndahei vahe mbahe nde remiti, ichui tēi avei ereipisi mbahe ndeyeupe nara yepi’ ehi chupe. <sup>22</sup>Evocoiyase mborerecuar guasu aipo ehi chupe: ‘Nde mbiguai ndaseco pōrai vahe ereico. Nde ñehes sui aicuara nde recocuer. Ereicuase egüe che hesa viña, <sup>23</sup>evocoiyase, ¿mahera ru ndereyapocatuí che guarepochi guarepochi apocatusave che yevise voi senose ãgua cheu imboyeve catumi ãgua viña?’ ehi. <sup>24</sup>Evocoiyase, ‘Perocua guarepochi ichui. Pemondora acoi diez rupi guarepochi ombota vahe upe’ ehi vupindar upe. <sup>25</sup>Supindar rumo aipo ehi: ‘Ore rerecuar, ovireco rumo evocói diez tupri avei iharive guarepochi’ ehi tēi yuvireco chupe. <sup>26</sup>Evocoiyase mborerecuar, ‘Co rumo supi eté vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara’ ehi. <sup>27</sup>‘Acoi ava che amotarēhimbar, ndache potai vahe mborerecuarã yuvireco, ahe opara peru cohava che rovai yucapa ãgua’ ehi” ehi Jesús ava eta upe.

### Jesús oi que Jerusalén pipe

<sup>28</sup> Jesús aipo ohe pare, uguata vite oso Jerusalén coti. <sup>29</sup> Evocoiyase coiye catu tecua Betfagé iyavei Betania rerovicave, ivitri Olivo ipiimi, aheve omondo ñuvirfo güemimbohe <sup>30</sup> aipo ehi chupe:

—Peso co tecuamive, yande rovaingarve. Peyepotase aheve, pesepiara guaricu ñapichimbri imoha ava ndoyeupi vitei vahe yuvireco sese. Ahe peyorañora seru. <sup>31</sup> Acoi, ‘¿Mahera vo peyora?’ ehise que ava pëu, ‘Yar oiporu pota’ peyeñora chupe —ehi güemimbohe upe.

<sup>32</sup> Evocoiyase semimbohe yuviraso, semimombehu rupi tupri ité osepia mbahe yuvireco. <sup>33</sup> Evocoiyase oyorase guaricu,

—¿Mahera vo peyora ore reimba? —ehi iyar yuvireco.

<sup>34</sup> —Yar oiporu pota —ehiño yuvireco chupe.

<sup>35</sup> Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyeupi sese oso água.

<sup>36</sup> Oyeupise oso guaricu harive, oipipira ava oturucuar peri rupi senonera imboetei guasusave yuvireco. <sup>37</sup> Ovirovise ivitri Olivo sui ogüeyi água oso, opacatu ava seroyasar supi uguata vahe omboipi osapucái yuvireco vorivetesave mbahe poromondiisa sembiapogüer rese Tüpa upe <sup>38</sup> aipo ehi yuvireco:

—¡Sovasapri secoi mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tüpa tasecoi! —ehi.

<sup>39</sup> Evocoiyase amove fariseo yuvirecoi vahe supi aipo ehi chupe:

—Porombohesar, eñehe nde rupi uguata vahe upe imonguiriri água —ehi tēi yuvireco.

<sup>40</sup> Evocoiyase aipo ehi:

—Supi eté amombehu pëu: co ava iquiririse yuvireco, ita rumo evocoiyase

osapucái pīratara che mboeteisave —ehi.

<sup>41</sup> Oyepota senimise tecua Jerusalén ve, ahe tecua repiase, oyaseho sese <sup>42</sup> aipo ehi: “¡Pesenducuar tarahu co co ari pipe teco tuprisa amondo pota vahe pëu viña, cūrítei rumo ocañi tupriño pe sui, ndapeicatu eté sepia!” ehi oyaseho. <sup>43</sup> “Oimera rumo ari imombepri naporai vahe pëu curi. Pe amotarēhimbar oñachi irira pe recua. Ipare oyere tuprira yuvireco pe rese pëu ovava água. <sup>44</sup> Iyavei yuviroiquera pe recua pipe, opara pe rēta omonduru yuvireco, pe yuca aveira yuvireco. Ndipoi chietera ita que ñepeí oya vahe ambuae rese. Esepia, ndapeicuai eté Tüpa ouse pëu pe pīsiro água” ehi Jerusalén pendar rese oyaseho.

### Jesús omombopa ava mbahe rerecosar tūparo pipe sui

<sup>45</sup> Ichui Jesús oi que judío tūparo guasu pipe. Aheve omboipi ava mbahe mondosar mombopa tupri ocarve oico <sup>46</sup> aipo ehi:

—Icuachiapri aracahendar pipe aipo ehi: ‘Che rēta yeruresa rētarā’ ehi. Pe rumo, imonda rai vahe rēta nungar tēi pereco —ehi.

<sup>47</sup> Ichui ahe tūparo guasu pipe ari yacatu oporombohe oico. Aheve avei rumo pahí eta rerecuar yuvirecoi vahe, Moisés porocuita rese oporombohe vahe iyavei tecua rerecuar guasu yuvirecoi vahe, ‘¿Mara yahera piña yuca uca água viña?’ ehi yuvireco chupe. <sup>48</sup> Ndoicatu rumo yuvireco. Esepia, ava rehii oyapisaca iporombohesa rese yuvireco.

### Jesús mborerecuasa

**20** Ñepeí ari Jesús judío tūparo guasu pipe güecose, ombohe ava eta, omombehu ñehesa pīsirosa resendar oico. Ahese yugüeru pahí eta rerecuar guasu yuvireco iyavei Moisés porocuita



rese oporombohe vahe, ava rerecuar guasu yuvirecoi vahe avei <sup>2</sup> aipo ehi:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã? —ehi ahe ava yuvireco chupe.

<sup>3</sup> Ahe omboyevi chupe:

—Che avei aporandura mbahe rese pëu. Pemboyevíra cheu —ehi—. <sup>4</sup> ¿Ava vo Juan ombou ava ãpiramo ãgua: Tüpa píha, ava tēi tie? —ehi ahe ava yuvirecoi vahe upe.

<sup>5</sup> Ahese, “¿Mara yahera píha?” ehi-ehi tēi oyeupe yuvireco. ““Tüpa’ yahese chupe, ‘¿Mahera ru ndaperoyai?’ ehira yandeu. <sup>6</sup> Anise, ‘Ava tēi remimbou’ yahese chupe, opacatu seroyasar evocoyase yande api-apira ita pipe yuvireco. Esepia, ava, ‘Juan omombehu vahe ñehesa Tüpa suindar’ ehi eté yuvireco chupe” ehi tēi oyeupe yuvireco. <sup>7</sup> Evocoyase ahe ava, “Ndoroicuai rumo Juan mbousar, que sui oporoãpiramo oico” ehiño yuvireco chupe. <sup>8</sup> Sese aipo ehi ahe ava upe:

—Sese che avei, ‘Ahe iporocuita pipe co mbahe ayapo’ ndahei chietera pëu —ehi mborerecuar guasu upe.

### **Ava mbahe tēi oporaviqui vahe recocuer sui yembohesa**

<sup>9</sup> Ipare Jesús oñehe ava eta upe ambuae ava recocuer rese aipo ehi: “Oime mbia oñoti vahe uva oivi pipe. Ipare oseya oivi ava oporaviqui vahe upe iporu ãgua. Ichui oso pucu que amombri vahesa rupi. <sup>10</sup> Evocoyase oyepotase ari uva pohosa, ahese omondo ñepe güembiguai oporaviqui vahe upe imborporandu ‘tomboumi uva pohopri cheundar cheu cute’ oyapave viña. Ahe rumo oinupa-nupaño imboyevi tupri tēi yuvireco serecuar upe. <sup>11</sup> Ipare ambuae güembiguai omondo iri no. Ahe oinupa-nupaño, iñehe mara-mara tēi avei ipogüer tēi imboyevi imondo yuvireco. <sup>12</sup> Ichui omondo iri tēi imom-

bosapisa rese ambuae güembiguai no. Ahe oyapicha-pichaño imosē imondo yuvireco.

<sup>13</sup> “Coieye miti yar aipo ehi: ‘¿Mara ahera píha? Amondora revo che rahir, che rembiaisu. Ahe tie revo, osepiase, omboyeroyara yuvireco’ ehi. <sup>14</sup> Evocoyase ahe ava tahir repiase, ‘Co aipo oipisira vu mbahe. Yayucaño. Yandeu nara päve topita co ivi’ ehi oyeupe yuvireco. <sup>15</sup> Evocoyase ovinose miti pähu sui, oyuca ité yuvireco.

“¿Mbahe vo evocoyase oyapora ivi yar ahe ava naporai vahe upe? <sup>16</sup> Oura evocoyase ahe ava mocañipa ãgua, omondora ambuae ava upe oivi rese oporaviqui vaheerã” ehi.

Aipo renduse,

—¿Egüe tehi eme! —ehi ava yuvireco chupe.

<sup>17</sup> Omahese rumo ahe ava rese aipo ehi:

—¿Mara oya vo co aipo ehi icuachi-apri arachendar pipe?:

‘Co ita oi aposar opaño omombo yuvireco, ahe ita rumo aviye catu vahe oi moviracua tupri ãgua’ ehi.

<sup>18</sup> Acoi que oviapi vahe evocoi ita harive, opa tēira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecualeta upe.

<sup>19</sup> Pahí eta rerecuar guasu iyavei oporombohe vahe Moisés porocuita rese, iñehe viteseve, oipisi pota tēi Jesús yuvireco. Esepia, osenducua ité oyesendar iporombohesa yuvireco. Osiquiyeño rumo ava rehii sui yuvireco.

### **Judío rerecuar osecoãha iri tēi Jesús guarepochi rese yuvireco**

<sup>20</sup> Ahe judío rerecuar evocoyase omondo ava ndaseco asiimi angahu vahe iviro, chupe iñehe ãgua ‘toyavi angahu oñehe’ oya viraso vaheerã

mborerecuar Pilato rovai. <sup>21</sup>Ahe evocoiyase,

—Porombohesar, ore oroicua nde ñehe iyavei nde porombohesa supi eté vahe. Iyavei nderemboyoaviratii vahe nde ñehe yepi. Nde rumo ereporombohe mbahe supi tupri vahe Tüpa recocuer rese. <sup>22</sup>¿Aviyera pïha yamondo guarepochi Roma pendar mborerecuar ivate catu vahe upe viña? ¿Aní tie? —ehi yuvireco chupe.

<sup>23</sup>Opa rumo oicua ñehe porombopasa tõi. Sese,

<sup>24</sup>—Pemboyecua ru ñepe guarepochi cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborerecuar guasu —ehiño yuvireco chupe.

<sup>25</sup>—Taa, pemondo ru mborerecuar uve chupendar, iyavei Tüpa upendar pemondoño ité Tüpa upe —ehi ahe ava upe.

<sup>26</sup>Ndoyavi uca catui eté ñehe ava rovaque ipisi água yuvireco. Ahe rumo oyeupe imboyevisé, iquiriripa tupriño oyeþihamondiisa pipe yuvireco.

### Porandusa cuerayevisa rese

<sup>27</sup>Ipare saduceo, ahe “ndipoi eté cuerayevisa” ehi vahe, yugüeru Jesús upe. Oporandu tõi angahu yuvireco chupe:

<sup>28</sup>—Porombohesar, Moisés niha oseya güembicuachiagüer yandeu aipo ehi: ‘Que cuimbahe omenda vahe omanose guahiëhiseve, tivri evocoiyase omen-dara sembirecocuer rese. Ahe viquehir omano vahecuer upe nara tahira oico’ ehi. <sup>29</sup>Evocoiyase oime siete tupri oye-suindar pãve yuvirecoi vahe. Yipïndar vahe omenda. Ipare omanoño guahiëhiseve. <sup>30</sup>Ichui tivri omenda sese. Ahe omanoño avei guahiëhiseve. <sup>31</sup>Ipare imombosapisa tivri omenda iri tõi sese. Ègüe ehi tupriño avei chupe. Ambuae ichuindar ègüe ehi tupri avei omanopa

yuvireco guahiëhiseve. <sup>32</sup>Coiye cuña avei omano cute. <sup>33</sup>Evocoiyase opase ocuerayevi yuvireco, ¿uma rembireco itera pïha omendase opacatu siete yuvirecoi vahe rese? —ehi saduceo yuvireco chupe.

<sup>34</sup>Ahe rumo omboyeve chupe:

—Co ivi pipe cuimbahe iyavei cuña omenda vahe yuvireco yepi. <sup>35</sup>Ocuerayevi pare oicatu vahe ivave yuviroique vahe, chupe ndipo iri chira mendasa. <sup>36</sup>Iyavei nomanoi chietera aheve. Es-

epia, yuvirecoira Tüpa rahir, Tüpa rembiguai eta iva pendar nungar yuvireco. <sup>37</sup>Moisés rembicuachía agüer pipe niha caha pãhu sendi vahe resendar oicua uca cuerayevisa yandeu. Aheve aipo ehi: “Ahe niha yande ramoi aracahendar Abraham, Isaac, Jacob Tüpa” ehi.

<sup>38</sup>¡Tüpa ndahei omano vahe Tüpa! ¡Ahe rumo oicove vahe ité Tüpa secoi! Esepia, chupe opacatu yuvirecove vahe —ehi saduceo upe.

<sup>39</sup>Evocoiyase moviro Moisés porocuita rese oporombohe vahe aipo ehi:

—Supi eté aipo ere, Porombohesar —ehi yuvireco chupe.

<sup>40</sup>Sese niquerëhi iri eté mbahe rese oporandu água yuvireco chupe.

### ¿Ava suindar pïha Poropïsirosar?

<sup>41</sup>Evocoiyase Jesús aipo ehi ahe ava upe:

—¿Mahera ru, “Poropïsirosar David suindar ité” ehi yuvireco? <sup>42</sup>David teieté niha aipo ehi güembicuachía pipe:

‘Yar aipo ehi che Yar upe:

Eguapï che acato coti <sup>43</sup>acoi che amon-dose voi eté nde amotarëhimbar ñenopiha água nde povrive yuvireco’ ehi David aracahe.

<sup>44</sup>¿Mahera ru, “Poropïsirosar David suindar secoira” peye? David teieté, “Che Yar” ehise chupe —ehi Jesús ahe ava upe.

### Jesús oicua uca Moisés porocuaita rese oporombohe vahe recocuerai

<sup>45</sup> Opacatu ava oñehe rendu viteseve, Jesús aipo ehi güemimbohe upe: <sup>46</sup> “Peicua catu co Moisés porocuaita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo água ocar rupi omboeteisa pipe yuvireco. Oseca avei tenda porañete catu vahe güenara otúparo pipe, carusave avei oseca tenda aviye catu vahe yuvireco. <sup>47</sup> Iyavei virocuarocuaño tēi cuña imer mano vahecuer rēta ichui. Oarondaguã tēi avei oyeroqui pucu-pucu yuvireco. Ahe rumo oipisira Tūpa ñemoirosa ipīrata catu vahe yuvireco curi” ehi güemimbohe eta upe.

### Cuña imer mano vahecuer iparaisu vahe porerecosa

**21** Ipare Jesús osepia ava imbahe eta vahe omondose oporerecosa guarepochi riru pipe yuvireco. <sup>2</sup> Aheve avei cuña imer mano vahecuer iparaisu vahe, omondo ñuviriomi guarepochi oporerecosa. <sup>3</sup> Evocoyase Jesús aipo ehi:

—Supi eté co cuña iparaisu vahe omondo catu oporerecosa opacatu mbahe yar sui. <sup>4</sup> Esepia, ava imbahe eta vahe, oguarepochi rumbirer tēi omondo oporerecosa Tūpa upe yuvireco. Co cuña rumo oparaisusa pipe virecomi vahe guarepochi oyeupe, opacatu ité omondo oporereco água Tūpa upe —ehi.

### Jesús omombehu tūparo guasu monduru água

<sup>5</sup> Evocoyase amove semimbohe oñehe yuvireco tūparo guasu recocuer rese: “Co tūparo niha icatupri vahe, ita mopuhapri, porerecosa sui opacatu mbahe

icatupri ipipe” ehi yuvireco. Jesús rumo aipo ehi:

<sup>6</sup>—Oimera ari opacatu co mbahe cūrtei pesepia vahe pipe ndipoi chietera que ñepeí ita oyeha vite vahe; opacatu ité imondurusara curi —ehi güemimbohe eta upe.

### Cañi renonde sepiasara setá mbahe poromondiisa íva rese

<sup>7</sup> Evocoyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

<sup>8</sup> Evocoyase aipo ehi güemimbohe eta upe: “Peicua catu, peyembopa ucai rene catu. Esepia, setá ava yugüerura, ‘Che niha Poropīsiosar aico, cūrtei osupiti ari imombehpri yandeu’ ehi tēira yuvireco. Ndaperoyai chira rumo ava aipo ehi vahe. <sup>9</sup> Acoi peyanduse vavasa iyavei tecua pipendar oyeupe vavase, ndapeyembosiquiyei chira rumo serācua anduse ichui. Evocoi nungar rane ité niha oimera. Ndehi vitei chira rumo ari cañi” ehi.

<sup>10</sup> “Ñepeí ivi pipendar ovavara ambuae ivi pipendar rese oyeupe yuvireco. <sup>11</sup> Ahese avei oimera ivi ririri tuvichá vahe, tiavor, mbaherasisa opacatu-catu tēi tecua rupi. Iyavei pesepiara íva rese mbahe pe mbosiquiye vahe, poromondiisa tuvichá vahe avei curi.

<sup>12</sup> “Co mbahe-mbahe tēi reime renondeve rumo pe pisira yuvireco che recocuer sui mara-mara tēi pe rereco água. Pe reraso aveira pēu porandu água tūparove, pe roquenda aveira, iyavei pe rerasora mborerecuar rovai, mborerecuar ivate catu vahe rovai avei yuvireco che recocuer sui tēi. <sup>13</sup> Ipipe pemombehura che recocuer chupe yuvireco. <sup>14</sup> ‘Aipo ahera añehe’ ndapeyei

chira pepihañemoñeta rereco pe yeepi ãgua. <sup>15</sup>Esepia, che amondora che mbahecuasa pe ñehe ãgua. Ndoicatu chi-etera evocoyase pe amotarẽhimbar imboyeve yuvireco pẽu. <sup>16</sup>Pe amotarẽhira rumo pe yesupa, pe mu, pe rivri, pe riquehir, pe mboripar avei. Iyavei oyucara amove pe pãhu pendar yuvireco. <sup>17</sup>Opacatu ava ndape ambotai chira che recocuer sui tẽi yuvireco. <sup>18</sup>Nocañi chi-etera rumo que ñepei pe ha pe ãca sui. <sup>19</sup>¡Peyemoviracua evocoi nungar mbahe upe pe ñepisiro ãgua!

<sup>20</sup>“Iyavei pesepiase ava Jerusalén rese sundao oyere tuprise, peicua evo- coyase mbahe-mbahe tẽi reime ãgua yu- vireco chupe. <sup>21</sup>Evocoyase Judea ve yu- virecoi vahe toñemipa poyava voi ivitri rese yuvireco ichui; tecua Jerusalén pipe yuvirecoi vahe, ahe toyuvinose poyava avei ichui. Iyavei acoi que rupi yu- virecoi vahe, ahe toyevi iri eme yu- vireco. <sup>22</sup>Esepia, ahe ari oimera Tũpa ñemoirosa. Ahe omboaviyera icuachi- apri aracahendar pipe imombehupri. <sup>23</sup>¡Iparaisu itera ahe ari pipe cuña ipu- ruha vahe, imembi pĩtani vahe avei! E- sepia, oimera tecoasisa co ivi pipendar upe, ñemoirosa tuvichá vahe ahe ava re- cocuer rese. <sup>24</sup>Iyavei quise pucu pipe setá ava omanora yuvireco iyavei am- buae setá ava ipisipri serasosara ambuae ivi rese amombrısave. Iyavei ambuae ivi pipendar ava ndahei vahe judıo yuvire- coi vahe oiporu itera tecua Jerusalén acoi osupitise voi eté ari imombehupri yuvireco chupe” ehi.

### Ava Riquehir yevisa

<sup>25</sup>“Iva rese iporẽhira poromondiisa, ari rese, yasi rese, yasitata rese; iyavei ivi pipe, opacatú tecua rupi ava ndayaracua iri chira yuvireco. Oyembosiquiye guasu-guasú tẽi aveira yuvireco para guasu riapugũer renduse. <sup>26</sup>Ahese ava setá yaracua cañi tẽira

osiquiyepave yuvireco opihañemoñeta guasu aise co ivi pipe mbahe oime vaheã sui. Ahese avei iva resendar opacatu mbahe oririira. <sup>27</sup>Ahese ramo opacatu ava che, Ava Riquehir, che repiara yuvireco, agũeyise iva quiha rese che pĩratasa rendigũer porañetesa pipe. <sup>28</sup>Omboipise evocoi nungar mbahe, peyemonguerẽhi catura, peyemopoase pe querẽhisa pipe. Esepia, pe renosesa pihavira mbahe tẽi sui” ehi.

<sup>29</sup>Iyavei oporombohe ambuae mbahe rese: “Peicua tupri higuera ivira re- cocuer, anise que ambuae ivira avei. <sup>30</sup>Co ivira soqui ramosa, yaicua cõimi ari sacu vahe yepota ãgua yandeu yepi. <sup>31</sup>Na ehi aveira pẽu che ñehe rupi tupri mbahe pesepiase. Sese peicua Tũpa mborerecuasa cõimi eté secoise.

<sup>32</sup>“Supi eté yuvirecove vitera ava os- epia vahe co mbahe opase yaviye. <sup>33</sup>Iva, ivi opara ocañi, che ñehengagũer rumo imboaviyesa rane itera” ehi gũemim- bohe upe.

<sup>34</sup>“Peicua catu, anı pemboavai etepri pe mbahe reroya ãgua mbahe tẽi aposa pipe, pe caguar tẽisa pipe, co ivi pipen- dar tecocuer rese pe pihañemoñeta tẽisa pipe avei. Evocoyase toposapiha eme <sup>35</sup>inungar ivonde oviapi vahe ahe ari pipe. Esepia, opacatu ava eta upe oimera evocoi nungar mbahe. <sup>36</sup>Sese peyemoin- gatu, peyeroqui ari rupi co mbahe tẽi sui pe yepepi ãgua, pe yemboyecua tupri ãgua che, Ava Riquehir, rovai” ehi gũemimbohe eta upe.

<sup>37</sup>Ëgũe ehi Jesús oporombohe ari rupi tũparo guasu pipe. Pĩtu pipe evocoyase opĩta ivitri Olivo rese. <sup>38</sup>Iyavei opacatu ava yuviraso añihiveive tũparo guasu pipe ñehe rendu ãgua yepi.

### Yemomborandusa Jesús yuca ãgua

**22** Ovirovise Pascua pieta pan ndayapepoi vahe hu ãgua,

<sup>2</sup>ahese pahi rerecuareta, Moisés porocuaita rese oporombohe vahe avei ava sui osiquiyepave, oseca-seca tēi Jesús yuca āgua yuvireco.

<sup>3</sup>Evocoiyase Carugar oi que Judas piha pipe, ahe acoi doce tupri semimbohe pāhu pendar Iscariote serer vahe.

<sup>4</sup>Ahe oso pahi eta rerecuar yuvirecoi vahe upe, tūparo rārosar yuvirecoi vahe upe avei imoñeta āgua, “Tamondo Jesús pe povrive” ehi. <sup>5</sup>Ahe evocoiyase oyemboviaharete yuvireco. “Yamondo guarepochi chupe” ehi voi eté yuvireco. <sup>6</sup>Judas evocoiyase, “Aviye” ehi. Oseca voi ava porēhiseve Jesús mondo āgua yamotarēhimbar upe.

### Yande Yar caru agüer ipa vahe

<sup>7</sup>Oyepota ari yipindar vahe pan ndayapepoi vahe hu āgua. Ahe pipeve avei ovesa Pascua pieta resendar yucapri seropovēhesa yepi. <sup>8</sup>Evocoiyase Jesús omondo güemimbohe Pedro, Juan reseve aipo ehi:

—Peso, tapemoingatu yande caru āgua Pascua pieta resendar —ehi.

<sup>9</sup>Semimbohe rumo,

—¿Que vo ereipota oromoingatura? —ehi yuvireco chupe.

<sup>10</sup>Evocoiyase aipo ehi:

—Peyepotase tecua pipe, aheve pesepiara mbia vireco vahe cambuchi pipe i. Pesora sētave supi. <sup>11</sup>Aipo peyera peñehe oi yar upe: “Ore mbohesar oporandu: ‘¿Uma oi pipe vo Pascua pieta resendar orohura che remimbohe rese?’ ehi” peyera. <sup>12</sup>Evocoiyase ahe omboyecuaara oi guasu, ivatendar pēu. Aheve pemoingatura yande caru āgua —ehi güemimbohe upe.

<sup>13</sup>Ipare ahe yuviraso, semimombehu rupi tupri ité osepia mbahe. Aheve omoingatu carusa Pascua pieta resendar yuvireco.

<sup>14</sup>Osupitise icaru āgua apóstol reseve yuviroguapi mesave. <sup>15</sup>Evocoiyase aipo ehi:

—¿Cueseve tēi eté niha aipota acaru vaherā pe piri Pascua pieta resendar rese che mano āgua renonde! <sup>16</sup>Esepia niha, ndayapo iri chira pieta Pascua resendar acoi yaviyese voi eté Tūpa mborerecuasa pipe —ehi.

<sup>17</sup>Evocoiyase oipisi igua riru, “Aviye ndeu” ehi Vu upe, iyavei aipo ehi:

—Co amondora pēu, perova-rova pey-acatu. <sup>18</sup>Esepia, co pipe suive ndaihu iri chira uva ricuer acoi ouse voi Tūpa mborerecuasa —ehi.

<sup>19</sup>Ipare oipisi pan, “Aviye ndeu” ehi Vu upe. Aipo ohe pare ombohi-mbohi imondo güemimbohe upe.

—Co che rete, omboyecua imondopirā pe recocuer rese. Na peyera pe mahenduhasa pipe che rese yepi —ehi.

<sup>20</sup>Ēgüe ehi avei carusa pare yapo igua riru rese aipo ehi:

—Co igua riru pipendar omboyecua che Ru remimbotar ipiasu vahe pēu nara, ahe che ruvi ipiyerepirā pe recocuer rese nara. <sup>21</sup>Cūrítei rumo oime mbia mesave yande piri che mondo va-herā che amotarēhimbar upe. <sup>22</sup>Supi eté imboaviyesa itera che, Ava Riquehir, rese ñehesa yipive imombepri. ¡Iparaisu catura rumo acoi mbia che mondosar! —ehi.

<sup>23</sup>Evocoiyase aipo ehise, semimbohe oporandu-randu tēi oyeupe: “¿Ava piha ěgüe ehi?” ehi tēi yuvireco.

### ¿Ava vo ivate catu vahe?

<sup>24</sup>Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco. <sup>25</sup>Evocoiyase Jesús aipo ehi: “Ava mborerecuar co ivi pipendar oyocuai pīrata ava yuvireco yepi. Ahe chupe rumo, ‘Mbahe tupri aposar’ ehi

yuvireco. <sup>26</sup>Pe rumo ěgüe ndapeyei chira. Acoi oyemboivate pota vahe, toyemochihivaheño güeco mbegüesa pipe. Acoi ava cuaisar, tihañeco catu ambuae ava rese. <sup>27</sup>¿Uma pñha ivate catu vahe: co mesave oguapí vahe ocaru yuvireco? ¿Sese ihañeco vahe tie? Acoi mesave oguapí vahe niha. Che rumo co aico pe pñhuvu inungar pe rese ihañeco vahe.

<sup>28</sup>“Pe rumo peico vahe che rupi yepi opacatú che recoãhasa pipe. <sup>29</sup>Sese che amondo pñu pe mborerecuasa inungar che Ru ombou cheu che mborerecuasa ãgua. <sup>30</sup>Esepia, pecarura iyavei peihura che mborerecuasave che piri. Iyavei peguapira opacatu judío recocuer rese porandu ãgua” ehi güemimbohe upe.

### Jesús, “Ndaicuai vahe evocoi mbia’ erera cheu” ehi Pedro upe

<sup>31</sup>Aipo ehi avei yande Yar:

—Simón, Simón, esendu: Carugar oporandu pe recoãha ãgua rese.

<sup>32</sup>Che rumo ayeroqui nde rese nde yeroyasa paneñhi ãgua. Ereyevise cheu, emonguerñhi catu ambuae nde rivireta imoviracua uca ãgua yuvireco oyese —ehi Pedro upe.

<sup>33</sup>—Che Yar, che rumo ayemoingatu voi eté nde rupi che so ãgua nde roquendasave iyavei che mano ãgua nde rupi —ehi Pedro chupe.

<sup>34</sup>—Pedro, supi eté amombehu ndeu: co pipe, tacura ñehe renondeve, nde, “Ndaicuai eté evocoi mbia” erera mbosapí oyupagüer rupi cheu —ehi.

### Virovi ité Jesús recoãha ãgua

<sup>35</sup>Evocoiyase Jesús oporandu güemimbohe eta upe:

—Opomondose acoi mbahe riru porñhi, guarepochi riru porñhi, ambuae pe pitaqui ndugüer rerasoñhise, ¿ipane vo acoi mbahe ahese pñu? —ehi.

—Aní eté —ehi yuvireco chupe.

<sup>36</sup>Evocoiyase,

—Cüritei, acoi mbahe riru vireco vahe, tovírecoveño, guarepochi riru vireco vahe, tovírecoveño avei; acoi ndovirecoi vahe quise pucu, tomondo oyeaosa quise repirã. <sup>37</sup>Supi eté amombehu pñu: iyacatu ité imboaviye tupri ãgua co che rese ñehesa imombehupri aipo ehi vahe: ‘Ava vireco ndaseco pñrai vahe nungar yuvireco’ ehi vahe. Supi eté yaviyera co icuachiapirer che resendar —ehi.

<sup>38</sup>Evocoiyase semimbohe aipo ehi yuvireco:

—Ore Yar, cohava oime ñuvirío quise pucu —ehi.

—Ahe güeraño ité aviye —ehi güemimbohe eta upe.

### Jesús oyoerqui Getsemaní ve

<sup>39</sup>Ipare Jesús osē oso ivitri Olivo ve. Ahe ivitrive oso yepi, aheve semimbohe yuviraso yuvireco supi. <sup>40</sup>Oyepotase aheve yuvireco, Jesús aipo ehi güemimbohe upe:

—Peyeroqui angaipa pe yapoñhi ãgua —ehi.

<sup>41</sup>Ipare oyepepi güemimbohe sui, inungar ita imombosa vahe amombrimi, aheve oñenopiha, oyoerqui <sup>42</sup>aipo ehi: “Che Ru, ereipotase, che renose eve co mbahe tñi sui; tayapo eme che remimbotar tñi, nde remimbotar rupira rumo” ehi.

<sup>43</sup>Evocoiyase oyemboyecua Tüpa rembiguai chupe, seco momirata ãgua. <sup>44</sup>Mbahe-mbahe tñi porarasa pipe oyoerqui catu. Ahese sacuvor inungar tuvi osē ichui otiqui ivive.

<sup>45</sup>Oñarapuhase oyoerquisa sui, oyevi oso güemimbohe uve. Ahe rumo opaño yuviroque yuvirocua oviharñhisa pipe.

<sup>46</sup>Evocoiyase,

—¡Mahera opaño peque! Peñarapuha, peyeroqui catu pe viapiñhi ãgua mbahe tñi pipe —ehi güemimbohe upe.

### Jesús oipisi yuvireco

<sup>47</sup> Jesús ñehe viteseve, oyepota ati ava yuvireco chupe. Judas doce semimbohe pāhu pendar tenonde seci. Ahe oyemboya oso sese sovaupite āgua. <sup>48</sup> Evocoyase aipo ehi Judas upe:

—Judas, ¿mahera vo che, Ava Riquehir, rovaupitesa pipe che mondo eve che amotarēhimbar upe? —ehi.

<sup>49</sup> Semimbohe eta rumo, mbahe-mbahe tēi repiase, oporandu yuvireco:

—Ore Yar, ¿yavavara yande quise pucu pipe? —ehi yuvireco chupe.

<sup>50</sup> Ñepei rumo supindar, pahi rerecuar ivate catu vahe rembiguai nambi yasú cotindar oyasia. <sup>51</sup> Ahe rumo,

—Teheni, evocoi rupive —ehi güemimbohe eta upe.

Ipare opoco inambi rese ombogüera voi. <sup>52</sup> Ichui aipo ehi güecasar opacatu pahi eta rerecuar upe, tūparo rārosar upe, tecua pipendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye? <sup>53</sup> Aicose tūparo pipe pe pāhuve ari yacatu rupi, na ndapeyapoi eté co nungar cheu. Avíyeño rumo, oyepota ité niha pēu imombepupri Carugar pīratasa pipe mbahe-mbahe tēi apo āgua —ehi.

### Pedro, “Ndaicuai vahe evocoi mbia” ehi Jesús upe

<sup>54</sup> Evocoyase Jesús oipisi yuvireco, oviraso pahi eta rerecuar ivate catu vahe rētave yuvireco. Pedro rumo amombri rupive tēi osaquicue moñaño oso. <sup>55</sup> Aheve ñachimbrí pipe oyatapí yuvireco, oyere tupri tata rese oyephe yuvinoi. Aheve avei Pedro ipāhuve chini. <sup>56</sup> Evocoyase cuña mbiguai, osepiase Pedro, omahe tupri iri sese aipo ehi:

—Co ava avei niha acoi Jesús rupindar —ehi.

<sup>57</sup> Ahe rumo aipo ehiño:

—Cuña, ndaicuai vahe ité ahe mbia —ehi.

<sup>58</sup> Iparemi tēi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tēi, ndaheí eté rumo che supindar aico —ehi.

<sup>59</sup> Ñepei hora paremi tēi, ambuae aipo ehi chupe:

—Supi eté rumo co ité supi seci vahe. Esepia, Galilea iguar ité niha —ehi.

<sup>60</sup> Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe viteseve, oñehe tacura. <sup>61</sup> Evocoyase yande Yar oyemboyere sese. Ahe ramoseve oyemomahenduha:

“Co pipe tacura ñehe renondeve, ‘Ndaicuai vahe’ erera mbosapi oyupagüer rupi cheu” ihe agüer rese. <sup>62</sup> Ahese osē, oyasehó iteanga oso.

### Sārosar mara-mara tēi Jesús vireco yuvireco

<sup>63</sup> Evocoyase ava Jesús rārosar iguayí tēi yuvirocua-rocua yuvireco sese. <sup>64</sup> Os-esacua yuvireco. Ipare oporandu yuvireco chupe:

—¡Eicua ité ru, ava evocoi ocua nde rese! —ehi yuvireco chupe.

<sup>65</sup> Iyavei setá mbahe rese oñehe-ñehe tēi yuvireco chupe.

### Jesús serasosa ava ñemonuhasa ivate catu vahesave

<sup>66</sup> Ahe ari pipe, cōhese, oñemonuha ava judío rerecuar, pahi eta rerecuar iyavei opacatu Moisés porocuita rese oporombohe vahe yuvireco Jesús reraso uca āgua ava ñemonuhasa ivate catu vahesave, oporandu mbahe rese yuvireco chupe:

<sup>67</sup>—¿Supi eté vo nde Poropisiosar ereico? Emombehu ru oreu —ehi yuvireco chupe.

—Amombehuse rumo pëu, ndacheeroyai chietera peye —ehi judío rerecuar upe—. <sup>68</sup>Inungar che aporanduse mbahe rese pëu, pe avei ndapemboyeveii chietera cheu viña no. <sup>69</sup>Co pipe suive rumo che, Ava Riquehir, aguapira Tüpa mbahe mboavaisarëhi acato coti —ehi.

<sup>70</sup>Ichui opacatu ava oporandu yuvireco chupe:

—Evocoyase, ¿nde ité ereico Tüpa Rahir? —ehi.

—Supi eté niha aipo aipo peye cheu —ehi mborerecuareta upe.

<sup>71</sup>Evocoyase ahe aipo ehi yuvireco:

—¿Indó! ¿Ava iri vo evocoyase mbahe omombehura yandeu? Yasendu niha iñehe ité cute —ehi mborerecuar oyeupe yuvireco.

### Jesús serasosa mborerecuar Pilato rovai

**23** Evocoyase opacatu ava opüha yuvireco Jesús reraso ägua mborerecuar Pilato rovai. <sup>2</sup>Aheve oiñehengapo aipo ehi yuvireco:

—Orosepia co mbia oipihañemoñeta rerova ati uca ava yande recua rupindar aipo ehi: “Pemondoi rene Roma pendar mborerecuar ivate catu vahe upe guarepochi” ehi. Iyavei, “Che Poropisiosar mborerecuar ivate catu vahe aico” ehi oico —ehi yuvireco Pilato upe.

<sup>3</sup>Evocoyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboyeveii Pilato upe.

<sup>4</sup>Evocoyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbia que mbahe oyapo vaheñã —ehi

<sup>5</sup>Ahe ava eta rumo,

—Supi eté opacatu ava oipihañemoñeta mboyeaviratí uca opacatu tecua rupindar. Yipindar omboipi Galilea rupi oico. Cüritei co Judea ve ëgiue ehiño ité —ehi ava eta Pilato upe yuvireco.

### Jesús imondosa mborerecuar Herodes rovai

<sup>6</sup>Pilato osenduse aipo ñehesa oporandu, “¿Supi eté püha co mbia Galilea iguar?” ehi. <sup>7</sup>“Ahe pendar ité” ehi se yuvireco chupe, ahe se omondo Herodes upe, ahe acoi mborerecuar Galilea rupindar. Ahe se avei secoi Jerusalén ve. <sup>8</sup>Herodes sorivete Jesús repiase. Espia, setá ari osepia pota tēi seräcua anduse yepi. Evocoyase oipota ité poromondiisa oyapo vaheñã oyeovaque viña. <sup>9</sup>Sese oporandu ati mbahe rese chupe. Nomboyeveii eté rumo Herodes upe. <sup>10</sup>Aheve opacatú pahi eta rerecuar iyavei Moisés porocuaite rese oporombohe vahe eta seroñrosave oñemoñetañeta tēi sese Herodes rovaque yuvireco. <sup>11</sup>Evocoyase Herodes osundao eta reseve iñehe mara-mara tēi Jesús upe sese oguayí tēisa pipe yuvireco. Omboyeponde avei turucuar iporañete vahe pipe yuvireco. Egiue ehi imboyeveii Herodes Pilato upe. <sup>12</sup>Ahe ari pipe suive oyembori Pilato Herodes rese. Ndoyebotai vahe tie yipindar yuvireco viña.

**“¿Tayaticasa!” ehi Jesús upe yuvireco**

<sup>13</sup>Evocoyase Pilato opa uca omonuha opacatu pahi eta rerecuar, judío rerecuareta, opacatu ava eta avei. <sup>14</sup>Ipape aipo ehi chupe:

—Pe niha peru co mbia cohava cheu, ‘Omañeco tēi ava secua rupi’ peye. Che rumo aporandu tēi pe rovaque mbahe rese chupe. Ndipoi eté rumo mbahe sembiapo naporai vahe pe remimombehu rupi. <sup>15</sup>Herodes avei, ‘Ndipoi mbahe sembiapo naporai vahe imano ägua’ ehi.



Sese omboveviño Jesús imbou cheu.  
<sup>16</sup> Ainupa ucara rumo. Ipare amoseñora  
 —ehi Pilato.

<sup>17</sup> Pascua pieta pipe iya ité Pilato ava  
 upe ñepeí soquendapri mose água.

<sup>18</sup> Opacatú guasu rumo ava oñehe  
 pĩrata yuvireco aipo ehi:

—¡Co topitaño oreu! ¡Barrabás  
 emoseño! —ehi ava eta Pilato upe.

<sup>19</sup> Co mbia Barrabás tecua pipe mbahe  
 tẽi mopuhasa sui iyavei oporapichisa  
 sui oyeoquenda uca vahe. <sup>20</sup> Pilato rumo  
 omose pota Jesús viña. Sese oporandu iri  
 ava upe imose água. <sup>21</sup> Ahe rumo osapu-  
 cai pĩrata catu yuvireco:

—¡Aní, tayaticasa! ¡Tayaticasa curusu  
 rese! —ehi ati-atiño yuvireco.

<sup>22</sup> Imombosapisa rese Pilato oñehe iri:  
 —¿Mbahe ité vo oyapo naporai vahe?  
 Ndipoi eté niha que mbahe sembiapo  
 yuca água, ainupa uca tẽira rumo. Ipare  
 amoseñora —ehi.

<sup>23-24</sup> Ava rehii rumo osapucaí pĩratá  
 catu yuvireco, “Tayaticasa ité” ehi-ehiño  
 yuvireco. Sese chupe, “Tayaposa evo-  
 coi yase semimbotar yuvireco” ehiño Pi-  
 lato ava eta upe. <sup>25</sup> Ēgüe ehi imose co  
 mbia Barrabás, acoi soquendapri mbahe-  
 mbahe tẽi mopuhasa sui, iporapichisa  
 sui avei ava remimbotar rupi. Ipare  
 omondo Jesús sãrosar upe ava remimb-  
 otar apo água sese.

### Jesús yaticasa curusu rese

<sup>26</sup> Oime mbia Simón serer vahe Cirene  
 iguar ou vahe que co coti rupi sui. Ovira-  
 sose Jesús yuvireco yatica águave, ahe  
 mbia upe, “Nde terevosii curusu rese  
 Jesús raquicuei” ehi voĩño tẽi yuvireco.

<sup>27</sup> Ava rehii yuviraso saquicuei. Cuña  
 avei setá oyaseho oviharẽhisave yu-  
 vireco sese. <sup>28</sup> Omahese rumo cuña rese  
 aipo ehiño chupe:

—Cuña Jerusalén iguar, peyasehoi  
 rene che rese. Peyese ae peyaseho, pe  
 membrí rese avei. <sup>29</sup> Esepia, oura ari

naporai vahe. Ahese aipo peye tẽira:  
 ‘Aviye catu acoi cuña nimembii vahe  
 iyavei ndoicuai vahe imocambu omem-  
 bri’ peye tẽira. <sup>30</sup> Ahese avei ava ivitri  
 uve aipo ehira yuvireco: ‘¡Toviapi ore  
 harive!’ ehira osiquiyepave. Iyavei ivi-  
 vate vahe upe: ‘¡Tore mi!’ ehi tẽira yu-  
 vireco. <sup>31</sup> Esepia, Ēgüe ehise ivira yivive  
 vitesse, ¿mara ehira vo catu oipise? —ehi  
 cuña eta upe.

<sup>32</sup> Iyavei viraso ñuvirío mbia ndaseco  
 põrai vahe supive yaticapirã yuvireco.

<sup>33</sup> Oyepotase Ava Āca Cangüer serer  
 vahesave, aheve oyatica curusu rese  
 yuvireco. Iyavei oyatica ñuvirío mbia,  
 ñepeí mbahe rese ipocosa coti, ambuae  
 evocoi yase mbahe rese ipocoẽhisa coti.

<sup>34</sup> Ahese Jesús aipo ehi:

—Che Ru, ndeñero co ava upe sembi-  
 apo rai rese. Esepia, ndoicuai co mbahe  
 güembiapo yuvireco —ehi.

Sundao evocoi yase iguayĩño Jesús tu-  
 rucuar rese oyeupe imboyaho-yaho água  
 yuvireco. <sup>35</sup> Ava rehii osepia yuvireco;  
 mborerecuareta avei seroĩrosave aipo  
 ehi yuvireco chupe:

—Oipĩsiro ambuae ava, toñepisiro  
 ru ahe ae ité cute Tũpa Rembipo-  
 ravo Poropĩsirosar güecosa pipe —ehi  
 yuvireco.

<sup>36</sup> Iyavei sundao seroĩropare omondo  
 vinagre itoihu yuvireco, <sup>37</sup> iyavei aipo  
 ehi yuvireco chupe:

—¡Nde niha aipo ava judío eta rere-  
 cuar guasu ereico! ¡Eñepisiro ru nde ae  
 ité! —ehi sundao eta yuvireco chupe.

<sup>38</sup> Curusu rese ñaca harive icuachiapri  
 aipo ehi oĩ: “Co judío rerecuar guasu”  
 ehi.

<sup>39</sup> Evocoi yase ndaseco põrai vahe yati-  
 capri iñehe mara tẽi chupe aipo ehi:

—¡Nde Poropĩsirosar ereicose,  
 eñepisiro ru nde ae, ore avei ru ore  
 pĩsiro eve! —ehi chupe.

<sup>40</sup> Ambuae evocoi yase aipo ehi voi on-  
 dugüer uve:

—¿Nderesiquiyeimi rutei vo Tūpa sui? Nde avei niha ocañi tēi vaheṛā. <sup>41</sup> Yande rumo co yande rembiapo sui tēi mara-mara tēi yande rereco yuvireco; co mbia rumo mbahe sembiapoēhi pipe sui tēi na ehi serecosa —ehi onduḡüer upe.

<sup>42</sup> Evocoiyase aipo ehi iri:

—Jesús, che paraisuerecomi tēi eve nde eremboipise nde mborerecuasa —ehi.

<sup>43</sup> Evocoiyase omboyeve chupe:

—Supi eté co pipe ereicora tecua apirēhi vahesave che rupi —ehi Jesús ahe mbia upe.

### Jesús mano agüer

<sup>44</sup> Osupitise rumo mbiter ari, opa tupri pītu ivi rupi; las tres pipe rumo opa icatu. <sup>45</sup> Ari avei ogüe tupri, turucuar guasu tūparo asiasa avei mbiter rupi tupri ovo. <sup>46</sup> Evocoiyase Jesús oñehe pīrata:

—¡Che Ru, amondo che espíritu ndeu! —ehi.

Aipo ohe pare voi omano.

<sup>47</sup> Evocoiyase Roma iguar sundao rerecuar osepiase co mbahe poromondiisa Tūpa mboeteisa pipe aipo ehi:

—Supi eté co mbia ndaseco marai vahe —ehi.

<sup>48</sup> Iyavei opacatu ava supindar yuvirecoi vahe osepiase co nungar mbahe, oye-pochiha nupa-nupa tēi oyepihamondiisa pipe yuvireco. <sup>49</sup> Opacatu avei ava oicua vahe Jesús, ipāhuve cuña Galilea sui yugüeru vahe, osepiño tēi amombrive co nungar mbahe yuvireco.

### Jesús apacatu agüer tuvipa pipe

<sup>50-51</sup> Oime mbia aviye etepri vahe, ahe serer José, tecua Arimatea pendar. Ahe tecua ivi Judea pipendar, judío rerecuar ñemonuhasa ivate catu vahe pendar secoi. Ahe mbia viroya vahe ité Tūpa ombou vaheṛā omborerecuasa pipe mbahe moingatu āgua. Sese nda-

hei ipihañemoñeta rupi co mborerecuar oyapo vahe mbahe Jesús upe yuvireco. <sup>52</sup> Evocoiyase ahe oso Pilato rētave oporandu āgua Jesús rehōḡüer rese. <sup>53</sup> Curusu sui seroyi pare voi, oimama turucuar secose vahe pipe, ipoyava imondo tuvipa pipe ita guasu yohopri ndiporusa vitei vaheve yuvireco. <sup>54</sup> Esepia, ahe ari omoingatu mbahe mbituhusa ari upe nara, ahe mbituhusa rumo osupiti pota ité.

<sup>55</sup> Cuña yugüeru vahe Jesús rupi Galilea sui, yuvirasoño ité suvipave, osepia sehōḡüer apocatusé yuvireco. <sup>56</sup> Oyevise güētave yuvireco omoingatu mbahe siacua vahe tehōḡüer resendar ipichi āgua.

### Jesús ocuerayevi

**24** Ahe cuña opituhu mbituhusa ari pipe judío porocuaita rerozasave yuvireco. <sup>1</sup> Cōhe ramomise domingu pipe, oyeve yuviraso tuvipave mbahe siacua vahe reseve. <sup>2</sup> Oyepotase yuvireco tuvipave, osepia soquendasa ita guasu ndipo irise güendagüerve. <sup>3</sup> Evocoiyase yuviroique voi tuvipa pipe. Ndoyosui rumo yande Yar rehōḡüer yuvireco. <sup>4</sup> Ndoyembovihai tēi; ndoicatu iri. Ahese aviyeteramo tēi osepia ñuvirío mbia iturucuar sendi vahe oipive yuvireco. <sup>5</sup> Opañño ñaca iviso ivi coti yuvireco osiquiyepave. Evocoiyase co mbia aipo ehi yuvireco chupe:

—¡Mahera peseca tuvipa pāhu rupi ava oicove vahe! <sup>6</sup> Ndipoi mo cohave; ocuerayevi mo ahe. Peyemomahenduha ñehengagüer ivi Galilea rupi omombehu vahecuer rese, <sup>7</sup> “Che, Ava Riquehir, imondoprira ava angaipa viyar povrive, iyavei che aticara curusu rese yuvireco. Mbosapi ari pare rumo acuerayevira” ehi acoi —ehi cuña upe yuvireco.

<sup>8</sup> Evocoiyase cuña oyemomahenduha voi Jesús ñehengagüer rese yuvireco.

<sup>9</sup>Oyevise tuvīpa sui yuvireco, omombehu opacatu co once apóstol yuvirecoi vahe upe, opacatu ambuae upe avei. <sup>10</sup>Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago si María iyavei ambuae cuña eta no. <sup>11</sup>Apóstol upe rumo oyeupe mombehuse aviye aipo ehi tēi vahe; ndoviroyai eté yuvireco.

<sup>12</sup>Pedro rumo yandu ramoseve voi, osē, oña oso tuvīpave. Omahese tuvīpa pipe, turucuar güeraño osepia co cotimi tuise. Evocoiyase oyepihamondii tēi ‘¿mara ehi rutei pīha?’ oya oyevi oive oso.

**Jesús oyemboyecua  
ñuvirío güemimbohe upe  
tecua Emaús piar rupi**

<sup>13</sup>Ahe ari pipeve caharuse, ñuvirío semimbohe yuviraso tecua Emaús ve. Ahe once kilómetro tecua Jerusalén sui. <sup>14</sup>Ahe peri rupi oñemoñeta yuviraso opacatu co mbahe oime vahecuer rese. <sup>15</sup>Oñemoñeta viteseve, Jesús tei-eté oyemboya sese, oguata supi. <sup>16</sup>Yepe osepia tēi, ahe rumo ndoyepiacua ucai eté chupe. <sup>17</sup>Evocoiyase Jesús oporandu chupe:

—¿Mbahe rese vo pe ñehē etepri pe guatasa rupi peico? —ehi.

Aipo hese, opita, ndovihai yuvinoha. <sup>18</sup>Ipāhu pendar Cleofas serer vahe omboyevi chupe:

—Nde güeraño revo Jerusalén ve erico vahe ndereicuai mbahe oime vahe tecua pipe —ehi.

<sup>19</sup>Evocoiyase,

—¿Mbahe vo oime yandeu? —ehi.

—Jesús mo Nazaret pendar, ahe Tūpa ñehē mombehusar seco pīrata vahe opacatu mbahe apo āgua, mbahe mombehu āgua avei Tūpa rovaque iyavei opacatu ava rovaque. <sup>20</sup>Omondo pahī rerecuar iyavei yande rerecuareta

yamotarēhisave yuca uca āgua curusu rese yuvireco. <sup>21</sup>Ore rumo oroyeroya ité sese. “Ahe yande pīsīrora yande amotarēhimbar sui” orohe chupe viña. Cūrītei rumo opa mbosapī ari yucare. <sup>22</sup>Ore pāhu pendar cuña ndore mbovihai eté oyevise suvipa sui yuvireco. Esepia, yipīndar yuvirasose añihiveive tuvīpave, <sup>23</sup>ndoyosui eté sehögüer yuvireco. Ahese aipo osepia Tūpa rembiguai aipo ehi vahe yuvireco chupe: “Jesús mo oicove cūrītei” ehi. Ahe evocoiyase yugüeru imombehu oreu. <sup>24</sup>Iyavei ambuae ore ndugüer yuvirasose tuvīpave cuña remimombehu rupi tupri avei. Ndosepiyai eté rumo Jesús yuvireco —ehi Cleofas chupe tupri ité.

<sup>25</sup>Evocoiyase aipo ehi ahe ñuvirío mbia upe:

—¿Ndapeicuai eté rumo pe piha pipe seroya tupri āgua opacatu Tūpa ñehē mombehusar remimombehugüer! <sup>26</sup>¿Ndapeicuai vo Poropīsīrosar iparaisu rane itera mbahe-mbahe tēi virecosa pipe güecua porañetesave güeique āgua renondeve? —ehi.

<sup>27</sup>Ipare opa omombehu icuachiapri Moisés cuachiar pipendar iyavei opacatu Tūpa ñehē mombehusar cuachiar pipendar oyese ñehē agüer.

<sup>28</sup>Oyepotase ahe tecuave yuviraso, Jesús rumo aviye oguataño vite vaherā senonde. <sup>29</sup>Co mbia rumo oñehē yuvireco chupe:

—Epitaño ore piri, caharu etepri. Pītura moco ndeu —ehi yuvireco chupe.

Evocoiyase oiique, opitaño ipiri yuvireco. <sup>30</sup>Oguapise yuvinoi mesave, oipisi pan, “Aviye ndeu” ehi Tūpa upe. Ipare ombohi co ñuvirío mbia upe imondo. <sup>31</sup>Ahese voi semimbohe omahecua ramo yuvireco sese, ahe rumo cūrīteimi ndoyemboyecua iri so-vai chupe. <sup>32</sup>Evocoiyase aipo ehi oyeupe yuvireco:

—Yande mbopihañemoñeta pīratami eté peri rupi oñehese yandeu co tecocuer icuachiapri rese —ehi yuvireco.

<sup>33</sup> Ipare ndopita pucu iri; oyeviño voi yuvirasu tecua Jerusalén ve. Aheve osepia once tupri vahe apóstol, omboetasa avei. <sup>34</sup> Aheve oñemonuha vahe aipo ehi yuvireco:

—Supi eté rumo yande Yar ocueravei. Esepia, oyemboyecua ité Simón upe —ehi.

<sup>35</sup> Evocoiyase ahe avei omombehu, “Oreu avei oyemboyecua oroguatase peri rupi. Ombohise pan ore piri, ahese ramo oroicua” ehi yuvireco omboetasa upe.

### **Jesús oyemboyecua güemimbohe eta upe**

<sup>36</sup> Ahe oñehe viteseve yuvireco co tecocuer rese, ahese Jesús oyemboyecua chupe aipo ehi:

—Avirave, mbahe tupri pipe tapeico —ehi güemimbohe eta upe.

<sup>37</sup> Ahe rumo oyembosiquiye guasu yuvireco ‘hägüer revo’ oyapave.

<sup>38</sup> —¡Mahera pesiquiye! ¡Mahera pereco vite pe poreroyaëhisa pe piha pipe! <sup>39</sup> Pemahe che po rese, che pi rese avei. Che ité niha co aico. Pepoco ru che rese. Tache reroya ru peye. Esepia, ava hã ndovirecoi voho iyavei ocangüer; che rumo areco ité —ehi güemimbohe eta upe.

<sup>40</sup> Aipo ohe viteseve omboyecuapa opo, opi avei chupe. <sup>41</sup> Ahe rumo vorivetesu pipe iyavei oyepihambosiquiye vitesa sui ndoviroya tupri vitei eté yuvireco. Evocoiyase aipo ehi:

—¿Perecomi vo mbahe yande caru ägua? —ehi güemimbohe upe.

<sup>42</sup> Evocoiyase omondo pira apiremi oyi vahe yuvireco chupe. <sup>43</sup> Ipare oipisi, ohu opacatu güemimbohe rovaque. <sup>44</sup> Ipare aipo ehi:

—Co rese acoi añehe vichico cuese pe rese aico vitese che mano renondeve. Yaviye ranera opacatu ñehesa che resendar Moisés porocuaita cuachiapri pipe, iyavei Tüpa ñehe mombehuser yuvirecoi vahe rembicuachiagüer pipe, Salmo pipe avei —ehi.

<sup>45</sup> Ëgüe ehi evocoiyase opacatu osenducua uca aracahendar icuachiapirer güemimbohe upe <sup>46</sup> aipo ehi:

—Co icuachiasa Poropširosar iparaisura omano ägua. Ipare mbosapi ari pare ocuerayevira. <sup>47</sup> Jerusalén sui tupri opacatu ivi yacatu rupi imombehusara serer pipe, “Pemboasi pe angaipa, peyevi Tüpa upe pëu ñeroi ägua” hesara. <sup>48</sup> Pe niha peico opacatu co nungar mbahe repiasar imombehu ägua. <sup>49</sup> Che amboura che Ru remimombehu pe harive. Pepitañora rumo cohave tecua Jerusalén ve acoi peipisise voi pīratasa iva suindar —ehi güemimbohe eta upe.

### **Ivave Jesús so agüer**

<sup>50</sup> Evocoiyase Jesús yuvinose tecua sui yuvirasu tecua Betania popive. Aheve ñuvirío opo omopuha, osovasa mbahe tupri reime ägua chupe. <sup>51</sup> Ipare oyepepi güemimbohe sui. Ahe ramoseve serasosa ivave. <sup>52</sup> Semimbohe evocoiyase osapucái imboetisave. Ipare oyevi Jerusalén ve vorivetesu pipe yuvireco. <sup>53</sup> Iyavei ahe ari yacatu rupi yuvirasu tüparo guasu pipe osapucái Tüpa mboetisave yuvireco yepi. Aipo rupive.

JUAN REMBICUACHIA JESUS  
RECOCUER RESENDAR

SAN JUAN

Tūpa Ñehe oyeapo ava

**1** <sup>1-2</sup>Jesús yipisuive ité Tūpa Ñehe secói. Ahe oicove mbahe apoēhi viteseve Tūpa rese. Esepia, ahe niha Tūpa secói. <sup>3</sup>Ipipe avei Tūpa opacatu mbahe oime vahe oyapo; ndipoi eté mbahe sembiapoēhi. <sup>4</sup>Jesús niha vireco tecovesa apirēhi vahe oyese. Ahe tecovesa tesapesa nungar secói opacatu ava upe. <sup>5</sup>Ahe tesapesa omboyecua tecocuer supi eté vahe pītumimbi nungar mbahe naporai vahe aposar pāhuve. Ahe mbahe tēi aposar rumo ndoicatui eté secopi yuvireco.

<sup>6</sup>Oime mbia Tūpa remimbou. Ahe Juan serer vahe. <sup>7</sup>Ahe rumo ou co tesapesa cua uca āgua ‘toviroya opacatu ava yuvireco’ ohesave. <sup>8</sup>Ahe rumo ndahei eté tesapesa; imombehugar tēi rumo secói. <sup>9</sup>Co tesapesa supi eté vahe osape opacatu ava. Ahe ou ité co ivi pipe.

<sup>10</sup>Yepe tie ipipe yapopri opacatu ava viña, sembiapo rumo ndoicuai co ivi pipe secoise yuvireco. <sup>11</sup>Supi eté ouse güecuave, secua pendar ae rumo ndoipisii yuvireco. <sup>12</sup>Opacatu rumo acói oipisi vahe seroyasave yuvireco, ahe chupe omondo ñecuñarosa Tūpa rahir seco āgua yuvireco. <sup>13</sup>Ndahei rumo co ivi pipendar rahir nungar que oha vahe ambuae ava remimbotar pipe tēi. Ahe rumo Tūpa rahir ité yuvirecoi.

<sup>14</sup>Ipare ahe Tūpa Ñehe, oyeapo ava, oicove yande pāhuve co ivi pipe oporoaisusave mbahe supi eté vahe aposa pipe. Iyavei orosepia ité seco porañetesa. Co seco porañetesa oipisi vahe Vu sui Tahir ñepe vahe güeco pipe. <sup>15</sup>Juan niha oñehe sese ava upe aipo ehi: “Co uve

niha acói aipo ahe vahe cuese: ‘Acoi ou vaheṛā che raquicuei, ahe ivate catu vahe che sui. Esepia, yipive ité secói che yesuēhi viteseve’ ahe” ehi.

<sup>16</sup>Esepia, opacatu ité yaipisiño iporovasasa tuvichá vahe ombouño vahe ité yandeu ari yacatu rupi yepi. <sup>17</sup>Mborocuaite yaipisi Moisés sui; porovasasa rumo iyavei mbahe supi eté vahe, ahe güero Jesucristo yandeu. <sup>18</sup>Ndipoi eté ava osepia vahe Tūpa; Tahir ñepe vahe, secói vahe ité ipiri, ahe oicua uca yandeu.

Juan Oporoāpiramo vahe  
oñehe Jesucristo rese

<sup>19</sup>Judío rereciar guasu tecua Jerusalén pendar oyocuai pahi eta iyavei ipītiviisareta imondo Juan uve ‘¿Ava vo nde? tehi yuvireco chupe’ oyapave icua āgua. <sup>20</sup>Ahe rumo oyemombehu ité aipo ehi:

—Che ndahei eté Poropisiosar aico — ehi.

<sup>21</sup>Evocoyase oporandu iri yuvireco: —¿Ava ité vo nde? ¿Nde tie Elías ereico? —ehi.

—Ndahei eté che ahe aico —ehi.

Evocoyase,

—¿Nde tie acói Tūpa ñehe mombehugar ou vaheṛā? —ehi yuvireco chupe.

—Aní eté —ehi.

<sup>22</sup>—¿Ava rutei vo evocoyase nde? ¿Emombehu oreu ore oromombehu vaheṛā ore mbousar uve! ¿Mbahe ité vo eremombehura ndeyesuindar oreu? —ehi yuvireco chupe.

<sup>23</sup>—Che aico oñehe vahe ivi iporupirēhisa rupi aipo ahe: ‘Pemoingatu pe recocuer yande Yar yepotase nara’ ahe pēu. Ahe inungar acói Tūpa ñehe mombehugar Isaías aipo ehi vahe aracahe —ehi.

<sup>24</sup>Ahe yuviraso vahe chupe, fariseo remimondo yuvirecoi, <sup>25</sup>oporandu yuvireco chupe:

—Evocoiyase ndahei niha aipo nde Poropĩsirosar, ndahei avei Elías, ndahei eté Tūpa ñehe mombehusar imombehupri ereico. ¿Mahera ru evocoiyase ereporoãpiramo? —ehi yuvireco chupe.

<sup>26</sup> Evocoiyase fariseo upe aipo ehi:

—Che rumo i pipe aporoãpiramo; oime rumo mbia pe pãhuve ndapeicuai vahe. <sup>27</sup> Ahe co ivi pipe ou vaheṛā che raquícuei. Che rumo ndahei eté seco catupri vahe aico ipitaquisā yora āgua —ehi.

<sup>28</sup> Co opacatu mbahe yaposa tecua Betania ve, iai Jordán rovai añihivei coti. Aheve Juan oporoãpiramo yepi.

### **Tūpa remimbou Ovesa nungar opacatu ava angaipa repirā**

<sup>29</sup> Ahere ayihive Juan osepia Jesús oyemboyase oyese aipo ehi: “¿Pesepia, co Tūpa remimbou Ovesa nungar seropovēhepirā opacatu ava angaipa mocañi āgua! <sup>30</sup> Añehese sese aipo ahe: ‘Che raquícuei oura mbia ivate catu vahe che sui. Esepia, yipive vahe ité che sui’ ahe acoi cuese. <sup>31</sup> Che rumo yipindar ndaicuai ahe yande remiaro ou vaheṛā. Sese niha aporoãpiramo i pipe vichico imboyecua āgua che mu judío yuvirecoi vahe upe” ehi.

<sup>32</sup> “Che asepia Espíritu Santo ogüeyise iva sui inungar apicasu, opita tupri iharive” ehi. <sup>33</sup> “Yipindar rumo ndaicuai eté. Tūpa che cuai vahe rumo che poroãpiramo āgua i pipe, aipo ehi cheu: ‘Acoi eresepiase Espíritu Santo ogüeyise, opitase mbia harive, ahe mbia oporoãpiramora Espíritu Santo pipe’ ehi. <sup>34</sup> Che niha asepia ité. Sese, ‘Co Tūpa Rahir ité secoi’ ahe pēu” ehi.

### **Yipindar vahe Jesús remimbohe**

<sup>35</sup> Ahere ayihive Juan secoi aheve avei ore ñuvirío mbia oroico vahe reseve.

<sup>36</sup> Jesús ore cuāse, Juan aipo ehi oreu:

—¿Pesepia, ndo co mbia Tūpa remimbou Ovesa nungar seropovēhepirā! —ehi oreu.

<sup>37</sup> Aipo ihe ramoseve, oroguata voi eté supi. <sup>38</sup> Evocoiyase omahe guaquícuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoiyase,

—Porombohesar, ¿que vo nde recosa? —orohe chupe.

<sup>39</sup> —Yaso, tapesepia ru —ehi oreu.

Evocoiyase oroso, oroyepota las cuatro pipe secosave. Aheve ore pĩtu ité ipiri.

<sup>40</sup> Simón Pedro rivri, Andrés, ahe che ndugüer ahese. <sup>41</sup> Ahe rane aipo oseca viquehir Simón aipo ehi chupe:

—Orosepia ité Poropĩsirosar —ehi (‘Cristo’ oyapave).

<sup>42</sup> Ipare voi, viraso Simón Jesús uve. Osepia, Jesús aipo ehi chupe:

—Nde Simón, Juan rahir, ndererguā rumo Cefas —ehi (‘Pedro’ oyapave).

### **Jesús oñehe Felipe upe, Natanael upe avei oyeupi iguata āgua**

<sup>43</sup> Ahere ayihive voi Jesús ipihañemoñeta oso āgua ivi Galilea rupi. Aheve osepia Felipe, aipo ehi chupe:

—Erio che rupi —ehi.

<sup>44</sup> “Aviye” ehi Felipe, ahe Pedro iyavei Andrés recua Betsaida pendar secoi.

<sup>45</sup> Ipare oso Natanael reca, aipo ehi chupe:

—Orosepia Poropĩsirosar, sesendar acoi Moisés oicuachía cuachiar porocuita resendar pipe aracahe, oicuachía avei sesendar Tūpa ñehe mombehusareta yuvireco. Ahe Jesús, José rahir, tecua Nazaret pendar —ehi.

<sup>46</sup> Natanael rumo aipo ehi:

—¿Oime pĩha yuvinose vahe ava aviye vahe Nazaret pendar? —ehi.

—Yaso, tereseapia ru —ehi Natanael upe.

<sup>47</sup> Acoi oyepota senise Natanael ou, Jesús sepiase, aipo ehi voi chupe:

—Co mbia secoi judío ete ité, ndo-porombopai vahe —ehi.

<sup>48</sup> —¿Mara ere che cua eve? —ehi Natanael chupe.

—Che oroepia yipive Felipe nde reca renondeva ivira higeravrive ereicose —ehi Natanael upe.

<sup>49</sup> —Porombohesar, ¡nde niha Tūpa Rahir ereico, Israel iguar recuar guasu! —ehi Natanael chupe.

<sup>50</sup> —¡Che roroya voi eté acoi, “Oroepia iviravrive” che he sui tēi eve! Eresepiara rumo co mbahe sui aviye catu vahe —ehi.

<sup>51</sup> Iyavei aipo ehi opacatu upe:

—Supi eté pesepiara iva oyemboi tuprise iyavei Tūpa rembiguai eta igüeyise che, Ava Riquehír, upe, iyevisse avei ivave yuvireco —ehi.

### Mendasa tecua Caná ve

**2** Ipare imombosapisa ari pipe, oime mendasa tecua Caná ve, Galilea ivi rupi. Jesús si avei secoi aheve, <sup>2</sup> iyavei Jesús ore semimbohe oroico vahe reseve ore soho avei yuvireco aheve. <sup>3</sup> Ēgüe ehi rumo opa tēi uva ricuer. Evocoyase Jesús si,

—Ndipo iri uva ricuer —ehi chupe.

<sup>4</sup> —Cuña, ¿mahera vo aipo ere cheu? Che remimbotar rumo ari ndoyepota vitei cheu —ehi osi upe.

<sup>5</sup> Ichi rumo aipo ehi ava igua rese ihañeco vahe upe:

—Peyapo opacatu semimbotar pe cuaise —ehi.

<sup>6</sup> Aheve oime seis cambuchi guasu ita cuhi apopri, ñepi-peí cambuchi pipe oique cincuenta litro, amove oique setenta litro i ipipe. Ahe judío oiporu pietase oyepoi āgua yuvireco Tūpa porocuita mboaviye āgua yepi. <sup>7</sup> Evocoyase ahe ava igua rese ihañeco vahe upe aipo ehi:

—Pemboapipopa co cambuchi i pipe —ehi.

Omboapipopa tupri yuvireco. <sup>8</sup> Evocoyase aipo ehi ava ihañeco vahe upe:

—Penosemi chíhi, peraso pieta rese hañecosar uve —ehi.

Ēgüe ehi eté yuvireco. <sup>9</sup> Ihañeco vahe pieta rese osāha i oyeapo vahe uva ricuer. Ndoicuai eté que sui osé ahe uva ricuer; igua rese ihañeco vahe güeraño tupri oicua yuvireco. Evocoyase pieta rese hañecosar oñeche cuimbahe omenda vahe upe <sup>10</sup> aipo ehi chupe:

—Opacatu ava omondo uva ricuer aviye catu vahe yipindar. Ipare acoi ava hītaropase yuvireco, omondo ndasepii vahe. Nde rumo ereyapocatupaño aviye catu vahe, ahe cūrítei ramo erenose —ehi.

<sup>11</sup> Co yipindar vahe poromondiisa Jesús oyapo vahe aheve. Ipipe omboyecua güeco pīratasa. Sese semimbohe viroya ité yuvireco.

<sup>12</sup> Ipare oso tecua Capernaum ve, ichi avei, tivri reseve supive, iyavei ore semimbohe eta oroso supi. Aheve oroico moviro ari tēi.

### Jesús omombopa ava mbahe rerecosar tūparo pipe sui

<sup>13</sup> Ipare judío upendar Pascua pieta yepota senise, Jesús oso Jerusalén ve.

<sup>14</sup> Aheve osepia tūparo guasu pipe corero ivipi rupi guarepochi rese mbahe mimba eta mondosar; guaca, ovesa iyavei apicasu. Aheve avei mbia guarepochi recuñarosar yuvinoi. <sup>15</sup> Co mbahe repiase rumo, Jesús oyapo tucumbo omombopa tupri tūparo sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otiapi-apii iguarepochi ivi rupi, iyavei imesa opa omombo. <sup>16</sup> Apicasu mondosareta uve aipo ehi:

—¡Penosepa co mbahe cūrítei ave sui! —ehi—. ¡Aní che Ru rêta mbahe mon-dosa tēi pereco! —ehi.

<sup>17</sup> Aipo hese, ore oroyemomahenduha ñehesa icuachiapri aracahendar aipo ehi vahe rese: “Nde rêta rese che recatēhisa sui che mocañira” ehi vahe.

<sup>18</sup> Evocoiyase judío mborerecuar yu-virecoi vahe oporandu yuvireco chupe:

—¿Mbahe vo ereyapora nde mborere-cuasa moporēhi āgua oreu cūrítei? —ehi yuvireco chupe.

<sup>19</sup> Evocoiyase,

—Pemondurupa co tūparo, che evocoiyase mbosapí arí rupive amopuha irira —ehi judío eta upe.

<sup>20</sup> Aipo hese, mborerecuar aipo ehi yu-vireco chupe:

—Co tūparo rumo imopuhasa cuarenta y seis araviter rupi, ¿ereicatura pīha aipo nde imopuha iri mbosapí arí rupive? —ehi yuvireco chupe.

<sup>21</sup> Oñehese Jesús tūparo rese, güete upe tēi rumo aipo ehi. <sup>22</sup> Ocuera yevise rumo manosa sui, ore oroyemomahenduha ñehese agüer rese. Sese oroviroya sesendar ñehesa icuachiapri pipe iyavei semimombegüer.

### Jesús oicua opacatu ava recocuer

<sup>23</sup> Jesús secoi vitesse Jerusalén ve Pas-cua pieta pipe, setá ité ava viroya os-epiase poromondiisa sembiapo yuvireco.

<sup>24</sup> Ndoyeroyai eté rumo ahe ava eta rese. Esepia, opacatu ité ava recocuer oicua.

<sup>25</sup> Ndipoi eté que ambuae ava pihanemoñeta mombehu āgua chupe. Esepia, ahe ité opa oicua.

### Nicodemo omoñeta Jesús

**3** Oime mbia fariseo, Nicodemo serer vahe, ahe mbia mborerecuar judío pāhuve secoi vahe. <sup>2</sup> Ahe oso Jesús piri pītu pipe, aipo ehi chupe:

—Porombohesar, oroicua ité Tūpa nde mbouse ore mbohe āgua —ehi—. Esepia,

ndipoi eté que ava oicatu vahe evocoi nungar poromondiisa apo Tūpa oyese secoēhise —ehi.

<sup>3</sup> Evocoiyase,

—Supi eté aipo ahe ndeu: acoi ava ndoyesu piasu iri vahe, ndoiqueei chietera Tūpa mborerecuasave —ehi Jesús chupe.

<sup>4</sup> Oporandu rumo aipo ehi:

—¿Mara ehira vo aipo ava oyese piasu iri ocuacua pipe viña? —ehi—. ¿Oicatu irira pīha osi aviterve oique oyese iri āgua? —ehi Jesús upe.

<sup>5</sup> Jesús omboyeve chupe:

—Supi eté aipo ahe ndeu: acoi ava i pipe iyavei Espiritu pipe ndoyesui vahe, evocoi nungar ndoyuviroiquei chira Tūpa mborerecuasave. <sup>6</sup> Acoi oyese vahe co ivi pipendar oyesupa sui, inungar tupri avei ahe; Espiritu pipe oyese vahe rumo, ahe espíritu. <sup>7</sup> Ereyepihamondii rene, ‘Peyesu piasu irira’ ahese ndeu. <sup>8</sup> Co rumo inungar ivitu oipeyu vahe güemimbotar rupi. Yepe sendusa siapu, ndicuasai rumo que sui turi, que oso no. Ēgüe ehi avei ava oyese vahe Espiritu pipe —ehi Jesús chupe.

<sup>9</sup> —¿Mara ehi pīha aipo evocoiyase? —ehi Jesús upe.

<sup>10</sup> —¡Nde niha promombohesar ivate vahe Israel pendar ereico, nderesenducuai eté rumo co nungar mbahe! —ehi chupe—. <sup>11</sup> Supi eté aipo ahe ndeu: ore oromombehu mbahe oroicua vahe, orosepia vahe ité. Pe rumo ndaperoyai eté ore remimombehu. <sup>12</sup> Añehese tēi niha mbahe co ivi pipendar rese pēu; ndache reroyai eté rumo peye. Tahetru revo mbahe iva pendar amombehuse pēu ndaperoyai chietera viña —ehi.

<sup>13</sup> “Esepia, ndipoi eté ambuae ava ivave oyeupi vahe; che güeraño, Ava Riquehír, iva sui agüeyi vahe pēu. <sup>14</sup> Inungar Moisés osupi ivate mboi rahanga ivi iporupirēhisa rupi aracahe. Ēgüe ehi aveira che, Ava Riquehír, rerecosa ivate



che rupira yuvireco <sup>15</sup> opacatu ava che reroiyasar tecovesa apirēhi rereco āgua yuvireco” ehi Jesús Nicodemo upe.

### **Tūpa poroaisusa ava upe nara**

<sup>16</sup> “Supi eté Tūpa osaisú iteanga opacatu ava. Sese ombou Guahir ñepei vahe ‘tocañi tēi eme che Rahir reroiyasar yuvireco’ oya, ‘tovireco tecovesa apirēhi vahe’ ohesave. <sup>17</sup> Esepia, nomboui Tūpa Guahir co ivi pipe ava mocañi tēi āgua; ahe rumo ombou ava pīsiro āgua.

<sup>18</sup> “Ava viroya vahe Tūpa Rahir, ndahei eté ocañi tēi vaheṛā; acoi ava ndoviroyai vahe rumo, oipisi itera cañisa yuvireco Tūpa Rahir ñepei vahe reroiyasāhisa pipe. <sup>19</sup> Ēgüe ehi etera chupe yuvireco. Esepia, tesapesa supi eté vahe ou co ivi pipe, ahe ava rumo oipota catu mbahe Carugar suindar pītumimbi vahesave güeco āgua yuvireco. <sup>20</sup> Supi eté acoi opacatu ava oyapo vahe angaipa, ndosepia potai tesapesa, iyavei ndoyemboyai tesapesa rese yuvireco oangaipa mboyecua potaēhisave. <sup>21</sup> Acoi ava yuvirecoi vahe rumo mbahe supi eté vahe aposa pipe, oyemboya tesapesa rese yuvireco mbahe Tūpa remimbotar oyapo vahe cua uca āgua opacatu ambuae ava upe —ehi.

### **Juan Oporoāpiramo vahe oñehe iri Jesús rese**

<sup>22</sup> Ipare Jesús oso güemimbohe eta rese ambuae tecua rupi-rupi ivi Judea ve. Aheve secoi pucu raimi oporoāpiramo. <sup>23</sup> Iyavei Juan oporoāpiramo vite Enón ve, Salim reroivcave. Esepia, aheve tuvichá i oime. Aheve ava yugüeru oñeapiramo uca āgua. <sup>24</sup> Co rumo mbahe yaposa Juan roquendaēhi viteseve.

<sup>25</sup> Evocoiyase Juan remimbohe ombopi ambuae omu judío rese oyecopiacopi vaheṛā i pipe ñeapiramosa resendar sui tēi yuvireco. <sup>26</sup> Sese yuvirasu Juan uve aipo ehi:

—Ore mbohesar, acoi secoi vahe nde rese iai Jordán rovai, sese acoi ereñehe oreu, cūrítei ahe oporoāpiramoñi tēi iyavei opacatu yuvirasu supi —ehi semimbohe yuvireco chupe.

<sup>27</sup> Evocoiyase aipo ehi güemimbohe upe:

—Ava ndoicatu mbahe apo Tūpa nombouise chupe. <sup>28</sup> Pesendu tupri ité che ñehe cuese: “Che ndahei Poropīsiosar aico, che rumo senonde imbupri tēi aico” ahese pēu. <sup>29</sup> Esepia, acoi mendasa oimese, vireco vahe güembirecovi ahe imevi, osenduse rumo imboripar iñehe yivii ohā, oyemboviharete sese. Ēgüe ahe avei che cūrítei, ayemboviharete Jesús rese. <sup>30</sup> Ahe niha seco ivate catu-catuñi itera ari rupi oico; che rumo ivi coti catu aicora ichui —ehi Juan güemimbohe upe.

### **Iva suindar ou vahe**

<sup>31</sup> Iva suindar ou vahe ivate catu ité opacatu sui. Co ivi pipe oyesu vahe rumo co ivi pipendar ité. Sese niha mbahe ivi pipendar rese tēi oñehe. Acoi ou vahe rumo iva sui, ivate catu ité opacatu sui. <sup>32</sup> Iyavei mbahe güembiepia osendu vahe reseño ité oñehe. Ndipoi eté rumo semimombehu viroya vahe yuvireco. <sup>33</sup> Acoi ava viroya vahe rumo iñehe, “Supi tupri ité Tūpa omombehu mbahe” ehi. <sup>34</sup> Co Tūpa remimbou niha omombehu Tūpa ñehe. Esepia, Tūpa omondo ité oEspíritu sese. <sup>35</sup> Tūpa osaisu Guahir iyavei opacatu mbahe omondo ipove. <sup>36</sup> Opacatu ava viroya vahe Tūpa Rahir, vireco ité tecovesa apirēhi; acoi ndoviroyai vahe rumo, ndovirecoi chietera co tecovesa. Ahe rumo oipisira Tūpa ñemoirosa ipīrata vahe ité yuvireco.

### Jesús oñehe Samaria pendar cuña upe

**4** Fariseo eta oyandu yuvireco Jesús vireco catuse ava oyeupi oguata vahe iyavei oporoãpiramo catuse avei Juan sui <sup>2</sup>(ndahei eté rumo Jesús oporoãpiramo; semimbohe tēi rumo ěgüe ehi yuvireco). <sup>3-4</sup>Jesús oicuae aipo nungar, osē Judea sui, oyevi iri ivi Samaria rupi, Galilea ve yuviraso.

<sup>5</sup>Aheve Samaria ivi rese oyepota tecua Sicar serer vaheve yuvireco. Ahe tecua rerovicave oime ivi Jacob omondo vahecuer guahir José upe aracahe. <sup>6</sup>Aheve oime ivicuar, chupe, “Jacob iguagüer” ehi yuvireco. Ahe igua rembe rese Jesús oguapi mbiter ari potase ocueraise oĩ. <sup>7-8</sup>Semimbohe eta rumo opacatu yuviraso tecuave mbahe tembihu rerocua. Aheseve cuña, Samaria pendar, oyepota iguave i renose. Ahese Jesús aipo ehi chupe:

—Emboumi chíhi nde i taihu —ehi.

<sup>9</sup>Cuña, Samaria pendar, rumo omboyeve chupe:

—¿Mahera vo, “Embou i taihu” ere cheu? Nde rumo judío; che cuña coha pendar aico —ehi chupe. (Esepia, judío noñehei vahe ité ava Samaria pendar upe yuvireco yepi.)

<sup>10</sup>Evocoyase omboyeve cuña upe:

—Ereicuase Tüpa porerecosa ndeundar viña iyavei ereicuase ahe ava ndeu i rese oporandu vahe, nde evocoyase eroporandura sese chupe. Ahe evocoyase omondora i ndopai vahe ndeu viña —ehi cuña upe.

<sup>11</sup>—Ndererecoi rumo i renose água. Esepia, co igua ipicucú ité. ¿Que sui vo aipo evocoyase eremboura i ndopai vahe cheu viña? —ehi cuña chupe—. <sup>12</sup>Esepia, co igua ore ramoi Jacob oseya oreu. Cohave suiño ité niha ahe oihu, tahir avei oihu yuvireco ichui iyavei opacatu seimba. ¿Nde píha ivate catu ereico ichui? —ehi cuña chupe.

<sup>13</sup>—Opacatu ava oihu vahe co i, ihuseiño itera yepi, —ehi cuña upe—.

<sup>14</sup>Acoi ava oihu vahe rumo i che remimondo, ndihusei iri chietera. Esepia, che amondo vahe i ndopai vahe ité. Ahe omboura tecovesa ndopai vahe ava upe —ehi cuña upe.

<sup>15</sup>—Nde ava, emboumi ahe i taihu che husei iriēhi água, tanose iri eme i cohavesui —ehi.

<sup>16</sup>—Eso rane nde mer reca, seseve peyu cohavesui —ehi cuña upe.

<sup>17</sup>—Ndarecoi rumo che mer —ehiño cuña chupe.

—Supi eté aipo ere, ndererecoi eté nde mer. <sup>18</sup>Esepia, cinco tupri erereco nde mer iyavei cūrítei erereco vahe nde resendar tēi. Supi eté aipo ere: “Ndarecoi che mer” ere cheu —ehi cuña upe.

<sup>19</sup>—Nde ava aviye moco Tüpa ñehe mombehusar ereico cheu —ehi—. <sup>20</sup>Ore ramoi eta omboetei Tüpa co ivitri rese yuvireco. Pe rumo, judío peico vahe, “Jerusalén ve yamboeteira Tüpa yepi” peye —ehi.

<sup>21</sup>—Che roroya eve cuña, virovi ari pēu peso iriēhi água Tüpa mboetei co ivitri rese iyavei Jerusalén ve. <sup>22</sup>Pe Samaria pendar peico vahe pemboetei tēi pe rembiguāēhi. Ore rumo oroicua oromboetei vahe. Esepia, ñepisiroa ou judío sui. <sup>23</sup>Oyepota rumo ari cute, ahe ité co cūrítei co pipe suive supi eté Tüpa omboetei vahe, Tüpa Espiritu pipe omboeteira yuvireco. Supi eté Tüpa, “Ĕgüe tehi che mboetei yuvireco” ehi. <sup>24</sup>Esepia, Tüpa niha Espiritu secoi. Sese acoi omboetei vahe oyapora Espiritu pipe supi tupri vahe ité yuvireco —ehi cuña upe.

<sup>25</sup>Cuña evocoyase aipo ehi chupe:

—Che aicua Poropisrosar yu água (ahe ‘Cristo’). Acoi ahe ouse, omombehu tuprira opacatu mbahe yandeu —ehi cuña chupe.

<sup>26</sup>—Che niha ahe aico añehe vahe ndeu —ehi cuña upe.

<sup>27</sup>Aheseve semimbohe eta oyeve yuvireco, nombovihaipri güemimbohe cuña rese oñemoñetase. Ndipoi eté rumo que “¿mbahe rese vo peñemoñeta?” ehi vahe, que “¿mahera vo ereñehe co cuña upe?” ehi vahe yuvireco chupe. <sup>28</sup>Ahese cuña oseyá tupriño ocambuchi, oso güecuave aipo ehi ava eta upe:

<sup>29</sup>—Perio, tapesepia pe ava omombe-hupa tupri vahe che recocuer cheu. ¿Ndahei pñha ahe Poropisrosar? —ehi omu eta upe.

<sup>30</sup>Evocoiyase ava rehii yuvinose tecua sui, yuviraso Jesús recosave sepiá. <sup>31</sup>Ava yepotañhi viteseve, semimbohe eta,

—Ore mbohesar, ecarumi —ehi tñi yuvireco chupe.

<sup>32</sup>—Oimera rumo ambuae mbahe cheu che moviracua água. Ahe ndapeicuai vahe —ehi güemimbohe eta upe.

<sup>33</sup>Semimbohe aipo hese oporandurandu tñi oyeupe yuvireco:

—¿Oime pñha que ava güeru vahe mbahe semihura? —ehi tñi yuvireco.

<sup>34</sup>Güemimbohe upe rumo aipo ehi:

—Che moviracuasa rumo che mbousar porocuita, ahe ayapora iyavei amboaviye rane itera iporaviqui —ehi—. <sup>35</sup>Esepia, pe aipo peye: ‘Ipane vite irungatu yasi mbahe miti ha monuha água’ peye yepi; che rumo aipo ahe pñu: pemahe pe ivirindar ava eta rese. Opa ité opñha omoingatu yuvireco, ahe inungar mbahe miti ha yaviye vahe. <sup>36</sup>Acoi oporaviqui vahe Túpa upe ava hñ pñi água rese, ahe oipisira sepri yuvireco iyavei semimonuha tecovesa ndopai vaheve nara ité yuvirecoira. Evocoiyase ava upe oñehe vahe iyavei oipisi vahe ava hñ ivave nara, oyoya guasu oviharetera ipisipri rese yuvireco. <sup>37</sup>Supi eté co ñehesa aipo ehi vahe: ‘Ñepei eté omaheti

vahe; imonuhasar rumo ambuae ité’ ehi. <sup>38</sup>Che opocuai ava hñ pñi água ambuae ava poraviquisave; yipindar rumo ambuae oporaviqui ité yuvireco sese. Pe evocoiyase peique iporaviqui agüer rupi —ehi güemimbohe eta upe.

<sup>39</sup>Setá ava tecua Sicar pendar Samaria pipe viroya cuña ñehe sui yuvireco, “Opacatu mbahe che rembiapo omombehu cheu” ihesa sui. <sup>40</sup>Evocoiyase ava rehii Samaria pendar yuviraso chupe ‘epitami ore piri’ oya. Evocoiyase opita ipiri ñuvirío ari rupi. <sup>41</sup>Setá catu iri ava viroya yuvireco ñehe ité renduse. <sup>42</sup>Evocoiyase ava eta aipo ehi cuña upe yuvireco:

—Cüritei oroviroya ité cute, ndahei nde ñehe suiño oroviroya. Esepia, ore ité orosendu ñehe cute, oroicua avei ahe supi eté opacatu ava pñisrosar ou vahe —ehi ava eta cuña upe yuvireco.

### Jesús ombogüera mborerecuar rahir

<sup>43</sup>Ñuvirío ari pare, Jesús osẽ ivi Samaria sui, osoño ivi Galilea ve. <sup>44</sup>Ahe ae ité aipo ehi: “Túpa ñehe mombehusar ndasaisusai iivi rese yuvireco yepi” ehi. <sup>45</sup>Oyepotase oivi Galilea ve, ahe pendar ava oipisi tupri yuvireco. Esepia, setá osepia opacatu mbahe sembiapo Pascua pietase Jerusalén ve.

<sup>46</sup>Evocoiyase oyeve iri tecua Caná ve Galilea ivi rese, aheve acoi i tñi oyapo uva ricuer. Tecua Capernaum ve oime mbia mborerecuar guasu ivirindar. Ahe vireco guahir imbaheasi vahe. <sup>47</sup>Oyanduse co mbia mborerecuar Jesús yepota Judea sui ivi Galilea ve, ahe ramoseve oso voi seca ‘toso che rñtave, tombogüerami che rahir omano pota vahe cheu’ oya. <sup>48</sup>Evocoiyase aipo ehi ahe mborerecuar upe:

—Pe ndache reroyai eté peye ndape-sepiase mbahe poromondiisa che rembiapo —ehi.

<sup>49</sup>—Che Yar, eyu poyavañomi tēi che rahir mano viteēhiseve —ehi mborerecuar chupe.

<sup>50</sup>—Eyevi nde rētave; nde rahir oicove —ehi mborerecuar upe.

Ahese viroya voi oyeupe ñehesa. Sese oyevi voi eté güētave. <sup>51</sup>Amombri seco viteseve, yuvinoña voi sovaīchi sembiguai imombehu:

—¡Nde rahir oicove! —ehi yuvireco chupe.

<sup>52</sup>Evocoyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

<sup>53</sup>Ahese mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahir oicove’ ehi” ehi. Evocoyase ahe iyavei opacatu imu eta viroya Jesús yuvireco.

<sup>54</sup>Co imoñuviriosa poromondiisa oyapo Jesús güecocuer cua uca āgua ivi Judea sui oyevisse Galilea ve.

### Jesús ombogüera ava ndoguatai vahe tecua Betzata pendar

**5** Ipare oime judío pieta guasu Jerusalén ve, aheve Jesús oso.

<sup>2</sup>Ahe tecua roquendipi, Ovesa serer vahe coti, oime ivicuar i vireco vahe, serer hebreo ñehes pipe Betzata. Ahe sese oyere tupri poyandepo oquendipi yapayere vahe pāve. <sup>3</sup>Aheve ava eta imbaheasi vahe oñeno yugüeru ivi rupi: ndasesapisoi vahe, ndoguatai vahe, ndipindugüei vahe avei i ñemomiisa osāro yuvireco yepi. <sup>4</sup>Esepia, amove tēi Tūpa rembiguai ogüeyi ahe ivicuarve i momii āgua, “Acoi ahe rane ocui vahe i ñemomiiseve ive, ocuera voi eté ombaherasisa sui” ehi yuvireco chupe.

<sup>5</sup>Aheve oime mbia ombaherasisa vireco vahe treinta y ocho araviter rupi.

<sup>6</sup>Osepiase Jesús, oicua voi eté vireco pucuse ombaherasisa. Evocoyase oporandu chupe:

—¿Ereipota vo nde cuera āgua? —ehi chupe.

<sup>7</sup>Imbaheasi vahe omboyevi:

—Nde mbia, ndipoi eté que ava che mongui vaheā i pipe i ñemomiise. Asāha tēi ‘tacui’ viya. Ambuae rane-raneño rumo yuvirocui che sui yepi —ehi.

<sup>8</sup>Evocoyase,

—Epūha, esupi nde rupa, eguata —ehi imbaheasi vahe upe.

<sup>9</sup>Ahe ramoseve ahe mbia ocuera tupri, osupi vupa, oguata voi oico. Mbituhusa ari pipe tupri rumo ēgüe ehi. <sup>10</sup>Evocoyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevosii āgua —ehi yuvireco chupe.

<sup>11</sup>Ahe mbia evocoyase,

—Che mbogüerasar rumo aipo ehi cheu: ‘Esupi nde rupa, eguata’ ehi cheu —ehi judío eta upe.

<sup>12</sup>—¿Uma vo aipo ehi ndeu? —ehi judío yuvireco chupe.

<sup>13</sup>Ahe mbia rumo ndoicua iri ombogüerasar. Sese ndoicatui imboyevi āgua. Esepia, Jesús aviyeteramo tēi ndoyecua iri ava rehii pāhuve. <sup>14</sup>Coiye rumo Jesús osepiā iri tūparove ahe mbia, aipo ehi chupe:

—Ereicua co nde cuerasa cūrutei, aní ereyemboangaipa iri mbahe tēi catu reime iri āgua ndeu —ehi chupe.

<sup>15</sup>Ahe mbia evocoyase oso voi eté judío eta rerecuar upe ‘Jesús che mbogüera’ oya. <sup>16</sup>Sese judío osaquicue moña iyavei oyuca pota yuvireco mbituhusa ari pipe iporombogüera rese tēi. <sup>17</sup>Ahe rumo aipo ehi:

—Che Ru niha oporaviquiño ité co ari rupi iyavei che aporaviquiño avei —ehiño judío upe.

<sup>18</sup>Aipo hese, judío, “Yayuca ité” ehi. “Esepia, ndahei mbituhusa ari güeraño nomboyeroyai, ahe rumo oyeapo Tūpa

nungar, Tūpa uve ‘che Ru’ ohe angahu tēisa pīpe” ehi yuvireco chupe.

### **Tūpa Rahir mborerecuasa**

<sup>19</sup> Evocoyase Jesús aipo ehi judío upe: “Supi eté aipo ahe: Tūpa Rahir ndoicatu eté mbahe apo oyesui tēi, Vu rembiapo mbahe oicua; aheño tupri avei oyapo yepi. <sup>20</sup> Esepia, Tu Guahir raisupave omboyecua opacatu mbahe güembiapo chupe iyavei omboyecuaño vite itera mbahe poromondiisa tuvicha catu vahe sembiaporā, ‘¡Mara ehi rutei col!’ pehe tēi āgua chupe. <sup>21</sup> Esepia, che Ru ombogüerayevi omano vahe iyavei omondo tecovesa chupe. Ēgüe ehi avei Tahir omondo tecovesa ava upe güemimbotar rupi. <sup>22</sup> Iyavei Tu nomondo iri ava upe sembiapo repri. Esepia, ombou Guahir upe opacatu pīratasa ava upe sembiapo repri mondo āgua. <sup>23</sup> Ēgüe ehi Guahir upe opacatu ava imboetei āgua yuvireco inungar Tu imboeteipri. Acoi ava Tahir nomboetei vahe, Tu imbousar avei nomboetei yuvireco.

<sup>24</sup> “Supi eté aipo ahe pēu: acoi oyapisaca vahe che ñehe rese, viroya vahe avei che mbousar, ahe virecora tecovesa apirēhi vahe; ndahehi chintera imocañipri. Esepia, osē manosa sui oipisi tecovesa. <sup>25</sup> Supi eté aicua uca pēu: oura ari imombehupri, cūrítei eté co ari oyepota, ava eta omano vahecuer osendura Tūpa Rahir ñehe. Acoi osendu vahe, oicoveño itera. <sup>26</sup> Esepia, Tu vireco tecovesa oyese. Ēgüe ehi avei Guahir upe imondo tecovesa rereco āgua. <sup>27</sup> Ombou avei imborerecua āgua chupe ava recocuer rese iporandu āgua. Esepia, ahe Ava Riquehir secói. <sup>28</sup> Peyepihamondii rene aipo che hesa sui. Esepia, oye-potara ari imombehupri, ahese opacatu ava omano vahecuer osendura ñehe. <sup>29</sup> Ahese yuvinosera yuvipa sui. Oyapo vahe mbahe tupri, ocuerayevira yuvireco tecovesa apirēhi rereco āgua; acoi

oyapo vahe rumo mbahe naporai vahe, ocuerayevira yuvireco Tūpa ñemoirosa pisi āgua” ehi Jesús judío rerecuar upe.

### **Jesús omboyecua tupri omborerecuasa**

<sup>30</sup> “Che ndaicutui mbahe apo cheyesui tēi. Che, ‘Pe peyavi vahe mbahe, peipisira che Ru ñemoirosa’ ahe ava ndaseco pōrai vahe upe che cuaita rupi iyavei che amombehu vahe supi tupri ité. Esepia, che ndaipotai che remimbotar tēi mbahe apo āgua. Che Ru, che mbousar remimbotar rumo ayapo. <sup>31</sup> Que cheyese ae tēi añehese, ahese ndache reroyai chira peye viña. <sup>32</sup> Oime rumo ambuae che mombehusar. Ahe supi eté che mombehu pe seroya āgua; ahe Juan. <sup>33</sup> Pe niha, pemondo ava chupe imboporandu mbahe rese. Ahe semimombehu niha supi tupri vahe ité. <sup>34</sup> Yepe ahe supi eté viña, che rumo ndayeroyai ava tēi che mombehusa rese. Che rumo aipota peñepisiro āgua. Sese aipo ahe pēu. <sup>35</sup> Juan niha inungar tataendi, ēgüe ehi omboyecua mbahe supi eté vahe. Sese pe peyemboviha raimi tēi iporombohesa tesapesa nungar pīpe peico. <sup>36</sup> Che rumo areco che yecua ucasar aviye catu vahe Juan sui. Ahe niha co mbahe ayapo vahe yepi. Ahe sese che Ru che cuai yapo āgua. Co mbahe ayapo vahe, ahe ité omboyecua che Ru Tūpa che mbousar. <sup>37</sup> Iyavei che Ru avei eté che cua ucasar. Ahe ñehe rumo ndapesendui vahe ité, iyavei ahe ndapesepiai eté. <sup>38</sup> Ññehengagüer icuachiapri avei ndoiqueei eté pe rese. Ipipe niha ndache reroyai eté peye che Ru che mbose. <sup>39</sup> Pe peicua tupri pota icuachiapri ‘icuapa tupri pīpe revo tecovesa apirēhi yarecora’ peye viña. Co rumo cuachiar che mombehu vahe: <sup>40</sup> pe rumo ndapeyu potai eté cheu co tecovesa apirēhi rereco āgua.

<sup>41</sup>“Ndaipisii eté ava che mboeteisa tēi. <sup>42</sup>Iyavei opocua Tūpa ndapesaisuise. <sup>43</sup>Che niha ayu che Ru rer pipe. Pe rumo ndache reroyai eté peye. Ouse rumo que ambuae ava oyesui tēi oñeche vahe, evocoi nungar tēi peroyara. <sup>44</sup>Ndapeicatui eté che reroya āgua peye. Esepia, pe ae tēi peyemboetei; ndapesecai eté Tūpa ñepeí vahe suindar yemboeteisa. <sup>45</sup>Ndapepihañemoñetai chira che pe recocer mombehu āgua rese che Ru rovai. Moisés peroya vahe ité niha oicuachía pe Tūpa reroyaēhisa chupe imombehu āgua. <sup>46</sup>Peroyase rumo Moisés ñehe viña, che avei che reroyara peye viña. Esepia, Moisés niha oicuachía che re-sendar ñehesa. <sup>47</sup>Ndaperoyaise ahe sem-bicuachía, evocoiyase ndapeicatui chietera che remimombehu reroya āgua” ehi Jesús oamotarēhimbar upe.

### Jesús oyopoi cinco mil ava

**6**<sup>1-4</sup> Ipare Pascua pieta ipiimi aipo Jesús osasa ipa Galilea serer vahe oso, ahe serer avei Tiberias. Ava rehii avei yuviraso saquicuei. Esepia, osepia ité yuvireco oyapose mbahe poromondiisa guasu imbaheasi vahe mbogüerese. Oyepotase ivi rese yuviraso, evocoiyase oyeupi ivitri rese. Aheve oguapi opacatu güemimbohe eta reseve yuvinoi. <sup>5-6</sup>Omahese ava rehii oyeupindar rese, ahese aipo ehi Felipe upe:

—¿Que vo yarocuara mbahe tem-bihu co opacatu ava upe nara? —ehi secoāhasave.

Ahe rumo oicua ité mbahe güembiaporā. <sup>7</sup>Evocoiyase Felipe omboyeve chupe:

—Dosciento denario pan ndosupitii chietera que chíhi-chíhimi ava retacuer viña —ehi.

<sup>8</sup>Aipo hese, ñepeí semimbohe pāhu pendar, Simón Pedro rivri, Andrés aipo ehi chupe:

<sup>9</sup>—Co chíhivahe vireco cinco pan, iyavei ñuvirío pira, ¿iyacatura vo co ava retacuer? —ehi.

<sup>10</sup>Evocoiyase aipo ehi:

—Pemombehu opacatu upe toguapi yuvireco —ehi güemimbohe upe.

Capihi reimesave opa omboguapi yuvireco cinco mil ava. <sup>11</sup>Evocoiyase oipisi cinco vahe pan, “Aviye ndeu” ohe pare Vu Tūpa upe, opa ombohi-mbohi imondo ava rehii upe. Ēgüe ehi avei pira upe, imondopa semimbotar rupi-rupi yuvireco. <sup>12</sup>Opase ava ihitaro,

—Pemonuhapa sumbirer iyemombucaēhi āgua —ehi güemimbohe upe.

<sup>13</sup>Evocoiyase omonuha doce iruova sumbirer yuvireco pan cincomi vahe sui.

<sup>14</sup>Evocoiyase ava eta co poromondiisa guasu Jesús rembiapo repiase, aipo ehi yuvireco:

—Supi eté co uve revo acoi: “Oura Tūpa ñehe mombehusar ivi pipe” ehi icuachiapri arachendar pipe —ehi yuvireco.

<sup>15</sup>Jesús rumo oicuase ava opīratasa pipe tēi güeraso pota āgua mborerecuar guasu vireco āgua oyeupe nara yuvireco, ahese oyeupi iri oso ivate catu. Aheve ahe ae güeco āgua.

### Jesús oguata i hari rupi

<sup>16</sup>Pītu ramosé ogüeyi yuviraso Jesús remimbohe ipave, <sup>17</sup>yuviroha carite pipe sasa āgua yuvireco tecua Capernaum ve yuviraso. Ahese pītu ité. Jesús rumo ndoyevi vitei eté. <sup>18</sup>Ahese oipeyu pīrata ivitu, i avei ohitu pīrata. <sup>19</sup>Yuviraso pucumi tēi cinco, anise seis kilómetro rupi. Ahese osepia Jesús yuvireco osupiti senise carite. Ahe i hari rupi oguata oso chupe. Evocoiyase osiquiye ité yuvireco ichui. <sup>20</sup>Ahe rumo aipo ehi güemimbohe upe:

—¡Che Jesús aico, pesiquiyei rene! —ehi.

<sup>21</sup> Evocoiyase sorivete yuvireco carite pipe seroha. Iparemi tēi oyepota yuvirasoyuvirasosave.

### Ava eta oseca Jesús

<sup>22</sup> Ahere ayihive ava rehii opita vahe sovai yuvireco, “Semimbohe año rumo yuviraso ñepeí vahe carite pipe. Jesús rumo ndosoi eté güemimbohe rupi” ehi tēi yuvireco. <sup>23</sup> Aheseve rumo ambuae carite viroyepota seru yuvireco tecua Tiberias pendar, acoi Jesús ava remihura pan rerojeroquí agüer rorovicave. <sup>24</sup> Evocoiyase ava rehii oicuaese Jesús semimbohe reseve iporēhise yuvireco, yuviroha yuviraso āgua co ambuae carite pipe tecua Capernaum ve seca.

### Jesús, pan nungar, tecovesa apirēhi vahe secoi

<sup>25</sup> Oyepotase ava rehii ipa rovai, aheve osepia Jesús yuvireco.

—Ore mbohesar, ¿marase vo ereyepota cohave? —ehi yuvireco chupe.

<sup>26</sup> Evocoiyase aipo ehi chupe:

—Supi eté aipo ahe pēu. Pe rumo che reca peye che pe mbocarusa rese tēi,, ndahei co che poromondiisa roroyasave ité peico pota che rupi. <sup>27</sup> Peoporaviqui eme catu tembihu ndasecosei vahe rese; iyacatu rumo peoporaviqui tembihu secose vahe rese omondo vahe tecovesa apirēhi. Co tembihu che, Ava Riquehir, amondora pēu. Esepia, che Ru Tūpa omboyecua ité che ichuindar aicose —ehi.

<sup>28</sup> Aipo hese,

—¿Mbahe mboraviqui vo oroyapora Tūpa upe? —ehi yuvireco.

<sup>29</sup> —Tūpa oipotata pe che roroyara peye che semimbou che recose —ehi ava eta upe.

<sup>30</sup> Evocoiyase,

—¿Mbahe poromondiisa vo eremboyecua irimira oreu orosepia vahe rānde reroya tupri catu āgua? <sup>31</sup> Esepia,

aracahe ore ramoi eta yuvirohu ivi iporupirēhisa rupi. Icuachiapri aracaendar pipe omombehu: ‘Omondo pan iva pendar semihura’ ehi —ehi ava eta yuvireco chupe.

<sup>32</sup> —Supi eté amombehu pēu: ndahei Moisés omondo pan iva pendar chupe, che Ru rumo omondo chupe. Cūrítei che Ru ombou pēu pan supi eté vahe iva sui. <sup>33</sup> Esepia, co pan ombou vahe Tūpa iva suindar ité. Ahe omondora tecovesa ivi pipendar upe —ehi ava eta upe.

<sup>34</sup> Evocoiyase,

—Ore mbohesar, embouño catu co pipe suive aipo pan oreu —ehi yuvireco chupe.

<sup>35</sup> —Che ité ahe pan aico tecovesa mondo āgua. Acoi ou vahe cheu ndiyumbiasi iri chietera iyavei acoi che roroya vahe ndihusei chiaveira. <sup>36</sup> Aipo ahe niha acoi pēu. Yepe pe che repia peye viña, pe rumo ndache roroyai eté peye.

<sup>37</sup> Opacatu ombou vahe ava che Ru cheu, cheu ité yugüerura; acoi yugüeru vahe cheu, aipisira; ndamomboi chietera cheyesui. <sup>38</sup> Esepia, ndayui iva sui mbahe che remimbotar apo āgua tēi; ayu rumo che mbousar porocuaíta apo āgua.

<sup>39</sup> Che Ru che mbousar ndoipotai que ñepeí ava ombou vahe cheu amocañira. Ahe semimbotar rumo che ambogüerayevira ahe ari ipa vahe pipe. <sup>40</sup> Che Ru oipotata avei opacatu ava oyeroya vahe rā che, Tūpa Rahir, che recosa rese. Ipipe vireco aveira tecovesa apirēhi vahe yuvireco. Supi eté ambogüerayevira ari ipa vahe pipe curi —ehi ava eta upe.

<sup>41</sup> Evocoiyase judío eta oñehe-ñehe tēi sese yuvireco, “Che pan aico, agüeyi vahe iva sui” ihesa rese <sup>42</sup> aipo ehi:

—Co niha acoi Jesús, José rahir. Yande yaicua ité tu, ichi avei. ¿Mahera ru, “Che agüeyi vahe iva sui” ehi no? —ehi yuvireco chupe.

<sup>43</sup> Evocoiyase judío eta upe aipo ehi:

—Pepoiño che roeroïrosa sui. <sup>44</sup> Ndipoi chietera que oicatu vahe ou cheu, nomonguerêhiise che Ru che mbousar; omonguerêhi vahe rumo oicatu yugüeru cheu. Ahe ambogüerayevira ari ipa vahe pipe. <sup>45</sup> Tüpa ñehe mombehúsar cuachiar pipe aipo ehi: ‘Tüpa pe mbohera opacatu’ ehi. Sese acoi osendu vahe che Ru ñehe, oyembohe vahe avei sese, evocoi nungar yugüerura cheu.

<sup>46</sup> “Ndipoi eté que ñepeï ava osepia vahe che Ru; acoi ichui ou vahaño ité, ahe güeraño tupri ité osepia. <sup>47</sup> Supi eté aipo ahe pëu: acoi che seroya vahe vireco tecovesa apirêhi. <sup>48</sup> Che pan nungar aico amondo vahe tecovesa. <sup>49</sup> Arac-ahe pe ramoi eta niha yuvirohu ité tembihu maná serer vahe ivi iporupirêhisa rupi. Ahe rumo opa iriño ité omano yuvireco. <sup>50</sup> Che rumo añehe pan iva sui ogüeyi vahe rese, acoi ava ohu vahe, no-manoi chietera. <sup>51</sup> Ahe pan oicove vahe niha che aico iva sui ogüeyi vahe; acoi ohu vahe co pan, oicovera apirêhi vaheherá ité. Co pan amondo vaheherá, ahe che rete ité. Ahe amondora ava recocuer rese” ehi judío eta upe.

<sup>52</sup> Aipo hese, judío rerecuar oyeecopiacopi yuvireco aipo ehi:

—¿Mara ehira vo aipo co imbou tẽi güete yande tohu viña? —ehi yuvireco.

<sup>53</sup> —Supi eté aipo ahe pëu: ndapehuise Ava Riquehir rete, ndapehuise avei suvi, ndaperecoi chietera tecovesa. <sup>54</sup> Acoi ohu vahe che rete, oiuhu vahe avei che ruvi, vireco tecovesa apirêhi iyavei che ambogüerayevira ari ipa vahe pipe. <sup>55</sup> Esepia, che rete supi eté vahe tembihu; che ruvi supi eté vahe avei igua. <sup>56</sup> Acoi ohu vahe che rete, oiuhu vahe avei che ruvi, secoi che rese, che avei aico sese. <sup>57</sup> Che Ru, che mbousar, vireco tecovesa. Ichui che aicove; êgüe ehi aveira che husar che sui yuvirecovera. <sup>58</sup> Añehe pan iva sui ogüeyi vahe rese. Co pan ndahei maná pe ramoi eta

yuvirohu vahe nungar. Esepia, yande ramoi opaño ité omano yuvireco. Acoi ohu vahe rumo co che rete, oicovera apirêhi vaheherá ité —ehi ava eta upe.

<sup>59</sup> Jesús oporombohe co mbahe rese judío ñemonuhasave tecua Capernaum ve.

### Ñehesa tecove apirêhisa resendar

<sup>60</sup> Osenduse co yembohesa, setá Jesús rupi oguata vahe aipo ehi oyeupe yuvireco:

—Aipo semimombehu yavai eté seroya água; ¿ava vo viroya tẽira viña? —ehi yuvireco.

<sup>61</sup> Jesús rumo oicua voi eté ñehe-ñehe tẽise co mbahe rese yuvireco, evocoiyase oporandu:

—¿Pemboasiño tie che ñehe? <sup>62</sup> ¿Mara peyera pĩha che repiase peye che, Ava Riquehir, ayeupise che reco agüerve vicho viña? <sup>63</sup> Espíritu ité niha omondo tecovesa; yande retecuer rumo êgüe ehi tẽi vahe. Co amombehu vahe pëu ahe espíritu iyavei tecovesa. <sup>64</sup> Oime vite rumo amove pe pãhuve ndache reroyai vahe —ehi ava rehii upe.

Esepia, Jesús oicua ité yipisuive uma ndoviroyai chira, oicua avei uma ava omondora yamotarêhimbar upe <sup>65</sup> aipo ehi:

—Sese niha acoi aipo ahe pëu: “Ndipoi chietera que ava ou vaheherá cheu che Ru nomonguerêhiise imbou” ahe —ehi.

<sup>66</sup> Ichuive tupri Jesús rupi oguata vahe setá oseya yuvireco; ndoguata iri eté yuvireco supi. <sup>67</sup> Evocoiyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

<sup>68</sup> Simón Pedro rumo omboyevi chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apirêhi vahe. <sup>69</sup> Ore nde reroyasar ité oroico iyavei oroicua nde



ndaseco marai vahe, Tūpa supi eté vahe remimbou ereico —ehi Pedro chupe.

<sup>70</sup>—Che niha opoporavo doce peico vahe, ñepei rumo pe pāhu pendar carugar ité —ehi Simón upe.

<sup>71</sup>Jesús oñehe Simón Iscariote rahir, Judas, rese. Yepe doce semimbohe pāhu pendar viña, ahe rumo omondora ava yamotarēhimbar upe.

### Jesús ndoviroyai tivri yuvireco

**7** Ipare Jesús oguata ivi Galilea rupi. Ndoico potai eté ivi Judea rese. Esepia, aheve ava judío eta oseca ité ‘yayuca’ oya yuvireco. <sup>2-3</sup>Virovise judío pieta guasu teyupa apo āgua yuvireco, ahese tivri aipo ehi yuvireco chupe:

—Erepita eme cohave. Eso ivi Judea ve; ahe pendar nde rupi oguata vahe avei tosepia poromondiisa nde rembiapo yuvireco. <sup>4</sup>Esepia, acoi oyapo pota vahe mbahe, noñomi eté mbahe güembiapo. Nde ereyapo ité mbahe poromondiisa. Sese iya eremboyecua opacatu ava upe —ehi tivri yuvireco chupe.

<sup>5</sup>Seroyaēhisave tēi avei tivri aipo ehi yuvireco chupe. <sup>6</sup>Evocoiyase vivri upe aipo ehi:

—Ndehi vitei rumo ari che so āgua. Pe guata āgua rumo opacatu ariño tēi aviye. <sup>7</sup>Esepia, pe ndape amotarēhii eté ava co ivi pipendar; che rumo che amotarēhi ité yuvireco. Esepia, che amboyecua ité mbahe sembiapo naporai vahe chupe. <sup>8</sup>Pesoño pe pieta repia; che rumo ndaso vitei chira. Esepia, ndosupiti vitei ari cheundar —ehi vivri upe.

<sup>9</sup>Evocoiyase Jesús opitaño Galilea ve.

### Jesús oso omu judío eta pietasave

<sup>10</sup>Vivireta so pare, Jesús avei oso pietasave. Ndoymboyecuai eté rumo ava upe. <sup>11</sup>Judío eta oseca tēi yuvireco pietasave aipo ehi:

—¿Que pñha acoi mbia? —ehi tēi yuvireco.

<sup>12</sup>Ava rehii pāhuve setá iteanga oñehe yuvireco sese. Amove aipo ehi yuvireco: “Ahe mbia aviye vahe”; ambuae rumo aipo ehi: “Ndahei aviye vahe; ahe rumo ombopa tēi vahe ava” ehi yuvireco.

<sup>13</sup>Nomboyecuai eté rumo oñehe yuvireco sese güerecuar sui osiquiyepave.

<sup>14</sup>Pieta mbiterse, Jesús avieteramo tēi oique ava pāhuve tūparo pipe ava mbohe. <sup>15</sup>Judío eta rerecuar evocoiyase, —¡Too, mara ehi rutei! —ehi tēi—. ¿Mara ehi vo co mbahecuá iteanga? ¡Ndoyembohei vahe niha yande yeroquisave! —ehi tēi yuvireco.

<sup>16</sup>Judío rerecuar upe rumo aipo ehi:

—Che porombohesa ndahei cheye-suindar tēi, ahe rumo che mbousar suindar —ehi—. <sup>17</sup>Que ñepei pe pāhu pendar oyapo potase Tūpa remimbotar, oicuara che porombohesa ndahei vahe che suindar, ahe Tūpa suindar ité. <sup>18</sup>Esepia, acoi ava oñehe vahe oyesui tēi, ahe ‘tache mboetei ava yuvireco’ ohesave tēi ēgüe ehi. Co ava rumo “tomboetei che mbousar” ehi vahe, ahe supi eté vahe; ndipoi eté porombopasa iporombohesa pipe.

<sup>19</sup>“Moisés niha omondo tēi mborocuita pēu. Que ñepei pe pāhu pendar rumo ndipoi eté omboyeroya vahe. ¿Mahera ru che yuca pota peye?” ehi.

<sup>20</sup>—¡Nde erereco carugar ndeyese! ¿Ava vo nde yuca pota? —ehiño ava eta yuvireco chupe.

<sup>21</sup>Aipo ehi ava upe:

—Cuese acoi ayapose mbahe mbituhusa ari pipe, ahese, “¡Too, mahera ēgüe ehi!” peyeño acoi cheu. <sup>22</sup>Pe avei rumo amove peporaviqui mbituhusa ari pipe peporombocircuncidase porocuita Moisés omondo vahe reroyasave. (Ahe circuncisión rumo ndahei Moisés suindar, ahe rumo yipive vahe pe ramo suindar ité.) <sup>23</sup>Oyepotase rumo chíhivahe mbocircuncida āgua

mbituhusa ari pipe tupri pëu, peyapoño rane ité mborocuaita mboaviye água. ¿Mahera ru cheuño pemboasi ñepe mbia mbituhusa ari pipe ambogüera tupri vahe rese? <sup>24</sup>“Oyavi evocoi” peye voi rene catu ava upe; peicua tupri rane ‘¿supi eté pîha?’ pe yapave —ehi Jesús ava eta upe.

### **Jesús oñehe güecocuer Tüpa suindar rese**

<sup>25</sup> Evocoiyase amove Jerusalén pendar mbia aipo ehi oyeupe yuvireco:

—¿Ndahei vo acoi co oseca tēi yuca água yuvireco? —ehi—. <sup>26</sup> Ahe ité co niha co ava pãhve oñehe oico, ndipoi eté que mara ehi vahe yuvireco chupe. ¿Omoha pîha mborerecuar co mbia Poropĩsrosar seco água yuvireco? <sup>27</sup> Yande rumo yaicua que sui turi. Acoi ouse rumo Poropĩsrosar ité coiye, ndipoi chietera que ava oicua vahe iyusa —ehi yuvireco.

<sup>28</sup> Evocoiyase aipo renduse oporom-bohe viteseve tũparove, oñehe pĩrata aipo ehi:

—¿Pe niha aipo, “Oroicua vahe” peye; “Oroicua avei iyusa” peye cheu! Ndayui rumo che remimbotar sui tēi. Oime rumo che mbousar, ahe seroyapri ité. Ahe pe ndapeicuai vahe. <sup>29</sup> Che rumo aicua ité. Esepia, che ichui ayu iyavei ahe ité che mbou pëu —ehi.

<sup>30</sup> Aipo ihese, oipisi pota yuvireco so-quenda água viña. Aní eté rumo. Esepia, ndoyepota vitei ihari chupe. <sup>31</sup> Setá iteanga rumo ava viroya iyavei aipo ehi yuvireco:

—Ouse Poropĩsrosar, ¿oyapo catura pîha mbahe poromondiisa co mbia sui? —ehi yuvireco.

### **Fariseo oyocuai sundao tũparo rãrosareta Jesús pisi água**

<sup>32</sup> Fariseo eta osendu ava ñehesa Jesús resendar yuvireco. Ahe ité iyavei pahi

eta rerecuar omondo sundao tũparo rãrosar Jesús pisi água yuvireco. <sup>33</sup> Jesús rumo aipo ehi:

—Aicove vitemira pe rese chíhi rupive. Ipare voi ayevíra che mbousar piri vicho —ehi—. <sup>34</sup> Che reca tēira peye, ndapeicatu chietera rumo che reca. Esepia, ndapeicatu chiaveira peso vaheerã che recosave —ehi ava eta upe.

<sup>35</sup> Evocoiyase judío oporandu-randu oyeupe yuvireco:

—¿Que pîha aipo osora yande sui seca iriēhi água? ¿Osora tie que amombri yande mu oñemosai vahe pãhu rupi ambuae ava ndahei vahe yande mu mbohe água? <sup>36</sup> ¿Mara oya pîha evocoiyase aipo, ‘Che reca tēira peye, ndapeicatu chietera rumo che reca. Esepia, ndapeicatu chiaveira peso vaheerã che recosave’ ehi yandeu? —ehi-ehi tēi oyeupe yuvireco.

### **Espíritu iai ndopai vahe nungar**

<sup>37</sup> Pieta ipa, ahe imboeteisa catu vahe, ahe ari pipe Jesús oñehe pĩrata ohã aipo ehi:

—Acoi que ava ihusei vahe, toyugüeru cheu. Che evocoiyase tamboihu —ehi—.

<sup>38</sup> Esepia, inungar aipo ehi vahe icuachi-apri pipe, che reroyasar piha sui osēra iai ndopai vahe nungar —ehi.

<sup>39</sup> ‘Che reroyasar oipisira Espíritu curi’ ohesave aipo ehi. Espíritu rumo ndou vitei ahese. Esepia, Jesús ahese ndoyevi vitei avei güecosa porañetesave.

### **Ava rehii oyemboyaho Jesús recocuer sui yuvireco**

<sup>40</sup> Osenduse ava rehii aipo nungar, amove aipo ehi:

—Supi eté co mbia Tüpa ñehe mombehusar imombehupri ou vahe —ehi yuvireco chupe.

<sup>41</sup> Ambuae aipo ehi:

—Co Poropĩsrosar ité —ehi yuvireco. Ambuae rumo aipo ehi yuvireco:

—¿Mahera aipo Galilea sui tēi oura Poropīsiosar viña? —ehi—. <sup>42</sup>Icuachiapri pipe rumo aipo ehi Poropīsiosar oyesura mborerecuar guasu David sui iyavei ahera Belén pendar, David recua pendar itera —ehi.

<sup>43</sup>Evocoiyase ava oyemboyaho-yaho yuvireco Jesús recocuer sui tēi. <sup>44</sup>Amove ava viraso pota tēi yuvireco soquenda; ndipoi eté rumo êgüe ehi vahe yuvireco chupe.

### Judío rerecuar ndoviroyai Jesús yuvireco

<sup>45</sup>Sundao tūparo rārosar oyeve yuvireco Jesús recosa sui. Fariseo eta iyavei pahi eta rerecuar evocoiyase oporandu yuvireco chupe aipo ehi:

—¿Mahera vo ndaperui! —ehi yuvireco chupe.

<sup>46</sup>Sundao tūparo rārosar evocoiyase aipo ehi:

—¿Ndipoi eté que ava oñehe vahe ahe mbia nungar! —ehiño yuvireco.

<sup>47</sup>Fariseo eta iyavei mborerecuareta evocoiyase aipo ehi yuvireco:

—¿Pe avei eté rumo peyembopa uca chupe? —ehi—. <sup>48</sup>Ndipoi eté niha ore mboetasa mborerecuar iyavei fariseo viroya vahe yuvireco. <sup>49</sup>Co ava rehii tēi êgüe ehi yuvireco. Ahe rumo ndoicuai vahe Tūpa porocuita yuvireco, sese ñemoirosavrive ité yuvirecoi —ehi sundao tūparo rārosar upe yuvireco.

<sup>50</sup>Evocoiyase Nicodemo, acoi oso vahe pītu pipe Jesús piri, ahe avei eté fariseo pāhuve secoi, ahe aipo ehi:

<sup>51</sup>—Yandeundar porocuita mboaviye āgua ndiyai, “Ereyavi mbahe” vahe voñño tēi que ava mbahe sembiapocuaēhi viteseve —ehi.

<sup>52</sup>Evocoiyase omboyevi yuvireco:

—¿Nde avei tie ereico Galilea pendar? Eyembohe tupri icuachiapri pipe. Ipipe eresepiara ndipoi eté que ñepe

ou vahe Galilea sui Tūpa ñehe mombehusar —ehi mborerecuareta Nicodemo upe yuvireco.

### Cuña oyemboaguasa tēi vahe resendar

<sup>53</sup>Ipare opa yuviraso ñepeipei güeta rupi.

**8** Jesús rumo oso ivitri Olivo ve. <sup>2</sup>Ahere ayihive cōhese, oyeve tūparove. Ahe opacatu ava oyemboya yuvireco sese. Ahe evocoiyase oguapi oī oporombohe.

<sup>3</sup>Evocoiyase Moisés porocuita rese oporombohe vahe, fariseo eta avei güero Jesús upe cuña oyemboaguasa tēi vahe yuvireco ava rehii rovai, <sup>4</sup>aipo ehi yuvireco chupe:

—Porombohesar, co cuña iyemboaguasase cuimbahe rese osesapiha ñepepe ave. <sup>5</sup>Moisés porocuita rumo ore cuai co nungar cuña yuca āgua ita pipe. ¿Mara ere vo catu nde co nungar upe? —ehi fariseo eta yuvireco chupe.

<sup>6</sup>Ahe rumo secoāhasave tēi aipo ehi yuvireco ‘toyavi angahu oñehe yandeu’ oya tēi. Ahe rumo oyaivi, ombahecuchía ocuā pipe ivi rese. <sup>7</sup>Evocoiyase oporandu vitese ava yuvireco, opūha aipo ehi:

—Que ñepepe pāhu pendar ndoyemboangaipai vahe, ahe rane toyapi ita pipe —ehi.

<sup>8</sup>Oyaivi iri, ombahecuchía ivi rese. <sup>9</sup>Osenduse rumo judío rerecuareta, omboipi ñepeipei yuvínose yuvireco, cuacua catu vahe sui rane yuvínose. Opacatu yuvínosepase, Jesús güerañomi cuña rese opita yuvireco. <sup>10</sup>Evocoiyase opūhase, ahese aipo ehi chupe:

—Cuña, ¿que que ru ava? ¿Ndipoi eté que ñepepe opita vahe nde mocañi āgua? —ehi

<sup>11</sup>—Aní eté, che Yar, ndipoi eté —ehi.

Evocoiyase aipo ehi chupe:

—Che avei ndoromocañi tēi potai. Sese cūrítei eso, ereyapo iri eme angaipa —ehi cuña upe.

### Jesús tesapesa ava upe secoi

<sup>12</sup> Jesús oñeche iri ava eta upe aipo ehi:

—Che aico tesapesa ava eta upe. Acoi che rupi secoi vahe virecora tesapesa omodo vahe tecovesa apirēhi vahe iyavei ndaseco iri chietera pītumimbisa nungar mbahe-mbahe tēi vahe pipe —ehi.

<sup>13</sup> Evocoyase fariseo eta aipo ehi yuvireco:

—Nde ereñeche ndeyese ae tēi. Sese nde ñehesa ndaseroyaprii eté —ehi yuvireco chupe.

<sup>14</sup> —Che ñeche rumo supi vahe ité. Yepe cheyese ae añeche viña, che rumo aicua que sui ayu, que asora no. Pe rumo ndapeicuai eté. <sup>15</sup> Pe peseca ava rembiapo cua tupri ãgua ava tēi pihañemoñeta rupi. Che rumo ndayui evocoi nungar mbahe apo. <sup>16</sup> Asecase ava rembiapo cua tupri ãgua, ahe supi tupri vahe ité. Esepia, ndahei che ae tēi ãgüe ahe, che Ru, che mbousar rumo secoi che rese. <sup>17</sup> Porocuaíta pēu icuachiapri pipe aipo ehi: “Que oimese ñuvirío ava oyoya tupri omombehu vahe mbahe, ahese voi seroyasara” ehi. <sup>18</sup> Supi eté che ae ité niha añeche cheyese viña, che Ru, che mbousar, reseve rumo oyoya tupri oroñeche —ehi.

<sup>19</sup> Aipo ihese, oporandu yuvireco chupe:

—¿Que vo aipo nde Ru? —ehi yuvireco.

—Pe ndache cuai eté peye, che Ru avei ndapeicuai. Che cuase rumo peye viña, che Ru avei peicuara viña —ehi fariseo eta upe.

<sup>20</sup> Jesús aipo ehi tūparo pipe, guarepochi monuhapri riru ipive oporombohe ohã. Ndipoi eté rumo ahese osoquenda

vaherã. Esepia, ndoyepota vitei eté ahese ihari chupe.

### Jesús, “Che sosave pe ndapeicatui chira peso” ehi

<sup>21</sup> Jesús aipo ehi iri:

—Che asose, che reca tēira peye. Pe rumo opara pемano pe angaipa reseve. Che sosave ndapeicatui chietera peso vaherã —ehi.

<sup>22</sup> Aipo ihese, judío eta aipo ehi yuvireco:

—¿Oyeyucara pīha ahe ae; ayeve pīha aipo ehi yandeu? —ehiño yuvireco chupe.

<sup>23</sup> —Pe rumo ivi pendar peico; che rumo ivatendar ité aico. Iyavei pe co ivi pipendar tēi avei peico; che rumo ndahei eté co ivi pipendar aico. <sup>24</sup> Sese niha acoi aipo ahe pēu: “Pemanopaño itera pe angaipa reseve” ahe. Esepia, ndache reroyaise peye, pe angaipa reseve ité pемanoñora —ehi fariseo eta upe.

<sup>25</sup> Aipo ihese,

—¿Ava ité vo nde ereico? —ehiño yuvireco chupe.

—Yipisuipe niha acoi amombehu vichico pēu. <sup>26</sup> Setá iteanga areco che ñeche ãgua pēu mbahe pe rembiavi rese. Che mbousar niha supi eté vahe. Ahe iñeche asendu vahe, amombehu opacatu ava upe —ehi fariseo eta upe.

<sup>27</sup> Ahe rumo ndosenducuai eté Vu rese iñehese yuvireco. <sup>28</sup> Sese aipo ehi fariseo upe:

—Pesupise rumo Ava Riquehir ivira rese, ahese voi peicuara che recocuer, ahese avei peicuara cheyesui tēi mbahe ndayapoise; che rumo amombehu che Ru che mbohesa güeraño. <sup>29</sup> Che mbousar niha che rupive ité secoi; ndache reyai eté. Esepia, ayapoño ité mbahe semimbotar yepi —ehi ava eta upe.

<sup>30</sup> Aipo ihese, setá iteanga ava viroya yuvireco.

**Ava Tūpa rahir ité yuvirecoi vahe  
iyavei ava angaipa  
pipe tēi yuvirecoi vahe**

<sup>31</sup> Evocoyase Jesús aipo ehi judío eta viroyasar upe:

—Peico tuprise che ñehe rupi, peicora che remimbohe supi eté vahe. <sup>32</sup> Peicua aveira mbahe supi eté vahe. Ahe evocoyase pe renosera mbiguai nungar pe recosa sui —ehi.

<sup>33</sup> Judío evocoyase aipo ehi:

—Ore rumo Abraham suindar ité oroico, ndoroicoi vahe ité que ava rembiguai tēi. ¿Mahera ru aipo nde, “Pesēra mbiguai nungar pe recosa sui” ere oreu? —ehiño judío eta yuvireco chupe.

<sup>34</sup> Evocoyase aipo ehi:

—Supi eté aipo ahe pēu: acoi opacatu ava oyemboangaipa vahe, inungar mbiguai tēi, ēgüe ehi oangaipa rereco yuvireco. <sup>35</sup> Mbiguai tēi ndahei güerecuar rēta pipe nara ité; tahir rumo opitaño itera güeta pipe nara. <sup>36</sup> Sese Tahir pe renosese mbiguai tēi pe recosa sui, supi eté ndapeico iri mbiguai nungar. <sup>37</sup> Aicua niha Abraham suindar pe recosa. Pe rumo che yuca potaño peye. Esepia, ndaperoyai eté che ñehe. <sup>38</sup> Che niha amombehu che Ru mbahe omboyecua vahe cheu, pe avei peyapo mbahe pe yesupa remimombehu —ehi judío eta upe.

<sup>39</sup> —¡Ore yesupa rumo Abraham! —ehi judío eta yuvireco chupe.

—Abraham suindar ité peicose, peyapora mbahe sembiapo nungar viña. <sup>40</sup> Che rumo, “Tūpa che mbohe mbahe supi eté vahe rese” ahe tēi pēu. Pe evocoyase che yuca potaño ité peye. ¡Abraham rumo ndoyapoi eté co nungar mbahe! <sup>41</sup> Esepia, pe peyapo mbahe peyesupa rembiapo tēi eté —ehi.

Evocoyase ava aipo ehi yuvireco:

—¡Ndahei rumo ore oyesu tēi vahe oroico; ore rumo orovireco ñepeño ité ore yesupa, ahe Tūpa! —ehiño yuvireco. <sup>42</sup> Evocoyase aipo ehi co judío eta upe:

—Tūpa ité pe yesupase rumo, che rai-sura peye viña. Esepia, che ayu Tūpa sui. Sese cūrítei cohava aico. Ndahei cheyesui tēi ayu, Tūpa rumo che mbou. <sup>43</sup> ¿Mahera pīha ndapesenducua catui eté mbahe che remimombehu? Esepia, ndapeyapisaca potai eté che ñehe rese. <sup>44</sup> Peyesupa niha Carugar ité, sese niha pe ahe tupri avei peico. Peyapo pota mbahe semimbotar tēi. Esepia, Carugar yipisuive ité oporoyuca serai vahe. Ndoyapoi vahe ité mbahe supi tupri vahe, noñehei avei mbahe supi eté vahe rese. Semirasa iñehe ité. Esepia, semirañete ai vahe ité; ahe ité niha yipindar semira tēi vahe. <sup>45</sup> Che rumo añehese mbahe supi tupri vahe rese, ndache reroyai eté peye. <sup>46</sup> ¿Ava pīha pe pāhu pendar oicua mbahe che rembi-avi? ¡Aní eté! Che añehe mbahe supi eté vahe rese pēu, ¿mahera ru evocoyase ndache reroyai eté peye? <sup>47</sup> Acoi ava Tūpa suindar, ahe osendu pota rai iñehe; pe rumo ndahei eté Tūpa suindar peico. Sese ndapesendu potai eté iñehe —ehi Jesús judío eta upe.

**Poropísirosar yipive  
catu vahe Abraham sui**

<sup>48</sup> Evocoyase judío eta aipo ehi Jesús upe yuvireco:

—Supi eté, ore oroicua nde Samaria iguar tēi ereico, carugar ité erereco ndeyese —ehi yuvireco chupe.

<sup>49</sup> —Che ndarecoi eté carugar cheyese. Che rumo che Ru amboetei; pe rumo ndache mboetei eté peye. <sup>50</sup> Iyavei che ndasecai ava che mboetei āgua. Oime rumo ñepeñe oipota vahe. Ahe niha omondora ava rembiapo repri chupe. <sup>51</sup> Supi eté aipo ahe pēu: acoi

omboyeroya vahe che ñehe, nomanoi chietera yuvireco —ehi judío eta upe.

<sup>52</sup> Evocoyase judío omboyevi yuvireco chupe apo ehi:

—Cūrítei oroicua ité cute nde ererese carugar ndeyese. Esepia, Abraham iyavei opacatu Tūpa ñehe mombehusar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere? <sup>53</sup> ¿Nde tie ivate catu ereico ore ramoi Abraham sui? Esepia, ahe omano ité iyavei ambuae Tūpa ñehe mombehusar omanopa ité yuvireco. ¡Mbahe angahu vo co evocoyase eremoha ndeyese! —ehi yuvireco chupe.

<sup>54</sup> —Che ae tēi ayemboeteise mbahe che rembiapo pipe, ahese ndahei chira supi vahe viña. Che Ru rumo che mboetei, chupe ité: “Ore Tūpa” peye. <sup>55</sup> Pe rumo ndapeicuai eté. Che rumo aicua. “Ndaicuai” ahese, evocoyase semirañete ai vahe aicora viña inungar pe peico. Che rumo supi eté aicua. Sese niha amboyeroya iñehe. <sup>56</sup> Esepia, pe ramoi Abraham oyemboviha ‘asepiara ihari oyepotase’ oya cheu. Osepia ité niha. Sese oviharete ité —ehi judío eta upe.

<sup>57</sup> Evocoyase judío eta:

—¿Mara erera vo aipo Abraham repia ndererecomi viteise cincuenta araviter? —ehiño yuvireco chupe.

<sup>58</sup> —Supi eté aipo ahe pēu: che aicove vahe Abraham yesuēhi viteiseve —ehi.

<sup>59</sup> Aipo ihese, oipisipa ita yuvireco yapi āgua. Ahe rumo ahe ramoseve oñemi ava eta pāhuve, osēño ité oso tūparo sui.

### Jesús ombogüera mbia ohasa suive ndasesapisoi vahe

**9** Jesús oguatase ocar rupi, osepia mbia ohasa suive ndasesapisoi vahe. <sup>2</sup> Ore semimbohe oroico vahe, oroporandu chupe:

—Ore mbohesar, ¿mahera pīha co mbia ndasesapisoi eté oha? ¿Oyesupa angaipa sui pīha? ¿Oangaipa sui ae tie? —orohe chupe.

<sup>3</sup> —Ndahei eté oangaipa sui, ndahei avei oyesupa angaipa sui; co rumo ēgüe ehi Tūpa mbahe sese mboyecua āgua. <sup>4</sup> Sese oime viteise ari yandeu che mbousar poraviquisa apo āgua, iya ité ahe yayapo. Esepia, pītura, ahese ndayaicatu chietera mbahe apo. <sup>5</sup> Co ivi pipe che recove viteise rumo, che aico ava upe tesapesa nungar —ehi oreu.

<sup>6</sup> Aipo ohe pare, ondivi ivive, güendi pipe omoaqui vahe ivi omondo ndasesapisoi vahe resa rese. <sup>7</sup> Ipare aipo ehi chupe:

—Eso, tereyovai igua Siloé serer vahe pipe —ehi (ahe serer ‘imondopri’ oya aipo ehi).

Ndasesapisoi vahe evocoyase oso, oyovai. Oyevise ichui, omahe tupri ité. <sup>8</sup> Evocoyase sēta ivirindar iyavei ava oicua vahe sesapisoēhise oporanduse guarepochi rese aipo ehi yuvireco:

—¿Ndahei vo acoi co oguapi oī guarepochi rese oporandu yepi? —ehi yuvireco.

<sup>9</sup> Amove ambuae ava aipo ehi:

—Taa, ahe ité —ehi.

Ambuae rumo aipo ehi yuvireco:

—Ndahei ahe. Aviye tupri ité rumo ahe —ehi.

Ahe mbia rumo aipo ehi:

—Taa, che ité niha ahe aico —ehi.

<sup>10</sup> Evocoyase oporandu yuvireco chupe:

—¿Mara ere vo co esareco? —ehi.

<sup>11</sup> —Acoi mbia, Jesús serer vahe, ahe omoaquimi güendi pipe ivi, oipichi che resa rese aipo ehi cheu: ‘Eso igua Siloé ve, eyovai’ ehi. Evocoyase aso, ayovaise, ahese amahe tupri ité —ehi.

<sup>12</sup> —¿Que vo ahe mbia? —ehi yuvireco chupe.

—Ndaicuai, ¿que vo catu? —ehiño ava güëta cotindar uve.

**Fariseo oporandu ndasesapisoi vahe cuera agüer rese yuvireco**

<sup>13-14</sup>Mbituhusa ari pipe aipo Jesús omoaquimi güendi pipe ivi ndasesapisoi vahe mbogüera ägua. Sese viraso ndasesapisoi vahecuer fariseo eta rovai yuvireco. <sup>15</sup>Fariseo oporandu iri yuvireco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güendi pipe omoaqui vahe che resa rese. Ichui ayovai. Ipare voi asareco —ehi.

<sup>16</sup>Evocoyase ambuae aipo ehi yuvireco chupe:

—Aipo mbia ndahei eté revo Tüpa suindar. Esepia niha, nombotei eté mbituhusa ari —ehi yuvireco.

Ambuae evocoyase aipo ehi yuvireco:

—¿Mara ehira aipo poromondiisa apo ava yangaipa vahe viña? —ehiño yuvireco.

Oyeavirati tēi ipihañemoñetasa.

<sup>17</sup>Sese oporandu iri ndasesapisoi vahecuer upe yuvireco aipo ehi:

—Nde no, ¿mara ehi nde pihanemoñeta co mbia rese? —ehi.

Ahe evocoyase aipo ehi:

—Che amoha ité Tüpa ñehe mombehusar secose —ehi.

<sup>18</sup>Ahe fariseo rumo ndoviroyai eté icuerasa yuvireco, oichoho uca rane ité iyesupa yuvireco. <sup>19</sup>Chupe oporandu aipo ehi:

—¿Pe rahir ité vo co? ¿Ndasesapisoi oha? ¿Mara ehi vo co cūritei osareco no? —ehi iyesupa upe yuvireco.

<sup>20</sup>—Ore rahir ité niha co, ndasesapisoi oha. <sup>21</sup>¿Mara ehi vo catu co cūritei osareco? iyavei ¿ava vo catu ombogüera? ¡Ndroicuai eté! Peporandu chupe. Ocuacua niha; ahe ae oicua ucara pēu —ehiño iyesupa yuvireco fariseo upe.

<sup>22</sup>Iyesupa rumo osiquiyepave tēi aipo ehiño yuvireco. Esepia, fariseo opa ité oyemoingatu yuvireco ava “Jesús Poropīsiosar secoi” ehi vahe oñemonuhasa sui ñepeí reseve imombo ägua. <sup>23</sup>Sese niha iyesupa aipo ehiño yuvireco: “Peporandu chupe. Ocuacua niha” ehiño.

<sup>24</sup>Evocoyase fariseo güeru uca iri acoi mbia imbogüerapri yuvireco, aipo ehi yuvireco chupe:

—Emombehuño oreu Tüpa rovaque mbahe supi tupri vahe. Esepia, ore oroicua ité evocoi mbia angaipa viyar seco rese —ehi.

<sup>25</sup>Ahe evocoyase omboyevi chupe:

—Che ndaicuai eté angaipa viyar tie revo. Co güeraño catu che aicua: che ndacheresapisoi vahecuer aico; cūritei rumo asareco —ehi.

<sup>26</sup>Evocoyase oporandu iri yuvireco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvireco chupe.

<sup>27</sup>—Amombehu niha acoi pēu. Pe rumo ndache reroyai eté peye. ¿Mahera vo peipota amombehu vite vaheñā pēu? ¿Pe avei tie peguata pota supi? —ehi fariseo eta upe.

<sup>28</sup>Ahese oñehe rai tēi yuvireco chupe:

—Nde ahe mbia rupindar tēi erico. Ore rumo yande ramoí aracahendar Moisés rupi oroguata vahe. <sup>29</sup>Esepia, oroicua ité Tüpa oñehese Moisés upe. Aipo mbia rumo ndoroicuai eté que sui osē —ehi yuvireco chupe.

<sup>30</sup>—¡Mara peye rutei pe ndapeicuai que suindar ahe! Che rumo che mbosareco. <sup>31</sup>Supi eté, yaicua Tüpa ndosendi eté ava angaipa viyar ñehe; ava omboeteisar iyavei viroyasar ñehe güeraño ité niha osendu. <sup>32</sup>Esepia, ndipoi eté que avaño tēi ava oyesu sui ndasesapisoi vahe ombogüera vahe. <sup>33</sup>Ahe rumo ndaheise Tüpa suindar

ou vahe viña, ndoicatui chietera revo mbahe apo viña —ehi fariseo eta upe.

<sup>34</sup> Evocoyase fariseo eta aipo ehi yuvireco chupe:

—¿Nde co oangaipa reseve oha vahe tēi, ore mbohe pota mbahe rese eve? —ehi.

Ipare omose ñepeí reseve oñemonuhasa sui yuvireco.

### **Jesús reroyasarēhi ndasesapisoi vahe nungar tēi**

<sup>35</sup> Jesús oicua ndasesapisoi vahecuer mombosa. Vupitise aipo ehi chupe:

—¿Ereyeroya nde Ava Riquehír rese? —ehi.

<sup>36</sup> Mbia evocoyase aipo ehi chupe:

—Che mbohesar, emombehumi cheu; tayeroya catu ru sese —ehi.

<sup>37</sup> —Eremahe niha co sese; che ité ahe aico —ehi ndasesapisoi vahecuer upe.

<sup>38</sup> Evocoyase mbia oñenopiha sovai:

—Oroviroya, che Yar —ehi chupe.

<sup>39</sup> Ichui aipo ehi:

—Che ayu co ivi pipe mbahe supi tupri vahe apo água; ava ndasesapisoi vahe nungar upe mbahe supi eté vahe che Ru suindar mboyecua água iyavei ava oicua tēi vahe mbahe Tūpa suindar mboesapisoēhi iri água —ehi.

<sup>40</sup> Evocoyase ambuae fariseo eta yuvirecoi vahe cōimi ichui osenduse aipo ñehesa, oporandu yuvireco chupe:

—¿Ore avei tie ndasesapisoi vahe nungar oroico? —ehi.

<sup>41</sup> Evocoyase omboyeví ahe fariseo upe:

—Peicose ndasesapisoi vahe nungar viña, “Peyavi mbahe” ndehi chietera Tūpa pe angaipa rese pēu viña. Pe rumo, “Ore oroicua tupri Tūpa suindar mbahe” peye tēi. Sese Tūpa, “Peyavi mbahe” ehi eté pēu —ehi Jesús fariseo eta upe.

### **Jesús ovesa rārosar nungar**

**10** “Supi eté aipo ahe pēu: acoi ava co coti rupi tēi yuviroique vahe ovesa rēta pipe, ahe imonda rai vahe tēi yuvirecoi. <sup>2</sup> Oique vahe rumo oquendipi rupi eté, ahe sārosar ité secoi. <sup>3</sup> Oquendipi rārosar omboi chupe. Evocoyase ovesa rārosar oñehe serer rupi güeimba ovesa upe senose água sēta sui. Ahe evocoyase oicua ñehe yuvireco. <sup>4</sup> Güeimba ovesa renose pare oguata senonde; seimba ovesa evocoyase oguata saquicuerive. Esepia, oicua ité ñehe yuvireco. <sup>5</sup> Ndoguatai eté rumo oyarēhi rupi yuvireco; yuvinoñañoñoño ichui. Esepia, ndoicuai eté ñehe” ehi <sup>6</sup> omboyoya güecocuer ovesa rārosar rese. Ava rumo ndosenducuai eté yuvireco.

### **Jesús ava rārosar aviye vahe**

<sup>7</sup> Evocoyase Jesús aipo ehi iri: “Supi eté, aipo ahe pēu: che año ité oquendipi nungar aico ovesa upe. <sup>8</sup> Opacatu ava yugüeru vahe che renonde, imonda rai vahe nungar tēi yuvirecoi. Ava cheundar rumo ndoviroyai eté yuvireco. <sup>9</sup> Che rumo oquenda nungar aico. Acoi oique vahe che rupi, ahera ipisiropirā yuvirecoi. Iyavei inungar acoi ovesa oique vahe güeta pipe, ichui osē capihi reca água água yepi, égüe ehira che reroyasar yuvireco.

<sup>10</sup> “Imonda rai vahe rumo omonda água tēi ou, oporoyuca água, mbahe mocañi água tēi avei. Che rumo ayu ‘tovireco ava tecovesa ndopai vaherā ité yuvireco’ viya. <sup>11</sup> Che ité ava rārosar aviye vahe aico. Sese ayemoingatu tupri che recocuer mondo água ava cheundar repirā; <sup>12</sup> acoi guarepochi repirā tēi oporaviqui vahe rumo, osepiase mahembiar oñaro ai vahe, oseypaño güemi-aro, oña oso. Esepia niha, ovesa ndahei eté seimba, ndahei avei eté ahe sārosar



ité seci. Evocoyase mahembiar oñaro ai vahe omondí-mondíi eté ipisi água. <sup>13</sup>Evocoi mbía oñaño. Esepia, guarepochi repirã tēi oporaviqui. Sese niha ndosaisui eté güemiario ovesa.

<sup>14-15</sup>“Che rumo ava rãrosar aviye vahe ité aico; che Ru che cua ité. Che evocoyase aicua avei che Ru. Sese che avei aicua che reimba ovesa eta. Ahe avei che cua yuvireco. Che niha amondo che recocuer sepirã yuvireco. <sup>16</sup>Areco avei ambuae ité che reimba ovesa. Ahe avei aru pota che mboyeroya vahe rã yuvireco. Ahese ñepeí reseve guasu che remiario yuvirecoira.

<sup>17</sup>“Che Ru niha che raisu ité. Esepia, amondo itera che recocuer manosave. Ipare rumo acuerayevira. <sup>18</sup>Ndoicatuí chira ava ahe ae tēi che yuca água; che teieté rumo amondora che recocuer che remimbotar rupi eté. Che areco ité pĩratasa imondo água, che cuerayevi iri água avei. Sese ité niha che Ru che cuai” ehi güemimbohe eta upe.

<sup>19</sup>Osenduse judío eta aipo nungar ñehesa, opa ipihañemoñeta yoavirati yuvireco. <sup>20</sup>Setá iteanga ipãhu pendar aipo ehi:

—¿Mahera vo co pemboyeroya? Vireco ité carugar oyese, ndayaracuai eté —ehi yuvireco chupe.

<sup>21</sup>Ambuae rumo aipo ehi yuvireco:

—Ndipoi eté rumo que ava na ehi vahe oñehe carugar rerecosar. ¿Omboesapiso tie carugar rerecosar ava? —ehi amove judío yuvireco Jesús upe.

### Judío rerecuar ndoyambotai Jesús yuvireco

<sup>22</sup>Ari sōhisa vahe pipe tecua Jerusalén ve tũparo rovasagüer pieta oyepota. <sup>23</sup>Ahese Jesús oguata oico tũparo Salomón oyapo vahecuer rocupe ivii rupi. <sup>24</sup>Evocoyase judío rerecuareta oyere tupri yuvireco sese aipo ehi yuvireco chupe:

—¿Marase rutei vo eremombehu tuprira Poropĩsirosar nde recosa oreu? Emombehu tupri catu ñepeí reseve oreu —ehi yuvireco chupe.

<sup>25</sup>—Amombehu niha acoi pēu, ndache reroyai eté rumo peye. Mbahe ayapo vahe che Ru mborerecuasa pipe omboyecua ité Poropĩsirosar che recosa; <sup>26</sup>pe rumo ndache reroyai eté peye. Esepia, pe ndahei eté che remiario ovesa peico. <sup>27</sup>Che remiario ovesa rumo oicua che ñehe. Che avei aicua ahe yuvireco. Ahe evocoyase che rupi oguata yuvireco. <sup>28</sup>Amondo avei tecovesa apirēhi yuvireco chupe icañiēhi água; ndipoi chietera que ava virocua iri vahe rã che sui. <sup>29</sup>Che Ru niha ombou cheu. Esepia, ahe ipĩrata catu opacatu ava sui. Ndipoi chietera que ñepeí ava oicatu vahe serocua che Ru sui. <sup>30</sup>Che Ru iyavei che oroico ñepeño ité —ehi judío rerecuareta upe.

<sup>31</sup>Aipo ihese, judío rerecuareta osupipa iri ita yuvireco yapi água. <sup>32</sup>Ahe chupe rumo aipo ehi:

—Setá mbahe poromondiisa aviye vahe pe rovaque ayapo che Ru pĩratasa pipe. ¿Uma che rembiapo aviye vahe sui che api-api pota peye ita pipe? —ehi judío rerecuareta upe.

<sup>33</sup>Judío rerecuareta omboyevi yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo egüe orohera ndeu. Esepia, nde ereñehe rai tēi Tũpa rese. Nde moco ava tēi ereico. Nde rumo ereyeapo Tũpa ndeyeupe ae —ehi yuvireco chupe.

<sup>34</sup>Evocoyase aipo ehi ahe ava upe:

—Pēundar mborocuaíta icuachiapri pipe niha aipo ehi: ‘Che aipo ahe pēu: pe tũpa pãve ité peico’ ehi. <sup>35</sup>Yaicua niha icuachiapri pipendar ndiyai yayamotarēhi. Esepia, Tũpa aipo ehi: ‘Pe tũpa pãve ité peico’ ehi evocoi ava oñehe pisisar upe. <sup>36</sup>Che niha che Ru Rembi-

poravo aico. Ahe che mbou co ivi pipe. ¿Mahera ru evocoyase, ‘Nde ereñehe rai tēi Tūpa rese’ peye cheu, ‘Che Tūpa Rahir aico’ ahesē pēu? <sup>37</sup> Esepia, acoi ndayapoise mbahe che Ru remimbotar, ahesē ndache reroyai chietera peye viña. <sup>38</sup> Yepe ndache reroyai chira che recocuer rese peye viña, mbahe ayapose rumo ahe tēi peroyara. Sese tapeicua ñepeí reseve che Ru secoise che rese iyavei che sese che recosa —ehi oamotarēhimbareta upe.

<sup>39</sup> Osoquenda pota iri yuvireco viña; Jesús rumo osoño ipāhu sui.

<sup>40</sup> Oyeveí iai Jordán rovai. Aheve acoi Juan yipindar oporoāpiramo. Aheve opīta. <sup>41</sup> Ava rehii yuvirasō sepia, aipo ehi yuvireco:

—Yepe Juan ndoyapoi mbahe poromondiisa viña. Opacatu mbahe omombehu vahe rumo co mbia resendar supi eté —ehi yuvireco.

<sup>42</sup> Setá iteanga ava Jesús viroya yuvireco aheve.

### Lázaro mano agüer

**11** Oime ava imbaheasi vahe serer Lázaro, tecua Betania pendar. Güeindri Marta iyavei María reseve yuvirecoi aheve. <sup>2</sup> Ahe María, oipiyere vahe mbahe siacua vahe yande Yar pi rese. Ipare oiquiti oha pipe. <sup>3</sup> Ahe seindri omondo oñehe Jesús upe yuvireco aipo ehi:

—Ore Yar, nde mboripar, nde rembi-aisu, imbaheasi ou —ehi.

<sup>4</sup> Ahe osenduse aipo ehi:

—Co mbaherasisa rumo ndahei ahe imano āgua ité. Ēgüe ehi rumo Tūpa reco porañetesa mboyecua āgua iyavei Tahir reco porañetesa mboyecua āgua avei —ehi.

<sup>5</sup> Yepe osaisú iteanga Marta icupihir reseve iyavei iquivri Lázaro viña, <sup>6</sup> oyan- duse rumo Lázaro mbaherasisa, opīta

viteño ité ñuvirío ari güecosave. <sup>7</sup> Ipare omombehu ore supi oroico vahe upe:

—Yaveví iri ivi Judea rupi —ehi.

<sup>8</sup> Ore rumo aipo orohe chupe:

—Ore mbohesar, cuesemi tēi acoi judío rerecuareta ahe pendar nde yuca pota ita pipe yuvireco; ¿cūrítei co erso pota iri aheve? —orohe chupe.

<sup>9</sup> Ore rumo aipo ehi:

—Ñepeí ari niha vireco doce hora. Supi eté acoi oguata vahe ari pipe ndoyepiapi eté. Esepia, osepia ité co ivi resapesa; <sup>10</sup> acoi oguata vahe rumo pītu pipe, oyepiapi eté. Esepia, ipane tesapesa chupe —ehi oreu.

<sup>11</sup> Ipare aipo ehi:

—Yande mboripar Lázaro oque tēi. Che rumo amomahera —ehi.

<sup>12</sup> Evocoyase ore aipo orohe chupe:

—Ore Yar, oque tēise, ocuerara —orohe.

<sup>13</sup> ‘Omano ité’ oyapave tēi aipo ehi. Ore rumo orepihañemoñeta: “Oque tēi revo” orohe chupe viña. <sup>14</sup> Ipare rumo omombehu tupri ité aipo ehi oreu:

—Lázaro omano ité. <sup>15</sup> Aviharete che ndaicoise aheve. Esepia, ēgüe ehise ité aviye catura pēu pe che reroya āgua. Yaso ru catu sepia —ehi oreu.

<sup>16</sup> Evocoyase Tomás, Gemelo serosa vahe, aipo ehi ore imboetasa oroico vahe upe:

—Yaso avei ru yande yamano vahe- rā supi —ehi.

### Jesús cuerayevisa secoi iyavei tecovesa

<sup>17-18</sup> Betania namombriimi Jerusalén sui, tres kilómetro tupri. Evocoyase ore oroyepota senise ahe tecuave, orosendu “cūrítei irungatu ari opa Lázaro tīre” ehi vahe. <sup>19</sup> Setá judío yuvirasō Marta iyavei María piri iquivri mano agüer sui imboviha āgua. <sup>20</sup> Oicua-se Marta Jesús yepota seni, oso voi eté sapeve;

María rumo opitaño oi pipe. <sup>21</sup> Evocoyase Marta aipo ehi voi chupe:

—Che Yar, ehi cohave ereicose, nomanoi chietera revo ore quivri viña. <sup>22</sup> Che rumo aicua Tūpa omboura opacatu nde porandusa ndeu —ehi Marta chupe.

<sup>23</sup> —Nde quivri rumo ocuerayevi irira —ehi Marta upe.

<sup>24</sup> —Supi eté aicua niha ocuerayevira opacatu omano vahecuer reseve ari ipa vahe pipe —ehi Marta.

<sup>25</sup> —Che niha cuerayevisa aico iyavei tecovesa. Acoi ava che reroya vahe, yepe omano tēira viña, oicoveño itera rumo.

<sup>26</sup> Acoi che reroya vahe güecoveseve, nomanoi chietera. ¿Ereroya aipo che hesa? —ehi Marta upe.

<sup>27</sup> —Oroviroya ité, che Yar. Nde niha Poropīsiosar ereico Tūpa Rahir, ore remiaro ereyu vaheṛā co ivi pipe oreu nara —ehi Marta Jesús upe.

### **Jesús oyaseho Lázaro ruvípa rovai**

<sup>28</sup> Aipo ohe pare, Marta oso ocupihir María reca, chupeñomi aipo ehi:

—Porombohesar oicove cohave, “Tou” ehi ndeu —ehi chupe.

<sup>29</sup> Evocoyase María oso voi eté sepia.

<sup>30</sup> Jesús rumo ndoique vitei eté tecua pipe; Marta rese oyoepiasave viteño ité secoi. <sup>31</sup> Osepiase María sē poyava, judío eta sētave yuvirecoi vahe imbovihasar yuviraso voi saquicuerive, “Oquivri ruvípave revo osora oyaseho” ehi yuvireco viña.

<sup>32</sup> Evocoyase María oyepotase chupe, oñenopiha sovai aipo ehi:

—Che Yar, ehi revo ereicoveño itese cohave, che quivri nomanoi chietera viña —ehi María chupe.

<sup>33</sup> Osepiase María yaseho iyavei judío eta yuviraso vahe supi, opíha pipe oyandu ité oviharēhisa. <sup>34</sup> Evocoyase oporandu:

—¿Que vo peñoti? —ehi chupe.

Ahe aipo ehi yuvireco chupe:

—Ore Yar, erio, teresepia —ehi.

<sup>35</sup> Ahese Jesús oyaseho. <sup>36</sup> Judío evocoyase aipo ehi yuvireco:

—¡Esepia, osaisu ité! —ehi oyeupe yuvireco.

<sup>37</sup> Ambuae rumo ipāhu pendar aipo ehi yuvireco:

—Co mbia omomahe vahe acoi mbia ndasesapisoi vahe, ¿ndoicatui chira píha Lázaro manoēhi āgua mbahe apo cuese rahe viña? —ehi yuvireco.

### **Lázaro mbogüerayevi agüer**

<sup>38</sup> Jesús oyemboya suvípave oviharēhisa pipe; ahe suvípa ita hopri, sovapisa ita avei.

<sup>39</sup> —Perocua sovapisa ita ichui —ehi.

Marta, omano vahe reindri, rumo aipo ehi:

—Che Yar, iné ité revo. Esepia, opa niha irungatu ari imanore —ehi.

<sup>40</sup> —¿“Che reroyase eve, Tūpa pīratasa eresepiara” ndahei vo acoi ndeu? —ehi Marta upe.

<sup>41</sup> Aipo ihe pare, virocua ita yuvireco ichui. Evocoyase omahe iva rese aipo ehi:

—Che Ru, “Aviye ndeu” ahe ndeu. Esepia, eresendu che ñehe. <sup>42</sup> Che aicua nde eresenduño ité che ñehe yepi, che rumo aipo ahe co ava eta rembiepiave ‘toviroya avei nde che mbousa co ivi pipe yuvireco’ che yapave —ehi.

<sup>43</sup> Aipo ohe pare, oñehe pīrata aipo ehi:

—¡Lázaro, esē eipeve sui! —ehi.

<sup>44</sup> Omano vahe evocoyase osē voi opacatu turucuar omamasa reseve. Jesús evocoyase aipo ehi ava upe:

—Peyorapa imamasa ichui, toguata —ehi.

### Judío rerecuareta oyemomborandu Jesús pisi āgua yuvireco

<sup>45</sup> Osepiase co poromondiisa, judío eta yuvirasos vahe María rupi setá ité Jesús viroya yuvireco. <sup>46</sup> Ipāhu pendar rumo moviro yuvirasos voi ava fariseo rerecuareta uve sembiapo mombehu āgua. <sup>47</sup> Evocoyase fariseo rerecuareta iyavei pahi rerecuareta oñemonuha guasu yuvireco aipo ehi:

—¿Mara yahera vo sereco? Co mbia setá ité oyapo poromondiisa oico. <sup>48</sup> Ndayayapoise mbahe chupe, opacatu tiēte ava viroyara yuvireco viña iyavei aviýeteramo mborerecuar Roma iñar yanduse, yugüerura yande tūparo mondurupa iyavei omocañi tēi uca aveira yande recua yande sui —ehi oyeupe yuvireco.

<sup>49</sup> Ñepeí rumo mbia ipāhu pendar Caifás serer vahe, ahe ité pahi eta rerecuar ivate catu vahe ahe araviter pipe, aipo ehi ava upe:

—Pe ndapeicuai eté mbahe, <sup>50</sup> ndape-senducuai avei co tecocuer; aviye catura ñepeí mbia omanose yande recocuer rese, ndahei que opacatu yande mocañi tēi āgua —ehi omboetasa eta upe.

<sup>51</sup> Ahe rumo ndahei oyesui tēi aipo ehi; Tūpa ité aipo ombohe uca. Esepia, ahe ité mborerecuar guasu chiní ahese. Sese aipo ehi: “Jesús omanora yande recocuer rese” ehi. <sup>52</sup> Iyavei ndahei chira ahe ava reseño, omanora opacatu ava Tūpa Rahir oñemosai tēi vahe ñepeí reseve imonuha āgua. <sup>53</sup> Ēgüe ehi ahe ari pipeve judío eta rerecuar oyemoin-gatupa voi yuca āgua yuvireco.

<sup>54</sup> Sese ndoguata iri ava judío eta pāhu rupi. Ahe rumo osē ivi Judea sui, oso ivi iporupirēhi vahe rerovicave, tecua Efraín ve. Aheve opacatu oropita supi.

<sup>55</sup> Virovise judío Pascua pieta apo āgua, setá iteanga ava ambuae tecua

rupindar yuvirasos tecua Jerusalén ve oyeecocuer moatiro ahe pieta mboetei āgua renondeve. <sup>56</sup> Oseca tēi Jesús yuvireco. Ipare tūparove yuviroiquese, oporandu-randu oyeupe yuvireco:

—¿Mara peye pe, oura pīha pieta repia, aní chira tie? —ehi-ehi oyeupe yuvireco.

<sup>57</sup> Yipive rumo fariseo rerecuar iyavei pahi rerecuar oyocuai ava, “Pesepiase Jesús, pemombehu voi oreu ipisi āgua” ehi yuvireco chupe.

### Ñepeí cuña omondo Jesús rese mbahe siācua vahe

**12** Seis ari ipane viteses Pascua pieta āgua, Jesús oso tecua Betania ve, aheve acoi Lázaro ombogüer-ayevi. <sup>2</sup> Eipeve ocaru yuvireco Jesús mboeteisave. Marta ihañeco sese; Lázaro evocoyase ocaru yuvinoi mesave ipiri. <sup>3</sup> Evocoyase María güeru medio litro mbahe siācua vahe nardo, sepí iteanga vahe. Omondo ipi rese. Ipare oiñiti ohavapri pipe ichui. Siācuá iteanga evocoyase opacatu oi pipe. <sup>4</sup> Evocoyase ore mboetasa Judas Iscariote, ahe acoi omondo vaheerā ava yamotarēhimbar uve, aipo ehi:

<sup>5</sup> —¿Mahera vo ndimondosai co mbahe siācua vahe trescientos denario rupi ava iparaisu vahe pitivii āgua? —ehi.

<sup>6</sup> Judas rumo ndahei ava iparaisu vahe raisupave aipo ehi. Ahe rumo imonda rai vahe tēi. Setá rupi guarepochi virocua güembiporuguā tēi. <sup>7</sup> Evocoyase Jesús aipo ehi:

—Toyapoño cheu. Esepia, ahe che mano āgua renonde ēgüe ehi cheu. <sup>8</sup> Yuvirecoveño itera ava iparaisu vahe pe pāhuve yepi; che rumo ndaico pucu iri chira pe pāhuve —ehi Judas upe.

**Pahi rerecuar oyamotarēhi  
Lázaro yuvireco**

<sup>9</sup>Setá iteanga ava judío oyandu yuvireco Jesús rerācua Betania ve sec-oise. Sese yuviraso aheve; ndahei Jesús repia güeraño yuviraso, ēgüe ehi rumo imbogüerayevipri Lázaro repia avei. <sup>10</sup>Evocoyase pahi rerecuar, “Yayuca avei Lázaro” ehi yuvireco oyeupe. <sup>11</sup>Esepia, ahe ichui tēi niha setá iteanga judío oyepepi pahi rerecuar sui Jesús reroya āgua yuvireco.

**Jesús oi que Jerusalén pipe**

<sup>12</sup>Ava rehii yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota āgua ahe tecuave yuvireco. <sup>13</sup>Ahese oyasia pindo yuvireco. Oyacatu viraso Jesús rovaīchi āgua, osapucái yuvireco chupe:

—¡Imboeteipri, sovasapri secoi ou vahe yande Yar Tūpa rer pipe! ¡Tūpa tosovasa Israel rerecuar guasu! —ehi yuvireco.

<sup>14</sup>Yipindar rumo opa Jesús oseca uca guaricumí. Ipare oyeupi sese icuachiapri aracahendar rupi tupri ité aipo ehi vahe:

<sup>15</sup>“Pesiquiyei rene, Sión pendar; pesepia, pe rerecuar guasu guaricumí harive ou pēu” ehi.

<sup>16</sup>Yipindar, ore semimbohe eta, ndorosenducuai eté co aracahendar imombehupri. Ipare rumo oyevise güecosa porañetesave, ahese oremahenduha aracahendar sesendar icuachiapri rese, “Supi eté omombehu” orohe tēi sepiase.

<sup>17</sup>Acoi ava yuvirecoi vahe Jesús rupi, Lázaro mbogüerayevisa osepia vahecuer, ahe opa omombehu-mbehu ambuae ava upe yuvireco. <sup>18</sup>Sese ava eta yuvinose voi sovaīchi ipisi āgua. Esepia, oicua ité ahe mbahe poromondiisa guasu yapose yuvireco. <sup>19</sup>Evocoyase fariseo rerecuareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, ¡opacatu guasu ité ava oguata cūrítei yuvireco supi! —ehi yuvireco.

**Oime griego oseca  
vahe Jesús yuvireco**

<sup>20</sup>Griego oime ava rehii pāhuve yuviraso vahe pieta repia Tūpa mboetei āgua tecua Jerusalén ve. <sup>21</sup>Ahe oyemboya Felipe, Betsaida pendar rese, ahe tecua Galilea pipendar. Ipare aipo ehi yuvireco chupe:

—Nde mbia, orosepia potami aipo Jesús —ehi.

<sup>22</sup>Felipe evocoyase oso imombehu Andrés upe; ichui yuviraso ñuvirío voi Jesús upe imombehu. <sup>23</sup>Evocoyase chupe aipo ehi:

—Oyepota ari cheundar che, Ava Riquehir, che yevi iri āgua che recua porañetesave. <sup>24</sup>Supi eté aipo ahe pēu: inungar acoi trigo rāhii nañotisaise, ahese ndihai chietera; ñotise rumo, ahese iha vaira. <sup>25</sup>Acoi ava osaisuse rumo güecocuer tēi, ocañi tēira; acoi ndosaisui vahe rumo güecocuer co ivi pipendar tēi che recocuer rese, evocoi nungar virec-ora tecovesa apirēhi. <sup>26</sup>Acoi ava che mboyeroya pota vahe, toguata che rupi yuvireco. Esepia, acoi che mboyeroyasar yuvirecoi vahe, ahe avei yuvirecoira che piri ivave. Che Ru Tūpa evocoyase omboeteira ahe sereco —ehi chupe.

**Jesús omombehu omano āgua**

<sup>27</sup>“¡Cūrítei ayandu ité mbahe-mbahe tēi oime vaherā cheu! ‘¿Mara ahera pīha?’ ahe tēi. ¿Aipo ahera: ‘Che Ru, che pīsiro eve cūrítei cheu oime vaherā mbahe tēi sui’ ahera viña? ¡Che rumo aicua evocoi nungarā ité ayu! <sup>28</sup>Che Ru, emboyecua nde pīratasa nde rer porañetes mboetei āgua” ehi oyoerqui.

Ichui oyeendu iva sui ñehesa aipo ehi vahe: “Ēgüe ahe niha amboyecua che pīratasa vichico, ěgüe ahe iri aveira” ehi.

<sup>29</sup> Aheve ava yuvirecoi vahe, “Osunu revo” ehi yuvireco viña; ambuae ava,

—Tūpa rembiguai revo oñehe Jesús upe —ehi yuvireco.

<sup>30</sup> Evocoyase aipo ehi ava eta upe:

—Ndahei cheundar ñehesa pesendu, ahe rumo pēundar. <sup>31</sup> Cūrítei oimera ñemoirosa co ivi pīpendar ndache reroiyai vahe upe, cūrítei avei imombosara Carugar co ivi pīpendar imborerecuasa sui. <sup>32</sup> Acoi che rupise ivate, opacatu ava arura cheyupi —ehi.

<sup>33</sup> Aipo ñehesa pipe omboyecua tupri ité mara ehira omano. <sup>34</sup> Aipo ihese ava eta aipo ehi:

—Ore rumo orosendu mborocuita icuachiapri pipe aipo ehi vahe: “Poropīsīrosar apirēhi vaherā ité” ehi. ¿Mahera ru aipo nde: “Ava Riquehir osupira ivate yuvireco” ere no? ¿Uma ru aipo Ava Riquehir, ambuae tie? —ehi ava eta yuvireco chupe.

<sup>35</sup> Evocoyase aipo ehi ava upe:

—Pe perco vitemira chíhi rupive tesapesa pe pāhuve. Peguata catu supi seime viteseve. Aviyeteramo pe resapiha tēira pītumimbi vahe. Esepia, acoi oguata vahe pītumimbisa rupi, ndoicuai que güecosa. <sup>36</sup> Peroya co tesapesa cūrítei perco viteseve, ipipe ité pe reco āgua —ehi.

Aipo ohe pare, Jesús osē ava rehii pāhu sui; ndoyemboyecua iri chupe.

### Setá judío rerecuar ndoviroya vitei eté Jesús yuvireco

<sup>37</sup> Yepe Jesús setá iteanga oyapo mbahe poromondiisa judío rerecuar rovaque viña, ahe rumo ndoviroyai eté yuvireco. <sup>38</sup> Esepia, imboaviyesa rane itera Tūpa ñehe mombehúsar Isaías rembicuachiagüer aipo ehi vahe:

“Che Yar, ava ndoviroyai yande ñehe yuvireco iyavei ndoviroyai nde pīratasa eremboyecuase chupe” ehi.

<sup>39</sup> Co rese avei ava ndoicatu eté senducua yuvireco. Inungar oicuachía Isaías aipo ehi:

<sup>40</sup> “Tūpa nomboesapisoí ava iyavei nombopiñañemoñeta tupri iri mbahe rese yuvireco.

Sese ndosepiacuai eté mbahe, ndosenducuai avei mbahe, ndoyevi catu yuvireco chupe ombogüera āgua” ehi.

<sup>41</sup> Isaías aipo ehi. Esepia, osepia ité Jesús reco porañetesa. Evocoyase ahe oñehe sese.

<sup>42</sup> Setá ité rumo judío viroya yuvireco, seco ivate vahe avei. Ahe rumo nomboyecuai eté seroyasa yuvireco fariseo rerecuar sui osiquiyepave ‘aviyeteramo yande mombora ñemonuhasa sui ñepeí reseve yuvireco’ oya. <sup>43</sup> Esepia, ahe oipota catu ava tēi suindar yemboeteisa Tūpa suindar yemboeteisa sui yuvireco.

### Jesús ñehe reroiyasa rese porandusara

<sup>44</sup> Yipindar rumo, Jesús oñehe vitesave rehi upe, oñehe pīrata aipo ehi: “Acoi che reroiyasa vahe ava, ndahei che güeraño che reroiyasa, ahe rumo che Ru avei, che mbousar, viroya yuvireco. <sup>45</sup> Iyavei acoi che repia vahe, che mbousar avei osepia. <sup>46</sup> Che tesapesa aico. Ayu co ivi pipe ava che reroiyasar pītumimbisave yuvirecoiēhi āgua. <sup>47</sup> Acoi osendu vahe che ñehe, nomoinguei vahe rumo oyese, ndahei che amocañira. Esepia, ndayui ava co ivi pīpendar mocañi āgua, che rumo ayu ipīsīro āgua. <sup>48</sup> Acoi ava che reroiño vahe, ndoviroyai vahe avei che ñehe, oime rumo imocañi āgua: Co che ñehesa supi eté vahe reroiyāñisa pipe oyemocañi ucara ari ipa vahe pipe. <sup>49</sup> Esepia, che nañehei eté cheyesui tēi; che Ru, che mbousar rumo che cuai che ñehe āgua, che porombohe āgua avei.

<sup>50</sup>Che aicua co cheundar porocuita güeru tecovesa apirēhi ava upe. Sese niha amombehu che Ru che cuaisa” ehi Jesús ava rehii upe.

### Jesús oyosei güemimbohe pi

**13** Pascua pieta renonde Jesús oicua ité ohari yepota co ivi reya água oso vaheṛá Vu piri. Ahe osaisu vahe ité ava oyeupendar co ivi pipe yepi. Ēgüe ehi saisu ari ipa vahe rupi.

<sup>2-4</sup>Carugar oique ité Simón rahir, Judas Iscariote, piha pipe imondo água yamotarēhimbar uve. Jesús rumo oicua ité Vu Tūpa sui ousa, oicua avei oyevi iri água Vu Tūpa piri iyavei Tu omondo opacatu omborecuasa chupe. Sese ocaruse güemimbohe eta reseve, mesa sui opūha, osequii oturucuar yohasa. Ipare omonde ambuae turucuar vumbicuasa rese. <sup>5</sup>Evocoyase omondo i yepoisa riru pipe, oyosei güemimbohe pi, omombiru turucuar vumbicuasa rese vireco vahe pipe oico.

<sup>6</sup>Ichui Simón Pedro pi oyosei potase, ahe aipo ehi chupe:

—Che Yar, ¿nde co ereyoseira che pi? —ehi chupe.

<sup>7</sup>—Nde rumo nderesenducuai mbahe che rembiapo cūrítei. Ipare rumo eresenducua —ehi Pedro upe.

<sup>8</sup>Pedro rumo aipo ehi chupe:

—¿Che pi rumo ndereyosei chietera! —ehi.

—Ndayoseise rumo nde pi, ndahei chietera evocoyase che rupindar ereico —ehi Pedro upe.

<sup>9</sup>Pedro evocoyase aipo ehi:

—¿Che Yar, aní catu che pi año ereyosei; eyosei che po, che rova avei! —ehi chupe.

<sup>10</sup>—Acoi oyasupa ramo vahe rumo, ahe ndiquihai eté. Sese ndiyai oyasu iri. Ipi güeraño rumo iya yoseisa. Ēgüe peye ndipoi eté mbahe pe rese; ndaopacatui rumo ēgüe peye —ehi.

<sup>11</sup>Ahe aipo ehi: “Ndaopacatui rumo ēgüe peye” ehi. Esepia, oicua ité uma omondora yamotarēhimbar upe.

<sup>12</sup>Güemimbohe pi sei pare, omonde iri oturucuar yohasa, oguapi mesave aipo ehi:

—¿Peicua vo co mbahe ayapo vahe pēu? —ehi—. <sup>13</sup>Pe niha, “Ore mbohesar, ore Yar” peye cheu. Supi eté niha. Esepia, ahe ité che aico. <sup>14</sup>Yepe supi eté, che pe mbohesar, pe Yar avei aico viña, ayosei rumo pe pi. Sese pe avei ñepepe-pey yacatu peyosei aveira pe pi. <sup>15</sup>Che niha ‘na tehi avei yuvireco’ viya opombohe pe rereco, ēgüe ahe pēu. <sup>16</sup>Supi eté aipo ahe pēu: ava mbiguai tēi, ahe ndahei ivate catu güerecuar sui; ēgüe ehi avei imbouprí ndahei ivate catu secoi ombousar sui. <sup>17</sup>Pesenducua se nungar mbahe, peyapo tuprise, ahese peviharete catura peico —ehi.

<sup>18</sup>“Che nañehei opacatu pe rese, che rumo aicua uma yuvirecoi vahe che rembiporavo. Icuachiapri rumo yaviyera: ‘Acoi ocaru vahe che piri, oyemboyere che amotarēhi’ ehi vahe. <sup>19</sup>Senondeve amombehu pēu. Evocoyase ēgüe ehise ité cheu, che reroyara peye che ité niha aipo ahe vahe vichico. <sup>20</sup>Supi eté aipo ahe pēu: acoi che remimondo oipisi tupri vahe, ahe che pisi tupri avei; acoi ava che pisi vahe, oipisi tupri avei che Ru yuvireco” ehi.

### Jesús omombehu: “Ñepepe pe pāhu pendar che mondora che amotarēhimbar upe” ehi

<sup>21</sup>Aipo ohe pare, Jesús ndoyembovihai eté iyavei mbahe oime vaheṛá omboyecua tupri ité,

—Supi eté aipo ahe pēu: ñepepe pe pāhu pendar che mondora che amotarēhimbar upe —ehi.

<sup>22</sup>Evocoyase ore oromahe-mahe tēi oreyses, “¿Ava upe piha aipo ehi?” orohe tēi oreyeupe. <sup>23</sup>Che sembiaisu

catu yípive acaru vīte. <sup>24</sup>Ipare Pedro oyaiti-iti ‘¿Ava upe vo aipo ere? tehi chupe’ oyapave cheu. <sup>25</sup>Evocoyase che asiri catu irimi yípive, aporandu chupe:

—Che Yar, ¿ava ité vo? —ahe.

<sup>26</sup>Ahe aipo ehi cheu:

—Cūrītei amoaquira pan rahicuer imondo tohu, ahe ité che mondora —ehi cheu.

Aipo ohe pare omoaqui pan rahicuer imondo Simón Iscariote rahir, Judas, upe. <sup>27</sup>Judas oipisise pan, oguapi voi eté Carugar sese. Evocoyase aipo ehi Judas upe:

—Evocoi ereyapo pota vahe, eyapo voĩno ité ru —ehi chupe.

<sup>28</sup>Que ñepi rumo mesave orocarua vahe, ndorosenducuai eté aipo ihesa. <sup>29</sup>Esepia, Judas guarepochi riru rārosar secoi yepi. Sese amove ore pāhu pendar ipihañemoñeta: “Tererocua mbahe pietase nara’ anise, ‘emondo mbahe ava iparaisu vahe upe nara’ aipo oya revo omose imondo” ehi yuvireco chupe viña.

<sup>30</sup>Pan pisi pare, Judas osé voi eté oso pītuse.

### Porocuita ipiasu vahe

<sup>31</sup>Judas sē pare, Jesús aipo ehi:

—Cūrītei oyecuara che, Ava Riquehir, reco porañetesa. Che Ru Tūpa reco porañetesa avei oyecuara che rese. <sup>32</sup>Acoi amboyecuase che Ru Tūpa reco porañetesa, ahe avei omboyecuara che reco porañetesa, ěgüe ehira imboyecua pihai. <sup>33</sup>Che rahireta, che rembiaisu, ndaico pucu iri chira pe rese. Che reca tēira peye; inungar acoi judío rerecuar upe aipo ahe: “Ndiyai chietera peso che sosave” ahe. <sup>34</sup>Sese co amondo porocuita ipiasu vahe pēu ñepi-peipeyaisu āgua inungar che opoaisu. <sup>35</sup>Peyeaisuse ñepi-peipei, opacatu tupri ité ava oicuara yuvireco che remimbohe supi eté pe recosa —ehi.

### Jesús, “Ndaicuai eté co mbia’ erera cheu” ehi Pedro upe

<sup>36</sup>Pedro oporandu Jesús upe:

—Che Yar, ¿que vo aipo eresora? —ehi chupe.

Ahese omboyevi Pedro upe:

—Cūrītei ndiyai peso vaheṛā che sosave che rupi; pesorera rumo che rupi curi —ehi.

<sup>37</sup>—Che Yar, ¿mahera ru cūrītei voi ndiyai nde rupi che so āgua? ¡Ayemoin-gatu ité amano vaheṛā nde rese! —ehi Pedro chupe.

<sup>38</sup>—¿Supi eté pīha ereyemoin-gatu ité che rese nde mano āgua? Nde rumo cōhe potase tacura ñehe renondeve, mbosapi oyupagüer rupi, “Ndaicuai eté co mbia” erera cheu —ehi Pedro upe.

### Jesús, Tūpa raper yandeu

**14** Ipare Jesús aipo ehi opacatu oreu: “Pepihañemoñeta atii rene; peyeroya Tūpa rese, che rese avei peyeroya. <sup>2</sup>Esepia, che Ru rētave setá oime pe reco āgua; ěgüe ndehise rumo, namombehui chira aipo pēu viña. Sese che asora pe recuarā moingatu. <sup>3</sup>Imoingatu pare ayevíra pe reca che recosave pe reraso āgua cheyepiri. <sup>4</sup>Pe peicua que vo asora iyavei peicua mara peyera pe yepota āgua che recosave” ehi oreu.

<sup>5</sup>Tomás rumo aipo ehi chupe:

—Che Yar, ndoroicuai rumo que vo eresora. ¿Mara orohera vo aipo icua ore so āgua? —ehi.

<sup>6</sup>—Che niha peri aico supi eté vahe iyavei tecovesa. Che rupi güeraño ité peyepotara che Ru upe —ehi—. <sup>7</sup>Pe peicua tuprise ité che recocuer viña, peicua aveira che Ru viña no. Cūrītei suive rumo peicua, pesepia avei cute —ehi oreu.

<sup>8</sup>Evocoyase Felipe aipo ehi chupe:

—Che Yar, torosepia ité ru aipo nde Ru. Ahese aviýera oreu —ehi.



<sup>9</sup>—Felipe, setá ari aico pe rese, ¿ndapeicua vitei eté vo che recocuer? Acoi ava che repia vahe, ahe osepia ité che Ru; ¿mahera ru evocoyase, “Torosepia rane ité nde Ru” ere vite cheu no? <sup>10</sup> ¿Ndache reroyai vo peye che Ru rese ité aicose, che rese avei che Ru secoise? Opatatu mbahe amombehu vahe pëu, ndahei cheyesui tēi amombehu. Che Ru secoi vahe che rese, ahe ité oyapo güemimbotar che recocuer rese —ehi—. <sup>11</sup> Che reroya peye che Ru rese che recose, ahe avei secoise che rese. Anise, che reroyañomi tēi catu peye mbahe che rembiapo rese —ehi—. <sup>12</sup> Supi eté aipo ahe pëu: acoi ava che reroya vahe, ahe avei oyapora mbahe che rembiapo nungar, tuvicha catura rumo. Esepia, che asora che Ru piri —ehi—. <sup>13</sup> Acoi peporanduse que mbahe rese che rer pipe, che amondoño itera pëu. Ipípe che amboyecuara che Ru reco pīratasa. <sup>14</sup> Che ayapora que mbahe che rer pipe pe porandusa —ehi oreu.

**Jesús, “Che amboura Espíritu Santo pëu” ehi viroyasar upe**

<sup>15</sup> “Che raisuse ité peye, pemboyeroya catu che porocuita. <sup>16</sup> Che aporandura che Ru upe ombou vaheñā Espíritu supi eté vahe pe pītívii āgua, ahe secoi vaheñā ité pe rese. <sup>17</sup> Ava Tūpa ndoicuai vahe rumo, ndoicatui chietera ipisi. Esepia, ndosepia, ndoicuai avei yuvireco. Pe rumo peicua ité. Esepia, ahe ité secoi pe rese. Ipape oi que itera pe piha pipe.

<sup>18</sup> “Ndopoeyai chira pe güeraño tēi; ayevira niha pe rese aico vaheñā. <sup>19</sup> Chīhi tēi oime vite ari che reroyasarēhi che repia vite vaheñā yuvireco. Ipape rumo ndache repia iri chira yuvireco. Pe rumo che repiaño itera peye iyavei peicoveño itera. Esepia, che aicoveño avei. <sup>20</sup> Ahe ari pipe peicuara che Ru rese che recosa, che rese pe recosa avei iyavei che aicose pe rese. <sup>21</sup> Acoi oicua vahe che

porocuita, omboyeroya vahe avei, ahe omboyecuara ité che raisusa yuvireco. Che Ru osaisura che raisusar; che avei asaisura, ayemboyecuara aveira chupe” ehi.

<sup>22</sup> Judas (ndahei vahe rumo Iscariote) aipo ehi:

—Che Yar, ¿mahera oreuño ereyemboyecuara; mahera ru ndereyemboyecuara iri chira ava nde reroyasarēhi upe? —ehi chupe.

<sup>23</sup> Evocoyase aipo ehi Judas upe:

—Acoi che raisu vahe, omboyeroya vahe che ñehe yuvireco, che Ru evocoyase osaisura iyavei che Ru reseve oroyura oroico vaheñā sese. <sup>24</sup> Acoi ndache raisui vahe, ahe ndoviroyai avei che ñehe yuvireco. Co ñehesa pesendu vahe ndahei cheyesui tēi; ahe rumo che Ru, che mbousar suindar —ehi.

<sup>25</sup> “Pe rese che reco vite se, opa co mbahe amombehu vichico pëu. <sup>26</sup> Espíritu Santo rumo, Poropītívii sar, che Ru ombou vahe che rer pipe, ahe pe mbohera opacatu mbahe aviye vahe rese. Pe momahenduha aveira opacatu pëu che ñehe agüer rese.

<sup>27</sup> “Aseya teco tuprisa pëu, ahe che reco tuprisa; ndahei rumo avaño tēi rembiapo nungar amondo pëu. Aní, ‘¿Mara yahera piha?’ peyera; aní chiveira pesiquiye. <sup>28</sup> Pesendupa niha acoi, ‘Asora, ipape ayevi irira pe rese aico vaheñā’ che hesa. Supi eté che raisuse peye, peviharetera peicuase che Ru piri che sosa. Esepia, ahe ivate catu vahe ité che sui. <sup>29</sup> Sese amombehupa voi co mbahe tenondeve pëu, egüe ehise ité, ahese peroyara.

<sup>30</sup> “Namombehu pucu iri chira mbahe pëu. Esepia, ou ité co ivi pipe oporocuai tēi vahe. Ahe rumo ndahei ivate catu vahe che sui <sup>31</sup> ‘toicua ava che reroyasarēhi che Ru raisusa yuvireco’ che hesa pipe. Ayapaoño ité che Ru che cuaita.

“Pepūha. Yaso cohave sui” ehi güemimbohe eta upe.

### Jesús uva hi nungar

**15** Ipare Jesús oñehe iri oreu aipo ehi: “Che aico inungar uva hi supi eté vahe; che Ru evocoyase inungar sese iñañeco vahe secói. <sup>2</sup>Ahe oyasia sãca ndihai vahe ichui yepi; iha vahe rumo omoatiro tupri iha catu água. <sup>3</sup>Pe pe recocuer imoatiropro ité che pe mbohosa pipe. <sup>4</sup>Peicoño ité catu che rese inungar che aicoño ité avei pe rese. Uva rãca oise ohi sui, ndiha iri ahe ae tēi; pe avei ěgüe peyera peyepise che sui” ehi oreu.

<sup>5</sup>“Che niha uva hi nungar aico; pe evocoyase sãca nungar peico. Acoi secói vahe che rese, che avei aico sese. Inungar mbahe miti iha ati vahe, ěgüe ehira ahe. Supi eté ndapeicatui chietera che porēhi mbahe apo. <sup>6</sup>Acoi ndasecói vahe che rese, ahe imombosara inungar acoi uva rãca yipi vahe. Ipare imonuhasa sapi água” ehi oreu.

<sup>7</sup>“Pe peicoñose ité che rese ndapere-saraise avei che porombohesa sui, peporanduño mbahe pe remimbotar rese, ahese imondosara pēu” ehi. <sup>8</sup>“Che Ru oipisira omboeteisa pe sui acoi peyapo tuprise opacatu che remimbotar. Pemboyecua evocoyase che remimbohe supi tupri vahe pe recosa. <sup>9</sup>Che opoaisu ité, inungar che Ru che raisu. Sese peicoño ité catu che poroaisusa pipe. <sup>10</sup>Esepia, pemboyeroyase che porocuita, peicov-eño itera co che poroaisusa pipe. Inungar che che Ru amboyeroya che cuaisa iyavei aicoveño ité che Ru poroaisusa pipe vichico.

<sup>11</sup>“Che aipo ahe pēu ‘tovireco che vihasa oyese yuvireco’ viya; ‘toyemboviharete catu yuvireco’ che hesa pipe. <sup>12</sup>Co che porocuita: Peyeaisu ñeppei, inungar che opoaisu. <sup>13</sup>Ndipoi eté que poroaisusa ivate catu vahe co sui omondose que ava güecocuer ombori-

par rese nara. <sup>14</sup>Pe che mboyeroyase peye, ahese che mboripar peico. <sup>15</sup>‘Pe mbiguai peico’ ndahe iri pēu. Esepia, mbiguai ndoicuai eté mbahe güerecuar pihañemoñetasa. Sese, ‘Che mboripar’ ahe pēu. Esepia, aicua ucapa ñehesa che Ru cheu omombehu vahe pēu. <sup>16</sup>Pe niha ndache poravoi peye. Che rumo opoporavo iyavei opocuai peporaviqui vaherã ava reru água cheu ‘che rese ité toyuvirecoi’ che yapave. Evocoyase che Ru omboura mbahe pe porandusa che rer pipe pēu. <sup>17</sup>Co rese opocuai: Peyeaisu catu ñeppei-pey peyacatu” ehi Jesús güemimbohe upe.

### Jesús amotarēhimbar, supindar amotarēhimbar avei

<sup>18</sup>“Acoi ava ndoicuai vahe Tūpa pe amotarēhise, peicuaño che rane che amotarēhi yuvireco yipindar. <sup>19</sup>Pe peico vitesa ava Tūpa ndoicuai vahe pãhuve, evocoyase pe raisu aira yuvireco viña. Che rumo opoporavo ipãhu sui yuvireco. Sese tēi ndape ambota iri yuvireco. Esepia, pe ndahe iri ipãhu pendar peico. <sup>20</sup>Peyemomahenduha pēu aipo che hesa rese: ‘Ndipoi eté que mbiguai ivate catu vahe güerecuar sui’ ahe. Che niha yipindar yamotarēhimbar aico, pe avei pe amotarēhira yuvireco. Acoi omboyeroya vahe rumo che porombohesa, pe porombohesa avei omboyeroyara yuvireco. <sup>21</sup>Co opacatu mbahe che recocuer sui tēi ěgüe ehira pēu. Esepia, ndoicuai niha che mbousar yuvireco.

<sup>22-24</sup>“Che ndayuisse ahe ava upe mbahe sembiavi mombehu viña, evocoyase, ‘Peyavi mbahe’ ndehi chira Tūpa chupe yuvireco viña. Che rumo ayu ité, amombehu mbahe sembiavi yuvireco chupe, ayapo avei mbahe ava ndoyapoi vahe yuvireco ipãhuve; ahe rumo yepe osepia co mbahe yuvireco viña, che amotarēhiño, che Ru avei oyamotarēhi yuvireco. Sese, ‘Pereco ité

mbahe pe rembiavi peyese' ehi Tūpa chupe. Esepia, acoi che amotarēhi vahe, che Ru avei oyamotarēhi yuvireco. <sup>25</sup> Co rumo ēgüe ehi. Esepia, imboaviyesa rane itera ñehesa sesendar icuachiapri pipe aipo ehi vahe: 'Mbahe apoēhi pipe sui tēi che amotarēhi yuvireco' ehi vahe.

<sup>26</sup> "Acoi ambouse rumo Poropītiviisar, Espiritu supi eté vahe che Ru sui pēu, ahe omombeura che recocuer. <sup>27</sup> Pe avei pemombeura che recocuer. Esepia, yipisuive ité peico che rupi" ehi.

**16** <sup>1-2</sup> "Pe mocañehi āgua che rese pe yeroyasa aipo ahe opacatu co mbahe imombehu pēu: pe mombora judío rerecuar oñemonuhasa sui yuvireco, pe yuca aveira yuvireco. Ahe rumo omohara, 'Tūpa uve nara revo na yahe' ehira yuvireco viña. <sup>3</sup> Evocoi rumo ēgüe ehira yuvireco che Ru cuaēhi pipe iyavei che cuaēhi pipe yuvireco. <sup>4</sup> Amombehu aipo pēu acoi ēgüe ehise, peyemomahenduhara che remimombehugüer rese.

### Espíritu Santo rembiapo

"Yipisuive rumo namombehui co mbahe pēu. Esepia, aicoveño ité pe rese. <sup>5</sup> Cūrítei rumo asora che mbousar piri iyavei ndipoi que ñepepe pe pāhu pendar '¿que vo aipo eresora?' ehi vahe cūrítei cheu. <sup>6</sup> Pe rumo ndapeyembovihaiño aipo mbahe amombehuse pēu. <sup>7</sup> Supi eté rumo aipo ahe pēu: aviye catura pēu che asose. Esepia, ndasoise viña, ndoui chietera pe rese Poropītiviisar. Asose rumo, che amboura pēu. <sup>8</sup> Ouse ahe, oicua ucara ava che cuaēhisar upe yangaipa, oicua uca aveira tecocuer ñvisa iyavei cañisa ndaseco pōrai vahe upendar. <sup>9</sup> Oicua ucara yangaipa chupe ndache reroyaise yuvireco; <sup>10</sup> oicuara rumo che reco ihīvi tupri vahe yuvireco. Esepia, asora che Ru recosave, ahese pe ndache repia iri chietera peye;

<sup>11</sup> iyavei oicuara Tūpa poromocañisa. Esepia niha, Carugar, ahe co ivi pipendar rerecuar oipisira che Ru Tūpa ñemoirosa.

<sup>12</sup> "Setá iteanga mbahe oime amombehu vaheā pēu. Pe rumo ndapeicatu chira cūrítei senducua. <sup>13</sup> Ouse rumo Espiritu supi eté vahe, ahe pe mbohera mbahe supi eté vahe rese. Esepia, noñehi chira oyesui tēi, ahe rumo omombeura mbahe osendu vahe güeraño, oicua uca aveira mbahe coiye oime vaheā. <sup>14</sup> Ahe che mboeteira. Esepia, oicua ucara opacatu mbahe cheundar pēu. <sup>15</sup> Opacatu mbahe che Ru vireco vahe, che mbahe. Sese niha, 'Espiritu oipisira opacatu mbahe cheundar, oicua uca aveira pēu' ahe.

<sup>16</sup> "Aviyeteramo tēi ndache repia iri chira peye. Ipare rumo coiye catumi che repia irira peye" ehi oreu.

### Yepe semimbohe ndovihai chira viña, coiye catu rumo oviharetera yuvireco

<sup>17</sup> Evocoyase ore oroporandu-randu tēi oreyeupe aipo orohe:

—¿Mara oya piha: 'Aviyeteramo tēi ndache repia iri chira peye' ehi yandeu; ipare rumo aipo coiye catumi yasepiara iyavei aipo osora Vu piri no? <sup>18</sup> ¿Mara oya vo aipo: 'Aviyeteramo tēi' ehi? Ndayasenducuai mo aipo ñehesa — orohe oreyeupe.

<sup>19</sup> Ipare rumo 'oporandura co mbahe rese yuvireco cheu' oya aipo ehi voi oreu:

—¿'Ipare rumo coiye catumi che repia irira peye' che he agüer rese co pe porandu vite peyeupe? —ehi—. <sup>20</sup> Supi eté aipo ahe pēu: peyasehora pe viharēhisa pipe, ava angaipa viyar rumo ovihareteñora yuvireco. Yepe pe, ndapevihai chira viña, coiye catu rumo peviharetera. <sup>21</sup> Inungar acoi que cuña imembira potase, tasi chupe oyepotase ari imembira āgua; pītani oha pare

rumo, nimahenduha iri tasicuer rese; soriveteño omembri rese. <sup>22</sup>Ēgüe peye avei; pe cūrítei tasi avei pēu, ayevi irira rumo pe repia āgua, ahese peviharetera. Ahe viharetesa ndipoi chietera que ava virocua vaherā pe sui.

<sup>23</sup>“Ahe ari pipe, ndapeporandu iri chietera mbahe rese cheu. Supi eté aipo ahe pēu: che Ru omboura opacatu mbahe pēu che rer pipe peporanduse. <sup>24</sup>Cūrítei rumo ndapeporandu vitei mbahe rese che rer pipe. Peporandu catu sese, ahese peipisira. Ipipe sui perorivete catura.

### Jesucristo mbahe-mbahe tēi recopisar

<sup>25</sup>“Opacatu mbahe rese niha amboyoya tecocuer pēu. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe pēu che Ru recocuer resendar. <sup>26</sup>Ahe ari pipe pe peporandura mbahe rese che rer pipe; che rumo, ‘Ayerokuirā pe rese che Ru upe’ ndahei pēu. <sup>27</sup>Esepia, che Ru ae ité pe raisu. Pe raisu ité niha. Esepia, pe che raisu peye, che roroya avei che Ru Tūpa sui che yuse peye. <sup>28</sup>Asē che Ru sui co ivi pipe vitu; cūrítei rumo aseyara co ivi, ayevíra che Ru upe” ehi oreu.

<sup>29</sup>Evocoiyase ore aipo orohe chupe:

—Indó, aipo rupi ereñehe tupri catu ité; nderemboyoya iri ambuae mbahe rese imombehu oreu. <sup>30</sup>Supi eté ereicua opacatu mbahe, ereicua avei ore porandusa. Evocoiyase ndiya iri ore porandu āgua mbahe rese ndeu. Sese oroviroya Tūpa sui nde yusa —orohe chupe.

<sup>31</sup>—¿Evocoiyase che roroya ité peye? —ehi—. <sup>32</sup>Supi eté oyepota ari cute, co pipe ité peyemosaipara che sui; che reyara che aemi peye. Ndahei rumo che ae aico. Esepia, che Ru secoi che rese. <sup>33</sup>Amombehu co opacatu pēu che rese mbahe tupri pipe pe reco āgua. Peparaisu itera co ivi pipe; peyemonguerēhi catura rumo. Esepia, che

opa ité asecopi co ivi pipendar mbahe tēi —ehi.

### Jesús oyerokui güemimbohe rese

**17** Aipo ohe pare, Jesús omahe iva rese aipo ehi: “Che Ru, oyepota ari cute. Che mboetei eve, ipipe sui avei che nde Rahir toromboetei. <sup>2</sup>Supi eté niha, nde erembou che mborerecua āgua opacatu ava ivi pipendar harive iyavei tecovesa apirēhi mondo āgua opacatu ava nde cheu erembou vahe upe. <sup>3</sup>Co niha tecovesa apirēhi, tande cua nde Tūpa ñepeí supi eté vahe nde recose yuvireco, tache cua avei nde che mbose yuvireco.

<sup>4</sup>“Che niha oromboetei co ivi pipe, iyavei ayapo nde che cuaisa. <sup>5</sup>Sese che Ru, embou irimi cūrítei che reco porañete āgua, inungar acoi yipindar arco vahe nde rese ivi apoēhiseva.

<sup>6</sup>“Co nde rembiporavo ava co ivi pipendar pāhu sui erembou vahe cheu; orocua ucapa chupe. Yipindar ndeundar yuvirecoi. Ipare nde erembou cheu. Ahe viroya ité nde ñehe yuvireco. <sup>7</sup>Cūrítei oicuapa opacatu mbahe nde suindar cheu erembou vahe yuvireco. <sup>8</sup>Esepia, amombehu ité nde ñehe erembou vahe cheu; ahe viroya ité yuvireco, viroya avei nde che mbousa yuvireco.

<sup>9</sup>“Che ayeroqui cheu nde remimbou rese ndeu. Esepia, ndeundar ité yuvirecoi; ndayeroquii rumo ambuae ava che roroyasarēhi rese. <sup>10</sup>Opacatu ava cheundar, ndeundar avei; ndeundar evocoiyase cheundar. Ahe sese che reco porañetesā oyecua.

<sup>11</sup>“Che ndapitai chira co ivi pipe; ahe rumo opitara cohava yuvireco. Che evocoiyase asora nde piri. Che Ru, seco maranehi vahe, esāro nde pīratasa pipe nde remimbou cheu oyese yuvirecoi tupri āgua inungar yande yaico. <sup>12</sup>Aicose co ivi pipe, asāro tupri nde rer pīratasa cheu erembou vahe pipe;

chemahemoha yuvireco sese mbahe tēi sui. Ndi poi eté que ñepei ocañi tēi vahe; acoi yipive ocañi vaneño ité rumo ocañi tēi; nde ñehe rupi tupri ité ěgüe ehi.

<sup>13</sup>“Cūrítei asora nde recosave. Co ivi pipe che reco vitese rumo, amombehu co mbahe chupe ‘tovireco che viharetesa yuvireco’ che yapave. <sup>14</sup>Che niha amombehu nde ñehe yuvireco chupe. Ava che reroyasarehi rumo oyamotarēhiño yuvireco. Esepia niha, ndahe iri Carugar povri pendar yuvirecoi inungar che ndahei ipovri pendar aico. <sup>15</sup>‘Enose ava Carugar povri pendar pāhu sui’ ndahei ndeu, che rumo aipota eresepera Carugar sui. <sup>16</sup>Inungar che ndahei Carugar povri pendar aico, ěgüe ehi avei ahe yuvireco. <sup>17</sup>Eipeha tupri angaipa sui ndeyeupe nara yuvireco ñehesa supi eté vahe reroyase. Nde ñehesa niha supi tupri vahe ité. <sup>18</sup>Inungar nde che mbou eve ava co ivi pipendar pāhuve, ěgüe ahe avei che imondo ava pāhuve yuvireco. <sup>19</sup>Amondo ité che recocuer ndeu nara ‘toyemondo catu yuvireco chupe co ñehesa supi tupri vahe reroya pipe’ viya.

<sup>20</sup>“Ndayeroqui co che remimbohe reseño ndeu, ayeroqui avei rumo ambuae ava che reroyasar ñehesa sui che reroya vahe rē. <sup>21</sup>Aporandu avei ndeu toyuvirecoi tupri ité yuvireco oyese inungar ñepei vahe, ěgüe tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipipe sui ava co ivi pipendar toviroya nde che mbousa yuvireco. <sup>22</sup>Che reco porañetesa nde erembou vahe cheu, ahe tupri avei amondo yuvireco chupe ñepei vahe nungar yuvirecoi āgua, inungar yande ñepei vahe yaico. <sup>23</sup>Che aico yuvireco sese, nde evocoyase ereico che rese ahe yuvirecoi tupri āgua inungar ñepei vahe. Ipipe

sui ava co ivi pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

<sup>24</sup>“Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepia vahe rē teco porañetesa cheu erembou vahe yuvireco. Nde niha yipive ité che raisu eve ivi apoēhiseve. <sup>25</sup>Che Ru, seco catupri vahe, ava co ivi pipendar tēi nande cuai yuvireco; che rumo orocua ité, co avei oicua nde che mbousa yuvireco. <sup>26</sup>Orocua uca chupe, orocua ucaño vite itera rumo. Evocoyase nde che raisusa toviroya avei yuvireco, che avei taico yuvireco sese” ehi Jesús oyeroqui güemimbohe recocuer rese.

### Jesús oipisi yuvireco

**18** Aipo ohe pare, Jesús ore renose ore reraso iembi Cedrón rovai. Aheve oime mbahe miti rēta, ipipe Jesús ore reroi que ore reraso. <sup>2</sup>Iyavei Judas omondo vahe rē yamotarēhimbar upe oicua avei aheve secosa. Esepia, setá rupi Jesús rese oroñemonuha aheve yepi. <sup>3</sup>Sese Judas oyepotaño ité aheve sundao rehii reseve iyavei sundao tūparo rārosar pahi rerecuar iyavei fariseo eta remimondo opacatu oyoepisa reseve yuvirecoi, guataendi reseve-seve avei yuviraso. <sup>4</sup>Yipive ité rumo oicua oyeupe mbahe oime vahe rē. Sese osē voi eté yuvireco chupe oporandu:

—¿Ava vo peseca? —ehi.

<sup>5</sup>Ahe ava rehii omboyevi yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehii upe.

Judas ipāhuve secoi imondo āgua yamotarēhimbar upe. <sup>6</sup>“Che niha ahe aico” ehise ava upe; guaquicuei coti

pāve opa oviapi yuvireco. <sup>7</sup> Evocoyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

<sup>8</sup> Aipo ihese,

—“Che niha ahe aico” ahe pëu —ehi—

. Che che recase peye, pepocoi rene catu co ambuae rese, toyuvirasopano —ehi.

<sup>9</sup> Co rumo ñehe mboaviye água êgüe ehi: “Acoi che Ru ombou vahe cheu, no-cañi eté que ñepei che sui” ehi. <sup>10</sup> Evocoyase Simón Pedro vireco vahe quise, vinose, oyasia Malco serer vahe nambi yasu cotindar, ahe pahi rerecuar ivate catu vahe rembiguai. <sup>11</sup> Pedro upe rumo aipo ehi:

—Emondo iri quise siru pipe —ehi—. Che Ru niha co mbahe yavai vahe ombou cheu. Añemosano itera chupe —ehi.

### **Jesús serasosa mborecuar Anás rovai**

<sup>12</sup> Evocoyase sundao rerecuar, osundao eta reseve iyavei judío tūparo rārosar oipisi Jesús yuvireco, oipocua. <sup>13</sup> Yipindar víraso Anás rētake yuvireco. Esepia, ahe Caifás rovayar. Ahe araviter pipe aipo Caifás pahi eta rerecuar ivate catu vahe seci. <sup>14</sup> Caifás ité aipo ehi omboetasa upe: “Yandeu aviye catu itera que ñepei mbia omanose yande rese” ehi.

### **Pedro, “Ndaicuai co mbia” ehi Jesús upe**

<sup>15</sup> Ore Pedro rese orosño ité Jesús raquicuei. Che rumo pahi eta rerecuar rēta pipendar opa ité che cua yuvireco. Sese aikuño ité Jesús raquicuei mborecuar rētake vicho. <sup>16</sup> Pedro rumo opitaño oquendipive ocarve. Che rumo pahi eta rerecuar che cua ité yuvireco. Evocoyase asē, aporandu oquendipi rārosar

uve Pedro reique água rese. <sup>17</sup> Evocoyase oquendipi rārosar oporandu Pedro upe:

—¿Ndahei vo nde avei co ava rupindar? —ehi chupe.

—Aní, ndahei che ahe —ehi oquendipi rārosar upe.

<sup>18</sup> Sōhisá iteanga ahe pītu pipe. Evocoyase mborecuar rembiguai iyavei sundao eta oyatapi yuvireco oyepehe água. Pedro avei aheve ipāhuve oyepehe tata ipive ohā.

### **Pahi eta rerecuar ivate catu vahe oporandu Jesús upe secocuer rese**

<sup>19</sup> Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe. <sup>20</sup> Jesús rumo aipo ehi chupe:

—Che niha añehe opacatu rupi, opacatu ava eta rovaque avei. Esepia, aporomboheño ité niha ava ñemonuhasa rupi, tūparo guasu pipe avei. Indó, che nañemi eté añehe vahe. <sup>21</sup> ¿Mahera vo evocoyase cheu tēi ereporandu? Eporandu catu che ñehe rendusar upe. Ahe tomombehu che oyeupe ñehesa yuvireco ndeu. Ahe niha oicua che ñehe agüer yuvireco —ehi.

<sup>22</sup> Aipo ihese, ñepei mbia sundao osovapete aipo ehi chupe:

—¿Aipo ere rutei pahi rerecuar ivate catu vahe upe imboyevi? —ehi chupe.

<sup>23</sup> Evocoyase omboyevi ahe mbia upe: —Añehese mbahe tēi rese, emombehu che ñehe raisa; che rumo añehe tupri ité, ¿mahera vo evocoyase che rovapete eve? —ehi.

<sup>24</sup> Evocoyase Anás omondo pahi eta rerecuar ivate catu vahe Caifás upe ipocua reseve.

**Pedro, “Ndaicuai co mbia” ehi vite Jesús upe**

<sup>25</sup> Ahese Pedro oyepheño vite ohã tata ipive. Aheve aipo ehi yuvireco chupe:

—¿Ndahei vo nde ité evocoi ava rupindar ereico? —ehi.

Pedro rumo,

—Aní, ndahei che ahe aico —ehiño.

<sup>26</sup> Ipare mbia pahi rerecuar ivate catu vahe rembiguai, inambi asiapri mu aipo ehi chupe:

—¡Aviye acoi nde ité oroepia vahe mbahe miti rêta pipe supi! —ehi chupe.

<sup>27</sup> Pedro rumo, “Aní, ndahei eté che” ehi iriño. Aipo iheseve, tacura oñehe.

**Jesús serasosa Pilato rovai**

<sup>28</sup> Evocoyase viraso Jesús Caifás rêta sui Roma pendar mborecuar guasu recosave yuvireco. Cõhe potase ãgüe ehi. Judío rumo ndoyuviroiquei eté mborecuar recosave oyemboangaipaëhi ãgua. Esepia, ahe icuaita yuviroique, ndiyai chietera Pascua resendar ovesa roho hu ãgua yuvireco chupe viña. <sup>29</sup> Sese Pilato osê ava upe aipo ehi:

—¿Mbahe vo sembiapo naporai vahe? —ehi.

<sup>30</sup> Ahe omboyevi yuvireco chupe:

—Seco catuprise, ndorogüerui chietera ndeu viña —ehi yuvireco chupe.

<sup>31</sup> Evocoyase aipo ehi ava upe:

—Peraso, pe ae peyapo mbahe pëundar ité porocuita rupi sese —ehi.

Judío rerecuar evocoyase omboyevi yuvireco:

—Ore judío oroico vahe upe rumo ndipotasai oroyuca vaheã que ava —ehi.

<sup>32</sup> ãgüe ehi Jesús ñehe imano ãgua resendar yaviye. <sup>33</sup> Ahese Pilato oi que iri oi pipe, güeru uca Jesús oyeupe oporandu chupe:

—¿Nde ité vo judío rerecuar ivate catu vahe ereico? —ehi.

<sup>34</sup> —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.

<sup>35</sup> —¿Che ndahei eté judío aico! Nde recua pendar ae niha pahi eta rerecuar nde reru yuvireco cheu. ¿Mbahe vo evocoyase ereyapo? —ehi Pilato chupe.

<sup>36</sup> —Che mborecua rumo ndahei co ivi pipendar. Co ivi pipendarse viña, che rupindareta ovavara che amotarëhimbar upe che repisave yuvireco viña. Che mborecua rumo ndahei eté coha pendar —ehi.

<sup>37</sup> Ahese Pilato aipo ehi chupe:

—Evocoyase nde mborecuar guasu ité ereico —ehi.

—Nde niha aipo, “Mborecuar guasu ereico” ere cheu. Aherã niha che aha co ivi pipe mbahe supi eté vahe mombehu ãgua. Opacatu ava viroya vahe mbahe supi eté vahe, osenduño ité che ñehesa yuvireco —ehi Pilato upe.

<sup>38</sup> Pilato rumo,

—¿Mbahe vo aipo supi eté vahe? —ehi chupe.

**“¡Tayaticasa!” ehi ava eta Jesús uve yuvireco**

Aipo ohe pare, Pilato osê iri judío eta upe oñehe aipo ehi:

—Che ndayosui eté co mbia rese mbahe sembiavi. <sup>39</sup> Pe rumo peicua amose ñepeï ava soquendapri Pascua pieta pipe yepi; ¿peipota amose vaheã judío rerecuar? —ehi.

<sup>40</sup> Aipo ihese, opacatu osapucui pĩratá yuvireco aipo ehi:

—¡Evocoi aní! ¡Barrabás catu emose! —ehiño yuvireco.

Barrabás rumo imonda rai vahe secui.

**19** Evocoyase Pilato oporocuai Jesús nupa ãgua. <sup>2</sup> Sundao eta omonde ñaca rese yu piapri iyavei

omboyemonde turucuar pīraumbi vahe pipe yuvireco. <sup>3</sup>Ipare oyemboya sese aipo ehi:

—¡Imboeteipri judío Rerecuar tasecoi! —ehi angahu sovapete-pete yuvireco.

<sup>4</sup>Pilato evocoyase osē iri ava upe aipo ehi:

—Pesepia, anose pēu pe icua āgua che ndayosui eté mbahe sembiavi —ehi.

<sup>5</sup>Evocoyase vinose yu piapri oāca rese turucuar pīraumbi vahe reseve senoha ava upe. Ahe se Pilato aipo ehi:

—¡Ndo co aipo mbia cute! —ehi.

<sup>6</sup>Osepiase pahi eta rerecuar, sundao rerecuar avei, omboipi osapucaí:

—¡Tayaticasa! ¡Tayaticasa! —ehi pāve voi yuvireco chupe.

Pilato evocoyase aipo ehi ava upe:

—Peraso, peyatica pe ae. Esepia, che ndayosui eté mbahe sembiavi —ehi.

<sup>7</sup>Judío rerecuar rumo omboyevi yuvireco:

—Ore rumo orovireco mborocuaita. Ipipe omanoño itera. Esepia, oyeapo tēi Tūpa Rahir —ehi yuvireco.

<sup>8</sup>Aipo ñehesa renduse, Pilato oyembosiquiyé catu. <sup>9</sup>Viroique iri oi pipe seraso. Aheve oporandu chupe:

—¿Que pendar ité vo nde ereico? —ehi.

Ahe rumo nomboyevi iri eté ñehe chupe. <sup>10</sup>Evocoyase Pilato aipo ehi chupe:

—¡Mahera ndereñehi eté cheu! ¿Ndereicuai vo che mborerecuar aico nde atica uca āgua, mbahe tēi sui nde renose āgua avei? —ehi Pilato chupe.

<sup>11</sup>—¡Aní! Ndererecoi chietera nde mborerecuasa che harive Tūpa nombouise ndeu viña. Sese niha ava che mondosar ndeu oyemboangaipa catu nde sui yuvireco —ehi Pilato upe.

<sup>12</sup>Ahe ramoseve, Pilato osāha iri tēi Jesús renose āgua; judío rerecuar rumo osapucaí voño yuvireco chupe:

—¡Acoi eremose co mbia, ndahei chietera nde mborerecuar ivate catu vahe mboripar ereico! ¡Opacatu oyemomborerecu tēi vahe, ahe evocoyase mborerecuar ivate catu vahe amotarēhimbar tēi yuvirecoi! —ehiño yuvireco chupe.

<sup>13</sup>Evocoyase Pilato osenduse aipo ihesa, vinose uca Jesús ocarve, uguapi mborerecuar guasu renda harive. Ahe mbahe rese porandusa rer hebreo ñehe pipe Gabata ‘ita apopri’ oya. <sup>14</sup>Mbiter ari Pascua pieta āgua Pilato aipo ehi judío eta upe:

—¡Ndo co pe rerecuar cute! —ehi.

<sup>15</sup>Ahe rumo osapucaí pīratá aipo ehi yuvireco:

—¡Tomano! ¡Tomano ité! ¡Tayaticasa! —ehi yuvireco chupe.

Pilato rumo aipo ehi chupe:

—¿Evocoyase ayatica ucara pe rerecuar? —ehi.

Pahi eta rerecuar rumo omboyevi yuvireco chupe:

—¡Ore ndorovireco iri ambuae mborerecuar, Roma pendar mborerecuar ivate catu vahe güeraño ité orovireco! —ehi yuvireco.

<sup>16</sup>Ipare Pilato omondo sundao upe yatica uca āgua. Ichui viraso yuvireco.

### Jesús yaticasa curusu rese

<sup>17</sup>Evocoyase Jesús vinose curusu seraso “Ava Ācagüer” serer vahesave (ahe serer hebreo ñehe pipe Gólgota).

<sup>18</sup>Aheve oyatica yuvireco. Seseve avei oyatica ñuvirío ava yuvireco, ñepeipei yique ivii. <sup>19</sup>Pilato oicuachía uca omondo curusu rese aipo ehi vahe: “Co Jesús, Nazaret pendar, judío Rerecuar guasu” ehi. <sup>20</sup>Setá iteanga ava oyeroqui co icuachiapri rese yuvireco. Esepia, icuachiasa hebreo, latín iyavei griego ñehe pipe. Iyavei yaticasa namombriimi eté tecua sui. <sup>21</sup>Sese pahi eta rerecuar aipo ehi Pilato upe yuvireco:



—Aní, ‘Judío Rerecuar guasu’ ere icuachía; iyacatu rumo, ‘Oyeapo pota tēi vahe judío Rerecuar guasu’ erera icuachía imoi —ehi yuvireco chupe.

<sup>22</sup> Pilato rumo omboyevi:

—Co aicuachía vahe, ēgüe ehiño itera oī —ehi.

<sup>23</sup> Jesús atica pare evocoi irungatu sundao, omonuha iturucuar oyeupe imboyaho āgua yuvireco. Oipisi avei iturucuar ivri pendar nimbovivilai vahe, ñepeí reseve pucuño tēi vahe. <sup>24</sup> Sundao eta aipo ehi oyeupe yuvireco:

—Yamondoro eme; aviye catu yandeguayño sese, ¿ava ité pīha oipisira? —ehi yuvireco.

Ēgüe ehi icuachiapirer imboaviye yuvireco aipo ehi vahe: “Omboyaho-yaho ava che turucuar iyavei iguayi yuvireco sese” ehi vahe. Supi tupri ité ēgüe ehi sundao yuvireco.

<sup>25</sup> Curusu ivipive yuvirecoi ichi, ichi cupihir, María Cleofas rembireco, María Magdalena avei. <sup>26</sup> Osepiase osi iyavei che repiase yípive, che güembiaisu, aipo ehi osi upe:

—Che si, evocoi nde membirā ererectora —ehi chupe.

<sup>27</sup> Ipare voi aipo ehi cheu:

—Evocoi nde si —ehi.

Ichuive tupri amoingue ichi che rētave asāro vaheṛā.

### Jesús mano agüer

<sup>28</sup> Ipare Jesús oicua ité Vu remimbotar yaviyepa iyavei icuachiapirer mboaviye āgua aipo ehi:

—Che husei —ehi.

<sup>29</sup> Aheve oime mbahe riru. Ipipe savapipo vinagre oī. Co vinagre pipe omoaqui mbahe saviyu vahe yuvireco omondo ivira rese, osupi, imondo iyuruve yuvireco. <sup>30</sup> Osupite pare aipo ehi:

—Opa yaviye cute —ehi.

Ipare voi ñaca iviso omano.

### Sundao oñaruca cutu lanza pipe Jesús

<sup>31</sup> Ñepeí ari Pascua pieta uve ipane vahe pipe aipo ēgüe ehi. Sese judío ndoipotai ava retecuer pita curusu rese mbituhusa ari pipe. Esepia, ahe mbituhusa ari imboeteipri guasu ité. Sese Pilato upe oporandu yuvireco ahe oyocuai vaheṛā sundao curusu rese yaticapri rētima mope āgua ‘tomano’ oyapave curusu sui setecuer reroyipa āgua yuvireco. <sup>32</sup> Evocoyase sundao yuvirasopa ñuvirío mbia Jesús rese yaticasa vahe yuvireco. Ahe sētima rane opa omope yuvireco. <sup>33</sup> Oyemboyase rumo Jesús rese, “Omano ité” ehiño yuvireco chupe. Sese nomopei sētima yuvireco.

<sup>34</sup> Ñepeí sundao rumo oicutu yiqueve lanza pipe. Ahe ramoseve voi osē suvi, i reseve. <sup>35</sup> Che asepia vahe ité; supi eté aipo ahe. Evocoyase amombehu pēu pe seroya āgua. <sup>36</sup> Esepia, co mbahe ēgüe ehi icuachiapirer mboaviye āgua aipo ehi vahe: “Ndimopesai chietera que ñepeí icangüer” ehi vahe aracahe. <sup>37</sup> Iyavei ambuae icuachiapri aipo ehi: “Osepiara ava eta icutupri yuvireco” ehi.

### Jesús yapocatusa ita hopri pipe

<sup>38</sup> Ipare José, tecua Arimatea pendar, oporandu Pilato upe Jesús rehögüer reraso āgua rese. José aipo Jesús rupindar. Ndoyecua ucai rumo omboetasa judío eta upe pahí rerecuar sui osiquiyepave. Pilato evocoyase, “Aviye, eraso” ehi chupe. Evocoyase José oso viraso sehögüer. <sup>39</sup> Nicodemo avei oipitivii, acoi oso vahe Jesús upe pītuse. Ahe güeru mbahe sīacua vahe mirra, áloe rese oyeseha vahe, treinta kilo, sehögüer rese nara. <sup>40</sup> Ēgüe ehi José, Nicodemo reseve viraso sehögüer yuvireco iyavei oimama tupri turucuar secose vahe imoiacuapri pipe yuvireco. Ēgüe ehi judío oyapo ava omano vahe tī āgua yuvireco yepi. <sup>41</sup> Namombrii Jesús

aticasa sui oime mbia remiti rêta. Aheve ité oime tuvipa ita hopri, ipiasu vahe iporupirêhi. <sup>42</sup> Ipipe omoingue Jesús rehögüer yuvireco. Esepia, ahe tuvipa cõimi eté ichui iyavei virovi ité judío pithusa ari.

### Jesús cuerayevisa

**20** Domingu pipe María Magdalena oso tuvipave pîtu vitemiseve. Ahe osepia ita tuvipa rovapisa ndahe irise güendave ihã. <sup>2</sup> Evocoyase ahe cuña oña oso Simón Pedro upe, cheu avei aipo ehi:

—¡Viraso tuvipa sui yande Yar yuvireco! ¡Ndoroicuai que vo catu omondo yuvireco! —ehi.

<sup>3</sup> Evocoyase Pedro rese oroña oroso tuvipave. <sup>4</sup> Che rumo aña catu Pedro sui. Che rane evocoyase ayepota tuvipave. <sup>5</sup> Aiviro tõi, turucuar güeraño rumo asepia aheve. Ndaiquei rumo ipipe. <sup>6</sup> Ipare Pedro oyepota che raquicuei, oique voi tuvipa pipe. Ahe avei osepia turucuar imama agüer tõi. <sup>7</sup> Iyavei osepia turucuar ñaca mamasa. Ndahe eté setecuer mamasa rese tui; ahe rumo co coti ité ipoquesa tupri ou. <sup>8</sup> Evocoyase che avei aique; asepia êgüe ehi vahe. Ahese aroya voi eté. <sup>9</sup> Ore rumo ndorosenducua vitei eté icuachiapri: “Ocuerayevira omano vahe pãhu sui” ehi vahe. <sup>10</sup> Ipare oroyevipa oroso ore rêtave.

### Jesús oyemboyecua María Magdalena upe

<sup>11</sup> María rumo, ore raquicuei ou vahe, opitaño ité tuvipa ipive, oyaseho. Oyasehoseve oiviro iri tuvipa pipe, <sup>12</sup> ahese osepia ñuvirío Tüpa rembiguai iturucuar morochí vahe oguapi yuvinoi sehögüer rupagüerve. Ñepeí oguapi oĩ ñaca rupagüer coti, ambuae ipi rupagüer coti. <sup>13</sup> Ahe Tüpa rembiguai oporandu yuvireco chupe:

—Cuña, ¿mahera vo ereyaseho? —ehi. Ahe aipo ehi:

—Esepia, che Yar rehögüer viraso yuvireco iyavei ndaicuai que vo catu omondo yuvireco —ehi.

<sup>14</sup> Aipo oheseve, oyemboyere, osepia Jesús aheve secoise; “Jesús co secoi” ndehi eté rumo chupe. <sup>15</sup> Evocoyase oporandu María upe:

—Cuña, ¿mahera vo ereyaseho? ¿Ava vo eresecha? —ehi chupe.

Ahe omoha ‘co mbahe miti rêta rãrosar revo’ oya viña, aipo ehi chupe:

—Nde ererasose sehögüer, emombehuñomi tõi cheu que vo eremondo. Aheve taso seca —ehi chupe.

<sup>16</sup> Evocoyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pipe chupe:

—¡Rabuni! —ehi (‘Porombohesar’ ohesave).

<sup>17</sup> Evocoyase María upe,

—Erepocoi rene che rese. Esepia, ndayeupi vitei che Ru recosave. Esoño, emombehu che reroyasar upe: “Jesús oyeupira Vu Tüpa recosave” erera chupe. Che Ru, pe Ru avei; che Tüpa, pe Tüpa avei —ehi.

<sup>18</sup> Evocoyase María Magdalena ou imombehu: “Asepia yande Yar” ehi iyavei opa omombehu mbahe semimombehu oreu.

### Jesús oyemboyecua güemimbohe upe

<sup>19</sup> Ahe ari pipeve, domingu pipe, pîtuse, ore ore ñemonhasave oroyequenda tupri judío rerecuareta sui ore siquiyepave. Ahese Jesús oique ore pãhuve. Ore mboavirave.

—¡Peico tupri! —ehi oreu.

<sup>20</sup> Aipo ohe pare, omboyecua opo, oique avei oreu. Ahese orerorivete yande Yar repiase oroico. <sup>21</sup> Ipare aipo ehi iri:

—¡Peico tupri! Inungar che Ru che mbou, ěgüe ahe aveira co che pëu —ehi oreu.

<sup>22</sup> Ichui ore peyu:

—Peipisi Espíritu Santo —ehi—.

<sup>23</sup> Peñeroise que ava upe, ahese ahe oipisira ñeroisa; napeñeroise rumo que ava upe, ahe evocoyase ndoipisii chira ñeroisa —ehi oreu.

### Tomás osepia yande Yar icuerayevise

<sup>24</sup> Ñepeí ore mboetasa rumo Tomás icõi vahe, ndipoi eté ore pãhuve Jesús oyemboyecua oreu. <sup>25</sup> Ipare ore aipo orohe chupe:

—Orosepia yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuã quiravo cuarer pipe iyavei amoinguese che po yique cutu agüerve, ahese ramo aroyara —ehiño oreu.

<sup>26</sup> Ocho ari pare, ore oroñemonuha iri oi pipe oroico. Aheve ramo Tomás secoi ore pãhuve. Yepe oroyeoquenda tupri ité viña, Jesús rumo oi queño ité ou ore pãhuve, ore mboavirave aipo ehi:

—¡Peico tupri! —ehi oreu.

<sup>27</sup> Ipare aipo ehi Tomás upe:

—Esepia che po, emoingue nde cuã quiravo cuarerve; embou ave nde po, emoingue avei che ique cutu agüerve. “Tachequerëhi eme seroya ãgua” nderei chira cheu; ¡che reroya eve! —ehi.

<sup>28</sup> Evocoyase Tomás aipo ehi:

—¡Che Yar Tüpa! —ehi chupe.

<sup>29</sup> Ahese aipo ehi Tomás upe:

—¿Cüritei che reroya che repiase eve cute? ¡Aviye catu ava che repiaëhi pipe che reroya vahe! —ehi chupe.

### Co icuachiapri Jesús reroya ãgua

<sup>30</sup> Jesús oyapo setá ambuae poromondiisa ore rovaque. Ahe rumo ndaicuachiai co cuachiar pipe. <sup>31</sup> Co rumo aicuachía ‘toviroya Jesús,

Poropĩsĩrosar, Tüpa Rahir secosa; ipipe tovireco tecovesa yuvireco’ che yapave.

### Jesús oyemboyecua siete güemimbohe upe

**21** Ore sore ivi Galilea ve, Jesús oyemboyecua iri oreu ipa Tiberia ve. <sup>2</sup> Ahese oyeseve Simón Pedro yuvirecoi, Tomás ahe acoi icõi vahe, Natanael, ahe aipo tecua Caná pendar ivi Galilea rese, ñuvirío ore Zebedeo rahir oroico vahe iyavei ambuae ñuvirío Jesús remimbohe. <sup>3</sup> Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, orohe carite pipe. Ahe pĩtu pipe rumo ndorombohai eté pira. <sup>4</sup> Cõhe potase rumo, Jesús oyemboyecua imbehĩ ivi. Ore rumo ndoroicuai eté Jesús secose. <sup>5</sup> Evocoyase aipo ehi oreu:

—Mbia chĩhivahe, ¿ndapembohaimi eté pira? —ehi.

—Aní eté —orohe chupe.

<sup>6</sup> Evocoyase aipo ehi:

—Pemondo pira mbohasa ive pe asu coti. Ahese pembohara —ehi.

Ěgüe orohe, ipare voi, “¡Too!” orohe, ndorovinose catui eté ipi sui pira mbohasa oroico. Esepia, savapipo tupri ité pira ipipe. <sup>7</sup> Evocoyase che, sembiaisu, aipo ahe Pedro upe:

—¡Yande Yar niha evocoi! —ahe.

Pedro che ñehe rendu ramoseve voi, omonde oturucuar. Esepia, yipindar nani secoi; opo ive oso chupe. <sup>8</sup> Ore evocoyase oroviroypota ité carite ndatipĩimiseve, oroichoho pira rehii imbohasa pipe seraso, cien metro tēi oroico imbehĩ sui. <sup>9</sup> Orovinosese ivi ãtasave, orosepia tãtapĩ harive pira, pan reseve.

<sup>10</sup> —Peru moviro evocoi pira penose ramo vahe —ehi oreu.

<sup>11</sup> Evocoyase Simón Pedro oha carite pipe, oichoho ndatipĩisave pira guasu

rehii imbohasa pipe, ciento cincuenta y tres tupri; yepe setá viña, imbohasa rumo ndosoroi eté. <sup>12</sup> Evocoiyase aipo ehi:

—Perio, tapecarumi rane —ehi oreu.

Ndipoi eté que ñepei ore pāhuve “¿ava vo nde ereico?” ehi vahe chupe. Esepia, oroicuano ité yande Yar secose. <sup>13</sup> Chupe ore sore, oipisi pan, ombou oreu, êgüe ehi avei pira imbou oreu.

<sup>14</sup> Co rese Jesús oyemboyecua mbosapí rupi oreu ocuerayevire.

### Jesús osecoãha Pedro

<sup>15</sup> Ore caru pare, Jesús oporandu Simón Pedro upe:

—Simón, Juan rahir, ¿che raisu catu ité eve co mbahe sui? —ehi.

—Taa, che Yar, ereicua niha che nde raisusa —ehi Pedro chupe.

—Ndehañeco tupri ru catu che reroya ramomi vahe rese yuvireco —ehi.

<sup>16</sup> Imoñuviriosa rupi oporandu iri chupe:

—Simón, Juan rahir, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro chupe.

—Evocoiyase esãro tupri che reroysasar yuvireco —ehi.

<sup>17</sup> Imombosapisa rupi oporandu iri chupe:

—Simón, Juan rahir, ¿che raisu vo eve? —ehi.

Aipo oyeupe hese, Pedro ndoyembovihal eté aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoiyase ndehañeco tupri catu che reroysasar rese —ehi—. <sup>18</sup> Supi eté

aipo ahe ndeu: nde chíhivahe catu vitesse, ereyemonde vite nde ae, ereguata vite avei nde remimbotar rupi; nde cuacua catuse rumo, ereyeviamoatara, ambuae evocoiyase nde mboyemondera, nde reraso aveira nde so potaêhisave —ehi.

<sup>19</sup> Jesús rumo omboyecua aipo ohe pipe mara ehira Pedro omano Tupa mboeteisave curi. Ipare,

—¡Erio che rupi! —ehi Pedro upe.

### Jesús remimbohe saisupri

<sup>20</sup> Che Jesús rembiaisu ité aico, che ité acoi carusa ipa vaheve yípive añ acoi aporandu chupe: “Che Yar, ¿ava vo nde mondora nde amotarêhimbar upe?” ahe acoi chupe. Aguatase Pedro raquicuei, oyemboyere che repia. <sup>21</sup> Ahese oporandu chupe:

—Che Yar, evocoi no, ¿mbahe oimera chupe? —ehi cheu.

<sup>22</sup> Evocoiyase omboyevi Pedro upe:

—Che aipotase secove vite água che yevise nara, ¿mara vo nde ererecora viña? Nde catu, eguataño che rupi —ehi.

<sup>23</sup> Sese ambuae Jesús reroysasar ipihañemoñeta tēi aipo che namanoi chivaherã ité yuvireco viña. Jesús rumo ndahei ‘nomanoi chietera’ ohesave aipo ehi cheu; ahe rumo, “Aipotase secove vite água che yevise nara, ¿mara vo nde ererecora viña?” ehi.

<sup>24</sup> Che ité amombehu co mbahe, che avei aicuachía iyavei yaicua supi tupri vahe ité che remimombehu.

<sup>25</sup> Oime avei ambuae mbahe setá Jesús rembiapo, que opacatú icuachiasase viña, ndiyai chietera revo ivi viña. Aipo rupive.

## APOSTOL REMBIAPO

### LOS HECHOS

#### Tüpa omboura Espíritu Santo viroyasar upe

**1** Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yípindar sembiapocuer amombehu ndeu iyavei yípisiu iporombohe agüer. <sup>2</sup>Ocueraevire, ivave oso renondeve, Jesús omombehu oporocuaíta Espíritu Santo pīratasa pipe güembiporavo apóstol upe sembiaporã. <sup>3</sup>Oyemboyecua güembiporavo upe omanore. Setá rupi omboyecua tupri ocueraevisa chupe. Semimbohe osepia yuvireco imanore cuarenta ari rupi. Ahese omombehu Tüpa mborerecuasa resendar güemimbohe upe.

<sup>4-5</sup>Oicove vītese yuvireco sese, aipo ehi chupe:

—Pesēi rene Jerusalén sui. Tomboaviye rane che Ru Tüpa güemimombehu, ahe acoi amombehu pēu. Juan niha pe āpiramo i pipe tēi; Tüpa rumo Espíritu Santo pipe pe āpiramora. Movīromi tēi ari ipane vite imondo āgua pēu —ehi güemimbohe upe.

#### Jesús oso ivave

<sup>6</sup>Oñemonuhase apóstol yuvireco sese, oporandu yuvireco chupe:

—Ore Yar, ¿erembou irira vo cūrītei Israel iguar upe pīratasa iyeyecuai āgua? —ehi semimbohe yuvireco chupe.

<sup>7</sup>Ahe rumo aipo ehi chupe:

—Ndiyai ahe ari cua āgua pēu. Esepia, Tüpa año ité vireco omborerecuasa ahe mbahe apo āgua. <sup>8</sup>Peipisira rumo Tüpa pīratasa oiquese Espíritu Santo pe piha pipe. Ahese pemombehu tupri che re-

cocuer Jerusalén pendar upe, Judea pendar, Samaria pendar iyavei opacatu co ivi pīpendar upe avei no —ehi chupe.

<sup>9</sup>Aipo ihe pare, omahe apóstol yuvireco sese, aheseve Tüpa viraso ivave. Ichui Jesús oi que iva quīha pāhuve. Evocoiyase ndosepia iri eté yuvireco cute. <sup>10</sup>Omahe vīteseve yuvinoha ivave ichosa rese, avieteramo tēi ñuvirío mbia, iturucuar morochí vahe, oyemboyecua apóstol ipive yuvinoha <sup>11</sup>aipo ehi yuvireco chupe:

—Galilea iguar, ¿mahera vo pemahe vite iva rese pehã? Evocoi Jesús, inungar Tüpa viraso ivave pe sui, ēgüe ehi aveira niha ogüeyi ou co ivi pipe coiye —ehi yuvireco chupe.

#### Jesús remimbohe oiporavo Matías, Judas recuñara yuvireco

<sup>12</sup>Evocoiyase apóstol oyevi yuviraso Jerusalén ve ivitri Olivo sui, ahe ihamombrīgüer ñepeí kilómetro tēi. Supivemi imombehusa judío guata āgua mbituhusa ari pipe yepi. <sup>13</sup>Yuviroiquese Jerusalén ve, oyeupipa oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahir, Simón ahe Zelote iyavei Judas, Santiago rahir yuvirecoi. <sup>14</sup>Co opacatu ari yacatu rupi oñemonuha oyoya guasu oyoerqui āgua yuvireco yepi Jesús rivri, ichi, ambuae cuña reseve avei.

<sup>15</sup>Evocoiyase ñepeí ari pipe oñemonuha guasu ciento veinte ava yuvireco. Ipāhuve Pedro opūha aipo ehi ava upe: <sup>16</sup>“Che mu eta Jesucristo reroyasar, iya ité co imboaviyesa Tüpa Ñehengagüer Judas recocuer resendar. Ahe imombepupri David upe Espíritu Santo pipe aracahe. Evocoi Judas viraso vahe Jesús amotarēhimbar ipisi uca āgua. <sup>17</sup>Ahe acoi secoi yande pāhuve co mboraviquisa rese yande pītivii āgua avei viña. <sup>18</sup>Evocoi güembiapo ai repri pipe

omboepi ivi. Ipare ñaca iviso oviapi oso ivive, oyetiapiipa. <sup>19</sup>Opacatu ava Jerusalén pendar oicua Judas recocuer yuvireco. Sese co ivi upe, ‘Acéldama’ ehi yuvireco oñehe pipe ‘Ivi Tuvi re-sendar’ oyapave. <sup>20</sup>Esepia, icuachiapri Salmo pipe aipo ehi:

‘Taseyasa sêta yuvireco.

Tipo iri eme ava ipipe’ ehi.

Iyavei ambuae aipo ehi:

‘Toime ambuae secoyar iporaviqui rägüer pisi ägua’ ehi vahe.

<sup>21</sup>“Evocoyase cohava oime ava yande Yar Jesús secoi vïtese yande pâhuve <sup>22</sup>ñapiramosa suive yuvirecoiño vahe ité yande rupi iyavei ivave ichosa ospia vahe avei yuvireco. Ahe tiporavosa ñepi ipâhu pendar yande rupi icuer-ayevi agüer mombehu ägua” ehi omboetasa upe.

<sup>23</sup>Evocoyase oiporavo ñuvirío mbia yuvireco: ahe José Barsabás, serosa Justo; ambuae rer Matías. <sup>24</sup>Ipare oyeroqui yuvireco aipo ehi: “Nde, ore Yar, opacatu ava piha ereicua. Emboyecua cohava nde rembiporavo oreu; ¿uma vo ereipota <sup>25</sup>eremondo vaherã icuaitarã apóstol seco ägua Judas recuñara? Ahe oangaipa pipe oyemocañi uca tēi vahe oico” ehi Tüpa upe yuvireco.

<sup>26</sup>Evocoyase osäha iporavo yuvireco. Matías ité vinose iporavopri sui yuvireco. Ichui tupri ité oique once apóstol pâhuve.

### Espíritu Santo güeyi agüer

**2** Oyepotase Pentecostés pieta, opacatu Jesús reroyasar oñemonuha oi guasu pipe yuvireco. <sup>2</sup>Aheve oi pipe aviyeteramo tēi ivitu ipirata vahe nungar siapu guasu ou iva sui. Ahe siapugüer oyendupa tupri oi pipe. <sup>3</sup>Ahese oyecua tata rendigüer nungar opacatu aheve yuvirecoi vahe harive. <sup>4</sup>Ahese avei Tüpa omoingue evocoi ava piha pipe oEspíritu Santo. Ichui ahe

Espíritu omoñehe uca ambuae ñehesa pipe yuvireco.

<sup>5</sup>Ahe ari pipe setá iteanga judío yuvirecoi Jerusalén ve omboaviye vahe ocuaita Tüpa mboeteisa, ahe oñemonuha vahe opacatu ivi rupindar yuvireco. <sup>6</sup>Mbahe siapu guasu vahe renduse, oñemonuha atí tēi yuvireco oyese. Ndoyemboaracuai tēi yuvireco ambuae ava oñehe pipe ñehese. <sup>7</sup>“¡Too!” ehi tēi oyepihamondiisa pipe yuvireco. Sese aipo ehi oyeupe:

—¿Ndaheí vo acoi co ava Galilea iguar oñehe vahe yuvireco? <sup>8</sup>¿Mahera piha co ñepi-peí oñehe yande ñehe pipe yuvireco? —ehi tēi oyeupe yuvireco—. <sup>9</sup>Esepia, cohava yuvirecoi vahe: Partias pendar, Media pendar, Elam pendar, Mesopotamia pendar, Judea pendar, Capadocia pendar, Ponto pendar, Asia pendar, <sup>10</sup>Frigia pendar, Panfilia pendar, Egipto pendar, Libia cotindar, ahe Cirene cõquivotindar. Iyavei Roma pendar, <sup>11</sup>judío yuvirecoi vahe, ambuae judío aracuasa reroyasar avei, Creta pendar, Arabia pendar. ¡Yande yasendu opacatu yandeu iñehe yuvireco yande ñehe pipe Tüpa rembiapo icatupri vahe! —ehi.

<sup>12</sup>Opacatu oyepihamondii, ndoicuai opihañemoñeta ägua yuvireco.

—¿Mara ehi piha co na oya yuvireco? —ehi-ehi tēi yuvireco oyeupe.

<sup>13</sup>Ambuae ava rumo seroïrosa pipe aipo ehiño yuvireco:

—¡Osavaipo mo evocoi yuvireco! —ehi.

### Pedro oñehe ava upe

<sup>14</sup>Evocoyase Pedro opüha opacatu once vahe apóstol pâhuve, oñehe pïrata aipo ehi: “Che mu judío eta, opacatu Jerusalén pendar avei, peicua co mbahe amombehu vaherã pëu; peyapisaca tupri che ñehe rese: <sup>15</sup>ndosavaipoi moco co mbia yuvireco. ¿Ndapesepiai vo añi-

hivei vite cūrítei? <sup>16</sup>Co niha Tūpa ñehe mombehusar Joel oicuachía vahe aracahe:

<sup>17</sup>“Tūpa aipo ehi:

Coiye, ari cañi renonde, amondora che Espíritu Santo opacatu ava upe.

Ipīratasa pipe pe rahir, pe rayri oñehera yuvireco.

Mbia chíhivahe osepiara oquer pendar nungar mbahe yuvireco.

Oime aveira queraisa supi eté vahe cuacua vahe upe.

<sup>18</sup>Supi eté ahe ari pipe amondora che Espíritu che rembiguai cuimbahe upe, che rembiguai cuña upe avei.

Ipare oñehera yuvireco che rese ipīratasa pipe.

<sup>19</sup>Amboyecuara poromondiisa iva rese. Ēgüe ahe aveira poromondiisa mboyecua ivi pipe:

tuvi, tata iyavei tātachi.

<sup>20</sup>Yande Yar ari tuvichá vahe imboeteipri renonde ohara pītu, yasi oyeapora tuvi nungar.

<sup>21</sup>Opacatu ava, che Yar che pītívii eve, ehi vahe, ahe oñepisírorra yuvireco’ ehi Joel icuachía aracahe.

<sup>22</sup>“Pe Israel suindar, pesendu che ñehe: Jesús, Nazaret pendar, oyapo poromondiisa tuvichá vahe, mbahe yavai vahe Tūpa pīratasa pipe pe pāhuve güeco maranehi mboyecua āgua. Ahe niha peicua opacatu. <sup>23</sup>Ipare rumo evocoi Jesús imondosa pēu yuca āgua. Ahe rumo Tūpa remimbotar rupi. Esepia, yipive ité Tūpa oicua pe peipisira yuca uca āgua curusu rese ava naporai vahe upe. <sup>24</sup>Tūpa rumo ombogüerayevi manosa sui. Esepia, manosa ndoicatui sereco āgua. <sup>25</sup>Supi eté mborerecuar guasu David oñehe Jesús recocuer rese aracahe aipo ehi:

‘Che aicua che Yar che rese secoi che acato coti mbahe tēi pipe che viapiēhi āgua yepi.

<sup>26</sup>Sese avihaño ité vichico, asapucaí avei che rorivetesá pipe.

Iyavei che yeroya tuprisave asārora mbahe aviye vahe che recove iri āgua.

<sup>27</sup>Esepia, nde ndereseyai chira che hā omano vahe pāhuve, nderemonduyu ucai chiveira nde rembiguai seco maranehi vahe retecuer.

<sup>28</sup>Co tecovesá ereicua uca cheu.

Che mbovihara eve nde rese che recose’ ehi David aracahe.

<sup>29</sup>“Che mu eta, supi eté yande ramoi David omano, ñotisa ita hopri pipe aracahe. Ahe suvipa ouve vite cohava yande pāhuve. <sup>30</sup>David rumo Tūpa ñehe mombehusar, oicua Tūpa oyeupe aipo ehi vahe: ‘Supi eté aipo ahe ndeu: nde suindar oimera mborerecuar guasu nde recuñara’ ehi vahe. <sup>31</sup>Ahe ndoyavii osepia vahe ité Poropisírosar cuerayevisa. Evocoyase aipo ehi oñehe sese: ‘Ihā ndopitai chira omano vahe pāhuve iyavei setecuer ndituyui chira’ ehi aracahe. <sup>32</sup>Evocoi Jesús, Tūpa remimbogüerayevi secoi. Ahe imombehusar opacatu ore oroico.

<sup>33</sup>Ipare Tūpa víraso oacato coti imboguapi. Ahe oipisi imombehupri Espíritu Santo Vu sui. Evocoyase ahe opa omondo co ava yuvirecoi vahe upe. Ahe pesepia, pesendu avei cūrítei peico. <sup>34</sup>Esepia, evocoi oso vahe ivave ndahei David. Ahe ae rumo aipo ehi aracahe:

‘Yar aipo ehi che Yar upe: Eguapi cohava che acato coti che piri. <sup>35</sup>Asecopipa uca ranera nde amotarēhimbar ndeu, ehi Yar che Yar upe’ ehi David aracahe.

<sup>36</sup>“Pe tapecuasapa, ticuasapa avei opacatu Israel recua rupi, supi eté evocoi Jesús curusu rese peyatica vahecuer, ahe Tūpa omoingo opacatu yande Yarā iyavei yande pīsiro āgua” ehi Pedro ava rehii upe.

<sup>37</sup> Aipo renduse, tasí iteanga ipiha pipe yuvireco. Evocoiyase oporandu chupe, ambuae imboetasa upe avei yuvireco:

—Ore mu, ¿mbahe vo oroyapora evocoiyase? —ehi.

<sup>38</sup> Evocoiyase aipo ehi ahe ava upe:

—Pemboasi pe angaipa; peyevi Tüpa upe. Iyavei peñeapiramo opacatu Jesucristo rer pipe. Evocoiyase Tüpa inerora pe angaipa rese. Iyavei omondora Espíritu Santo pëu. <sup>39</sup> Esepia, co ñehesa imombepuri, ahe pëu nara, pe suindar upe nara iyavei opacatu amombri Tüpa sui yuvirecoi vahe upe nara avei, ahe acoi opacatu yande Yar Tüpa oyeupe nara güeru pota vahe —ehi.

<sup>40</sup> Egüe ehi oñehe vite ava mboaracua aipo ehi:

—¡Peyepipi co ava secocuer co coti tēi vahe sui! —ehi chupe.

<sup>41</sup> Acoi ava viroya vahe co ñehesa, oñeapiramo uca yuvireco. Ahe ari pipe oyemboeta iri tres mil ava yuvireco Jesús viroya vahe rese. <sup>42</sup> Opacatu viroya tupri ité apóstol porombohesa. Opacatu guasu avei oyeaisu tupri yuvireco, oyerogui iyavei oñemonuha oyeupe pan mboyaho-yaho água yuvireco yepi.

### Yipindar vahe Jesús reroyasar recocuer

<sup>43</sup> Opacatu oyembosiquiye imboeteisa pipe yuvireco. Esepia, apóstol oyapo setá poromondiisa ‘toicua Tüpa suindar yande porombohesa yuvireco’ oyapave. <sup>44</sup> Opacatu Jesús reroyasar ipihañemoñeta tupri ité ombahe rese yuvireco güecocuer upe nara. <sup>45</sup> Omondo ambuae ava upe oivi iyavei ombahe eta yuvireco. Sepri omondo oyeupe mbahe panesa rupi-rupi. <sup>46</sup> Ari yacatu rupi judío tūparove oñemonuha yuvireco. Iyavei oi yacatu rupi avei oñemonuha oyoya guasu pan mboyaho água. Ipare oyoya guasu ocaru yuvireco

oyembovihasa pipe, opihañemoñeta tuprisa pipe avei. <sup>47</sup> Osapucai yuvireco Tüpa upe yepi iyavei opacatu ava osaisu Jesús reroyasar yuvireco. Yande Yar evocoiyase ari rupi omboeta catu ava inepisiro água Jesucristo viroya vahe pāhuve.

### Ndoguatai vahe cuerasa

**3** Ñepe ari aipo, caharuse las tres pipe, Pedro, Juan reseve oyoya yuviraso judío tūparove. Ahe hora pipe judío oyerogui yuvireco yepi. <sup>2</sup> Ahe tūparo roquendipi rer Porañete. Aheve ari yacatu rupi viraso ñepe ari oyesu suive ndoguatai vahe ‘tomondo guarepochi ava tūparove yuviroique vahe yuvireco chupe’ oyapave. <sup>3</sup> Ahe ndoguatai vahe omahe Pedro, Juan rese tūparove seique potase, oporandu guarepochi rese chupe. <sup>4</sup> Pedro, Juan avei rumo omahengatu yuvireco sese. Pedro aipo ehi chupe:

—Emahe ore rese —ehi.

<sup>5</sup> Evocoiyase ahe mbia omahengatu sese ‘omboura revo que mbahe cheu’ oya viña. <sup>6</sup> Aipo ehi rumo ndoguatai vahe upe:

—Che ndarecoi guarepochi, oro avei.

Co areco vahe rumo amondora ndeu: Jesucristo, Nazaret pendar, rer pipe epüha, eguata —ehi chupe.

<sup>7</sup> Evocoiyase oipisi ipo yasu cotindar imopuha. Ahe ramoseve opa tupri ipi, ipiñuha avei oviracua. <sup>8</sup> Evocoiyase opüha, opo, uguata; oique oso tūparove supi. Opo-opo vorivetesave iyavei osapucai Tüpa upe. <sup>9</sup> Opacatu ava osepia yuvireco iguatase iyavei Tüpa upe isapucaise. <sup>10</sup> Omahecuase sese, “¡Too!” ehi tēi yuvireco. Iyavei ndoyembovihai aviyeteramo tēi icuerase yuvireco. Esepia, evocoi ava oicupa tūparo roquendipi Porañete serer vahesave chinise mbahe rese iporanduse yuvireco yepi.



**Pedro oñehe ava rehii upe tũparo  
Corero Salomón serer vahevribe**

<sup>11</sup> Ndoguatai vahecuer ndoyepepi potai Pedro, Juan sui. Yuvinoña ati, oyepihamondii ava sepia tũparo Corero Salomón serer vaheve yuvirecoise. <sup>12</sup> Pedro evocoyase aipo ehi ava upe: “Che mu, ¿mahera vo peyemondii? ¿Mahera vo ore repia ati peye? Ndojavii co ore pĩratasa pipe tẽi iyavei Tũpa rese ore pihañemoñeta tupriisa pipe tẽi orombogũera vahe co mbia pẽu viña. <sup>13</sup> Tũpa, ahe acoi Abraham, Isaac iyavei Jacob viroya yuvireco aracahe iyavei opacatu yande ramoi eta avei no, ahe niha omondo güeco pĩratasa tuvicha catu vahe Guahir Jesús upe. Pe rumo acoi pemondoño mborerecuar Pilato povrive. Acoi omose potase, pe evocoyase ndapeipotaiño imose āgua chupe. <sup>14</sup> Ahe seco maranehi vahe, seco ïvi vahe renose rāgũer pipe, peporandu: ‘Tosẽ oporapichi vahe’ peye. <sup>15</sup> Ēgũe peye acoi tecovesa ombou vahe yuca. Tũpa rumo ombogũerayevei omano vahe pāhu sui. Ahe niha ore oromombehu oroico pẽu. <sup>16</sup> Co Jesús rer rese yeroya pipe itẽ niha oipisi pĩratasa co mbia ndoguatai vahecuer opacatu pe pesepia vahe iyavei peicua vahe. Jesús rese yeroyasa pipe itẽ niha co pe rembiepiave ocuera tupri” ehi ava upe.

<sup>17</sup> “Che mu eta, che aicua acoi pe peipĩtivii vahe pe rerecuar Jesús yuca uca āgua pe icua tupriẽhi pipe cuese. <sup>18</sup> Ēgũe ehi Tũpa imboaviye aracahendar opacatu oñehe mombehusar upe güemimombehugũer: ‘Che Rembiporavo Poropĩsiosar oiporarara mbahe-mbahe tẽi rasicuer omano’ ehi vahe. <sup>19</sup> Sese pemboasi pe angaipa; peyevi Tũpa upe. Ipĩpe sui tomocañi pe angaipa pe sui. Aviyeteramo co sui omboura yande Yar pe reco morohisa āgua, <sup>20</sup> ombou aveira Jesús, ahe yipisuipe iporavopri pe

pĩsiro āgua. <sup>21</sup> Cũritei rumo Jesucristo ivave vite secoi acoi Tũpa opase voi omoingatu opacatu mbahe iyeve āgua. Aipo ehi acoi imoñehe uca aracahendar oñehe mombehusar ndaseco marai vahe. <sup>22</sup> Moisés yande ramoi yuvirecoi vahe upe aipo ehi imombehu aracahe: ‘Yande Yar Tũpa omopuhara ñepei oñehe mombehusar pe pāhume che nungar. Ahe iñehe pesadura, pemboyeroa catu aveira. <sup>23</sup> Opacatu ndoviroyai vahe iñehe Tũpa omocañira güembiporavo pāhu sui’ ehi.

<sup>24</sup> “Ēgũe ehi opacatu Tũpa ñehe mombehusar Samuel suive aracahe omombehu avei co ari cũritei yasepia vahe yuvireco. <sup>25</sup> Pẽu nara niha Tũpa ñehe mombehusar remimombehugũer aracahendar. Pẽu nara avei acoi Tũpa omombehu vahe güemimbotar yande ramoi eta upe. Esepia, aipo ehi Abraham upe aracahe: ‘Opacatu ava co ïvi pipendar ahe sovasapri yuvirecoira nde suindar sui’ ehi. <sup>26</sup> Acoi Tũpa Guahir ombogũerayeveise, pẽu rane ombou pe rovasa āgua ‘toseyapa ñepei-peĩ güecocueraĩ yuvireco’ oya” ehi Pedro ava rehii upe.

**Pedro, Juan serasosa  
mborerecuar rovai**

**4** <sup>1-2</sup> Pedro, Juan reseve oñehe vite-seve ava rehii upe, ahese oñemoirosa pipe pahi eta, tũparo rārosar sundao rerecuar, saduceo avei oyugũeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayeve; sese oime cuerayevisa omano vahe pāhu sui” ehi. <sup>3</sup> Ichui oipisi seraso soquenda yuvireco ‘ayihive voi yanosera mbahe rese porandu āgua’ ohesa pipe. Esepia, caharuse tẽi osoquenda yuvireco. <sup>4</sup> Setā rumo ava iñehesa osendu vahe viroya yuvireco. Ahe cuimbahe seroyasar retacuer güer-año seni cinco mil.

<sup>5</sup>Ahere ayihive mborerecuareta oñemonuha yuvireco Jerusalén ve: judío rerecuar, pahi eta rerecuar, Moisés porocuita rese oporombohe vahe, <sup>6</sup>pahi rerecuar ivate catu vahe Anás, Caifás, Juan, Alejandro, opacatu omu reseve. <sup>7</sup>Evocoiyase güeru ucase Pedro iyavei Juan opāhuve yuvireco, oporandu yuvireco chupe:

—¿Ava pe cuaita pipe vo, ava rer pipe avei vo co mbahe peyapo? —ehi.

<sup>8</sup>Evocoiyase Pedro, Espiritu Santo pīratasa pipe, aipo ehi chupe:

—Pe, mborerecuareta co tecua pipendar, pe avei pahi rerecuar: <sup>9</sup>peporandu niha co ava imbaheasi vahe ndoguata catui vahe mbogüera agüer rese oreu —ehi chupe—. <sup>10</sup>Evocoiyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatica uca vahecuer curusu rese. Tüpa rumo ombogüerayevi iri omano vahe pāhu sui. <sup>11</sup>Co Jesús pe remieroïro, ahe rumo yande vīracuasa. Pe evocoiyase inungar oi mopusasar omomboño vahe ita aviye catu vahe oi movīracuasa rāgüer yepi. <sup>12</sup>Ndipoi que ambuae ava sui poropīsīrosa, Jesús güeraño ité oicatu oporopīsīro. Esepia, Tüpa nomboui ambuae ava tēi co ivi pipe yande pīsīro āgua —ehi.

<sup>13</sup>Mborerecuar osepiase iyembosiquiyeehisa yuvireco, “¿Mara ehi pīha co mbia? ¡Ava tēi, ndoyembohei vahe niha!” ehi tēi yuvireco chupe. Ichui oicua Jesús remimbohegüer secose yuvireco. <sup>14</sup>Iyavei acoi ava semimbogüeragüer supive ité secoise, sese ndoicatui chupe oñehe mara āgua yuvireco. <sup>15</sup>Ipare, “Pesē ocarve” ehi mborerecuareta yuvireco chupe. Ahe güeraño evocoiyase opita oi pipe oñemoñeta yuvireco sese <sup>16</sup>aipo ehi:

—¿Mara yahera vo co ava rereco? Esepia, opacatu ava Jerusalén pendar

oicua co mbahe poromondiisa oyapose yuvireco. Ndiyai eté, “Ēgüe ndehi” yahe chupe. <sup>17</sup>Yambosiquiye ava upe Jesús rer rese iñehe iriñhi āgua yuvireco. Ipipe sui ava tosendu iri eme Jesús resendar ñehesa yuvireco —ehi.

<sup>18</sup>Aipo ohe pare, “Perio” ehi yuvireco chupe. “Pesendu, co pipe suive peñehe iri eme tupri iyavei pembohe iri eme avei ava Jesús rer pipe” ehi yuvireco chupe. <sup>19</sup>Omboveviño rumo oñehe yuvireco chupe:

—¿Mara ehi pe pihave? ¿Uma pīha aviye catu Tüpa rovai? ¡Pe porocuita tie oroviroya catura Tüpa ore cuaisa sui! <sup>20</sup>Ndiyai rumo mbahe ore rembiepia, mbahe orosendu vahe avei mombehuēhi āgua oreu —ehi.

<sup>21</sup>Aipo ihese, mborerecuar ombosiquiye catu tēi yuvireco. Ichui rumo omose tupriño. Esepia, ava omboetei guasu Tüpa yuvireco co imbaheasi vahe mbogüera repiase. Sese ndoicatui eté mbahe apo yuvireco chupe. <sup>22</sup>Evocoi ava oipisi vahe Tüpa poromondiisa ocuera āgua, ahe oñaro catu cuarenta araviter vireco vahe sui.

### **Jesús reroyasar oporandu Tüpa upe siquiyeehisa rese yuvireco**

<sup>23</sup>Yuvinosese Pedro, Juan avei, oyevei yuviraso omboetasa piri. Aheve oñemonuhasave opa omombehu pahi rerecuar oyeupe ñehe mara-mara tēisa yuvireco. <sup>24</sup>Aipo rendu pare, oyoya guasu oyeroqui yuvireco Tüpa upe aipo ehi: “Ore Yar, nde niha Tüpa opacatu iva, ivi, para guasu, opacatu ipor reseve aposar ereico. <sup>25</sup>Nde Espiritu Santo pipe aipo eremombehu uca nde rembiguai mborerecuar David upe aracahe:

‘¿Mahera vo co ava ndahei vahe judío oyamotarēhi yuvireco?  
¿Mahera vo ipihañemoñeta rai tēi yuvireco?’

<sup>26</sup>Mborerecuar guasu eta, ambuae mborerecuar reseve co ivi pipendar oñemonuha yuvireco yande Yar Tüpa iyavei sembiporavo amotarēhi āgua' ehi aracahe.

<sup>27</sup>“Ēgüe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepia, oñemonuha yuvireco nde rembiguai aracaheve nde Rembiporavo Poropīsīrosar Jesús, seco maranehi vahe, amotarēhi āgua. <sup>28</sup>Ēgüe ehi yapo opacatu nde pihañemoñeta aracahendar rupi tupri ité yuvireco. <sup>29</sup>Iyavei cūrītei, ore Yar, emahe ore amotarēhisar rese. Embou nde pīratasa nde rembiguai oroico vahe upe siquiyēhisa pipe nde ñehengagüer mombehu vite āgua. <sup>30</sup>Ipare, nde pīratasa pipe, embogüera imbaheasi vahe iyavei eyapo mbahe poromondiisa yavai vahe nde rembiguai Jesús rer maranehi pipe” ehi yuvireco oyoeroqui.

<sup>31</sup>Iyeroqui pare, Tüpa omborirīi opacatu mbahe iñemonuhasave yuvireco chupe. Ahese Espiritu Santo opa oique yuvireco sese. Sese osiquiyēhisa pipe omombehu tupri Tüpa Ñehengagüer yuvireco.

### **Jesús reroyasar ombahe opacatu oyeupe nara vireco yuvireco**

<sup>32</sup>Setá iteanga Jesús reroyasar yuvireco. Opacatu oyoya tupri ipihañemoñeta yuvireco. Ndipoi eté “co güer-año co che mbahe” ehi vahe; opacatu seroyasar mbahe rumo opacatu mbahe. <sup>33</sup>Jesucristo apóstol omombehu vite ipīratasa pipe icuerayevi agüer yuvireco. Ipīpe Tüpa osovasa catu vite opacatu yuvireco. <sup>34</sup>Ndipoi eté ipāhu pendar mbahe ndovirecoi vahe. Esepia, opacatu ivi vireco vahe iyavei oi omondo, <sup>35</sup>ahe seprī omondo apóstol upe yuvireco yepi. Ahe evocoyase omboyaho-yaho opacatu upe mbahe ipane vahe rupi-

rupi yuvireco. <sup>36</sup>Ēgüe ehi ava judío ramoi Leví suindar, Chipre pendar, José serer vahe, apóstol osero, “Bernabé” ehi yuvireco chupe (‘porombovihasar’ oya aipo ehi), <sup>37</sup>ahe mbia omondo oivi, güeru seprī apóstol upe.

### **Ananías iyavei Safira yemboangaipa agüer**

**5** Ambuae ava rumo, Ananías serer vahe, güembireco Safira reseve omondo ivi yuvireco. <sup>2</sup>Ahe mbia rumo omboyaho seprī, ñepeiyahocuer vireco oyeupe nara, ambuae iyahocuer viraso apóstol upe, sembireco avei oicua tēi opacatu. <sup>3</sup>Evocoyase Pedro aipo ehi chupe:

—Ananías, ¡mahera ereroya Caruguar nde piha pipe Espiritu Santo mbopa āgua, eremboyahoño tēi nde ivi reprī guarepochi ndeyeupe nara! <sup>4</sup>¿Ndahei vo nde mbahe ité ivi viña? Eremondo ité niha, evocoyase nde mbahe ité guarepochi. ¡Mahera ereyapo co nungar! Ndahei ava upe nde remira, Tüpa upe ité rumo nde remira —ehi chupe.

<sup>5</sup>Osenduse Pedro ñehesa, oviapi sehögüer oso sovai. Ahese opacatu oyandu vahe osiquiye tēi yuvireco. <sup>6</sup>Ipare mbia chīhivahe yugüeru, osupi sehögüer, oipoque seraso yuvireco ñoti āgua.

<sup>7</sup>Mbosapi hora pare, sembireco Safira serer vahe oique oi pipe. Ndoicua vitei rumo omer mano. <sup>8</sup>Ahese Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoi rupive ité niha oromondo —ehiño avei cuña chupe.

<sup>9</sup>Evocoyase aipo ehi ahe cuña upe:

—¡Mahera peyemboyoya pe pihañemoñetasa rese pe secoāha āgua yande Yar Espiritu! Coi yugüeru nde mer

t̄sarer. Nde avei nde reraso āgua yuvireco eipeve —ehi chupe.

<sup>10</sup>Ahe ramoseve avei oviapi sehōgüer Pedro rovai. Mbia chíhivahe yuviroique, oipoque voiño ité sehōgüer seraso imer ivii ñoti āgua yuvireco. <sup>11</sup>Opacatu Jesús reroyasar, ambuae ava avei oyembosiquiye guasu yuvireco yanduse.

### Setá poromondiisa yaposa

<sup>12</sup>Evocoyase apóstol pipe Tūpa omboyecua uca setá poromondiisa ava pāhuve yuvireco. Opacatu Jesús reroyasar oñemonuha judío tūparo ique, Salomón serer vahesave yuvireco.

<sup>13</sup>Opacatu ambuae ndoyemboyai yuvireco sese osiquiyepave. Ava rehii rumo, omboetei eteanga apóstol yuvirecoi vahe yuvireco. <sup>14</sup>Oyemboeta catu yande Yar reroyasar setá cuimbahe, setá avei cuña. <sup>15</sup>Iyavei ava rehii vīnose yuvireco imbaheasi vahe supa reseve-seve Pedro renonera, “Oñocuase Pedro, aviyeteramo omohara ihāgüer. Ahese revo ombogüerara” ehi yuvireco oyeupe. <sup>16</sup>Ava Jerusalén ivirindar avei güeru omonuha setá imbaheasi vahe, carugar rese yuvirecoi vahe apóstol upe imbogüerapirā. Ahe evocoyase opacatu ombogüera yuvireco.

### Apóstol yamotarēhipri yuvirecoi

<sup>17</sup>Ichui tēi pahi rerecuar ivate catu vahe, saduceo yuvirecoi vahe oñemoiro yuvireco apóstol upe ava rese güecatēhisave. <sup>18</sup>Sese oipisi osoquendapa uca yuvireco. <sup>19</sup>Ipare rumo, pītu pipe, Tūpa rembiguai iva pendar ou omboi oquenda, vīnose ichui, aipo ehi chupe: <sup>20</sup>“Peso tūparo guasuve, pemombehu avei ava upe co ñehesa tecocuer piasu resendar” ehi chupe. <sup>21</sup>Co mbahe rendu pare, supi tupri ité oyapo yuvireco. Cōhe ramoseve yuviraso judío tūparo guasuve ava mbohe āgua.

Aheseve pahi rerecuar ivate catu vahe, supindar avei osenoi opacatu tecua pipendar mborerecuar ñemonuha āgua ivate catu vahesave; omondo yuvireco güembiguai apóstol reru āgua soquendasa sui aheve nara viña. <sup>22</sup>Oyepotase rumo sembiguai yuvireco, oseca tēi soquendapri. Ichui oyevi tēi yuvireco imombehu <sup>23</sup>aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendipi rupi sārōsar osāro tupri ité viña. Oromboise rumo oquenda, ndipoi eté ava soquendapri ipipe —ehi tēi yuvireco.

<sup>24</sup>Osenduse, pahi rerecuar ivate catu vahe, tūparo rārosar rerecuar, pahi rerecuareta avei yuvireco, ipihañemoñeta tēi: “¿Que rupi vo opoira co mbahe sui yuvireco?” ehi tēi yuvireco oyeupe. <sup>25</sup>Aheseve ñepeí mbia oyepota imombehu:

—Evocoi pesoquenda vahecuer, ahe mbia cūrítei oporombohe tūparove yuvireco —ehi chupe.

<sup>26</sup>Evocoyase tūparo rārosar rerecuar, sembiguai avei yuviraso seru āgua mbahe tupri pipe, “Aviyeteramo yande api-api tiētera ava yuvireco yaru raise” ehi yuvireco. <sup>27</sup>Vīroyepotase yuvireco ñemonuhasa ivate catu vahesave, ahese evocoi pahi rerecuar ivate catu vahe aipo ehi chupe:

<sup>28</sup>—Ore mborerecuar tecua pipendar, ndoroipotai peporombohe evocoi mbia recocuer rese. Pe rumo pembohe opacatu Jerusalén pendar secocuer rese serer pipe. Pemombehu avei ava rehii upe ore mborerecuar oroyuca uca evocoi mbia —ehi pahi rerecuar chupe.

<sup>29</sup>Pedro, omboetasa reseve, omboyevi pahi rerecuar ivate catu vahe upe yuvireco:

—Ore cuaita ité Tūpa mboyeroya, ndahei chira rumo ava tēi rane orom-

boyeroyara —ehi yuvireco chupe—. <sup>30</sup>Yepe peyatica, peyuca uca Jesús curusu rese viña, yande Ru Tūpa rumo acoi yande ramoi eta viroya vahe, ahe ité ombogüerayevi. <sup>31</sup>Ipare osecomboivate ivave oacato coti imboguapi imoi. Ahe niha Mborerecuar guasu, Poropisirosar avei ‘tomboasi oangaipa, toyevi cheu, toipisi angaipa resendar ñeroisa yuvireco’ oya Tūpa Israel suindar upe. <sup>32</sup>Ore Tūpa rembiapo repi-asarer imombehu āgua oroico, Espiritu Santo avei oñehe ore ñehe rupi ava upe, ahe acoi Tūpa ombou vahe viroyasar upe —ehi.

<sup>33</sup>Osenduse mborerecuar aipo ñehesa, oñemoiró iteanga yuvireco. Oyu-capa pota opacatu apóstol yuvireco viña. <sup>34</sup>Mborerecuar pāhu pendar rumo oime mbia fariseo, Gamaliel serer vahe, ahe Moisés porocuaita rese oporombohe vahe iyavei imboeteipri catu vahe. Ahe opūha oporocuai, “Toyuvinose raimi ocarve apóstol” ehi. <sup>35</sup>Ipare aipo ehi ambuae mborerecuareta upe:

—Che mu, judío, peicua catu, yandepihañemoñeta tupri rane mbahe apo āgua renondeve co mbia upe yuvireco —ehi—. <sup>36</sup>Peyemomahenduha Teudas recocuer rese. Esepia niha, acoi oyemboivate aisa pipe viroguata cuatrociento ava oyeupi aracaco. Ipare acoi oyuca yuvireco. Ahese supindar opa oñemosai tēi yuvireco. Ahe peve secocuer opa. <sup>37</sup>Coiye catu, omombehuse mborerecuar Roma pendar ava retacuer cua āgua, ahese Judas, Galilea pendar, oye-momborerecua. Setá avei ava oguata yuvireco supi. Ahe avei rumo oyuca yuvireco, opa tupriño avei supindar oñemosai tēi yuvireco —ehi—. <sup>38</sup>Sese cūritei peyapoi rene mbahe co ava upe. Yaseyaño. Esepia, evocoi mbahe sembiapo ndipocopii chira oyapose opīratasa pipe tēi yuvireco. <sup>39</sup>Tūpa suindarse rumo ndapemombituhu catui chietera.

Peicua catu, aní chira yayamotarēhi Tūpa ipipe —ehi omboetasa upe.

Aipo ihese, opacatu imboetasa viroya yuvireco. <sup>40</sup>Ichui rumo güeru iri apóstol inupa uca āgua iñehe iriēhi āgua Jesucristo rese yuvireco. Inupa pare opa omose yuvireco. <sup>41</sup>Ipipe apóstol ovihareté iteanga yuvireco. Esepia, Tūpa ombou chupe iparaisu āgua yuvireco Jesús rer rese iyeroyasa sui tēi. <sup>42</sup>Ipare ndopoi eté ari yacatu Poropisirosar Jesús recocuer mombehusa sui yuvireco. Omombehuño ité tūparo pipe iyavei opacatu ava rēta rupi yuvireco.

### Siete iporavosa iparaisu vahe pītivii āgua yuvireco

**6** Ahe araviter pipe aipo oyemboetase Jesús reroyasar yuvireco, griego pipe oñehe vahe oñehe rai oyeupe hebreo pipe oñehe vahe rese yuvireco: “Nihañeco tuprii ore mu imer mano vahecuer rese ari yacatu mbahe poropītiviisa imondosase chupe” ehi oñehe yuvireco. <sup>2</sup>Evocoiyase doce apóstol omonuhapa uca opacatu Jesús reroyasar. Aheve aipo ehi yuvireco chupe:

—Ndiyai rumo ore oropoi tēi Tūpa Ñehengagüer mombehusa sui mbahe poropītiviisa mondo āgua rese tēi —ehi yuvireco—. <sup>3</sup>Sese ore rivireta, peiporavo siete mbia seco aviye vahe pe pāhu sui, yaracua vahe iyavei Espiritu Santo viroya vahe ité opiha pipe. Ahe mbia tihañeco co mboraviquisa rese yuvireco. <sup>4</sup>Ore evocoiyase, oroyerureñora iyavei oroporomboheño itera Tūpa Ñehengagüer rese —ehi yuvireco.

<sup>5</sup>Opacatu oipotaño yuvireco ñehesa oyeupendar. Ichui osenoi Esteban yuvireco, ahe oyeroya ité Tūpa rese iyavei viroya ité Espiritu Santo opiha pipe. Ichui oiporavo Felipe, Prócoro, Nicanor, Timón, Parmenas iyavei Nicolás evocoi mbia Antioquía pendar, ahe viroya vahecuer judío aracuaa. <sup>6</sup>Ichui virasopa

apóstol upe yuvireco. Ahe omondo opo iharive oyerokui yuvireco sese.

<sup>7</sup>Ahese Tüpa Nehengagüer oyemosai catu tecua pipe. Ichui oyemboeta catu iri avei Jesús reroyasar yuvireco Jerusalén ve. Setá avei judío pahi viroya iñehengagüer yuvireco.

### Esteban pisisa

<sup>8</sup>Co mbia, Esteban, vireco ité Tüpa pírataa iyavei Tüpa porovasasa oyese. Oyapo avei mbahe poromondiisa, yavai vahe opacatu ava pāhuve. <sup>9</sup>Evocoiyase Jerusalén ve oime judío tūparo Mbiguagüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivirindar yuvirecoi vahe reseve oiñehopepi-epi Esteban yuvireco. <sup>10</sup>Ndoicatu rumo iñehe recopi āgua yuvireco. Esepia, ahe oñehe mbahecuasa Espiritu Santo omondo vahe pipe. <sup>11</sup>Evocoiyase yamotarēhimbar omboepi ambuae ava upe semira tēi āgua sese yuvireco. “Ore orosendu co mbia oñehese mbahe naporai vahe rese Moisés amotarēhisave, Tüpa amotarēhisave avei’ aipo peyera peñehe” ehi yuvireco chupe. <sup>12</sup>Evocoiyase ahe ava oyamotarēhi uca opacatu ava mborerecuar reseve iyavei judío porocuita rese oporombohe vahe upe avei yuvireco. Ichui oipisi yesapiha Esteban seraso mborerecuar uve porandusa ivate catu vahesave yuvireco. <sup>13</sup>Iyavei oseca mbia semira tēi vahe oñehe vaherā sese yuvireco. Ahe aipo ehi:

—Co mbia oñehe-ñehe tēi yande tūparo guasu imaranehi vahe amotarēhisave, Moisés porocuita amotarēhisave avei. <sup>14</sup>Ore orosendu iñehe: “Jesús Nazaret pendar omocañira tūparo guasu iyavei Moisés yande mbohesa avei aipo osecañarora” ehi —ehi yuvireco chupe.

<sup>15</sup>Ahese opacatu mborerecuar oñemonuha vahe yuvinoi aheve omahe Esteban rese yuvireco. Omahese aipo yuvireco sese, ndoyavii sepiaca Tüpa rembiguai iva pendar rova.

### Esteban oñehe oyeepisa pipe

**7** Evocoiyase pahi rerecuar ivate catu vahe oporandu chupe: “¿Supi eté vo aipo nde ñehe mara eico?” ehi chupe. <sup>2</sup>Ahese omboyeve chupe: “Che mu eta, peyapisaca che ñehe rese: Tüpa imboeteipri oyemboyecua yande ramoi Abraham upe aracahe. Mesopotamia ve secoi vitesse, icho renondeve Harán ve seco āgua, <sup>3</sup>aipo ehi chupe: ‘Eso nde recua sui; eseyapa nde mu; eso evocoi tecuave che amboyecuaru ndeu’ ehi Tüpa chupe. <sup>4</sup>Evocoiyase osē Caldea ivi sui oso tecua Harán ve güeco āgua. Omano pare tu Harán ve, Tüpa ombou cohava yande recosave. <sup>5</sup>Yepe oye-pota tēi cohava aracahe, Tüpa rumo nomondoimi eté que chíhi ivi chupendar chupe. ‘Co ivi amondora ndeu nde mano pare nde suindar upe nara’ ehi Tüpa chupe (ahe rumo ndatahi vitei ahese). <sup>6</sup>Tüpa aipo ehi avei chupe: ‘Nde suindar yuvirecoira ambuae ava recua rupi, ahe pendar ava secua vahe rembiguirā semimombaraisuguā tēi avei yuvirecoira cuatrociento araviter rupi’ ehi. <sup>7</sup>Tüpa rumo aipo ehi avei Abraham upe: ‘Che rumo, aicuara evocoi ava nde suindar mombaraisusar upe yuvireco. Ipare yuvinosera ipovri sui che mboetei iri āgua cohava yuvireco’ ehi Tüpa chupe aracahe. <sup>8</sup>Tüpa oyocuai güemimbotar pipe Abraham guahir mbocircuncida āgua rese. Sese Abraham ombocircuncida guahir Isaac iha pare ocho ari pipe. Isaac ēgüe ehi avei guahir Jacob upe. Jacob ēgüe ehi avei guahireta upe, ahe doce vahe Israel suindar” ehi.

<sup>9</sup>“Ipare yuvirecoi vahe yande ramoi Jacob rahir omondo vivri guarepochi

repirā yamotarēhisa pipe yuvireco. Ahe tivri rer José omondo vahe Egipto pendar upe yuvireco. Tūpa rumo secoiño ité sese. <sup>10</sup> Ichui vinose opacatu iparaisusa sui. Omondo ombahecuasa chupe iyavei seco aviye tupri āgua Egipto pendar mborerecuar guasu faraón upe. Evocoyase faraón ipotasa pipe omoingue mborerecuar seco āgua opacatu ava ivi Egipto pendar cuai āgua iyavei güeta pipendar cuai āgua avei.

<sup>11</sup> “Ipare ou tiavou opacatu Egipto ivi rupi, Canaán ivi rupi avei. Iparaisu yuvireco. Ahe se yande ramoi ndoyosui mbahe güemihura yuvireco. <sup>12</sup> Oyanduse rumo Jacob Egipto ve oime vitesse trigo, ahe se omondo guahir aheve seca, ahe yande ramoi yuvirecoi vahe. Ahe yipendar ichosa Egipto ve yuvireco. <sup>13</sup> Ichui yuviraso yupagüe irise Egipto ve, ahe se José oyecua uca viquehir upe. Ēgüe ehi faraón upe oicua uca uma sui oyesu. <sup>14</sup> Evocoyase José güeru uca oyesupa Jacob iyavei opacatu omu, ahe imu retacuer setenta y cinco tupri. <sup>15</sup> Ēgüe ehi Jacob yuviraso Egipto ve yuvirecoi āgua opacatu guahir reseve. Aheve omano iyavei opacatu yande ramoi eta omano yuvireco aracahe. <sup>16</sup> Imano pare rumo, suminogüer viraso icangüer yuvireco tecua Siquem ve. Aheve oñoti yuvireco. Aheve acoi Abraham virocua tuvipa Hamor rahir sui aracahe” ehi mborerecuar upe.

<sup>17</sup> “Ipare, virovise arí ipapapri Tūpa Ñehengagüer Abraham upendar, ahe se yande ramoi setá catu-catu iri oyesu Egipto ve yuvireco aracahe. <sup>18</sup> Ipare oporocuai ambuae mborerecuar guasu Egipto ve. Ahe ndoicuai vahe ité yande ramoi José. <sup>19</sup> Evocoi mborerecuar guasu ombopa yande ramoi eta aracahe. Omombaraisu avei oyucapa uca israelita rahir cuimbahe pītani. Ahe oyocuai iyepupa aipo ehi: ‘Peseya pe rahir oha ramomi vahe, tomanoño’ ehi

yande ramoi upe aracahe. <sup>20</sup> Ahe se avei aipo Moisés oha. Ahe pītani aviye ité Tūpa uve. Ihare, iyepupa mbosapi yasimi rupive vireco oyese güetave yuvireco. <sup>21</sup> Oseyase rumo iyepupa ive yuvireco, ahe se faraón rayri oseca ahe i rupi sui. Ichui vinose seraso güetave, omboacua omembri nungar ité sereco. <sup>22</sup> Ichui Egipto pendar yaracua vahe opacatu ombahecuasa rese ombohe tupri Moisés sereco yuvireco. Evocoyase Moisés ipirata ité oñehese iyavei oyapose mbahe.

<sup>23</sup> “Virecose rumo Moisés cuarenta araviter, ipihañemoñeta: ‘Tasepia rane che mu israelita cohava yuvirecoi vahe’ ehi. <sup>24</sup> Ipare aheve osepia Egipto pendar oinupa-nupa imu sereco yuvireco. Ahe se oyuca Egipto pendar omu repicave. <sup>25</sup> Ahe rumo, ‘Oicua revo che mu Tūpa vinose uca āgua Egipto sui yuvireco cheu’ ehi viña. Imu rumo nomohai eté Moisés vinose āgua yuvireco evocoi ava po sui. <sup>26</sup> Ahere ayihive oso omu pāhuve. Aheve osepia ñuvirío mbia ovavase oyeupe yuvireco. Ahe rumo oipota tēi iñero āgua oyeupe yuvireco viña, aipo ehi chupe: ‘Che mu, oñemu mo peico, ¿mahera vo pevava peyese ae?’ ehi tēi chupe. <sup>27</sup> Oyemoviracua catu vahe rumo omombo oyesui. Ichui ahe aipo ehi chupe: ‘¿Ava vo nde moingue ore pāhuve ore rerecuarā ore recocuer moingatu āgua?’ ehi chupe. <sup>28</sup> ‘¿Che yuca pota avei tie eve inungar ereyuca evocoi Egipto pendar irapipe!’ ehi chupe. <sup>29</sup> Osenduse rumo co iñehe, oñemi voi eté oso Egipto sui ambuae ivi Madián ve. Aheve opita pucu. Ahe ivi rumo ndahei secua ité. Aheve oyesu ñuvirío tahir.

<sup>30</sup> “Omboaviyese cuarenta araviter Madián ve, Tūpa rembiguai oyemboyecua ivitri Sinaí rerovicave ivi iporupirēhisave cahá rese tata rendigüer pāhuve chupe. <sup>31</sup> Osepiase mbahe sendi vahe oyepihamondii,

oyemboya catu sese sepia tupri āgua viña. Ahese osendu Yar ñehe aipo ehi vahe: <sup>32</sup>‘Che nde ramoī Tūpa aico. Nde ramoī Abraham, Isaac iyavei Jacob che reroya vahecuer yuvireco’ ehi. Evocoyase Moisés orirī osiquiyesa pipe nomahe pota iri sese. <sup>33</sup>Evocoyase Yar aipo ehi chupe: ‘Esequiī nde pitaqui. Esepia, ivi nimarai vahesave ereico’ ehi chupe. <sup>34</sup>‘Che asepiā tupri ité Egipto ve nde mu che rembiporavo paraisuse; asendu avei ipoāse tēisa yuvireco yepi. Sese agüeyi ndeu nde oromondora aheve senosepa āgua’ ehi Tūpa Moisés upe aracahe.

<sup>35</sup>‘Yepe yande ramoī ndoviroya potaiño ité yuvireco, ‘¿Ava vo nde moingue ore rerecuarā ore recocuer moingatu āgua?’ ehiño yuvireco chupe, Tūpa ité rumo oyocuai güembiguai imbogüeyi tata rendigüer pāhuve imoñehe Moisés upe iporocuai āgua, ava renosepa āgua avei ivi Egipto pendar mborerecuar povri sui. <sup>36</sup>Ipare ahe ité vinose yande ramoī eta Egipto sui, oyapo avei mbahe poromondiisa aheve ‘toicua Tūpa yuvireco’ oya, para guasu Pira vaheve avei oyapo poromondiisa iyavei ivi iporupirēhisa rupi avei cuarenta araviter rupi. <sup>37</sup>Ahe avei aipo ehi israelita upe: ‘Tūpa vinosera pe pāhu sui ñepeī oñehe mombehusar che nungar’ ehi. <sup>38</sup>Ahe avei acoi ivi iporupirēhisa rupi ava pāhu rupi secoi. Chupe avei oñehe Tūpa rembiguai ivitri Sinaí ve yande ramoī rese; ahe avei oipisi ñehesa tecovesa resendar yandeu imbou āgua.

<sup>39</sup>‘Yande ramoī eta rumo nomboyeroya potai eté Moisés yuvireco. Ipihañemoñetaño ité Egipto ve oyevi āgua rese yuvireco. <sup>40</sup>Evocoyase aipo ehi Aarón upe yuvireco: ‘Eyapomi catu ava tūpa rahanga oreu ore reroguata āgua’ ehi yuvireco chupe. ‘¿Que vo catu Moisés, ore renosesarer Egipto sui,

secoi? Omano tie revo’ ehi tēi israelita yuvireco aracahe. <sup>41</sup>Ipare oyapo uca mbahe rahanga guaca repiaca nungar oyeupe yuvireco. Oyuca mbahe mimba ahe mbahe rahanga upe viropovēhe vāherā yuvireco iyavei oyemboviha pieta apo yuvireco güembiapo ucagüer rese tēi. <sup>42</sup>Sese Tūpa opoiño ahe ava sui, ‘Toyerure evocoyase yasi, yasitata upe yuvireco’ ehiño chupe. Aipo ehi niha oñehe mombehusar icuachiapri pipe:

‘Pe peico vahe israelita, ndahei cheu peyuca mbahe mimba seropovēhe āgua cuarenta araviter pipe ivi iporupirēhisa rupi.

<sup>43</sup>Pe rumo che mboeteiēhisa pipe peraso tūpa rahanga Moloc rēta iyavei yasitata rahanga Refán pe ae tēi peyapo vahe pe tūpaga.

Sese che opovinosera pe recua sui pe mondo Babilonia cupe coi coti’ ehi Tūpa chupe aracahe.

<sup>44</sup>‘Ivi iporupirēhisa rupi yande ramoī eta vireco Tūpa porocuita rēta oyeupive yuvireco aracahe mbahe mimba pírer apopri. ‘Na peyera yapo’ ehi Moisés upe. Evocoyase iñehe rupi tupri oyapo uca. <sup>45</sup>Ahese coiye catu yande ramoī eta vireco co oi Tūpa rēta mbahe pírer apopri yuvireco iyavei Josué rupi yugüeru vahe güeruño ité avei yuvireco, omosepase Tūpa ambuae ava co yande recuavi sui. Ēgüe ehiño vite ité ahe sereco yuvireco mborerecuar guasu, David, secoise aracahe. <sup>46</sup>Ahe David aviye ité Tūpa upe, oyapo pota setarā ‘toime tūparoguā yande ramoī Jacob rembieroya upe’ oya. <sup>47</sup>Tahir Salomón rumo omopuha ité ahe tūparo. <sup>48</sup>Tūpa rumo, seco ivate vahe, ndasecoi vahe tūparo ava tēi rembiapo pipe. Inungar acoi omombehu vahe Tūpa ñehe mombehusar aracahe aipo ehi:

<sup>49</sup>‘Iva che renda iyavei ivi che pirunga.



¿Mbahe nungar oi vo peyapora cheu? ehi yande Yar.

¿Que vo evocoyase che pituhu ãgua?

<sup>50</sup> Che niha opacatu co mbahe aposar aico' ehi Tūpa icuachiapri pipe" ehi mborerecuar upe Esteban.

<sup>51</sup> Ichui aipo ehi chupe: "Pe rumo ndapeyapisaca potai vahe ité peico. Oime tēi pe nambi, pe piha avei, ipipe rumo ndapeicuai eté Tūpa. Peico Espíritu Santo amotarēhimbar tēi inungar pe ramoi aracahe yuvirecoi. <sup>52</sup> ¿Uma profeta revo ndovireco meguai pe ramoi yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cūrítei ou ndaseco marai vahe cute. Pe avei evocoyase ahe yuca uca ãgua peporocuai. <sup>53</sup> Pe pereco tēi Tūpa porocuita acoi Tūpa rembiguai güeru vahe yuvireco; ahe rumo ndaperoyaiño ité peico" ehi Esteban opacatu mborerecuar upe.

### Esteban mano agüer

<sup>54</sup> Osendupase mborerecuar iñehe, omboasí iteanga yuvireco; oñeaimboterepri ité yamotarēhisave yuvireco. <sup>55</sup> Esteban rumo vireco ité Espíritu Santo oyese. Evocoyase iva rese omahese, osepia Tūpa porañetesa. Osepia avei Jesús opūha ohã Tūpa acato coti. <sup>56</sup> Evocoyase aipo ehi:

—¿Pesepia! Asepia inungar iva imboipri. Aheve asepia Ava Riquehir Vu acato coti ihã —ehi.

<sup>57</sup> Mborerecuareta rumo osapucái pīrata, oyopiño oapisacuar yuvireco ichui. Aheve yuvinoña guasu yuvireco chupe. <sup>58</sup> Viraso güecua ivii yuvireco. Aheve oseya oyeaosa Saulo pive 'tosãro' oya yuvireco chupe. Ipare oyapi-yapi ita pipe yuca yuvireco.

<sup>59</sup> Oapi-apiseve, Esteban oyerure Tūpa upe: "Che Yar Jesús, eipisi che hã" ehi.

<sup>60</sup> Ipare oñenopiha, oñehe pīrata Tūpa

upe: "¿Che Yar, ndeñero co ava che amotarēhisar angaipa upe!" ehi.

Aipo ohe pare, omano.

**8** Iyavei Saulo, "Peyuca ité" ehi catu-catu aheve ohã.

### Saulo oseca Jesús reroyasar mocañipa ãgua oico

Ahe ari pipeve omboipi Jesús amotarēhimbar seroyasar reca mara-mara tēi catu sereco ãgua yuvireco Jerusalén ve. Evocoyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco. <sup>2</sup> Oime ava Tūpa mboeteisar yuvirecoi vahe, ahe víraso Esteban rehögüer ñoti yuvireco. Itĩ pare, oyasehó iteanga yuvireco sese. <sup>3</sup> Ahe pipeve avei aipo Saulo omombaraisu ava Jesús reroyasar yuvirecoi vahe seroya ucaēhi ãgua viña. Yuviroique-iqueño tēi aipo sēta rupi cuimbahe, cuña mbotiriri senose soquenda ãgua yuvireco.

### Samaria pendar osendu ñehesa Jesucristo recouer resendar yuvireco

<sup>4</sup> Ava oñemosai vahecuer rumo Jerusalén sui omombehuño ité ñehesa pīsirosa resendar que yuvirasosa rupi yuvireco. <sup>5</sup> Felipe oso Samaria rupi. Aheve omombehu ava upe: "Evocoi Jesús Tūpa Rembiporavo ava pīsiro ãgua" ehi. <sup>6</sup> Ahese ava rehii oñemonuha Felipe ñehe rendu ãgua yuvireco. Oyapisaca tupri iñehe rese yuvireco. Esepia, osepia mbahe sembiapo poromondiisa. <sup>7</sup> Iyavei setá ava carugar rerecosar sui omose carugar. Osēse ava sui, sãse yuvireco. Iyavei setá ava nomii vahe, ndoguatai vahe avei ombogüera. <sup>8</sup> Evocoyase oviharete ahe tecua pipendar yuvireco.

<sup>9</sup> Aheve rumo mbia, Simón serer vahe, yipive ipaye ai oico, ombosiquiye-quiyē ava Samaria pendar. "Che seco ivate

vahe aico” ehi angahu ava mbopa. <sup>10</sup> Evocoyase opacatu ava, cuacua vahe iyavei chíhivahe catu vahe oyapísaca tupri ñehe rese, aipo ehi yuvireco: “Co niha Tüpa pīratasa tuvicha vahe” ehi oyeupe yuvireco.

<sup>11</sup> Omboyeroya pucu ité yuvireco. Espia, opayesa pipe ava ombosiquiye etepri oico yepi. <sup>12</sup> Oyepotase rumo Felipe Samaria ve omombehu ñehesa aviye vahe Tüpa mborerecuasa resendar, Jesucristo recocuer resendar avei. Ahese ava rehii viroya yuvireco. Ipare oñeapiramo ité yuvireco cuimbahe, cuña avei. <sup>13</sup> Ahe Simón avei viroya. Oñeapiramo pare, oso Felipe rupi. Co mbahe poromondiisa iyavei Tüpa suindar ndayasepiai vahe rese oyepihamondii.

<sup>14</sup> Jerusalén ve apóstol yuvirecoi vahe oyandu Samaria ve setá ava oipisise Tüpa Ñehengagüer yuvireco. Evocoyase omondo aheve omboetasa Pedro iyavei Juan yuvireco. <sup>15</sup> Oyepotase aheve yuvireco, oyerure opacatu ava Jesús reroysar rese ‘Espíritu Santo toipísi yuvireco’ oya. <sup>16</sup> Esepia, Espíritu Santo ndogüeyi vitei yuvireco sese; oñeapiramoño tēi vite yande Yar Jesús rer pipe yuvireco. <sup>17</sup> Pedro iyavei Juan oyerurese, omondo opo iharive yuvireco. Ahese Espíritu Santo ogüeyi yuvireco sese.

<sup>18</sup> Ahe osepiase, Simón omondo pota guarepochi chupe, <sup>19</sup> aipo ehi:

—Cheu avei pemboumi tēi evocoi pīratasa, amondose che po que ava harive, togüeyi avei Espíritu Santo sese yuvireco —ehi Simón.

<sup>20</sup> Omboyevi rumo Simón upe:

—¡Tocañipa nde guarepochi nde rese! Esepia, ndepihañemoñeta co Tüpa ombou vahe oreu, ererocua vaherã nde guarepochi pipe viña —ehi chupe—.

<sup>21</sup> Ndeu ndiyai co nungar mbahe apo água. Esepia, nde pihañemoñetasa ndahei ihivi vahe Tüpa rovaque. <sup>22</sup> Sese epoi nde pihañemoñeta raisa sui, eyerure

Tüpa upe. Aviyeteramo iñerora ndeu —ehi—. <sup>23</sup> Aicua nde piha naporai vite iyavei nde pihañemoñeta raisa pipe vite ereico —ehi chupe.

<sup>24</sup> Evocoyase Simón omboyevi chupe: —Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

<sup>25</sup> Yande Yar ñehesa mombehu pare ahe tecua pendar upe, apóstol omombehu-mbehu co ñehesa písirosa resendar Samaria pipendar tecua rupi yuvireco. Ēgüe ehi oyepota yuviroyevi Jerusalén ve yugüeru.

### Felipe omombehu Jesucristo recocuer Etiopía pendar upe

<sup>26</sup> Ipare Tüpa rembiguai oyemboyecua Felipe upe aipo ehi chupe: “Epüha, eso irohi coti nde yepota água evocoi peri ogüeyi vahe oso Jerusalén sui, Gaza ve” ehi. Evocoi Gaza piar osasa ivi iporupirēhi rupi oso. <sup>27</sup> Evocoyase opüha oso peri rupi. Aheve osovaichi ñepeí ava, ahe seco ivate vahe guarepochi apocatusar Etiopía pendar cuña mborerecuar upe nara yepi, ahe mbia oso vahe Jerusalén ve Tüpa mboetei água. <sup>28</sup> Oyevise ocáreto pipe, oyerogui Tüpa ñehe mombehusar Isaías rembicuachiagüer rese ou.

<sup>29</sup> Evocoyase Espíritu aipo ehi Felipe upe: “Eyemboya cãretomi rese” ehi. <sup>30</sup> Evocoyase virovise ahe ava, osendu iyeroqui Isaías rembicuachiagüer pipe oí. Ahese oporandu chupe:

—¿Eresenducua aipo Tüpa Ñehengagüer nde yeroquisa eí? —ehi chupe.

<sup>31</sup> Etiopía pendar mbia omboyevi chupe:

—¿Mara ahera vo che senducua viña ndipoise imombehu tuprisar cheu? —ehi chupe.

Ipare, “Erio, eyeupi, tereguapi cohava che píri” ehi Etiopía pendar chupe.

<sup>32</sup>Ahe Isaías rembicuachía oyeruqui vahe pipe aipo ehi:

“Inungar ava viraso ovesa yuca água, ĕgüe ehi avei ahe mbia seraso yuca água yuvireco.

Iyavei inungar ovesa nasasei eté guagüer roerocuaese, ĕgüe ehi avei ahe mbia nõnehei eté.

<sup>33</sup>Osecomomini yuvireco, ndipoi ava sepisar.

Ndipoi ichuindar.

Esepia, omocañi co ivi sui yuvireco” ehi Isaías rembicuachía pipe.

<sup>34</sup>Oyeruqui pare ahe Etiopía pendar oporandu chupe:

—Emombehumi cheu: ¿Ava rese pïha aipo Isaías nõnehe: oyese ae pïha, ambuae ava rese tie? —ehi.

<sup>35</sup>Evocoiyase co ñehesa sui omombehu ñehesa aviye vahe Jesús recocuer resendar Etiopía pendar upe.

<sup>36</sup>Ipare oguata catuse yuvireco, Etiopía pendar osepia i. Aheve ahe aipo ehi chupe:

—Esepia co i tui. ¿Ndiyai vo cohava che ãpiramomi tõi eve viña? —ehi.

<sup>37</sup>Ahese omboyeve chupe:

—Eeroya itese opacatu nde piha pipe, iya ité ndeu —ehi.

—Aroya ité niha Jesucristo ahe Tüpa Rahir secoi —ehi.

<sup>38</sup>Evocoiyase omombita uca ocãreto, ichui ogüeyi ive yuviraso. Aheve Etiopía pendar Felipe õñapiramo. <sup>39</sup>Yuvinosese i sui, yande Yar Espiritu viraso ahe Etiopía pendar sui. Ahese ndosepia iri; ĕgüe ehiño vorivete oso perĩ rupi. <sup>40</sup>Felipe rumo oyemboyecua Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. Ĕgüe ehi oyepota Cesarea ve oso.

### Saulo ñecuñaro agüer

**9** Jerusalén ve rumo Saulo õñemoiró iteanga vite yande Yar reroyasar upe

oico. Oyucapa potaño ité. Sese oso pahi rerecuar ivate catu vahe upe, <sup>2</sup>oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer Piasu rupi cuimbahe, cuña yuvirecoi vahe” ehi. “Taipisipa seru cohava nde rer pipe” ehi, “evocoiyase eremobehura cuachiar pipe Damasco pendar tûparo rerecuar upe” ehi pahi rerecuar ivate catu vahe upe. <sup>3</sup>Ĕgüe ehi yuvinosese Jerusalén sui, yuviraso Damasco ve ambuae ava reseve. Virovi potase rumo Damasco yuviraso, aviyeteramo tõi osesape guasu iva sui chupe. <sup>4</sup>Evocoiyase oviapi oso ivive. Osendu iva pendar ñehesa aipo ehi vahe: “Saulo, Saulo, ¿mahera vo che moña-moña eve?” ehi chupe.

<sup>5</sup>Evocoiyase oporandu chupe: “¿Ava vo nde ereico, nde mbia?” ehi. “Che Jesús, che niha co che moña che rereco eve” ehi chupe. <sup>6</sup>“Epüha, eique Damasco ve. Aheve amombehu ucara mbahe nde rembiapoguã ndeu” ehi chupe.

<sup>7</sup>Ava rumo, yuviraso vahe supi, osiquiyé iteanga osenduse ñehesa iva suindar yuvireco. Esepia, ndosepiai eté ivate nõnehe vahe yuvireco. <sup>8</sup>Ipare Saulo opüha, omahe tõi; ndoicatu rumo mbahe repia. Ichui supindar oipisi iyiva rese seraso Damasco ve yuvireco. <sup>9</sup>Aheve mbosapĩ ari ndasesapisoi, ndocarui, ndoihui avei oico.

<sup>10</sup>Aheve mbia Jesucristo reroyasar Ananías serer vahe secoi. Ahe iquer nungarve oyemboyecua yande Yar aipo ehi chupe: “¡Ananías!” ehi. “Co aico, che Yar” ehi imboyeve chupe.

<sup>11</sup>Evocoiyase yande Yar aipo ehi chupe: “Epüha, eso calle Ihĩvi serer vahe rupi. Eporandu Judas rõtave Saulo, tecua Tarso pendar, rese. Ahe oyeruqui cüritei. <sup>12</sup>Oquerve angahu osepia mbia Ananías serer vahe omondose opo iharive omboesapiso iri” ehi.

<sup>13</sup> Evocoyase omboyeve chupe: “¡Too! Che Yar, setá rumo evocoi mbia recocuer omombehu yuvireco cheu. Mbahe tēi oyapo vahe nde reroysar reco maranehi upe Jerusalén ve. <sup>14</sup> Cūrítei ou rutei ahe mbia pahi rerecuar porocuaíta rupi opacatu nde rer rese oyeroya vahe roquendapa água” ehi.

<sup>15</sup> Yande Yar rumo aipo ehi chupe: “Eso. Esepia, aiporavo evocoi mbia che recocuer rese oñehe vaheṛá ava ndahei vahe judío upe iyavei serecuar guasu yuvirecoi vahe upe, judío upe avei. <sup>16</sup> Che ae amboyecua setá mbahe tēi chupe oiporara vaheṛá che remimbotar mboaviye água” ehi yande Yar chupe.

<sup>17</sup> Evocoyase oso secosave. Oiquese ahe oi pipe, oso, omondo opo Saulo rese aipo ehi chupe:

—Che rivri, Saulo, yande Yar Jesús oyemboyecua vahe ndeu peri rupi nde yuse, ahe che mbou ndeu nde mboesapiso iri água. Toique avei catu Espiritu Santo nde rese —ehi Saulo upe.

<sup>18</sup> Ahese voi eté pira pírer nungar mbahe oviapipa sesa sui. Ahese voi sesapiso iri. Ichui opūha. Ipare voi Ananías oñapiramo. <sup>19</sup> Ipare Saulo ocaruse, ipírata catu iri. Moviro ari tēi opíta iri Jesús reroysar píri Damasco ve.

### **Saulo omombehu Jesús recocuer Damasco ve**

<sup>20</sup> Ipare voi oso oñehe judío tūparo yacatu rupi Damasco ve aipo ehi: “Jesús Tūpa Rahir ité secoi” ehi ahe pendar ava upe. <sup>21</sup> Ava opacatu osendu vahe ñehe,

—¿Mara ehi pīha co? —ehi tēi yuvireco—. ¿Ndahei vo acoi co mbia Jerusalén ve Jesús reroysar mara-mara tēi vireco vahe? ¿Ndahei vo acoi co avei ou cohava ava Jesús reroysar ha pendar písi água serasopa água avei Jerusalén ve pahi rerecuar upe viña? —ehi yuvireco chupe.

<sup>22</sup> Saulo rumo omombehu tupri catu Jesús recocuer. Osecopi opacatu omu Damasco pendar. Omboyecua catu chupe Jesús Tūpa Rembiporavo ava písiro água secosa. Sese ndoicatu judío ñehe mboyeve yuvireco.

### **Saulo oñemi omu sui oamotarēhise**

<sup>23</sup> Setá ari pare judío ahe pendar omboguai yuca água Saulo yuvireco viña. <sup>24</sup> Ahe rumo oyandu omboguaisa judío osārose tecua áchisa roquendipive ari, pītu momba yuvireco yuca água viña. <sup>25</sup> Jesús reroysar rumo pītu pipe tecua tapia áchisa oyere tupri vahe tecua rese, icupe rupi ombogüeyi iruova guasu pipe imoñemi imondo yuvireco.

### **Saulo Jerusalén ve secoi**

<sup>26</sup> Coiye Saulo oyepota Jerusalén ve. Aheve oyemboya pota tēi Jesucristo reroysar rese. Osiquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tupri tēira yandeu” ehiño oyeupe yuvireco. <sup>27</sup> Ipare rumo Bernabé viraso Saulo apóstol yuvirecoi vahe upe. Aheve Bernabé omombehupa chupe aipo ehi: “Co mbia Saulo osiepia yande Yar peri rupi iyavei yande Yar oñehe chupe. Ichui co oñehe osiquiyeēhisa pipe Damasco ve Jesús recocuer rese” ehi. <sup>28</sup> Evocoyase Saulo opíta aheve ipiri. Ari yacatu rupi apóstol rupi oguata yepi, iyavei omombehu yande Yar recocuer osiquiyeēhisave. <sup>29</sup> Oñehepoepi avei secocuer rese judío griego pipe oñehe vahe yuvireco. Ichui rumo oyuca potaño yuvireco. <sup>30</sup> Oicuaese rumo Jesucristo reroysar yuvireco, viraso voi eté Saulo Cesarea ve. Ichui omondo Tarso ve yuvireco.

<sup>31</sup> Evocoyase opacatu Jesús reroysar yuvirecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemoviracua tupri catu yuvireco yande Yar mboeteisa

pipe, Espiritu Santo oip̄itivii iyemboeta catu āgua yuvireco.

### Eneas mbogüera agüer

<sup>32</sup> Pedro oguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar. <sup>33</sup> Aheve osepia mbia Eneas serer vahe, ahe ndoguatai vahe. Vupave tēi tui vahe ocho araviter rupi. <sup>34</sup> Pedro aipo ehi chupe:

—Eneas, Jesucristo nde mbogüera — ehi—. Eñarapuha, emoingatu nde rupa —ehi chupe.

Eneas evocoyase oñarapuha voi.

<sup>35</sup> Osepia opacatu Lida pendar, Sarón pendar co ndoguatai vahecuer guatase, viroyapa voi eté yande Yar yuvireco.

### Dorcas cuerayevi agüer

<sup>36</sup> Ahe araviter pipe Jope ve cuña Tabita serer vahe secoi, griego ñehe pipe rumo Dorcas serer. Ahe Jesucristo reroyasar secoi. Ahe secocuer aviye vahe oporop̄itivii yepi. <sup>37</sup> Imbaheasi guasu rumo. Coiye omano. Ipare ava sehögüer oyosei yuvireco. Ichui viroyeupi oi ivate vahesave seraso yuvireco. <sup>38</sup> Jope namombriimi Lida sui. Evocoyase oyanduse Jesús reroyasar Jope pendar Pedro Lida ve secoise, ahese omondo ñuvirío mbia seru poyava āgua Jope ve yuvireco.

<sup>39</sup> Evocoyase Pedro oso supi yuvireco oyepota yuviraso Jope ve. Aheve viroyeupi oi ivateve seraso tehögüersave yuvireco. Opacatu cuña imer mano vahecuer oyere ati voi, oyaseho Pedro ivii yuvireco. Omboyecua avei oturucuar ihari pendar reseve Dorcas rembiapogüer yuvireco chupe. <sup>40</sup> Ipare Pedro omosepa rane opacatu ava ocarve. Ahese ahe ae oñenopiha, oyerure Tüpa upe. Ichui omaha ahe cuña omano vahe rese aipo ehi chupe:

—¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oĩ. <sup>41</sup> Ahese oip̄isi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuerayevi” ehi chupe. <sup>42</sup> Serācua oyanduse opacatu Jope rupi yuvireco, setá ava yande Yar viroya yuvireco. <sup>43</sup> Evocoyase Pedro opita setá ari aheve, mbia mbahe pিরer mopitasar, Simón serer vahe, piri.

### Pedro iyavei Cornelio

**10** Tecua Cesarea ve mbia Cornelio serer vahe secoi, ahe cuartel Italiano serer vahe pendar cien sundao rerecuar. <sup>2</sup> Ahe mbia omboetei Tüpa opacatu guahir, güembireco reseve yepi. Iyavei omondoño ité judío p̄itivii āgua guarepochi, oyeroqui avei Tüpa upe yepi. <sup>3</sup> Ñepe ari, caharuse las tres rupi, osepia oquer nungar pipe Tüpa rembiguai güecosave aipo ehi chupe: “¡Cornelio!” ehi. <sup>4</sup> Omahengatuse sese, “¿Mbahe, che Yar?” ehi osiquiyepave. Tüpa rembiguai rumo omboyevi chupe: “Tüpa oip̄isi nde yeruresa; osepia avei nde poroparaisuerecosa” ehi chupe. <sup>5</sup> “Emondo mbia Jope ve Simón reca. Ahe serer avei acoi Pedro. <sup>6</sup> Ahe secoi ambuae Simón, mbahe pিরer mopitasar piri. Ahe sēta para guasu popive chini” ehi chupe.

<sup>7</sup> Orose Tüpa rembiguai ichui, Cornelio oñehe ñuvirío güembiguai upe iyavei ñepe sundao Tüpa mboeteisar upe, sese acoi oyeroya vahe yepi. <sup>8</sup> Opacatu Tüpa rembiguai ñehe mombehu pare, omondo Jope ve.

<sup>9</sup> Ahere ayihive virovise Jope yuviraso, Pedro oyepi oi ipe vahe harive mbiter ari senise oyeroqui āgua. <sup>10</sup> Vieporēhise ocaru pota viña. Omoingatu viteseve rumo semihura yuvireco, aviyyeteramo tēi osepia mbahe

oquer pendar nungar: <sup>11</sup> ahesa osepia iva oyemboise, ahe ichui turucuar tuvicha vahe pipe ogüeyi mbahe, ñapichimbri ipopi yacatu ou chupe. <sup>12</sup> Ahe turucuar pipe, osepia opacatu mahembiar vai, mboi, vîrai vai tēi avei. <sup>13</sup> Ahesa osendu ñehesa aipo ehi vahe: “Pedro, epûha, eyuca, ichui ehu” ehi chupe.

<sup>14</sup> Pedro rumo omboyevi chupe: “Aní, che Yar, che rumo ndahui vahe ité co mbahe roho ava remimbotarēhi ndihusai vahe yepi” ehi chupe. <sup>15</sup> Osendu iri ñehesa aipo ehi vahe chupe: “Tûpa remimbocatupri upe, ‘Ava remimbotarēhi, ndihusai vahe’ nderei chira” ehi.

<sup>16</sup> Ēgüe ehi mbosapi oyupagüer rupi chupe. Ipare turucuar oyevi ivave oso. <sup>17</sup> Pedro ipihañemoñeta vitesese mbahe osepia vahecuer rese oquer nungar pipe: “¿Mbahe rese pîha co oyemboyecua cheu?” ehi vite oico. Aheseve Cornelio remimondo oporandu-randu pare yuvireco, oyepota Simón rêta roquendipive yuvireco. <sup>18</sup> Oñehe pucu oi pipendar upe yuvinoha: “¿Ave vo Simón, ahe Pedro serer vahe, secoi?” ehi yuvireco.

<sup>19</sup> Ipihañemoñeta vitesese Pedro mbahe oyemboyecua vahecuer rese, Espíritu Santo aipo ehi chupe: “Pedro, esendu rane, pe mbosapi mbia nde reca yuvireco. <sup>20</sup> Eyemoingatu, egüeyi chupe, eso supi. ‘¿Asora pîha?’ erei rene. Esepia, che ambou evocoi mbia nde reca” ehi Espíritu Santo Pedro upe.

<sup>21</sup> Evocoiyase ogüeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

<sup>22</sup> Ahe evocoiyase omboyevi ñehese yuvireco chupe:

—Ore oroyu sundao rereciar Cornelio ore cuaisa pipe, ahe mbia seco ñivi vahe, Tûpa mboeteisar opacatu judío osaisu, oipota rai yuvireco. Tûpa rembiguai oyocuai nde rese ereso vaherã sē-

tave, ahe osendu vaherã nde ñehesa —ehi yuvireco Pedro upe.

<sup>23</sup> Evocoiyase omoinguepa, omombitapa oyepiri ñepepi pîtu. Ahere ayihive oso supi, moviro Jesús reroyasar Jope pendar yuviraso avei supi Cesarea ve yuvireco.

<sup>24</sup> Ahere ayihive oyepotase Cesarea ve, yuviraso sêtave. Cornelio rumo osâro opacatu omu eta rese yuvireco iyavei omboriparete güembisoho reseve avei. <sup>25</sup> Oyepotase sêtave oso, Cornelio rane osē voi, osovaïchi, oñenopiha sovai imboeteisa pipe. <sup>26</sup> Pedro rumo aipo ehi chupe:

—Epûha, che niha nde nungar avei aico —ehi chupe.

<sup>27</sup> Evocoiyase ahe omoñeta seroique seraso oi pipe. Aheve ava oñemonuha vahe setá osepia yuvireco. <sup>28</sup> Ahe ava upe aipo ehi:

—Pe peicua judío porocuita aipo ehi vahe: “Peiquei rene ndahei vahe judío piri. Aní chaveira pembori evocoi ava peico” ehi acoi —ehi Cornelio rêta pipendar upe—. Tûpa rumo omombehu cheu che quer nungar pipe: “Ava remimbotarēhi peico’ erei rene ambuae ava upe” ehi cheu. <sup>29</sup> Pe pemondo ava che reca. Che evocoiyase nacheatēhii che yu água pëu. Sese che aicua pota, ¿mahera vo che reru uca peye? —ehi.

<sup>30</sup> Evocoiyase Cornelio aipo ehi chupe:

—Opa co irungatu ari, caharuse co hora rupi tupri avei, che cohave che rêtave aicose, ndacarui eté che yerure água Tûpa upe. Aheseve oyemboyecua mbia Tûpa rembiguai iturucuar rendí iteanga vahe cheu. <sup>31</sup> Ahe aipo ehi cheu: “Cornelio, Tûpa osendu nde yeruresa iyavei oicua avei nde poroparaisuerecosa. <sup>32</sup> Emondo nde rembiguai Jope ve Simón Pedro serer vahe reca. Ahe oicove ambuae Simón rêtave, ahe mbahe pিরer mopitasar. Ahe sêta para guasu popive

chini” ehi cheu. <sup>33</sup>Sese amondo voi eté nde reca água. Aviye nde ereyu cohave. Cūrítei co opacatu yaico cohave Tūpa rovaque. Orosendu pota opacatu nde ñehe yande Yar nde cuai vahe nde ñehe água oreu —ehi Cornelio chupe.

### Pedro oñehe Cornelio rêtave

<sup>34</sup> Evocoyase Pedro aipo ehi chupe:

—Aicua cute, supi eté Tūpa nombayahoi yande raisu. <sup>35</sup> Sese ambuae ivi pīpendar omboetei vahe Tūpa, oyapo vahe avei mbahe tupri yuvireco, ahe oipisira Tūpa. <sup>36</sup> Aracahe Tūpa oñehe avei Israel suindar upe, omombehu ñehesa tupri yeamotarēhiēhisa resendar Jesucristo rembiaporã sui, ahe opacatu ava co ivi pīpendar yuvirecoi vahe Yar. <sup>37</sup> Pe peicua tupri ité co mbahe oime vahe opacatu judío ivi rupi. Ahe omboipi Galilea ve Juan ñeapiramosa mombehu pare. <sup>38</sup> Peicua revo Tūpa omondo Jesús Nazaret pendar upe opīratasa, oEspíritu Santo avei. Ipare Jesús oguata opacatu rupi mbahe tupri apo oico. Ombogüera avei opacatu ava iparaisu vahe caruguar povrive yuvirecoi vahe. Esepia, Tūpa secói sese. <sup>39</sup> Ore orosepia opacatu Jesús rembiapogüer Judea ivi rupi, tecua Jerusalén pipe avei. Aheve imu oyatica uca curusu rese yuca yuvireco. <sup>40</sup> Tūpa rumo ombogüerayevi imombosapisa ari pipe. Ipare omboyecua iri oreu. <sup>41</sup> Nomboyecuai rumo opacatu ava upe, omboyecua ore sembiporavo oroico vahe upeñomi. Ore piri niha ocaru, oiñu avei ocuerayevi pare. <sup>42</sup> Iyavei ahe ore cuai: “Pemombehu ava upe. Co che Jesucristo, Tūpa Rembiporavo, aico opacatu ava recocuer rese porandu água oicove vite vahe, omano vahe avei” ehi oreu. <sup>43</sup> Ahe secocuer avei opacatu Tūpa ñehe mombehusar omombehu yuvireco aracahe aipo ehi: “Opacatu acoi seroyasar, ahe virecora Tūpa ñeroisa serer pipe an-

gaipa rese yuvireco” ehi —ehi Pedro Cornelio rēta pipe yuvinoi vahe upe.

### Espíritu Santo oique avandahei vahe judío pīha pipe

<sup>44</sup> Pedro oñehe viteseve, Espiritu Santo ogüeyi opacatu ava osendu vahe rese. <sup>45</sup> “¡Too! Evocoyase ndahei vahe judío upe avei Tūpa omondo Espiritu Santo inungar ombou yandeu” ehi Jesús reroyasar judío yuvirecoi vahe Pedro rupi yugüeru vahe yuvireco. <sup>46</sup> Esepia, osendu ahe oñehese ñehesa ndicuasai vahe pipe yuvireco Tūpa upe. <sup>47</sup> Evocoyase aipo ehi vupindar upe:

—¿Oime pīha ndoipotai vahe co ava ñeapiramo água yande pāhu pendar? Esepia, co oipisi Espiritu Santo yuvireco inungar yande —ehi vupindar upe.

<sup>48</sup> Sese,

—Yañapiramopa Jesucristo rer pipe yuvireco —ehi.

Ipare Cornelio rēta pipe yuvinoi vahe aipo ehi: “Epita vitemi moviro ari ore piri” ehi yuvireco chupe.

### Pedro remimombehu Jerusalén pendar Jesús reroyasar upe

**11** Evocoyase ambuae apóstol iyavei Jesús reroyasar Judea ve yuvirecoi vahe oyandu yuvireco avandahei vahe judío viroya avei Tūpa Ñhengagüer yuvireco. <sup>2</sup> Oyevise rumo Pedro Jerusalén ve oso, ahese setá judío Jesucristo reroyasar viroñero sovai eté yuvireco, <sup>3</sup> aipo ehi:

—¡Mahera eresño tēi eté ndahei vahe judío piri! Iyavei nde erecaruño tēi eté ipāhuve yuvireco no —ehi yuvireco chupe.

<sup>4</sup> Pedro rumo omombehu tupri yipi-sui opacatu mbahe güembiepia yuvireco chupe aipo ehi:

<sup>5</sup> —Che, tecua Jope ve aicose, ayerure. Ahese che quer nungarve asepia turucuar tuvicha vahe nungar ipopi ya-

catu ñapichisa vahe ogüeyi ou che rovai iva sui. <sup>6</sup>Asepia ipipe opacatu mahembiar ihupirêhi, mbahe mimba, mboi, vîrai vai têi avei —ehi—. <sup>7</sup>Iyavei ahese asendu ñehesa aipo ehi cheu: “Pedro, epûha, eyuca, ehu” ehi cheu. <sup>8</sup>Che rumo aipo ahe chupe: “Aní, che Yar, che rumo ndahui vahe ité co mbahe roho ava remimbotarêhi yepi” ahe chupe. <sup>9</sup>Ichui asendu iri ñehesa: “Tûpa remimbotapuri upe, ‘Ava remimbotarêhi’ erei rene” ehi cheu. <sup>10</sup>Ëgüe ehi mbosapi oyupagüer rupi cheu. Ipare opacatu oyevi iri ivave oso. <sup>11</sup>Aheseve avei mbosapi mbia imboupri Cesarea sui oyepota yuvireco che recosave che reca. <sup>12</sup>Espíritu Santo che cuai che so água che atêhiêhisa pipe supi yuvireco. Co seis mbia Tûpa reroyasar, yande mu, yuviraso avei che rupi. Ipare aheve oryepotase oroso, oroi que Cornelio rêtave. <sup>13</sup>Ahe omombehu oreu osepia vahecuer güetave Tûpa rembiguai oyemboyecua vahe sovai iyavei aipo ehi vahe chupe: “Emondo mbia tecua Jope ve Simón Pedro reru água. <sup>14</sup>Ahe omombehura ndeu nde ñepisiro água iyavei opacatu nde rêta pendar ñepisiro água avei” ehi Tûpa rembiguai Cornelio upe —ehi—. <sup>15</sup>Añehe ramoseve chupe, Espíritu Santo ou sese yuvireco inungar yande rese ou aracaco. <sup>16</sup>Evocoyase che chemahenduha voi eté yande Yar ñehengagüer rese aipo ehi vahecuer: “Supi eté i pipe Juan oporoãpiramo, pe rumo Espíritu Santo pipe peñeapiramora” ehi vahe. <sup>17</sup>Tûpa Espíritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Tûpa ayamotarêhira —ehi Pedro omu upe.

<sup>18</sup>Osenduse rumo co Pedro ñehe, imu noñehe iri sese yuvireco. Ahe rumo,

—¡Too, evocoyase Tûpa ombou avei ndahei vahe judío upe secocuer recuñaro

água, tecovesa apirêhi vahe rereco água! —ehi Tûpa mboeteisa pipe yuvireco.

### Ava Jesús reroyasar Antioquía ve

<sup>19</sup>Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotarêhimbar oyamotarêhi catu yuvireco. Evocoyase amove Jesús reroyasar yuviraso oñemi Fenicia ve, ambuae Chipre ve, ambuae Antioquía ve. Oguatasa rupi omombehuño ité judío upe güeraño Jesús recocuer yuvireco. <sup>20</sup>Amove oñemosai vahe Chipre pendar iyavei Cirene pendar oyepota tecua Antioquía ve yuvireco. Omombehu rumo ndahei vahe judío upe avei ñehesa aviye vahe yande Yar Jesús recocuer resendar yuvireco. <sup>21</sup>Yande Yar pîratasa vireco yuvireco. Evocoyase setá ava viroya; oseya ité yipîndar güembieroya yuvireco yande Yar reroya água.

<sup>22</sup>Serâcua oyepotase Jesús reroyasar upe Jerusalén ve, ahese omondo Bernabé yuvireco Antioquía ve. <sup>23</sup>Oyepotase aheve, osepia Tûpa sovasase. Ahese sorivete aipo ehi chupe: “Peyemoviracua catu yande Yar rese. Peyapo semimbotar opacatu pe piha pipe” ehi chupe yuvireco. <sup>24</sup>Bernabé aviye etepri vahe, viroya ité Espíritu Santo iyavei oyeroya ité yande Yar rese. Evocoyase setá ava oyemboya yande Yar rese yuvireco.

<sup>25</sup>Ipare oso Tarso ve Saulo reca. <sup>26</sup>Oyosuse, güeru Antioquía ve. Aheve oyemboya yuvireco ambuae viroya vahe rese imbohe água ñepe araviter rupi. Setá ava oyembohe ipiri yuvireco. Ahese Jesús reroyasar Antioquía pendar upe yipîndar, “Cristo reroyasar” ehi yuvireco.

<sup>27</sup>Aheseve Tûpa ñehe mombehusar yugüeru Antioquía ve Jerusalén sui.

<sup>28</sup>Ñepe ipâhu pendar, Agabo serer vahe, opûha aipo ehi Espíritu Santo pîratasa pipe chupe: “Oura tiavor guasu



opacatu ivi rupi” ehi, (ahe tiavor oye-pota mborerecuar guasu Claudio re-cose). <sup>29</sup> Evocoyase Jesús reroyasar Antioquía pendar omondo pota voi guare-pochi Jesús reroyasar Judea pendar pítivii água yuvireco ocatugüer rupi. <sup>30</sup> Ègüe ehi yande Yar reroyasar rārosar Judea pendar upe porerecosa mondo. Bernabé, Saulo ahe porerecosa viraso yuvireco.

### Santiago mano agüer iyavei Pedro roquenda agüer

**12** Ahe araviter pipe avei mborerecuar guasu Herodes omboipi Jesús reroyasar mombaraisu. <sup>2</sup> Ahese oyuca uca quise pucu pipe Santiago, ahe Juan riqehir. <sup>3</sup> Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi. <sup>4</sup> Pedro roquenda pare omondo irungatu imar sui irungatu-ngatu sundao omondo sāro água yuvireco. Mborerecuar ipihañemoñeta: “Opase co Pascua pieta, amboyecua ucara ava rovaque” ehi viña. <sup>5</sup> Evocoyase Pedro opita voquendasave sārombri tupri chini. Jesús reroyasar rumo oyeroqui pīrata Tūpa upe yuvireco sese.

### Tūpa omose uca Pedro soquendasa sui

<sup>6</sup> Ahe ari vinose potase Herodes Pedro soquendasa sui, ahe pītu pipe Pedro oque ñuvirío sundao guārosar rese. Ñapichisa ñuvirío carena pipe ou, ñuvinohambe avei sārosar soquendasa roquendipive. <sup>7</sup> Aviyeteramo tēi Tūpa rembiguai oyemboyecua ique viteseve chupe. Ahese sendi guasú iteanga soquendasa pipe. Ahe oñatoi Pedro iqueve imomahe: “¡Epūha poyava!” ehi chupe. Ipūhase, opa voi oyera carena ipo sui. <sup>8</sup> Ahese Tūpa rembiguai aipo ehi chupe:

“Eyemonde, emonde nde pitaqui” ehi. Evocoyase Pedro omonde. Ipare aipo ehi iri: “Emonde avei nde yeasa, eyu che raquicuei” ehi chupe.

<sup>9</sup> Ègüe ehi oso saquicuei. Ahe rumo ndoicuai Tūpa rembiguai oyeupe ègüe ehise. Ndoyavii iquerve tēi ègüe ehi vahe chupe. <sup>10</sup> Ichui yuvinose, oñocua yipindar guārosar yuvireco. Ipare yuviraso catumi ambuae imoñuviriosa guārosar oñocua avei. Oyepota oquenda guasu guarepochi apoprive ocarve yuvinose água yuvireco. Ahe oquenda oyemboi ahe ae ité chupe yuvireco. Ipare yuvinose yuviraso pucumi ocarusu rupi. Aviyeteramo tēi Tūpa rembiguai ndoyecua iri chupe.

<sup>11</sup> Evocoyase Pedro aipo ehi oyeupe: “¡Too! Supi eté Tūpa ombou cheu güembiguai che renose água Herodes povri sui. Tūpa che pīsiro judío rerecuar che yuca rāgüer sui” ehi oyeupe.

<sup>12</sup> Oyese opihañemoñeta pare, oso, oyepota Juan Marcos si María rētave oso. Aheve setá ava oñemonuha oyeroqui yuvireco sese. <sup>13</sup> Oñehese Pedro oquenda ocar cotindarve, cuñatai, Rode serer vahe, osē imboi água chupe. <sup>14</sup> Osenduse rumo Pedro ñehe, oquenda omboi rāgüer sui, oña oique oi pipe vorivetesave, omombehu: “Pe Pedro ihāi oquendipive” ehi oi pipendar upe. <sup>15</sup> Ahe rumo,

—¿Nanderocoi vo eico? —ehiño yuvireco chupe. “¡Aní! Supi eté” ehiño Rode chupe.

—Ndahei ahe, Tūpa rembiguai mo aipo sārosar —ehiño yuvireco chupe.

<sup>16</sup> Aheseve Pedro oñehe viteño ité oquendipive ohā. Ichui omboise oquenda yuvireco chupe cute, oyembosiquiye iriño tēi sepiase yuvireco. <sup>17</sup> Pedro rumo opo omopuha imonguiriri água. Ichui opa omombehu yande Yar opīsiro agüer voquendasa sui chupe yuvireco. Ipare aipo ehi chupe:

—Pemombehupa Santiago upe iyavei ambuae Jesús reroyasar upe —ehi.

Ichui oseño, ambuaeve oso.

<sup>18</sup>Cōhese sundao oyepihamondii eteanga yuvireco. “¿Que pīha Pedro?” ehi tēi oyeupe yuvireco. <sup>19</sup>Ipare Herodes omondo sundao Pedro reca. Ndosyoi eté rumo yuvireco. Evocoiyase Herodes porocuita rupi oporandu tupri sārosar upe: “¿Que vo secoi?” ehi tēi chupe. Sese oyocuai ambuae sundao opacatu ahe sārosar yucapa āgua. Ipare Herodes osē Judea sui oso Cesarea ve oyemboerecua.

### Herodes mano agüer

<sup>20</sup>Yipindar rumo Herodes ndasorii eté ava Tiro pendar upe, Sidón pendar upe avei. Evocoiyase ahe pendar oyoya ipihañemoñeta yuviraso vaheṛā mborerecuar rovai. Ahe evocoiyase oyembori Blasto rese yuvireco, ahe mborerecuar Herodes mboyoyasar. Ahe oporandu Blasto upe Herodes moñero uca āgua rese yuvireco. Esepia, Herodes porocuita sui oipisi mbahe güemihura yuvireco. <sup>21</sup>Herodes evocoiyase omombehu ari oñehe vaheṛā chupe. Osupitise ahe ari, omonde sese iturucuar mborerecuar secosa resendar yivirindar yuvireco. Ipare güenda imboeteipri harive oguapi oī. Aheve oñehe ava rehii upe. <sup>22</sup>Evocoiyase ava rehii osapucaī pīrata yuvireco aipo ehi: “¡Co mbia oñehe vahe ndahei ava tēi, Tūpa ité!” ehi yuvireco Herodes upe imboeteisave. <sup>23</sup>Ava aipo iheseve voi, ñepeī Tūpa rembiguai oyapo mbaherasi guasu chupe. Ichui mbahe rasoi ocaru yaviter rupi yuvireco. Esepia, nomboteī eté Tūpa. Sese omano.

<sup>24</sup>Tūpa Ñehengagüer rumo imombehusa catu opacatu rupi.

<sup>25</sup>Iyavei Bernabé, Saulo ocuaita mboaviye pare, viroyevi Juan Marcos seraso yuvireco.

### Tūpa oiporavo Bernabé, Saulo oyeupe mboraviqui apo āgua

**13** Evocoiyase Jesús reroyasar Antioquía pendar pāhuve oime Tūpa Ñehengagüer mombehusar, sese oporombohe vahe avei. Ahe Bernabé, Simón (chupe, “Avaü” ehi yuvireco), Lucio evocoi Cirene pendar, Manaén (ahe mbia oyoya ocuaita mborerecuar Herodes, Galilea pendar reseve) iyavei Saulo. <sup>2</sup>Ñepeī ari opacatu Jesús reroyasar oñemonuhase yande Yar mboeteī āgua, oyecuaçu avei, ahese Espiritu Santo aipo ehi chupe: “Peiporavo Bernabé iyavei Saulo. Evocoi mbia aiporavo cheyeupe mboraviqui apo āgua” ehi Espiritu Santo yuvireco chupe.

<sup>3</sup>Evocoiyase oyeroqui pare, omondo opo yuvireco iporavopri āca harive sovasa āgua. Ipare omondo yuvireco ambuae tecua rupi Jesús recocuer mombehu āgua.

### Apóstol yuvirecoi Chipre rupi

<sup>4</sup>Evocoiyase Bernabé, Saulo Espiritu Santo remimondo yuviraso Seleucia ve. Ichui yuviraso carite pipe caha pāhu Chipre ve. <sup>5</sup>Oyepota yemboyasa Salamina ve yuviraso. Aheve omombehu Tūpa Ñehengagüer judío tūparo rupi yuvireco. Juan avei oso supi ipitívii āgua.

<sup>6</sup>Opase ité oguata caha pāhu Chipre pipe yuvireco, oyepota ambuae tecua Pafos serer vahesave yuviraso. Aheve judío ipaye vahe Barjesús serer vahe osepia yuvireco. Ahe oporombohe tēi: “Che añehe Tūpa Ñehengagüer rese” ehi tupri tēi vahe. <sup>7</sup>Ahe ipaye vahe oicove Chipre pendar mborerecuar Sergio Paulo serer vahe piri, ahe mborerecuar yaracua vahe. Ahe güeru uca Bernabé, Saulo avei Tūpa Ñehengagüer rendu potasave oyeupe. <sup>8</sup>Ipaye vahe rer griego ñehe pipe Elimas. Ahe ndoviroya

ucaí güerecuar upe ñehesa supi eté vahe. <sup>9</sup>Evocoiyase Saulo, Pablo serer vahe, víreco ité vahe Espíritu Santo opiha pipe, omahe tupri sese. <sup>10</sup>Ipare aipo ehi chupe:

—¡Nde iporombopa serai vahe ereico! ¡Ndiipihai vahe, Carugar rahir tēi ereico! Opacatu mbahe aviye vahe amotarēhisar tēi avei ereico no. ¡Mahera nderepoi potai yande Yar porombohesa supi eté vahe reroirosa sui. <sup>11</sup>Eyapisaca, cūrítei yande Yar nde mombaraísura. Nande mboesapisoi chira moviro ari rupi. Ichui ndereicatu iri chietera ari rendigüer repia água —ehi Pablo chupe.

Aipo ehi ramoseve voi, opacatu pītumimbi chupe. Oñehe tēi ava güeraso água upe. <sup>12</sup>Ahe mbahe repiase, mborecuar viroya yande Yar. Oyepihamondii porombohesa yande Yar re-sendar renduse.

### **Pablo, Bernabé reseve yuvirecoi Antioquía ve Pisidia ivi pipe**

<sup>13</sup>Evocoiyase Pablo, supindar avei, yuvirasó carite pipe Pafos sui Panfilia rupindar Perge ve. Juan rumo oseya oyevei Jerusalén ve oso. <sup>14</sup>Perge sui yuvirasó Antioquía ve, ahe namombrii Pisidia sui. Aheve, mbituhusa ari pipe, yuviroique judío tūparove oguapí yuvinoi. <sup>15</sup>Oyeroquí pare Tūpa porocuita resendar cuachiar pipe, Tūpa ñehe mombehusar cuachiar pipe avei, tūparo pendar rerecuar omondo oñehe Pablo upe:

—Ore mu, perecese mbahe pemombehu vaheṙã co ava monguerēhi água, pemombehumi yandeu cūrítei —ehi.

<sup>16</sup>Evocoiyase Pablo opūha ohã. Omopuha avei opo ‘toyapisaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tūpa mboeteisar, psendu che ñehe —ehi—. <sup>17</sup>Israel iguar

Tūpa oiporavo yande ramoí oyeupe nara, ahe Egipto ivi pipe omboeta se-cua ambuae vahe secosa pipe. Ipare opīratasa pipe vinosepa ahe ivi sui arac-ahe. <sup>18</sup>Ipare Tūpa oñemosañó yande ramoí reco ai upe cuarenta araviter rupi, oguatase yuvireco ivi iporupirēhisa rupi. <sup>19</sup>Ipare omocañi ava eta Canaán pipen-dar siete tupri yuvirecoi vahe serecuar reseve-seve. Ipare omondo Canaán ivi yande ramoí upe nara. <sup>20</sup>Ēgüe ehi cua-trocientos cincuenta araviter rupi yapo yuvireco —ehi.

“Ipare Tūpa ombou ava recocuer moingatusar oporocuai vaheṙã. Ipa vahe ipāhu pendar serer Samuel aracahe. Ahe Tūpa ñehe mombehusar avei. <sup>21</sup>Ahese yande ramoí eta oporandu yuvireco Tūpa upe mborerecuar guasu rese. Evocoiyase Tūpa omondo Saúl chupe, ahe Cis rahir, ahe yande ramoí Benjamín suindar secói. Oporocuai cuarenta araviter rupi oico. <sup>22</sup>Ipare Tūpa virocua imborerecuasa ichui; omondo David upe yande ramoí cuai água. Ahe secocuer rese aipo ehi: ‘Co David, Isái rahir, oyapo che remimbotar yepi. Ahe omboaviyera che porocuita’ ehi Tūpa. <sup>23</sup>Ahe David suindar sui, Tūpa ombou Jesús Israel iguar pīsiro água. Aracaheve Tūpa omombehu co yande ramoí upe. <sup>24</sup>Yande Yar yu renondeve, Juan omombehu opacatu Israel iguar upe: ‘Pemboasi pe angaípa, peyevi Tūpa upe pe ñeapiramo água’ ehi chupe. <sup>25</sup>Juan omboaviye senimise ocuita, aipo ehi ava upe imombehu: ‘Pepihañemoñeta revo: co ité yande pīsirora, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipitaquisã yora água ipi sui’ ehi Juan” ehi judío tūparo pendar upe imombehu.

<sup>26</sup>“Che mu eta, pe Abraham suindar iyavei ndahei vahe Abraham suindar Tūpa mboeteisar, opacatu yandeu

nara ombou Tūpa co ñehesa pĩsirosa resendar. <sup>27</sup>Jerusalén pendar rerecuar avei ndoicuai evocoi Jesús Tūpa remimbou secoise yuvireco. Iyavei ndosenducuai Tūpa ñehe mombehúsar cuachiar pipe oyerouise mbituhusa ari yacatu yuvireco. Ichui ahe ae oyuca uca yuvireco. Ēgüe ehi imboaviye Jesús rese Tūpa ñehe mombehúsar rembicuachiagüer pipendar yuvireco. <sup>28</sup>Yepe ndoyosui mbahe sembiapo rai yuca uca ñgua yuvireco viña, ahe rumo oporanduño Pilato upe yuca uca ñgua rese yuvireco” ehi. <sup>29</sup>“Ichui omboaviyese opacatu icuachiapri pipendar yuvireco, oviroyi uca curusu sui ñoti ñgua yuvireco. <sup>30</sup>Tūpa rumo ombogüerayevi iri. <sup>31</sup>Setá ari rupi oyemboyecua oyeupi oguata vahe upe, evocoi ava yugüeru vahe supi Galilea sui, Jerusalén ve. Cūrítei ahe ava ité omombehu Jesús recocuer ava upe yuvireco” ehi tūparo pendar upe.

<sup>32</sup>“Sese che mu eta, cūrítei oromombehu pēu evocoi ñehesa aviye vahe Tūpa omondo vahe yande ramo upe aracahe. <sup>33</sup>Tūpa omboaviye ramo güemimombehugüer yande Israel suindar yaico vahe upe, ombogüerayevise Jesús. Evocoi güemimombehu oicuachía uca Salmo moñuviriosa pipe aipo ehi: ‘Co pipe nde che Rahír ereico; che nde Ru aico’ ehi Tūpa chupe. <sup>34</sup>Tūpa omombehu avei güemimobogüerayevi sete tuyuēhi ñgua icuachiapri pipe aracahe aipo ehi: ‘Che niha oroovasara acoi David upe che ñehe maranehi supi tupri vahe mboaviye ñgua’ ehi. <sup>35</sup>Sese omombehu avei ambuae icuachiapri pipe: ‘Nde, Tūpa, ndereseyai chira nde rembiguai Ava seco maranehi vahe rete ituyupa ñgua’ ehi. <sup>36</sup>Supi eté, David omboaviye ocuaita ava rese ohañecosa pipe yepi. Ipare omano. Evocoyase oyapocatu tuvipave imu pāhuve yuvireco. Ahe

setecuer rumo opaño ité ituyu” ehi. <sup>37</sup>“Acoi Tūpa ombogüerayevi vahe retecuer rumo ndituyui eté” ehi tūparo pendar upe imombehu. <sup>38</sup>“Sese, che mu eta, peyapisaca, tapeicua evocoi Jesús recocuer sui oime ñeroisa angaipa rese yandeu. Ahe co amombehumi pēu. Moisés porocuita uco ndipoi ñeroisa angaipa rese yande reco mohivi ñgua. <sup>39</sup>Jesús recocuer sui rumo oime ñeroisa ñepeipei viroya vahe upe” ehi. <sup>40</sup>“Peicua catu co mbahe sui, toviapi eme pe harive acoi Tūpa ñehe mombehúsar rembicuachiagüer pipe aipo ehi vahe:

<sup>41</sup>‘Esepia, pe seroĩrosar peico vahe. Peyepihamondii, ipare pecañi tēira. Esepia, che ayapora mbahe pe recoveseve. Yepe ambuae omombehu tupri itera pēu che rembiaporā viña, pe rumo ndaperoyai chietera’ ehi Tūpa” ehi Pablo tūparo pendar upe.

<sup>42</sup>Yuvínose potase tūparo sui, omombita Pablo yuvireco: “Teremombehu irimi eremombehu vahe ñehesa ambuae mbituhusa ari pipe oreu” ehi yuvireco chupe. <sup>43</sup>Yuvínosese ava rehii tūparo sui, setami judío iyavei ambuae oyembojudío vahe yuviraso Pablo, Bernabé rupi yuvireco. Ahese, “Peico tupri catu Tūpa pe rovasasa pipe” ehi ava upe yuvireco.

<sup>44</sup>Ambuae mbituhusa ari pipe seni opacatu ava ahe pendar oñemonuha yuvireco Tūpa Ñhengagüer rendu ñgua. <sup>45</sup>Osepiase ava rehii, judío rerecuar oñemoiró iteanga Pablo upe, supindar upe avei yuvireco. Viroĩro Pablo ñehe ava upe yuvireco. <sup>46</sup>Evocoyase Pablo, Bernabé reseve oñehe yuvireco judío upe osiquiyeeñisave:

—Tūpa ore cuai pēu rane ore ñehe ñgua. Pe rumo ndapeyapisaca potai iñhengagüer rese. Ipipe sui ndiyai peipisi tecovesa apirēhi vahe. Evocoyase orosora, oroñehe ava ndahei vahe judío upe. <sup>47</sup>Esepia, yande Yar om-

bou ore cuaitarā co ñehesa rese araca-hendar aipo ehi vahe:

‘Che oroporavo tataendi nungar nde reco āgua ndahei vahe judío yuvire-coi vahe upe písrosa reroguata āgua opacatu ivi rupi’ ehi.

<sup>48</sup> Ava ndahei vahe judío osenduse co ñehesa, oviharete yuvireco, omboetei avei Tūpa Ñehengagüer. Opacatu ava iporavopri tecovesa apirēhi vahe pisi āgua, ahe viroya yuvireco. <sup>49</sup> Evocoiyase Tūpa Ñehengagüer omombehu opacatu ahe ivi rupi yuvireco. <sup>50</sup> Judío rumo omonguerēhi cuña imboyeroyapri Tūpa mboeteisar iyavei mbia seco ivate vahe Pablo, Bernabé mose uca āgua güecua sui yuvireco yamotarēhisave. <sup>51</sup> Ahese Pablo, Bernabé oipipete opitaqui ivi sui yuvireco ‘Tūpa toicua mbahe sembiapo ai rese yuvireco chupe’ oya. Ichui yu-virasos Iconio ve. <sup>52</sup> Jesús reroyasar rumo oviharete yuvireco, vireco ité Espíritu Santo oyese yuvireco.

**Pablo, Bernabé reseve omombehu Tūpa Ñehengagüer Iconio ve yuvireco**

**14** Pablo, Bernabé oyepota Iconio ve yuvirasos. Aheve yuviroique judío tūparo pipe, omombehu tupri yande Yar recocuer yuvireco. Sese setá ava viroya ñehesa yuvireco judío, ndahei vahe avei judío. <sup>2</sup> Judío ndoviroyai vahe rumo oipihanemoñeta rerova yuvireco ava ndahei vahe judío Pablo, Bernabé iyavei ambuae Jesús reroyasar amotarēhi āgua. <sup>3</sup> Ahe rumo opita pucu yuvireco Iconio ve, omombehuño yande Yar recocuer osiquiyeēhisave yuvireco. Aheve Tūpa ombou opíratasa mbahe yavai vahe apo āgua chupe ‘ichui toicua yuvireco Pablo, Bernabé che poroaisusa mombehuse’ oyapave. <sup>4</sup> Ahe tecua pendar rumo ipihanemoñeta yoivi yuvireco: ñepeí judío pihanemoñetasa rupindar; ambuae evocoiyase apóstol pihanemoñetasa rupindar yuvireco. <sup>5</sup> Oime judío iyavei nda-

hei vahe judío oyemboyoya mborere-cuar rese mara-mara tēi sereco āgua yuvireco, “Ita pipe avei yayapi-yapi” ehi yuvireco chupe viña. <sup>6</sup> Oyanduse rumo yuvireco, oñemi voi yuvirasos Licaonia rupi, Listra ve, Derbe ve, ipopi rupi avei. <sup>7</sup> Supi omombehu ñehesa aviye vahe Jesús resendar yuvireco.

**Pablo yapi-yapisa ita pipe Listra ve**

<sup>8</sup> Listra ve yuvirecoise, oime mbia oha ramomi suive ndoguatai vahe. Ahe mbia oguapi oí <sup>9</sup> oyapisaca Pablo ñehese. Ahese Pablo omahengatuse sese, oicua ndoguatai vahe oyeroya ité Tūpa rese ocuera āgua. <sup>10</sup> Evocoiyase aipo ehi pírata chupe:

—¡Epūha! —ehi.

Ahese opo, opūha, oguata voi. <sup>11</sup> Osepiase ava rehii mbahe sembiapo yuvireco, osapucaí pírata Licaonia ñehese pipe yuvireco:

—¡Tūpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

<sup>12</sup> Ipihanemoñeta yuvireco Bernabé ahe tūpa Zeus iyavei Pablo ahe tūpa Hermes viña. Esepia, Pablo oñehese vahe. <sup>13</sup> Ahese co tūpa Zeus pahi güeru tivi, mbahe potri avei. Ahe tecua tapia roquendave, ahe Zeus tūparo tecua pipe ava reiquesa rupi chini. Oyuca pota tivi Pablo, Bernabé mboetei āgua yuvireco viña. <sup>14</sup> Oicuse rumo Bernabé, Pablo, ahese omondoro oturucuar yuvinoña ava pāhuve; oñehese pírata yuvireco:

<sup>15</sup> —Mbia, ¿mahera ēgüe peye oreu? —ehi—. Ore rumo ava tēi pe nungar avei oroico. Oromombehu: “Pepoi co mbahe ēgüe ehi tēi vahe mboeteisa sui; peroya Tūpa supi eté vahe” orohe pēu. Ahe oyapo vahe iva, ivi, para guasu, opacatu ipor reseve. <sup>16</sup> Aracahe rumo Tūpa, “Ēgüe tehi oguata ndahei vahe judío oipihanemoñetasa rupi yuvireco” ehi viña. <sup>17</sup> Tūpa rumo ndasesarai ava

upe mbahe tupri apo āgua sui. Ahe ombou amar pēu mbahe miti ha aviye āgua yepi. Ēgüe ehi mbahe tembihu imbou iyavei viharetesa pēu —ehi ava upe yuvireco.

<sup>18</sup>Yepe aipo omombehu yuvireco chupe, ava rehii rumo seniño ité tivi oyuca yuvireco chupe imboetei āgua viña.

<sup>19</sup>Ahese oyepota moviro judío Antioquía sui, Iconio sui avei. Oipihañemoñeta rerova ava rehii yuvireco. Ichui oyapi-yapi ita pipe Pablo yuvireco. Ipare ombotiriri seraso yuvireco tecua ivii. Ipihañemoñeta: “Yayuca ité” ehi yuvireco chupe viña. <sup>20</sup>Oyere tupri Pablo rese Jesús reroyasar yuvireco. Ahe rumo oñarapuha, oi que iri oso tecua pipe. Ahere ayihive yuvinose oyeve yuviraso Bernabé reseve Derbe ve.

<sup>21</sup>Omombehu tuprise co ñehesa icatupri vahe Derbe rupi, setá ava viroya yande Yar yuvireco. Ipare oyeve yugüeru Listra rupi, Iconio rupi avei, oyepota Antioquía ve yuvireco. <sup>22</sup>Ahe supi omonguerēhi catu opacatu Jesús reroyasar yuvireco, aipo ehi imombehu: “Yepe ava yande mombaraisura yuvireco viña, yaroyaño itera rumo Jesucristo. Sese peseya eme ité seroyasa. Yandeu aviye catu ité mbahe-mbahe tēi pipe yande recose Tūpa mborerecuasave yande reique āgua” ehi yuvireco Jesús reroyasar upe. <sup>23</sup>Ipare oiporavo ava Jesús reroyasar rāro āgua ñepeipei ñemonuhasa rupi. Oyeroqui iyavei oyecuacu. Ipare viropovēhe yande Yar upe iporaviqui āgua yuvireco.

### **Pablo, Bernabé oyeve yuvireco Antioquía ve Siria ivi rese**

<sup>24</sup>Ipare yuviraso Pisidia rupi, oyepota Panfilia ivi rese. <sup>25</sup>Omombehu Tūpa Ñehengagüer yuvireco Perge ve. Ipare yuviraso Atalia ve. <sup>26</sup>Ahe ichui yu-

viraso carite pipe Antioquía ve, ahe tecua pipe yipindar imondopri Tūpa upe sovasapri yuvirecoi mboraviqui apo āgua. Aheve tupri avei imboaviye pare oyeve yuvireco. <sup>27</sup>Oyepotase Antioquía ve yugüeru, omonuha opacatu Jesús reroyasar yuvireco. Aheve omombehu opacatu Tūpa mbahe oyapo vahe oyese yuvireco iyavei aipo ehi: “Yande Yar ombou avei ava ndahei vahe judío upe Guahir reroya āgua yuvireco” ehi yuvireco omboetasa upe. <sup>28</sup>Aheve Pablo, Bernabé opita pucu yuvireco ipiri.

### **Jesús reroyasar oñemonuha Jerusalén ve yuvireco**

**15** Evocoyase moviro mbia Jesús reroyasar judío yugüeru Judea sui Antioquía ve. Ahe ombohe Jesús reroyasar yuvireco aipo ehi: “Aracahē Tūpa oyocuai Moisés yande ramoi cuai āgua: ‘Pembocircuncida opacatu pe mu cuimbahe cheu nara’ ehi Tūpa aracahē” ehi yuvireco. “Cūrítei acoi ēgüe ndapeyese Jesús reroyasar upe, noñepisiroi chietera yuvireco” ehi Antioquía pendar upe yuvireco. <sup>2</sup>Pablo, Bernabé reseve rumo oñehe pīrata yuvireco chupe. Nomoingatu catuise rumo mbahe yuvireco, ahese Jesús reroyasar omondo Pablo, Bernabé iyavei ambuae omboetasa Jerusalén ve apóstol upe iyavei Jesús reroyasar rārosar upe aipo mbahe moingatu āgua yuvireco.

<sup>3</sup>Ēgüe ehi Jesús reroyasar Antioquía pendar yocuai imondo yuvireco. Oñocuase Fenicia, Samaria avei yuviraso, oguatasa rupi omombehu-mbehu Jesús reroyasar upe ndahei vahe judío recocuer yuvireco aipo ehi: “Setá ava ndahei vahe judío opa oseya aracahendar aracuasa Tūpa rupi oguata āgua yuvireco” ehi. Ahese opacatu Jesús reroyasar oyemboviharete yuvireco senduse.

<sup>4</sup>Yuviroyepotase Jerusalén ve, apóstol, Jesús reroyasar rārosar iyavei am-

buae Jesús reroyasareta oipisi tupri yuvireco. Aheve omombehu Tüpa mbahe oyapo vahe oyese yuvireco. <sup>5</sup> Osenduse rumo, moviro Jesús reroyasar fariseo opüha voi aipo ehi yuvireco chupe:

—Aní —ehi—. Pembocircuncida rane ité catu opacatu Jesús reroyasar ndahei vahe judío —ehi yuvireco—. Peyocuai avei opacatu ambuae Moisés porocuita mboaviye água yuvireco —ehiño ité yuvireco.

<sup>6</sup> Ahese apóstol, Jesús reroyasar rārosar avei oñemonuha oyemomborandu água aipo mbahe rese yuvireco.

<sup>7</sup> Yemomborandu viteseve, Pedro opüha ipāhuve aipo ehi:

—Che mu, peicua niha aracaco Tüpa che poravo pe pāhu sui co ñehesa poropīsirosa resendar mombehu água ava ndahei vahe judío upe ‘toviroya yuvireco’ oyapave. <sup>8</sup> Tüpa oicua ité opacatu ava pīhañemoñeta. Chupe avei omondo Espíritu Santo inungar yandeu. Ipipe sui yaicua Tüpa oipisi avei ahe ava oyeupe nara —ehi—. <sup>9</sup> Evo-coiyase, “Judío aviye catu vahe ava ndahei vahe judío sui” ndehi Tüpa. Esepia, opacatu oyoya pāve Tüpa upe yaico. Sese omoatiro ipīhañemoñeta rai sui oyese yeroyasa pipe. <sup>10</sup> ¡Pe tie pesecoāha pota Tüpa! ¡Mahera peyocuai uca pota co Jesús reroyasar mbahe yavai rai vahe apo água! Aní rumo. Esepia, yande ramoi ndoicatui Tüpa porocuita mboaviye água yuvireco, yande avei ěgüe yahe —ehi—. <sup>11</sup> Co rumo, yaroyase yande Yar Jesucristo, yande pīsirora oporoaisusa pipe, inungar co ava ndahei vahe judío yuvirecoi —ehi Pedro.

<sup>12</sup> Evocoyase opacatu oyemonguiriri yuvireco, osendu Bernabé, Pablo ñehesa, mbahe sembiapo avei yuvireco. Evo-coiyase omombehu ndayasepai vahe poromondiisa Tüpa oyapo uca ava ndahei vahe judío pāhuve yuvireco chupe.

<sup>13</sup> Osendupase iñehe yuvireco, ahese Santiago aipo ehi:

—Che mu, Jesús reroyasar, peyapisacami che ñehe rese: <sup>14</sup> Simón omombehu yandeu Tüpa osaisu avei ava ndahei vahe judío. Sese oiporavo ahe ava oyeupe nara —ehi—. <sup>15</sup> Oyoya tupri Tüpa ñehe mombehusar rembicuachiagüer rese. Ñepeí ipāhu pendar oicuachía aracahe aipo ehi:

<sup>16</sup> ‘Coíye catu ayevíra vitu. Ahese ayapo piasu irira che rēta David oyapo uca vahecuer, ahe oi imocañipirer. Ambopiasu irira oitipa vahecuer yuvireco.

<sup>17</sup> ěgüe ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ipehapri reseve.

<sup>18</sup> Evocoi yande Yar rembiaporā icuapri aracahe suive’ ehi Tüpa ñehe mombehusar aracahe.

<sup>19</sup> “Sese chepīhañemoñeta iya ndayayocuai chira Moisés porocuita rupi oñecuñaro vahe rā ndahei vahe judío Tüpa rupi oguata água yuvireco” ehi.

<sup>20</sup> “Aviye rumo yaicuachiase chupe co mbahe resendar güeraño: Pehui rene mbahe mīmba yucapri mbahe rahanga tēi upe seropovēhepri iyavei ndapeagua-sai chira, pehui rene mbahe mīmba yucapri suvi renosepīrēhi, mbahe ruvi avei” ehi. <sup>21</sup> “Esepia, opacatu tecua rupi yuvirecoi ava omombehu vahe Moisés porocuita ñepeí-peí mbituhusa ari pipe judío tūparo pipe aracahe suive. Aipo rupive” ehi Santiago.

### Icuachiapri ndahei vahe judío upe nara

<sup>22</sup> Ahese apóstol, Jesús reroyasar rārosar, ambuae Jesús reroyasar avei omondo pota opāhu pendar Pablo, Bernabé rupi Antioquía ve yuvireco. Oiporavo yuvireco ñuvirío mbīa, ahe Judas Barsabás iyavei Silas. Ahe

imboyeroyapri omboetasa pāhuve yuvireco. <sup>23</sup>Ahe supi aipo ehi icuachía imondo yuvireco:

“Ore apóstol, Jesús reroysar rārosar, pe mboetasa oroico vahe. Pe mboaviravesa, ndapemarai revo pe ndahei vahe judío Antioquía pendar, Siria pendar, Cilicia pendar avei. <sup>24</sup>Oroyandu amove ava ore pāhu pendar pe mañeco tēi aipo oporombohesa pipe yuvireco. Ahe ava ndahei ore ocuaita pipe yuviraso pēu pe pihañemoñeta rova. <sup>25</sup>Sese oyoya orepihañemoñeta oroiporavo ñuvirío mbia ore rembiaisu ore rivri Bernabé, Pablo rupi imondo eipeve pēu. <sup>26</sup>Ahe acoi oyemondo vahe mbahe-mbahe tēi povrive yande Yar Jesucristo recocuer rese yuvireco. <sup>27</sup>Oromondo Judas, Silas avei pēu: ahe teieté omombehura opacatu cuachiar pipendar pēu yuvireco. <sup>28</sup>Aviye Espiritu Santo upe, oreu avei co porocuita güeraño oromondo vahe rese pēu. Ndape cuaisa pota iri rumo ambuae mborocuita rese. <sup>29</sup>Pehui rene mbahe mimba yucapri seropovēhepri mbahe rahanga tēi upendar, ndapehui chiaveira mbahe ruvi, mbahe mimba yucapri suvi renosepirēhi vahe iyavei ndapeaguasai chira. Pepoise evocoi mbahe naporai vahe sui, oimera mbahe tupri pēu. Aipo rupive. Peico tupri” ehi.

<sup>30</sup>“Aviye” ohe pare, yuviraso, oyepota Antioquía ve. Aheve opase omonuha Jesús reroysar yuvirecoi vahe omondo cuachiar yuvireco chupe. <sup>31</sup>Ahe cuachiar rese oyoerquise, oyemboviharete yuvireco. <sup>32</sup>Judas, Silas Tūpa suindar ñehesa mombehular avei yuvirecoi. Sese omboviharete catu iyavei omonguerēhi catu avei ahe ava yuvireco oñhe pipe. <sup>33</sup>Opitase moviro ari aheve, Jesús reroysar Antioquía pendar aipo ehi: “Aviye. Peyevi tupri pe mbousar upe” ehi yuvireco chupe.

<sup>34</sup>Silas rumo opita potaño ité aheve.

<sup>35</sup>Pablo, Bernabé avei opita viteño ité aheve yuvireco, ahe setá ambuae Jesús reroysar reseve imbohe vite āgua yande Yar resendar ñehesa rese yuvireco.

### **Imoñuviriosa Pablo guata agüer Jesús recocuer mombehu āgua**

<sup>36</sup>Coiye Pablo aipo ehi Bernabé upe:

—Yaso, yasepia iri Jesús reroysar opacatu yande Yar ñehengagüer yamombehu vahecuer rupi, ¿mara ehi pīha ahe yuvireco? —ehi.

<sup>37</sup>Ahese Bernabé viraso pota Juan Marcos oyeupi viña. <sup>38</sup>Nomboyoyai rumo Pablo ipihañemoñeta rese. Esepia, cuese Juan Marcos oseyaño oyepotase yuvireco Panfilia ve. “Taipitiviñño iporaviquisa rese” ndehi chupe. <sup>39</sup>Nomoingatuise mbahe oyeupe yuvireco, oyepipiño yuvireco oyesui. Ahese Bernabé viraso Marcos oyeupi carite pipe Chipre ve. <sup>40</sup>Pablo rumo oiporavo Silas oyeupi icho āgua. Yuvinose āgua Antioquía sui, Jesús reroysar ahe pendar aipo ehi yuvireco chupe: “Tape rovasa Tūpa oporoaisusa pipe” ehi yuvireco imondo. <sup>41</sup>Ipare yuviraso Siria, Cilicia rupi Jesús reroysar monguerēhi catu āgua yuvireco.

### **Timoteo oso Silas ndugüerā Pablo rupi**

**16** Pablo ondugüer reseve yuviraso Derbe ve, Listra ve avei. Aheve osepia Jesús reroysar, Timoteo serer vahe, judía, Jesús reroysar membri. Iyesupa rumo griego. <sup>2</sup>“Evocoi Timoteo aviye etepri” ehi Jesús reroysar Listra pendar, Iconio pendar avei yuvireco chupe. <sup>3</sup>Pablo viroguata potaño ité Timoteo oyeupi. Sese seroguata renondeve, ombocircuncida uca seroñroēhi āgua judío yuvirecoi vahe upe. Es-



epia, opacatu oicua Timoteo ru griego secose yuvireco. <sup>4</sup>Evocoiyase opacatu tecua iguatagüer rupi omombehu ahe mborocuaita apóstol, Jesús reroysar rārosar Jerusalén pendar ombou vahe yuvireco chupe. <sup>5</sup>Sese Jesús reroysar ahe tecua rupindar oyemoviracua catu yuvireco Jesús reroysa pipe iyavei oyemboeta catu yuvireco ari rupi.

### **Tüpa omondo uca Pablo Macedonia ve iquer nungar pipe**

<sup>6</sup>Espíritu Santo ndoipotai Asia rupi yuviraso vaherā Tüpa Ñehengagüer mombehu āgua. Sese oyahuva yuviraso Frigia rupi, Galacia rupi avei. <sup>7</sup>Ēgüe ehi oyepota Misia popive yuvireco. Ichui yuviraso pota tēi Bitinia ve. Jesús Espiritu rumo ndoipotai icho āgua supi. <sup>8</sup>Ahese osasaviño yuviraso Misia sui carite guasu yemboyasa Troas ve oyepota āgua yuvireco. <sup>9</sup>Oyepotase aheve, ahe pītu pipe Pablo oquer nungar pipe osepia mbia, Macedonia pendar, “Ereyumira Macedonia ve ore pītivii āgua viña” ehi ohā chupe. <sup>10</sup>Ipare ore oroyemoingatu voi eté Macedonia ve ore so āgua. Esepia, ore oroicua ité Tüpa aheve ore mondora ñehesa pīsirosa resendar mombehu āgua.

### **Pablo, Silas Filipino ve yuvirecoi**

<sup>11</sup>Oroso carite pipe Troas sui oromohiviño voi oroso evocoi ivi para guasu Samotracia ve. Ahere ayihive oroyepota Neápolis ve. <sup>12</sup>Ichui oroso ivi rupi Filipos ve, ahe tecua seroyapri catu vahe ambuae tecua sui, ahe ivi Macedonia rupindar. Aheve Roma iğuar oyeyecuai, oyocuai avei opacatu tecua ivirindar ava yuvireco. Aheve moviro ari tēi oroico. <sup>13</sup>Mbituhusa ari pipe orosē evocoi tecua sui iai popive. “Aheve oñemonuhara judío oyeroqui āgua” orohe. Aheseve cuña oñemonuha yugüeru. Aheve oroye-

pota chupe, oroguapi ipāhuve. Ipare oromombehu co ñehesa pīsirosa resendar yuvireco chupe. <sup>14</sup>Ñepei imboetasa, Lidia serer vahe, Tiatira pendar, oyapisaca ore ñehere rese oī. Ahe Tüpa mboeteisar secoi, turucuar suendi vahe mbovendesar avei secoi. Yande Yar omohivi ipihañemoñetasa iyapisaca āgua Pablo remimombehu rese. <sup>15</sup>Sese ñapiramosa, opacatu sēta pendar reseve. Ipare ore mombita pota güetave.

—Che reroysa peye yande Yar reroysar che recose, pepitara che rētave — ehi oreu.

Ēgüe ehi ore monguerēhi. Sese oropita sētave ipiri.

<sup>16</sup>Ipare ambuae ari oroso irise oroyeroqui āgua, cuñatai ore rovaichi, ahe cuñatai caruguar pīratasa pipe mbahe mombehusar. Oicatu ava upe mbahe oime vaherā mombehu. Omombehuse mbahe, setá oipisi sepi guarepochi güerecuar yuvirecoi vahe upe nara yepi. <sup>17</sup>Ahe cuñatai ou ore raquicuei,

—¡Co ava Tüpa ivate catu vahe upendar oporaviqui yuvireco omombehu: “Na ehira Tüpa yande pīsiro” ehi yuvireco! —ehi pucu-pucu ore mombehu ava upe.

<sup>18</sup>Setá ari ēgüe ehi oico oreu. Omañeco tēise rumo Pablo, oyemboyere chupe cute, aipo ehi icaruguar upe:

—Che orocuai Jesucristo rer pipe: esē co cuñatai sui —ehi.

Aheseve voi caruguar osē ichui.

<sup>19</sup>Evocoiyase cuñatai rerecuar oyanduse, “Ndoipisi uca iri chira guarepochi yandeu” ehi yuvireco. Imboasipave oipisi Pablo, Silas mborerecuar upe ocarusuve seraso yuvireco. <sup>20</sup>Ipare mborerecuar yuvirecoi vahe upe aipo ehi yuvireco:

—Co ñuvirío mbia orogüeru vahe peu, judío tēi yuvirecoi. Ayeve omboaivu guasu tēi yuvireco yande recua

pipe. <sup>21</sup> Oporombohe güecocuer rese yuvireco. Secocuer rumo naporai oreu. Ore Roma iguar oroico, sese ndoroicatui secocuer moña água —ehi yuvireco mborerecuar upe.

<sup>22</sup> Evocoyase ava eta oyamotarēhi Pablo iyavei Silas yuvireco iyavei mborerecuar, “Pesequii iturucuar ichui. Ipare peinupara ivira pipe” ehi. <sup>23</sup> Inupá iteanga pare, osoquenda yuvireco. Oyocuai pírata soquendapri rārosar yuvireco, “Esāro tupri” ehi yuvireco chupe. <sup>24</sup> Aipo oyeupe he ramosave, soquendapri rārosar omoingue Pablo, Silas oi ava nose catui vahesa pipe. Aheve omopaha cepo pipe.

<sup>25</sup> Ahe pītu mbiter rupi rumo Pablo, Silas oyerogui, osapucui Tūpa mboetisave yuvireco. Ambuae ava soquendapri evocoyase osenduño tēi yuvireco isapucui. <sup>26</sup> Ahese aviyeteramo tēi ivi orirri eteanga. Opa omomara ava roquendasa moviracuasa, opacatu oquenda oyemboi iyavei opacatu carena oyera soquendapri sui. <sup>27</sup> Ahese soquendapri rārosar omahe yesapiha. Osepiase oquenda imboipri, ahese vinose oquise pucu siru sui oyeyuca água viña. Esepia niha, “Opacatu ité revo soquendapri yuviraso” ehi viña. <sup>28</sup> Pablo rumo,

—¡Ereyapoi rene mbahe tēi ndeyeupe!  
¡Esepia, opacatu oroicoveño cohave! —  
ehi pucu soquendapri rārosar upe.

<sup>29</sup> Evocoyase soquendapri rārosar, “Emboui tataendi” ehi ondugüer upe. Ichui oña oique, orirri, osiquiyepave oñenopiha Pablo, Silas rovai oso. <sup>30</sup> Vinose pare soquendasa sui oporandu chupe:

—Mbia, ¿mara ahera vo che ñepisiro água vichico? —ehi chupe.

<sup>31</sup> —Eroya yande Yar Jesucristo. Ichui ahe nde pīsirora, nde rēta pendar avei —ehi yuvireco chupe.

<sup>32</sup> Ahese omombehu yuvireco Tūpa Ñehengagüer soquendapri rārosar upe, opacatu sēta pendar upe avei.

<sup>33</sup> Ahe pītu pipeve avei soquendapri rārosar viraso oyeupi, yapichasa oyoseipa chupe. Ahese Pablo, Silas oñapiramo guārosarer, sēta pendar avei yuvireco. <sup>34</sup> Viraso pare sārosar güetave, ombocarui. Ahe sēta pendar avei oviharete ité yuvireco Tūpa reroyasa rese.

<sup>35</sup> Cōhese mborerecuareta omondo sundao ava rese icuapri soquendasave yuvireco. Oyepotase yuvireco, aipo ehi: “Emosepa evocoi mbia judío” ehi. <sup>36</sup> Ahese soquendapri rārosar omombehu co ñehesa Pablo upe:

—Mborerecuar ombou yuvireco ñehesa cheu pe mose água. Peso tupriño peico —ehi chupe.

<sup>37</sup> Omboyevi rumo chupe,

—Ore niha romano oroico viña, ore nupasa rumo opacatu ava rovaque. Ndoorandu rane angai eté rumo mbahe rese oreu. Ore roquendapa voiño tēi yuvireco. Ipare aipo ava rembiepiaēhive tēi ore mosepa uca pota viña. ¡Aní eté rumo! Ahe teieté ru toyugüeru ore mose água —ehi soquendapri rārosar upe.

<sup>38</sup> Ipare sundao ava rese icuapri omombehu güerecuareta upe Pablo ñeha. Oyanduse Pablo, Silas romano secose, osiquiyé iteanga yuvireco. <sup>39</sup> Ahese ahe teieté yuviraso Pablo, Silas oyeupe ñero água rese yuvireco: “Peso tupriño ore recua sui” ehi yuvireco chupe. <sup>40</sup> Pablo, Silas yuvinosese voquendasa sui, yuviraso iri Lidia rētave. Oñemonuha irise ambuae Jesús reroyasar pāhuve, omonguerēhi catu yuvireco. Ipare yuviraso ichui.

### Ava yaidu guasu tēi Tsalónica ve yuvireco

**17** Oguatase Pablo iyavei Silas,  
oñocua Anfípolis iyavei

Apolonia rupi yuviraso. Ēgüe ehi oyepota tecua Tesalónica ve yuvireco. Aheve oime judío tūparo. <sup>2</sup>Secocuer rupi eté mbituhusa ari pipe Pablo oique judío tūparove, oñemoñeta ava eta upe mbosapi mbituhusa ari rupi Tūpa Ñehengagüer rese. <sup>3</sup>Omboyecua tupri imombehu Tūpa Rembiporavo ava pīsiro āgua iparaisu rane itera, omanora, ipare rumo ocuerayevi iriño itera. Ipare aipo ehi:

—Jesús, acoi amombehu vahe pēu, ahe ité niha Tūpa Rembiporavo ava pīsiro āgua —ehi.

<sup>4</sup>Amove ipāhu pendar seroyasa pipe oyemboya sese yuvireco. Setá avei ava griego yuvirecoi vahe, Tūpa mboeteisar judío aracuasa reroyasar avei. Ipāhuve setá avei cuña oyemboetei vahe oyemboya sese yuvireco. <sup>5</sup>Judío rumo ndoviroyai vahe oñemoñombave secatēhi ava rese yuvireco. Sese omonuha ava yuvireco tēi vahe, ndipihai vahe yuvireco. Imonuha pare, ahe omboaivu guasu uca tēi ahe ava upe opacatu güecua pipe yuvireco. Yuviraso Jasón rētave Pablo, Silas reca, vinose pota ava rehii pāhuve yuvireco viña. <sup>6</sup>Ndoyosuisse rumo aheve yuvireco, virasoño Jasón, ambuae Jesús reroyasar avei güecua rerecuar rovai yuvireco. Viroāse guasu sereco yuvireco,

—¡Evocoi mbia Pablo iyavei Silas virova vahe ava recocuer opacatu tecua rupi yuvireco, cūrítei oyepotapa yuvireco cohave! <sup>7</sup>Co Jasón omombituhu güētave. ¡Opacatu co yuvirecoi vahe ndoviroyai Cesar porocuita yuvireco iyavei omombehu yuvireco: “Oime ambuae mborerecuar guasu, ahe Jesús” ehi niha aipo yuvireco! —ehi yuvireco mborerecuar upe.

<sup>8</sup>Aipo ñehesa renduse, oyepihamondii guasu ava eta, mborerecuar avei tecua pipendar yuvireco. <sup>9</sup>Mborerecuar rumo oipisipase guarepochi Jasón sui, am-

buae Jesús reroyasar sui avei, ahesa opa omose.

### **Pablo, Silas omombehu Tūpa Ñehengagüer Berea ve yuvireco**

<sup>10</sup>Ahe pītu pipeve voi ava Jesús reroyasar omondo Pablo, Silas tecua Berea ve yuvireco. Oyepotase aheve, yuviroique judío tūparo pipe. <sup>11</sup>Berea pendar sui aviye catu ava Tesalónica pendar sui. Ēgüe ehi ipisi ohāpisiēhisa pipe ñehesa yuvireco iyavei ari yacatu rupi oseca Tūpa Ñehengagüer pipe ‘¿supi eté pīha Pablo ñehesa?’ oyapave yuvireco. <sup>12</sup>Evocoyase setá avei Pablo ñehere royasar iyavei setá griego viroya yuvireco, ndahei cuimbahe güeraño, cuña oyemboetei vahe avei. <sup>13</sup>Judío Tesalónica pendar rumo oyandu yuvireco Pablo porombohesa Tūpa Ñehengagüer rese Berea ve. Sese yuviraso aheve imboaivu guasu tēi uca āgua ava upe yuvireco. <sup>14</sup>Evocoyase Jesús reroyasar Berea pendar Pablo viroguata poyava voi tecua sui para guasu coti yuvireco. Silas iyavei Timoteo rumo opita viteño aheve yuvireco. <sup>15</sup>Evocoyase Pablo rupi yuviraso vahe viroyepota Atenas ve seraso. Ahe ichui viroyevi Pablo ñeha Silas upe iyavei Timoteo upe avei yuvireco yuviraso voi āgua Pablo piri ahe tecuave yuvireco.

### **Pablo Atenas ve secoi**

<sup>16</sup>Pablo osāro vitesese Silas iyavei Timoteo Atenas ve oico, ndoyembovihai osepiase opacatu rupi tūpa rahangaanga tēi. <sup>17</sup>Sese judío tūparo pipe omombehu Jesús recocuer judío eta upe iyavei ambuae Tūpa mboeteisar upe avei. Iyavei ari yacatu omoñeta ava osepiya vahe ocarusu rupi ava ñemonuhasave ahe tecua pipe. <sup>18</sup>Evocoyase amove mbia oyembohe vahe epicúreo aracuasa rese iyavei mbia oyembohe vahe estoico aracuasa rese

oñemoñeta Pablo rese yuvireco. Amove aipo ehi Pablo upe yuvireco seroñrosave:

—¿Mbahe rese angahu pīha co mbia iñehe papa rai ava upe oico? —ehi.

Ambuae aipo ehi yuvireco:

—Ndoyavii co mbia oñehe vahe ambuae ava Tūpa rese tēi —ehi yuvireco.

Esepia, omombehu Jesús recocuer iyavei cuerayevisa resendar.

<sup>19</sup> Evocoiyase ahe oyembohe vahe viroyeupi Pablo Areópago serer vahesave seraso yuvireco. Aheve ava oñemonuhasave aipo ehi yuvireco chupe:

—¿Ndiyai vo eresenducua uca tupri catumira co porombohesa piasu resendar oreu viña? <sup>20</sup> Supi eté niha eremombehu mbahe ndorosendu vitei vahe, ore oroicua tupri pota, ¿mara oyapave ité vo aipo ehi? —ehi yuvireco Pablo upe.

<sup>21</sup> Atenas pendar iyavei yugüeru vahe Atenas ve, oyembohe pota serai vahe yuvireco. Ahe oñemoñetaño, omombehuño mbahe oyeupe yuvireco yepi iyavei osendu pota rai ñehesa ipiasu vahe. Aheño ité ipīhañemoñetas yuvireco.

<sup>22-23</sup> Evocoiyase Pablo opūha ahe ava pāhuve aipo ehi:

“Pesendu rane Atenas iguar. Aguatase ocar rupi asepia pe tūpa eta pemboetei vahe. Ahese asepia ñepeí tūpa upe seropovēheprī renda. Sese asepia icuachiapri aipo ehi oī: ‘Tūpa ndicuasai vahe upendar’ ehi. Evocoi Tūpa ndapeicua vitei vahe, ahe secocuer niha amombehu pēu” ehi.

<sup>24</sup> “Evocoi Tūpa oyapo vahe co ivi, opacatu mbahe ipor avei. Ahe niha ivi, iva Yar secoi. Sese ndasecoi tūparo ava tēi rembiapo pipe. <sup>25</sup> Ndahei ava rembiapo pipe sui tēi oicove. Esepia, ndipoi mbahe ipane vahe chupe. Ahe ité niha opacatu upe ombou tecovesa, pītuhesa iyavei opacatu mbahe oime vahe ivi, ivave” ehi.

<sup>26</sup> “Tūpa oyapo opacatu-catu tēi ava ñepeí ava sui ava yesu āgua opacatu ivi rupi. Omondo ivi ava yemboerecua āgua ñepeí-peí upe. Ari avei omondo co ivi pipe iyemboerecua āgua yuvireco chupe. <sup>27</sup> Ēgüe ehi ava upe ‘tache reca yuvireco’ oya, ‘ipipe sui aviyeteramo che reroyara yuvireco’ oyapave. Ēgüe ehi rumo Tūpa yande resevemi eté. <sup>28</sup> Esepia niha, Tūpa sui yaicove, ipiratasa pipe yayembovava, ichui avei yareco yande recovesa, inungar oicuachía amove pe recua pendar yuvireco, aipo ehi: ‘Yaico ité Tūpa suindar’ ehi yuvireco. <sup>29</sup> Sese yande Tūpa suindar yaicose, ‘Co mbahe rahanga oro apopri iyavei guarepochi, ita apopri, ahe revo Tūpa’ ndayahei chira. Esepia, mbahe rahanga ava rembiapo tēi, ndahei Tūpa” ehi. <sup>30</sup> “Pe ramoi ndoicua tupriise yuvireco aracahe, Tūpa oñemosañ mbahe sembiapo rese chupe. Cūrítei rumo oyocuai opacatu ava co ivi pipendar ‘tomboasi oangaipe, toyeve yuvireco cheu’ oya. <sup>31</sup> Esepia, ahe oiporavo ari opacatu ava recocuer rese porandu uca āgua güecocuer ivi tuprisa pipe ñepeí güembiporavo upe. Ahe ombogüerayevi güembiporavo omano vahe pāhu sui ‘toicua opacatu ava güecocuer rese iporandu āgua’ oya” ehi Atenas pendar upe.

<sup>32</sup> Osenduse yuvireco cuerayevisa resendar, ahese oime ava oyoyai catu yuvireco seroñrosave. Ambuae rumo aipo ehi yuvireco:

—Torosendu irimi aipo ñehesa curi — ehi yuvireco.

<sup>33</sup> Sese Pablo osē ipāhu sui oso. <sup>34</sup> Moviro rumo mbia oyemboya sese, viroya ité vahe iñehesa yuvireco. Ahe ipāhuve secoi mbia Dionisio serer vahe, ahe Areópago pāhu pendar iyavei cuña Dámaris serer vahe. Ambuae oime vite yuvireco seroyasar.

### Pablo Corinto ve seci

**18** Coiye catu Pablo osē Atenas sui, oso Corinto ve. <sup>2</sup>Aheve oyoe pia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugüeru ramo rumo Italia sui güembireco Priscila reseve. Yuvinose ñepeí tecua Italia rupindar Roma sui oyocuaise mborerecuar guasu Claudio: “Toyuvinose ité opacatu judío Roma sui” ehise. Pablo oso, <sup>3</sup>opita Aquila piri oporaviqui água. Esepia, Pablo, Aquila avei ahe mbahe pírer mbovívar páve yuvirecoi. <sup>4</sup>Mbituhusa ari yacatu rupi Pablo omombehu Jesucristo recocuer ava upe judío tūparo pipe ‘toviroya Jesús judío iyavei ndahei vahe judío yuvireco’ oyapave.

<sup>5</sup>Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu água rese güeraño judío eta upe aipo ehi: “Jesús niha Tūpa Rembiporavo ava písiro água seci” ehi. <sup>6</sup>Iñehe-ñehe tēi rumo seroĩrosave yuvireco chupe. Sese Pablo oipípete oturucuar sovaque ‘oimera mbahe tēi pēu’ oya, iyavei aipo ehi chupe yuvireco:

—Pe ae niha peseca Tūpa ñemoirosa peyeupe pe recocuerai sui. Ndahei rumo che resera mbahe. Esepia, che amboaviye tupri che cuaita pēu. Che rumo, co pipe suive, amombehu catuño itera co ñehesa ava ndahei vahe judío upe vichico —ehi Pablo judío upe.

<sup>7</sup>Evocoiyase Pablo osē judío tūparo sui, oi que mbia Ticio Justo serer vahe rētave, ahe Tūpa mboeteisar avei seci. Ahe sēta judío tūparo iqueve. <sup>8</sup>Crispo, ahe judío tūparo rerecuar viroya avei yande Yar, opacatu sēta pendar avei viroya yuvireco. Setá ambuae Corinto pendar avei viroya osenduse ñehesa yuvireco. Seroya pare, oñeapiramopa uca yuvireco. <sup>9</sup>Ñepeí pītu pipe yande

Yar oñehe Pablo upe iquer nungarve: “Eresiquiyei rene, ereñehe ava upe, che mombehuño eve, erepoi rene che mombhusa sui. <sup>10</sup>Esepia, che nde reseve aico. Sese ndiyai ava upe nde momara uca água. Supi eté che areco setá che rahirā co tecua pipe” ehi yande Yar chupe. <sup>11</sup>Evocoiyase opita ñepeí araviter yemombitesa rupi Corinto ve oico. Aheve ombohe Tūpa Ñhengagüer rese ahe pendar ava.

<sup>12</sup>Galión mborerecuar secose opacatu Acaya rupi, judío oñemonuha Pablo amotarēhisave. Ichui viraso ahe mborerecuar upe porandusa ivate catusave yuvireco, <sup>13</sup>aipo ehi yuvireco chupe:

—Co mbia oipihañemoñeta rerova tēi ava oTūpa mboetei água. Ndahei rumo Roma pendar porocuita rupi ěgüe ehi yuvireco —ehi yuvireco seroĩrosave chupe.

<sup>14</sup>Oñehe pota tēi viña, Galión rane rumo oñehe judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemonguerēhira che yapisaca água pe remimombehu rese viña. <sup>15</sup>Pe rumo peporandu cheu mbahe pe yembohesa resendar, pe Tūpa rer resendar iyavei pe Tūpa porocuita resendar rese tēi. Pemoingatu pe ae pe recocuer; ndaipotai aipo nungar mbahe moingatu água —ehi Galión ahe ava upe.

<sup>16</sup>Ipape opa omboyepipi porandusa sui. <sup>17</sup>Ahese opacatu griego oipisi judío tūparo rerecuar Sóstenes yuvireco. Ipape yuvirocua-rocua Galión rovai ahe peve yuvireco sese. Galión rumo, “Mara etemo che areco viña” ehiño chupe.

### Pablo yevi irisa Antioquía ve

<sup>18</sup>Pablo seci pucu vite pare Corinto ve, “Asora vichico cute” ehi Jesús reroyasar upe. Ipape yuviraso Aquila, Priscila reseve. Oyepotase Cencrea ve yuvireco para guasu popive, aheve

Pablo oñeapipa tupri oñehe mboaviye água. Ipore yuviraso carite pipe Siria ve. <sup>19</sup>Siria piar rupi yuviraso Efeso ve. Aheve opita Aquila, Priscila yuvireco. Ichui Pablo oique judío tūparo pipe Jesús resendar ñehesa mombehu água chupe yuvireco. <sup>20</sup>Ahe pendar omombita pota vite tēi yuvireco viña, Pablo rumo ndopita potai aheve. <sup>21</sup>Evocoyase, “Aviye, taso rane” ehiño chupe yuvireco. “Tūpa oipotase cheu, ayevi irira vitu pe piri” ehi.

Ipore oso Efeso sui carite pipe. <sup>22</sup>Oyepotase Cesarea ve, oso Jerusalén ve “avirave” apo água Jesús reroyasar upe. Ipore oso Antioquía ve. <sup>23</sup>Opita pucu pare aheve, osē, oguata iri Galacia rupi, Frigia rupi opacatu Jesús reroyasar monguerēhi catu água.

### **Apolos omombehu Jesús recocer Efeso ve**

<sup>24</sup>Aheseve avei judío Apolos serer vahe oso Efeso ve, ahe Apolos, Alejandría iguar. Oñehe tupri ai vahe, oicua tupri avei Tūpa Ñehengagüer. <sup>25</sup>Ahe oyembohe vahe avei yande Yar recocer rese. Omombehu oquerēhisa pipe secocer ava upe, oporombohe tupri ai avei sese. Ahe rumo oicua Juan oāpiramo agüer güeraño tēi. <sup>26</sup>Ahe osiquiyeēhisave judío tūparo pipe omombehu Tūpa Ñehengagüer. Osenduse Aquila, Priscila ñehesa, omombita yuvireco oyepiri. Ahese omombehu tupri catu Tūpa recocer chupe yuvireco. <sup>27</sup>Oso potase Apolos Acaya coti, ahese Jesús reroyasar Efeso pendar omonguerēhi catu. Oyapo cuachiar Acaya pendar upe imondo yuvireco sese hañeco tupri água. Ipore oyepota oso Acaya ve. Aheve oime ava Tūpa guaisusa pipe sui viroya vahe Jesús yuvireco. Ahe ava Apolos oipitívii seroya tupri catu água yuvireco. <sup>28</sup>Omboyecua opacatu rovaque judío

pihañemoñetasa co coti tēi vahe. Ahese opa osecopi oñehe pipe ahe ava. Esepia, Tūpa Ñehengagüer pipe omboyecua ité: “Jesús Tūpa Rembiporavo ava pīsiro água secoi” ehi eté judío eta upe.

### **Pablo omombehu Jesús recocer Efeso ve**

**19** Evocoyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroyasar. <sup>2</sup>Evocoyase oporandu ahe ava upe:

—¿Peipisi vo Espiritu Santo pe piha pipe peroyase Jesús? —ehi chupe.

—Ore ndorosendui eté aipo Espiritu Santo resendar ñehesa —ehiño yuvireco chupe.

<sup>3</sup>Ichui oporandu iri chupe:

—Evocoyase, ¿mbahe nungar vo āpiramosa peipisi? —ehi.

—Juan poroāpiramosa oroipisi —ehi ahe ava yuvireco chupe.

<sup>4</sup>Evocoyase aipo ehi ahe ava upe:

—Juan niha oñapiramo acoi omboasi vahe oangaipa oyevisse Tūpa upe. Ipore rumo omombehu ava upe: “Peroya ahe eté vahe ou vaherā che raquicuei” ehi. Ahe ou vaherā, “Jesús upe” aipo ehi —ehi Pablo chupe.

<sup>5</sup>Osenduse Pablo ñehe, opacatu oñeapiramo uca Jesucristo rer pipe yuvireco. <sup>6</sup>Omondose Pablo opo iharive yuvireco, ahese ogüeyi Espiritu Santo, oique ipiha pipe yuvireco. Ipore aviyeteramo tēi oñehe ambuae ñehesa pipe iyavei omombehu Tūpa suindar ñehesa yuvireco. <sup>7</sup>Ēgüe ehi Tūpa ahe doce mbia yuvirecoi vahe upe.

<sup>8</sup>Mbosapi yasi rupi Pablo oique omombehu Tūpa Ñehengagüer judío upe osiquiyeēhisave itūparo pipe ipihañemoñeta rerova água Tūpa mborerecuasa resendar reroya água rese. <sup>9</sup>Amove rumo judío ipihaviracua

ité seroyaēhi āgua yuvireco. Ipipe iñehe-ñehe tēiño co tecocuer ipiasu vahe mombehusa rese yuvireco ava rehii rovaque. Evocoyase Pablo oyepepi ichui, vinosepa oyeupi Jesús reroyasar yeroquisa Tirano serer vahesave seraso. Aheve ari yacatu rupi oñehe yepi. <sup>10</sup>Ēgüe ehi ñuvirío araviter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer. <sup>11</sup>Tüpa omondo güeco pīratasa Pablo upe poromondiisa apo āgua. <sup>12</sup>Sese pañueru iyavei turucuar Pablo rese imboyapri, ahe serasosa imbaheasi vahe upe imbogüera āgua. Carugar avei opa yuvinose yuvireco ichui.

<sup>13</sup> Amove oime judío oguata vahe ocar rupi carugar mose āgua ava sui. Sese nara oiporu pota yande Yar Jesús rer yuvireco.

<sup>14</sup> Evocoyase aipo ehi carugar upe: “Pablo Jesús recocuer omombehu vahe rer pipe, ‘Peyepepi co mbia sui’ ahe pēu” ehi. Ēgüe ehi pota avei siete Esceva rahir mbahe apo yuvireco viña. Ahe iyesupa judío pahi rerecuar secoi.

<sup>15</sup> Carugar rumo omboyevi chupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño carugar chupe.

<sup>16</sup> Aheseve ahe cuimbahe carugar vireco vahe opo ipāhuve oso. Opacatu opīratasa pipe opa ité osecopi siete mbia yuvirecoi vahe. Omomara-mara tēi oguayihisa pipe imonanipa tupri imondo. <sup>17</sup> Co mbahe sembiapo rēracua opa oyepota opacatu Efeso pendar upe, judío upe, ava ndahei vahe judío upe avei. Evocoyase oyembosiquiye guasu yuvireco. Ipipe sui opacatu oicua yande Yar Jesús rer yuvireco.

<sup>18</sup> Setá Jesús viroya ramo vahe yugüeru opacatu mbahe güembiapocuer naporai vahe mombehu yuvireco

<sup>19</sup> iyavei setá ipaye vahe Jesucristo viroyase, omonuhapa ocuachiar ombopayesa resendar sapi āgua opacatu ava rovaque yuvireco. Sapi pare, opa ahe cuachiar repri vinose yuvireco. Ahe sepri cincuenta mil tupri ari mboraviqui repri. <sup>20</sup> Ēgüe ehi Tüpa opīratasa pipe ombouvicha oñehengagüer iyavei iñehe pīratasa oyecua catu ava rese.

<sup>21</sup> Ipare Pablo ipihañemoñeta Jerusalén ve oso āgua ivi Macedonia, Acaya rupi. “Coixe catu aheve che reco viteseve, ichuive che asora Roma ve” ehi. <sup>22</sup> Evocoyase omondo ñuvirío opītviisar Timoteo, Erasto Macedonia ve güenonera. Ahe rumo opita vitemi Asia rupi oico.

### **Ava Efeso pendar yaivu guasu yuvireco**

<sup>23</sup> Ahe ari pipe Efeso pendar yaivu guasu yuvireco co tecocuer ipiasu vahe rese. <sup>24</sup> Aheve mbia Demetrio serer vahe secoi. Ahe oyapo Artemisa rēta rahanga guarepochi apopri guarepochi pisi āgua. Ambuae ava mbahe rahanga aposar oipisi tupri avei oporaviqui repri ipiri yuvireco. <sup>25</sup> Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, ava mboaivu guasu uca āgua. “Pe mbia, peicua yayapose mbahe Artemisa nungar, yaipisi tupri yande poraviqui repri” ehi omboetasa upe.

<sup>26</sup> “Peicua avei Pablo opa ovirova ava eta piha Artemisa mboeteisa sui ‘ndahei Tüpa ité’ ohesa pipe yande rembiapo uve. Ndahei rumo cohapeño ěgüe ehi, opacatu Asia rupi ěgüe ehi avei imombehu. <sup>27</sup> Aviyeteramo mbahe tēi oimera yandeu yande poraviquisa mocañi tēi āgua, tūparo guasu Artemisa upendar aviyeteramo ocañi tēi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo

rumo ava nomboetei iri chira, iyavei viroïrora yande rembiapo catuprisa yuvireco” ehi.

<sup>28</sup> Osenduse aipo ihe ava yuvireco, oñemoirosa pipe virosapucaí aipo ehi yuvireco: “¡Imboeteipri catu Artemisa yande recua pendar tasecoi!” ehi yuvireco.

<sup>29</sup> Opacatu Efeso rupi ava yaïvu guasu tēi. Osapucaí vahe oipisi Gayo iyavei Aristarco, ahe ñuvirío Pablo rupindar yugüeru vahe Macedonia sui. Oipisise, omombo-mombo seraso yuvireco ava ñemonuha guasusave. <sup>30</sup> Pablo oique pota tēi ava rehii pāhuve, ambuae Jesús reroyasar rumbo nomoingue uca potai yuvireco. <sup>31</sup> Iyavei moviro mborerecuar imboripar Asia rupindar omondo oñeche chupe aipo ehi: “Ereiquei rene ava ñemonuhasa guasuve” ehi avei yuvireco chupe. <sup>32</sup> Ñemonuhasave amove ava osapucaí pīrata ñepeí mbahe rese, amove osapucaí ambuae mbahe rese. Esepia, yaïvu tēi yuvireco. “¿Mahera vo evocoyase yañemonuha?” ehi tēi setá ipāhu pendar yuvireco. <sup>33</sup> Amove rumbo ava rehii pāhuve yuvirecoi vahe judío, ahe ombohe-mbohe imoañi-añi imondo Alejandro mbahe mombehu āgua ava rehii rovaque yuvireco. Alejandro evocoyase omopuha tēi opo ava monguiriri āgua viña. Osepí pota omu judío ava rehii rovaque viña. <sup>34</sup> Ava rehii rumbo oicuase Alejandro judío secose yuvireco. Opacatu guasu osapucaí pīrata yuvireco. “¡Imboetepri catu Artemisa yande recua pendar tasecoi!” ehi pucu-pucu yuvireco. Ēgüe ehi ahe osapucaí ñuvirío hora rupi rutei yuvireco.

<sup>35</sup> Evocoyase tecua pipendar mbahe cuachiasar oicatusé ava monguiriri āgua, aipo ehi chupe: “Peyapisaca mbia pe Efeso pendar, ndipoi ava ndoicuai vahe yande Artemisa tūparo rese yande hañecosa iyavei sahanga íva sui oviapi vahe rese avei hañecosa. <sup>36</sup> Ndipoi niha

ava, ‘Aní’ ehi vaheṛā che remimombehu rese. Sese peyemonguiririño, peyapoi rene mbahe pe yapisacaēhisave. <sup>37</sup> Peruño tēi eté co ñuvirío mbia cohave, ndoyapoi rumbo mbahe tēi Artemisa upe yuvireco. Nimondai mbahe rese itūparove, ndoviroïroi avei serer yuvireco. <sup>38</sup> Sese Demetrio iyavei oporaviqui vahe supi ahe oñemoirose que ava upe, toyuvirasó rane ava recocuer moingatusar upe yuvireco; aheve tomoingatu güecocuer yuvireco. <sup>39</sup> Pemoingatu potase que ambuae mbahe, peso ranera yemomborandusave imoingatu āgua. <sup>40</sup> Mborerecuar revo oyandura yande rembiapo co pipe, ‘¿Mahera peaivu guasu tēi? ¿Che amotarēhimbave tie ēgüe peye?’ ehi tiētera yandeu. Oporanduse yandeu, ndayaicatui chitiētera imboyevi āgua iñeche chupe. Esepia niha, co yañemonuha yande remimbotar tēi cohave” ehi chupe. <sup>41</sup> Aipo ihe pare, omomba aheve oñemonuhasa yuvireco.

### Pablo guata agüer

#### Macedonia, Grecia rupi

**20** Ava aivu guasu pare, Pablo, “Toyugüeru” ehi ava Jesús reroyasar upe. Ahese omboaracua ahe ava. Chupe, “Aviye” ohe pare, oso Macedonia ve. <sup>2</sup> Oguatase Macedonia rupi, omonguerēhi-rēhi avei ambuae Jesucristo reroyasar yuvirecoi vahe tecuatécua rupi. Ipape oyepota Grecia ve oso. <sup>3</sup> Aheve opita mbosapi yasi. Oso potase Siria ve carite pipe, judío ipihañemoñeta mara sereco āgua rese yuvireco. Oyanduse, carite pipe oso rāgüer sui, oyevi iri oso Macedonia ve ívi rupi. <sup>4</sup> Yuvirasó moviro mbia supi, ipāhuve ñepeí Berea pendar, Pirro rahir Sópater; ñuvirío Tesalónica pendar, Aristarco, Segundo; ñepeí Derbe pendar, Gayo; ñuvirío Asia pendar, Tíquico, Trófimo. Timoteo oso avei supi. <sup>5</sup> Evocoi mbia yu-



vıraso Pablo renondeve sãro ãgua Troas ve. <sup>6</sup>Pieta pan ndayapepoi vahe hu pare, orosẽ tecua Filipino sui carite pipe, cinco ari rupi oroyepota Troas ve. Ahe tecuave oropita siete ari rupi.

### **Pablo Troas ve secoi**

<sup>7</sup>Domingu pipe, ore oroñemonuha pan hu ãgua. Ahese Pablo oporombohe oico pıtu mbiter rupi. Esepia, ahe osẽ pota ahere ayihive voi ichui. <sup>8</sup>Ahe oi ivate vahesave ñemonuhasa pipe setá tataendi. <sup>9</sup>Mbia chíhivahe, Eutico serer vahe, metanave oguapı oı. Pablo rumo oñehe pucú iteanga. Evo-coiyase omboopesıi ahe chíhivahe. İpare oquẽ; avieteramo tẽi oviapi oi ivate vahe mbosapisa sui. Ahese ava ogüeyi sehögüer rupi ivi sui yuvireco. <sup>10</sup>Evo-coiyase Pablo ogüeyi ou chupe, oñeno oso sese icuhaguã. İpare aipo ehi Jesús roroyasar upe:

—Pesiquıyei rene; nomanoi moco — ehi.

<sup>11</sup>İpare oyeupi iri oso ombohi pan igua. Ichui oñehe pucu vite. Omomba cõhe senise; ipare oso cute. <sup>12</sup>Evo-coiyase co mbia chíhivahe viroyevise secosave, opacatu oyembovıha guasucatu yuvireco. Esepia, nomanoi eté.

### **Pablo yuvıraso Troas sui Mileto ve**

<sup>13</sup>Pablo oso pota ivi rupi, ore rãngatu rumo oroso carite pipe Aso ve. Aheve oroyepota Pablo reraso ãgua semimbotar rupi. <sup>14</sup>Oroyoepiase aheve, oha carite pipe ore pıri. Ichui oroso cute Mıtılene ve. <sup>15</sup>Ahere ayihive carite pipe oroñocua Quıo oroso. Ambuae ari rese oroyepota Samos ve. Ichui oroso no oroyepota Mileto ve. <sup>16</sup>Pablo ipoyava. Esepia, oipota Jerusalén ve Pentecostés pieta pipe tuprı güeco ãgua. Sese Efeso oroñacuasaño oroso.

### **Pablo ñehesa Jesús roroyasar rãrosareta Efeso pendar upe**

<sup>17</sup>Mileto ve ore recose, Pablo omondo oñehe Efeso ve ‘toyugüeru Jesús roroyasar rãrosar cheu’ oya. <sup>18</sup>Oyepotase yuvireco chupe, aipo ehi: “Peıcuia niha che recocuer aviye ité yıpsıuve ari che reique ramosa resendar co Asia ve. <sup>19</sup>Ari yacatu rupi aporavıquı yande Yar upe pe pãhuve vıchico che reco asiẽhisave che yasehosa pipe. Yepe judıo che mboguai eteprı che recoãhasave pe recuave yuvireco vıña, <sup>20</sup>che rumo ndaıcatui ñehesa aviye vahe mombehuẽhi pẽu mbahe aviye ãgua yepi. Che opombohe ava rehıi rovaque, opombohe avei ñepeı-peı pe rẽta rupi yepi” ehi. <sup>21</sup>“Amombehu ñehesa judıo upe, ava ndahei vahe judıo upe avei aipo ahe: ‘Pemoasi pe angaıpa; peyevi Tũpa upe, peroya avei yande Yar Jesús’ ahe” ehi. <sup>22</sup>“Cũritei asora Jerusalén ve vıchico. Aheve che so ãgua Espıritu che cuai che pıha pipe. ‘¿Mara ehıra pıha yuvireco peve cheu?’ aipo ahe. <sup>23</sup>Co güerãño che aıcuu: opacatu tecua che sosa rupi Espıritu Santo aipo ehi cheu che roquenda ãgua iyavei che mombaraisu ãgua yuvireco yepi” ehi. <sup>24</sup>“Ndacherecatẽhıi rumo cheyese che mano ãgua. Che rumo amboaviye potaño ité che poravıquısa Tũpa upe, ahe yande Yar Jesucristo che cuai vahe co ñehesa icatuprı vahe mombehu ãgua. Co Tũpa oporoaisusa pipe ombou ñepeı vahe Guahir ava pısiro ãgua” ehi.

<sup>25</sup>“Opa niha Tũpa mborerecuasa amombehu pẽu. Che rumo aıcuu ndache repıa iri chıra peye. <sup>26</sup>Sese tapeıcuu cũritei: ndayavıı eté che cuaita mboaviye ãgua co tecocuer aviye vahe mombehu pipe pẽu. <sup>27</sup>Esepia, ndaıcuacui eté Tũpa Ñehengagüer mombehu; che rumo amombehuño ité opacatu Tũpa recocuer pẽu. <sup>28</sup>Sese

peñearo tupri, pesâro avei opacatu Jesús reroyasar Espíritu Santo porocuaite rupi. Inungar ovesa rãrosar, êgüe peye tuprira sâro. Ahe Tûpa remimboepi yuvirecoi. Esepia, Jesús oipiyere vuvi opacatu ava angaipa repirã. <sup>29</sup>Aicua che opoeyare, oyugüerura ambuae ava mahembiar oñaro ai vahe nungar pe pâhuve opacatu Jesús reroyasar mocañipa pota âgua. <sup>30</sup>Oime aveira que ava pe pâhuve pendar pe mbopa pota aveira yuvireco pe reraso âgua oyeupi. <sup>31</sup>Sese pemahemoha tupri peyese. Pemahenduha acoi opomboaracua tuprise mbosapi araviter rupi, pîtu, ari yacatu rupi avei che yasehosa pipe pe rereco” ehi.

<sup>32</sup>“Sese, che rivireta, opoeyara Tûpa povrive iyavei iñehesa iporovasasa resendar pipe. Ahe pe moviracua catura pe rereco iyavei omboura opacatu mbahe güemimombehu pëu opacatu ambuae güembiporavo reseve. <sup>33</sup>Ndahei pe guarepochi, que oro iyavei pe turucuar pota raisa pipe aso pe pâhuve. <sup>34</sup>Peicua niha acoi che po pipe ité aporaviqui che recove âgua, che rupindar recove âgua avei. <sup>35</sup>Êgüe ahe amboyecua che recocuer pëu. Supi avei êgüe peyera; yaporaviqui tupri iparaisu vahe rese hañeco âgua. Pepihañemoñeta acoi yande Yar Jesús remimombehu rese: ‘Sorivete catu ava iporereco vahe, mbahe oipisi vahe sui’ ehi aracahe” ehi Efeso pendar Jesús reroyasar rãrosar upe.

<sup>36</sup>Oñhe pare, oñenopiha oyerure âgua opacatu omboripar reseve. <sup>37-38</sup>Ndoyembovihai eté, “Ndache repia iri chira peye” oyeupe ihese. Sese opacatu oyasehó iteanga yuvireco, oyaco-yaco, osovaupite-pite iri tēi avei yuvireco saisupe. Ipare yuvirasoño ité yuvireco supi carite yemboyasave.

### Pablo so agüer Jerusalén ve

**21** Evocoyase oroseyase ore rivireta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso. <sup>2</sup>Aheve orosepia carite oso va-herã Fenicia ve, ahe ipipe oroha, oroso. <sup>3</sup>Orosasase para guasu oroso, orosepia caha pâhu guasu Chipre serer vahe. Ahe oroñocua yande mbahe rese pocoñisa coti, oroso ivi Siria ve, para guasu rovai. Carite rumo seroyemboyasatecua Tiro ve ipipendar mbahe reya âgua. <sup>4</sup>Aheve orosepia Jesús reroyasar yuvirecoi vahe. Ahese oropita siete ari ipiri. Yepe ahe Jesús reroyasar aipo ehi Pablo upe yuvireco: “Espíritu Santo oñhe oreu. Evocoyase eresoi rene Jerusalén ve” ehi yuvireco chupe viña, <sup>5</sup>siete ari pare rumo, orosoño ité para guasu popive. Opacatu Jesús reroyasar yugüeru, güembireco, guahir reseve-seve ore rupi. Aheve oroñenopihapa ore yerure âgua. <sup>6</sup>“Aviye, toroso rane” ore he pare chupe yuvireco, oroha carite pipe. Ahe evocoyase oyevi yuviraso güetave.

<sup>7</sup>Tiro sui oroso Tolemaida ve. Oroyepotase, oroso Jesús reroyasar repia âgua. Aheve oropita ñepe ari. <sup>8</sup>Ahere ayihive oroso Cesarea ve. Aheve oroique, oropita Felipe rëta ve, ahe oguata vahe Jesús recocuer mombehu. Ahe mbia iporavopri secoi aracaco ambuae seis yuvirecoi vahe pâhuve. <sup>9</sup>Evocoi Felipe vireco irungatu guayri ndomendai vahe. Tayri Tûpa ñhe mombehúsar pâve yuvirecoi. <sup>10</sup>Oropitase setá arimi ipiri, ahese oyepota Judea sui mbia Agabo serer vahe oreu. Ahe avei Tûpa ñhe mombehúsar secoi. <sup>11</sup>Ouse ore pâhuve, virocua Pablo rumbicuasa ichui. Ipipe oñapichi opi, opo avei. Ahese aipo ehi oreu:

—Espíritu Santo oicua uca cheu, na ehira judío Jerusalén pendar co tumbicuasa yar ãpichi yuvireco iyavei

omondora ava ndahei vahe judío upe — ehi Agabo imombehu oreu.

<sup>12</sup>Orosenduse aipo ihe, ore, evocoi Cesarea pendar avei, oromombehu Pablo upe: “Eresoi rene Jerusalén ve” orohe tēi chupe. <sup>13</sup>Omboyevi rumo oreu:

—¡Mahera peyaseho che rese, ndache mbovīhai peye! Che rumo ayemoingatu voi che āpichi uca āgua, che mano āgua rese avei Jerusalén ve yande Yar Jesús recocuer rese —ehi oreu.

<sup>14</sup>Ndroicatuise ipihañemoñetasa rerova āgua, oropoiño ichui aipo orohe:

—Tayaposa ayase yande Yar remimb-otar —oroheño chupe.

<sup>15</sup>Ipare cute oroyemoingatu ore so āgua Jerusalén ve. <sup>16</sup>Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rētave. Ahe oremoingue oyepiri. Ahe yipive ité viroya yande Yar oico.

### **Pablo ombori Santiago**

<sup>17</sup>Oroyepotase Jerusalén ve, ahe pendar Jesús reroyasar nihapisii ore pisi yuvireco. <sup>18</sup>Ahere ayihive Pablo, ore avei oroso Santiago repia. Aheve yuvirecove avei opacatu Jesús reroyasar rārosar Jerusalén pendar. <sup>19</sup>Pablo, “Avirave” ehi opacatu oñemonuha vahe upe. Ipare omombehu tupri yipisuive oyeupe Tūpa mbahe oyapo uca vahe ava ndahei vahe judío pāhu rupi. <sup>20</sup>Osenduse, omboetei guasu Tūpa yuvireco. Omombehu Pablo upe yuvireco:

—Che mu, ereicua setá iteanga judío viroya Jesús yuvireco. Ahe setacuer setá catu mil vahe sui cute. Opacatu evocoi ava iquerēhi vahe Moisés porocuita aracahendar mboaviye āgua yuvireco — ehi—. <sup>21</sup>Osendu tēi nde rembiapo yuvireco. Omombehu tēi avei aipo nde he yande mu ambuae tecua rupindar yuvirecoi vahe upe: “‘Peseya Moisés porocuita. Pembocircuncida iri rene pe rahir. Peico iri rene yande recocuer arac-

ahendar pipe’ aipo ehi tēi oico” ehi nde mombehu yuvireco —ehi Pablo upe yuvireco—. <sup>22</sup>¿Mara yahera vo? Esepia, oyandura nde yepotasa cohava yuvireco. <sup>23</sup>Aviye catu ereyapora ore porocuita oromombehu vahe ndeu. Oime irungatu mbia ore pāhuve. Ahe mbia omboaviyera güemimombehu Tūpa upe yuvireco. <sup>24</sup>Eraso co mbia ndeyeupi, eñemoatiro supi eso, emboepi avei mbahe Tūpa upe icuavēhepri. Ahese ahe mbia oicatura oñeapi yuvireco. Eremboaviyese evocoi mborocuita, opacatu judío nde reroyara, oicua vahe semira tēise mbahe nde rembiapo rese yuvireco. Oicua aveira, nde ereroya vite Moisés suindar mborocuita —ehi yuvireco chupe—. <sup>25</sup>Ndoroyocuai rumo ava Jesús reroyasar ndahei vahe judío evocoi nungar mbahe rese. Esepia, opa icuachiasa chupe: “Pehui rene mbahe mimba yucapri mbahe rahanga tēi upendar seropovēhepri, pehui rene mbahe ruvi, pehui rene mbahe mimba yucapri suvi renosepirēhi vahe iyavei peaguasai rene” orohe chupe —ehi yuvireco.

### **Judío oipisi Pablo tūparo guasu pipe yuvireco**

<sup>26</sup>Evocoiyase Pablo viraso ahe irungatu mbia yuvirecoi vahe oyeupi. Ahere ayihive oyoya oñemoatiro yuvireco. Ipare yuviroique judío tūparo guasu pipe, omombehu yuvireco pahi upe: “Oroñemoatiro ramo. Sese oroyevira siete ari pipe oromombase ore ñemoatirosa. Ahese oromondo pota ndeu porerecosa Tūpa porocuita rupi icuavēhepirā” ehi yuvireco pahi upe.

<sup>27</sup>Opa potase evocoi siete ari, judío Asia pendar osepia Pablo tūparo pipe yuvireco. Ahese omoñemoiro uca opacatu ava rehii tūparo pendar. Ipare ipisise, <sup>28</sup>sāse yuvireco: “¡Ore mu, ore pītivii peye co mbia oroipisi vahe rese! Esepia, oguata opacatu rupi. Oñehe tēi yande

rese, Moisés porocuita rese, yande tū-  
paro rese avei iyavei viroique ava nda-  
hei vahe judío yande tūparo pipe. Sese  
omonguiha tēi yande tūparo maranehi”  
ehi yuvireco chupe.

<sup>29</sup> Co rese aipo ehi. Esepia, cuese os-  
epia Pablo viroguatase Trófimo oye-  
upi, ahe mbia Efeso pendar ndahei  
vahe judío. Sese ipihañemoñeta ‘Pablo  
viroguata ava ndahei vahe judío yande  
tūparo pipe’ oya yuvireco viña.

<sup>30</sup> Opacatu Jerusalén pendar ndasorii  
yuvireco. Cūrteimi ava yuvinoña guasu  
tūparove. Oipisi Pablo ombotiriri senose  
tūparo pipe sui yuvireco. Ahese om-  
boya voi guaquicuei tūparo roquenda  
yuvireco. <sup>31</sup> Oyuca potase yuvireco, ah-  
ese yaivu rēracua oyepota sundao rere-  
cuar guasu upe. <sup>32</sup> Cūrteimi serecuar  
viraso sundao, yuvinoña yaivu vahe upe  
yuviraso. Osepiase ava sundao rerecuar  
guasu, isundao avei yuvireco, ndoyu-  
virocua iri Pablo rese yuvireco. <sup>33</sup> Ah-  
ese ahe sundao rerecuar guasu oyem-  
boya oso Pablo rese, oipisi uca. Ipare oy-  
ocuai osundao, “Tapeicuhacua ñuvirío  
carena pipe” ehi. Evocoiyase oporandu  
ava upe: “¿Ava vo co mbia? ¿Mbahe  
vo oyapo pēu?” ehi judío eta upe.  
<sup>34</sup> Ahese amove ava ñepeí mbahe rese  
oñehe, ambuae, ambuae mbahe rese tēi  
yuvireco. Evocoiyase sundao rerecuar  
ndoicatuí supí eté vahe mbahe rendu  
āgua yaivu guasu vahe pāhuve. Sese,  
“Peraso quartelve” ehi. <sup>35</sup> Viroyepotase  
yeupisave, ichui osupi sundao oachihive  
seraso yuvireco ava rehii ñemoiró itean-  
gasa sui. <sup>36</sup> Ava rehii rumo yuvirasoño  
ité saquicuei, “¡Tomano!” ehi pucu-pucu  
yuvireco chupe.

### Pablo oyoepeí ava rehii rovaque

<sup>37</sup> Omoingue potase Pablo quartel pipe  
yuvireco, aipo ehi sundao rerecuar  
guasu upe:

—¿Iyacatu vo yañemoñeta raimi? —  
ehi.

Evocoiyase, omboyeví mborerecuar  
chupe:

—¿Ereicua vo griego ñehe? —ehi—.  
<sup>38</sup> ¿Ndahei vo nde Egipto pendar, vavasa  
oyapo vahecuer ereico? Nde revo acoi  
ereraso oporoyuca vahe pāve cuatro mil  
tupri ivi iporupirēhisa rupi —ehi sundao  
rerecuar chupe.

<sup>39</sup> Evocoiyase,

—Che judío, tecua Tarso pendar aico.  
Ahe tecua Cilicia pipendar imboeteipri  
vahe secui. Eyapomi mbahe icatupri  
vahe cheu, tañehemi rane catu ava upe  
—ehi.

<sup>40</sup> Evocoiyase mborerecuar, “Aviye”  
ehi chupe. Ipare opūha yeupisa harive,  
omopuha opo ava eta monguiriri āgua.  
Ahese oyapisaca tupri ava rehii yu-  
vireco. Ahe ava upe oñehe hebreo ñehe  
pipe aipo ehi:

**22** “Che mu eta, peyapisaca, che  
añehemira che yoepi āgua pēu  
cūrteí” ehi.

<sup>2</sup> Oñehe hebreo ñehe pipe. Sese os-  
enduse, oyapisaca tupri catu yuvireco.

<sup>3</sup> “Che judío aico. Aha Cilicia ivi  
pipe Tarso ve. Cohave rumo acuacua,  
Jerusalén pipe, Gamaliel che mbohe  
oyeroquisave. Aheve ayembohe tupri  
yande ramoí porocuita rese. Ahe  
che mbohesa pipe avei ayembohe  
Tūpa mboetei āgua rese vichico  
inungar pe peico cūrteí. <sup>4</sup> Che yipindar  
aseca-seca catu ava co Tecocuer Piasu  
rupi oguata vahe yamotarēhisave.  
Supitisave, añapichi-pichi yuvireco  
yepi, asoquenda-quenda cuimbahe,  
cuña avei. Ayuca uca pota rai ahe  
ava yuvireco. <sup>5</sup> Pahi rerecuar ivate  
catu vahe iyavei opacatu tecua pendar  
rerecuar oicua che reco yuvireco. Ichui  
niha aipisi cuachiar aru vaheṛā yande  
mu tūparo rerecuar Damasco pendar  
upe, ‘Taso Damasco ve pahi rerecuar

rer pipe ava Jesús reroyasar pisi água. Ichui tarupa cohava imombaraisu água' ahe viña.

### **Pablo omombehu oñecuñaro agüer**

<sup>6</sup>“Evocoyase aso Damasco ve. Ahe ipiar rupi arovise vicho mbiter ari rupi, aviyeteramo tēi osesape guasu iva sui oreu. <sup>7</sup>Ahese aviapi ivive. Asendu avei ñehesa: ‘Saulo, Saulo, ¿mahera vo che amotarēhi etepri eve?’ ehi vahe cheu. <sup>8</sup>Ahese aporandu: ‘¿Ava vo nde ereico, Mbia?’ ahe chupe. ‘Che Jesús, Nazaret pendar aico. Che niha che amotarēhi etepri che rereco eve’ ehi cheu. <sup>9</sup>Che rupindar osepia sendigüer, osiquiye avei yuvireco ichui. Ndosendui rumo ñehesa cheundar yuvireco. <sup>10</sup>Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epūha, eso Damasco ve. Aheve ava opara omombehu mbahe nde rembiaporā’ ehi cheu. <sup>11</sup>Sendí iteanga vahe, ndache mboesapisoise, ahese che rupindar che po pisi che reraso Damasco ve yuvireco” ehi.

<sup>12</sup>“Aheve mbia, Ananías serer vahe, ou cheu. Ahe Tūpa mboyeroyasar ité, viroya tupri vahe avei iporocuaita; sese opacatu judío secua pendar: ‘Co mbia aviye vahe ité’ ehi yuvireco chupe. <sup>13</sup>Oyepotase, aipo ehi: ‘Che rivri, Saulo, esareco iri’ ehi. Aheseve iporēhi iri mbahe cheu. <sup>14</sup>Ipore aipo ehi: ‘Yande ramoi rembieroya, yande Ru Tūpa, nde poravo güemimbotar cua água. Oipota avei eresepia vaherā ichuindar ava seco ñvi vahe, eresendu aveira ñhehe’ ehi. <sup>15</sup>‘Nde evocoyase eremombehura secocuer opacatu ava upe; eremombehura nde rembiepia, eresendu vahe avei’ ehi cheu. <sup>16</sup>‘Evocoyase, cūrítei ndiya iri eresāro’ ehi. ‘Epūha, toroāpiramo. Eporandu yande Yar upe nde reco moatiro água nde angaipa sui’ ehi Ananías cheu.

### **“Tūpa che mondo ava ndahei vahe judío upe” ehi Pablo**

<sup>17</sup>“Coie catu, ayeve irise Jerusalén ve, ayerure tūparo guasu pipe. Ahese che quer nungarve asepia mbahe. <sup>18</sup>Asepia yande Yar. Ahe aipo ehi cheu: ‘Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che resendar’ ehi Jesús cheu. <sup>19</sup>Che aipo ahe chupe: ‘Che Yar, opacatu che cua nde reroyasar roquenda-quendase, ainupanupa ucuse avei aguatase judío tūparo yacatu rupi’ ahe. <sup>20</sup>Aipo ahe avei chupe: ‘Oyucase Esteban yuvireco, ahe nde recocuer mombehusar, che ahese asepia. Chepiñañemoñeta rupi aviyeño oyucase yuvireco. Sese asāro yucasar yeaosa vihā’ ahe chupe. <sup>21</sup>Che Yar rumo omboyevi cheu: ‘Eso, oromondora coi rupi ava ndahei vahe judío pāhuve’ ehi che Yar cheu” ehi Pablo ava rehii upe.

### **Pablo sundao rereciar guasu povrive secoi**

<sup>22</sup>Aipo rupi osendu ñhehe yuvireco. Ahese rumo osapucaí pīrata yuvireco chupe: “¡Tomano co mbia! ¡Toicove vite iri eme co ivi pipe!” ehi yuvireco chupe. <sup>23</sup>Osapuca-pucaí, osequiipa oyeaosa oñemoirombave yuvireco iyavei omombo-mombo ivi cuhi ivate coti yuvireco yamotarēhimbave. <sup>24</sup>Ahese sundao rereciar guasu omoingue uca cuartelve, aipo ehi osundao upe: “Peinupa, ahese revo omombehura mbahe sui vo sāsē ati yamotarēhimbave ava yuvireco chupe” ehi osundao upe. <sup>25</sup>Oñapichise rumo inupa água yuvireco, Pablo omombehu ñepeí sundao rereciar upe:

—Yepe che judío, che rumo romano avei aico. ¿Iyacatu pīha peinupara romano chupe mbahe rese poranduēhi-seve? —ehi mboreciar upe.

<sup>26</sup> Osenduse iñehe, oso voi omombehu güerecuar upe.

—Eicua catu, aipo mbia romano secoi —ehi.

<sup>27</sup> Evocoiyase sundao rerecuar guasu ou chupe:

—¿Supi eté vo aipo nde romano ereico? —ehi.

—Taa, ahe ité niha aico —ehi.

<sup>28</sup> Ahese sundao rerecuar guasu aipo ehi chupe:

—Che rumo setá guarepochi amondo romano che reco água —ehi.

—Che rumo che ha ramo suive, romano aico —ehiño sundao rerecuar upe.

<sup>29</sup> Ahese oinupa pota vahe osiquiyepave oyepipi yuvireco ichui; sundao rerecuar guasu avei oicuaase Pablo romano secosa rese, osiquiye ñapichi ucase.

### Pablo oyoepi judío porandusa ivate catu vahesave

<sup>30</sup> Ahere ayihive sundao rerecuar guasu oicua tupri pota: ¿Mbahe sui piha judío oyamotarēhi Pablo yuvireco? Evocoiyase oyora. Ahese oyocuai porandusa pendar ivate catu vahe ahe opacatu judío pahi rerecuar, opacatu ambuae judío rerecuar iñemonuha água yuvireco. Ahese oviraso uca Pablo yuvireco chupe.

**23** Aheve Pablo omahengatu ava oñemonuha vahe rese ohā aipo ehi chupe:

—Che mu, che rembiapo mbahe tupri Tūpa rovaque areco yepi che pihañe-moñeta tuprisa pipe —ehi.

<sup>2</sup> Ahese Ananías, ahe pahi rerecuar ivate catu vahe, yipi pendar uve, “Peiyurupete” ehi. <sup>3</sup> Ahese Pablo omboyevi chupe:

—¡Tūpa nde nupara, nde aviye tupri tēi angahu vahe ereico! Nde mbahe rese porandu água cheu porocuaita rupi erei. Evocoiyase, ¿mahera ereporocuai che

yurupete água mborocuaita mboyeroy-aēhisa pipe? —ehi chupe.

<sup>4</sup> Yivirindar aipo ehi yuvireco chupe:

—¡Ereñehe rai rutei seroñrosa pipe co Tūpa rembiporavo, co yande pahi rerecuar ivate catu vahe upe! —ehi yuvireco.

<sup>5</sup> Ahese omboyevi chupe:

—Che mu, ndaicuai co oñehe vahe pahi rerecuar ivate catu vahe secose. Esepia, icuachiapri pipe aipo ehi yandeu: ‘Peñehe rai eme pe rerecuar upe’ ehi —ehi.

<sup>6</sup> Ahese oicuaase oñemonuha vahe pāhuve amove oime saduceo, amove fariseo. Ahese oñehe pīrata chupe:

—Che mu, che fariseo aico iyavei fariseo che yesupa yuvirecoi. Oroviroya avei ava ocuerayevi vaherā curi. Sese revo co imboasipave oporandu mbahe rese yuvireco cheu —ehi.

<sup>7</sup> Aipo he ramoseve voi, fariseo, saduceo oñeñehopepi-epi yuvireco. Sese oyemboyaho yuvireco. <sup>8</sup> Esepia, saduceo ndoviroyai vahe cuerayevisa iyavei “ndipoi Tūpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco. <sup>9</sup> Sese sāse guasu yuvireco. Ahese oime amove opūha vahe Moisés porocuaita rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tēi. Aviyeteramo espíritu que Tūpa rembiguai revo oyemboyecua mbahe mombehu água chupe —ehi yuvireco.

<sup>10</sup> Yaivu guasu catu-catu irise yuvireco, ahese sundao rerecuar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pāhu sui, pe-moingue iri cuartel pipe” ehi.

<sup>11</sup> Ahe pītu pipe, yande Yar oyemboyecua chupe aipo ehi: “Eyemonguerēhi catu, Pablo, inungar che mombehu nde siquiyeēhisa pipe cohava Jerusalén ve,

ēgüe ere aveira che mombehu Roma ve” ehi.

### **Omboguai Pablo yuca āgua yuvireco**

<sup>12</sup> Ahere ayihive setá judío oñemonuha, omboguai Pablo yuca āgua yuvireco: “Tüpa rovaque ndayayucaise Pablo, ndayacarui chira, ndayaihui chiveira; yayucase voi, yacarura, yaihura” ehi yuvireco. <sup>13</sup> Ahe ava aipo ehi vahe retacuer setá catu cuarenta sui. <sup>14</sup> Ichui yuviraso pahi rerecuar upe, tecua pendar rerecuar upe avei aipo ehi:

—Oromboguai Tüpa rovaque Pablo; ndorocarui chira ndoroyucaise —ehi yuvireco chupe—. <sup>15</sup> Sese pe, ambuae porandusa ivate catu vahe pendar avei peporandu ahe sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osēse, oroquētirora sese. Oyepotase ou, oroyucara —ehi yuvireco.

<sup>16</sup> Pablo rihir rumo oyanduse sēracua, oso cuartelve chupe imombehu. <sup>17</sup> Ahese Pablo oñehe sundao rerecuar upe aipo ehi imombehu chupe:

—Erasomi tēi co mbia chīhivahe sundao rerecuar guasu upe. Omombehu pota mbahe chupe —ehi.

<sup>18</sup> Evocoyase mborecuar viraso ahe chīhivahe güerecuar upe aipo ehi:

—Pablo soquendapri oñehe cheu aipo ehi: “Eraso co mbia chīhivahe sundao rerecuar guasu upe” ehi. Co chīhivahe omombehu pota mbahe ndeu —ehi.

<sup>19</sup> Ahese mborecuar guasu oipisi ipo rese, viroyepēpi ambuae sui, oporandu chupe:

—¿Mbahe vo eremombehu pota cheu? —ehi.

<sup>20</sup> Evocoyase ahe aipo ehi:

—Judío rerecuar oyemboyoya yuvireco. Oporandu angahu tēira Pablo rese seraso iri āgua ñemonuhasa ivate

catu vahesave ayihive yuvireco. “Oroporandu pota iri Pablo upe sembiapo rese” aipo ehi tēira yuvireco ndeu —ehi—. <sup>21</sup> Ndereroyai chira ahe iporandusa yuvireco. Esepia, cuarenta sui setá catu ava oquētiro vaheṛā yuvireco sese. Omboguai eté yuca āgua yuvireco. Ndocarui, ndoihui chira aipo ndoyucaise yuvireco. Cūrítei oyemoingatu, osāro viteño nde porocuita yuvireco —ehi mbia chīhivahe chupe.

<sup>22</sup> Ipare sundao rerecuar guasu omboyevi imondo, aipo ehi chupe: “Eremombehui rene ambuae ava upe eremombehu vahe cheu” ehi.

### **Pablo imondosa mborecuar guasu Félix rovai**

<sup>23</sup> Sundao rerecuar guasu ñuvirío opovri pendar sundao rerecuar upe aipo ehi yocuai: “Pemoingatu doscientos sundao Cesarea ve yuviraso vaheṛā opi rese, ambuae setenta sundao cavayu harive iyavei doscientos tupri toguata lanza resendar yuvireco. Ipare pesopara pītuse las nueve pipe” ehi. <sup>24</sup> “Pemoingatu uca avei cavayu Pablo yeupi āgua. Ēgüe peye pesāro tuprira seraso yande rerecuar Félix upe” ehi. <sup>25</sup> Evocoyase sundao rerecuar guasu oicuachía Félix upe imondo. Aipo ehi chupe:

<sup>26</sup> “Imboeteipri ore rerecuar Félix. Che, Claudio Lisias, amondo che mahenduhasa ndeu. <sup>27</sup> Iyavei co amombehu pota ndeu: judío oipisi co mbia yuvireco yuca āgua viña. Che rumo aicua romano seco rese, ahese araso sundao sepi āgua judío eta sui <sup>28</sup> ‘¿mbahe rese pīha ndoyambotai yuvireco?’ viya. Sese araso judío porandusa ivate catu vahe pendar upe ñemonuhasave yuvireco. <sup>29</sup> Ahese aicua yamotarēhisa judío porocuita sui tēi iyavei ndoyapoi mbahe tēi oreu. Sese ndiyai yuca āgua oreu, soquenda āgua avei. <sup>30</sup> Ayanduse rumo judío oquētiro

sese yuvireco, amondo voi evocoi mbia ndeu. Ipape amombehu yamotarēhisar upe: ‘Peporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

<sup>31</sup> Evocoiyase ahe pītu pipe sundao viroguata Pablo ocuaita rupi yuvireco, viraso Antīpatris ve yuvireco. <sup>32</sup> Ahere ayihive sundao yuviraso vahe opi rese oyevi yugüeru cuartelve. Sundao cavayu ari pendar güeraño rumo yuvirasoño vite. <sup>33</sup> Viroyepotase Cesarea ve, omondo cuachiar mborerecuar guasu upe yuvireco. Aheseve avei Pablo omondo yuvireco chupe. <sup>34</sup> Oyeroqui pare mborerecuar cuachiar rese, oporandu Pablo upe: “¿Que pendar vo nde ereico?” ehi. “Che Cilicia cotindar aico” ehi.

<sup>35</sup> —Oyepotase nde amotarēhisar yuvireco, asendura nde yoepisa —ehi Félix chupe.

Evocoiyase oyocuai opītiviisar Pablo rāro āgua güētave Herodes rembiapogüer pipe.

### Pablo oyoepi mborerecuar Félix rovai

**24** Cinco ari pare, Ananías, ahe pahī rerecuar ivate catu vahe, tecua pipendar rerecuar avei yugüeru Cesarea ve. Ou avei mbia ava mbahe aposar pītiviisar oñehe vaheṛā Pablo amotarēhi uca āgua, ahe serer Tértulo. Ahe yugüeru Pablo recocuer mombehu āgua mborerecuar Félix upe. <sup>2</sup> Evocoiyase Félix güeru uca Pablo. Ahese Tértulo omboipi sese oñehe aipo ehi Félix upe:

—Nde imboyeroyapri ereico. Aviye ndeu nde porocuai tuprisa rese. Esepia, ndipoi vavasa ore recua rupi. Ereyapo uca avei ore recua pipe mbahe iporañete vahe nde poroaisusa pipe. <sup>3</sup> Opacatu rupi nde ereyapo tupri vahe oroipisi. Sese, “Aviye ndeu” orohe ndeu, imboyeroyapri Félix. <sup>4</sup> Ndoromombita pucu potai

rumo che ñehe pipe. Sese eyapisaca raimi tēi catu che ñehe rese —ehi—. <sup>5</sup> Oroyandu co mbia ava mañeco tēisar oguata opacatu ivi rupi. Ore judío, ore mboyaho ore yeamotarēhi uca āgua, ahe Jesús, Nazaret pendar, reroyasar rerecuar —ehi—. <sup>6</sup> Viroique avei ava ndahei vahe judío ore tūparo pipe. Ēgüe ehi ore tūparo momara. Sese co oroipisi —ehi—. <sup>7</sup> Evocoi sundao rerecuar guasu Lisias rumo oyepota ore pāhuve. Ahe opiratasa pipe vinose ore po sui, <sup>8</sup> aipo ehiño oreu: “Peso, tapemombehu co mbahe sembiapo Félix upe” ehi. Nde avei ereporandura sembiapo rese mbahe sui eté vo Ēgüe orohe chupe —ehi Tértulo.

<sup>9</sup> Aipo ehi tupri avei ambuae judío yugüeru vahe yuvireco supi. <sup>10</sup> Ipape Félix oyaiti Pablo upe ‘toñehe’ oyapave. Ahese oñehe:

—Aicua nde ereporocuai setá araviter ore recua rupi. Sese ayoepira nde rovaque che rorivetesā pipe —ehi Félix upe—. <sup>11</sup> Nde ereicua tupri potase, ereporandura supi eté co pipe doce ari ramo opa che yepotare Jerusalén ve Tūpa mboetei āgua. <sup>12</sup> Co judío oicua yuvireco nañehengatai ava upe tūparo guasu pipe, namboaiyu ucai avei ava ambuae judío ñemonuhasa rupi iyavei que ambuae ava Jerusalén pendar —ehi—. <sup>13</sup> Co mbia ndoicatu eté mbahe che rembiavi mombehu seroya tupri āgua yuvireco ndeu. <sup>14</sup> Co rumo amombehu vahe ndeu: che amboetei Tūpa, ore ramoi rembieroya Tecocuer Piasu pihañemoñetasa rupi. Co judío upe rumo: “Co porombohesa co coti tēi vahe” ehi. Che rumo aroya ité opacatu icuachiapri porocuita pipendar iyavei Tūpa ñehe mombehusar rembicuachiagüer avei —ehi—. <sup>15</sup> Inungar co mbia, Ēgüe ahe tupri avei aicua Tūpa ombogüerayevira ava omano vahecuer seco aviye vahe, ndaseco pōrai vahe avei coiye. <sup>16</sup> Sese ayemoviracua tupri che



pihañemoñetasa rereco tupri catu água yepi Tūpa rovaque, ava rovaque avei.

<sup>17</sup>“Setá araviter pare ayevi che recua Jerusalén ve ava iparaisu vahe upe por-erecosa mondo água. Ahese avei mbahe mímba ayuca uca Tūpa upe seropovêhe água. <sup>18-19</sup>Evocoiyase moviro judío Asia pendar che repia yuvireco Jerusalén ve tūparo pipe judío porocuita rupi che ñemoatiro pare. Ndipoi ahese ava rehí che rupi, namboaivu guasu ucai avei avei. Ahe che repia vahe rumo iya yugüeru ndeu che mombehu, que virecose che amotarêhisa yuvireco viña.

<sup>20</sup>Anise, aviyeteramo co oyepota vahe cohava yugüeru, omombehura ndeu que mbahe che rembiavi yuvireco pahi rerecuar guasu ñemonuhasave che reique-sendar” ehi. <sup>21</sup>“Co rese revo oñemoiro yuvireco cheu aipo ahe pīratase ipāhuve: ‘Che aroya ava ocuerayevira coiye. Sese che reraso pe rovai co pipe che recoãha água yuvireco’ ahese” ehi Félix upe.

<sup>22</sup>Félix oicua tupri co Tecocuer Piasu. Sese osendu pare aipo ñehesa, ndoyapo pota vitei mbahe, aipo ehiño ava upe:

—Oyepotase Lisias, ahe sundao rerecuar guasu, ahese voi aicua tupri catura aipo mbahe sembiapo —ehi Félix ava upe.

<sup>23</sup>Evocoiyase oyocuai sundao rerecuar Pablo rāro água: “Eremondomira rumo que mbahe semimbotar apo água chupe iyavei imboripar yugüeruse, tihañecoño yuvireco sese. Ēgüe ere sāro” ehi Félix sárosar upe.

<sup>24</sup>Moviro ari pare Félix viroyepota güembireco Drusila, ahe judía avei. Ahese Félix güeru uca Pablo, osendu pota iñehe Jesucristo reroyasa resendar yuvireco. <sup>25</sup>Pablo rumo omombehuse chupe teco ñvisa resendar, teco ñearosa resendar avei iyavei aipo ehise: “Tūpa oporandura mbahe yande rembiapogüer rese yandeu ari cañise coiye” ehise, ah-

ese Félix osiquiyepave aipo ehi Pablo upe:

—Esoño rane. Arecose ari nde ñehe rendu iri água, orogüeru uca irira —ehiño.

<sup>26</sup>Félix ipihañemoñeta yepi ‘Pablo revo omboura guarepochi cheu osê água’ oya viña. Sese osāro pucu tēi. Iyavei setá oyupagüer güeru uca oyeupe oñemoñeta água sese. <sup>27</sup>Ñuvirío araviter pare rumo, Porcio Festo oique Félix recuñara. Ahese Félix judío mboviha água, oseya Pablo soquendasave.

### Festo rovai Pablo imondosa

**25** Mbosapi ari oyepotare Festo osē Cesarea sui, oso Jerusalén ve.

<sup>2</sup>Aheve oyepotase, pahi rerecuareta, judío rerecuareta avei omombehu Pablo recocuer yuvireco chupe. <sup>3</sup>Ipare oporandu chupe: “Emboumi uca Pablo cohava oreu” ehi yuvireco ‘yayuca perirupive’ oyapave yuvireco viña. <sup>4</sup>Festo rumo aipo ehi chupe: “Aní. Esepia, Pablo Cesarea ve soquendasa oico iyavei che ayevi piaivira vicho aheve” ehi.

<sup>5</sup>—Sese pemondo pe rerecuar che rupi. Naporaise co mbia rembiapo, aheve tomombehu yuvireco cheu sembiapocuerai sereco mara água —ehi Festo chupe.

<sup>6</sup>Evocoiyase Festo opita Jerusalén ve ocho ari rupi revo, anise diez ari. Ipare oyevi oso Cesarea ve. Ahere ayihive oguapi güendave ava reco moingatu água oí. Ahese oyocuai Pablo reru água. <sup>7</sup>Oyepotase Pablo oso, ahese judío yugüeru vahe Festo rupi, oyemboya yuvireco sese. Ahese omombehumbehu tēi Festo upe Pablo rembiapo yuvireco, ndoicatui eté rumo seroya uca água yuvireco. <sup>8</sup>Esepia, Pablo aipo ehi oyoepisave:

—Ndayemboangapai judío porocuita rese, judío tūparo rese,

yande rerecuar guasu Roma pendar Cesar rese avei —ehi.

<sup>9</sup>Festo rumo omboviha pota judío, sese oporandu Pablo upe:

—¿Ndequerēhi vo Jerusalén ve ereso vahe? Aheve co mbahe nde rembiapo rese aporandura ndeu —ehi chupe.

<sup>10</sup>Ahe rumo omboyeve chupe:

—Cūrítei aico cohava romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ereicua ndipoi eté mbahe tēi ayapo judío amotarēhisave —ehi—. <sup>11</sup>Ayapose que mbahe naporai vahe, aviyeño che yuca uca āgua eve; ndayapoise rumo co judío omombehu vahe yuvireco ndeu, ndiyai che mondo āgua evocoi ava povrive eve. Che rumo aso pota mborerecuar Cesar ivate catu vahe upe cheu mbahe rese porandu āgua —ehi.

<sup>12</sup>Ahese Festo oñemoñeta opītiviisar oporomboaracua vahe rese, ipare omombehu Pablo upe:

—Ereso pota Cesar upe. Aviye, eresora evocoiyase —ehi chupe.

### **Pablo mborerecuar Agripa rovai**

<sup>13</sup>Evocoiyase moviro ari pare, evocoi mborerecuar guasu Agripa, cuña Berenice rese, oyepota Cesarea ve “avirave” apo āgua Festo upe yuvireco.

<sup>14</sup>Opitase yuvireco setá ari Cesarea ve, Festo omombehu Agripa upe Pablo recocuer. Aipo ehi chupe:

—Oime ñepeí mbia soquendapri oseya vahe Félix cheu —ehi—. <sup>15</sup>Aose Jerusalén ve, judío pahi rerecuareta, tecua pendar rerecuareta avei omombehu yuvireco cheu secocuerai, ‘Tayucasa, tehi chupe’ oya yuvireco viña —ehi—. <sup>16</sup>Ahese aipo ahe yuvireco chupe: “Ndiyai eté romano mborerecuar omondo vahe que ava uve sese oñemoñeta vahe rese mbahe moingatuēhi renondeve. Toyoepeí rane

omombehusar rovai, tomombehu tupri rane opacatu güecocuer” ahe judío upe —ehi—. <sup>17</sup>Sese yugüeruse cohava yuvireco, aporandu voi pota secocuer rese chupe. Evocoiyase ñepeí ari pare aguape che rendave porandusave. Ahese ayocuai che pītiviisar evocoi mbia reru āgua —ehi—. <sup>18</sup>Evocoiyase opūha sese oñemoñeta vahe sembiapo ai mombehu āgua. Asendu renondeve che pīhañemoñeta: “Oyapo revo mbahe naporai vahe” ahe viña. Ndipoi eté rumo mbahe sembiapo —ehi—.

<sup>19</sup>Mbahe sembieroya tēi omombehu yuvireco. “Evocoi Jesús omano” ehi ava yuvireco. Pablo rumo aipo ehi imombehu: “Jesús oicoveño ité” ehi. <sup>20</sup>“¿Mara ahera pīha co sembiapo moingatu?” ahe tēi. Sese aporandu chupe: “¿Ndequerēhi vo Jerusalén ve mbahe nde rembiapo rese porandu āgua ndeu?” ahe chupe —ehi—. <sup>21</sup>Pablo rumo oporandu cheu Cesar upe oso āgua. Oipota mborerecuar ivate catu vahe oyeupe mbahe güembiapo rese porandu āgua. Sese asoquenda ucaño vite sereco imondo āgua Cesar upe —ehi Agripa upe.

<sup>22</sup>Evocoiyase Agripa aipo ehi chupe:

—Asendu pota avei ahe mbia ñehe —ehi.

Ahe aipo ehi chupe:

—Ayihive voi teresendu —ehi.

<sup>23</sup>Ahere ayihive, Agripa oyepota, Berenice rese yugüeru chupe inungar opivondi vahe, ēgüe ehi yuviroique mborerecuar ñemoñetasave sundao rerecuar iyavei opacatu tecua pipendar ava seco ivate catu vahe reseve. Ahese Festo oyocuai opītiviisar Pablo reru āgua yuvireco, <sup>24</sup>aipo ehi:

—Ore rerecuar guasu Agripa iyavei opacatu ambuae yuviroique vahe, peyapisaca: pesepia co mbia. Co mbia rese judío eta oñehe tēi yuvireco Jerusalén ve iyavei cohava Cesarea ve.

Osapucaí pírata tēi yuvireco ‘¡tomano ité evocoi!’ oya yuvireco cheu —ehi—. <sup>25</sup>Ndayosui rumo mbahe sembiapo yuca uca āgua iyavei oporandu oso āgua mborerecuar ivate catu vahe Cesar upe. Sese che ayemoingatu ité imondo āgua chupe. <sup>26</sup>Ndarecoi rumo mbahe naporai vahe aicuachía vaherā imondo āgua chupe. Sese aru uca co mbia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeteramo oimera mbahe icuachiapirā sesendar Cesar upe nara —ehi—. <sup>27</sup>Chepihañemoñeta amondose co mbia chupe, naporai cheu ndipoise mbahe sembiapo ai —ehi Festo Agripa upe.

#### **Pablo omombehu güecocuer Agripa rovai**

**26** Evocoyase Agripa aipo ehi Pablo upe:  
—Emombehuño nde yoepisa cheu —ehi.

Ahese Pablo omopuha opo oñehe āgua aipo ehi: <sup>2</sup>“Ore rerecuar Agripa, ayoepira che rorivetesave judío che rese ñemoñeta-ñeta tēisa sui mbahe che rembiapoēhi rese nde rovai. <sup>3</sup>Esepia, ereicua tupri opacatu judío recocuer, ipihañemoñetasa avei. Sese eyapisacami nde reco mbeğüesa pipe che ñehe rese” ehi.

#### **Pablo omombehura güecocuer oñecuñaro vitechisendar**

<sup>4</sup>“Opacatu judío che cua vahe yuvireco, oicua tupri che recocuer che chíhivahe suive che recuave iyavei Jerusalén ve aicose yuvireco. <sup>5</sup>Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recua rupi’ ehira yuvireco viña. <sup>6</sup>Sese cūrítei che reru nde rovai yuvireco che recocuer

rese nde porandu āgua. Esepia, aroya Tūpa remimombehugüer ore ramoi uve omombehu vahe aracahe” ehi. <sup>7</sup>“Doce ore ramoi suindar opacatu judío yuvirecoi, osāro vite evocoi Tūpa remimombehugüer aviye vahe yuvireco. Sese yuviroique tūparove ari, pītu pipe avei Tūpa mboetei āgua yuvireco. Ore rerecuar Agripa, eyapisaca tupri che ñehe rese. Evocoi Tūpa remimombehugüer reroyasa sui judío eta semira-mira tēi che amotarēhisave che rese yuvireco” ehi. <sup>8</sup>“Iyavei opacatu pe, ¿mahera pe avei ndaperoyai Tūpa porombogüerayevisa?” ehi.

#### **Pablo omombehu yipindar Jesús reroyasar amotarēhi agüer**

<sup>9</sup>“Yipindar che avei che pihañemoñeta rai aracaco mbahe tēi apo āgua rese ava Jesús, Nazaret pendar, rer amotarēhisave. <sup>10</sup>Ēgüe ahe Jerusalén ve. Ombouse pahi rerecuar oporocuita cheu, ahese serer pipe setá Jesús reroyasar asoquenda; iyavei ambuae ava oyucase Jesús reroyasar yuvireco, ‘Toyucaño yuvireco’ ahe voñño ité che” ehi. <sup>11</sup>“Setá rupi amombaraisu Jesús reroyasar ‘tamomboipa ava seroyasa sui yuvireco’ che hesa pipe tēi. Ēgüe ahe aguata opacatu tūparo rupi, ambuae tecua rupi avei yamotarēhisa pipe” ehi.

#### **Pablo omombehu güeco recuñaro agüer**

<sup>12</sup>“Evocoyase aso avei Damasco ve Jesús reroyasar mombaraisu āgua, pahi rerecuar ombouse oporocuita apo āgua cheu” ehi. <sup>13</sup>“Mbiter ari rupi rumo, aguatase Damasco piar rupi, asepia mbahe sendí vahe iva sui. Ari sui osesape catu cheu, che rupindar upe avei. <sup>14</sup>Oroviapipase ivive, asendu ñehesa aipo ehi vahe hebreo ñehe pipe cheu: ‘Saulo, Saulo, ¿mahera vo ereyapo mbahe-mbahe tēi cheu? Ereyapose evo-

coi mbahe tēi, nde ae ereyemombaraisu' ehi cheu. <sup>15</sup> Evocoiyase amboyevi: '¿Ava vo nde ereico, mbia?' ahe chupe. Omboyevi cheu: 'Che Jesús aico, che niha co che amotarēhi eve. <sup>16</sup> Epūha, co rese ayemboyecua ndeu, tasecoi che rembiguai, che yapave. Tomombehu avei co mbahe osepia vahe iyavei tomombehu avei co mbahe amboyecua vaheṛā chupe curi, viya ndeu' ehi. <sup>17</sup> 'Oropīsiroa judío sui iyavei oromondora ava ndahei vahe judío upe. Ereuatase ipāhuve, oropīsiro aveira' ehi cheu. <sup>18</sup> 'Oromondora, tache cua yuvireco, che yapave iyavei toguata iri eme pītumimbi vahe nungar rupi; toguata catu tesapesa rupi yuvireco. Ipīpe sui toyuvireco iri eme caruguar povrive yuvireco; toguata catu Tūpa rupi; ēgūe tehi che reroya yuvireco. Ahese oipīsira ñeroisa oangaipa rese yuvireco iyavei oipīsira Tūpa porerecosa oime vaheṛā opacatu che rembipeha rupive' ehi Jesús cheu" ehi Agripa upe.

### **Pablo viroya mbahe güembiepia**

<sup>19</sup> "Evocoiyase, che rerecuar Agripa, che quer nungarve asepiā vahe iva pendar, aroya ité. <sup>20</sup> Aipo ahe ava upe: 'Pemboasi pe angaipa; peyevi Tūpa upe. Peicove tupri, ipīpe sui toicua ava yuvireco pe ñecuñarosa' ahe. Aipo ahe Damasco pendar upe rane añehe, ipare Jerusalén pendar upe iyavei Judea rupindar upe, coiye catumi ava ndahei vahe judío upe. <sup>21</sup> Sese tēi judío che pisi tūparo pīpe che yuca pota yuvireco" ehi. <sup>22</sup> "Tūpa che pītiviisa pipe rumo aicoveño ité supi, amombehumbehu vite Tūpa recocuer opacatu ava seco ivi coti catu vahe upe, seco ivate catu vahe upe avei. Namombehui eté que mbahe co coti tēi Tūpa ñehe mombehusar iyavei Moisés, 'Oimera mbahe aviye vahe' ihe agüer sui. <sup>23</sup> Aracahē omombehu yuvireco: 'Tūpa Rembiporavo Poropīsirosar omano ranera'

ehi. Ahe rumo yipindar ocuerayevi vaheṛā omano vahe pāhu sui. Omombehu aveira tesapesa ñepisirosa resendar ore mu judío yuvirecoi vahe upe iyavei ava ndahei vahe judío upe avei" ehi Agripa upe.

### **Pablo osecuñaro pota tēi Agripa recocuer**

<sup>24</sup> Aipo ehise Pablo oñehe oyoepisave, Festo oñehengataño chupe aipo ehi:

—¡Nande mboaracuai moco nde mbahecia vaisa! —ehiño chupe.

<sup>25</sup> Ahe rumo omboyevi chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supi eté vahe, ndahei che aracuaēhisave —ehi Festo upe—.

<sup>26</sup> Co mborerecuar revo oicua tupri avei che remimombehu. Sese ndasiquiyei opacatu co mbahe mombehu āgua chupe. Esepia, opacatu co mbahe yaposa vahe ndahei ñomipri tēi. <sup>27</sup> Ore rerecuar Agripa, ¿ereroya vo evocoi Tūpa ñehe mombehusar rembicuachía? Che aicua ereroya ité —ehi Agripa upe.

<sup>28</sup> Ahese Agripa omboyevi chupe:

—Moviro tēi ñehesa ipane cheu Jesús reroya āgua —ehi chupe.

<sup>29</sup> Ahe omboyevi Agripa upe:

—Ipanese que moviro tēi, anise setá vite ñehesa ndeu iyavei opacatu osendu vahe che ñehe co pipe, ēgūe ehi tarahu Tūpa pēu viña che nungar pe reco āgua. Ndahei chira rumo soquendapirā peico —ehi.

<sup>30</sup> Aipo ihe pare, mborerecuar guasu iyavei ambuae mborerecuar Berenice reseve iyavei opacatu sendusar opūha yuvireco. <sup>31</sup> Oyepepi pare, oñemoñeta co coti aipo ehi yuvireco:

—Evocoi mbia ndoyapoi eté mbahe. Sese ndiyai yucapirā; ndiyai avei soquendapirā viña —ehi yuvireco oyeupe.

<sup>32</sup> Ahese Agripa aipo ehi:

—Ahe ndoporanduisse Cesar upe oso āgua rese, yamoseño itera niha viña — ehi Festo upe.

### Pablo imondosa Roma ve

**27** Evocoiyase mborerecuar opihañemoñeta omboyoya yuvireco ore mondo āgua carite pipe Italia ve. Sese omodo Pablo iyavei ambuae ava soquendapri yuvireco mbia Julio serer vahe upe. Ahe mbia sundao rehii rerecuar secoi, ahe yuvirecoi vahe rer Mborerecuar upendar. <sup>2</sup>Oroha carite pipe, ahe Adramitio sui yuvirasota vahe Asia ve. Mbia Tesalónica pendar, Aristarco serer vahe, oha avei ore rupi, ahe secua Macedonia ivi rupi. <sup>3</sup>Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguata tupri nde mboripar rēta rupi nde rese ihañeco tupri āgua yuvireco” ehi chupe. <sup>4</sup>Sidón sui orosirise, oroso Chipre ivii rupi ivitu sui ore ñemoha āgua. Orosopotēi ari sosa coti rupi, ndoroicatu rumo. Esepia, oipeyu pīrata ivitu icoti sui. <sup>5</sup>Evocoiyase oroguata para guasu pipe Cilicia, Panfilia ivii rupi. Ipare oroyepota tecua Mira yemboyasave, ahe Mira, Licia ivi pipe.

<sup>6</sup>Aheve sundao rerecuar oyosu carite ou vahe Alejandría sui, oso vaheṛā Italia ve. Evocoiyase ahe ipipe opa voi ore mboha. <sup>7</sup>Ichui oroguata mbegüe setá ari. Oroporaviquí iteanga oreypota āgua Gnido rovai. Ivitu oipeyu pīrata vite. Sese oroyahuva Creta coti, oroñocua tecua Salmón rovai rupi. Ēgüe orohe oroso Creta cupe rupi. <sup>8</sup>Supi yavairai ore guata āgua, ipare oroyepota yemboyasa Yemboyasa Aviye vahe serer vahesave. Ahe ichui namombrii tecua Lasea.

<sup>9</sup>Ore yepota āgua aheve, setá ari oro-mocañi. Ahese ivitu naporai catu oreu cute. Esepia, virovi ari naporai catu

vahe. Sese Pablo aipo ehi carite pipendar upe:

<sup>10</sup>—Mbia, naporai iri chira revo yande guata vite āgua. Yaguata vītese, yamocañira carite, ivosiita reseve, yande avei eté aviyeteramo yacañi tēira —ehi.

<sup>11</sup>Sundao rerecuar rumo nomboyeroyai iñehe, ahe omboyeroya catu carite reroguatasar, carite yar avei. <sup>12</sup>Ahe yemboyasa naporai ivitu ai rāro āgua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasāro ivitu ai” ehi yuvireco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi avei yepi.

### Ivitu ai para guasu pipe

<sup>13</sup>Oipeyu mbegüemise ivitu irohi coti sui, ipihañemoñeta yuvireco, “Yaicatuño ité yande yepota āgua” ehi yuvireco viña. Ahese orosirise ore yemboyasa sui, oroso Creta ivii rupi. <sup>14</sup>Coiyemi tēi rumo oyepota ivitu ai oreu Creta coti sui. Ahe ivitu ai ou norte ique coti sui. <sup>15</sup>Oyepotase oreu, ndoroicatu iri eté sovañichi. Evocoiyase, “Tayande rerasoño” orohe chupe. <sup>16</sup>Oroñocua caha pāhumi serer Cauda. Ahe oroñocuasave oroviroha sāi ore caritemi ore carite guasu pipe. <sup>17</sup>Orosupire, ahe oicuhacua carite guasu inicha pipe yuvireco. Ipare ipihañemoñeta yuvireco ‘carite oyeupi tiētera ivi cuhi Sirte serer vahe harive’ oya. Sese opa viroyi imombitasa yuvireco. Ahese ivitu ore reroguatano. <sup>18</sup>Ivitu rumo ombohitú iteanga para guasu. Sese ahere ayihive oporaviqui vahe omboipi carite vosiita mombo yuvireco. <sup>19</sup>Imombosapisa ari pipe, omombo vite mbahe carite resendar yuvireco. <sup>20</sup>Setá ari ndoyecuai ari, yasitata avei oreu. Ivitu ai ndopaiño ité avei. Opa ité ore pihañemoñeta

mocañi, “Yacañi tēi etera para guasu pipe” orohe viña.

<sup>21</sup>Setá ari ore caruēhi pare, Pablo opūha aipo ehi carite pipendar upe:

—Mbia, ehi acoi che roroya voira peye viña, nayasēse Creta sui, ahese ndipoi chira co mbahe yandeu cūritei viña —ehi—. <sup>22</sup>Cūritei, peyemonguerēhi catuño. Esepia, ndipoi chira yande pāhu pendar omano vahe, carite giëraño rumo ocañi tēira. <sup>23</sup>Ayihi pisa oyemoporēhi cheu Tūpa rembiguai semimbou, chupendar che aico, chupe avei aporaviqui. <sup>24</sup>Ahe aipo ehi cheu: “Pablo, eresiquiei rene. Ereyepotaño itera Cesar upe. Tūpa oipisiro aveira opacatu nde rupindar carite pipendar” ehi cheu. <sup>25</sup>Mbia, ayeroya Tūpa rese. Esepia, ahe omboaviye itera oñehesa cheu. Sese peyemonguerēhiño —ehi—. <sup>26</sup>Yande mohañira rumo imbehi coti caha pāhumi rese yande mondo —ehi.

<sup>27</sup>Ñuvirío semana ivitu ore reroguata pare ahe pītu mbiter pipe para guasu Adriático rupi oroicose, carite pipe oporaviqui vahe ipihañemoñeta yuvireco ‘yarovi revo ivi yaico’ oya. <sup>28</sup>Sese osāha para guasu ripigüer yuvireco. Ahe tipigüer treinta y seis metros tupri. Ipare osiri irimi yuvireco. Aheve osāha iri, tipigüer veintisiete metros tēi. Ahese oicua, “Yarovi ivi” ehi yuvireco. <sup>29</sup>Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiyepave omombo irungatu carite mombitasa tuvicha vahe ipive yuvireco. “¡Omocohe voi tarahu Tūpa yandeu viña!” orohe tēi. <sup>30</sup>Oñemi potase oporaviqui vahe carite guasu sui yuvireco, viroyi caritemi mbahemohasa. Ombopa pota tēi ambuae carite pipendar yuvireco viña, “Oromombora carite renonendar imombitasa” ehi tupri tēi yuvireco. <sup>31</sup>Pablo rumo aipo

ehi sundao rerecuar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

<sup>32</sup>Ahese sundao eta oyasia caritemi sã oiti ive imondo yuvireco.

<sup>33</sup>Cõhe ramosé Pablo aipo ehi opacatu upe:

—Cūritei ñuvirío semana pemomba pecaruēhi peico ‘¿mara yahera pīha co yaico?’ pe hesa pipe. <sup>34</sup>Evocoyase pehuñomi mbahe cute pe ñepisiro āgua. Acoi ocañise carite, yande rumo nayacañi chira iyavei que ñepi pe ha nocañi chietera —ehi Pablo.

<sup>35</sup>Aipo ehi pare, oipisi pan, “Aviye ndeu” ehi Tūpa upe ihu āgua. Ahe imbohi pare, ohu. <sup>36</sup>Evocoyase opacatu ava oyemonguerēhi yuvireco ocaru āgua. <sup>37</sup>Ore retacuer doscientos setenta y seis tupri. <sup>38</sup>Ore caru pare, oporaviqui vahe opa omombo trigo carite vosiita para guasu pipe iposiiēhi āgua yuvireco.

### Carite ocañi

<sup>39</sup>Cõhese, osepiase ivi, “¿Que pīha yaico?” ehi tēi yuvireco. Oyosuse rumo yācua vahe, ipipe oime ivi cuhi ipiru vahe. Aheve yuviroique pota tēi yuvireco viña. <sup>40</sup>Oyasia ahe carite mombitasa cuasa carite sui yuvireco, omonguhi carite mboyahuvasa, osupi carite resendar turucuar imboguatasa yuvireco. Evocoyase oroique oroso yācua vahe pipe. <sup>41</sup>Oroguatase rumo, oroyapi ivi cuhi. Aheve carite opāha ité sese. Ndoicatui eté seroyevi yuvireco iyavei carite rupita i ohitu vahe opa tupri oyoca.

<sup>42</sup>Ahese sundao eta, “Aviyeteramo soquendapri ohita tiētera, oñemi yuvireco. Sese yayucapa” ehi yuvireco chupe viña. <sup>43</sup>Sundao rerecuar rumo ndoipotai Pablo mano āgua, sese, “Teheni” ehi,

“peyucai rene soquendapri” ehi. “Ohita oicua vahe rane toyuvirocui ive, toyuvinose ivi rese yuvireco” ehi. <sup>44</sup>“Ambuae evocoyase ivirape, carite yecacuer rese toyasecoño yuvinose āgua ivi rese” ehi. Ēgüe orohe orosēpa ivi rese oroso.

### Caha pāhu Malta ve Pablo secoi

**28** Ore ñepisiropare, ahese ramo oroicua caha pāhu rer Malta revo rahe. <sup>2</sup>Ahe pendar ava nihapisii ore repiase yuvireco. Oquí iteanga, sōhisa avei. Ahese oyatapī guasu yuvireco, “Perio, tapeyepehemi” ehi yuvireco oreu. <sup>3</sup>Evocoyase Pablo omonuha yepaha seru, omondo potase rumo tatave, ahese osē aviyeteramo tēi sacucuer sui mboi ahe eté vahe chupe, oipomama ichuhu. <sup>4</sup>Osepiase mboi ichuhuse ahe pendar yuvireco, ahese, “Co mbia revo oporapichi vahe ité. Yepe oñepisiro para guasu sui viña, Tūpa rumo oichuhu uca mboi upe ‘tomano’ oya” ehi yuvireco viña.

<sup>5</sup>Ahe rumo omomboño mboi tatave imondo oyesui. Ipare nomomaraño ité. <sup>6</sup>Ahe pendar opacatu osāro tēi yuvireco, “Irurura chupe, ahese oviapira, omanora revo” ehi yuvireco chupe viña. Osāro pucu tēi yuvireco, Pablo rumo nimararaño ité. Ahese, “Ndahei vo co mbia tūpa ité co secoi” ehi tēi yuvireco chupe.

<sup>7</sup>Evocoyase mbia Publio serer vahe, ahe opacatu caha pāhu Malta pendar ava rerecuar secoi. Iivi namombriimi ichui. Ahe nihapisii ore repia güetave iyavei ihañeco tupri ai ore rese mbosapī ari rupi. <sup>8</sup>Aheve ore recoseve Publio yesupa sohí iteanga ou, sepochiuvi avei. Evocoyase Pablo oique chupe. Ahese oyerotqui Tūpa upe sese, omondo opo iharive. Ēgüe ehi imbogüera. <sup>9</sup>Oyanduse ahe icuera yuvireco, ahese ambuae imbaheasi vahe evocoi caha pāhu pendar yugüeru chupe, ahe ombogüerapa avei. <sup>10</sup>Ahe pendar oyemboava etepri yuvireco oreu. Ipare ore ha āgua am-

buae carite pipe, opacatu mbahe ore guatasa rupi ipaneēhi āgua ogüeru yuvireco oreu.

### Pablo oyepota Roma ve

<sup>11</sup>Co carite mbosapī yasi osāro vahe ari mbahe tēi vahe pītuhu āgua. Ipipe oroso. Ahe carite yugüeru Alejandría sui. Ahe ichi rese ñuvirfo itūpa rahanga yuvireco: ñepeí rer Cástor, ambuae evocoyase Pólux. <sup>12</sup>Ahese oroso oroyepota yemboyasa Siracusa ve. Aheve oropita mbosapī ari. <sup>13</sup>Ichui orosē oroso oroyepota Regio ve. Ahere ayihive ivitū oipeyu irohi coti sui. Sese oroyepota Puteoli ve ambuae ari pipeve. <sup>14</sup>Aheve orosepia ambuae Jesús reroyasar. Ore mombita güetave yuvireco ñepeí semana. Ipare oroso Roma ve ivi rupi. <sup>15</sup>Jesús reroyasar Roma pendar yipive ore andu yuvireco. Sese moviro yugüeru Foro de Apio ve, ambuae yugüeru Tres Tabernas ve ore rape penda āgua yuvireco. Sepiase, Pablo, “Aviye ndeu” ehi Tūpa upe. <sup>16</sup>Oroyepotase Roma ve, sundao rerecuar co coti omondo Pablo ñepeí sundao upe sāro uca āgua.

### Pablo omombehu Roma ve Tūpa Ñhengagüer

<sup>17</sup>Mbosapī ari pare Pablo omonuha opacatu judío rerecuar Roma pendar. Ahese oñehe chupe:

—Che mu eta, ndayapoi mbahe tēi judío Jerusalén pendar upe, naroñoi avei yande ramoí recocuer viña. Che roquendasa rumo iyavei imondopri aico Romano sundao rerecuar povrive. <sup>18</sup>Ahe mborerecuar oporandu che recocuer rese yuvireco. Oicuse che recocuer, opoi pota tēi che sui yuvireco viña. Esepia, ndoyosui eté mbahe che rembiapo che yuca āgua yuvireco. <sup>19</sup>Evocoi judío rumo ndoipotaiño ité chupe. Ahese ayu pota cohava Cesar upe che yoepi āgua. Nayamotarēhi uca potai

rumo che mu Jerusalén pendar Cesar upe —ehi—. <sup>20</sup>Che yoepi āgua oposoho uca. Opomoñeta pota yande remiario rese. Co Tūpa Rembiporavo ava pīsiro āgua resendar reroyasa rese carena pipe ñapichimbri aico —ehi.

<sup>21</sup>Ahese ahe ava omboyevi yuvireco chupe:

—Ndroipisii eté cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recocuer resendar yuvireco oreu —ehi—. <sup>22</sup>Opacatu rupi ava viroiro pe rembieroya piasu yuvireco. Sese orosendu pota nde pihañemoñetasa —ehi yuvireco chupe.

<sup>23</sup>Oiporavo ari ñehe āgua yuvireco. Osupitise ari chupe, setá catu ava oñemonuha yuvireco secosave. Ahese omombehu Tūpa mborerecuasa resendar iyavei Jesús recocuer Moisés porocuita icuachiapri pipe sui iyavei Tūpa ñehe mombehugar rembicuachía pipe avei ‘toviroya yuvireco’ oyapave. Ēgüe ehi imombehu ari momba.

<sup>24</sup>Amove osendu vahe viroya yuvireco, ambuae rumo ndoviroyai eté yuvireco.

<sup>25</sup>Opihñemoñetasa nomboyoyaise yuvireco, yuvínosepa pota. Ahese aipo ehi ahe ava upe:

—Supi eté Isaías omombehu Espiritu remimombehu pe recocuer resendar pe ramoí upe aracahe aipo ehi:

<sup>26</sup>“Eso nde mu pāhuve.

Emombehu aipo ere:

‘Yepe pesendu tēira mbahe viña, ndapesenducuai chira rumo.

Iyavei pesepia tēira mbahe viña, ndapemahecuaí chira rumo sese’ ere chupe.

<sup>27</sup>Esepiá, co ava ipiharātá iteanga seroyaēhisave.

Ndoyemboapisaiño yuvireco.

Iyavei osapivii tupriño mbahe sui, ndosepia potai mbahe aviye vahe yuvireco.

Ndosenducua catui eté avei ñehesa supi eté vahe.

Evocoiyase ndoyevi potai cheu güecocuer moingatu yuvireco” ehi Espiritu Santo

remimombehu chupe aracahe —ehi—.

<sup>28</sup>Sese tapeicua co pipe suive Tūpa omboyecua ucara oporopīsirosa ava ndahei vahe judío upe. Ahe niha oyapisacara imombehusa rese yuvireco —ehi chupe.

<sup>29</sup>Aipo ihe pare, judío yuvínose ñehe rese oyecopi-copi yuviraso.

<sup>30</sup>Ipare Pablo opita ambuae ava rētave ñuvirío araviter rupi omboepi oque āgua oico. Aheve nihapisii opacatu ava rese oyepiri oyepotase yepi. <sup>31</sup>Omombehu Tūpa mborerecuasa resendar iyavei oporombohe opacatu yande Yar Jesucristo recocuer resendar osiquiyēhisa pipe. Ndipoi eté que ava omombituhu vahe Pablo ñehese.



*PABLO REMBICUACHIA  
ROMA PENDAR UPE*

**ROMANOS**

**Pablo mahenduhasa Roma  
pendar Jesús reroyasar upe**

**1** Che Pablo, Jesucristo rembiguai, aicuachía co che ñehe pëu. Tüpa che poravo apóstol che reco água ñehesa poropširosa resendar mombehu água.

<sup>2</sup>Tüpa niha yipisuive omombehu uca co ñehesa ava oñehe mombehusar upe icuachiapri maranehi pipe aracahe.

<sup>3</sup>Ahe ñehesa Tüpa Rahir Jesucristo resendar. Ahe ava güecosa pipe ité oyesu ou mborerecuar guasu David suindar sui; <sup>4</sup>ocuerayevise oespíritu maranehi pipe, ahese opiratasa pipe omboyecua tupri ité Tüpa Rahir güecosa. Ahe niha yande Yar Jesucristo.

<sup>5</sup>Ahe ichui Tüpa ombou cheu oporopšiviisa apóstol che reco água, che cuai avei ava ndahei vahe judío upe Guahir recocuer mombehu água opacatu ivi rupi sese yeroya uca água ‘ipipe sui toviroya che Rahir yuvireco’ oya. <sup>6-7</sup>Pe Roma pendar peico vahe, pe avei senoipri ipáhuve peico Jesucristo rese peico vaherä. Pe niha Tüpa rembiaisu peico. Oipota avei pe reco catupri água oyeupe nara. Peipisi catu porovasasa, teco tuprisa yande Ru Tüpa suindar, yande Yar Jesucristo suindar avei.

**Pablo oso pota Jesús  
reroyasar repia Roma ve**

<sup>8</sup>Che yipindar yande Yar Jesucristo rer pipe, “Aviye ndeu” ahe Tüpa upe pe rese. Esepia, opacatu ivi rupi icuapri sese pe yeroyasa. <sup>9</sup>Iyavei Tüpa oicua pe rese ari rupi che yeroquisa. Chupe ité niha mbahe ayapo opacatu che piha

pipe, amombehu Tahir resendar ñehesa aviye vahe vichico. <sup>10</sup>Aporanduño ité semimbotar rupi pe piri che so água rese chupe yepi. <sup>11</sup>Esepia, che aso pota ité Espiritu suindar mbahecuasa mondo pëu pe pšitivii água ‘toyemoviracua tupri catu Cristo rese yuvireco’ che yapave. <sup>12</sup>Che aipota ité yande ñepeipei yañepitivii catu água Cristo rese yande yeroyasa yareco vahe pipe.

<sup>13</sup>Che rivireta, che aipota peicua setá rupi che so pota tēisa pe piri yepi. Cūrítei rumo ndaicatuño vite ité. Che rumo aipota, “Toime que che poraviquisa sui Cristo rese oyemoviracua catu vahe yuvireco ipáhuve” ahe pëu, inungar opacatu ambuae ivi rupi ēgüe ahe ava ndahei vahe judío upe vichico. <sup>14</sup>Che cuaita ité niha opacatu ava upe che ñehe água, tecua pipendar yuvirecoi vahe upe iyavei ndayaracua vitei vahe upe, imbahecuva vahe upe, nimbahecuai vahe upe avei no. <sup>15</sup>Sese pe Roma ve peico vahe upe avei ayemonguerēhi voi eté co ñehesa pširosa resendar mombehu água.

**Ñehesa pširosa resendar pīratasa**

<sup>16</sup>Che nachī eté co ñehesa pširosa resendar aviye vahe sui. Esepia, ahe Tüpa pīratasa opacatu viroyasar pširo água, judío rane yipindar, ipare opacatu ambuae ava-ava tēi avei. <sup>17</sup>Supi eté co ñehesa omboyecua Tüpa ava reco mbo-catuprisa. Oyese yande yeroyasa pipeño ité ēgüe ehi yandeu. Esepia, icuachiapri aracahendar aipo ehi: “Acoi ava seco catupri vahe Tüpa rese oyeroyasa pipe sui oicoveño itera apirēhi” ehi.

**Opacatu ava rembiavi resendar**

<sup>18</sup>Supi eté niha yande Aposar oñemoirosa ipīrata vahe ombou itera iva sui opacatu ava viroyasarēhi upe, ndaseco pōrai vahe upe avei, mbahe güembiapo ai sui ndoicua uca potai vahe co ñehesa supi eté vahe ambuae ava upe yuvireco.

<sup>19</sup>Ahe oicua tupri tēi mbahe Tūpa suindar yuvireco. Esepia, Tūpa ité niha omboyecua chupe. <sup>20</sup>Ēgüe ehi eté Tūpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tūpa ité seci iyavei ipíratasa apirēhi vahe. Sese ava angaipa viyar ndiyai, “Eñemosañ tēi rane oreu” ehi vaheṛā yuvireco chupe. <sup>21</sup>Esepia, yepe ahe oicua tēi Tūpa yuvireco viña, nomboetei rumo Tūpa secosa rese. “Aviye ndeu” ndehi avei yuvireco chupe. Iyavei ipihañemoñeta mbahe ěgüe ehi tēi vahe rese. Ipipe sui mbahe ndosenducua catu iri eté yuvireco. <sup>22</sup>Yepe, “Ore mbahecua vai” ehi tēi viña, ndoicuai eté rumo mbahe ipipe yuvireco. <sup>23</sup>Esepia, ahe Tūpa nomanoi vahe seco porañete vahe mboetei rāgüer sui, omboetei ava ocañi tēi vaheṛā rahanga yuvireco iyavei vīrai, opacatu mbahe mimba, mboi tēi avei omboetei yuvireco.

<sup>24</sup>Sese Tūpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboeteiēhisa pipe yuvireco. <sup>25</sup>Esepia, mbahe supi vahe reroya rāgüer sui temira tēi viroya catu yuvireco. Iyavei Tūpa ité mboyeroya rāgüer sui ombotei catu mbahe sembiapocuer tēi yuvireco. Yaposar ité ru timboeteisa catu yepi.

<sup>26</sup>Sese Tūpa opoi eté ichui, “Toyapoño poromochisa mbahe tēi güemimbotarai pipe yuvireco” ehi chupe. Evocoiyase cuña avei cuimbahe rese güeco rāgüer sui yuvirecoi oyese ae. <sup>27</sup>Cuimbahe avei cuña rese güeco rāgüer sui yuvirecoiñ avei oyese ae iyavei oipota raino ité evocoi güeco raisa yuvireco. Evocoi nungar aposa sui oyemomara ahe ae yuvireco.

<sup>28</sup>Iyavei, “Tūpa supi eté vahe” ndehise seroyaēhisa pipe yuvireco, Tūpa evocoiyase opoi eté ichui ‘toyapoño

ayase mbahe ndipotasai vahe güeco raisa pipe yuvireco’ oya chupe. <sup>29</sup>Ahe evocoiyase yuvirecoi opacatu mbahe mbahe tēi pipe; oyemboaguasa-guasa tēi vahe cuimbahe, cuña avei, ambuae ava mbahe oipota rai iyavei oyapo mbahe mbahe tēi ava upe. Ahe oñemoiro ambuae ava mbahe pota raisave tēi, oporapichi, ivava serai, iporombopa serai, ipihañemoñeta ava reco momara āgua tēi iyavei imahechiroi ai ipipe yuvireco. <sup>30</sup>Iyavei ambuae ava cupe cotive mara ehi-ehi tēi vahe, ahe Tūpa amotarēhisar yuvirecoi, viroñero avei ava, oyemboivate ai, oyecomboivate ai tēi avei oñehe pipe yepi, oseca-seca tēi mbahe naporai vahe güembiaporā, nomboyeroyai avei oyesupa yuvireco, <sup>31</sup>ndoyapisaca potai eté Tūpa suindar ñehesa rese, nomboaviyei avei oñehe, ndosaisui avei que ava, niñeroi avei ava upe, ndoiparaisuerecoi eté ava yuvireco. <sup>32</sup>Oicua tēi Tūpa “oimera evocoi nungar aposar upe cañisa” ehi vahe, oyapo viteño rumo mbahe tēi yuvireco iyavei ambuae ava oyapose mbahe tēi, ovihareteño sepiase yuvireco.

### Tūpa omondo ava upe sembiapogüer rupi tupri ité

**2** Oimese que pe pāhu pendar ‘co oyapo mbahe tēi; tocañi’ ohesave ambuae upe, ahese ahe ae oyemocañi tēi uca. Esepia, ahe inungar tupri avei. <sup>2</sup>Yaicua rumo Tūpa omocañise evocoi nungar mbahe tēi aposar recocuer, ahe evocoiyase oyapo mbahe supi tupri vahe. <sup>3</sup>Pe opase ava recocuer pesenoi, pe avei rumo ěgüe peye tupri peico. Pe avei eté evocoiyase ndapeñemi chiterā Tūpa ñemoirosa sui. <sup>4</sup>¿Peroñero tie Tūpa oyapo vitesse mbahe aviye vahe oñemosase, seco mbegüe tupri ai vitesse avei pēu? ‘Tosecuñaro güecocuer yuvireco’ oyapave rumo ěgüe ehi pēu. <sup>5</sup>Pe rumo pepiharāta viteño ité Tūpa

upe pe yevi potaēhi āgua. Sese pereco catu viteño ité Tūpa ñemoirosa peyese, acoi ari oyepotase Tūpa güeco tuprisa pipe yande renoipara yande mocañi āgua, anise yande pīsiro āgua curi. <sup>6</sup>Ahese opara omboepi ñepei-peí yande rembiapogüer rupi yandeu. <sup>7</sup>Omboura tecovesa apirēhi vahe yandeu yasecase teco ori, Tūpa suindar poromboeteisa iyavei mbahe apirēhi vahe yande mbahe tupri aposa pipe. <sup>8</sup>Ombou aveira oñemoirosa ava ndiporomboyeroyai vahe upe, ahe acoi co ñehesa supi eté vahe reroya rāgüer sui viroya vahe mbahe tēi. <sup>9</sup>Judío opacatu mbahe-mbahe tēi aposar ranengatu oiporarara mbahe rasicuer yuvireco, iparera ndahei vahe avei judío. <sup>10</sup>Tūpa rumo opacatu seco catupri vahe upe omondora imboetei āgua ‘toipisi teco ori iyavei toyuvirecoi mbahe tupri pipe’ oya chupe. Yipindar rumo judío eta upe rane omondora, iparera ndahei vahe judío upe.

<sup>11</sup>Esepia, Tūpa ndayande mboyoaviratii yande rereco. <sup>12</sup>Ēgüe ehi eté, opacatu oyemboangaipa vahe Moisés porocuita porēhi oyemocañi tēira yuvireco. Acoi oyemboangaipa vahe Moisés porocuita rereco pipe yuvireco, ahe porocuita pipe avei opara ocañi tēi porandusave yuvireco coiye. <sup>13</sup>Esepia, osenduño tēi vahe porocuita ndahei seco catupri vahe yuvireco. Viroya vahe ité rumo porocuita, ahe seco catupri vahe yuvirecoi. <sup>14</sup>Supi eté acoi ndahei vahe judío yuvirecoi vahe yepe ndovirecoi co porocuita yuvireco viña, ahe rumo co porocuita rupi tupri oyapose mbahe, ahe evocoyase inungar porocuita vireco vahe yuvireco. <sup>15</sup>Esepia, güembiapo catupri pipe omboyecua porocuita virecose opiha pipe. Opihañemoñeta pipe avei oyandu porocuita mboaviyesa. Ahe ipipe avei oyandu mbahe güembiavi, ichui

avei oyemonguerēhi mbahe aviye vahe apose. <sup>16</sup>Ahe ari cañi pipe Tūpa oyocuai ucara opacatu ava rembiapo cuaēhisa repri pisi āgua Jesucristo upe, co ñehesa pīsirosa resendar amombehu vahecuer rupi tupri ēgüe ehira curi.

### Ñehesa judío resendar, Moisés porocuita resendar avei

<sup>17</sup>Pe rumo, “Judío aico” peye vahe, peyeroya opacatu Moisés porocuita mboaviyesa pipe pe reco catupri āgua Tūpa rovaque viña. Iyavei ipipe peyeecomboivate ai Tūpa rese peicose. <sup>18</sup>Peicua semimbotar. Ahe porocuita pe mbohe avei mbahe aviye catu vahe poravo āgua. <sup>19</sup>Pe, “Aicatu ité ndasapisoi vahe nungar ava ndayaracuai vahe mboaracua iyavei ava angaipa viyar pītumimbi vahe nungarsave tēi resape āgua” peye tēi. <sup>20</sup>“Aicatu avei ava mbahe ndosenducuai vahe mboaracua iyavei ava chihivahemi nungar mbohe āgua. Esepia, areco co mborocuita vireco vahe opacatu mbahecua iyavei mbahe supi tupri vahe ité” peye tēi avei. <sup>21</sup>Pe pembohe vahe ambuae ava, ¿mahera ru ndapeyembohei pe ae? Pe pemombehu vahe ambuae ava mondaēhi āgua, ¿mahera ru pe ae avei pemonda no? <sup>22</sup>Pe, “Ndiyai pe aguasa” peye; pe teieté avei rumo ēgüe peye. Ndapesepia potai eté mbahe rahanga; pe avei rumo opa peñomi mbahe sepi vahe itūparo pipe sui. <sup>23</sup>Peyecomboivate ai co mborocuita rerecoa rese; ndapemboetei rumo Tūpa ipipe ahe mborocuita mboaviyeēhi pipe. <sup>24</sup>Supi eté icuachiapri aracahendar pipe aipo ehi: “Pe sui tēi ava ndoicuai vahe Tūpa iñehe-ñehe tēi serer maranehi rese yuvireco” ehi.

<sup>25</sup>Supi eté co tecocuer cuacua circuncisión resendar ahe aviye angara pēu, peroya tupri itese Moisés porocuita viña. Ndaperoya tupriise rumo, pe evocoyase inungar

ndapeyembocircuncidai vahe peico. <sup>26</sup>Acoi ava ndoyembocircuncidai vahe, ahe rumo viroyase porocuita, ahe seroyapri inungar imbocircuncidapri yuvirecoi. <sup>27</sup>Acoi ndoyembocircuncidai vahe, oyapose rumo mborocuita yuvireco, ahe evocoyase omombehura pe cañi água yuvireco. Esepia, yepe pereco Tūpa porocuita viña, pe rumo ndapemboaviyei eté. <sup>28</sup>Judío supi eté vahe yaicose, ndahei yande yesupa judío recocuer rupi güeraño ègüe yahera. Iyavei circuncisión supi eté vahe ndahei yande retecuer rese güeraño tēi avei no. <sup>29</sup>Judío ete ité rumo opihá pipe ité viroya Tūpa. Iyavei circuncisión supi eté vahe, Espiritu rembiapo yande piha pipe, ndahei porocuita icuachiapri rembiapo tēi. Evocoyase judío supi eté vahe oipisira omboeteisa Tūpa suindar ité, ndahei ava tēi suindar.

**3** Evocoyase, ¿mbahe vo co aviye judío yande reco água? ¿Yande yembocircuncidasa piha aviye? <sup>2</sup>Supi eté. Esepia, yipindar Tūpa omondo oñehe judío eta upe imboaviye água. <sup>3</sup>Amove yepe ipāhu pendar nomboaviyeise ocuita viña, ¿Tūpa avei tie ègüe ehira? <sup>4</sup>¡Aní eté! Tūpa rumo supi tupri vahe ité secoi, yepe que ava opacatu semirañete ai tēi yuvireco. Esepia, icuachiapri arachendar pipe aipo ehi:

“Supi tupri vahe Tūpa’ ehira nde ñehe rese yuvireco.

Sese ereiquese ava porandusave, eresē tupriñora eso ichui” ehi.

<sup>5</sup>Yande reco rai pipe tēi yamboye- cuase Tūpa reco tuprisa, ¿mara yahera vo evocoyase? ¿“Tūpa ndahei supi tupri vahe yande reco raisa rese yande nupa” yahera tie? (Che rumo aipo ahe inungarra ava co ivi pipendar tēi viña.) <sup>6</sup>¡Aní eté! Esepia, Tūpa ndaheise supi tupri vahe viña, ndiyai chietera yande re-

cocuer rese porandupa tupri água chupe viña.

<sup>7</sup>Aviyeteramo oimera ava aipo ehi vahe: “Yande remira pipe sui tēi ava omboetei catusé Tūpa supi eté vahe, ¿mahera piha evocoyase angaipa viyar nungar yande rerecora viña?” ehi. <sup>8</sup>“Yayapora ayase mbahe naporai vahe mbahe tupri reime água” ehi. Amove ava, “Pablo ondugüer reseve aipo ehi eté oporombohe” ehi tupri tēi yuvireco oreu. Aipo ehi tēi vahe rumo. Iya ité oipisira cañisa yuvireco.

### Opacatu yande angaipa viyar yaico

<sup>9</sup>¿Mara ehi ru evocoyase? ¡Yande judío yaico vahe ndahei eté ivate catu yande recocuer opacatu ambuae ava-ava tēi sui! Esepia, opa amboyecua Tūpa rovaque opacatu angaipa viyar yaico que judío, que ndahei vahe judío avei.

<sup>10</sup>Supi eté icuachiapri arachendar pipe aipo ehi:

“¡Ndipoi eté ava seco catupri vahe, que ñepei angara viña!

<sup>11</sup>Ndipoi avei que ava Tūpa recocuer os- enducua tupri vahe.

Ndipoi avei Tūpa oseca vahe yuvireco.

<sup>12</sup>Opacatu ava oguata mbahe tēi pipe yuvireco, co coti tēi avei secocuer yuvireco.

¡Ndipoi eté que ava mbahe tupri aposar, que ñepei angara viña!

<sup>13</sup>Iñehesa mbahe tēi eté, inungar tuvipa ndasovapisai vahe.

Oñehesa pipe oporombopa yuvireco.

Ahe ñehesa evocoyase inungar mboi naporai vahe oporomocañi tēi vahe.

<sup>14</sup>¡Pipe oñehe rai opihaviracuá iteangasa pipe yuvireco.

<sup>15</sup>Ndayipitii oporapichi água yuvireco.

<sup>16</sup>Setá ava omomara, omombaraisu avei oguatasa rupi yuvireco.

<sup>17</sup>Iyavei ndoicuai eté güeco tupri água yuvireco.

<sup>18</sup>Ndipihañemoñetai eté Tūpa sui osiquiye āgua yuvireco” ehi.

<sup>19</sup>Yande niha opa yaicua opacatu co mbahe omombehu vahe mborocuita arachendar pipe, omombehu co porocuita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tūpa ñemoirosa pisi āgua yuvireco’ ohesave aipo ehi. <sup>20</sup>Esepia, ndipoi chietera que ñepeí seco aviye vahe Tūpa rovaque co porocuita mboaviye pipe. Ahe mborocuita rumo oicua uca yande angaipa viyar yande reco.

### **Cristo rese yande yeroya pipe Tūpa yande pīsirora**

<sup>21-22</sup>Cūrítei rumo Tūpa oicua uca yandeu ndahe iri mborocuita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayande mboyoavii eté. Yipive ité ahe imombehupri secoi porocuita arachendar pipe, iñehe mombehusareta rembicuachiagüer pipe avei. <sup>23</sup>Supi eté yande opacatu yayapo angaipa, ndayasupitii eté Tūpa reco porañetesa. <sup>24</sup>Ahe rumo oporoaisusa pipe, “Ereyavi mbahe che ñemoirosa pisi āgua” ndehi iri yandeu. Esepia, ahe yande pīsiro uca Guahir Jesucristo upe. Yande rumo ndayamboepii eté yande raisusa chupe. <sup>25-26</sup>Tūpa rumo ombou Guahir Cristo oipiyere vaheṛā vuví yande angaipa rese ñero āgua. Sese yande yeroya pipe oime ñeroisa yandeu. Ipipe omboyecua güeco ñvi tuprisa. Yipisuive rumo güeco asiēhisa pipe oñemosañō arachendar ava angaipa upe; cūrítei rumo omboyecua ité güeco ñvisa yandeu, seco ñviño ité seco catupri vahe yande rerecose Tahir rese yande yeroya pipe.

<sup>27</sup>¡Evocoyase ndiyai eté yande yeecomboivate ai āgua sovaque! Esepia, ndahei porocuita mboaviye rese ēgüe ehi, ahe rumo Cristo rese yande yeroya pipe ēgüe ehi yandeu. <sup>28</sup>Sese yaicua Tūpa, “Ereyavi mbahe che ñemoirosa pisi āgua” ndehi iri Cristo rese yande yeroyase yandeu, ndahei mborocuita mboaviyesa sui tēi.

<sup>29</sup>¡Tūpa niha opacatu ité ava Tūpa, ndahei ore judío oroico vahe Tūpa güer-año! <sup>30</sup>¡Supi eté ñepeño ité secoi: sese yayeroyase Cristo rese, oyoya guasuño ité, “Ereyavi mbahe che ñemoirosa pisi āgua” ndehi chira yandeu, yepera imbocircuncidapri viña, anise que ndahei vahe imbocircuncidapri viña no! <sup>31</sup>Ndahei rumo, “Ēgüe ehi tēi vahe” yahe evocoi mborocuita upe Jesucristo reroyasa pipe. Ipipe rumo yamboyecua evocoi mborocuita ēgüe ndehi tēi vahe.

### **Abraham recocuer sui yembohesa**

**4** Iyavei, ¿mara ehi pīha yande ramoi Abraham recocuer aracahe? <sup>2</sup>Acoi mbahe güembiapo pipe sui tēi oipisise güeco tupri āgua Tūpa sui, oyemboivate aira oico ipipe viña. Ndiyai eté rumo ēgüe ehi Tūpa rovaque. <sup>3</sup>Esepia, icuachiapri arachendar pipe aipo ehi: “Abraham oyeroya ité Tūpa rese. Sese Tūpa, ‘Co seco catupri vahe’ ehi chupe” ehi. <sup>4</sup>Co rumo yande yayapose mboraviqui, ahe yaipisi vahe ndahei porerecosa tēi, ahe rumo mboraviqui reprí ité yaipisi. <sup>5</sup>Yande rumo, yayeroyase Tūpa rese, Tūpa evocoyase yande pīsira, ‘co seco catupri vahe’ ohesave. Esepia, ahe ēgüe ehi vahe ité oyese oyeroya vahe upe, yepe ndoyapoi chira mbahe aviye vahe chupe viña. <sup>6</sup>David mborerecuar arachendar avei oñehe ava rorivetesā rese Tūpa seco catupri vahe nungar pisisa rese. Ahe rumo ndahei mbahe sembiapogüer rese tēi oipisi. <sup>7</sup>Ahe aipo ehi aracahe:

“¡Sorivete acoi ava Tūpa iñeroise yangaipa rese, iyavei ndoyemomahenduha irise yangaipa rese chupe!

<sup>8</sup> ¡Sorivete avei ava, ‘Nde angaipa viyar ereico’ ndehi irise Tūpa chupe!” ehi.

<sup>9</sup> Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tūpa, “Co seco catupri vahe secói” ehi Abraham upe oyese iyeroyasa rese. <sup>10</sup> ¿Marase piha oipisi oyeupe nara sereco? ¿Oyembocircuncida renondeva piha, anise ipare tie? Yipive ité. <sup>11</sup> “Toicua ava co seco catupri vahe che rese iyeroyase yuvireco” ehi Tūpa chupe. Sese imbocircuncidapri secói. Ēgüe ehi Abraham opacatu ava oyeroya vahe Tūpa rese, ndoyembocircuncidai vahe yesupa nungar secói. Ēgüe ehi Tūpa, “Co seco catupri vahe yuvirecoi” ehi avei ahe ava upe. <sup>12</sup> Supi eté yande ramoi Abraham opacatu ava oyembocircuncida vahe, Tūpa rese oyeroya vahe yesupa avei secói. Abraham rumo oyeroya vahe Tūpa rese ndoyembocircuncida viteiseve.

### **Tūpa remimombehu imboaviyesara sese yeroyasa pipe**

<sup>13</sup> Esepia, aracahe Tūpa aipo ehi Abraham upe, ichuindar upe avei: “Peipisira opacatu co ivi pe mahera” ehi. Ndahei Moisés porocuita mboyeroya pipe ēgüe ehi chupe, oyese yeroyasa pipe sui eté rumo ahe oipisi ‘co seco catupri vahe’ ohesave. <sup>14</sup> Supi etese co mborocuita mboyeroyasar güeraño oipisise co mbahe oime vaherã chupe viña, evocoyase yande yeroyasa Tūpa rese ēgüe ehi tēi etera, Tūpa remimombehugüer evocoyase ēgüe ehi tēi vahe aveira viña no. <sup>15</sup> Esepia, co mborocuita mboaviyeēhisa pipe ñemoirosa oime ava upe. Ndipoise rumo mborocuita, ndipoi chietera ahe porocuita mboyeroyaēhisa.

<sup>16</sup> Sese mbahe Tūpa remimombehugüer porerecosa yaipisira sese yande yeroyasa pipe, ahe semimombehugüer supi tupri vahe opacatu yande Abraham suindar upe nara. Esepia, ndahei mborocuita mboyeroyasar upe güeraño, ahe rumo opacatu yande Abraham nungar Tūpa rese oyeroya vahe upe nara. Evocoyase ahe opacatu yande ramoi secói. <sup>17</sup> Icuachiapri aracahendar pipe aipo ehi: “Orombou ava eta ivi rupindar ramoirã” ehi. Co Tūpa niha Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yipindar.

<sup>18</sup> Yepe yavai eté seroya āgua viña, Abraham rumo oyeroya ité Tūpa oyeupe ñehesa rese; sese ava eta ivi rupindar ramoi eté secói Tūpa ñehes: “Setã oimera ava nde suindar” ehi vahe rupi tupri ité. <sup>19</sup> Abraham evocoyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco reseve nañaroi eté guahi āgua yuvireco viña. <sup>20</sup> Ndopoi eté Tūpa oyeupe ñehesa reroyasa sui. Ahe rumo oyeroya catu ité sese iyavei omboetēi eté. <sup>21</sup> “Supi eté Tūpa vireco opiratasa opacatu oñehengagüer mboaviye āgua” ehiño ité opiha pipe. <sup>22</sup> Sese Tūpa, “Co seco catupri vahe secói” ehi iyeroyasa rese chupe.

<sup>23</sup> Co ñehesa ndahei Abraham upe güeraño. <sup>24</sup> Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús. <sup>25</sup> Esepia, ahe imondopri secói yande angaipa repirã. Ipare Tūpa ombogüerayevi yande pisi āgua seco catupri vahe nungar oyeupe.

### **Tūpa, “Peyavi mbahe” ndehi iri**

**5** Sese yaico mbahe tupri pipe Tūpa, “Peyavi mbahe” ndehi irise yan-

deu yande Yar Jesucristo rembiapo sui sese yande yeroyasa pipe. <sup>2</sup>Esepia, Jesucristo sui niha yareco co Tūpa suindar porovasasa yayeroyase sese. Ipipe avei yayemoviracuaño ité yaico, yayemboviha avei. Esepia, yaicua Tūpa piri yande reco āgua imborerecuasave. <sup>3</sup>Ndahei rumo sese güeraño yayemboviha, yande yemombaraisusa rese avei niha yayemboviha yaico. Esepia, yaicua ahe yande mbohe yande ñemosa āgua, <sup>4</sup>iyavei yañemosañose, yasē tuprira yande recoāhasa sui, ahesa yaicua yaipisi vaheerā mbahe aviye vahe Tūpa suindar yepi. <sup>5</sup>Iyavei ahe yande remiario nayamoha tēi chira sereco. Esepia, Tūpa ombou ité oporoaisusa yandeu oEspíritu Santo yandeu ombou vahe pipe.

<sup>6</sup>Yande ae ndayaicatu yande ñepisiro āgua yande recocuerai sui, Cristo rumo osupitise ari chupe, omano opacatu yande angaipa rese. <sup>7</sup>Aviyeteramo oimera que ñepeí ava omano vaheerā ambuae ava aviye vahe upe nara; yepe que ava recocuer supi eté aviye aira viña, seni rumo ndipoi eté que ava, “Che tamano sepirā” ehi vaheerā chupe. <sup>8</sup>Yepe yande angaipa viyar yaico yipindar, Tūpa rumo omboyecua yande raísusa; ombou Cristo imano āgua yande angaipa repirā. <sup>9</sup>Ipipe sui cūrítei, “Peyavi mbahe” ndehi iri chira. Sese nomboui chietera oñemoirosa yandeu. <sup>10</sup>Esepia, yamotarēhimbar yaico vitesa, ahe Guahir manosa pipe sui yande reroyeví iri oyeupe mbahe tuprí pipe; ocuerayevisa pipe evocoiyase oicatu ité yande pīsiro. <sup>11</sup>Ndahei co reseño ēgüe yahera, yaviha catu aveira Tūpa rese, yande Yar Jesucristo rese avei. Ichui niha ndipo iri mbahe Tūpa rovaque yande rese.

### Adán iyavei Cristo resendar ñehesa

<sup>12</sup>Supi eté Adán sui oime angaipa ivi pipe, ichui avei oime manosa opacatu ava upe. Esepia, opacatu ité oyapo angaipa yuvireco. <sup>13</sup>Ndipo viteise Moisés porocuaíta, oime voi eté angaipa co ivi pipe. Yepe tie ndicuasa vitei angaipa porocuaíta ndipoise viña, <sup>14</sup>Adán reco sui tuprí ité rumo ava omanoño ité oangaipa pipe yuvireco. Ēgüe ehiño ité yuvireco Moisés recose, yepe ahe ava yuvirecoi vahe angaipa ndahoyoyai Adán angaipa mborocuaíta mboaviyēhisa resendar rese viña. Ahe Adán rese omboyecua mbia ou vaheerā.

<sup>15</sup>Tūpa porerecosa ombou vahe rumo yandeu ndahoyoyai eté Adán angaipa rese. Esepia, Adán rembiavi sui setá ava omano; Jesucristo rembiapo sui rumo Tūpa ombou oporerecosa poropīsirosa yandeu. Ahe rumo aviye catu vahe ava eta upe nara. <sup>16</sup>Ahe ñepeí ava angaipa rumo ndoyoyai eté Tūpa poropīsirosa ombou vahe rese yandeu. Esepia, ñepeí ava angaipa sui ou Tūpa ñemoirosa; oporerecosa rumo Tūpa ombouño ité ava eta mbahe oyavi ati vahe upe nara yangaipa mocañi āgua. <sup>17</sup>Supi eté ñepeí ava angaipa sui oimeño ité manosa opacatu yandeu. Yande rumo yaipisi mbahe ipirata catu vahe ichui, ahe Tūpa porovasasa tuvichá vahe ité iyavei iporerecosa, “Peyavi mbahe” iheēhisa resendar. Sese yareco ité tecovesa apirēhi vahe yandeyeupe nara ñepeí ava sui, ahe Jesucristo.

<sup>18</sup>Evocoiyase inungar Adán rembiapo ai güeru Tūpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tūpa ñemoirosa pisiēhi āgua ‘tovireco tecovesa apirēhi yuvireco’ oya. <sup>19</sup>Esepia, ñepeí ava Tūpa reroyaēhisa sui setá oime ava angaipa viyar; ēgüe ehi aveira ñepeí ava

mboyeroyasa sui setá aveira ava vireco güeco catuprisa Tūpa rese yuvireco.

<sup>20</sup>Supi eté porocuita ouse aracahe, ahese angaipa yaposa catu ité. Yepe ěgüe ehi viña, Tūpa porovasasa rumo ivate catu ité ichui. <sup>21</sup>Evocoyase inungar angaipa ipīrata yandeu yande mano āgua viña, ěgüe ehi avei rumo Tūpa oporovasasa ipīrata vahe pipe yande pisi seco catupri vahe nungar yande rereco ‘toipisi tecovesa apirēhi vahe che Rahir Jesucristo rembiapo sui’ oya.

**Angaipa upe omano vahe nungar yaico; Cristo rese yaicose rumo oicove vahe ité yaico**

**6** Evocoyase, ¿iya iri pīha yayapo vite angaipa yaico Tūpa yandeu oporovasasa mboyecua catu āgua? <sup>2</sup>¡Aní chietera! Esepia, yande niha senosepri angaipa sui. Evocoyase ndiya iri eté yayapo viteño angaipa yaico. <sup>3</sup>¿Ndapeicuai vo pe yañeapiramose Jesucristo rer pipe, ndoyavii yamano vahe ité sese? <sup>4</sup>Yande ñeapiramose, aviye acoi ñotimbri yaico Cristo rupive yande mbogüeravevi iri āgua iyavei yande recocuer mopiasu āgua avei, inungar acoi Cristo ocueravevi Vu reco pīratasa pipe.

<sup>5</sup>Yande omano vahe nungar yaicose supive, ěgüe yahe aveira yande yacueravevi supi. <sup>6</sup>Yaicua avei niha yipindar yande recocuerai yaticapri nungar curusu rese Cristo rupive, “Che recocuerai tocañipa che sui” yande hesa pipe, iyavei yande angaipa pipe mbiguai tēi nungar yande recoēhi āgua. <sup>7</sup>Esepia, acoi omano vahe ndoyapo iri angaipa yuvireco. <sup>8</sup>Yande avei niha omano vahe nungar Cristo rese yaico. Evocoyase yayeroya avei yaicove vaherā sese. <sup>9</sup>Yande niha yaicua, Cristo ñepeí reseve ocueravevi, nomano iri chietera. Esepia, manosa ndoicatu iri eté chupe. <sup>10</sup>Supi eté omanose Cristo, omano ñepeí reseve opacatu angaipa mocañi āgua;

cūritei rumo oicove Tūpa upe nara. <sup>11</sup>Ěgüe peye avei pe, “Che omano vahe nungar aico angaipa upe” peyera; “Che rumo Tūpa upeño ité aicovera yande Yar Jesucristo rese che recosa pipe” peye aveira.

<sup>12</sup>Sese aní peico vite angaipa pīratasavrive pe cuai āgua pe remimbotarai mboyeroyasa pipe. <sup>13</sup>Aní peyemondo angaipa upe mbahe tēi apo āgua. Peyemondo catu Tūpa upe. Esepia, pe inungar ava ocueravevi iri vahe peico. Sese peyemondo tupri ité Tūpa upe mbahe tupri apo āgua. <sup>14</sup>Evocoyase, pe angaipa ndape cuai iri chira pe rereco. Esepia, ndapeicoi Moisés porocuita pipe; pe rumo Tūpa porovasasa pipe peico.

**Yembohesa mbiguai tēi recocuer sui**

<sup>15</sup>Ndayaico iri mborocuita pipe tēi, yaico rumo Tūpa porovasasa pipe. Evocoyase, ¿“Tayapo vite angaipa” yahera pīha? ¡Aní chietera! <sup>16</sup>Pe niha peicua que ava pemboyeroyase, ipovri pendar evocoyase peico. Pemboyeroyase Carugar angaipa apo āgua, ahe evocoyase pe reco mocañi tēira. Tūpa pemboyeroyase rumo, ahe evocoyase pe reco mohivira. <sup>17</sup>Aviye Tūpa upe. Esepia, pe yipindar mbiguai tēi nungar peico angaipa pipe viña, cūritei rumo pemboyeroya pe pihave ité prombohesa peipisi vahe. <sup>18</sup>Ñepeí reseve pe angaipa sui Tūpa pe renosese, pe evocoyase mbiguai nungar mbahe supi tupri vahe apo āgua peico. <sup>19</sup>(Che amboyoya tecocuer mbahe co ivi pipendar rese imombehu pēu. Esepia, yavai vite ité pēu co ñehesa renducua tupri āgua.) Yipindar pe retecuer pereco mbahe tēi pipe mbahe naporai vahe apo āgua. Ěgüe peye rumo pe cūritei pe reco mohivi āgua peico mbahe tupri pipe ñepeí reseve Tūpa upe pe reco āgua.



<sup>20</sup> Pe peico vïtese mbiguai tēi nungar pe angaipa pipe, ahese ndapeyapo vïtei mbahe supï tupri vahe; <sup>21</sup> cūrïtei rumo pechï tēi ichui, ahe niha ndape pītivïi eté pe recocuer rese, iyavei pe reraso pota manosa apirēhi vahesave yepi. <sup>22</sup> Cūrïtei rumo angaipa sui senosepri peico Tūpa povrive pe reco āgua. Ichui mbahe tupri oime pēu. Ahe niha ombou oyeupe nara ité pe reco tupri āgua. Ipïpe sui peicora apirēhi vahe. <sup>23</sup> Angaipa niha ombou manosa tēi yandeu, Tūpa rumo oporecosa ombou tecovesa apirēhi vahe yandeu yande Yar Jesucristo rese yande recose.

### Mendasa sui yembohesa

**7** Che rivireta, pe niha peicua tupri mborocuita, peicua avei ahe porocuita povriveño ité opacatu yaico yaicove vïtese co ivi pipe. <sup>2</sup> Esepia, inungar cuña omenda vahe, imer oicove vïtese, iporocuitavrive vïteño ité secoi yepi. Omanose rumo imer ichui, ahe cuña ndahe iri omer porocuitavrive secoi. <sup>3</sup> Acoi cuña omer recove vïteseve, virecose ambuae cuimbahe, oyemboaguasa tēi evocoyase; acoi omanose rumo imer ichui, ndaseco iri ipovrive. Ahe iyacatu ité omenda yupagüe iri; ahese ndahei yaguasa tēi cute.

<sup>4</sup> Che rivireta, pe niha ěgüe peye avei Cristo rese peico vahe; Cristo manosa sui ndahe iri Moisés porocuitavrive peico Cristo rese peico āgua. Ahe niha acoi ocuerayevi vahe. Sese yande recocuer ěgüe ndehi tēi vahe Tūpa upe. <sup>5</sup> Esepia, yande yaicove vïtese yande reco ai pipe, ahe porocuita renduse, yaipota catu mbahe tēi pipe yande reco āgua. Ipape rumo ahe manosave tēi yande reraso ucara viña. <sup>6</sup> Cūrïtei rumo yande omano vahe nungar yaico acoi porocuita pipe yaico vahecuer sui. ěgüe yahe, yasē ichui Tūpa upe mbahe apo āgua Espiritu

sui yande reco piasu pipe. Ndahe iri mborocuita icuachiapri yipïndar vahe pipe yaico.

### Angaipa oime vahe yande rese

<sup>7</sup> ¿“Tūpa porocuita angaipa” yahera pïha? ¡Aní eté; ndahei eté ahe angaipa! Co rumo ndaicuai chïetera che angaipa Tūpa porocuita ndipoise viña. Supi eté che ndaicuaise, “Ndapeipota rai chira ambuae ava mbahe” ehi vahe mborocuita pipe, ahese ndaicuai chïaveira che mbahe pota raisa viña. <sup>8</sup> Aicuase mborocuita, ahese angaipa ipïrata catu cheu. Ahe mborocuita apo potaěhisa pipe che querēhi catu opacatu che remimbotarai tēi apo āgua. Esepia, mborocuita porēhi angaipa aviye ndipoi vahe viña. <sup>9</sup> Yipïndar Tūpa porocuita ndaicua vïteise, ndoyavïi aviye vahe ité che reco areco viña. Porocuita aicuase rumo, aipota rai angaipa apo āgua. <sup>10</sup> Che evocoyase acañi tēi vahe rā aico ipipe viña. Ahe porocuita che recove apirēhi āgua mbou rāgüer sui, che mondo ucaño itera manosa apirēhi vahe pipe tēi viña. <sup>11</sup> Esepia, angaipa ahe porocuita pipe che mbopa ité. Ahe ipipe avei che mo-cañi tēira viña.

<sup>12</sup> Evocoyase co porocuita ndaseco marai vahe ité, supi tupri vahe ité, aviye vahe avei. <sup>13</sup> ¿Co porocuita aviye vahe pïha che rereco che mano āgua tēi? ¡Aní eté! Angaipa tēi rumo ěgüe ehi che rereco. Evocoyase co porocuita cuasa sui oipota catu uca mbahe tēi apo āgua cheu. Ipïpe aicua angaipa oime vahe che rese. ěgüe ehi avei ahe porocuita omboyecua tupri ité angaipa mbahe tēi vahe yandeu.

<sup>14</sup> Yaicua niha porocuita Tūpa suindar, che tēi rumo imondopri aico angaipa mboyeroa āgua. <sup>15</sup> Che rumo ahese ndaicuai mbahe oime vahe cheu. Esepia, che remimbotar ayapo pota

vahe ndayapoi; mbahe che remimbotarēhi rumo ayapo. <sup>16</sup>Che rumo ayapose mbahe ndayapo potai vahe, ahese aicua co porocuita aviye vahe. <sup>17</sup>Evo-coiyase ndahei cheyesui eté ěgüe ahe, angaipa tēi rumo ěgüe ehi che mbohe uca. <sup>18-19</sup>Esepia, che aicua ndipoi eté mbahe aviye vahe che reco ai rese; sese yepe che ayapo pota ité mbahe aviye vahe viña, ndaicatui eté rumo yapo. Iyavei yepe ndayapo potai mbahe tēi viña, che rumo ayapoño ité. <sup>20</sup>Sese ayapo viteño itese mbahe ndayapo potai vahe, ndahei rumo che ité ayapo, che piha pipe angaipa oime vahe, ahe tēi rumo oyapo uca cheu.

<sup>21</sup>Sese che aicua oime che cuaisar che rese. Esepia, ayapo potase mbahe aviye vahe yepi viña, ahe rumo oyapo uca pota voño ité mbahe naporai vahe cheu yepi. <sup>22</sup>Che piha pipe rumo Tūpa porocuita aipotá iteanga tēi, <sup>23</sup>che rumo aicua che piha pipe oime ambuae mbahe, mbahe tupri apo potaēhisar cheu, ahe angaipa tēi oime vahe che rese. Ahe mbuguai nungar tēi che rereco.

<sup>24</sup>“¡Che paraísu ité!, ndaicatu iri eté, ¿uma piha co mbahe tēi sui che renosera viña?” ahe cheyeupe vichico. <sup>25</sup>Tūpaño ité oicatu Guahir Jesucristo rese. “Aviye” yande Ru Tūpa upe. ěgüe ehi ahese mbahe cheu; Tūpa porocuita amboaviye pota viña, che remimbotarai tēi rumo che rereco uca angaipa povrive.

### Yaico vaheṛā Tūpa Espíritu rese

**8** Cūrítei rumo ndipo iri Tūpa ñemoirosa yandeu Jesucristo rese yaicose. <sup>2</sup>Esepia niha, Jesucristo rese yaicose, yande cuaisar Espíritu tecovesa mondosar yande renose angaipa povri sui, manosa sui avei. <sup>3</sup>Esepia, yande remimbotarai rese ndayaicatui Moisés porocuita mboyeroya āgua, ahe avei evocoyase ndoicatui eté yande reco moingatu. Tūpa rumo oicatuño ité.

Esepia, Guahir ombou yande nungar tupri ité ‘toyemondo ava angaipa repirā’ oya. ěgüe ehi imocañi opacatu yande angaipa yande sui, yande remimbotarai avei. <sup>4</sup>Ahe ěgüe ehi yande yamboaviye vaheṛā mborocuita. Esepia, ndayaico iri yande remimbotar tēi pipe. Yaico rumo Espíritu aviye vahe rese.

<sup>5</sup>Esepia, acoi yuvirecoi vahe rumo güemimbotar tēi pipe, güecocuerai reseño tēi ipihañemoñeta yuvireco; Espíritu rese yuvirecoi vahe rumo semimbotar rese ipihañemoñeta catu yuvireco. <sup>6</sup>Iyavei acoi güemimbotarai rese tēi ipihañemoñeta vahe, ahe omano itera apirēhi yuvireco. Ipihañemoñeta vahe rumo Espíritu suindar mbahe rese, virecora tecovesa apirēhi vahe mbahe tupri pipe yuvireco. <sup>7</sup>Esepia, acoi güecocuerai reseño tēi ipihañemoñeta vahe, ahe Tūpa amotarēhimbar yuvirecoi. Ndoipotai eté iyavei ndoicatu Tūpa porocuita mboyeroya āgua yuvireco. <sup>8</sup>Ěgüe ehi eté, acoi yuvirecoi vahe güemimbotarai pipe, ndoicatui eté Tūpa remimbotar apo āgua yuvireco.

<sup>9</sup>Pe rumo ndapeico iri pe remimbotarai pipe. Peico rumo Tūpa Espíritu rese, ahe perecose peyese. Acoi ndovirecoi vahe rumo Espíritu Cristo suindar, ndahei eté chupendar. <sup>10</sup>Cristo secoise rumo pe rese, yepe pe rete ocañi tēi vaheṛā angaipa sui viña, pe espíritu rumo oicoveño ité. Esepia, Tūpa, “Peyavi mbahe” ndehi iri pēu. <sup>11</sup>Acoi Tūpa Espíritu secoise pe rese, Tūpa evocoyase omondora tecovesa piasu pe retecuer upe oEspíritu pe rese secoi vahe pīratasa pipe. Esepia niha, ipipe ité ombogüerayevi Guahir Jesucristo.

<sup>12</sup>Ěgüe ehi che rivireta, yareco yande cuaita, ndahei rumo yande remimbotarai pipe yande reco āgua. <sup>13</sup>Esepia, pe peicoño itese pe remimbotarai pipe, ahese pecañi tēira; pemombopase rumo

Espíritu pipe peyesui, ahese peicovera apirēhi vaherā.

<sup>14</sup>Esepia, opacatu Tūpa Espiritu ombohe vahe, Tūpa rahir ité yuvirecoi. <sup>15</sup>Supi eté pe Espiritu peipisi vahe ndapembosiquiye uca iri pe rereco, ahe rumo pemoingo Tūpa rahir ité pe reco āgua. Ahe avei, “¡Che Ru!” pe mbohe uca chupe. <sup>16</sup>Co Espiritu avei oicua uca yande espíritu upe Tūpa rahir yande recose. <sup>17</sup>Evocoiyase yaipisi aveira mbahe yande Ru Tūpa ombou vaherā yandeu; ahe oyoya Cristo reseve yaipsisira, Cristo paraisu agüer pipe ité yaicose yareco va-herā teco porañetesa ipiri curi.

### Teco porañetesa ou vaherā curi

<sup>18</sup>Cūrítei rumo yande paraिसusa ndoyoyai eté teco porañetesa yande rese ou vaherā rese. <sup>19</sup>Opacatu Tūpa rembiapocuer osāro vite ité opacatu oquerēhisa pipe, osepia pota ité teco porañete vahe tahir yuvirecoi vahe rese. <sup>20</sup>Esepia, Tūpa rembiapo ndahe iri eté yipindar nimarai vahe nungar. Ndahei rumo oyesui tēi ēgüe ehi, Tūpa ité, “Ēgüe tehi” ehi chupe, ombouse angaipa reprí ava upe. Mbahe sembiapocuer rumo osāroño ité <sup>21</sup>giüeco opa tēi vaherā sui ñepisiro āgua teco porañete vahe Tūpa rahir vireco vahe rupití āgua curi. <sup>22</sup>Yande niha yaicua aracahe suive opacatu mbahe Tūpa rembiapo oiporara mbaherasicuer yuvireco cuña imembi rasi vahe nungar. <sup>23</sup>Ndahei rumo ahe güeraño ēgüe ehi yuvireco, yande avei ēgüe yahe. Yande yareco ité Espiritu, ahe yipindar vahe yaipisi vaherā ichui curi. Yayemombaraisu, yasāro vite yande querēhisa pipe Tūpa guahir ité yande rereco āgua, yande retecuer recuñaro āgua avei. <sup>24</sup>Esepia, yande niha yañepisiro ité yande remiario reroya pipe; sese acoi yasepia vahe mbahe yande remiario, nayasāro iri. Ndipoi ava osāro vite tēi

vahe mbahe güembiepia. <sup>25</sup>Acoi mbahe yande remiario ndayasepia viteise rumo, yasāro vite yande ñemosasa pipe sereco.

<sup>26</sup>Ēgüe ehi avei Espiritu yande pītivii ndayaicatu irise. Esepia, ndayaicuai eté mara yahera yayeroqui, co Espiritu Santo rumo oporandu ité Tūpa upe yande rese oyemopoasesa pipe. <sup>27</sup>Iyavei Tūpa, ahe oicua vahe opacatu yande pihañemoñetasa, oicuaño ité Espiritu mbahe omombehu pota vahe oyeupe. Esepia, Espiritu oporandu chupe semimbotar rupi yande seroyasar yaico vahe rese.

### Yasecopipa itera mbahe tēi

<sup>28</sup>Tūpa niha yande poravo güemimbotar rupi. Yepe yaicua mbahe tēi oime yandeu viña, Tūpa rumo opacatu mbahe oyapo yandeu mbahe tupri reime āgua yande raisusave. <sup>29</sup>Esepia, yipive Tūpa yande cua, yande poravo Guahir Jesucristo nungar ité yande reco āgua ‘ahe che Rahir tenonde catu vahe tasecoi opacatu ambuae che rahir sui’ oya. <sup>30</sup>Iyavei Tūpa yipisuive ahe yuvirecoi vahe oiporavo. Chupe oñehe oyeupe nara seco āgua. Ipare, “Co seco catupri vahe” ehi chupe; ahe chupe avei omondo teco porañetesa.

<sup>31</sup>¿Mara yahe irira vo chupe? ¡Tūpa niha yande repisar secoi, sese ndoicatu iri eté yande amotarēhimbar yuvireco! <sup>32</sup>Tūpa niha ombou ité Guahir imano āgua opacatu yande rese. Sese yaicua ombou aveira opacatu mbahe yandeu yande pītivii āgua Tahir rese yande recose. <sup>33-34</sup>Sese ndiyai eté ava upe, “Pecañi tēira, peyavi pe recocuer” ihe āgua yande iporavopri yaico vahe upe yuvireco. Esepia, Tūpa opa omocañi yande angaipa yande sui Cristo omanose sepirā, iyavei ocuerayevise. Cūrítei Cristo Vu acato coti, “Co che-undar ité yuvirecoi” ehi yande rese oyerure yepi. <sup>35</sup>¿Mbahe piha yande

mboyepipira Cristo yande raisusa sui viña? ¿Que yande paraisusa, mbahe yavai vahe yandeu, yande momara-mara tēisa, que tieporēhi, anise que yande turucuarā ndipose, que mbahe tēise yandeu, yande yuca potase tie yuvireco? <sup>36</sup>Inungar icuachiapri arachendar pipe aipo ehi:

“Oyemoingatu voi ari rupi yande yuca āgua yuvireco ndendar yaicose, ovesa yucapirā nungar tēi yande rereco yuvireco” ehi aracahe.

<sup>37</sup>Opatatu rumo co mbahe oimese yandeu, yasecopipa ité ahe yande raisusar recocuer pipe sui. <sup>38</sup>Sese che aroya ité Tūpa yande raisu viteño itera yepi yepe que yamanora, anise que mbahe oime vahe yandeu yande recove vitesse. Ndayande mboyepipi chiaveira ichui que Tūpa rembiguai, que seco ivate vahe, seco pīrata vahe ndayasepiai vahe, que cūrīte mbahe oime vahe yandeu, anise que mbahe oime vahe rēri. <sup>39</sup>¡Ndayande mboyepipi chiaveira que iva pendar mbahe, anise que mbahe ivi pipendar, que ambuae mbahe Tūpa rembiapo iporoaisusa sui omboyecua vahe opacatu yande Yar Jesucristo recocuer pipe yandeu!

### **Tūpa oiporavo Israel oyeupe nara aracahe**

**9** Che Cristo reroyasar che reco pipe supi eté añehe, ndopombopai. Tūpa Espiritu oicua ité che pihañemoñetasa supi vahe. <sup>2</sup>Ndavihai eté che piha pipe; oime mbahe tasi vahe cheu yepi. <sup>3</sup>Che aipota tēi opacatu che mu judío ñepisiro āgua yuvireco viña. “Tacañi tēi Cristo porēhi icañi tēiēhi āgua yuvireco” ahera viña. <sup>4</sup>Ahe niha Israel suindar yuvirecoi, aracahe Tūpa oiporavo vahe guahirguā. Ahe ipāhuve avei secoi güendigüer porañetesa pipe, iyavei omondo ité oñehe güemimbotar, oporocuita avei chupe

nara viña ‘tache mboetei oyeruresa pipe che rētave yuvireco’ oya, iyavei, “Amboaviye itera che ñehe pe rese” ehi yuvireco chupe. <sup>5</sup>Ahe avei niha yande ramoi yipindar vahe suindar yuvirecoi, Tūpa Rembiporavo Poropīsīrosar avei ahe ichuindar oyesu vahe. Ahe Poropīsīrosar niha Tūpa ité, ivate catu vahe secoi opacatu sui. Sese, ¡timboeteisa catu yepi! ¡Ēgüe tehi apirēhi!

<sup>6</sup>“Tūpa nomboaviye Israel upe oñehe imombehupri” ndapeyei chira. Esepia, ndahei opacatu Israel suindar supi tupri vahe. <sup>7</sup>Iyavei ndahei opacatu Abraham suindar tahir supi tupri vahe yuvireco. Esepia, Tūpa aipo ehi: “Nde rahir Isaac sui rumo oimera nde suindar sovasapri” ehi chupe. <sup>8</sup>Co rumo osenducua uca yandeu ndahei Abraham suindar yuvinoise vaheño ité Tūpa rahir yuvirecoi, Tūpa remimombehu rupi yuviroha vahe güeraño rumo ichuindar ité yuvirecoi. <sup>9</sup>Esepia, Tūpa Abraham upe aipo ehi aracahe: “Co ari rupi avei ayevira curi, ahese oimera Sara membri ndeu” ehi.

<sup>10</sup>Ndahei rumo co reseño, tahir Isaac rese avei. Esepia, ocuacuase sembireco Rebeca imembi cōi, ahe icōi vahe yesupa rumo ñepeño ité. <sup>11-13</sup>Ahe ndoyuviroha viteise, ndoyapo viteise mbahe que aviye vahe, que naporai vahe yuvireco, Tūpa aipo ehi ichi Rebeca upe: “Yipindar oha vahe nde membri ahe omboyerayara ipandar” ehi. Co oyoya ité icuachiapri rese acoi aipo ehi vahe: “Che asaisu ité Jacob, Esaú rumo ayamotarēhi” ehi. Sese yaicua iya ité Tūpa upe ava poravo güemimbotar rupi, ndahei seco aviye vahe rese.

<sup>14</sup>¿Sese pīha Tūpa upe, “Ndaseco tuprii vahe” yahera? ¡Aní eté! <sup>15</sup>Esepia, acoi Moisés upe aipo ehi: “Aiparaisuerecora ava, asaisu aveira che remimbotar rupi” ehi. <sup>16</sup>Supi eté ndahei yande remimbotar rupi tēi, ndahei avei yande pīratasa rupi Tūpa oyapo mbahe; ahe

rumo oporoparaisuerecosa pipe mbahe oyapo yandeu. <sup>17</sup> Supi eté Tūpa aipo ehi mborerecuar guasu Egipto pendar upe aracahe: “Che oromoingue uca mborerecuar nde reco āgua che pīratasa mboyecua āgua nde sui, che rer mboetei āgua avei opacatu ava upe co ivi pipe” ehi. <sup>18</sup> Ēgüe ehi oporoparaisuereco güemimbotar rupi. Güemimbotar rupi avei omboavai viroya āgua ava upe.

<sup>19</sup> Aviyeteramo oimera que amove pe pāhu pendar aipo ehi vahe, “Ndiyai evocoyase Tūpa upe, ‘Pe peyavi mbahe’ he āgua yandeu. Esepia, ndipoi eté niha ava, ‘¡Aní!’ ehi vaheṛā Tūpa remimbotar upe” ehira. <sup>20</sup> “Ndiyai eté rumo Tūpa poepi āgua ndeu” ahera aipo ehi vahe upe. Inungar ñaihu mbahemoinda ndiyai, “¿Mahera che apo rai tēi eve?” ihe āgua oaposar upe. <sup>21</sup> Ñaihu rese oporaviqui vahe rumo güemimbotar rupi oyapora mbahe yuvireco sese. Oicatu ichui aviye catu vahe apo, oicatu avei ambuae iporupirā tēi apo āgua.

<sup>22</sup> Tūpa rumo oñemosa pare iya ité oñemoirora, opīratasa mboyecua āgua ocañi tēi vaheṛā upe. <sup>23</sup> Ēgüe ehi avei yapo güemimbotar rupi güeco porañetesa ivate vahe mboyecua āgua yandeu. Esepia, yande paraisuereco iyavei yipisuive teco ori porañetesa omoingatu yandeu aheve yande reique āgua. <sup>24</sup> Yande avei yande renoi oyeupe, que judío, anise que ndahei vahe judío yande recose. <sup>25</sup> Esepia, Oseas rembicuachiagüer pipe aipo ehi:

“Acoi ava ndahei vahe cheundar, chupe, ‘Cheundar ité’ ahera, iyavei acoi ava ndahei vahe saisupri yuvirecoi, chupe, ‘Che rembiaisu ité’ ahera” ehi.

<sup>26</sup> “Pe ndahei vahe cheundar peico’ ehi vahesave, ahe chupe, ‘Tūpa oicove vahe rahir ité’ hesara” ehi.

<sup>27</sup> Isaías rumo aipo ehi israelita upe: “Yepe Israel suindar setá iteangara

viña inungar ivi cuhi, moviro tēi rumo oñepisiora yuvireco. <sup>28</sup> Esepia, yande Yar omboaviye voira oñeche ava viroyasarēhi mocañi āgua co ivi pipe” ehi. <sup>29</sup> Oyoya avei ambuae Isaías remimombehugüer yipindar vahe rese: “Yande Yar seco pīrata catu vahe noipisiroise que moviro yande ramoi yandeu, yacañipa tēira viña inungar tecua guasu Sodoma, Gomorra reseve yuvireco” ehi.

### Judío yuvirecoi vahe iyavei ñehesa pīsirosa resendar

<sup>30</sup> ¿Mara yahera vo evocoyase? Yaicua ava ndahei vahe judío, yepe ndahei osecá vahe güeco catupri āgua yuvireco viña, Cristo rese oyeroyasa pipe rumo vireco ité güeco catuprisa Tūpa rovaque. <sup>31</sup> Judío yuvirecoi vahe rumo oipota tēi güeco tupri āgua ité Tūpa porocuita mboyeroya pipe viña, ndoicatui eté rumo supiti yuvireco. <sup>32</sup> Esepia niha, ndahei oyeroyasa pipe ité oseca oñepisiro āgua, ahe rumo co mborocuita mboyeroya sui tēi Tūpa rese yuvirecoi pota viña. Ahe evocoyase ndoyavii oyepiapi vahe “ita yepiapisa” rese yuvireco. <sup>33</sup> Aipo ehi tupri icuachiapri aracahendar pipe:

“Che amondo Sión ve ñepeí ita yepiapisa, ahe oporoieiti vahe. Acoi sese oyeroyá vahe rumo, nomochi ucai chietera oyesui” ehi Jesús recocuer upe.

**10** Che rivireta, che aipota che piha pipe ité iyavei ayerure Tūpa upe che mu judío recocuer rese ‘toñepisiro yuvireco’ che yapave. <sup>2</sup> Supi eté iquerēhi ité Tūpa upe mboraviqui apo āgua yuvireco viña. Oquerēhisa sui rumo oyavi senducuaēhisa pipe yuvireco. <sup>3</sup> Esepia, ndoicua potai mara ehi Tūpa ava pisi oyeupe. Sese oyesui tēi oseca güecocuer tuprisa pipe ‘tomoingatu Tūpa opiha yande pisi āgua’ ohesave yuvireco

viña. Ipípe sui nomboyeroyai eté Tūpa remimbotar güeco mbocatupri āgua ité yuvireco. <sup>4</sup>Esepia, Cristo recocuer pípe imboaviyesa tupri Moisés porocuaíta, “Peyavi mbahe che ñemoirosa pisi āgua” ehiēhi āgua Tūpa oyese oyeroya vahe upe.

<sup>5</sup>Co yande reco catupri āgua porocuaíta pípe sui, Moisés aipo ehi icuachía: “Acoi ava omboaviye tupri vahe opacatu co mborocuaíta, ipípe sui yuvirecovera” ehi. <sup>6</sup>Tūpa, “Peyavi mbahe che ñemoirosa pisi āgua” heēhi āgua rumo yande yeroyasa pípe, “Ava vo oyeupira ivave Tūpa Rembiporavo reroyi āgua” ndapeyei chira. <sup>7</sup>Iyavei, “Ava vo ogüeyira omano vahe pāhuve Tūpa Rembiporavo mboyeupi uca āgua” ndapeyei chiaveira. <sup>8</sup>¿Mara peyera evocoyase pe piha pípe? “Co ñehesa namombriveimi pe sui, pe yuru pípe ité, pe piha pípe avei secoi” peyera. <sup>9</sup>“Jesús, che Yar” peyese, pe piha pípe peyeroyase avei Tu imbogüerayevisa rese, ahese ipisiropro peicora. <sup>10</sup>Esepia, yande piha pípe yayeroya Jesús rese. Ahese Tūpa, “Co seco catupri vahe” ehira yandeu. Iyavei yamombehuse sese yande yeroyasa, ahese ipisiropro yaicora.

<sup>11</sup>Esepia, icuachiapri aracahendar pípe Tūpa aipo ehi: “Acoi sese oyeroyá vahe rumo, nomochi ucai chietera oyēsui” ehi. <sup>12</sup>Sese oyoya tupri judío ndahei vahe judío recocuer rese. Esepia, ñepeño ité niha Yar opacatu ava upe nomopanei vahe oporovasasa tuvichá vahe oyeupe oporandusar upe. <sup>13</sup>Esepia, icuachiapri aracahendar pípe aipo ehi: “Acoi opacatu osenoi vahe yande Yar rer, ipisiropro yuvirecoira” ehi. <sup>14</sup>Ava rumo ndoporandui chira písirosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduise yuvireco. Iyavei ndosendui

chira ndipoise ñehesa mombehusar yuvireco chupe. <sup>15</sup>Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri aracahendar pípe: “¡Aviye ai eté acoi ava güeru vahe ñehesa aviye vahe písirosa resendar!” ehi.

<sup>16</sup>Ndahei rumo opacatu che mu judío viroya co ñehesa písirosa resendar yuvireco. Isaías niha aipo ehi avei aracahe: “Che Yar, ¿uma piha viroya ore ñehe yuvireco?” ehi. <sup>17</sup>Sese yayeroya Jesucristo rese co ñehesa písirosa rendusa pípe.

<sup>18</sup>¿Osendu piha judío co ñehesa yuvireco? ¿Osendu ité! Esepia, aipo ehi avei acoi icuachiapri aracahendar pípe: “Sendusa niha opacatú ivi rupi iñehe” ehi.

<sup>19</sup>Iyavei, ¿osenducua piha yuvireco? ¿Osenducuaño ité! Esepia, yipindar Moisés omombehu icuachiapri pípe aipo ehi:

“Perecatēhira che porovasasa rese oipisise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe” ehi.

<sup>20</sup>Ipare omombehu tupri ité Isaías osiquiyeehísave Tūpa ñehe aipo ehi vahe: “Acoi ava ndache recai vahe, ahe che pisi ité yuvireco.

Iyavei ayemboyecua acoi ava che rese ndoporandui vahe upe” ehi.

<sup>21</sup>Judío recocuer rese avei rumo aipo ehi: “Ari rupi añehe tēi ava che reroyasarēhi ndiporeroyai vahe upe vichico” ehi aracahe.

### Moviro tēi ava Israel pendar Tūpa oiporavo oyeupe nara

**11** Evocoyase, ¿omombo piha Tūpa ava Israel güembiporavo eta oye-sui? ¡Aní eté! Esepia, che avei niha ichuindar aico. Abraham niha che ramoi eté, Benjamín suindar avei aico. <sup>2</sup>Yipi-

suive ité niha Tūpa, “Co ava cheundar ité” ehi ore ramoi israelita upe. Sese cūrītei ndore momboi eté oyesui. Pe-icua niha acoi Elías resendar icuachiapri arachendar oyerouqui tēise omu israelita rese aipo ehise Tūpa upe: <sup>3</sup>“Che Yar, nde ñehe mombehusareta opa oyuca yuvireco. Ndeu porerecosa ropovēhesa renda avei opa omombo yuvireco. Che güeraño aicove vitemi nde roroyasar. Che yuca potaño avei eté rumo yuvireco” ehi. <sup>4</sup>Tūpa rumo omboyevi chupe: “Aipeha rumo siete mil tupri ava che mboyeroyasar cheyeupe nara noñenopihai vahe Baal rahanga rovai yuvireco” ehi. <sup>5</sup>Ēgüe ehi avei cūrītei opita viteño moviro judío, ahe niha Tūpa oiporavo oporoaisusa pipe. <sup>6</sup>Ipipe ité niha ēgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pipe viña.

<sup>7</sup>Evocoyase judío eta ndosecai eté mbahe oipotá catu vahe Tūpa suindar yuvireco. Sembiporavo ete ité rumo oipisi yuvireco. Ambuae upe rumo Tūpa omboavai catu viroya āgua. <sup>8</sup>Icuachiapri pipe aipo ehi aracahe: “Tūpa nomboyecua uca iri mbahe secocuer pipe. Cūrītei ēgüe ehiño vite ité yuvireco. Omondo tēi sesarā; ipipe rumo ndosepia ucai mbahe chupe. Omondo tēi avei yapisaguā; ipipe ndosenducua ucai mbahe chupe” ehi. <sup>9</sup>Iyavei David aipo ehi aracahe:

“Ipietasa ivonde nungar iyavei pira mbohasa nungar tasecoi chupe.

Ipipe sui toyuviroha mbahe tēi pipe yuvireco, toyemombaraisu uca avei ipipe yuvireco.

<sup>10</sup>Toicua eme mbahe inungar ndasesapiso vahe yuvireco.

Icuhapri nungar ayase toyuvirecoi apirēhi vahe rā” ehi.

### Ndahei vahe judío ñepisiro agüer

<sup>11</sup>Evocoyase areco iri che porandusa pēu: ¿Apirēhi vahe rā ité piha judío eta ndoyeroyai Jesucristo rese oñepisiro āgua yuvireco? ¡Aní eté! Ahe rumo ēgüe ehi ava ndahei vahe judío pisiroa pisi āgua yuvireco. Ipipe sui oyemonguerēhi catura judío ipisi āgua yuvireco curi. <sup>12</sup>Evocoyase judío eta rembiavi sui tuvichá Tūpa poroparaisuerecosa oime opacatu ava ndahei vahe judío upe. Coiye rumo tuvicha catu itera Tūpa poroparaisuerecosa opacatu ava upe oyevise yuvireco chupe.

<sup>13</sup>Che rumo areco che ñehesa pēu pe ndahei vahe judío. Tūpa niha che cuai oñehe mombehu āgua ndahei vahe judío upe. Sese, “Aviye ai eté che poraviquisa” ahe che mu judío rovaque yepi. <sup>14</sup>Sendusa sui aviyeteramo oimera ipāhuve oyemonguerēhi vahe pisiroa Tūpa suindar pisi āgua oyeupe nara yuvireco. <sup>15</sup>Esepia, judío mombosa pipe sui Tūpa omoime ñerosa opacatu ava co ivi pipendar upe. ¿Mara ehira piha evocoyase Tūpa ipisise? Ahese oipisira tecovesa apirēhi vahe yuvireco, evocoyase ndoyuvireco iri chira omano vahe nungar Tūpa upe. <sup>16</sup>Esepia, yipindar panguā sui yapopri seropovēhese Tūpa upe, opacatu panvi evocoyase sovasapri avei ichui. Iyavei inungar ivira rapo seropovēhese Tūpa upe viña, sāca avei evocoyase opacatu ēgüe ehi aveira viña.

<sup>17</sup>Amove che mu judío inungar Olivo rāca yasiapri. Pe evocoyase ndahei vahe judío ivira caha pipendar rāca nungar peico vahe, peso yasiapri rendagüerve, ipipe sui peipisi vīracuasa pe recove āgua. <sup>18</sup>Aní chira rumo, “Yande aviye catu vahe yaico ivira rāca nungar yipindar yuvirecoi vahe sui” peye pe yeecomboivate aisa pipe. Esepia, ndahei pe sui judío oipisi oyemoviracua āgua yu-

vireco, pe rumo yipindar ichui eté seipisi pe yemoviracua água.

<sup>19</sup> Iyavei, “Co judío rumo imombosa ité ivira rāca asiapri nungar yande sendagüerve yapita vaherā” peye revo. <sup>20</sup> Supi eté, co rumo Tūpa reroyaēhi pipe ahe imombosa ichui yuvireco, pe rumo seroya pipe suiño ité pepita sendagüerve. Sese peicua catu, aní chira peyemboivate ai ipipe. <sup>21</sup> Esepia, Tūpa oiporavo co judío oyeupe nara ité viña, ndoviroyaise rumo, ndoipisii eté. Pēu avei ēgüe ehira ndapemboyeroyaise. <sup>22</sup> Peyapisaca tupri, Tūpa niha aviye vahe ité. Seco pīrata vahe avei rumo ava viroyaēhisar upe. Pēu rumo aviye ité. Peicoño catu iporoaisusa pipe; aviyeteramo ndapeicoise supi, pe avei yasiapri nungar tēi peicora. <sup>23</sup> Opoipase rumo judío eta Cristo reroyaēhisa sui, Tūpa evocoyase viroyevi irira oyeupe nara. Esepia, chupe iya ité ipisi iri água. <sup>24</sup> Pe ndahei vahe judío ivira caha pipendar rāca yasiapri nungar peico, Tūpa rumo pe mondo ivira aviye vahe nungar rese. ¡Evocoyase judío ete ité inungar ahe ivira aviye vahe rāca yasiapri, ahe ivate catu oipisi irira oyeupe nara!

### Ipa vahe judío ñepisiro agüer

<sup>25</sup> Che rivireta, che aipota, “Toicua Tūpa remibotar icuapirēhi oyemboivate aiēhi água yuvireco” ahe pēu. Esepia, amove Tūpa judío upe omboavai viroya água. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pēu, <sup>26</sup> ahese ramo opacatu ava judío yuvirecoi vahe Tūpa oipisirora. Esepia, icuachiapri aracahendar pipe aipo ehi:

“Oura ava Pīsirosar judío recua Sión pāhu sui, ahe oipehara mbahe naporai vahe opacatu judío sui.

<sup>27</sup> Evocoi niha che remibotar chupe nara, amocañise yangaipagüer yuvireco ichui” ehi.

<sup>28</sup> Ēgüe ehi cūrítei judío eta ndosendu potai ñehesa pīsirosa resendar yuvireco. Sese Tūpa amotarēhisar yuvirecoi. Pēu mbahe tupri água rumo ēgüe ehi. Tūpa rumo osaisu vite. Esepia, yipive ité oiporavo tamoi eta oyeupe. <sup>29</sup> Supi eté, Tūpa ndoviroyevi iri eté mbahe güemimondo iyavei ndovirova-rova tēi vahe opihañemoñetasa güembiporavo sui. <sup>30</sup> Yipindar niha pe ndapemboyeroyai eté Tūpa. Cūrítei rumo judío eta ndoviroyaise yuvireco, pe paraisuereco Tūpa. <sup>31</sup> Ēgüe ehi avei judío eta cūrítei ndoviroyai yuvireco. Tūpa pe paraisuereco uca água rumo ēgüe ehi yuvireco. Coiye inungar pe, judío avei ospitira Tūpa poroparaisuerecosa yuvireco. <sup>32</sup> Esepia, Tūpa ité, “Opacatú oyavi mbahe che reroyaēhisa pipe” ehi ‘oicua mbahe güembiavi, tiquerēhi opacatú che poroparaisuerecosa pisi água yuvireco’ oya.

<sup>33</sup> ¿Mara ehi rutei Tūpa aracuasa, imbahecuasa avei? Ndipoi chietera que ava yaracuasa mombehu tupri água. Ndayaicutui avei secocuer cuapa tupri água. <sup>34</sup> Ndipoi eté que ava oicua vahe yande Yar pihañemoñetasa iyavei ndipoi eté que ambuae ava tēi ombohe vahe no. <sup>35</sup> Ndipoi que ava mbahe omondo vahe yande Yar upe ‘tomboyevi cheu’ ohesave. <sup>36</sup> Esepia, Tūpa suiño ité niha opacatu mbahe oime, oyeupe nara avei mbahe oyapo opīratasa pipe. ¡Sese imboetepri ité Tūpa tasecoi yepi! Ēgüe tehi apirēhi.

### Yande recocuer imondopri Tūpa upe nara

**12** Sese che rivireta, che Tūpa poroparaisuerecosa pipe aipota pe yemondo ité pe recovesese chupe nara, inungar mbahe Tūpa upe seropovēhepri ité, ahe aviye itera chupe. Ahe niha pe cuaita pe piha pipe sui eté peyapo vahe rā chupe. <sup>2</sup> Peico iri eme co ivi pipendar pihañemoñetasa



tēi rupi. Iyacatu rumo pesecuñaro pe pihañemoñetasa. Ipípe sui opacatu pe recocuer oñecuñarora. Ēgüe peyese, peicuara Tūpa remimbotar ahe mbahe aviye vahe, semimbotar supí tuprí vahe ité.

<sup>3</sup>Tūpa niha oporovasasa pipe che cuai, sese aipo ahe pēu: pepihañemoñeta eme pe yemboivate ai āgua rese. Iyacatu rumo peicua tuprí pe pihañemoñetasa peyesendar Tūpa pēu mbahe imbougüer rupí sese pe yeroyasa pipe. <sup>4</sup>Inungar yande rete ñepeño ité, sesendar rumo setá, iyavei ndahoyoyai mbahe sembiapo. <sup>5</sup>Ēgüe vahe avei yande, yepe que yande retara viña, Cristo rese yayemboyase rumo, ñepeí vahe nungar yaico. Evo-coiyase yande ñepeí-peí opacatu upendar yaico.

<sup>6</sup>Tūpa niha omboyeavirati mbahecuasa imbou oporoaisusa pipe ñepeí-peí upe. Evocoyase Tūpa ombouse oñehe mombehu āgua yandeu, yamombehura ñepeí-peí iñehe sese yande yeroyagüer rupí. <sup>7</sup>Que ombouse mbahecuasa ambuae ava pítivii āgua yandeu, yaipítivii tuprí aveira. Ombouse yande porombohe āgua, yaporombohe tupríño itera. <sup>8</sup>Iyavei ombouse yandeu ambuae ava monguerēhi āgua, yaporomonguerēhiño itera. Ombouse yande poropítivii āgua ava mbahe ndovirecoi vahe upe, yamondoño itera mbahe chupe yande recatēhiēhisave. Acoi oporocuai vahe, toyapoño oquerēhisa pipe; iparaisu vahe pítiviisar, toipítiviño avei vorivetesá pipe.

### Cristo reroyasar cuaita

<sup>9</sup>Iyavei peyeraisu tuprí ité; aní pesepia potara mbahe tēi, iyacatu rumo peicoño itera mbahe aviye vahe pipe. <sup>10</sup>Peyeraisu catu ñepeí-peí oyeivri nungar tuprí pe recosa pipe. Pe ae peyemboetei rāgüer sui pemboetei catura ambuae ava Jesús reroyasar.

<sup>11</sup>Peyemonguerēhi, aní ndapequerēhi chira iyavei peyapo yande Yar upe mbahe opacatu pe recoete pipe.

<sup>12</sup>Peicoño pe viharetasave mbahe iva péndar rārosa pipe; peñemosañ mbahe rasicuer peiporarase iyavei aní chira pe-seya pe yeruresa yepi.

<sup>13</sup>Peipítivii ambuae ava Cristo reroyasar mbahe ipanese chupe, pemohapisira ava oyepota vahe pe piri.

<sup>14</sup>Peyerure pe amotarēhimbar rese; peporandu Tūpa porovasasa rese ahe ava upe nara; aní pe avei peñehe mara chupe.

<sup>15</sup>Peyemboviha acoi ava oyemboviha vahe rupive; peyaseho avei ava oyaseho vahe rupive.

<sup>16</sup>Peico tuprí oyoya guasu ñepeí-peí oyese pe yeaisusa pipe. Aní chira peyeecomboivate ai. Iyacatu rumo peyemoingatu ava seco mbegüemi vahe mbori āgua. Aní peñemoha imbahecuá vai vahe nungar.

<sup>17</sup>Aní pēu mbahe tēi aposar upe pemboevira mbahe tēi avei. Peyapo catu mbahe tuprí opacatu ava rembiepiave.

<sup>18</sup>Peicatu vahe rupí peseca pe reco tuprí āgua opacatu ava upe. <sup>19</sup>Che rivireta, aní pe ae pemboeví mbahe tēi pipe pe rereco momarasar upe. Peseyañ Tūpa upe. Ahe oicuara chupe. Esepia, icuachiapri pipe aipo ehi: “Che ité aicuara ava mbahe tēi aposar upe. Che amboepira” ehi yande Yar. <sup>20</sup>Iyavei aipo ehi: “Acoi nde amotarēhimbar ndasiepoise, emondo mbahe itohu, iyavei acoi ihuseise, eremondora itoihu. Esepia, ēgüe peyese pe amotarēhimbar upe, ochira pe sui” ehi. <sup>21</sup>Aní mbahe tēi upe peyecopi uca. Iyacatu rumo pesecopira mbahe-mbahe tēi mbahe tuprí aposa pipe.

**13** Opacatu mborerrecuar yuvirecoi vahe pemboyeroyara. Esepia, ndipoi mborerrecuar ndovirecoi vahe ocuaita Tūpa suindar. Co oime vahe

rumo semimbou ité. <sup>2</sup>Sese acoi mborerecurar upe que mara ehi vahe, Tūpa porocuaita reroyaēhisar yuvirecoi. Ēgiue ehi vahe inupambri yuvirecoira. <sup>3</sup>Esepia, mborerecurar yuvirecoi vahe ndahei ava seco tupri vahe mbosiquiye āgua yuvirecoi, ahe rumo yuvirecoi ava mbahe tēi aposar mbosiquiye āgua. Ndayasiquiye potaise mborerecurar sui, iya yaicora mbahe tupri pipe. Mborerecurar evocoiyase, “Aviye” ehira yande reco catuprisa rese yandeu. <sup>4</sup>Esepia, ahe Tūpa rembiguai mbahe tupri apo āgua yandeu. Acoi mbahe tēi yayapose rumo, yasiquiyera ichui. Esepia, ahese mborerecurar yande nupaño itera yuvireco. Ahe niha Tūpa remimbotar rupi eté icuaita ava mbahe tēi aposar nupa āgua yuvireco. <sup>5</sup>Sese iya yamboyeroya ité mborerecurar; ndahei rumo ahe yande nupaēhi āgua reseño, yande pihañemoñetasa momaraēhi āgua rese avei. <sup>6</sup>Sese avei yamondora guarepochi mborerecurar upe yuvireco yandeu oporanduse. Esepia, ahe mborerecurar Tūpa rembiguai yuvirecoi. Evocoiyase aheño ité iporaviquisa yuvireco.

<sup>7</sup>Yamondo ñepei-peí ava upe mbahe chupendar. Iya ité yamondo mborerecurar upe guarepochi oporanduse sese, yamboetei avei ava imboyeroyapri.

<sup>8</sup>Aní yandereve. Ahe yande cuaita. Yande cuaita avei yande yeaisu āgua, supi eté acoi ava osaisu vahe ambuae ava, omboaviye ité Tūpa porocuaita. <sup>9</sup>Aipo ehi acoi Tūpa porocuaita: “Ndapeyemboaguasai chira, ndapeporoyucaí chira, ndapemondai chira, ndaperemirai chira, ndapeipota rai chiaveira ambuae ava mbahe” ehi. Co iyavei opacatu ambuae Tūpa porocuaita sendusa tupri ité co ambuae ñehesa rese: “Pesaisu ava pe yeaisu nungar” ehi. <sup>10</sup>Acoi vireco vahe oporoaisusa, ahe ndoyapoi eté

mbahe ava upe; sese poroaisusa pipe imboaviyesa tupri ité porocuaita.

<sup>11</sup>Iyavei peicua tupri co mbahe oime vahe yandeu. Cūrítei ari osupiti ité yandeu yande yemopoase āgua. Esepia, yande Yar yevi āgua cōimi catu yandeu iñehengagiuer yipindar seroyasa sui. <sup>12</sup>Supi eté osupiti senimi ari yandeu; sese iyacatu yapoi pītumimbi vahe nungar mbahe-mbahe tēi aposa sui mbahe icatupri vahe pipe yande reco āgua. Evocoiyase tayaico sundao oyoeписа omonde vahe nungar. <sup>13</sup>Yande catu yaguata yande reco ĩvi tuprisa pipe, inungar yaguatase ari pipe. Aní catu yaico caguar pipe tēi iyavei pieta siapu tēi vahe rupi, ndayande poropota rai chiaveira, iyavei ndayayapoi chira mbahe tēi, ndayaicoi chiaveira yande pihañemoñeta ndahoyoyai vahe pipe, ambuae ava mbahe pota raisa pipe avei no. <sup>14</sup>Iya rumo yarecora yande Yar Jesucristo recocuer yande yese, aní yande pihañemoñeta mbahe-mbahe tēi apo āgua yande remimbotarai pipe.

#### Aní peroïro ambuae Jesús reroyasar

**14** Acoi ava ndoyeroya tupri vitei vahe yande Yar rese que oiquese pe piri, peipisi tuprira; aní peñehepoepira ipihañemoñetasa ndahoyoyaise pe pihañemoñeta rese. <sup>2</sup>Esepia, amove evocoi nungar ava ihupri pāve tēi yuvirohu, oime rumo amove ava ipihañemoñeta opacatu mbahe hu āgua rese. <sup>3</sup>Acoi ava opacatu mbahe ohu vahe, tovirōro eme amove ndohui vahe mbahe iyavei acoi amove ndohui vahe mbahe, tovirōro eme acoi ohu vahe opacatu mbahe. Esepia, evocoi nungar ava Tūpa oipisi ité. <sup>4</sup>Supi eté pe ndiyai eté peroïro vaherā ambuae ava rembiguai. Esepia, ahe yande Yar povri pendar secoi. Yepe ndoyaviise mbahe ipipe, anise ichui oviapise mbahe tēi pipe, serecurar ité oicuara chupe. Esepia,

yande Yar opīratasa pipe osecomoin-gatuño itera.

<sup>5</sup>Oime avei amove ava ñepei ari omboetei catu yuvireco ambuae ari sui, iyavei ambuae oime aipo ehi: “Oyoya guasuño ité niha ari” ehi vahe. Ñepei-peí opihañemoñeta rupi, “Co supi tupri vahe” ehira opiha pipe yuvireco. <sup>6</sup>Acoi que ñepei ari ava omboetei vahe, yande Yar mboeteisa pipe rumo êgüe ehi. Iyavei ohu vahe opacatu mbahe, Yar mboeteisave avei êgüe ehi. Esepia, ahe güembiapo rese, “Aviye ndeu” ehi Tüpa upe; iyavei acoi amove ndohui vahe mbahe, Yar mboeteisave êgüe ehi, iyavei, “Aviye ndeu” ehi avei Tüpa upe.

<sup>7</sup>Esepia, yande ñepei-peí ndayaicoi yandeyeupe nara tēi, ndayamanoi avei yandeyeupe nara. <sup>8</sup>Esepia, yaicove vitesé, yaico yande Yar upe nara; yamanose, yamano yande Yar upe nara avei. Êgüe yahe yande yaicove vitesé, anise yamanose, opacatu chupe nara ité yaico. <sup>9</sup>Sese niha Cristo omano, ipare ocuerayevi opacatu ava Yar güeco âgua que omano vahe, anise que oicove vite vahe upe avei.

<sup>10</sup>¿Mahera evocoyase peroïro pe mboetasa Cristo reroyasar iyavei mahera ndapesepia potai? Esepia, supi eté niha yande opacatú yasora Tüpa rovai. Ahe evocoyase opara oporandu yande recocuer rese yandeu.

<sup>11</sup>Esepia, icuachiapri arachendar pipe omombehu:

“Supi eté che reco pipe aipo ahe, ehi yande Yar, opacatu ava oñenopihara che rovai yuvireco, iyavei che mboeteira yuvireco, ehi” ehi.

<sup>12</sup>Evocoyase yande ñepei-peí yamombehura yande recocuer Tüpa upe.

### Aní pe rivireta mbahe tēi pipe pereco uca

<sup>13</sup>Sese yande ndiyai yañeroïro. Iyacatu rumo ñepei reseve pereco tupri ambuae pe rivri, angaipa pipe sereco ucaêhi âgua, iyeroyasa momaraêhi âgua avei.

<sup>14</sup>Che yande Yar reroyasar che reco pipe aicua ndipoi eté que tembihu yande reco momara vahe. Amove rumo ava, “Mbahe tēi co tembihu, ndiyai yahu” ehise, ahe chupe evocoyase mbahe tēi, ndiyai eté ihu âgua. <sup>15</sup>Iyavei yande que mbahe yahuse, ipipe yamomara tēise yande rivri pihanemoñetasa Tüpa rese, ndahei evocoyase yande poroaisusa pipe ité êgüe yahe. ¡Aní ahe yamocañi tēi uca Cristo sui evocoi nungar mbahe yahu vahesa pipe! Esepia, secocuer rese Cristo omano. <sup>16</sup>Yepe que mbahe aviye era yandeu viña, ndayayapoi chira rumo evocoi nungar yande rembiapo rese ava ñehe-ñehe tēiêhi âgua. <sup>17</sup>Esepia, ndahei ivate catu vahe Tüpa upe yande carusa, yande igua avei ipovrive yande recose. Êgüe ehi rumo co ivate catu vahe chupe yande recocuer mohivisa, yande reco tuprisa ambuae Tüpa reroyasar pâhuvé iyavei yande rorivetesa yareco vahe Espíritu Santo sui. <sup>18</sup>Êgüe yahese Cristo mboeteisave, aviye aira Tüpa upe iyavei opacatu ava rembiepiave avei no.

<sup>19</sup>Sese opacatu yande recoeté pipe yasecara yaico tupri vaherã yandeyeupe. Ipipe sui yande yaicatura yañepitivii yande yemoviracua tupri âgua yande Yar rese. <sup>20</sup>Aní pemocañi uca tēi ava recocuer Tüpa remipisiro tembihu sui tēi. Opacatu niha co tembihu aviye aiño ité; ndiyai eté rumo yahu que tembihu ambuae ava Cristo reroyasar pihanemoñetasa momara âgua. <sup>21</sup>Aviye catu ndayahuisse mbahe roho, que ndayahuisse uva ricuer iyavei que ambuae mbahe ndayayapoise, ambuae ava Cristo reroyasar angaipa pipe seiti

uca iriēhi āgua. <sup>22</sup>Yande pihañemoñe-tasa yareco vahe rumo yarecoño itera yandeyeupe ité Tūpa rovaque. ¡Aviye ai catuño ité ava acoi, “Aviye yayapose evocoi nungar mbahe” he pare, “¿Mara ehi pīha?” ndehi irise opihañemoñe-tasa pipe! <sup>23</sup>Acoi que ava, “¿Mara ehi pīha?” ehise tembihu upe. Ipare rumo ohuse, ahe evocoiyase oyemboangaipa ipipe. Esepia, ndohui Tūpa rese oyeroyasa pipe. Iyavei ava, “¿Mara ehi pīha?” ehi viteshe que mbahe upe, ipare oyapose ité, ahe angaipa.

**Yambovihara ava yande cotindar,  
ndahei chira yande ae  
tēi yayembovihara**

**15** Yande yayemoviracua catu vahe Cristo rese yande yeroyasa pipe, iyacatu yande teieté yañemosañora ava Tūpa rese ndipihañemoñeta tupri vitei vahe rese. Ndahei chira rumo yande ae tēi yayemboviha. <sup>2</sup>Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye āgua yuvireco chupe ‘toyeroya catu opihañemoñeta pipe Tūpa rese yuvireco’ yande yapave. <sup>3</sup>Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri ité acoi omombehu vahe: “Nde rese ñehe-ñehe tēi opa aipisi” ehi. <sup>4</sup>Supi eté co opacatu omombehu vahe aracahe opa icuachiasa yande mbohe āgua, yande yasāro vaherā Tūpa reco porañetesasa yande ñemosasa pipe iyavei yande pīhamonguerēhisa pipe avei ahe yareco vahe ichuindar. <sup>5</sup>Tūpa, acoi ombou vahe yande ñemosasa, yande pīhamonguerēhisa avei yandeu, tape pītivii oyoya guasu pe reco tupri āgua ñepeipei peyese Jesucristo recocuer rupi. <sup>6</sup>Ipape sui pe opacatu oyoya guasu ñepeipei pe pīhanemoñetasasa pipe, pe ñehe

pipe avei tapemboetei Tūpa, yande Yar Jesucristo Ru.

**Ñehesa pīsirosa resendar  
imombehusa ava eta  
ndahei vahe judío upe**

<sup>7</sup>Peyepisi tupri ñepeipei, inungar Cristo pe pisi tupri oyeupe nara Vu mboetei āgua. <sup>8</sup>Che rumo aipo ahe pēu: Jesucristo ou judío pītivii Tūpa remimombehugüer mboaviye āgua judío ramo aracahendar upe. Ēgüe ehi Tūpa oñehe mboaviyasa mboyecua <sup>9</sup>‘tomboetei ava ndahei vahe judío yuvirecoi vahe che Ru Tūpa iporoparaisuerecosa rese yuvireco’ oyapave. Ahe ēgüe ehi icuachiapri rupi tupri ité aipo ehi vahe:

“Sese che oromboeteira opacatu ava ndahei vahe judío pāhu rupi, iyavei asapucaira ndeu nde rer mboeteisa pipe” ehi.

<sup>10</sup>Iyavei acoi ambuae icuachiapri pipe omombehu avei no:

“¡Peyemboviha catu pe opacatu ndahei vahe judío peico vahe judío Tūpa rembiporavo reseve!” ehi.

<sup>11</sup>Ambuae pipe avei aipo ehi no:

“Pe opacatu ivi pipendar ava, ¡pemboetei yande Yar!” ehi.

<sup>12</sup>Isafas avei aipo ehi icuachía:

“Oimera niha ava Isaí suindar, opacatu ava rerecuarā secoira.

Ava ndahei vahe judío seseño ité oyero-yara yuvireco” ehi.

<sup>13</sup>Tūpa acoi ombou vahe mbahe oye-suindar rāro āgua, tayande mboviharete catu iyavei mbahe tupri tayareco sese yeroyasa pipe. Ipape sui tombou yasāro vaherā ahe mbahe aviye vahe Espíritu Santo pīratasa pipe.

<sup>14</sup>Che rivireta, ayeroya ité pe reco aviyesa rese, opacatu mbahe peicuapa tupri, peicatu avei pe ñepeipei peyeupe pe yemboaracua āgua. <sup>15</sup>Co tecocuer rese rumo aicuachía opacatu che

siquiyeehisa pipe pëu pe resaraiëhi ägua ichui. Esepia, ayapo Tüpa che cuaita ombou vahe che raisusa pipe cheu <sup>16</sup>Jesucristo rese che poraviqüi ägua ava ndahei vahe judío recocuer aviye ägua. Evocoyase judío pahi nungar che cuaisa pipe amombehu co ñehesa Tüpa ombou vahe pñisirosa resendar yuvireco chupe imoporëhi ägua Tüpa rovai inungar mbahe seropovëhepri aviye vahe Tüpa upe Espñritu Santo pipe yepi.

<sup>17</sup>Supi eté che Jesucristo reroyasar che recosa pipe aviharete Tüpa che cuaita rese. <sup>18</sup>Esepia, cheu ndiyai añehe vaheerã que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu añehe vaheerã. Esepia, amonguerëhi Tüpa reroya ägua yuvireco che ñehe rese, che rembiapo sui avei. <sup>19</sup>Ëgüe ahe poromondiisa mbahe yavai vahe apo Tüpa pñratasa pipe. Ahe ayapo Espñritu Tüpa suindar pñratasa pipe. Ipipe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no. <sup>20</sup>Chequerëhi avei co ñehesa pñisirosa resendar mombehu ägua ava Cristo recocuer ndosendui vahe upe yepi. Ndahei rumo ambuae ava imboaracua pare tñi, <sup>21</sup>che rumo ayapo inungar icuachipri pipe omombehu vahe:

“Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

**Pablo ipihañemoñeta  
Roma ve oso ägua**

<sup>22</sup>Co rese tñi che ndaicutui aso pe pñri, yepe setá rupi aso pota tñi viña. <sup>23</sup>Cüritei rumo opa amboaviye che poraviqüi co ivi rupi, iyavei opa tñi setá araviter pe pñri che sosa rägüer. <sup>24</sup>España ve che soseve, apita pucumira vicho pe

pñri yande yemboviha ägua. Iyavei pe sui che sē potase, che pñtiviimira peye aheve che so ägua. <sup>25</sup>Cüritei rumo che asora Jerusalén ve. Arasora porerecosa ahe pendar yande mboetasa Jesús reroyasar pñtivii ägua. <sup>26</sup>Esepia, ivi Macedonia pendar iyavei Acaya pendar Jesús reroyasar, ahe omonuha guarepochi yuvireco Jerusalén ve yande rivri iparaisu vahe pñtivii ägua yuvireco. <sup>27</sup>Ahe ëgüe ehi güemimbotar rupi yuvireco iyavei iya ité imboyevi ägua yuvireco chupe ahe mbahe tupri oyeupe apo agüer rese. Esepia, yipindar Jesús reroyasar judío yuvirecoi vahe oicua uca co tecocuer Tüpa suindar ahe ava ndahei vahe judío yuvirecoi vahe upe. Sese iya ité imboyevi ägua co ivi pipendar porerecosa chupe. <sup>28</sup>Opase che co porerecosa amondo yuvireco chupe, España ve che sose, ahese apitara vicho pe pñri. <sup>29</sup>Che amoha voi eté asose eipeve, tuvichá omboura Cristo oporovasasa yandeu.

<sup>30</sup>Che rivireta, yande Yar Jesucristo rer pipe iyavei yeaisusa Espñritu ombou vahe pipe avei aporandu pëu opacatu che rese peyeroqui pñrata vaheerã Tüpa upe che pñtivii ägua co mboraviqüi rese. <sup>31</sup>Peoporandu Tüpa upe, tache repi ava Jesús reroyasarëhi sui ivi Judea ve, iyavei Jerusalén pendar yande rivireta co porerecosa pñsi tupri ägua avei. <sup>32</sup>Ahese Tüpa oipotase, che aviharetera ayepotase pe repia, iyavei toime pñtuhusa yandeu che pe pñri che sose. <sup>33</sup>Ëgüe tehi Tüpa güeco tuprisa pipe tasecoi opacatu pe rese.

**Pablo mahenduhasa  
ñepei-pei ava upe**

**16** Co yande reindri Febe serer vahe, ahe oipñtivii tecua Cencrea pendar Cristo reroyasar oico. <sup>2</sup>Peipisi tupri catu yande Yar rer pipe; ahe niha yande cuaita Cristo reroyasar yande recose, iyavei peipñtiviiño que mbahe chupe

ipane vahe rese. Esepia, ahe setá ité oporopitívii iyavei che avei eté che pítívii no.

<sup>3</sup>Pemombehu che mahenduha Prisca upe, Aquila upe avei, ahe niha che pítívii mboraviquí Jesucristo recocuer resendar rese yuvireco. <sup>4</sup>Ahe avei niha mbahe tēi pipe omondo güecocuer che repicave yuvireco, sese, “Aviye” ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvireco chupe. <sup>5</sup>Pemombehu avei che mahenduha sêtave oñemonuha vahe upe yuvireco. Pemombehu avei che mahenduha che rembiaisu Epeneto upe. Ahe rane niha yipindar ivi Asia pendar Cristo reroyasar. <sup>6</sup>Pemombehu avei che mahenduha María upe. Ahe niha oporaviquí iteanga vahe pe recocuer rese. <sup>7</sup>Pemombehu avei che mahenduha che mu Andrónico iyavei Junias upe. Ahe niha che mboetasa yuvirecoi che roquendasave; ahe avei apóstol remimboyeroa yuvirecoi, ahe rane avei yipindar Cristo reroyasar yuvirecoi che sui.

<sup>8</sup>Pemombehu avei che mahenduha che rembiaisu Ampliato upe yande Yar rese secosa pipe. <sup>9</sup>Pemombehu avei che mahenduha Urbano upe. Ahe niha yande ndugüer oporaviquí vahe Cristo recocuer rese, che mboripar Estaquis upe avei. <sup>10</sup>Pemombehu avei che mahenduha Apeles upe. Ahe niha güecoãhasa sui osê tupri vahe Cristo rese oyeroyasa pipe. Iyavei pemombehu che mahenduhasa ava Aristóbulo rêta pipendar yuvirecoi vahe upe avei. <sup>11</sup>Pemombehu avei che mahenduha che mu Herodión upe, ava Narciso rêta pipendar yande Yar reroyasar upe avei. <sup>12</sup>Pemombehu avei che mahenduha Trifena upe iyavei Trifosa upe. Ahe niha oporaviquí vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporaviquí ité yande Yar upe nara. <sup>13</sup>Pe-

mombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi. <sup>14</sup>Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei. <sup>15</sup>Pemombehu avei che mahenduha Filólogo upe iyavei Julia upe, Nereo upe iyavei seindri upe, Olimpás upe, opacatu yande rivri yande Yar rese yuvirecoi vahe ipirindar upe avei.

<sup>16</sup>Peyeovaupite catu pe reco maranehisa pipe che mahenduha mombehuse peyeupe. Opacatu Cristo reroyasar cohave omondo avei omahenduhasa yuvireco pēu.

<sup>17</sup>Che rivireta, peicua catu pe pāhu pendar omboyaho pota serai vahe sui. Oime ava ěgüe ehi vahe, oiti uca vahe ava mbahe tēi pipe. Esepia, ahe ndahei eté co ñehesa pe yembohesa rupi yuvirecoi. Sese evocoi nungar ava sui peyepipiño itera. <sup>18</sup>Esepia, ahe ava ndahei yande Yar Jesucristo upe nara oyapo mbahe yuvireco. ěgüe ehi rumo ahe oyeupe nara tēi oipota rai mbahe yuvireco. Iyavei ombopa ava ndayaracua tuprii vahe; oñehe tupri ai angahu oporomohapisi aisa pipe tēi yuvireco. <sup>19</sup>Opacatu ité icuasa pe poreroyasa. Sese che aviharete vichico. Che rumo aipota pemboyecua vaherã pe mbahecuasa mbahe aviye vahe apo āgua, ndahei mbahe tēi apo āgua. <sup>20</sup>Evocoyase Tūpa güeco tuprisa pipe pihaivi Carugar osecopipa tupri itera. Pe avei evocoyase pesecoreroyira. Yande Yar Jesucristo tape rovasa.

<sup>21</sup>Omondo avei omahenduhasa Timoteo pēu. Ahe che pítívii che poraviquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

<sup>22</sup>Che, Tercio, aicuachía vahe co ñehesa pëu, che avei che mahenduhasa amondo yande Yar reroyasa pipe pëu.

<sup>23</sup>Omondo avei omahenduhasa Gayo pëu. Ahe sêtave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu pëu, ahe tecua mbahe guarepochi apocatusar. Yande rivri Cuarto avei omondo omahenduhasa pëu.

<sup>24</sup>Aviye, yande Yar Jesucristo tape rovasa opacatu.

### **Pablo omboetei Tūpa**

<sup>25</sup>¡Yamboetei Tūpa! Ahe niha oicatu pe moviracua co ñehesa ñepisirosa re-

sendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tūpa omboyecua ramo vahe cheu co ivi apoëhi suive mbahe ndicuasai vahe rese. <sup>26</sup>Cūrítei rumo oyecua uca oñehemombehusar rembicuachía pipe Tūpa apirēhi vahe porocuita rupi cute. Ahe ñehesa ndicuasai vahe omboyecua uca opacatú ava upe ‘toviroya sese oyeroyasa pipe yuvireco’ oya.

<sup>27</sup>¡Tūpa güeraño imbahecuá vahe yepi, ãgüe tehi ahe yande Yar Jesucristo rer pipe imboeteipri tasecoi!

*YPHINDAR PABLO REMBICUACHIA  
CORINTO PENDAR UPE*

**CORINTIOS**

**Pablo mahenduhasa Jesús  
reroyasar Corinto pendar upe**

**1** Che Pablo, yande rivri Sóstenes reseve, oromondo co ore mahenduhasa opacatu pëu. Tüpa niha, güemimbotar rupi, che poravo apóstol che reco água. <sup>2</sup>Aicuachía co che ñehe pëu, pe Jesús reroyasar peñemonuha vahe Tüpa upe tecua Corinto ve. Peicua niha pe ipehapri peico Tüpa upe nara ité Jesucristo rese peicose. Peicua avei niha Tüpa pe poravose oyeupe nara pe reco catupri água, inungar opacatu ambuae seroyasar co ivi pipendar omboeteci vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei. <sup>3</sup>Yande Ru Tüpa, yande Yar Jesucristo tape rovasa pe reco tupri água.

**Jesucristo suindar  
porovasasa seroyasar upe**

<sup>4</sup>Che, “Aviye ndeu” aheño ité Tüpa upe pe recocuer rese yepi. Esepia, Tüpa pe rovasa ité Jesucristo rese peicose. <sup>5</sup>Ëgüe ehi secocuer pipe sui Tüpa ombou opacatu pe reco tupri catu água, pemombehu tupri vaherã imbahecua, opacatu mbahe supi eté vahe cua tupri água avei. <sup>6</sup>Esepia niha, ore co ñehesa Jesucristo resendar pëu imombehusa pipe sui pe recuñaro uca ité. <sup>7</sup>Sese ndipoi eté que porovasasa Tüpa Espiritu suindar ipane vahe pëu yande Yar Jesucristo yevi água pesãrose. <sup>8</sup>Tüpa niha pe moviracuaño itera pe rereco ari cañisa pipe Jesucristo yevise voi curi ‘tipo eme

que mbahe tēi secocuer rese yuvireco’ ohesave. <sup>9</sup>Ahe acoi omboaviye vahe ité oñhengagüer yande poravo Guahir yande Yar Jesucristo rese yande reco água.

**Jesús reroyasar pihañemoñetasa  
ndahoyoyai vahe resendar**

<sup>10-11</sup>Che rivireta, che amombehu potami mbahe pëu yande Yar Jesucristo rer pipe. Esepia, Cloé mu pe mombehu yuvireco cheu: “Oñemoiro-iro yuvireco oyeupe ae” ehi. Sese aipo ahe pëu: pemboyoya catu pe pihañemoñetasa, ndapeyembohoyai chira peyesui. Peico catu pe yeaisusa pipe. Ichui tahoyoya pe pihañemoñetasa, tahoyoya avei mbahe pe remimbotar. <sup>12</sup>Supi eté amove aipo, “Ore Pablo rupindar oroico” peye tēi; ambuae evocoyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peye-peye tēi aipo peico. <sup>13</sup>¡Cristo rumo vireco porombohesa ndoyaho-yaho tēi vahe! ¿Che tie amano curusu rese pe angaipa repirã? anise, ¿che rer pipe tie peñepiramo uca peico? <sup>14</sup>¡Aviye Tüpa upe che ndopoãpiramoise! Crispo iyavei Gayo, ahe güeraño rumo añapiramo yuvireco cuese. <sup>15</sup>Sese ndipoi chira “serer pipe ñapiramosa” ehi vahe yuvireco cheu. <sup>16</sup>Estéfanas rēta pendar avei añapiramo yuvireco, ipare ndipo iri revo ambuae ava añapiramo vahecuer. <sup>17</sup>Cristo niha nomombehui che poroãpiramo água. Ëgüe ehi rumo che cuaita ñehesa ñepisirosa resendar mombehu água tēi. Iyavei ndahei ñehesa yavai catu vahe aiporu. Esepia, ñañomi potai eté que chíhi co ñehesa pīratagüer Jesucristo curusu rese imano agüer resendar ava sui.



### Cristo Tūpa pīratasa, imbahecuaasa avei

<sup>18</sup> Esepia, acoi ava ocañi tēi vaherā upe co ñehesa curusu rese Cristo manosa resendar aviye ěgüe ehi tēi vahe viña. Yande ipīsiropri yaico vaherā upe rumo co ñehesa vireco ité Tūpa pīratasa, <sup>19</sup> inungar Isaías rembicuachiagüer pipe aipo ehi:

“Amocañira co ivi pipendar ava tēi mbahecuaasa iyavei arocuara ava yaracua vai tēi vahe sui yaracuaasa” ehi.

<sup>20</sup> ¿Mara ehi evocoyase co ivi pipendar ava imbahecua vai vahe, ava-ava tēi aracuasa cuapar avei, iyavei ñehese cua tupri ai vahe co ivi pipendar mbahe rese yuvireco? ¡Tūpa niha osecuñaro evocoi nungar mbahecuaasa ěgüe ehi tēi vahe pipe! <sup>21</sup> ěgüe ehi eté oaracuasa pipe ‘toicua eme che recocuer ava oaracuasa pipe tēi’ oya. Yepe, “Co ñehesa Cristo resendar ěgüe ehi tēi vahe” ehi tēi ava yuvireco chupe viña, Tūpa rumo co ñehesa mombhusa sui ‘toñepisiro che Rahir rese yeroyasa pipe yuvireco’ oyapave yandeu.

<sup>22</sup> Che mu judío osepia pota tēi mbahe poromondiisa ipiratá vahe iva pendar yuvireco. Griego evocoyase osendu pota tēi ñehesa aracuasa resendar yuvireco no. <sup>23</sup> Yande rumo, “Cristo omano curusu rese” yahe ava upe yaico. Amove judío upe mbahe tēi co ñehesa. Iyavei amove ndahei vahe judío, co ñehesa osenduse, aviye acoi ěgüe ehi tēi vahe yuvireco chupe. <sup>24</sup> Yande rumo, Tūpa rembiporavo yaico vahe, que judío, anise que griego avei, yandeu co ñehesa Tūpa Rembiporavo Cristo resendar Tūpa pīratasa ité, imbahecuaasa avei. <sup>25</sup> Esepia niha, ava upe, Tūpa suindar mbahe aviye acoi ěgüe ehi tēi vahe viña. Co Tūpa suindar rumo mbahecuaasa aviye catu vahe ité ava tēi mbahecuaasa sui

iyavei acoi mbahe Tūpa suindar aviye nipiratai vahe ava upe viña, ahe rumo ipīrata catu ité opacatu ava tēi pīratasa sui. <sup>26</sup> Che rivireta, peyemomahenduha catu co rese: Tūpa pe poravo, yepe pe pāhu pendar ndasetaimi imbahecua vai vahe ava rovaque yuvireco viña. Ndasetaimi avei pereco pe mu seco ivate vahe viña no. <sup>27</sup> Evocoi ava, “Ndoicuai vahe mbahe yuvireco” ehi yuvireco pēu viña. Tūpa rumo pe poravo evocoi ava imbahecua vai vahe mochi āgua. Iyavei oiporavo ava pe pāhu pendar ndoicatu tuprii vahe yuvireco ava ipīrata vahe Tūpa cuaparēhi mochi āgua. <sup>28</sup> Oiporavo avei co ivi pipe ava remieroñro seco mbegüemi vahe, ava seco ivi coti catu vahe pe pāhu pendar co ava seco ivaté vahe reroyi āgua <sup>29</sup> ‘toyemboivate ai eme que ava che rovaque yuvireco’ oya. <sup>30</sup> Tūpa ité rumo yande mboyemboya Guahir Jesucristo rese, ahe avei ombou Guahir yande mboaracua āgua, yande reco mohivi āgua avei ‘toyuvirecoi cheu nara’ ohesave iyavei ‘ipīsiropri toyuvirecoi’ oya yandeu. <sup>31</sup> Sese inungar aipo ehi ñehesa icuachiapri arachendar pipe: “Acoi ava oyeecomboivate ai pota vahe, toyecomboivate catu yande Yar rembiapo rese” ehi.

### Pablo omombehu curusu rese Cristo mano agüer

**2** Iyavei, che rivireta, che asose cuese, añehese pēu Tūpa suindar ñehesa supi eté vahe yipindar ndicuasai vahe pipe, nañehēi co ivi pipendar tēi ava mbahecuaasa pipe, ñehesa ivate ai vahe pipe avei. <sup>2</sup> Esepia, acoi aicose pe pāhuve cuese, ndachepiñañemoñetai eté que ambuae mbahe rese; Jesucristo recocuer rese, yatica agüer rese catu ité che piñañemoñeta vichico. <sup>3</sup> Iyavei ndachepiratai, aririi avei che siquiyepave pēu che sose. <sup>4</sup> Iyavei acoi añehese ñehesa pīsirosa resendar rese pēu, ndaiporui

eté rumo ñehesa ivate ai vahe pe pihañemoñetasa rerova água. Che rumo Tüpa Espíritu pīratasa pipe añehe pēu<sup>5</sup> ‘toyeroya catu Tüpa pīratasa rese yuvireco’ che yapave pe yeroyaēhi água ava tēi mbahecuasa rese.

### **Tüpa oEspíritu pipe oicua uca mbahe yandeu**

<sup>6</sup>Ore rumo oromombehuño ité aracuasa pēu, pe peyemoviracua vahe Jesús rese pe yeroyasa pipe. Co aracuasa rumo aviye vahe ndahei ava suindar tēi, ndahei avei ava mborerecuar co ivi pipendar tēi aracuasa nungar. Esepia, ahe imborerecuasa ocañi tēi vaherā. <sup>7</sup>Oroñehe catu aracuasa Tüpa suindar ndicuasai vahe rese, ahe yipive vireco vahe ivi apoēhi viteseve, ahe co omboyecua ramo vahe yandeu yaico vaherā teco ori apirēhi vahesave. <sup>8</sup>Co ivi pipendar ava mborerecuareta rumo ndosenducuai eté co ñehesa. Osenducuaase rumo mborerecuar Jerusalén pendar yuvireco viña, ndoyatica ucai chira yande Yar seco ivate, porañete vahe curusu rese yuvireco viña. <sup>9</sup>Icuachiapri aracahendar pipe aipo ehi:

“Tüpa omoingatu mbahe ava guaisupar upe. Ahe rumo mbahe ndosepiai vahe ité ava yuvireco yepi, ndosendui vahe ité, iyavei ndoyembopihañemoñetaimi eté sese yuvireco no” ehi aracahe.

<sup>10</sup>Tüpa rumo oicua uca Espíritu pipe yandeu cute. Esepia, Espíritu oicua tupri catu ité opacatú secocuer oico.

<sup>11</sup>Ēgüe ehi eté, inungar opacatu ava pāhuve ndipoi eté que ñepeí ava pihañemoñetasa oicua vahe, iespíritu güeraño ité oicua mbahe oime vahe ipiha pipe. Ēgüe ehi avei Tüpa Espíritu güeraño ité oicua Tüpa pihañemoñetasa. <sup>12</sup>Yande evocoyase ndahei co ivi pipendar tēi espíritu yaipisi, Ēgüe ehi rumo Espíritu

Tüpa suindar yaipisi yaicua vaherā iporecosa oporoaisusa pipe ombou vahe yandeu. <sup>13</sup>Ahe niha oromombehu Tüpa Espíritu ore mbohe vahe, ndahei ñehesa ava tēi aracuasa sui. Ēgüe orohe co supi eté vahe ñehesa Espíritu suindar oromombehu Espíritu rese yuvirecoi vahe upe yepi.

<sup>14</sup>Acoi ava ndovirecoi vahe rumo Tüpa Espíritu opiha pipe, ndoipisii eté mbahe Tüpa Espíritu suindar yuvireco. Esepia, chupe evocoi mbahe aviye Ēgüe ehi tēi vahe, iyavei ndosenducua catu eté yuvireco. Esepia, evocoi nungar mbahe senducua Espíritu pipeño ité. <sup>15</sup>Acoi ava vireco vahe rumo Tüpa Espíritu opiha pipe oicatu opacatu mbahe cua água. Ndipoi chira rumo ambuae ava ndovirecoi vahe Espíritu opiha pipe ahe ava recocuer cua tupri água. <sup>16</sup>Esepia, icuachiapri aracahendar pipe aipo ehi: “¿Ava vo oicua tēira yande Yar pihañemoñetasa viña? ¿Ava vo ombohe tēira viña?” ehi. Yande rumo yareco yande Yar Cristo pihañemoñetasa.

### **Pablo iyavei Apolos Tüpa upe oporaviqui vahe yuvirecoi**

**3** Che rivireta, ndapeguata tuprii Espíritu reroyasa pipe; pe rumo peguataño vite ava tēi pihañemoñetasa rupi peico. Sese namombehu catu ñehesa yavai vahe Espíritu suindar pēu. Esepia, pe pītanimi nungar vite tēi pe pihañemoñetasa Cristo rese. <sup>2</sup>Sese che opombohe mbahe ndayavaimi vahe rese. Esepia, pītanimi ndoicatu vitei ocaru. Sese ocambu viteño tēi. Cūrítei rumo Ēgüe peye vite ité. Esepia, pe ndapesenducua catu vitei eté Tüpa Ñehengagüer yavai vahe. <sup>3</sup>Peguata viteño co ivi pipendar pihañemoñetasa tēi rupi. Esepia, peyemoecatēhi-tēhi oyeupe, iyavei peñemoiro peyeupe pe pihañemoñeta ndahoyoyai vahesa pipe. Pe evocoyase peyapo ava ndoicuai

vahe Tūpa rembiapo nungar. <sup>4</sup>Esepia, aipo peyeño tēi, “Ore Pablo rupindar oroico”; ambuae evocoyase, “Ore Apolos rupindar oroico” peye-peye tēi pe yembohesa rese pe yeecopisa pipe. Aipo ehi vahe pe pāhuve inungar ava Tūpa ndoicuai vahe pihañemoñetasa.

<sup>5</sup>Pesendu che ñehe: ¡Che Pablo iyavei Apolos Tūpa rembiguai tēi oroico! Esepia, yande Yar niha ombou ñepei-peí mboraviquí yandeu chupe yayapo vaherā. Tūpa upe ore poraviquísa pipe sui niha peroya yande Yar peico: <sup>6</sup>che rane inungar añoti vahe mbahe rāhii pe piha pipe; Apolos evocoyase inungar imboihusar; Tūpa rumo inungar omboori vahe pēu. <sup>7</sup>Evocoyase ndiyai peyeroya mbahe tīsar rese tēi, imboihusar rese tēi avei. Peyeroya catura rumo Tūpa rese. Ahe niha pe reco momirata catu pe rereco. <sup>8</sup>Ore rumo oyoya tupri oroyapo mbahe pēu nara. Sese ñepei-peí Tūpa omboura porerecosa pe rese ore poraviquíguier rupi oreu. <sup>9</sup>Ore oroporaviquí vahe Tūpa upe. Pe evocoyase ivi nungar peico Tūpa poraviquí āgua iyavei pe inungar Tūpa omopuha ramomi vahe oi peico. <sup>10-12</sup>Che inungar oi apo cuapar oyapo rane vahe oi víracua āgua, ēgüe ahe imombehu Cristo resendar ñehesa pēu seroya tupri āgua. Ndiyai eté yaroya que ambuae ava tēi, Jesucristo güeraño ité yaroyara. Ambuae evocoyase inungar oi aposar omopuha vahe ivíracuasa harive, ēgüe ehi ahe pe monguerēhi catu pe mbohe co ñehesa rese. Evocoyase inungar oi aposar amove oiporu mbahe ipocopi vahe oi apo āgua yuvireco oro, guarepochi, anise ita aviye vahe. Amove rumo oiporu avei ndipocopii vahe mbahe que ivirape tēi, capihí, anise tacuar tēi oiguā yuvireco. Ēgüe ehi aveira pe mbohesar yuvireco. Ahe ñepei-peí rumo iya oicua tuprira pe mbohe āgua yuvireco. <sup>13</sup>Ahe iporaviquí agüer rumo ari cañise icuasa

tuprira ñepei-peí yuvireco. Esepia, ahe ari pipe yande Yar oura tata reseve ñepei-peí pe mbohesar poraviquí agüer cua āgua. <sup>14</sup>Acoi ava oporombohe tupri vahe inungar ava oyapo oi ndocai vahe, ahe oipisira oporaviquí repri; <sup>15</sup>ambuae oporombohe rai vahe rumo inungar oi oyapo ocai vahe tēi, iporombohe agüer opa tēi etera ocañi. Ahe güeraño evocoyase oñepisiro sāira tata guasu sui.

<sup>16</sup>¿Ndapeicuai vo pe yande Jesús reroyasar Tūpa rēta nungar yaico? ¡Espíritu niha secoi eté yande piha pipe. <sup>17</sup>Oimese que ava yande pāhuve omomara vahe Tūpa rēta, Tūpa evocoyase omboura oñemoirosa ahe ava upe. Esepia, Tūpa rēta nimarai vahe ité; yande teieté niha Tūpa rēta yaico.

<sup>18</sup>Peyembopa eme catu pe ae. Oimese que pe pāhu pendar oyeupe aipo “che yaracua tupri vahe aico” ehi vahe co ivi pipendar pihañemoñetasa rupi tēi, toyecomombegüemi rane oaracua āgua. <sup>19</sup>Esepia, ava tēi aracuasa Tūpa upe ēgüe ehi tēi vahe. Inungar icuachiapri arachendar pipe aipo ehi: “Ava oaracua raisa pipe oyeiti uca mbahe tēi pipe Tūpa upe yuvireco” ehi. <sup>20</sup>Iyavei aipo ehi no: “Yar rumo oicua ava tēi yaracua rai vahe pihañemoñetasa, ahe ēgüe ehi tēi vahe” ehi. <sup>21</sup>Sese ndapeyecomboivate ai chira que ava tēi porombohesa rupi peico. Esepia, opacatu mbahe pēundar ité: <sup>22</sup>Ēgüe ehi eté che Pablo, iyavei Apolos, Pedro avei, opacatu ivi pipendar mbahe Tūpa omoime vahe yandeu, tecovesa, manosa avei, yasepia vahe, iyavei mbahe oime vaherā, ahe niha opacatu pēu nara, <sup>23</sup>pe niha Cristo upendar, Cristo evocoyase Tūpa upendar secoi.

#### Apóstol yuvirecoi vahe poraviquí agüer

**4** Iya aipo peye: “Co mbia Cristo povri pendar yuvirecoi, icuaita ité niha

Tūpa suindar ñehesa oyecua ramo vahe rese iporombohe āgua” peyera oreu viña. <sup>2</sup>Acoi vireco vahe ocuaitarā, iya ité omboyecua ocuaita mboaviye tuprisa. <sup>3</sup>Mara etemo che areco pe che recocuer rese peporanduse viña. Iyavei cheu mba-hemi tēi che reraso potase que ava tēi porandusave che recocuer rese porandu āgua yuvireco. Che avei ndaicuai eté che recocuer cuapa tupri. <sup>4</sup>Yepe ndaicuai que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe va-herā pēu. Yande Yar rumo oicua. <sup>5</sup>Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesāro ranera rumo yande Yar yevi āgua. Ahe niha omboyecua opacatu mbahe ndoyecuai vahe, iyavei omboyecupara ñepeipei yande pihanemoñetasa. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepeipei yandeu.

<sup>6</sup>Che rivireta, che añehe cheyese ae, Apolos rese avei pēu mbahe tupri āgua rese ‘ore recocuer sui toyembohe yuvireco Tūpa remimbotar icuachiapri rupi tupri yuvirecoi āgua’ ore yapave pēu. Pe evocoiyase, “Co mbia seco ivate catu vahe co ambuae mbia sui” ndapeyei chira pe yemboivate aisa pipe oreu. <sup>7</sup>¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tūpa suindar. ¡Sese ndiyai peyeecomboivate etepri co mbahe pereco vahe rese! ¡Aviye opacatu mbahe peyesui tēi pe reco vahe viña!

<sup>8</sup>Ndoyavii pereco ité vahe opacatu mbahe pe remimbotar viña, ndoyavii avei nipanei vahe ité Tūpa suindar mbahe pēu. Peyeupe revo ndoyavii mborerecuar guasu peico ore sui viña. ¡Ēgüe peye itera tarahu viña! Ahese, ore avei mborerecuar oroicora pe pāhuve viña. <sup>9</sup>Ore rumo apóstol oroico vahe

ndoyavii cheu Tūpa ore renoi ipa tēi vahe ore mano tēi āgua. Sese seroñrombri oroico inungar ava imboguai pri yucapirā. Ēgüe orohe oroico opacatu ava rovaque, Tūpa rembiguai eta iva pendar rovaque avei. <sup>10</sup>Iyavei, “Co ndayaracuai vahe” ehi rutei ava yuvireco oreu Cristo rese ité ore recose; ahese avei rumo pe peyeapo imbahecua etepri vahe peico Cristo rese pe recosa pipe. Iyavei ore ndoyavii ndaseco piratai vahe oroico ava rembiepiave; aheseve avei rumo peyeecomomirata tēi peico. Ore seroñrombri tēi oroico, pe evocoiyase ava pe mboetei guasu pe rereco yuvireco. <sup>11</sup>Cūrítei ore oroicove vite ité ore rieporehi pipe, ore husei tēi iyavei ndore turucuai eté. Ava rumo evocoiyase mara-mara tēi ore rereco yuvireco. Iyavei ndorovirecoi ore rēta ité. <sup>12</sup>Ore oroporaviquiño ité, oroyembogüerai tēi ipipe. Ava rumo ñeñe mara-mara tēi eté yuvireco oreu; ore evocoiyase oromboyeviño ñeñe mbahe tupri pipe chupe. Ore reca-reca catuño ité ore momara āgua yuvireco; ore rumo oroñemosañe ité yuvireco chupe. <sup>13</sup>Ñeñe-ñeñe tēi ore rese yuvireco; ore rumo saísusa pipe oromboyevi ñeñe yuvireco chupe. Ore rereco iti nungar tēi iyavei ore rereco inungar ava Ēgüe ehi tēi vahe yuvireco. Cūrítei Ēgüe ehi viteño ité yuvireco oreu.

<sup>14</sup>Ndahei pe mochi āgua aipo ahe icuachía pēu, Ēgüe ehi rumo pe mboaracua āgua tēi. Inungar che rahir ité, che rembiaisu opovireco. <sup>15</sup>Esepia, yepe pereco ati pe pñiviisar Cristo rese pe reco āgua viña, ndaperecoi rumo setá pe yesupa. Esepia, che amombehuse niha ñehesa pñirosa resendar pēu, ahese ramo peroya Jesucristo. Seroyasa pipe evocoiyase che inungar pe yesupa ité aico pēu. <sup>16</sup>Sese che aipota ité che recocuer moña peye.

<sup>17</sup>Sese che amondo che rembiaisu Timoteo pēu, che rahir nungar om-

boaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agüer rese che sose opacatu Jesús reroyasar ñemonuhasa rupi yepi. <sup>18</sup> Amove oime pe pãhuve oyecomboivate ai vahe. “Ndou iri chietera revo cohavé yande repia” ehi yuvireco cheu viña; <sup>19</sup> aso pihaiviño itera rumo pe repia yande Yar oipotase cheu. Ahese aicua tuprira oyemboivate ai vahe reco pĩratasa yuvireco. Ndahei chira ñehe güeraño tẽi aicuara. <sup>20</sup> Esepia, Tũpa omborerecuasave, ndahei õñehe pipe tẽi oporocuai, opĩratasa pipe rumo ãgũe ehi. <sup>21</sup> ¿Mbahe pĩha peipota peico? ¿Peipota pĩha che aso vaheřã pẽu che ñehe pĩrata pe mboaracua ãgua mbahe pe rembiavi rese? Anise, pemoingatu rane pe recocuer, ahese asora mbahe tuprĩ pipe pe pĩri.

**Pablo õñehe ñepei Jesús  
reroyasar pãhu pendar  
oyemboaguasa vahe rese**

**5** Ambuae mbahe, oroyandu ñepei mbahe tẽi pe pãhu pendar rembiapo oroico: oime aipo osĩ recoyar rese secoi vahe. Ahe angaipa guasu oyapo oico. Tũpa reroyasarẽhi itẽ ndoyapoi evocoi nungar mbahe tẽi yuvireco. <sup>2</sup> ¡Pe rumo peyecomboivate ai peico! ¡Iyacatu rumo ndapeyemboivhai chira evocoi nungar mbahe tẽi repiase viña! Evocoi nungar ava iyacatu itẽ pemboypepira pe pãhu sui. <sup>3</sup> Yepe niha che teietẽ ndaicoi pe pãhuve viña, pe rese che mahenduhasa pipe rumo aicove itẽ pe pãhuve iyavei aicua voi etẽ aipo oyapo vahe mbahe tẽi recocuer inungarra aico vahe itẽ pe pãhuve viña. <sup>4</sup> Acoi peñemonuhase, che avei niha aicora pe pãhuve che mahenduhasa pipe, yande Yar Jesucristo pĩratasa avei secoira pe rese. <sup>5</sup> Evocoiyase ahe ava timondosa Carugar povrive secocuerai mo-

cañi ãgua. Ipipe sui iespĩritu õñepisirora yande Yar Jesucristo yevise curi.

<sup>6</sup> Ndapeyecomboivate ai chira peico co mbahe tẽi oimese pe pãhuve. Esepia, peicua niha co ñehesa aipo ehi vahe: “Yepe chíhimi imondosa pan mboapeposa panguã rese viña, ahe rumo oiuepa tuprĩ panguã rese” ehi. <sup>7</sup> Evocoi ava rembiapo ai inungar pan mboapeposa pe pãhuve. Sese pemombopa pe pãhu sui peicoẽhi ãgua angaipa pipe peico vaheřã inungar panguã ipiasu vahe ndovirecoi vahe omboapeposa oyese. ãgũe peye itẽ niha. Esepia, yande Yar Jesucristo iparaisu omano yande repiřã. ãgũe ehi ahe inungar ovesa yucapri angaipa mocañi ãgua judĩo pieta Pascua pipe yepi. <sup>8</sup> Sese inungar judĩo omboetei vahe Pascua pieta yuvireco yepi omombopaño pan mboapeposa cuacua vahe oyesui pan ipiasu, ndayapepoi vahe rereco ãgua, ãgũe yahe aveira yaico yande reco piasu supĩ etẽ vahe pipe; yamombopara yande recocuerai yandeyesui, ahe ava reco momara-mara tẽisa, mbahe naporai vahe avei.

<sup>9-10</sup> Ambuae aicuachĩa vahe pipe aipo ahe pẽu: “Ndapemborii chira ava oyemboaguasa-guasa tẽi vahe, acoi ava oipota rai vahe ambuae ava mbahe, imonda rai vahe, iyavei ava mbahe rahanga upe tẽi oyerure vahe” ahe. Co che ñehesa rumo ndahei Tũpa ndoicua vitei vahe upendar. Esepia niha, pe yepepi ãgua ñepei reseve evocoi nungar ava sui, pesẽ itera co ivĩ pipe sui viña. <sup>11</sup> Che niha aipo ahe icuachĩa pẽu: ndapemborii chira que ava acoi “che Jesucristo reroyasar aico” ehi angahu tẽi vahe, que oyemboaguasase, anise oipota raise que ambuae ava mbahe, oyerogui tẽi vahe que mbahe rahanga upe, iyavei imahechiroi ai vahe, caguar tẽi vahe, anise imonda rai vahe. Evocoi nungar ava pĩri ñepei yepe ndapecarui chietera. <sup>12-13</sup> Cheu ndiyai etẽ ava

ndoyuvirecoi vahe Tūpa rese recocuer rese porandu āgua. Tūpa ahe ava yuvirecoi vahe recocuer opara oicua coiye. Pe rumo pe cuaita ité Tūpa rese yuvirecoi vahe upe pe porandu āgua secocuer rese. ¡Sese pemboyepepiño ité osi recoyar rese secoi vahe pe pāhu sui!

**Ndiyai Jesús reroyasar serasosa  
ndahei vahe Jesús reroyasar  
mborerecuar rovai**

**6** Ambuae mbahe no: Oime pe pāhu pendar “co mbia oyapo mbahe tēi cheu” ehi vahe ambuae Jesús reroyasar upe. ¡Mahera peraso mborerecuar Tūpa reroyasarēhi upe tēi evocoi mbia rembiapo ai rese porandu āgua! Iyacatu rumo Tūpa reroyasareta upe perasora secocuer moingatu āgua yuvireco viña. <sup>2</sup>Peicua niha pe Tūpa reroyasar peporandura ava ndoicuai vahe Tūpa upe secocuer rese yuvireco curi. Evocoiyase, ¿ndapeicatu pīha co tecocuer mbahemi tēi moingatu peico? <sup>3</sup>¿Ndapeicuai vo yande avei yaporandura Tūpa rembiguai recocuer rese curi? Evocoiyase, ¡peporandu catu itera co ivi pipendar tecocuer rese peyeupe yepi! <sup>4</sup>Perecose evocoi nungar mbahe tēi peyeupe, ¡mahera peiporu ava ēgüe ehi tēi vahe tūparo pendar upe mbahe moingatu āgua! <sup>5</sup>Che aipo ahe ité pēu pe chí āgua: ¿Ndipoimi eté vo pe pāhuve que ñepey yaracua vahe oicatu vahe que mbahe tēi peyeupendar moingatu āgua? <sup>6</sup>¡Amove pevava peyeupe! ¡Ndahei co güeraño, oime avei pe pāhu pendar Tūpa reroyasar viraso ambuae omboetasa mborerecuar Tūpa reroyasarēhi upe tēi mbahe moingatu āgua!

<sup>7</sup>Supi eté evocoiya pe reco pipe peyavi guasu ité. Iya peñemosañora co mbahe tēi pe mboetasa suindar upe viña. Ēgüe ehi eté, iya mbahe pe reco vahe, “Toñomiño yuvireco” peyera chupe pe raso rāgüer sui Tūpa reroyasarēhi mbor-

erecuar upe viña. <sup>8</sup>Amove rumo pe avei peyapo mbahe-mbahe tēi eté; peñomi avei pe mboetasa Tūpa reroyasar mbahe.

<sup>9-10</sup>¡Pe niha peicua acoi ava mbahe-mbahe tēi aposar ndoyuviroiquei chietera Tūpa mborerecuasa pipe curi! Peyembopa ucai rene chupe. Esepia, acoi ava oyemboaguasa-guasa tēi vahe, mbahe rahanga upe tēi oyerouqui vahe, omendasa sui oyemboaguasa vahe, cuimbahe pāve oyapo vahe mbahe oyese ae yuvireco, imonda rai vahe, oipota rai vahe ambuae ava mbahe, osavaipo serai vahe, imahechiroi ai vahe, iyavei ava virocuva yesapiñaño tēi vahe mbahe tēi pipe ambuae ava mbahe, ahe opacatu ndoyuvirasoi chira ivave Tūpa mborerecuasave curi.

<sup>11</sup>Oime avei niha acoi pe pāhu pendar yipindar ēgüe ehi vahe yuvireco viña, cūrítei rumo opa pe angaipa imocañisa pe sui iyavei pe ipehapri peico Tūpa upe nara ité. Ahe, “Peyavi mbahe” ndehi iri pēu yande Yar Jesucristo rer pipe iyavei yande Ru Tūpa Espíritu pīratasa pipe avei no.

**Yande rete ipehapri Tūpa  
upe nara yaguasaēhi āgua**

<sup>12</sup>Iyavei ambuae mbahe: Supi eté niha “aviye que mbahe che remimbotar ayapo vaherā” ehi vahe. Amove rumo co mbahe ndahei aviye vahe yandeu iyavei yandeu ndiyai evocoi nungar mbahe povrive nara tēi yande reco āgua. <sup>13</sup>Supi eté niha aipo ehi vahe: “Yande rembihu yande aviter upe nara, yande aviter evocoiyase yande rembihu upe nara” ehi. Coiye rumo Tūpa opara omocañi evocoi nungar mbahe. Yande retecuer rumo ndicuitai yaguasa tēi vaherā, ahe rumo yande Yar upe nara. Yande Yar evocoiyase yande retecuer upe nara secoi. <sup>14</sup>Inungar Tūpa ombogüerayevi yande Yar, ēgüe ehi aveira yande mbogüerayevi opīratasa pipe coiye.

<sup>15</sup>Peicua niha yande rete Jesucristo upendar ité. Ndiyai eté evocoiyase Jesucristo upendar yande rete mondo água cuña güetecuer omondo-mondo tēi vahe upe. <sup>16</sup>Peicua niha pe aipo nungar cuña ndipihai vahe rese peicose, pe retecuer evocoiyase ñepeí vahe nungar ité pereco. Esepia, icuachiapri aracahendar pípe aipo ehi yandeu: “Yepe ñuvirío ava yuvirecoi vahe viña, ñepeí vahe nungar ité rumo secocuer yuvireco” ehi. <sup>17</sup>Acoi ava secoi vahe rumo yande Yar rese, ahe secocuer evocoiyase ñepeíno ité.

<sup>18</sup>Peyepipi voíno catu ava yemboaguasa-guasa tēisa sui. Opacatu ambuae angaipa ndahei yande retecuer rese nara ité. Acoi ava rumo oyapo tēi vahe mbahe cuña rese, güetecuer ae evocoiyase omomara catu güembiapo pípe sui tēi. <sup>19</sup>¿Ndapeicuai vo pe retecuer Espíritu Santo upendar ité secoi, iyavei ahe Espíritu Tūpa remimbou pe rese ité secoi? Sese pe retecuer ndahei pēundar ité. <sup>20</sup>Esepia, Tūpa yande rerocua oyeupe nara. Yande rumo yande repi chupe. Sese peyapo mbahe aviye vahe pe retecuer pípe Tūpa mboetei água.

### Poromboaracuasa mendasa resendar

**7** Cūrítei amboevira pēu acoi cuese pe porandusa mendasa resendar peicuachía vahe imbou cheu. Aviyeño ité niha que ava ndomendaise viña. <sup>2</sup>Pe aguasa-guasa tēiēhi água rumo peyacatu perecora pe rembireco, cuña avei evocoiyase tovireco oyacatu omer yuvireco. <sup>3</sup>Cuimbahe tomboaviye omendasa güembireco rese iyavei cuña omenda vahe, tomboaviye avei mendasa omer rese. Ahe niha yande cuaita yamendase. <sup>4</sup>Esepia, cuña omenda vahe güetecuer ndahe iri oyeupe nara vireco, omer upe nara ité rumo. Iyavei cuimbahe omenda vahe, ndahei avei güetecuer oyeupe nara

vireco, ahe rumo güembireco upe nara ité vireco. <sup>5</sup>Ndiyai peatēhi oyeupe. Oyoya rumo, “Yayapo eme mbahe” peyese peyeupe pe yeroqui água Tūpa upe, ahe aviyeño. Ndiyai rumo peyoeya pucura, aviyeleramo ndapeñemosai chira, ipipe sui aviyeretamo Carugar pe átoi tiētera.

<sup>6</sup>Ndahei che opocuai ‘tomenda yuvireco’ viya pēu. <sup>7</sup>Che rumo aipota che nungar pe mendaēhi água viña. Tūpa rumo ombou yande yacatu yande recorã.

<sup>8</sup>Iyavei ndomenda vitei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar. <sup>9</sup>Ndapeicatuise rumo pe ñemosa água, pemendaño. Esepia, aviye catu itera pemenda poropota rai rãgüer sui.

<sup>10</sup>Che rumo amombehu omenda vahe upe ‘topoi eme cuña omer sui’ viya. Ndahei cheyesui tēi aipo ahe. Ahe rumo yande Yar porocuita ité. <sup>11</sup>Acoi opoise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei güembireco sui.

<sup>12</sup>Ambuae ava opacatu upe rumo cheyesui eté aipo ahe. Esepia, ndipoi eté yande Yar ñehe sesendar: acoi Jesús reroyasar virecose güembireco ndahei vahe Jesús reroyasar, ahe cuña secoi potaño itese sese, evocoiyase ahe topoi eme ité güembireco sui. <sup>13</sup>Iyavei acoi cuña Jesús reroyasar, virecose omer ndahei vahe Jesús reroyasar, ahe cuimbahe secoi potaño itese sese, evocoiyase ahe cuña topoi eme ité ichui. <sup>14</sup>Esepia, co cuña Jesús reroyasar virecose omer ndahei vahe Jesús reroyasar, ndahei eté angaipa yuvireco Tūpa rovaque. Ēgüe ehi aveira cuimbahe Jesús reroyasar virecose güembireco Jesús reroyasarēhi. Ēgüe ndehise rumo, tahir avei ndoyavii chira ndahei vahe Jesús reroyasar rahir yuvireco viña. Ahe

tahir rumo Tūpa upendar yuvirecoira. <sup>15-16</sup> Sese pe, pemenda vahe ndahei vahe Jesús reroyasar rese, pepoi eme catu ichui; aviyeteramo pe recocuer sui pe mer oñepisirora. Iyavei pe cuimbahe, aviyeteramo pe recocuer sui avei pe rembireco oñepisirora. Acoi cuña ndahei vahe Jesús reroyasar opoi potase omer Jesús reroyasar sui, topoiño ichui. Iyavei cuimbahe ndahei vahe Jesús reroyasar opoi potase güembireco Jesús reroyasar sui, topoiño avei ichui. Esepia, Tūpa oipota mbahe tupri pipe yande reco āgua.

<sup>17</sup> Co rumo mbahe: peicoveño yipindar pēu Tūpa ombou vahe rese seroyaēhi vitesendar pipe. Ahe aporocuai opacatu Cristo upendar ñemonuhasa rupi yepi. <sup>18</sup> Acoi Tūpa osenoise ava judío oyeupe nara, ahe judioño ité secoira. Acoi osenoise rumo, ndahei vahe judío, ahe ndoyembocircuncida ucai chira judío güeco āgua. <sup>19</sup> Esepia, ndahei chira que judío, anise que ndahei vahe judío yaicose aviye catura yaico. Co rumo Tūpa oipota catu, “Tomboaviye opacatu che porocuita amondo vahe chupe yuvireco” ehi yandeu. <sup>20</sup> Sese peicoveño peyacatu pe recocuer pēu Tūpa ombou vahe rese pe renoiēhi viteseve. <sup>21</sup> Pe mbiguai tēi peico vahe pe renoise Tūpa, pepihañemoñeta etepri eme evocoiya pe recosa sui pesē vajerā rese. Peicatuse rumo, peyepipiño itera ichui. <sup>22</sup> Esepia, yepe pe mbiguai tēi peico viña, peroyase rumo yande Yar, ahese inungar ndahe iri vahe mbiguai peico chupe. Iyavei pe no, ndahei vahe mbiguai tēi peico vahe, yepe ēgüe peye viña, peroyase rumo Cristo, ahese sembiguai peico. <sup>23</sup> Tūpa upe rumo perepí iteanga, sese ndiyai eté ambuae ava povrive tēi peico. <sup>24</sup> Sese, che rivireta, peicoveño itera pe recocuer pipe inungar yipindar Tūpa pe renoise.

<sup>25</sup> Cuñatai ndomenda vitei vahe re-sendar rese rumo ndarecoi Yar suindar

che ñehe āgua. Che rumo amondora che pihanemoñetasa yuvireco chupe. Esepia, yande Yar che paraisuerecosa pipe im-boyeroyapri aico. <sup>26</sup> Cheu aviye catuño ité ndomendai vahe ēgüe ehiño tēise yuvireco viña. Esepia niha, tecocuer yavaí eteanga cūrítei. <sup>27</sup> Acoi pemendase, pepoi eme ité oyesui. Acoi ndapemendaise, ndapeseca iri chietera peyeupe. <sup>28</sup> Pemendase rumo, ndahei angaiya iyavei cuñatai omendase, ndoyapoi avei angaiya. Acoi omenda vahe upe rumo yavaí catura co ivi pipe yuvireco chupe. Sese che ndaipotai evocoi nungar mbahe pipe yuvireco vajerā.

<sup>29</sup> Che rivireta, aipo mbahe amombehu pota pēu: ndipucuvei co ari naporai vahe yepota āgua yandeu. Sese co pipe suive tupri omenda vahe toyuvirecoi ndomendai vahe nungar yande Yar rese opihanemoñetasa pipe. <sup>30</sup> Acoi ndovihai vahe, toyuvirecoi eme oviharēhisa pipe iyavei acoi oviharete vahe, ahe toyuvirecoi eme avei oviharetasa pipe, iyavei virocua vahe mbahe omahera, toyuvirecoi inungar mbahe ndovirocui vahe omahera viña yande Yar rese opihanemoñetasa pipe. <sup>31</sup> Acoi ava ipihanemoñeta catu vahe co ivi pipendar mbahe poru āgua, tipihanemoñeta eme evocoi nungar mbahe tēi rese yuvireco. Esepia, co ivi pipendar mbahe yasepia vahe, ocañi tēira.

<sup>32</sup> Che ndaipotai co ivi pipendar recocuer rese tēi pe pihanemoñeta etepri peico. Acoi mbia ndomendai vahe rumo, ipihanemoñeta catuño ité yande Yar rese imboviha āgua; <sup>33</sup> omenda vahe rumo ipihanemoñeta avei co ivi pipendar recocuer rese tēi, güembireco mboviha āgua rese avei. <sup>34</sup> Evocoiyase ndahei ñepeí opihanemoñetasa vireco. ēgüe ehi avei cuña opihanemoñeta rereco; cuña ndomendai vahe, ipihanemoñeta yande Yar upendar mbahe rese, güetecuer



iyavei oespíritu rereco tupri āgua Tūpa upe. Cuña omenda vahe rumo ipihañemoñeta co ivi pipendar recocuer rese tēi omer mboviha āgua oico.

<sup>35</sup> Che aipo ahe pēu ‘mbahe tupri pipe toyuvirecoi’ viya, ndahei mbahe yavai vahe pipe pe reco āgua. Che aipota ité pe reco catuprisa pipe yande Yar upeño ité mbahe peypapo vaheṛā pe recoeté pipe peico.

<sup>36</sup> Acoi ava ipihañemoñeta vahe güembirecovi rese omenda āgua, “Aviyeteramo ayavira mbahe ichui iyavei niha osupiti ité imenda āgua, sese aviye catu yamenda” ehise, toyapoño güemimbotar. Tomendaño ité güembirecovi rese. Esepia, mendasa niha ndahei angaipa. <sup>37</sup> Acoi mbia rumo ndovirecoise que ocuaita omenda āgua iyavei oicatu ité güemimbotar apo, ipihañemoñetase ñepeí reseve güembirecovi rese omendaēhi āgua, ahe aviyeño ité. <sup>38</sup> Evocoiyase acoi omenda vahe aviyeño; acoi ndomendai vahe rumo, aviye catuño ité.

<sup>39</sup> Iyavei acoi cuña omenda vahe, ahe ndiyai eté iyepepi āgua omer sui imanoēhi viteseve. Omanose rumo ichui, ahese ramo ahe cuña upe aviyeño imenda iri āgua güemimbotar rupi. Yande Yar reroyasar rese avei rumo omendara. <sup>40</sup> Ndomenda irise rumo, aviye catuño itera. Ahe che pihanemoñetasa, iyavei revo ahe che pihanemoñetasa Tūpa Espiritu suindar.

### **Pablo oñehe tembihu mbahe rahanga upe tēi seropovēhepri rese**

**8** Cūrítei ambuae mbahe amombe-hura pēu mbahe rahanga upe mbahe mimba yucapri seropovēhepri rese. Supi eté aipo ehi vahe: “Yande opacatu yareco yande mbahecuaa” ehi. ¡Yande rumo, “Aicua tupri opacatu mbahe” yande hesa pipe yayecomboivate ai tēi! Yayeaisuse rumo, ahese yañepitívii

catu Cristo reroya tupri āgua. <sup>2</sup> Supi eté yande, “Che aicua ité co mbahe” yahe tēise que mbahe upe, ipane vite ité rumo icua tupri āgua yandeu. <sup>3</sup> Yande rumo yasaisuse Tūpa, ahese Tūpa, “Co ava cheundar ité secoi” ehira yandeu.

<sup>4</sup> Evocoiyase co mbahe rahanga upe tēi seropovēhepri mbahe mimba yucapri hu āgua rese añehe. Yande niha yaicua co mbahe rahanga ēgüe ehi tēi vahe co ivi pipe, iyavei oime ñepeí güeraño ité Tūpa. <sup>5</sup> Esepia, yepe ava upe setá tūpa ivave, ivive avei viña (setá iteanga niha oime tūpa angahu tēi, yar angahu tēi avei). <sup>6</sup> Yande rumo yaicua ñepeño ité Tūpa oime, ahe niha yande Ru opacatu mbahe aposar. ¡Evocoiyase yande chupe nara ité yaico! Oime avei yande Yar ñepeí vahe, ahe Jesucristo. Ahe ichui oime opacatu mbahe, ichui avei yaicove.

<sup>7</sup> Ndahei rumo opacatu oicua aipo mbahe yuvireco. Amove Jesús reroyasar yipindar güecocuer vireco vahe sui ndasesarai viteño yuvireco; imahenduhaño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovēhepri, ipihañemoñeta, “Co mbahe roho tūpa rahanga upe seropovēhepri” ehi viteño yuvireco oyeupe. Ipipe sui omomara uca Tūpa rese opihanemoñetasa yuvireco. <sup>8</sup> Supi eté tembihu ndayande pítívii Tūpa rese yaico vaheṛā. Ndahei mbahe roho husa pipe sui tēi aviye catura yaico iyavei ndayahuse, ndahei chira mbahe tēi catu yaico. <sup>9</sup> Pēu niha aviyeño pehu viña; peicua catura rumo, aviyeteramo que Jesús reroyasar ndoicatu tupri vitei vahe pemboangaipa ucara. <sup>10</sup> Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, aviyeteramo pemonguerēhi aveira ihu uca āgua chupe. <sup>11</sup> Evocoiyase co pe mbahecuaa pipe pemocañi uca yande rivri Tūpa rese noviracua tupri vitei

vahe peico. ¡Cristo rumo omano ipĩsiro ãgua! <sup>12</sup>Esepia, pemomarase Tũpa rese ipĩhañemoñetasa, ahese pe ae peyemboangaipa uca Cristo amotarẽhisa pipe peico. <sup>13</sup>Sese yande mbahe roho husa pipe sui yamboangaipa ucase yande rivri viña, ndayahu iri chietera evocoi mbahe roho yande rivri mboangaipa ucaẽhi ãgua.

**Apóstol Pablo ndoporandu potai oyeupe nara apóstol upendar mbahe rese ava upe**

**9** Supi eté che aicatu avei apóstol upendar mbahe pisi ãgua viña. Esepia, che apóstol aico. Supi eté che asepia yande Yar Jesús iyavei che poraviquisa pipe sui niha peroya yande Yar peico. <sup>2</sup>Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co secoi” peye voiño itera cheu. Esepia, che remimombehu pipe sui niha yande Yar peroya peico. Ipípe sui avei icuasa tupri apóstol che recosa pẽu.

<sup>3</sup>Ahe ñehesa amboyeve tupri ava che recoãha potasar upe yuvireco yepi. <sup>4</sup>Iya ité che remihura pisi, che iguarã avei pe sui viña. <sup>5</sup>Iyavei inungar ambuae apóstol viraso ité güembireco oyeupi yuvireco yepi, Jesús rivireta avei ãgüe ehi yuvireco, ãgüe ehi avei Pedro, ãgüe ahe aveira niha che viña. <sup>6</sup>¡Ore güeraño tie Bernabé rese oroporaviquira ambuae mbahe rese ore recove ãgua? <sup>7</sup>Esepia, sundao nombopii sundao güeco ãgua, ahe rumo oporaviquisa repri oipisiño. Iyavei ava uva tĩsar, ahe avei yaviyese, ohu güemitigüer. Iyavei ovesa rãrosar, ahe avei omohe ovesa cambi igua. <sup>8</sup>Che ndahei cheyesui tẽi aipo ahe pẽu. Esepia niha, Moisés porocuita pipe avei aipo ehi yandeu: <sup>9</sup>“Pemondo eme tivi yuru rese mbahe icaruẽhisa mbahe rãhii oicambese yuvireco pẽu” ehi. Supi eté co Tũpa aipo ehi vahe ndahei tivi upeño. <sup>10</sup>Yande reco tupri ãgua rese niha aipo

ehi yandeu. Esepia, acoi ava omonguhi vahe ivi iyavei acoi oicambe vahe mbahe rãhii, oyoya osãro mbahe oipisi vaherã oporaviquisa sui oyeupe nara yuvireco yepi. <sup>11</sup>Evocoiyase ore avei oroñoti Tũpa Ñehengagüer pe piha pipe ore pe mbohese. Sese aviyeño aveira oropisise mbahe pe sui oreyeupe nara viña. <sup>12</sup>Esepia, ambuae oicatu mbahe pisi ãgua oyeupe nara yuvireco pe sui. Evocoiyase ore avei niha oroicatu mbahe pisi ãgua pe sui ore poraviquisa pipe viña.

Ore rumo ãgüe ndorohei eté. Esepia, ore oroñemosañõ ité ‘tiñehe mara eme co ñehesa Cristo resendar rese yuvireco’ ore yapave. <sup>13</sup>Pe niha peicua ité acoi oporaviqui vahe judío tũparove, ichui ocaru yuvireco. Esepia, yuvirohu mbahe roho Tũpa upe seropovẽhepri tũparo rocarve yuvireco yepi. <sup>14</sup>Ëgüe ehi avei yande Yar ore cuai ‘toipisi mbahe ipane vahe co ñehesa mombehusa pipe sui yuvireco oyeupe’ oyapave oreu. <sup>15</sup>Che rumo ndaporandui eté mbahe pe rembiereco rese vichico pẽu yepi. Ndahei ‘tombou mbahe yuvireco cheu’ che yapave aipo aicuachia imondo pẽu. Che rumo evocoi nungar mbahe rese ayembovihaño ité. ¡Yepe che yucapri tẽira tieporẽhi viña, ndaporandui chietera rumo mbahe rese pẽu! Esepia, namocañi potai eté co che yembovihasa cheyesui.

<sup>16</sup>Che rumo amombehuse co ñehesa pĩsirosa resendar ava upe, ndiyai ayecomboivate ai ipipe. Esepia niha, che cuaita ité yapo ãgua iyavei, ¡cheparaisu itera ndamombehuise ava upe co ñehesa viña! <sup>17</sup>Tũpa ndache cuaise õñehe mombehu ãgua viña, che rumo che querẽhisa pipe amombehuse, ahese aipisira Tũpa suindar porerecosa. Ëgüe ndahei rumo. Esepia, Tũpa che cuaisa pipe niha amombehu. <sup>18</sup>Ndaporandui mbahe rese pẽu amombehuse co ñehesa pĩsirosa resendar, ipípe ayemboviha ahe che vihasa porerecosa nun-

gar cheu. Yepe aicatu mbahe rese che porandu āgua viña, che rumo ēgüe ndahei eté.

<sup>19</sup>Yepe che ndahei ava povrive tēi aico viña, che rumo che remimbotar rupi opacatu ava rembiguai nungar ayeereco ‘tasetá catu ava iquerēhi vahe Cristo reroya āgua’ che yapave. <sup>20</sup>Esepia, aicose judío pāhuve, secocuer rupi aicoveño Yar upe imonguerēhi catu āgua yuvireco. Ēgüe ahe ité, aicose ava Moisés porocuita povrive yuvirecoi vahe pāhuve, che avei eté mborocuitavrive nungar aico. Ndahei rumo Moisés porocuita povrive ité aico imboaviye āgua. <sup>21</sup>Iyavei ava ndoyuvirecoi vahe Moisés porocuita povrive, ipāhuve aicose, inungar ahe yuvirecoi, ēgüe ahe tupri avei imonguerēhi āgua yande Yar upe vichico. Ndahei rumo Tūpa porocuita mboyeroyaēhisa pipe aico. Esepia, Cristo porocuitavrive che recocuer. <sup>22</sup>Iyavei no, aicose ava yande Yar ndoviroya tupri vītei vahe pāhuve, secocuer nungar tupri avei aico Yar upe imonguerēhi catu āgua. Ēgüe ahe opacatu ava upe ‘toñepisiro catu ahe avei yuvireco’ viya. <sup>23</sup>Che ayapo co opacatu mbahe ‘tasetá catu co ñehesa písirosa reroysar yuvireco’ che hesa pipe, ‘taipisi avei co porovasasa oime vahe co ñehesa reroysa pipe’ che yapave avei.

<sup>24</sup>Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oipisi porerecosa yepi. Evocoyase inungar co ivava catu vahe, ēgüe peye avei pe recocuer pipe Tūpa porerecosa pisi āgua peico. <sup>25</sup>Iyavei opacatu oyemoin-gatu vahe oguayī āgua oñearo tupri opacatu mbahe tēi sui oyemomaraēhi āgua yuvireco. Ahe ēgüe ehi porerecosa ndipocopi vahe pisi āgua tēi yuvireco. Yande rumo yayemomorarara porerecosa apirēhi vahe pisi āgua yaico. <sup>26</sup>Evo-

coiyase che avei, ndahei ava oyahuvahuva tēi vahe nungar aico Tūpa remimbotar apo āgua iyavei che ndaicoi ava iguayi tēi vahe nungar. <sup>27</sup>Che rumo mbiguai nungar che retecuer areco, amboyeroya uca piñañemoñeta tuprisa upe. Esepia, ndaipotai ambuae ava mbohe pare imombopri tēi nungar guayisa sui che yereco āgua.

### Ndiyai aracahendar ava recocuerai rupi yaguata

**10** Che rivireta, che aipota pe judío peico vahe peyemomahenduha vitera aracahe yande ramoi guatasa rupi mbahe pītu Tūpa imboguata agüer rese. Iyavei para guasu Pīra vahe avei osasa opacatu yuvireco aracahe. <sup>2</sup>Ēgüe ehi eté opacatu oguatase mbahe pītu-vri rupi iyavei para guasu osasase yuvireco, ndoyavii ñapiramombri yuvirecoi Moisés recocuer rupi oguata āgua aracahe. <sup>3</sup>Iyavei oyoya guasu yuvirohu tembihu Tūpa ombou vahe chupe nara yuvireco, <sup>4</sup>opacatu guasu avei oihi ita sui Tūpa ombou vahe ihiguarā yuvireco. Ahe ita rumo inungar Cristo secoi opacatu iguatasa rupi yuvireco. <sup>5</sup>Yepe ēgüe ehi Tūpa opacatu yande ramoi judío upe viña, setá iteanga rumo ava ipāhu pendar ndahei aviye vahe ipiha rupi yuvireco. Ipipe sui opa omano ivi iporupirēhisa rupi aracahe.

<sup>6</sup>Co opacatu mbahe sembiapogüer yuvireco ahe yande mbohe āgua ‘toipota rai eme mbahe-mbahe tēi inungar ahe ava yuvirecoi’ oyapave yandeu. <sup>7</sup>Sese yande ndayamboetei chira mbahe rahanga tēi, inungar ahe ipāhu pendar yuvirecoi aracahe. Aipo ehi eté niha icuachiapri aracahendar pipe: “Co ava ocaru vahe, yuviroihu avei yuvinoi. Ichui yuviropūha, oyembovīhaño pieta apo yuvireco” ehi. <sup>8</sup>Ndayayemboaguasa-guasa tēi chiveira inungar ahe amove ēgüe ehi

yuvireco. Ipípe sui tēi ñepeí ari pípe ahe opa omano veintitrés mil tuprí yuvireco aracahe. <sup>9</sup>Ndayasecoãha-ãha tēi chiaveira yande Yar, inungar ahe yuvireco. Ipípe sui oyeyucapa uca mboi osuhusa pípe yuvireco. <sup>10</sup>Iyavei ndayande ñehe mara-mara tēi chira yande Aposar rese, inungar ahe ěgüe ehi yuvireco. Ipípe sui Tūpa ombou güembiguai ava yucasar íva sui ahe ava yucapa āgua aracahe.

<sup>11</sup>Co opacatu yande ramoí upe mbahe oime vahe aracahe icuachiaprí yande ípa yaico vahe upe nara: “¡Peícua catu aipo nungar mbahe sui!” he āgua yandeu. <sup>12</sup>Sese yande “che aico tuprí ité Tūpa rese” yahe vahe, yaicua catura rumo. Aviyeteramo yaviapira mbahe tēi pípe. <sup>13</sup>Pe recoãhasa rumo oyoya tuprí ité ambuae ava recoãhasa rese. Pe rumo peyeroña itera Tūpa rese, ahe niha oicua pe yemoviracuasa, noñocuai chira tecoãhasa imbou pēu. Acoi mbahe tēi oimese pe recoãhase, Tūpa ombou voñora pīratasa evocoi mbahe tēi sui pe sē āgua, chupe pe ñemosa āgua.

<sup>14</sup>Sese che rivireta, che rembiaisu, peyepépi mbahe rahanga mboeteisa sui. <sup>15</sup>Ava niha peico pesenducua vaheṛā mbahe, evocoiyase peporandu co che remimombegüer rese peyeupe icua tuprí āgua. <sup>16</sup>Yaihuse uva ricuer sovasapri, “Aviye ndeu, che Yar” yande hesa pípe, ahese oyoya guasu Cristo rese yaico suví pípe sui. Yahuse co pan imboyaho-yahopri, ahese oyoya guasu yaipisi Cristo retecuer yandeyeupe nara. <sup>17</sup>Yepe yande reta yaico viña, opacatu rumo yahu ñepeí pan sui. Sese yande ñepeí vahe ité yaico.

<sup>18</sup>Peyapisaca acoi ava aracahendar Israel recocuer rese. Esepia, acoi yuvirohu vahe Tūpa upendar mbahe seropovēhepri, ahe evocoiyase chupendar ité yuvirecoi. <sup>19</sup>Che rumo, “Mbahe rahanga aviye vahe ité” ndahei,

iyavei, “Mbahe roho icuavēhepri mbahe rahanga upe, aviye catu ité” ndahei avei. <sup>20</sup>Co rumo, acoi ava ndoicuai vahe Tūpa oicuavēhe mbahe carugar upe tēi yuvireco yepi. Ndahei rumo Tūpa upe nara ité ěgüe ehi yuvireco. Che evocoiyase ndaipotai eté carugar upe nara tēi ěgüe peye vaheṛā peico. <sup>21</sup>Peihuse rumo yande Yar upendar ígua, ndiyai peihu avei carugar upendar ígua; iyavei pehuse yande Yar upendar mbahe, ndiyai avei pehu carugar upendar mbahe.

<sup>22</sup>¿Yasecara pīha yande ae yande Yar ñemoiro āgua yandeyeupe? ¡Yande rumo ndahei chira ipīrata catu vahe yaico ichui!

**Yande renesa mbiguai tēi  
nungar yande recosa sui  
mbahe tuprí apo āgua**

<sup>23</sup>Amove ava, “Aviyēño opacatu mbahe yayapo yande remimotar rupi” ehi yuvireco viña. ěgüe ehi eté niha, ndahei rumo opacatu aviye, ndahei avei co opacatu mbahe yande pītivii catu Cristo rese yande reco āgua. <sup>24</sup>Ndapesecai chira que mbahe aviye vahe peyeupe nara tēi, pesecara rumo ambuae ava upe nara.

<sup>25</sup>Pehuño mbahe tembihu opacatu mbahe mboepisa rupi sui perocua vahe. Ndapeporandui chira rumo sese Tūpa rese pe pīhañemoñetasa momaraēhi āgua. <sup>26</sup>Esepia, ívi opacatu ipor reseve, ahe yande Yar upendar.

<sup>27</sup>Acoi Tūpa reroyasarēhi pe soho ucase oyepiri pe mbocarū āgua, peso potase ipiri, pehuñora mbahe imbouprí pēu. Ndapeporandui chira rumo sese chupe Tūpa rese pe pīhañemoñetasa momaraēhi āgua. <sup>28</sup>Acoi ava, “Co mbahe roho icuavēhepri mbahe rahanga upe” ehise pēu, ndapehui chira ahe mbahe roho. ěgüe peyera pēu imombehusar rereco meguaēhi āgua, ava pīhañemoñe-

tasa momaraēhi āgua avei. <sup>29</sup>Supi eté che añeche co ambuae ava pihañemoñetasa rese, ndahei pe pihañemoñetasa rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava piha rupi?” ehi vahe. <sup>30</sup>Iyavei aipo ehira no: “Aviye ndeu’ ahese Tūpa upe mbahe ahu vahe rese, ¿mahera piha che roñora yuvireco ahuse viña?” ehira. <sup>31</sup>Iyacatu rumo pehuse que mbahe, peihuse avei, anise que mbahe peyapose, peyapo ru opacatu Tūpa mboeteisa pipe. <sup>32</sup>Supi eté ndapemboyecuai chira pe recocuera, que judío upe, que ndahei vahe judío yuvirecoi vahe upe, anise que Jesús reroyasar yuvirecoi vahe upe avei. <sup>33</sup>Che opacatu che rembiapo pipe aipota ité mbahe tupri apo āgua opacatu ava upe nara. Ndahei cheyeupeño mbahe tupri aseca, ambuae ava upe avei mbahe tupri aipota inēpisiro āgua yuvireco.

**11** Che raquicue moñá catu peye ungar che asaquicue moña Cristo vichico.

### Mara ehira cuña Jesús reroyasar ñemonuhasave yuvireco yepi

<sup>2</sup>Che rivireta, che, “Aviye ité yuvirecoi” ahe pēu yepi che rese pemahenduha vitesse iyavei peguataño vitesse che opombohe vahe agüer rupi. <sup>3</sup>Che rumo aicua uca tupri pota pēu, Cristo niha seci ñepeipei cuimbahe cuaisar, cuimbahe evocoiyase güembireco cuaisar seci. Ēgüe ehi avei Tūpa Guahir Cristo upe. <sup>4</sup>Acoi cuimbahe Cristo upe ñemonuhasave oāca ndiru ndosequiise oyerure āgua, anise Tūpa Ñehengagüer mombehu āgua, ahe ēgüe ehi güerecuar Cristo mboeteiēhisa pipe. <sup>5</sup>Iyavei acoi cuña ndoyopiise oāca oyeruqui āgua, anise Tūpa Ñehengagüer mombehu āgua, ahe ēgüe ehi omer mboyeroyaēhisa

pipe. Ahe cuña evocoiyase ndoyavi oñeapipa tupri vahe. <sup>6</sup>Acoi cuña ndoyopi potaise oāca, tayapecāraisa tupri. Ochise rumo oapecārai āgua, evocoiyase toyopiño oāca sereco. <sup>7</sup>Cuimbahe rumo ndoyopii chira oāca sereco. Esepia, ahe Tūpa rahanga ité seci iyavei iporañetesa omboyecua ité oyese. Cuña rumo omboyecua omer recocuere oyese yuvireco. <sup>8</sup>Esepia, Tūpa oyapose cuimbahe, ndahei cuña sui vinose, cuimbahe sui niha cuña oyapo. <sup>9</sup>Iyavei ndahei cuña upe nara Tūpa oyapo cuimbahe, ahe rumo oyapo cuña cuimbahe upe nara. <sup>10</sup>Co rese cuña virecora oācapisa omer mboyeroyasa mboyecua āgua omahese Tūpa rembiguai eta yuvireco sese. <sup>11</sup>Yande, yande Yar reroyasar yaico vahe co tecocuere rese, yañepitivii oyoya yaico. Evocoiyase cuimbahe ndoicatui cuña porēhi; cuña avei ndoicatui cuimbahe porēhi yuvireco. <sup>12</sup>Esepia, yepi supi eté cuimbahe sui yapopri cuña. Ipare rumo cuña sui oha cuimbahe; opacatu rumo oyoya Tūpa suindar yuvirecoi.

<sup>13</sup>Evocoiyase peyapisaca tupri co rese: ¿Iya piha cuña noñeacapii vahe oyerure Tūpa upe? <sup>14</sup>Yande ité yaicua yemochisa cuimbahe oyemboha vucuse. <sup>15</sup>Cuña rumo oviharete oha vucu porañetesa rese. Esepia, chupe imondopri ité ñacapi āgua. <sup>16</sup>Acoi ava iñeche-ñeche tēi pota vahe co tecocuere rese, toicua ore ndoroicoi ambuae reco pipe. Iyavei opacatu ambuae Jesús reroyasar ēgüe ehi avei yuvireco.

### Yande Yar rese yemomahenduha raisa

<sup>17</sup>Co ambuae mbahe rese rumo ndaicatui eté, “Aviye tupri yuvirecoi” che he āgua pēu. Esepia, aipo pe ñemonuhasave, mbahe tēi eté aipo peyapo. <sup>18</sup>Esepia, yipindar che ayandu peñemonuhapase aipo oyese yande

Yar mboetei āgua pe pīhañemoñetasa ndahoyoyai pipe peico. Amove ayanduse pe rerācua, aroya ité.<sup>19</sup> ¡Iya ité revo pīhañemoñetasa ndahoyoyai vahe reime āgua pe pāhuve Jesús reroyasar supi tupri vahe cua tupri āgua!<sup>20</sup> Peñemonuhase pe pīhañemoñetasa ndahoyoyai vahe pipe pe caru āgua, ndahei yande Yar rese pe yemomahenduhaseve ēgüe peye.<sup>21</sup> Espia, aipo pecaruse, pe rane aipo pepoyava pecaru. Ambuae aipo evocoiyase ndasiepoi tēi yuvireco; ambuae rumo pe pāhu pendar aipo oyembosavaipoño yuvireco.<sup>22</sup> Pereco niha pe rēta aheve pe caru āgua iyavei pe ihu āgua. Pe rumo pe reco pipe opa peroĩro ambuae Jesús reroyasareta peico. Ipipe avei pemochi ava ndovirecoi vahe mbahe. ¡Che evocoiyase, “Aviye yuvireco” ndahei chietera co mbahe pe rembiapo ai rese pēu!

### **Yande Yar rese yemomahenduhasa supi ité vahe resendar**

<sup>23</sup> Co ñehesa aipisi vahe yande Yar suindar amombehu vahe pēu: ahe pītu pipe acoi Jesús mboguaisar opisi āgua renonde, ahe oipisi pan.<sup>24</sup> “Aviye ndeu” ohe pare Vu upe, ombohi-mbohi, ahese aipo ehi güemimbohe eta upe: “Co che rete amondo vahe manosave mbahe tupri pe reco āgua. Ēgüe peyera che rese pe mahenduhasa pipe peico” ehi.<sup>25</sup> Ēgüe ehi avei ocarure yuvireco, ahe oipisi igua riru aipo ehi: “Co uva ricuer omboyecua pēu Tūpa oyapora mbahe ipiasu vahe pe recorā. Che ruvi pipe rumo yaposara. Evocoiyase co ari pipe suive peihuse co, peyemomahenduhara che rese yepi” ehi.<sup>26</sup> Esepia, acoi pehuse co, peihuse avei, peyemomahenduhara, pemombehu aveira yande Yar mano agüer opacatu ava upe peico. Ēgüe peyera iyevi rāro peico.

### **Mara yahera yande Yar rese yayemomahenduhase**

<sup>27</sup> Evocoiyase acoi ava ocaruño tēi vahe, yuviroihuño tēi vahe avei Yar mboeteiēhisave, ahe evocoiyase nomboetei yuvireco yande Yar rembiapocuer omondose güetecuer, iyavei oipiyereve vuvi.<sup>28</sup> Sese tipīhañemoñeta rane oyacatu güecocuer rese ava co pan hu āgua renonde, oihu āgua renonde avei co uva ricuer yuvireco.<sup>29</sup> Esepia, acoi pe yemomahenduhāēhisave co secuer rese pehuse iyavei peihuse, ahese mbahe naporai vahe peseca peyepu nara peico.<sup>30</sup> Ichui niha setá pembahesi, oime setá nipirata iri vahe avei pe pāhuve, oime avei omano vahe pe pāhu pendar.<sup>31</sup> Yande pīhañemoñeta tuprise rumo yande reco āgua rese, yande Yar evocoiyase nomoime chira mbahe tēi yandeu evocoiya yande recosa pipe.<sup>32</sup> Yande Yar rumo oicua yande rembiapo ai. Sese omoime mbahe tēi yandeu. Yande reco mohivi tupri āgua rumo ēgüe ehi yandeu, ndahei yande cañi āgua opacatu ava viroyasarēhi reseve.

<sup>33</sup> Sese, che rivireta, acoi peñemonuhase pe yemomahenduhā āgua yande Yar rese, peñearo ranera oyoya guasu pe caru āgua.<sup>34</sup> Acoi ava ndasiepoise yuvireco, tocaru rane güētave. Ahese yuvirasose ñemonuhaseve, ndipoi chira mbahe chupe. Iyavei che asose eipeve pe repia, opara ambuae mbahe amoiñgatu vicho pēu.

### **Mbahecuasa Tūpa Espiritu suindar**

**12** Che rivireta, che aicua uca pota pēu co mbahecuasa resendar ñepepepe pēu Espiritu omondo vahe.

<sup>2</sup> Pe niha cūrítei peicua tupri ité yipindar Tūpa rese peicoēhi vitese, peyembopa uca mbahe rahanga ēgüe ehi tēi, noñehi vahe upe peico.<sup>3</sup> Sese, che

aipota peicua acoi ava ñehe mara Jesús upe ndahei Tūpa Espíritu pīratasa pipe ěgüe ehi. Iyavei ava ndoicatui chira, “¡Jesús che Yar secoi!” ohe āgua opiha pipe Espíritu Santo ndovirecoise.

<sup>4</sup>Oime setá ambuae-ae tēi mbahecuasa Espíritu suindar yande Jesús reroyasar yaico vahe upe nara, ahe Espíritu rumo ñepeño ité imondosar secoi. <sup>5</sup>Setá mbahe avei oime mbahe yayapo vahe yande Yar upe. Ahe yande Yar rumo ñepeño ité secoi. <sup>6</sup>Iyavei setá oime ambuae mbahe Tūpa oyapo vahe yande rese opīratasa pipe, Tūpa rumo ñepeño ité secoi. Ahe oyapo opacatu co mbahe ñepepei yande rese. <sup>7</sup>Ahe omboyecua yande Espíritu rerecosa ñepepei yandeu opacatu yande reco tupri āgua. <sup>8</sup>Espíritu pīratasa pipe Tūpa omondo ñepe viroyasar upe ñehe āgua aracuasa rese iyavei ambuae upe omondo iporombohe tupri catu āgua ombahecuasa pipe. <sup>9</sup>Ambuae upe evocoyase omondo oyese yeroya tupri catu āgua oEspíritu pipe sui avei. Iyavei ambuae upe omondo opīratasa imbaheasi vahe mbogüera āgua. <sup>10</sup>Ambuae oipisi pīratasa mbahe poromondiisa oyapo vahe yande yuvireco. Ahe ichui avei vireco ambuae ava omombehu vahe yande ñehesa Tūpa suindar yuvireco. Ambuae upe Tūpa omondo mbahecuasa espíritu naporai vahe iyavei Espíritu supi tupri vahe cua tupri āgua. Ambuae evocoyase ichui avei oicatu ñehesa ndicuasai vahe Tūpa suindar pipe oñehe āgua. Ahe ichui avei ambuae oicatu ahe ñehesa ndicuasai vahe mombehu tupri āgua ava upe. <sup>11</sup>Ěgüe ehi Espíritu ñepeño ité güemimbotar rupi omondo ñepepei yande Jesús reroyasar yaico vahe upe co mbahecuasa.

### Opacatu Cristo rese yaico vahe ñepeño ité yande recocuer

<sup>12</sup>Inungar yande retecuer resendar setá mbahe oime viña, ahe rumo ñepeño ité; ěgüe ehi avei Cristo. <sup>13</sup>Ěgüe yahe avei opacatu, yepe yande pāhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico ñepe vahe nungar yande reco āgua Espíritu ñepe vahe pipe. Ahe ñepe Espíritu avei opa yaipisi.

<sup>14</sup>Supi eté yande rete resendar ndahei ñepe mbahe, setá rumo mbahe. <sup>15</sup>Iyavei yepe que yande pi revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tēi ndaseco iri chira yande rete rese. <sup>16</sup>Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiaveira ichui tēi ndaseco iri chira yande rete rese! <sup>17</sup>Esepia, opacatu tupri yande rete sesa pāve tēise, ndayasendui chietera evocoyase mbahe viña. Anise, yande rete yapisacuar pāve tēise, ndayasētui chietera evocoyase mbahe viña. <sup>18</sup>Tūpa rumo ñepepei yande rese mbahe omondo senara rupi tupri güemimbotar rupi. <sup>19</sup>Yande opacatu ñepe vahe rete resendar nungar pāve tēise, ndahei evocoyase opacatu tupri vahe rete nungar yaico. <sup>20</sup>Supi eté yepe setá mbahe yande rete rese, ñepeño ité rumo yande rete.

<sup>21</sup>Iyavei que yande resa ndiyai aipo ehira yande po upe: “¡Nde ěgüe ere tēi vahe eico!”; anise que yande āca avei, “¡Nde ěgüe ere tēi vahe eico!” ndehi chira yande pi upe. <sup>22</sup>Esepia, yande rete resendar mbahe aviye nipiratai vahe yandeu, ahe sese rumo yayeroya catu. <sup>23</sup>Iyavei yande rete rese mbahe ndayasaisu tupri vahe, ahe

rumo yamboyemonde tupri ai sereco. Iyavei no yande rete resendar mbahe ndayamboyecuai vahe ava rembiepiave, ahe yayopi tupri sereco. <sup>24</sup>Oime rumo ambuae yande rete resendar ndayayopii vaherã. Ēgüe ehi Tüpa yande rete resendar mbahe imoingatu tupri. Evocoyase yande rete resendar mbahe ndayasaisu tupri vahe imboeteipri catu seci. <sup>25</sup>Tipo eme pihanemoñetasa ndoyoyai vahe pe pãhuvé. Oyoya pehañeco tupri ñepeipei peyese peico. <sup>26</sup>Evocoyase que ñepeipei yande pãhú pendar upe mbahe tasise, opacatu ambuae upe avei tasi; anise que ñepeipei imboyeroyapri secoise, ambuae avei opacatu oyemboviha yuvireco sese.

<sup>27</sup>Supi eté pe inungar Cristo rete peico. Ēgüe peye ité ñepeipei chupendar ité peico. <sup>28</sup>Ēgüe ehi Tüpa iporavo viroyasar pãhuvé, “Toime rane yipindar apóstol; ipare toime ava che ñehengagüer mombehu água, ichui ambuae upe iporombohe água, ipare ambuae mbahe ndayasepiai vahe apo água, iyavei ambuae ava imbaheasi vahe mbogüera água, ambuae ava pítiviisar tasecoi, ambuae ava recocuer reroguata tupri água tasecoi, ambuae ava evocoyase toñehe ñehesa ndicuasai vahe pipe” ehi. <sup>29</sup>Ndahei rumo opacatu ava apóstol yuvirecoi, iyavei ndahei opacatu Tüpa ñehe mombehusar yuvirecoi, ndahei opacatu oporombohe yuvireco, ndaopacatu avei oyapo mbahe ndayasepiai vahe yuvireco, <sup>30</sup>ndahei opacatu vireco pĩratasa oporombogüera água yuvireco, iyavei ndahei opacatu ndicuasai vahe ñehesa Espiritu suindar pipe oñehe yuvireco, ndaopacatu avei oicua evocoi ñehesa renducua uca água ambuae ava upe yuvireco. <sup>31</sup>Peseca ru Espiritu suindar mbahecua aviye catu vahe peyeupe nara.

### Yembohesa yande poroaisu água resendar

Che rumo amombehura tecocuer aviye catu vahe pëu.

**13**Yepe yande yañeheño tैसे ambuae ava ñehe ndayaicuai vahe pipe, iyavei Tüpa rembiguai ñehe pipe avei viña, ndayasaisuise rumo ava ipipe, yande evocoyase ěgüe yahe tupri tẽi inungar mbahe guarepochi apopri siapu iteanga vahe, iyavei inungar acoi platillo siapú rai tẽi vahe, ěgüe yahe tẽi yaico. <sup>2</sup>Iyavei yepe yamombehuño tैसे Tüpa suindar ñehesa ou vahe yandeu viña, iyavei yepe yaicua mbahe opacatu icuapirẽhi Tüpa suindar yaico, yarecose avei yande aracuasa opacatu yandeyese, iyavei yepe yande Tüpa rese yeroya pipe yarosirira ivitri guasu senda sui viña, ndayasaisuise rumo ava ipipe, yande evocoyase ěgüe yahe tupri tẽira yaico. <sup>3</sup>Iyavei yande mbahe opacatu yareco vahe yamboyaho-yaho tupri tैसे ava iparaisu vahe upe viña, iyavei yayoapi ucapa tupri tैसे viña, ndayasaisuise rumo ava ipipe yaico, ndayande pítivii eté evocoiya yande reco güer.

<sup>4</sup>Acoi ava iporoaisu vahe, ahe seco mbegüe tupri, secocuer aviye ai eté iyavei ndoporoamotarẽhii ambuae ava mbahe potasave; “Che aviye catu vahe aico” ndehi avei, ndoyecomboivate ai eté, <sup>5</sup>ahe ndovirecoi eté oporomboeteiẽhisa, ndahei oyeupe güeraño mbahe oipota, niñemoiro serai vahe, ahe rumo iñero voiño ambuae ava upe. <sup>6</sup>Ndahei mbahe tẽi rese oyemboviha; ahe rumo oyemboviha mbahe supi tupri vahe rese. <sup>7</sup>Oporoaisusa virecose oñemosañõ opacatu uve, oyeroya vite sese, osãro vite mbahe tupri ichui, iyavei seco mbegüe viteño chupe.

<sup>8</sup>Poroaisusa niha ndopai vahe ité. Oyepotara ari ipapapri coiye, ahese ndayamombehu iri chira Tüpa suindar



ñehesa ou vahe, ndayañehe iri chira ambuae ñehesa ndayaicuai vahe pipe, ndayaiporu iri chiaveira yande mbahecuasa. <sup>9</sup>Esepia niha, yaicua raimi tēi mbahe iyavei chīhi raimi tēi yamombehu Tūpa Ñehengagüer. <sup>10</sup>Acoi ouse rumo oicuaa tupri vahe mbahe, ahese ndahe iri chira yaicua raimi tēi vahe yaiporura.

<sup>11</sup>Esepia niha, chīhivahe vite yande recose, yañehe, yandepihañemoñeta, yasenducua mbahe chīhivahe nungar; yacuacuase ité rumo cute, yaseyapa chīhivahe yande reco agüer. <sup>12</sup>Cūrítei yande ndayasenducua tuprii Tūpa resendar mbahe, inungar acoi yepiasa pipe yasepia hāvomi tēi que mbahe; oyeovai eté yaicose rumo, yasenducua tupri catu itera mbahe evocoiyase. Cūrítei rumo yaicua raimi tēi mbahe Tūpa suindar yaico; coiye rumo yaicua tupri catu itera, inungar ahe oicua tupri ité yande recocer.

<sup>13</sup>Co oime mbosapī mbahe ndopai va-herā, ahe: Tūpa rese yande yeroyasa, mbahe yande remiaro ivave oime vahe iyavei yande yeaisusa; co imombosapisa rumo aviye catú vahe ité ambuae sui yandeu, ahe yeaisusa.

### Yaseca catura Tūpa suindar ñehesa mombehu āgua

**14** Peseca catu pe yeaisu tupri āgua peico; aheseve avei peipotara mbahecuasa Tūpa Espíritu remimbou. Ichuindar ñehesa mombehu āgua rese catu ité rumo peicora. <sup>2</sup>Esepia, acoi ava oñehe vahe ñehesa ndayaicuai vahe pipe, Tūpa upe ité evocoiyase oñehe; ndahei ava upe tēi oñehe. Esepia, ndipoi eté ava iñehe renducua-par. Ahe rumo oñehe mbahe ndicuasai vahe rese oespíritu pipe. <sup>3</sup>Acoi ava omombehu vahe rumo Tūpa suindar ñehesa yasenducua vahe pipe, ahe oipītivii ambuae ava Tūpa rese iyeroya āgua,

oporomonguerēhi catu, oporomboviha catu avei. <sup>4</sup>Acoi ava oñehe vahe rumo ñehesa ndayaicuai vahe pipe, ahe ae tēi vireco catu Tūpa rese opihañemoñeta. Acoi ava omombehu vahe rumo Tūpa suindar ñehesa icuapri ité, ahe om- bopihañemoñeta catu Tūpa rese Cristo reroyasar yuvirecoi vahe.

<sup>5</sup>Yepe aipotara opacatu pe ñehe āgua ñehesa ndayaicuai vahe pipe pēu viña, aviye catu rumo pemombehura Tūpa suindar ñehesa icuapri vahe peico. Esepia, ahe aviye catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tupri āgua, ahese aviyeño oñehe Jesús reroyasar rovaque. Ipipe sui ipihañemoñeta catura Tūpa rese yuvireco. <sup>6</sup>Sese, che rivireta, asose pe repia, añehese co ñehesa ndayaicuai vahe pipe pēu, ndapesenducuai chira che ñehe viña. Amombehuse rumo Tūpa oicua uca vahe cheu que mbahecuasa supi tupri vahe resendar, anise que ñehesa Tūpa suindar, anise que ambuae porombehesa, ahese pesenducua viña.

<sup>7</sup>Mbahe yande remimombehu rumo inungar acoi mbahe porasei recasar imoñehepri viña, inungar mimbī, arpa avei. Esepia, ndoyoya tupriise iñehegüer yuvireco, ndayasenducuai eté evocoiyase mbahe-mbahe sapucaisa os-āha yuvireco. <sup>8</sup>Anise co inungar mimbī nomoñehe tupriise vavasave nara yuvireco viña, ndipoi chietera que ava oyemoingatu voi vaherā ovava āgua viña. <sup>9</sup>Ēgüe peye avei niha peico peñehese ava upe ñehesa ndayasenducuai vahe pipe, ahe evocoiyase osenduño tēi, ndosenducuai eté rumo pe ñehe yuvireco. ¡Evocoiyase peñeheño tēi eté! <sup>10</sup>Supi eté, setá iteanga co ivi pipe oime ambuae-ae tēi ava ñehesa. Oime avei rumo ava osenducua vahe aipo nungar ñehesa. <sup>11</sup>Acoi ndayasenducuaise rumo ambuae ava ñehe, yande evo-

coiyase inungar ambuae tecua pendar tēi yaico vahe chupe; yandeu avei evocoyase ahe ava inungar ambuae tecua pendar tēi yuvirecoi vahe. <sup>12</sup>Pe niha peipota ité pereco vaherā mbahecuasa Tūpa Espiritu suindar yepi. Sese peporandu catu mbahecuasa Espiritu suindar rese opacatu Jesús reroyasar pītivii āgua Tūpa rese yuvirecoi tupri catu vaherā.

<sup>13</sup>Sese acoi ava oñehe vahe ñehesa ndayaicuai vahe pipe, toporandu rane Tūpa upe ambuae ava upe senducua uca tupri āgua rese. <sup>14</sup>Esepia, acoi yayeroquiño tēise Tūpa upe ñehesa ndayasenducuai vahe pipe, yayeroqui yande espíritu pipe, ndayasenducuai rumo yande yeroqui. <sup>15</sup>¿Mara yahera vo evocoyase? Yayeroquia yande espíritu pipe, yande aracuasa pipe avei. Yasapucaira yande espíritu pipe, yande aracuasa pipe avei no. <sup>16</sup>Esepia, acoi Tūpa upe, “Aviye ndeu” yahese yande espíritu pipe güerāño, evocoyase ava ndosenducuai vahe, oyemboyase yande rese iyavei osenduse yande yeroquisa, “Aviye ité” ndehi chiterera yuvireco. Esepia niha, ahe ndosenducuai eté yande yeroqui yuvireco. <sup>17</sup>“Aviye ndeu” yande hesa, aviyeteramo aviyera Tūpa upe viña, ambuae ava rumo osenduse, noipitívii chiterera Tūpa rese imbopihañemoñeta catu āgua senducuaēhi pipe. <sup>18</sup>“Aviye ndeu” ahe Tūpa upe. Esepia, añehe catu ñehesa ndayaicuai vahe pipe opacatu pe sui. <sup>19</sup>Jesús reroyasar ñemonuhasave rumo aipota catu amombehu vahe tēi ñehesa yasenducua vahe ava mbohe āgua setá ñehesa ndicuasai vahe pipe che ñehe rāgüer sui.

<sup>20</sup>Che rivireta, pepihañemoñeta eme chihivahemi pihañemoñeta nungar pipe. Iyacatu rumo peicora cuacua vahe pihañemoñeta nungar pipe. Peyemochihivahe catuñora rumo peico mbahe naporai vahe apoēhi āgua. <sup>21</sup>Porocuita resendar icuachiapri aracahendar pipe

aipo ehi: “Añehera co ava yuvirecoi vahe upe ambuae ava ñehe pipe. Iyavei ava ambuae ivi pendar amoñehe ucara iñehe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe. <sup>22</sup>Evocoyase co ñehesa ndayaicuai vahe pipe oñehese ava Tūpa pīratasa pipe, ahe Jesús reroyasarēhi yuvirecoi vahe upe nara: “¡Peicua catu, co supi tupri vahe!” he āgua. Ndahei rumo ava Jesús reroyasar yuvirecoi vahe upendar. Ñehesa Tūpa suindar senducupri yamombehuse rumo, ahe, “Co supi tupri vahe” he āgua Jesús reroyasar yuvirecoi vahe upe; ndahei ava seroyasarēhi yuvirecoi vahe upendar. <sup>23</sup>Evocoyase, acoi opacatu pe Jesús reroyasar pe ñemonuhasave oyoya guasu peñehese ñehesa ndayaicuai vahe pipe tēi, ipare yuviroquese pe pāhuve Jesús reroyasarēhi ndosenducuai vahe Tūpa suindar mbahe yuvireco, “¡Opacatu co ndayaracuai vahe tēi yuvireco!” ehira yuvireco pēu. <sup>24</sup>Opacatu rumo peñehese Tūpa suindar ñehesa yasenducua vahe pipe, yuviroquese evocoi nungar ava yuvirasos pe pāhuve, ahe ae evocoyase, “Supi eté ayavi che recocuer Tūpa rovaque” ehira pe ñehe renduse yuvireco. <sup>25</sup>Ēgüe ehira opihañemoñeta rai ndoyecuai vahe imboporēhipa uca oyeupe pe ñehe rendu ramosa yuvireco. Ipipe sui omboeteira Tūpa yuvireco. Ahese, “Supi eté catu Tūpa ité pereco peyese” ehira yuvireco pēu.

#### **Yayapora mbahe opacatu yande cuaita rupi ñemonuhasave**

<sup>26</sup>Sese che rivireta, peñemonuhasave, oime pe pāhu pendar osapucui pota vahe sapucaisa Tūpa upendar, ambuae evocoyase oipota ité ava mbohe yuvireco, anise ambuae omombehu pota ava upe mbahe oyeupe omboyecua uca vahe Tūpa, ambuae oipota ité oñehe

ñehesa ndicuasai vahe pipe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesús reroyasareta seroya catu água yuvireco. <sup>27</sup> Acoi ava oñehese ñehesa ndayaicuai vahe pipe, toñehe ñuvirío güeraño yuvireco, anise que mbosapí ñepeipei rupi; ñepeipei evocoiyase osenducua ucara ñehe ava upe oico. <sup>28</sup> Acoi ndipoise ité rumo ambuae ava ahe ñehesa ndayaicuai vahe renducua uca água, ndiyai ahe oñehera yuvireco pe ñemonuhasave; oyeupeñomi evocoiyase ahe oñehera ipipe yuvireco Tüpa upe. <sup>29</sup> Ëgüe peye tuprí aveira pemombehuse Tüpa suindar ñehesa ambuae ava upe, peñehera ñuviriomi, anise mbosapí. Ambuae evocoiyase pe pãhu pendar oyapisaca tupríra sese yuvireco ‘¿supi eté pãha?’ ohesave. <sup>30</sup> Que ñepeipei oñehevites Tüpa oicua ucase mbahe ambuae ava upe, topituhuño yipindar oñehevaha, ambuae evocoiyase toñehe pëu. <sup>31</sup> Evocoiyase ëgüe peyera peñehe ñepeipei opacatu ambuae osendu vahe mbohe água iyavei imonguerëhi catu água. <sup>32</sup> Acoi omombehu vahe ñehesa Tüpa suindar, ahe oicatu oñehevomombituhu água. <sup>33-34</sup> Esepia, Tüpa secoi mbahe aviye vahe aposar, ndahei ndoyembohe catui vahe.

Ndiyai cuña upe ñehevaha água pe ñemonuhasave. Esepia, ëgüe ehi avei opacatu ambuae Jesús reroyasar ñemonuhasa rupi yuvireco. Evocoiyase ndiyai eté aheve ñehevaha água yuvireco chupe. Iyacatu rumo ahe imboyeroyapri yuvirecoira omer upe Tüpa porocuaita rupi. <sup>35</sup> Oicua potase que mbahe, iya omer upe oporandura güëtave yuvireco. Esepia, cuña upe ndiyai eté iporandu água mbahe rese pe ñemonuhasave.

<sup>36</sup> Peyapisaca catu co ñehesa rese. Ndahei niha pe rane pemombehu Tüpa Ñehengagüer ava upe peico, ndahei

avei pëuñomi ou Tüpa suindar ñehesa. <sup>37</sup> Acoi que pe pãhuve oimese “che Tüpa Ñehengagüer mombehusar aico” ehiño tēi vahe, anise que “aicua Espiritu suindar mbahe” ehi vahe, iya rumo oicua tupri co aicuachía vahe imondo pëu, ahe yande Yar porocuaita resendar. <sup>38</sup> Ahe ndoyapisaca potaise rumo che ñehevaha rese, ñehevaha rese evocoiyase ndapeyapisacai chira.

<sup>39</sup> Sese, che rivireta, peyemonguerëhi catu Tüpa suindar ñehesa icuapri vahe mombehu água peico. Ndiyai rumo ndapeipotai ambuae ava upe ñehesa ndayaicuai vahe pipe ñehevaha água. <sup>40</sup> Peyapora rumo opacatu mbahe ñepeipei pe cuaita rupi mbahe tupri pipe.

### Cristo cueravevi agüer

**15** Che rivireta, che aipota peyemomahenduha acoi ñehesa písirosa resendar pëu mombehu vahecuer rese. Co ñehesa niha peipisi. Ipipe sui avei niha peyemoviracua peyese. <sup>2</sup> Seroya pipe niha peñepisiro peico peyemoviracuase sese. Ëgüe ndapeyese rumo, peroya tupri tēi.

<sup>3</sup> Acoi ñehesa aipisi vahe, opa uca aicua pëu. Esepia, ahe aviye catu vahe: Cristo omano yande angaipa repirã Tüpa Ñehengagüer icuachiapri rupi eté <sup>4</sup> iyavei oñoti sehögüer yuvireco. Ipare rumo, imombosapisa ari pipe, ocueravevi iri icuachiapri rupi eté avei. <sup>5</sup> Ichui oyemboyecua Pedro upe. Ipare voi oyemboyecua apóstol yuvirecoi vahe upe. <sup>6</sup> Ichui oyemboyecua quiniento sui setá catu vahe viroyasar upe. Evocoiyase oyoya guasu osepia yuvireco. Setá vite rumo sepiasarer yuvirecove vite cūrítei; amove rumo ambuae opa omano yuvireco. <sup>7</sup> Coiye oyemoporëhi Santiago upe. Ipare opacatu apóstol once yuvirecoi vahe upe.

<sup>8</sup> Cheu avei ipa ité oyemboyecua cute, aviye evocoyase che ipá oha vahe aico seroya água. <sup>9</sup> Esepia, che seco ivi coti catu vahe opacatu ambuae apóstol sui aico. Iyavei ndacheãroi eté apóstol che reco água viña. Esepia, che yipindar seroyasar aseca-seca catu vahe mara-mara tēi sereco água. <sup>10</sup> Che rumo apóstol ité aico. Esepia, Tūpa oyapo mbahe aviye vahe ité cheu; che rovasa oico. Evocoyase che recocuer osecuñaro ité sereco. Ichui che aporaviqui catu ité opacatu ambuae apóstol sui. Ndahei rumo cheyesui tēi ěgüe ahe vichico, Tūpa rumo oporovasasa pipe secoi che rupi. <sup>11</sup> Ndapepihañemoñetai chira rumo acoi oporaviqui catu vahe rese tēi. Co ñehesa Cristo recocuer re-sendar ore oromombehu vahe rese rumo pepihañemoñeta catura. Esepia niha, ahe peroya vahe ité peico.

#### **Ava omano vahe cuerayevisa**

<sup>12</sup> Oromombehu ité niha Cristo cuerayevi agüer resendar pēu. Oime rumo amove pe pāhu pendar, “¿Mahera aipo ocuerayevira omano vahe yuvireco viña?” ehiño yuvireco. <sup>13</sup> Ndocuerayeviise ité rumo ava omano vahe viña, Cristo avei evocoyase ndocuerayevii chietera viña; <sup>14</sup> iyavei Cristo ndocuerayeviise viña, ore secocuer oromombehu vahe evocoyase ěgüe ehi tēi etera viña. Iyavei pe yeroyasa Cristo rese ěgüe ehi tēi aveira viña. <sup>15</sup> Acoi ěgüe ehise ité rumo viña, ore avei evocoyase oroñehēo tēi etera Tūpa resendar ñehesa rese oroico viña. Esepia, “Tūpa Cristo ombogüerayevi” orohe ité imombehu ava upe oroico. Ndocuerayeviise ité rumo omano vahe yuvireco viña, ahese Tūpa nombogüerayevii chiaveira Cristo viña. <sup>16</sup> ěgüe ehi eté, acoi omano vahe ndocuerayeviise yuvireco viña, Cristo avei evocoyase ndocuerayevii

chietera viña; <sup>17</sup> Tūpa rese pe yeroyasa evocoyase ěgüe ehi tēi vahe itera viña; angaipa pipe viteño tēi evocoyase pe recocuer viña. <sup>18</sup> Iyavei acoi ěgüe ehise ité viña, evocoyase omano vahe Cristo reroyasar, ahe avei ocañi tēira viña. <sup>19</sup> Ndipoise yasáro vaheerā Cristo suindar mbahe yamanose, yande evocoyase imbopapri tēi catu itera yaico opacatu ambuae ava sui yuvireco viña.

<sup>20</sup> Cristo rumo supi eté ocuerayevi omano vahe pāhu sui; ahe rane yipindar ocuerayevi vahe. <sup>21</sup> Esepia, ñepi ava rembiapo sui oime manosa yandeu. Evocoyase ñepi ava rembiapo sui avei yacuerayevira. <sup>22</sup> Esepia, inungar acoi Adán rembiapo ai sui ava opacatu omano yuvireco, ěgüe ehi aveira Cristo rembiapo sui opacatu ava sese yuvirecoi vahe virecora tecovesa yuvireco. <sup>23</sup> Ñepi-pei yandeu imombehusa rupi; yipindar Cristo ocuerayevi, ichui yande seroyasar yaico vahe yacuerayevi aveira sese acoi ahe oyevise curi. <sup>24</sup> Ahese oura ari ipa vahe cute. Yipindar rumo Cristo omocañipara opacatu seco pīrata ěgüe ehi tēi vahe. Ipare omondora opovri pendar Vu Tūpa upe. <sup>25</sup> Ahe rane ité rumo opacatu oporocuaira oico acoi Tu opase voi eté omondo opacatu yamotarēhimbar ipovrive. <sup>26</sup> Ahese ipa manosa opa itera. <sup>27</sup> Esepia, Tūpa osecopi opacatu mbahe imondo ipovrive, “Opacatu ité mbahe secopipri” ehise. Ndahei rumo Tu Tūpa avei secoi ipovrive. Esepia, Tu ité opacatu mbahe osecopi imondo ipovrive. <sup>28</sup> Evocoyase, opase mbahe imondosa ipovrive, ahe ae evocoyase oyemondora Vu Tūpa povrive. Tu evocoyase secoira ivate catu vahe opacatu mbahe sui.

<sup>29</sup> Ndipoise omano vahe cuerayevi água yuvireco viña, ¿mbahe rese piha evocoyase omanose ava, amove chupe nara tēi ambuae oñeapiramo uca yuvireco? Esepia, omano vahe ndocuer-

ayeviise yuvireco viña, ¿mahera ru evocoyase ahe ava oñeapiramo uca chupe yuvireco? <sup>30</sup>Iyavei ore no, ¿mahera ru evocoyase oroyemondora mbahe tēi upe ari rupi viña? <sup>31</sup>Supi eté, che rivireta, ari yacatu aviye che amano vaherā opacatu co mbahe tēi sui. Ahe pipeve avei rumo che areco ité che viharetesa pe rese yande Yar Jesucristo rese che recose. <sup>32</sup>Oime mbia Efeso pendar mbahe tēi eté oyapo yuvireco cheu. Aviye acoi mahembiar oñaro ai vahe rese avava vahe vichico. Acoi omano vahe ndocuerayeviise rumo yuvireco viña, evocoyase ichui ndipoi chietera mbahe aviye vahe cheu viña. Sese che ayapoño itera inungar ava aipo ehi vahe yuvireco viña “yacaruño, yaihuño avei. Esepia, ayihive yamanora” ehi vahe.

<sup>33</sup>Peyembopa uca eme evocoi nungar ava upe peico. Supi eté ñehesa aipo ehi vahe: “Ava naporai vahe piri peicose, ahe evocoyase virovara pe reco tuprisa” ehi vahe. <sup>34</sup>Pepihañemoñeta tupri iri, peyemboangaipa uca iri eme. Esepia, amove pe pāhu pendar oime ndoicuai vahe ité Tūpa yuvireco. Che aipo ahe ité pēu ‘toyuvinochi che ñehe osenduse yuvireco’ viya.

### **Yande retecuer cuerayevisa resendar**

<sup>35</sup>Aviyeteramo pe pāhu pendar oimera oporandu vahe: “¿Mara ehira pīha omano vahe ocuerayevi irise yuvireco coiye? ¿Mara ehi angahura pīha setecuer ahese yuvireco?” ehira yuvireco oyeupe. <sup>36</sup>¡Pe aipo peye-peye tēi peico! Esepia, mbahe rāhii yañotise, ituyu rane ité sori āgua. <sup>37</sup>Yañotise mbahe, sāhii rane ité yañoti; ndahei ihi opacatu reseve yañoti. <sup>38</sup>Ípare rumo Tūpa omondo ahe mbahe rāhii upe ihiguā güemimbotar rupi, iyavei ambuae mbahe rāhii yacatu omondo ihiguā. <sup>39</sup>Ndahoyoyai rumo que ñepei mbahe miti hi ambuae mbahe miti hi

rese. Ēgüe yahe avei yande yaico vahe ambuae ité yande rete mbahe mimba sui; vīrai rete ambuae ité iyavei pira rete ambuae tēi no. <sup>40</sup>Ēgüe ehi avei niha, oime iva pendar rete, ivive ava yuvirecoi vahe rete avei no. Iva pendar rete catuprigüer rumo ndahoyoyai eté ivi pipendar rete rese. <sup>41</sup>Ari rendigüer avei ndahoyoyai yasi rendigüer rese, yasitata rendigüer rese avei. Ñepei yasitata ambuae yasitata rese ndahoyoyai avei sendigüer yuvireco.

<sup>42</sup>Ēgüe ehi aveira niha omano vahe cuerayevisa; yañotise sehögüer, ahe ituyu vaherā. Ocuerayevise rumo ndituyu iri chietera; apirēhi vaherā ité secoira. <sup>43</sup>Tehögüer ñotimbrí nimomburusai vahe; coiye ocuerayevise rumo, imboeteipri ité secoi. Acoi ava rehögüer oñoti vahe yuvireco, nipirata iri eté oico, coiye ocuerayevise rumo, ipirata itera. <sup>44</sup>Supi eté, acoi ava rehögüer ñotisa vahe, ahe co ivi pipendar tēi setecuer. Ocuerayevise rumo, setecuer iva pendar secoira. Esepia, oime ité ivi pendar setecuer, oime avei iva pendar setecuer.

<sup>45</sup>Supi eté aipo ehi icuachiapri aracahendar pipe: “Yipindar ava Adán serer vahe. Ahe sete upe ombou Tūpa secove āgua co ivi pipe” ehi. Ichui rumo ambuae ité ipa Adán nungar ou vahe, ahe rumo vireco ité tecovesa iva pendar ava upe imbou āgua. <sup>46</sup>Yipindar oime co ivi pipendar tecovesa. Ípare rumo oime co tecovesa iva pendar yandeu. <sup>47</sup>Ēgüe ehi yipindar ava ivi sui yapopri, ivi rese nara ité icuaita oico; coiye catu ava ou vahe evocoyase iva pendar. <sup>48</sup>Inungar yipindar ava ivi suindar, ēgüe ehi avei opacatu ava ivi suindar tecovesa rereco yuvireco. Iyavei inungar Jesús iva suindar, ēgüe ehi aveira opacatu iva suindar tecovesa vireco vahe yuvireco.

<sup>49</sup>Iyavei inungar cūrítei Adán nungar tupri yaico; ēgüe yahe aveira yande Je-

sucristo iva pendar nungar tupri yaico curi.

<sup>50</sup> Che rivireta, co mbahe amombehu potami pëu: acoi ava upe güetecuer reseve, ndiyai eté seique água ivave Tüpa mborerecuasave. Esepia, co yande rete ocañi tēi vaherā, ndoipisii chira tecocuer apirēhi vahe. <sup>51</sup> Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi eté secuñaros-apara. <sup>52</sup> Mimbī moñehese voi yande resapihara inungar yande resapiqui vahe, ěgüe ehira secuñarosapa yande rete. Aheseve avei omano vahe ocuerayevi-para apirēhi vaherā ité yuvireco; yande evocoyase nayamano vitei vahe, opaño tēira yande rete secuñarosa. <sup>53</sup> Esepia, co yande rete ocañi tēi vaherā, ahe yande rete niha opara oñecuñaro apirēhi va-herā yuvireco. <sup>54</sup> Ęgüe ehise yandeu, ahese ramo osupitira Tüpa ñehe icuachi-apri pipe imombehupri yandeu curi: “Manosa opara imocañisa” ehi vahe. <sup>55</sup> Iyavei aipo ehi: “Ndayasiquiye iri chira yande mano água. Esepia, manosa ndovireco iri chira oyeroyasa oyese inungar acoi cau popiar opa vahe serocuasa ichui” ehi. <sup>56</sup> Angaipa niha inungar mbahe popiar omoime vahe manosa yandeu. Moisés porocuaita aracadendar evocoyase ombou pīratasa angaipa upe angaipa aposar mocañi uca água. <sup>57</sup> Che rumo, “¡Aviye ndeu!” ahe Tüpa upe. Esepia, ahe ombou angaipa recopi água yandeu yande Yar Jesucristo rembiapo sui.

<sup>58</sup> Sese, che rivireta, peico tupriño ité Cristo rese iyavei peyemoviracua opacatu mbahe tēi upe; peporaviqui catuño yande Yar upendar mbahe rese peico. Esepia, peicua niha yande Yar rese peicose, pe poraviquisa ndahei ěgüe ehi tēi vahe.

### Porrecosa Jesús reroyasar pítivii água resendar

**16** Iyavei co guarepochi monuha água iparaisu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe. <sup>2</sup> Domingu yacatu iya pe avei peipeha voimi guarepochi peico pe poraviqui repri sui yapocatu água. Eipeve che yepotase, ndapeyemañeco iri chira guarepochi monuha água rese peico. <sup>3</sup> Evocoyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso água yuvireco ahe pendar yuvirecoi vahe upe. <sup>4</sup> Aviyeteramo, iyase cheu, che avei asora aheve. Evocoyase ahe yuvirasora che rupi.

### Pablo ipihañemoñeta oguata água rese

<sup>5</sup> Che sose, asora ivi Macedonia rupi, ipare asora pe repia Corinto ve. <sup>6</sup> Aviyeteramo apita pucumira pe piri, anise aviyeteramo pe pīrive ité mbahe porañehi che mombitañora. Ipare pe che pítiviiñomira peye eipeve sui ambuae tecuave che so água rese. <sup>7</sup> Ndaipotai che opoepia raimi tēi eipeve vicho. Yande Yar rumo oipotase, aico pucu itera pe piri. <sup>8</sup> Che rumo cūritei apitaño vitera cohava Efeso ve, asepia ranera Pentecostés pieta. <sup>9</sup> Esepia, oime ité yande Yar upe che poraviquisa aviye vahe ité cohava, yepe setá iteanga ava che amotarēhimbar yuvirecoi viña. <sup>10</sup> Acoi Timoteo oyepotase oso pe piri, taseco tupriño ité pe pāhuve. Esepia, ahe avei oporaviqui yande Yar upe nara oico che nungar. <sup>11</sup> Tipo eme ñepe yepe sepia potaēhisar yuvireco, iya rumo peipítivii catura che piri iyepota tupri água rese.

Esepia, che iyavei ambuae Jesús reroyasar rese orosãro ité iyepota água oroico.

<sup>12</sup>Yande rivri Apolos upe, “Eso ambuae Jesús reroyasar piri Corinto ve” ahe tēi. Cūrítei rumo niqerēhii oso pe repia; iyase chupe, ahese osora pe piri.

### **Pablo mahenduhasa ipa vahe**

<sup>13</sup>Pemahemoha peyese; peyemoviracua avei Jesús rese pe yeroyasa pipe. Peñemosaño catu pe cuaita upe. Peicoveño itera Tūpa pīratasa pipe. <sup>14</sup>Opacatu mbahe peyapo pota vahe, peyapora pe poroaisusa pipe ité.

<sup>15</sup>Che rivireta, pe peicua Estéfanas opacatu güēta pendar reseve, ahe ranei yipindar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri água yuvireco no. <sup>16</sup>Evo-coiyase che aipota peyemboyeroyara evocoi nungar ava rese iyavei opacatu ambuae yande Yar upe oporaviqui vahe rese avei.

<sup>17</sup>Pe pāhu pendar Estéfanas, Fortunato iyavei Acaico cohava oyepotase che mboviha yuvireco. Esepia, ahe oyapo ité

pe ndapeicatu tuprii vahe apo yuvireco. <sup>18</sup>Ahe che monguerēhi catu yuvireco, ēgiie ehi avei revo pēu no. Pemboeteira evocoi nungar ava peico.

<sup>19</sup>Jesús reroyasar Asia pendar opacatu ombou omahenduhasa yuvireco pēu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe sētava yuvireco, ahe avei ombou omahenduhasa yande Yar rer pipe yuvireco pēu. <sup>20</sup>Opacatu Jesús reroyasar coha pendar avei omondo omahenduhasa yuvireco pēu. Peyeovaupite catu pe reco maranehisa pipe ahe mahenduhasa mombehu peyeupe pe viharetesave.

<sup>21</sup>Che Pablo, che po pipe ité aicuachía co che mahenduhasa imondo pēu.

<sup>22</sup>Acoi ava ndosaisui vahe yande Yar Jesucristo, ahe tocañi mbahe tēi pipe. ¡Toyevi pihavi voi yande Yar ou!

<sup>23</sup>Yande Yar Jesucristo tape rovasa ité yepi. <sup>24</sup>Pēu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pēu.

*IMOÑUVIRIOSA PABLO  
REMBICUACHIA  
CORINTO PENDAR UPE*

**CORINTIOS**

**Pablo mahenduhasa Jesús  
reroyasar Corinto pendar upe**

**1** Avirave, opacatu Jesús reroyasareta Corinto pendar peico vahe, pe Tüpa reroyasar ivi Acaya rupindar avei. Che Pablo, Tüpa remimbotar rupi Jesucristo apóstol aico. Aicuachía che ñehe pëu. Co yande rivri Timoteo avei omondo omahenduhasa pëu. <sup>2</sup>Tapepisi catu yande Ru Tüpa, yande Yar Jesucristo porovasasa avei pe reco tupri ägua.

**Pablo paraisu agüer resendar**

<sup>3</sup>Yamboeteiño itera yande Ru Tüpa. Ahe niha yande Yar Jesucristo Ru secoi, ahe yande paraisuereco vahe iyavei ombou vahe yande mboviha ägua yepi. <sup>4</sup>Ahe niha yande mbovihaño opacatu yande paraisusa pipe, yande avei evocoyase yaicatura ava iparaisu vahe mboviha ägua yuvireco. Egüe ehi eté Tüpa imbou vihasa yandeu, ahe avei yande yamondora yuvireco chupe. <sup>5</sup>Esepia, inungar Cristo imombaraisupri secoi, egüe vahe aveira imombaraisupri yaico yaicose sese. Cristo sui avei rumo oime itera vihasa yandeu. <sup>6</sup>Ore paraisu pe mboviha ägua 'toñepisiro yuvireco' ore yapave. Iyavei Tüpa ore mboviha pe mboviha ägua avei. Supi evocoyase pe peñemosañora mbegüe rupi ore paraisu agüer nungar tupri pe recose. <sup>7</sup>Ore oroyeroya ité Tüpa pe pítivii ägua rese. Esepia, oroicua ore paraisu agüer nungar tupri peico, egüe peye avei peipisi ore vihasa Tüpa suindar.

<sup>8</sup>Che rivireta, opomomahenduha pota mara orohe oroico ivi Asia rupi. Ore

recoãhasa yavai vahe ité oime aheve oreu. Ndoroi catu iri eté oroñemoso ore pĩrataẽhise chupe, seni orepihañemoñeta: "Yamanoño itera co mbahe-mbahe tẽi pipe" orohe viña. <sup>9</sup>Supi eté oromoha ore cañi tẽi ägua viña, egüe ehi rumo oreu oroyeroya catu ägua Tüpa rese, ndahei oreyses tẽi. Esepia, ahe oporombogüerayevi vahe secoi. <sup>10</sup>Ahe niha ore repi ore mano rãgüer sui, ore repi aveira curi evocoi nungar mbahe tẽi sui. Supi eté oroyeroya viteño ité sese. Ahe ité niha ore repi viteño itera mbahe-mbahe tẽi sui, <sup>11</sup>pe ore pítiviise peye pe yeroqui pipe. Ahese setá, "Aviye ndeu" ehira yuvireco Tüpa oporopítiviisa ombou vahe rese oreu setá yeroquisa sui.

**Mbahe sui Pablo ndosoi Corinto ve**

<sup>12</sup>Oime mbahe ore mboviharete vahe: ore piha pipe ité oroicua oroico tupri Tüpa suindar ore reco catuprisa pipe, ore pihañemoñeta tuprisa pipe avei co ivi pipendar ava rembiepiave, pe rembiepiave avei eté. Tüpa porovasasa pipe niha egüe orohe, ndahei ava co ivi pipendar mbahecuasa pipe tẽi. <sup>13-14</sup>Esepia, che ñehe aicuachía vahe imondo pëu, aicuachía ñepei reseve pe yeroqui tupri ägua, pe senducua tupri ägua avei no. Iyavei ore cua revo chíhi peye cute. Acoi yande Yar Jesús yevise curi, ahese peyembovihara ore rese, inungar ore oroyembovihara pe rese.

<sup>15-16</sup>Sese yipindar supi eté che pihañemoñeta aso vahe rã ñuvirio yupagüer pe repia, pe mboviha catu ägua viña. Egüe ahe ité, che pihañemoñeta pe piri rane che so ägua che guatasa rupi Macedonia ve. Ichui ayevi pota iri pe piri viña, ipare pe che pítivimira peye ivi Judea rupi che so ägua rese viña. <sup>17</sup>Ndachepihañemoñeta voioño tẽi che so ägua, ndahei iporombopa serai vahe aico "che co mbahe ayapora" ehi tẽi



vahe, ipare rumo nomboaviyei eté. <sup>18</sup>Tüpa rumo oicua ore ndahei, “Aviye” ore he voisa pëu, ahe pipeve avei, “Aní” ore hesa. <sup>19</sup>Esepia, Tüpa Rahir Jesucristo avei ñepei reseve vahe ité yayeroyá vahe sese. Ahe secocuer niha oromombehu oroico pëu, che, Silvano, Timoteo avei. <sup>20</sup>Esepia, opacatu Tüpa remimombehugüer imboaviyesa sese. Sese niha serer pipe, “Ègüe tehi” yahe Tüpa upe imboetisave. <sup>21</sup>Tüpa niha opacatu yande momirata seseño ité yande reco água, yande poravo avei. <sup>22</sup>Güerer omondo yande rese ‘cheu nara’ oyapave. Ombou avei oEspíritu yande pïha pipe ‘ipipe toicua che remimombehugüer rupi tupri ité mbahe amondora chupe yuvireco curi’ oyapave.

<sup>23</sup>Tüpa niha oicua acoi ndayeviise Corinto ve pe piri, ègüe ahe pëu mbahe aviye água rese. <sup>24</sup>Ndahei opocuai pota mbahe pe rembieroyará rese. Esepia, pe Tüpa rese pe yeroyasa pipe peyemoviracuaño ité Cristo rese. Ore rumo oroipota pe pïtiviisa pe yemboviha água.

**2**<sup>1-2</sup>Co rese ndaso catu iri pe piri. Esepia, che aso irise pe piri ndopomboviha catui chira viña, ¿ava vo evocoyase che mbovihara viña? Pe ité niha che mbovihasar peico. <sup>3</sup>Sese che aicuachía ñehesa ipirata vahe pëu cuese. Esepia, ndaipotai eipeve che sose, che mbovihaëhi água peye. Pe rumo iya ité che mboviha catura peye viña. Che ayeroya ité opacatu pe rese aviharetese, pe avei evocoyase opacatu peviharetera che rese. <sup>4</sup>Supi eté che aicuachiasa che ñehe pëu, che ae ayepïhamboasi ité, ayaseho avei. Esepia, aicuachía vahe pëu ndahei pe mbovihaëhi água, che rumo aicuachía ‘toicua che guaisu eteprisa yuvireco’ che yapave pëu.

### Oime ñerosa ava upe mbahe sembiavi rese

<sup>5</sup>Acoi yande rivri omoime uca vahe viharëhisa co mbahe tëi apo pipe, ndahei che güeraño ndache mbovihai, pe avei rumo seni opacatu ègüe peye. Che, “Seni” aipo ahe ité pëu. Esepia, ndaipotai che ñehe rasi água. <sup>6</sup>Co mbia upe setá mbahe peiporara uca ité, evocoi rupive iya ègüe peye chupe. <sup>7</sup>Co suive ité rumo peñerora chupe, peipïtívii aveira. Esepia, aviyeteramo oviharëhisa pipe oyemocañi tëira. <sup>8</sup>Sese cüritei opomonguerëhi ité pe mboyecua iri água pe poroaisusa chupe. <sup>9</sup>Cuese ambuae che ñehe aicuachía co che pe mbohesa resendar pëu pe recoãha água, “¿Oyapo itera pïha che remimombehu yuvireco?” ahe pëu. <sup>10</sup>Cüritei cheñero avei que ava upe peñero vahecuer upe. Esepia, oimese que mbahe rese che ñero água, Cristo rovaque ègüe ahe pe raisusave <sup>11</sup>Carugar yande mbopaëhi água. Esepia, yande yaicua tupri ité iporombopasa.

### Tecua Troas ve Pablo nombohe catui opïhañemoñetasa

<sup>12</sup>Ayepotase tecua Troas ve Cristo recocuer mombehu água, oime ité yande Yar upe nara aheve che poraviqui água viña. <sup>13</sup>Nambohe catui rumo che pïhañemoñetasa. Esepia, ndasepiai eté yande rivri Tito. Sese, che, “Aviye” ahe pare ava Troas pendar upe, asoño ivi Macedonia rupi.

### Cristo rese yaicose, yaicatu mbahe tëi recopi

<sup>14</sup>Aviye yande Ru Tüpa upe. Esepia, yande Cristo rese yaico vahe yande renose oamotarëhimbar povri sui opacatu ava rembiepiave iyavei yande recocuer sui opacatu ava upe oicua uca güecocuer inungar mbahe sïacua

vahe yasētu vahe opacatu rupi. <sup>15</sup> Esepia, inungar itaisi sīacua vahe opacatu rupi, ēgüe vahe avei yande Tūpa upe Cristo yande reropovēhese yaico ava ipīsiropirā upe, ava ocañi tēi vaherā upe avei. <sup>16</sup> Ahe ava ocañi tēi vaherā upe evocoi ñehesa yaru vahe inungar cañi tēisa resendar; ava ipīsiropirā yuvirecoi vahe upe rumo evocoi ñehesa ombou tecovesa. Yande ae tēi rumo ndayaicatu i evocoi nungar mbahe apo. <sup>17</sup> Ore rumo ndahei setā ambuae ava nungar tēi oroico. Esepia, oromombehuse Tūpa Ñehengagüer, ndahei mbahe pisi āgua tēi rese ēgüe orohe, ore rumo ore pihañemoñeta tuprisa pipe oromombehu co ñehesa Tūpa rovaque Cristo rese ore recosa pipe. Esepia niha, ore semimondo oroico.

### Ñehesa Tūpa remimbotar ipiasu vahe resendar

**3** Ore aipo orohese, aviyeteramo pēu ndoyavii oroyecomboivate ai pota iri viña, ēgüe ndorohei rumo iyavei ndorosecai icuachía āgua ava ñehesa aviye vahe ore recocuer resendar oromondo vaherā pēu. Ndorosecai avei aipo nungar cuachiar pe suindar, inungar co ambuae oyapo vahe yuvireco yepi. <sup>2</sup> Esepia, pe ité inungar ore rembicuachía ore recocuer resendar ore oroipota vahe, ēgüe peye peico ore piha pipe. Esepia, opacatu ava pe reco tupri repiase, oicua ore poraviqui tuprisa pe pāhuve yuvireco. <sup>3</sup> Pe niha pemboyecua pe reco tupri pipe ore rembiapo Cristo porocuaite pipe pe pāhuve. Sese pe inungar Cristo rembicuachía aviye vahe oromondo vahe ava upe, ahe rumo ndahei tinta pipe ité icuachiapri itape rese, Espiritu Tūpa oicove vahe suindar pipe rumo yapopri ava piha pipe.

<sup>4</sup> Oroyeroya ité co rese Tūpa rese ore yeroyasa pipe. Cristo niha ēgüe ehi oreu.

<sup>5</sup> Ndahei oreyesui tēi oroicatu co mbahe apo. Tūpa rumo ombou oreu opacatu co mbahe apo āgua. <sup>6</sup> Ahe niha ombou opīratasa oreu güemimbotar ipiasu vahe rese poraviqui āgua, ndahei Moisés rembicuachiagüer rupi oroporaviqui. Esepia, ahe imboaviyeēhisa pipe yamano tēira viña. Ahe rumo Espiritu Tūpa suindar pipe oroporaviqui. Esepia, ahe ombou tecovesa yandeu.

<sup>7</sup> Co Moisés recosendar porocuaite icuachiasa ité itape rese, iyavei Tūpa reco porañetesa pipe ou. Israelita evocoyase Moisés rova rese nomahe catu eté yuvireco. Esepia, sendí iteanga, yepe sendigüer ogüe mbegüeño oso viña. Ahe Moisés recosendar porocuaite ava upe manosa tēi güeru vahe iporañete ai eté yipindar oico viña. <sup>8</sup> ¡Cūrítei rumo iporañeté catu ité ñehesa Tūpa remimbotar ipiasu vahe resendar Espiritu Santo ombou vahe yandeu! <sup>9</sup> Supi eté yepe iporañete ai eté Moisés porocuaite acoi güeru vahe manosa yandeu viña, ¡co ñehesa ipiasu vahe rumo yande reco moingatu vahe iporañete catu ité ichui! <sup>10</sup> Esepia, co yipindar porañete vahe ndahoyoyai ñehesa cūríteindar porañete catu vahe rese. <sup>11</sup> Acoi mborocuaite yipindar ndipocopiimi vahe virecose Tūpa reco porañetesa, co ñehesa piasu ipocopi vahe rumo iporañete catu itera ichui.

<sup>12</sup> Ore oroyeroya ité co ñehesa ipocopi vahe rese. Sese oroñehe ava upe ore siquiyeēhisa pipe ité. <sup>13</sup> Ore rumo ndahei Moisés nungar oroico. Esepia, ahe oyovapi turucuar pipe omu israelita sui güepiaēhi āgua ndogüe viteise sendigüer ichui aracahe. <sup>14</sup> Ēgüe ehi ahe ndosenducua ucai eté ndoyavii sovapisa vite vahe cūrítei, ēgüe ehi vite oyerouise Moisés porocuaite icuachiapri yipindar vahe pipe yuvireco. Ñomipri vahe nungar tēi chupe ahe senducuaēhi pipe. Esepia, Cristo güeraño ité oicatu sovapisa nungar rerocua ichui senducua uca āgua

chupe. <sup>15</sup> Ēgüe ehi vite cūrítei, senducuaēhi pipe Moisés porocuaíta pipe oyeróqui viteño tēi eté yuvireco inungar sovapisa vite vahe. <sup>16</sup> Supi eté que ava oyevíse yande Yar upe, ahese ramo serocuasa sovapisa nungar ichui senducua tupri āgua. <sup>17</sup> Esepia niha, yande Yar Espíritu secoi. Ahe Espíritu ava rese secoise, ndahe iri mbiguai nungar yuvirecoi. <sup>18</sup> Sese opacatu yande ndahei Moisés oyeovapí vahe nungar yaico Tūpa porañetesa sendiyai vahe repiaēhi āgua. Yande rumo inungar yepiasa yamboyecua ité yande Yar porañetesa sendiyai vahe ava upe yaico. Yaico catuño ité yande Yar Cristo nungar ari yacatu rupi yepi. Esepia, ēgüe yahese, yareco catu-catu iri seco porañetesa yandeyese. Yande Yar rumo acói Espíritu secoi vahe ēgüe ehi yandeu.

**4** Sese, “Ndorequerēhi iri” ndorohei eté. Esepia, Tūpa ore poravo ore paraisuerecosa pipe ore poraviqui āgua co ñehesa rese. <sup>2</sup> Ore rumo oroseyapa opacatu mbahe tēi ore chí aisa, ndoromboyecuai vahe avei ore piha pipe sui; ndoroporombopa-mbopa tēi iyavei Tūpa Ñehengagüer ndorosecuñaro-ñaro tēi. Ore rumo oroñehe tupri mbahe supi tupri vahe rese güeraño. Ēgüe orohe opacatu ava upe Tūpa rovai ‘Supi eté, tehi yuvireco opíha pipe’ ore yapave. <sup>3</sup> Yavaise co ñehesa pīsiosa resendar ore remimombehu renducua āgua, ahe ēgüe ehi ava ocañi tēi vakerā upe. Ahe aviye oyeovapí vite vahe. <sup>4</sup> Esepia, supi eté caruguar rerecuar inungar nombosapiso vahe ahe ava yuvireco, sese ndosenducua ucai chupe ‘toviroya eme ñehesa Poropīsiosar Cristo resendar porañete vahe’ oyapave. Ahe niha Tūpa recocuer mboyecuar secoi. <sup>5</sup> Esepia, oromombehuse ñehesa pēu, ndahei oreyse tēi. Ore rumo, “Jesucristo yande Yar secoi” orohe oroico. Ore evocoyase mbiguai nungar tēi oroico pēu Jesús raisupave.

<sup>6</sup> Esepia, Tūpa aipo ehi aracahe: “Toime tesapesa pītumimbi vahe resape āgua” ehi. Ahe avei osesape uca yande piha pipe ‘ipipe toicua che porañetesa che Rahír Cristo recocuer rese oime vahe yuvireco’ oya.

### Yaicora Cristo rese yande yeroyasa pipe ité

<sup>7</sup> Co tesapesa nungar porañete vahe Tūpa suindar rumo yareco yande retocuer pipe, inungar-ra que mbahe sepírusu vahe yapocatupri ivi mbahemoinda ndipocopii vahe pipe tēi viña. Ipipe toicua opacatu ava yuvireco co pīratasa Tūpa suindar, ndahei oreysuindar tēi. <sup>8</sup> Yepe mbahe-mbahe tēi oime opacatu rupi oreu viña, oimeño ité rumo ore sē āgua ichui. Yepe orepihañemoñeta-ñeta tēi mbahe rese, yande Yar rese ore pihañemoñetasa rumo ndoromocañii eté oreysui. <sup>9</sup> Yepe ore reca-reca catu tēi ore amotarēhimbar yuvireco viña, Tūpa rumo ndore reyai eté; iyavei yepe ore reiti ore recopí āgua yuvireco viña, aní eté rumo. <sup>10</sup> Opacatu ore guatasa rupi rumo orovirecoño ité Jesús mara-mara tēi sereco agüer ore mano āgua oreyse, “Toyecua avei secocuer ore rese” ore hesave. <sup>11</sup> Esepia, ore recove viteseve imboguaipri oroico ore mano āgua Jesús rese. Ēgüe orohe secocuer mboyecua āgua ore retocuer ndipocopii vahe rese. <sup>12</sup> Evocoyase co ñehesa mombehu pipe ore manosa ore ropeña, ipipe sui rumo pesopeña tecovesa apirēhi vahe peico seroyasa pipe.

<sup>13</sup> Icuachiapri aracahendar pipe niha aipo ehi: “Ayeroya ité Tūpa rese, ipipe sui añehe” ehi; ēgüe orohe avei ore, sese oroyeroya ité, ichui oroñehe. <sup>14</sup> Esepia, yaicua niha acói Tūpa yande Yar Jesús ombogüerayevi vahe, yande mbogüerayevi aveira supive. Ipare oyoya guasu

pe reseve oyeipive yande rerecora. <sup>15</sup>Co opacatu mbahe tēi oime vahe oreu, pēu mbahe aviye āgua rese niha ‘tovireco catu Tūpa porovasasa yuvireco; ipipe sui, Aviye ndeu, tehi setá catu ava imboetisave yuvireco chupe’ ore yapave.

<sup>16</sup>Sese orequerēhiño ité mbahe apo oroico pēu. Yepe ore rete ocañi pota tēi viña, ore recocuer rumo Tūpa ombopiasu-asuño ité ari yacatu rupi. <sup>17</sup>Esepia, co mbahe oroiporara vahe co ivi pipe, ahe ēgüe ehi raimi tēi vahe, ipare rumo opañora; ahe ichui rumo oimera mbahe tupri ivate catu vahe oreu ivave apirēhi orovireco va-herā. <sup>18</sup>Sese ore ndorepihañemoñeta atii chira co ivi pipendar mbahe rese; ore rumo orepihañemoñeta mbahe iva pendar ndayasepiai vahe rese. Esepia, co mbahe yasepia vahe, ahe ēgüe ehi raimi tēi vahe; co mbahe rumo ndayasepiai vahe, apirēhi vaheerā ité.

**5** Yaicua niha yande retocuer ndipocopii vahe, inungar oi ndipocopii vahe avei. Sese imocañisase, aviyeño. Esepia, Tūpa opa omoingatu ambuae yande rete ndopai vahe ivave yandeu. Ndahei ahe ava rembiapo tēi. <sup>2</sup>Supi eté yaicove vitesse co yande rete ndipocopii vahe rese, yande poāsese pipe yaipota ité yande rete iva pendar. <sup>3</sup>Aheve yande rete ipiasu vahe yarecose, ahese ndahei chira yande hā nani tupri vahe nungar yuvirecoira. <sup>4</sup>Ēgüe ehi eté yande retocuer pipe vite yaicose, yande poāse yande viharēhisa pipe. Esepia, ndayaipotai yande hā nani tupri vahe nungar seco āgua, yande rumo yaipota yande retocuer ipiasu vahe, ndopai vahe. Evocoyase, “Tocañipa co mbahe ocañi tēi vaheerā yande resendar tecovesa piasu, ndopai vahe rereco āgua” yahe. <sup>5</sup>Tūpa niha yande apo ‘na tehi yuvireco’ oyapave, ombou avei oEspíritu Santo yandeu ‘ipipe toicua opacatu yuvireco che

amondo aveira co opacatu tecocuer ipiasu vahe chupe’ oya.

<sup>6</sup>Sese niha yayeroyaño ité yepi; iyavei yaicuaño yande yaicove vitesse yande rete rese, ndayaico vitei eté ivave yande Yar piri. <sup>7</sup>Esepia, cūrteitai yande Yar rese yeroyasa pipe ité yaguata, ndahei mbahe yande rembiepia pipe. <sup>8</sup>Yande rumo yayeroyaño ité sese, iyavei yaipota ité yande retocuer reya āgua yande Yar piri yande so āgua ivave. <sup>9</sup>Sese yaseca yande Yar mboviha āgua yepi, que yaicove vitesse yande rete rese, anise que yasēse ichui. <sup>10</sup>Esepia, yande opacatu yañe-cuavēhera Cristo rovai iporandusave yaipisi vaheerā ñepeipei mbahe yande rembiapocuer rupi mbahe aviye vahe, anise que mbahe naporai vahe yande rete rese yaico vitesse.

### Ñehesa yande reco moingatusa resendar

<sup>11</sup>Ore niha oroicua yande Yar sui ore siquiye āgua imboyeroyasave. Sese orosāha ava pihañemoñeta rerova Tūpa rese ipihañemoñeta āgua yuvireco. Tūpa niha ore cua tupri, tapeicua avei ru ore recocuer. <sup>12</sup>Ndoronehei pēu ore yemboivate ai āgua tēi. Ore rumo oronehe pēu ‘toviharete catu ore rese yuvireco’ ore yapave. Ipipe sui peicatura ava güembiepia rese tēi oyemboivate ai vahe upe iñehe mboyevi āgua. Esepia, ahe ndahei ava piha pipendar rese oyemboviha yuvireco. <sup>13</sup>Ndayaracuai vahe nungar ore rerecose amove pe pāhu pendar yuvireco. Tūpa upe rumo ēgüe orohe oroico. Yaracua vahe nungar rumo, ore rerecose peye, pēu mbahe aviye āgua rese ēgüe orohe. <sup>14</sup>Cristo poroaisusa, ahe ité ore reroquata catu. Esepia, supi eté ahe omano opacatu ava repirā, ipipe sui yaicua opacatu ava ocañi tēi vaheerā yuvireco viña. <sup>15</sup>Cristo niha omano opacatu yande repirā. Yande yaicove vite vahe evocoyase ndahe iri yandeye-

upe nara tēi yaico; yande rumo yaico chupe nara ité. Esepia, ahe omano, ocuerayevi yande rese. <sup>16</sup>Sese, iya ité oreu ore pihañemoñetaēhi iri āgua que ava rese, ava tēi pihañemoñetasa rupi. Yepe yipindar inungar ava ivi pipendar tēi ēgüe orohe ore Cristo rese ore pihañemoñeta oroico viña, cūrítei rumo ēgüe orohe iri orepihañemoñeta sese. <sup>17</sup>Evocoyase acoi ava Cristo rese ité secói vahe, ahe secocuer ipiasu vahe ité; ndipo iri eté secocuerai yipindar vahe sese. Opacatu ité oyembopiasu iri.

<sup>18</sup>Co mbahe opacatu Tūpa oyapo yandeu, ahe niha Cristo rembiapo sui yande recocuer moingatu oyeupe nara. Ipore oreu avei ombou co ñehesa mombehu āgua ambuae ava upe secocuer moingatu āgua avei. <sup>19</sup>Aipo oyapave aipo ehi: Tūpa ombou Guahir Cristo co ivi pipe ava recocuer moingatu āgua ‘toyeve cheu’ oya; ipipe sui avei ahe ava angaipagüer omocañi yuvireco ichui. Ore evocoyase ore cuai ahe ñehesa ava recocuer moingatusa resendar mombehu āgua ava upe. <sup>20</sup>Ore evocoyase Cristo porocuaíta rupi oroñehhe vahe oroico, inungar Tūpa ité oñehera pēu viña. Sese, “Peyevi Tūpa upe, ahe pe recocuer moingatura oyeupe nara” orohe Cristo rer pipe pēu. <sup>21</sup>Yepe Cristo ndoyapoi eté angaipa, Tūpa rumo vireco uca angaipa viyar nungar yande repirā yande reco ïvi āgua Cristo rupi yande guatase.

**6** Ore pe mboetasa co Tūpa upendar mboraviqui resendar ore recosa pipe: “Peicua catu, pemocañi tēi rene Tūpa porovasasa peipisi vahe” orohe pēu. <sup>2</sup>Esepia, Tūpa aipo ehi icuachiapri aracahendar pipe: “Acoi ari aviye vahe pipe niha che asendu pe yeruresa; iyavei ahe ari poropīsirosa pipe opopītivii” ehi. ¡Ahe ari oyepota cute! iyavei oime ité cūrítei ñepisirosa.

<sup>3</sup>Ore niha ndoromboyecuai ore reco ai ava pāhuve. Esepia, ndoroipotai que ava Tūpa upe ore poraviquisa rese iñehhe rai āgua yuvireco. <sup>4</sup>Ore rumo oromboyecua ité Tūpa rembiguai ore recosa. Esepia, ore reco mbegüesa pipe oroñemosaño mbahe-mbahe tēi upe yepe ipane mbahe oreu viña, iyavei mbahe yavaise; <sup>5</sup>ēgüe orohe avei ore nupa-nupase, ore roquendase avei iyavei omonguerēhise ava rehii ore amotarēhi āgua yuvireco. Oroyapo avei mboraviqui ipirata vahe; amove ndoroquei eté, setá rupi ndoreriepoi tēi avei. <sup>6</sup>Oromboyecua avei ore reco maranehisa, ore mbahecuasa supi eté vahe, ore reco mbegüe tuprisa, yeaisusa orovireco avei no. Ēgüe orohe ité niha Espíritu Santo pīratasa pipe, ore poroaisusa supi eté vahe pipe avei. <sup>7</sup>Ore remimombehu supi eté vahe pipe iyavei Tūpa pīratasa pipe avei oroico. Ore niha ore reco tupri pipe orosecopi mbahe-mbahe tēi. Ipape avei oroyoepe. <sup>8</sup>Amove ava ore mboetei ai, amove rumo oñemoiro yuvireco oreu; amove avei oñehhe tupri ai ore rese yuvireco, ipare rumo iñehhe-ñehhe tēi ore rese yuvireco yepi no. Iyavei amove oporombopa tēi vahe nungar ore rereco yuvireco, yepe oromombehu tēi mbahe supi eté vahe viña. <sup>9</sup>Amove ndicuasai vahe nungar tēi ore rereco yuvireco, icuapri ité tie oroico viña; amove ore yuca seni yuvireco, oroicoveño ité rumo; iyavei amove ore mombaraisusa catu tēi, ndore yucái eté rumo ipape yuvireco. <sup>10</sup>Amove ndoyavii ndorovihi vahe yuvireco chupe, ore rumo orovihaño ité yepi; iyavei yepe ndoyavii iparaisu vahe oroico viña, ore rumo oromondo catuño ité mbahe aviye vahe ava eta upe. Yepe ndoyavii ndorovirecoi eté mbahe viña, opacatuño ité rumo mbahe aviye vahe Tūpa suindar oime oreu.

<sup>11</sup>Che rivireta Corinto pendar, ore ñehesa pipe opacatu mbahe oromboyecua

cua pëu iyavei pe raisu āgua orovireco ore piha pipe tuvichá pe rese. <sup>12</sup>Ndorehāpisii pe rese pe raisu āgua; pe rumo ēgüe ndapevei ore rese. <sup>13</sup>Che niha opovireco che rahir nungar; pembovevi avei catu ore pe raisusa oreu.

### **Tūpa oicove vahe rēta nungar ité yaico**

<sup>14</sup>Ndapeyovaichoi chira ava Tūpa ndoviroyai vahe rese. Esepia, ndoyoyai eté pe pihañemoñetas. Ēgüe ehi eté teco īvisa ndoyoyai teco rai rese inungar tesapesa ndoyoyai pītumimbi vahe rese. <sup>15</sup>Ndahoyoyai eté niha Cristo pihañemoñetas Carugar pihañemoñetas rese yuvireco. ¿Oyoya tie Tūpa reroyasar Tūpa reroyasarēhi rese yuvireco? ¡Aní eté! <sup>16</sup>¿Oyoya tie mbahe rahanga tēi Tūpa rēta rese? Yande niha Tūpa oicove vahe rēta nungar ité yaico. Ahe ité niha aipo ehi icuachiapri pipe aracahe:

“Che aicovera seseve iyavei aguatarā ipāhu rupi yuvireco; che avei aicora iTūpa ité; ahe evocoyase cheundar yuvirecoira” ehi.

<sup>17</sup>Iyavei aipo ehi:

“Sese peyepēpi evocoi nungar ava naporai vahe sui; peyemboyai rene que mbahe naporai vahe rese.

Ahese che opopisira.

<sup>18</sup>Che aicora pe yesupa; pe evocoyase peicora che rahir, che rayri avei aipo ehi yande Yar güeco pīratasa pipe” ehi.

**7** Che rivireta, che rembiaisu, co Tūpa remimombehu imboaviyepirā yandeu. Sese yande yamoingatu tuprira yande recocuer chupe yarecoēhi āgua yande retecuer iyavei yande espíritu mbahe tēi pipe. Iyavei Tūpa mboeteisa pipe yasecara yande reco catupri āgua chupe nara güeraño ité.

### **Corinto pendar ava recocuer recuñarosa resendar**

<sup>2</sup>¡Che pisi peye pe piha pipe! Ndoroyapoi niha mbahe tēi que ava upe, ndoromomarai eté que ava recocuer, ndoroporombopai avei. <sup>3</sup>Ndahei pe recocuer rese che ñehe raisave aipo ahe pëu. Supi eté yipindar, “Che pihave ité opoaisu, pëu nara avei aicove, amano aveira pëu” ahe acoi pëu cuese. <sup>4</sup>Ayeroya ité pe rese, pe rese avei aviharete. Che paraisu pāhuve ayemonguerēhi iyavei ayembovihareteño.

<sup>5</sup>Ore yepotasa suive rumo Macedonia ve, ndopituhui eté mbahe tēi ore sui; oime viteño ité rumo mbahe-mbahe tēi oreu opacatu rupi: oime ore amotarēhimbar iyavei oime ore yepihamondiisa. <sup>6</sup>Tūpa rumo, ava ndoyemonguerēhi vahe, omonguerēhi iri yepi. Ahe ore monguerēhi catu iri Tito yepotase. <sup>7</sup>Ndahei rumo Tito yepotaseño oroviharete, ahe avei oyemboviha guasu pe rese. Ahe aipo ehi oreu pe aipo che repia pota ité peye yepi; omombehu avei che rese pe viharēhi agüer cheu, pemahenduhaño ité aipo che rese pe che raisusave yepi. Aipo nungar renduse ayembovihá catu.

<sup>8</sup>Yepe che ñehe aicuachía vahecuer imondo pëu ndape mbovihal viña, cheu rumo aviyeño cūrítei. Yipindar rumo ayepihamboasi aicuse che ñehe tasí iteanga vahe pëu; chíhi rupi tēi rumo ndapevihal peyeroqui pare sese. <sup>9</sup>Cūrítei che avihareté. Ndahei rumo pe viharēhisa rese ēgüe ahe. Esepia, co pe viharēhisa sui pemboasi pe angaipa Tūpa upe pe yevi āgua, evocoi nungar Tūpa oipota. Evocoyase ore ñehe ndoyapoi mbahe naporai vahe pëu. <sup>10</sup>Esepia, co nungar viharēhisa Tūpa oipota vahe yande angaipa mboasi uca, chupe yande yevi āgua. Ipīpe sui niha yañepisiro yande pihañemoñeta rerovaēhisa pipe.

Co ivi pipendar tēi viharēhisa rumo manosa tēi viresco yandeu. <sup>11</sup>Pe rumo peñemosañō pe viharēhisa upe; ahe aviye Tūpa upe. ¡Pesepia ru co mbahe aviye vahe pe recocuer pipe oime vahe evocoi Tūpa remimbou pe viharēhisa sui cute! Supi eté rumo, peyapisaca iyavei pe querēhisa pipe peyoepi, pemboasi pe piha pipe ité co mbahe tēi oimese pe pāhuve, iyavei peyembosiquiye peico. Ichui che repia pota ité peye, iyavei pequerēhi ité mbahe moingatū āgua. Sese pemboyepēpi ité evocoi mbahe tēi aposar peyestū. Che aicua cute pēu ndahei pe piha rupi co nungar mbahe tēi oimese. <sup>12</sup>Cuese aicuachiasē evocoi che ñehe imondo pēu, ndahei ava mbahe tēi aposar reseño, ndahei avei mbahe tēi oiporara vahe reseño, che rumo aipota catu peicua pe ore raisusa pereco vahe oreu nara Tūpa rovaque. <sup>13</sup>Co rese ore oroyemboviharete.

Iyavei oroviha catu Tito yembovihasa repiasē. Esepia, pe avei niha opacatu pemboviha catu ité pe recocuer pipe. <sup>14</sup>“Co Corinto pendar ava aviye ité” ahe Tito upe pe mombehu cuese. Che ñehe pe resendar aviye ité, ipipe nachi eté. Inungar oromombehu mbahe supi tupri vahe pēu yepi; inungar tupri avei supi eté mbahe oromombehu vahe pe rese yeroyasave Tito upe. <sup>15</sup>Iyavei cūrītei ahe pe raisu catu ité pe rese omahenduhase opacatu pe poreroyasa rese. Iyavei peipisi tupri ité imboeteisave sereco. <sup>16</sup>¡Ayeroya ité pe rese, sese aviha ité!

#### Ava querēhisa porerecosa mondo āgua Jerusalén pendar upe

**8** Che rivireta, cūrītei che amombehu potami pēu mara ehi mbahe tupri apo Tūpa ava viroyasar upe ivi Macedonia rupi. <sup>2</sup>Yepe ahe ava recocuer yavai eté yuvireco chupe secoāhasa pipe viña, ovihareteño rumo ipipe yuvireco; yepe

iparaisu vahe pāve tēi, iporerecoño ité rumo yuvireco. <sup>3</sup>Supi eté oquerēhisa pipe omondo ité ocatugüer rupi; amove oseca iri mbahe güemimbotar rupi yuvireco. <sup>4</sup>Ahe, “Ore avei catu toroipitīvii ambuae Tūpa roroyasar” ehi yuvireco. <sup>5</sup>Ahe rumo oñocua iri ore pihañemoñetasā yuvireco. Yande Yar upe rane oymonondo. Ipare Tūpa remimbotar rupi ēgüe ehi avei oreu yuvireco. <sup>6</sup>Evo-coiyase ore aipo orohe Tito upe pēu: “Tomboyeapi iri co porerecosa monuha āgua ava upe” orohe. Esepia, yipindar ahe osose pe pāhuve, ahe pe pītīvii imboipi āgua. <sup>7</sup>Aicua peyapo tupri ité opacatu co ambuae mbahe: peyeroya tupri ité yande Yar rese, pemombehu tupri ai Tūpa ñehesa, pereco ité Tūpa suindar mbahecuasa, pequerēhi ité Tūpa upe mbahe apo āgua iyavei ore raisu ité peye. Evocoiyase ēgüe peye aveira co nungar poroaisusa apo.

<sup>8</sup>Ndahei pe cuaisa pipe aipo ahe pēu, che rumo ‘toicua ambuae ava rembiapo oquerēhisa pipe oyapo vahe yuvireco’ che yapave. Sese niha peicuara, supi eté vahe piha pe poroaisusa. <sup>9</sup>Peicua niha pe yande Yar Jesucristo poroaisusa. Yepe ahe mbahe yar secoi viña, opa rumo oseya ombahe pe recocuer rese; iparaisu pipe sui niha pe i va pendar mbahe pereco.

<sup>10</sup>Pēu mbahe aviye āgua che añehe co nungar mbahe rese. Cuese ambuae araviter pe niha yipindar pemboipi co mbahe apo. Ahe niha pe querēhisa pipe peyapo. <sup>11</sup>Cūrītei pemboaviye catu pe porerecosa pe querēhisa yipindar pe reco vahe pipe; pemondoñora mbahe pe-icatugüer rupi. <sup>12</sup>Esepia, acoi que ava omondo pota vahe mbahe, Tūpa oipisi ahe iporerecosa que mbahe virescomi vahe; ahe rumo ndoporandui mbahe ndayarecoi vahe rese yandeu.

<sup>13</sup>“Toyemombaraisu ava pītiviisa pipe yuvireco” ndahei rumo pēu.

<sup>14</sup> Cūrītei mbahe pe rembiereco eta pipe peipītīvīi catu ambuae ava ipane vahe mbahe yuvireco chupe. Virecomise mbahe, ahe avei pe pītīvīira yuvireco pēu mbahe ipanese. Evocoiyase pe recocuer oyoya tupri itera. <sup>15</sup> Inungar Tūpa ñehe mombehusar aipo ehi icuachiapri pipe aracahe: “Acoi omonuha ati vahe mbahe, ndasumbirei eté mbahe chupe; iyavei acoi moviromi tēi mbahe omonuha vahe, nipanei mbahe chupe” ehi.

**Pablo omondo Tito  
indugüer reseve Corinto ve**

<sup>16</sup> Aviye Tūpa upe ombopihañemoñeta Tito pe rese inungar che pihañemoñeta pe rese yepi. <sup>17</sup> Ahe viroya ité che ñehe. Güemimbotar rupi eté rumo iquerēhi oso āgua pe repia.

<sup>18</sup> Supi oromondo yande rivri, ahe opacatu ambuae Jesús reroyasar oicua iporaviqui tupri aise ñehesa pīsīrosa rese yuvireco. <sup>19</sup> Sese opacatu oiporavo yuvireco ore rupi iguata āgua ore pītīvīi vaheṛā avei co porerecosa reraso āgua. Ore ēgüe orohe oroico yande Yar mboetei āgua rese ‘toicua ore querēhisa pipe ité oroporopītīvīi yuvireco’ ore yapave. <sup>20</sup> Ore ndoroiopotai que ava oñehe tēira ore rese yuvireco co porerecosa monuhasa pipe sui. <sup>21</sup> Esepia, ore oroyapo pota mbahe aviye vahe, ndahei Tūpa rovaque güeraño, opacatu ava rembiepiave avei.

<sup>22</sup> Supi avei oromondo ambuae yande rivri. Ahe omboyecua ité oreu oquerēhisa opacatu mbahe güembiapo pipe. Ahe cūrītei iquerēhi catu ité. Esepia, oyeroya ité pe rese. <sup>23</sup> Acoi oporanduse que ava Tito rese yuvireco pēu, “Ahe oyoya Pablo rese oporaviqui vahe pe pītīvīi āgua” peyeñora. Acoi oporanduse avei ambuae yande rivri rese yuvireco pēu, “Ahe ambuae Jesús reroyasareta remimbou Cristo

mboeteisar yuvirecoi” peyeño aveira chupe. <sup>24</sup> Sese, pe recocuer cua āgua, pemboyecua catu pe poroaisusa supi eté vahe chupe yuvireco. Evocoiyase toviroya ité che ayeroyase iyavei ayembovihase pe recocuer rese yuvireco.

**Porerecosa imonuhapri  
Jesús reroyasar upe**

**9** Porerecosa imonuhapri Jesús reroyasar upe nara rese rumo nañehe iri pēu. <sup>2</sup> Esepia, che aicua pequerēhi ité ipītīvīi āgua. Evocoiyase che viharetesa pipe Macedonia iguar Jesús reroyasar upe aipo ahe yepi: “Acaya iguar, ahe oyemoingatu voi eté ambuae Jesús reroyasareta pītīvīi āgua cuese ambuae araviter suive yuvireco” ahe yuvireco chupe. Evocoiyase pequerēhise ité ipītīvīi āgua, ahese setaño ité oyemonguerēhi yuvireco. <sup>3</sup> Che rumo amondo co yande rivri yuvireco pēu cūrītei ‘ēgüe tehi tēi eme che ñehesa aviye vahe sesendar yuvireco’ viya pēu. Pe yemoingatu tupri āgua ité aipo ahe pēu; <sup>4</sup> aní acoi arasose Macedonia pendar cheyeupi, sembiepiave ndapeyemoingatu vitei chira peico. Ēgüe peyese ore mochi guasu uca tiētera peye. Esepia, che ayeroya ité pe rese. Pe avei evocoiyase pechīra. <sup>5</sup> Sese che pihañemoñeta yipindar añehe co mbosapi yande rivri upe yuvireco, ahe ranei ore renonde yuvirasos āgua pe piri pe pītīvīi āgua co porerecosa aviye vahe monuha āgua rese, acoi cuese pe remimombehugüer rupi. Evocoiyase ahe pe porerecosa pe remimonuha opara pemoingatu tupri ité pe avagüer mboyecua āgua, ndahei chira rumo pe recatēhisa pipe.

<sup>6</sup> Peyemomahenduha co rese: acoi noñoti atīimi vahe mbahe, chupe moviromi tēi avei iha; acoi oñoti ati vahe rumo mbahe, ahe setá



catu avei iha chupe. <sup>7</sup>Ñepei-pei iya opihãñemoñetasa rupi omondora oporerecosa Tüpa upe yuvireco, ndahei chira opiha vîracuasa pipe tõi iyavei ndahei chiaveira ambuae ava ocuai pîratasa pipe tõi. Esepia, Tüpa osaisu ava oviharetasa pipe omondo vahe oporerecosa chupe. <sup>8</sup>Tüpa niha oicatu opacatu mbahe aviye vahe mondo ägua pëu ari yacatu rupi pereco vaheerã opacatu mbahe ipane vahe pëu iyavei sumbirer pipe opacatu ambuae mbahe aviye vahe rese pe poropîtivii ägua.

<sup>9</sup>Inungar icuachiapri pipe aipo ehi:

“Ahe iporereco ai iparaisu vahe rese yepi. Ahe mbahe aviye vahe sembiapo nocañii chietera” ehi.

<sup>10</sup>Tüpa niha ombou mbahe rãhii ava remitãra, mbahe semihura avei. Sese ombou catura mbahe pëu iyavei ombouvicha catura pe rembiapo aviye vahe ava pîtivii ägua. <sup>11</sup>Tüpa ombou catura opacatu mbahe pe rembierecorã ava upe imondo catu ägua pe avasa pipe. Ore orovirasose porerecosa pe remimbou yande rivireta upe, ahe evocoyase, “Aviye ndeu” ehira Tüpa upe yuvireco. <sup>12</sup>Esepia, co pemondo vahe yande rivireta pîtivii ägua, ndahei peipîtivii mbahe ipane vahe rese güerãño, ichui avei niha, “Aviye Tüpa upe” ehira yuvireco. <sup>13</sup>Ahe evocoyase omboeteira Tüpa yuvireco. Esepia, co pe poropîtiviisa pipe pemboyecua itera pe Cristo ñehe reroyasa peico. Ahe avei omboeteira Tüpa yuvireco. Esepia, pe pemondoño itera mbahe pe porerecosa chupe iyavei opacatu ambuae ava upe. <sup>14</sup>Evocoyase ahe oyoerquirã pe rese iyavei pe raisu etepriã yuvireco. Esepia, Tüpa pe pîtivii eté oporovasasa pipe. <sup>15</sup>¡Aviye Tüpa upe! ¡Esepia, ahe ombou mbahe tuvichã vahe aviye catu vahe yandeu, ndayaicatui vahe mombehu tupri ägua!

### Pablo cuaita apóstol seco ägua

**10** Che Pablo añehe Cristo poroaisusa, seco asiëhisa pipe avei pëu. Amove ava pe pãhu pendar, “Seco mbegüemi tõi yande pãhuve oicose, amombri güecose rumo oñehe pîratã iteanga” aipo ehi tõi yuvireco cheu viña. <sup>2</sup>Che rumo asose pe repia, ndaipotai che pîratasa mboyecua ägua pe pãhu pendar upe. Amove rumo ava pe pãhu pendar ipihañemoñeta: “Oyapo mbahe co ivi pipendar pihãñemoñetasa rupi tõi” ehi yuvireco cheu. Sese che ayemoingatuño ité evocoi nungar ava upe añehe pîrata vaheerã. <sup>3</sup>Supi eté, yepe co ivi pipe oroicove viña, ore rumo ndoroyapoi mbahe ava co ivi pipendar rembiapo nungar. <sup>4</sup>Esepia, ore yoepisa ndahei ava co ivi pipendar yoepisa nungar; orovireco rumo Tüpa pîratasa mbahe tõi seco pîrata vahe recopi ägua ava aracuasa tõi recopi ägua avei. <sup>5</sup>Ahe ipipe ore opa orosecopi yepoepi-episa iyavei opacatu semira-mira tõi vahe güeco ivate aisa pipe ndoicua uca potai vahe Tüpa recocuer ava upe. Iyavei opacatu ava pihãñemoñeta raisa orosecopi Cristo reroya tupri ägua yuvireco. <sup>6</sup>Iyavei ore oroyemoingatu ité opacatu ndiporeroyai vahe recocuer reroyi ägua. Pe rane rumo peroya tupriã.

<sup>7</sup>Pe rumo pemaheño tõi ahe ava recocuer rese. Acoi ava pe pãhu pendar oicua vahe Cristo rese güecosa, toicua tupri avei ore Cristo rese ore recosa yuvireco. <sup>8</sup>Yepe ayecomboivate che mborerecuasa rese pëu viña, ipipe rumo nachi eté. Esepia, yande Yar ombou mborerecuasa cheu pe recocuer moviracua tupri ägua, ndahei rumo pe recocuer momara ägua. <sup>9</sup>Aní chira, “Pablo yande mboisiquiye pota güembicuachia pipe” peye cheu. <sup>10</sup>Esepia, amove ava pe pãhu pendar, “Oñehe oicuaachia vahe ombou yandeu, ahe

ipīratá, yavai avei yandeu; ahe ité rumo aní angai vahe seci yande pāhuve iyavei iñehe ěgüe ehi tēi vahe” ehi yuvireco cheu. <sup>11</sup>Toicua catu ru yuvireco: eipeve oroso irise, inungar amombehu che rembicuachía pipe amombri che re-cose, ěgüe ahe tupri aveira yapo pe pāhuve.

<sup>12</sup>Ndoromboyoyai eté ore recocuer ava oyese tēi oñehe vahe recocuer rese. Esepia, omboyoyase oyese, ndoyapisacai eté yuvireco. <sup>13</sup>Ore rumo ore remimombehu pipe ndoroyapirasai chietera ore cuaita ore yeecomboivatesa pipe. Tūpa rumo güemimbotar rupi ombou ore poraviqui āgua oreu, eipeve pe rese ore poraviqui āgua avei. <sup>14</sup>Ore rumo ndoroyapirasai ore cuaita mombehusa icuachía pēu. Esepia, supi eté ore ranei eté oroico pe pāhuve, ore ranei avei oroviraso Cristo resendar ñehesa imombehu pēu. <sup>15</sup>Ndoroyapirasai avei ore ñehe pipe ambuae ava poraviquisa sui tēi. Ore rumo, orosāro ore oroparaviqui catu vaheṛā pe pāhuve Tūpa rese pe yeroyasa rupi. Ndoroyapirasai avei rumo ore cuaita. <sup>16</sup>Iyavei orosāro ñehesa pīsirosa resendar mombehu ava amombri catu yuvirecoi vahe upe. Ndaheṛi chira rumo ambuae ava poraviqui agüer rese tēi oroyecomboivate oroico.

<sup>17</sup>Acoi ava oyecomboivate pota vahe, toyecomboivate catu yande Yar rese. <sup>18</sup>Esepia, acoi ava “che aico tupri” ehi vahe ndaheṛi ahe osē tupri güecoãhasa sui yande Yar rovaque; “Aviye ité co mbia” ehise rumo yande Yar chupe, ahe osē tupri güecoãhasa sui.

### Pablo iyavei apóstol angahu tēi yuvirecoi vahe

**11** ¡Peñemosa iriñomi tēira cheu co che ñehe ndayaracuai vahe nungar pipe che ñehese! <sup>2</sup>Esepia, che cherecatēhi ité pe rese, ahe tecatēhisa ou

cheu Tūpa sui. Che aipota Cristo upe opomondo vaheṛā pe reco maranehisa pipe, inungar cuñatai ndaseco marai vahe imondopri cuimbahe upe imenda āgua. <sup>3</sup>Che rumo asiquiye co mbahe sui, inungar mboi ombopa Eva oporombopasa pipe, aviyeteramo Carugar pe mbopa aveira pe pihañemoñetasa rovera āgua Cristo mboeteisa supi eté vahe sui. <sup>4</sup>Esepia, peñemosaño ava oñehe vahe pēu ambuae Jesús rese ndoyoyai vahe ore remimombehu rese. Ichui peipisi pe querēhisa pipe ambuae espíritu peipisi vahecuer sui. Iyavei ambuae ñehesa pīsirosa resendar peipisi avei ndoyoyai vahe ore pēu oromombehu vahe rese. <sup>5</sup>Che rumo namohai eté ivi coti catu tēi aicora evocoi supi peguata vahe apóstol yemboivate ai tēi vahe sui. <sup>6</sup>Yepe ndayemboheṛi che ñehe tupri āgua ité, che rumo areco che mbahecuaṛa, ahe oromboyecuaño ité opacatu ore rembiapo pipe pe rembiepiave.

<sup>7</sup>Ndamombehui eté niha ñehesa pīsirosa resendar pe cheu imboepi āgua; pe recocuer mboivate catu āgua rumo Tūpa rovaque ěgüe ahe che reco yemominisa pipe. ¿Mbahe tēi pīha ayapo ěgüe ahese pēu? <sup>8</sup>Aipisi ambuae ava Jesús reroyasar sui guarepochi, pe recocuer rese che poraviqui āgua. <sup>9</sup>Iyavei acoi aicose pe pāhuve, ipane avei mbahe cheu. Ndogomañecoṛi eté rumo; yande rivri ivi Macedonia pendar yugüeru vahe ombou mbahe ipane vahe yuvireco cheu. ěgüe ahe che pepoṛisupave pe mañecoēhi vichico. Ndogomañecoṛi chietera niha mbahe ipanese cheu. <sup>10</sup>Supi eté aicua supi tupri vahe mbahe Cristo suindar. Evocoyase supi eté avei che aicua ndipoi chietera que ava ivi Acaya rupi virocuva vaheṛā co che viharetesa che sui yuvireco. <sup>11</sup>¿Mbahe rese pīha aipo ahe pēu? ¿Pe raisuēhisaṛe pīha? ¡Tūpa rumo oicua che pe raisusa!

<sup>12</sup> Ayapoño itera rumo co mboraviqui cheu imboepiēhisa pipe vichico co ambuae pe pāhu pendar ava pe mbopaēhi āgua yuvireco. Esepia, che nungar yuvirecoi pota tēi viña. <sup>13</sup> Ahe rumo ndahei apóstol supi tupri vahe yuvirecoi, ahe oporombopa tēi, “Ore apóstol oroico” ehi tupri tēi yuvireco. <sup>14</sup> Yaicua niha Carugar rerecar oporombopa. Esepia, oyeapo inungar Tūpa rembiguai amove. <sup>15</sup> Sese yaicua avei Carugar povri pendar oporombopasa pipe oyeapo inungar Tūpa ñehe mombehusar yuvireco. ¡Ahe chupe rumo oimera Tūpa ñemoirosa mbahe sembiapocuer rupi curi!

### **Pablo oiporara mbahe-mbahe tēi apóstol güecosa pipe**

<sup>16</sup> Aipo ahe iri pēu: tipo eme ava “ndayaracuai” ehi vahe cheu. Acoi, “Ēgüe ehi oico” peyese cheu, tañeheño ayase ndayaracuai vahe nungar, che avei evocoyase tayeecomboivateño vichico. <sup>17</sup> Ndahei rumo yande Yar che cuaisa pipe aipo ahe, che aracuaēhisa nungar pipe rumo aipo ahe che yemboivate aisa pipe. <sup>18</sup> Esepia niha, setá iteanga ava ahe ae tēi oyemboivate ai güecocuer aviye angahu vahe tēi pipe. Sese che avei ayemboivatera. <sup>19</sup> Esepia, yepe pe imbahecua vai vahe nungar peico, pemboyoyá catu pe querēhisa pipe ava ndayaracuai vahe. <sup>20</sup> Pe niha pemboyoyañ acoi que mbiguai tēi nungar pe rereco vahe, que mbahe pe rembiereco sui tēi oicove vahe, que pe mbopa tēisar, pe roeroirosar, que pe rova pete-petesar avei. <sup>21</sup> Che chīsa pipe aipo ahe co imombehu, jore reco mbegüe etepri evocoi nungar apo āgua pēu!

Acoi oñehese ambuae ava oyeupendar mbahe rese oyemboivate aisa pipe, che avei evocoyase ēgüe ahera. Aipo aheso rumo aviye ndayaracuai vahe nungar aico. <sup>22</sup> Ahe, “Che hebreo aico” ehise yuvireco, che avei ahe aico; “Che is-

raelita aico” ehise, che avei ahe aico; “Che Abraham suindar aico” ehise yuvireco, che avei ahe ichuindar aico. <sup>23</sup> “Che Cristo rembiguai aico” ehi yuvireco, che rumo sembiguai catu aico ichui yuvireco, aipo añehese aviye che ndayaracuai vahe aico. Aporaviqui catu rumo ichui yuvireco, setá catu soquendapri tēi aico yuvireco ichui, inupambri catu aico ichui yuvireco, setá rupi avei seni-seni che yuca uca che mombaraisusa pipe yuvireco. <sup>24</sup> Cinco yupagüer judío che nupá iteanga treinta y nueve tupri tucumbo pipe yuvireco. <sup>25</sup> Mbosapi yupagüer che nupasa ivira pipe, ñepe rupi evocoyase che api-apisa ita pipe. Mbosapi yupagüer avei oñeapivii iar ipive che guatasa rupi cheu, ñepe pītu, ñepe ari avei avevui tēi para guasu aviter rupi vichico. <sup>26</sup> Setá aguata opacatu rupi, iyavei iai rupi mbahe-mbahe tēi oime cheu, aico avei imonda rai vahe pāhuvē; che mu judío mbahe tēi vahe pāhuvē avei aico iyavei ndahei vahe che mu pāhuvē no. Aico avei tecua guasu pipe mbahe tēisave, amombri vahesa rupi iyavei para guasu pipe, iyavei mbahe-mbahe tēisave Jesús reroyasar angahu tēi pāhuvē aico. <sup>27</sup> Aporaviqui ité iyavei ayapo mbahe cheu yavai vahe; iyavei setá yupagüer ndaquei eté; aiporara avei tieporēhi iyavei husei; setá rupi ndacarui; söhisagüer avei aiporara, ndacheturucuai avei vichico.

<sup>28</sup> Ndahei co opacatu mbahe güeraño aiporara, ari yacatu rupi che mahenduhaño ité avei opacatu tecua rupindar Jesús reroyasar rese. <sup>29</sup> Oimese que oiporara vahe mbaherasicuer, che avei ayandu co mbaherasisa. Acoi que oimese oyavi uca vahe mbahe, che moñemoiro uca. <sup>30</sup> Iyase che yeecomboivate ai āgua cheu, co mbahe omboyecua vahe che pīrataēhisa rese ayecomboivate aiño itera. <sup>31</sup> Yande Yar Jesucristo Ru Tūpa, ahe imboetepri apirēhi secoi

vahe, ahe oicua aipo che hesa supi tupri vahe. <sup>32</sup>Tecua Damasco ve aicose, mborerecuar guasu Aretas povri pendar mborerecuar oyocuai osundao co tecua roquendipive che rese osareco va-herã che roquenda água yuvireco viña; <sup>33</sup>oime rumo ava iruova guasu pipe che mogüeyi vahe tecua açhisa metana rupi yuvireco. Ëgüe ahe añemi ichui yuvireco.

### **Tüpa omboyecua Pablo upe mbahe queraisa nungar pipe**

**12** Ndipoi eté que ava mbahe oipisi vahe ahe ae tēi oyemboeteisa pipe. Che rumo amombehuño itera mbahe asepia vahe che quer nungar pipe iyavei yande Yar remimboyecua che aipisi vahe ichui. <sup>2</sup>Che aicua mbia Cristo reroyasar, omomba cūrítei catorce araviter ahe imbosapisa ivave seraso agüer. Ndicuasai güetecuer rese tie revo oso, anise ihã güeraño tie revo. Tüpa rumo oicua. <sup>3-4</sup>Che rumo, “Ëgüe ehi tie revo oico” ahe aipo mbia upe, Tüpa güeraño oicua. Serasopri ivave teco orisave. Aheve osendu ñehesa ndicuasai vahe. Ahe niha que ava tēi upe ndipotasai imombehu água yuvireco. <sup>5</sup>Evo-coi nungar mbia rese ayecomboivat-era; cheyese ité rumo ndayecomboivate ai chira. Che recocuer nipiratai vahe reseño ëgüe ahera vichico. <sup>6</sup>Yepe che añehe tupri aira cheyese viña, che revo ndahei chira ndayaracuai vahe nungar aico. Esepia, mbahe supi eté vahe amombehura viña. Ahe rumo ndayapoi. Esepia, ‘tipihañemoñeta catu che rembiapo rese, che remimombebugüer rese avei yuvireco che querve nungar mbahe mombehu rãgüer sui’ viya. <sup>7</sup>Sese che yemboivate aiēhi água che quer nungar mbahe che pihamondii vahe rembiepi-agüer rese Tüpa ombou teco asisa cheu. Ahe aviye yu che cutu guasu vahe, ndoyavii avei Carugar mara-mara tēi che

rereco vahe. <sup>8</sup>Mbosapi yupagüer yande Yar upe aporandu ité teco asisa che sui serocua água rese viña. <sup>9</sup>Ahe rumo aipo ehi cheu: “Che porovasasa ndeu ambou vahe iyara nde ñemosa água. Esepia, che pīratasa oyecua catu ité ava nipiratai vahe recocuer rese” ehi. Evocoiyase che ayemboviha catuño itera che reco nipi-ratai vahe rese. Ëgüe ehira Jesucristo pīratasa oyecua che rese. <sup>10</sup>Sese Cristo rese che recosa pipe aviyeño ité ndache pīratase, que ambuae ava oñehe raise che rese, que mbahe ipanese cheu, ambuae che reca-reca tēise che reco m-mara água yuvireco iyavei que mbahe yavai vahe aiporarase Cristo sui. Esepia, ayanduse che pīrataēhisa, aheshe che pīrata catu.

### **Pablo ipihañemoñeta ité Jesús reroyasareta Corinto pendar rese**

<sup>11</sup>Che ndayaracuai vahe nungar aico pēu, pe rese tēi rumo ëgüe ahe. Iya rumo peñehe tuprira che rese viña. Esepia, yepe ndahei seco ivate vahe aico viña, co apóstol angahu tēi rumo pe supi peguata vahe ndahei ivate catu vahe che sui yuvireco. <sup>12</sup>Che ñemosa tupri pipe mboraviqui ayapo pe pāhuve. Ayapo mbahe poromondiisa mbahe pesepia yesapiha rai vahe imboyecua água che supi eté vahe apóstol che recosa. <sup>13</sup>Co mbahe reseño pe ivi coti catu peico ambuae Jesús reroyasareta sui, che ndopomañe-coise mbahe cheu pembou vahe rã rese. ¿Ayavi tie che cuaita, ëgüe aheshe pēu? ¡Peñero sese cheu!

<sup>14</sup>Cūrítei che ayemoingatu imombosapisa rupi che so água pe piri. Iyavei ndopomañecoi chira mbahe rese. Esepia, ndasecai mbahe pe rembiereco; pe recocuer ité rumo aipota. Esepia, iyepi omonuha guarepochi guahir upe, ndahei tahir tēi ëgüe ehi oyesupa upe yepi. <sup>15</sup>Evocoiyase che querēhisa pipe amondora opacatu che mbahe areco vahe pe

p̄tívii āgua iyavei opacatu che recocuer rese ayemondo p̄u pe reco tupri āgua. Che rumo opoaisu ité, pe tie revo ndache raisu tuprii eté peye.

<sup>16</sup>Cheu mbahe ipanese, ndaporandui eté mbahe pereco vahe rese p̄u. Amove rumo ava, “Yande mbopa āgua t̄i ēḡiē ehi Pablo yandeu” ehi t̄i yuvireco. <sup>17</sup>¿Opombopa uca tie ava p̄u che remimondo pipe? <sup>18</sup>Che Tito upe, “Eresora ipiri yuvireco” ahe. Supi avei ambuae yande rivri Tūpa reroyas amondo. ¿Pembopa tie Tito? Oyoya tupri mbahe oroyapo Tūpa upe ñepei ore pihanemoñetasa pipe.

<sup>19</sup>Che rivireta, che rembiaisu, pe revo pepihanemoñeta ore oroicuachía co p̄u, ore yoepi āgua t̄i. Ēḡiē ndorohei eté rumo. Ore rumo Cristo rese ore reco pipe oroñehe Tūpa rovaque. Opacatu ité niha mbahe oroyapo pe recocuer moviracua catu āgua. <sup>20</sup>Che asiquiye asose eipeve pe repia, aviyeteramo ndahei chira che piha rupi pe recocuer. Iyavei pe aviyeteramo ēḡiē peye aveira che repiase. Che asiquiye ité, oime revo pe p̄ahuve yepoepi-episa, pe pihanemoñeta raisa ava mbahe pota raisa pipe, pe ñemoirosa peyeupe. Iyavei aviyeteramo oimera pe p̄ahuve ava oyeupeño t̄i mbahe oipota vahe, imahechiroi ai vahe iyavei oñehe-ñehe t̄i vahe ambuae ava rese, seco ivate ai vahe iyavei ndiporoviroyai vahe. <sup>21</sup>Asiquiye avei aso irise pe repia, omboura Tūpa pe sui che chí āgua, che mboyaseho uca tiētera peye setá pe cueseve peyemboangaipa vahe rese iyavei ndapemboasii etese mbahe t̄i, yemboaguasaguasa t̄eisa iyavei que mbahe pe remimbotarai peyapo vahecuer.

**Poromboaracua  
iyavei mahenduhasa**

**13** Co niha imombosapisa yupagüer asora pe repia. Pemombehu

potase que ava rembiapo ai cheu, toime que ñuvirío, anise mbosapi oicua vahe sembiapo ai. <sup>2</sup>Co yipindar oyemboangaipa vahe upe opa aipo ahe: “Peicua catu” ahe che imoñuvirío yupagüesa pipe aicose pe piri. Cūrítei amombri aico pe sui, amombehu irira rumo co p̄u. Co yipindar vahe upe iyavei opacatu ambuae angaipa pipe yuvirecoi vahe upe aipo ahe: aso irise pe p̄ahuve, ndopoparaisuereco iri chira. <sup>3</sup>Esepia, pe peipota ité che recoāha āgua ‘¿Cristo ité piha omoñehe uca?’ pe yapave cheu. Cristo ndaseco mbegüemi p̄u mbahe apo oico. Ahe rumo omboyecua opiratasa p̄u. <sup>4</sup>Supi eté niha ahe yaticasa, inungar ava nipiratai vahe. Cūrítei rumo ahe oicove Tūpa p̄iratasa pipe. Ēḡiē orohe avei ore seco p̄irataēhisa sereco. Oroicose rumo sese oroico Tūpa p̄iratasa pipe pe rese hañeco āgua.

<sup>5</sup>Pemahecua tupri catu pe recocuer rese: ¿peico ité piha pe Cristo rese yeroyasa pipe? ¿Ndapeicuai vo Jesucristo sec-oise pe rese, pesése pe recoāhasa sui? <sup>6</sup>Pe revo peicuara ore ndoroañi t̄i vahe oroico ore recoāhasa pipe. <sup>7</sup>Iyavei oroyerure pe rese Tūpa upe ‘toyapo eme mbahe t̄i yuvireco’ ore hesave. Ndahei rumo ore ivate catu vahe mbahe t̄i rasa pare mboyecuasave ēḡiē orohe; co catu ‘toyapo mbahe aviye vahe yuvireco’ ore yapave, yepe p̄u ndoyavii oroañi t̄i vahe oroico viña. <sup>8</sup>Esepia, ndiyai mbahe supi tupri vahe amotarēhi āgua oreu; ēḡiē ehi rumo sese catu ité oroñehe. <sup>9</sup>Sese orovihaño ité norep̄irataise, ore rumo oroipota ité pe momirata; iyavei ore oroyerure catuño itera pe recocuer catupri catu āgua rese. <sup>10</sup>Aicuachía co che ñehe imondo p̄u pe piri che so āgua renonde. Acoi asose, namboyecua p̄iratai chira che mborerecuasa eipeve. Ahe niha yande Yar ombou vahe cheu

pe reco momirata catu āgua, ndahei pe reco momara āgua.

<sup>11</sup>Imomba āgua, che rivireta, aipota peviharetera peico. Peseca avei pe reco tupri catu āgua peyeupe, peyemonguerēhi catu, oyoya guasu peico tupri avei peyese mbahe tupri pipe. Evocoyase Tūpa oporoaisusa pipe, güeco tuprisa pipe avei secoira pe

rese. <sup>12</sup>Pemombehu che mahenduhasa ñepei-peipeyeupe pe yeovaupitesa pipe.

<sup>13</sup>Opacatu ambuae yande rivri, Tūpa reroyasar avei omondo omahenduhasa yuvireco pēu.

<sup>14</sup>Peipisi yande Yar Jesucristo porovasasa, Tūpa poroaisusa iyavei Espiritu Santo tasecoi opacatu pe rese. Aipo rupive che ñehe pēu.

*PABLO REMBICUACHIA  
GALACIA PENDAR UPE*

**GALATAS**

**Pablo mahenduhasa Jesús  
reroyasar Galacia pendar upe**

**1** Che, Pablo, imondopri aico apóstol che reco āgua. Ndahei ava tēi sui ayu pēu iyavei ndahei ava tēi che cuai; Jesucristo ité niha che cuai iyavei yande Ru Tūpa che mbou acoi ombogüerayevi vahecuer Guahir. <sup>2</sup>Che, Pablo, iyavei opacatu Jesús reroyasar yuvirecoi vahe cohava oroicuachía co ore ñehhe pēu, pe opacatu Jesús reroyasar Galacia pipe peico vahe. <sup>3</sup>Tapeipisi yande Ru Tūpa, yande Yar Jesucristo porovasasa pe reco tupri āgua. <sup>4</sup>Ahe acoi oyemondo vahe omano āgua yande angaipá repirã. Ēgüe ehi cūrítei yande renose co ivi pipe mbahe-mbahe tēi sui yande Ru Tūpa remimbotar rupi. <sup>5</sup>Imboeteipri apirēhi Tu tasecoi!

**Ndipoi ambuae ñehesa  
poropīsirosa resendar**

<sup>6</sup>Che pīhamondii etepri peye. Esepia, peyepēpi poyava peico Tūpa sui. Ahe niha pe renoi Guahir Jesucristo pe rai-susa pipe sui. Pe rumo, peroya pota ambuae tēi yembohesa pe ñepisiro āgua peico viña. <sup>7</sup>Supi eté ndipoi ambuae ñehesa pīsirosa resendar. Ēgüe ehi rumo, oime ava pe mañeco tēi vahe pe mbopa āgua ñehesa supi tupri vahe sui yuvireco. Iyavei virova pota co ñehesa Jesucristo resendar yuvireco. <sup>8</sup>Oimese rumo que ambuae ava oñehhe vahe poropīsirosa angahu tēi rese ndoyoyai vahe che ñehesa rese pesendu vahe yipisui-ve, evocoi nungar ava upe “Toime Tūpa ñemoirosa” ahe yepe chera viña, anise que Tūpa rembiguai iva pendar

avei no. <sup>9</sup>Amboyupagüe iri, “Evocoi nungar ava upe toime ité Tūpa ñemoirosa” ahe.

<sup>10</sup>Aipo che he pipe, ndasecai ava tēi, “Co mbia aviye vahe” he āgua cheu, Tūpa rumo aseca cheu aipo he āgua. Esepia, java remimbotar rupi tēi mbahe ayapo vitesse, evocoiyase ndahei chietera Cristo rembiguai aico viña!

**Mara ehi Pablo apóstol güeco āgua**

<sup>11</sup>Che rivireta, tapeicua co ñehesa poropīsirosa resendar amombehu vahe ava upe ndahei ava tēi pīhañemoñetas. <sup>12</sup>Ndahei avei ava tēi che mbohe; Jesucristo ité niha oicua uca cheu.

<sup>13</sup>Pe niha pesendu yipindar che recocuer resendar, che mu judío yembohesa rupi aguata vitesse aracaco. Che pīratasa pipe tēi aseca opacatu Tūpa rembiporavo Jesús reroyasar momara āgua. <sup>14</sup>Ēgüe ahe che ayemboivate ai catu che mboetasata eta sui judío yembohesa pipe. Ayapó catu opacatu che recocuer pipe yipindar che ramoi eta yembohe agüer rupi eté vichico. <sup>15</sup>Tūpa rumo yipive che ha viteēhiseve che poravo oyeupe nara. Iyavei oporoaisusa pipe che renoi güemimbotar rupi. <sup>16</sup>Ēgüe ehi ahe oicua uca Guahir cheu, che imombehu āgua co ñehesa Tahir recocuer resendar ava ndahei vahe judío upe. Ndasoi rumo ava tēi upe icua āgua; <sup>17</sup>ndasoi avei Jerusalén ve yipive apóstol yuvirecoi vahe repia āgua. Che rumo aso voi eté ivi Arabia ve. Coiyé ayevi tecua Damasco ve vitu.

<sup>18</sup>Ichui mbosapi araviter che seroya pare, aso tecua guasu Jerusalén ve cute. Ahese ramo Pedro ambori quince ari rupi güerañomi tēi. <sup>19</sup>Ndasepiai eté rumo ambuae apóstol. Yande Yar riviri Santiago güeraño asepia. <sup>20</sup>Tūpa oicua co mbahe aicuachía vahe pēu, supi tupri vahe ité.

<sup>21</sup> Ipare aso ivi Siria ve, Cilicia ve avei no. <sup>22</sup> Yande Yar reroyasar rumo oñemonuha vahe ivi Judea ve ndache cuai eté yuvireco. <sup>23</sup> Co oyanduño tēi yuvireco ambuae ava aipo ehi vahe: “Acoi aracaco yande reca-reca catu vahe yandeu mbahe tēi apo āgua, cūrítei omombehu Jesucristo reroya āgua oico” ehi, “Ahe acoi yipindar yande mocañi pota rai vahe oico” ehi yuvireco cheu. <sup>24</sup> Ahese, “Imboeteipri Tūpa tasecoi” ehi yuvireco che recocuer rese.

### **Ambuae apóstol, “Aviye ité Pablo porombohesa” ehi yuvireco**

**2**<sup>1-2</sup> Coiye catorce araviter pare, Tūpa omboyecua cheu Jerusalén ve che yevi āgua. Evocoiyase aso iri aheve. Ahese oroso Bernabé rese, Tito avei oroviraso oreyeupi. Aheve yipindar opacatu Jesús reroyasar rerecuar reseño rane oroñemonuha. Esepia, ndaipotai che rembiapo opitara ēgüe ehi tēi vajerā. Evocoiyase amombehu co ñehesa poropīsirosa resendar chupe yuvireco acoi amombehu vahe ava eta ndahei vahe judío pāhuve. <sup>3-4</sup> Oime rumo amove yande rivri angahu tēi, ahe yuviroique mbegüe vahe ore pāhuve ‘yasecoepia rane, ¿supi eté ndoviroyai Moisés porocuita Jesucristo reroysa pipe yuvireco?’ oyapave. Oipota ahe ore roreyevi iri Moisés porocuitavrive tēi yuvireco viña. Ahese che ndugüer Tito upe, “¡Eyembocircuncida Moisés porocuita rupi!” ehi yuvireco. Esepia, ahe ndahei vahe judío secoi. <sup>5</sup> Ore rumo ndoroipotai eté semimbotar apo āgua yuvireco chupe. Esepia, ‘tovireco viteño oyese co ñehesa pīsirosa resendar supi tupri vahe yuvireco’ ore yapave pēu.

<sup>6</sup> Co rumo acoi icuapri ité Jesús reroyasar rerecuar, nomombehui eté yembohesa ambuae vahe yuvireco cheu, oyoyaño ité che porombohesa rese. (Yepe ocuaita virecora ivate yuvireco viña.

Che rumo nañecuñaroi chietera che recocuer sui. Esepia niha, Tūpa ndahei ava rete tēi osepia.) <sup>7</sup> Ahe rumo oicua yuvireco Tūpa che cuai oñehengagüer poropīsirosa resendar mombehu āgua ndahei vahe judío yuvirecoi vahe upe, inungar omondo Pedro oñehengagüer poropīsirosa resendar mombehu āgua judío upe. <sup>8</sup> Esepia, inungar Tūpa omondo Pedro upe apóstol seco āgua ava judío upe nara, ēgüe ehi avei imbou apóstol che reco āgua ava ndahei vahe judío upe nara.

<sup>9</sup> Sese Santiago, Pedro iyavei Juan, ahe chupe, “Oyemoviracua vahe Jesús reroyasar pāhuve” ehi yuvireco, ahe oicua yuvireco Tūpa ombou vahe oporovasasa cheu. Ahese imboetasa ore recosa pipe che po pisi yuvireco, Bernabé upe avei ēgüe ehi yuvireco. Iyavei ipiña rupi eté ore oroporaviqui vajerā ava ndahei vahe judío pāhuve oroico, inungar ahe oporaviqui judío pāhuve yuvireco. <sup>10</sup> Co reseño oporandu yuvireco oreu: “Peyemomahenduhami ava iparaisu vahe pītivii āgua rese” ehi. Yipive ité rumo che ēgüe ahe pota vichico yepi.

### **Pablo oñehe pĩrata Pedro upe sembiavi rese Antioquía ve**

<sup>11</sup> Iyavei oose Pedro tecua Antioquía ve. Aheve oyavi güecocuer. Evocoiyase añehe pĩrata sovai eté chupe mbahe sembiavi rese. <sup>12</sup> Esepia, yipindar ahe ocaru ndahei vahe judío piri viña. Ipare rumo, oyepotase ambuae judío Jesús reroyasar Santiago mboetasa yuvireco, ahese Pedro osiriño ichui osiquiyepave. Iyavei ndocar upe ipiri. Esepia, ahe Jesús reroyasar judío yugüeru vahe “judío recocuer rupi yaguatara yande ñepisiro āgua” ehi vahe ité yuvireco viña. <sup>13</sup> Evocoiyase ambuae Jesús reroyasar judío avei osiripaño tēi supive yuvireco. Bernabé avei eté supive ēgüe ehiño tēi. <sup>14</sup> Che asepiase rumo, ndahoyoyai secocuer yuvireco



co ñehesa poropĩsirosa resendar supi tupri vahe rese. Ichui Pedro upe añehe opacatu Jesús reroyasar rovaque: “Nde niha judío, ereico rumo inungar ndahei vahe judío. Cūrítei rumo erembohe tēi nde rembiapo pipe evocoi ava ndahei vahe judío Jesús reroyasar judío rereco uca āgua” ahe chupe.

**Judío, ndahei vahe judío  
oyoya oñepisiro yuvireco  
Cristo rese oyeroyasa pipe**

<sup>15</sup>Yande niha judío yande hasa suive yaico, ndahei ava ndahei vahe judío nungar yangaipa vahe yaico. <sup>16</sup>Cūrítei rumo yaicua, ndipoi eté que ava seco catupri vahe Tūpa rovaque Moisés porocuaita mboaviyasa pipe. Jesucristo rese yeroyasa pipeño ité rumo yande reco catupri. Sese yande yayeroya ité Jesucristo rese, “Co seco catupri vahe” Tūpa he āgua yandeu. Ēgüe ehi eté seroya pipe, ndahei acoi porocuaita tēi reroyasa pipe. Esepia, ndipoi chietera que ñepeí ava seco catupri vahe Tūpa rovaque evocoi porocuaita tēi aposa pipe.

<sup>17</sup>Yasecase yande reco catupri āgua Cristo rese yande yeroyasa pipe, ipipe yaicuase angaipa viyar yande reco, ¿Cristo piha evocoyase yande mboangaipa? ¡Aní eté! <sup>18</sup>Che amocañise mbahe, ipare rumo amopuha irise, che evocoyase ayemboangaipa ipipe. <sup>19</sup>Esepia, ndaicatuisse Moisés porocuaita reroya tupri che ñepisiro āgua, ahese ocañi tēi vahe aico ipipe. Ichui rumo Jesucristo reroyasa pipe asupiti Tūpa upe nara che recove āgua. Esepia, che aviye yaticapri aico Cristo rese. <sup>20</sup>Sese ndahe iri che ité aicove; Tūpa Rahir Cristo rumo che rese secoi. Sese ité ayeroya che retecuer pipe che recove āgua. Ahe niha oyemondo omano āgua che raisupave. <sup>21</sup>Naroiroi eté co Tūpa porovasasa. Esepia, ava

seco catupri Tūpa rovaque porocuaita tēi reroya pipe viña, evocoyase Cristo mano agüer ēgüe ehi tēi etera viña.

**Porocuaita iyavei yeroyasa**

**3** ¡Ndapembahecuaí eté pe Galacia pendar! Pe ndoyavii ipaye vahe remimbopa peico. Oromombehu tupri niha pe rovai eté acoi Jesucristo curusa rese yatica agüer pēu. <sup>2</sup> ¡Pemboyecua co che porandusa cheu! ¿Moisés porocuaita mboyeroya pipe piha peipisi Espiritu Tūpa suindar, co ñehesa pesendu vahecuer reroya pipe tie? <sup>3</sup> ¡Ndapembahecuaí eté! Yipindar Espiritu pipe pemboipi Cristo rupi pe guata āgua. ¿Ēgüe peye aveira piha pe pĩratasa pipe tēi pe guata tupri āgua Cristo rupi cūrítei? <sup>4</sup> ¿Ndape pĩtívimi eté vo acoi opacatu pe paraisusa Cristo recocuer rese? ¡Pe pĩtívimira tarahu viña! <sup>5</sup>Tūpa niha omondo oEspiritu pe rese iyavei oyapo poromondiisa pe pāhuve. ¿Mahera piha oyapo? Esepia, co ñehesa pesendu vahe peroya ité, sese ēgüe ehi pēu ndahei Moisés porocuaita tēi reroya pipe.

<sup>6</sup>Esepia, aracahe Abraham oyeroya ité Tūpa rese, ipipe sui Tūpa oipisi seco catupri vahe nungar oyeupe nara. <sup>7</sup>Sese iya ité peicuara opacatu acoi oyeroya vahe Tūpa rese yuvireco, ahe Abraham suindar supi tupri vahe. <sup>8</sup>Iyavei Tūpa Ñehengagüer icuachiapri pipe omombehu ité senondeve Tūpa oipisi aveira opacatu oyese oyeroya vahe ndahei vahe judío co ivi pipendar oyeupe nara. Iyavei omombehu co ñehesa icatupri vahe Abraham upe: “Opacatu ava ivi pipendar sovasapri yuvireco nde sui” ehi. <sup>9</sup>Evocoyase Tūpa osovasara cūríteindar oyese yeroyasareta inungar Abraham aracahe.

<sup>10</sup>Acoi seco catupri pota vahe Moisés porocuaita pipe tēi yuvirecoi vahe, ahe Tūpa ñemoirosavrive tēi yuvirecoira. Esepia, icuachiapri aracahendar pipe aipo

ehi: “Opacatu ava nomboaviyei vahe ité opacatu Tūpa porocuaita icuachiapri pipe yepi, ahe inemoirosavrive tēi yuvirecoira” ehi. <sup>11</sup>Sese, co omboyecua tupri yandeu ndahei Moisés porocuaita roroyasa pipe tēi Tūpa, “Co seco catupri vahe” ehi ava upe. Esepia, icuachiapri aracahendar pipe aipo ehi: “Acoi ava seco catupri vahe oicovera Tūpa rese oyeroyasa pipe sui” ehi. <sup>12</sup>Moisés porocuaita ndahoyoyai Cristo rese yeroyasa rese. Esepia, ahe porocuaita aipo ehi: “Acoi ava oico pota vahe co porocuaita pipe, tomboaviye tupri ité opacatu porocuaita güecove āgua” ehi.

<sup>13</sup>Moisés porocuaita mboaviyēehisa pipe yacañi tēira viña. Cristo rumo yande renose yande cañi tēi rāgüer sui. Ahe ae opa oipisi ñemoirosa yande repirā. Esepia, icuachiapri aracahendar pipe aipo ehi: “Opacatu ava imboyasecopri ivira rese, oipisi Tūpa ñemoirosa yuvireco” ehi. <sup>14</sup>Ēgüe ehi Cristo yandeu ‘toipisi ava ndahei vahe judío che Ru porovasasa che rembiapo sui’ oyapave. Ahe porovasasa Tūpa omombehu vahecuer Abraham upe aracahe. Ipipe sui yande opacatu yaipisi Espiritu imombehupri yayeroyase Cristo rese cūritei.

### **Porocuaita iyavei Tūpa güemimombehugüer omboaviye vahe**

<sup>15</sup>Iyavei, che rivireta, amboyoya pota mbahe co ivi pipendar mbahe rese. Inungar acoi que ava ñepeí reseve oicuachias güemimbotar omombehu vahe, ahese ndipoi que ambuae ava omboyeho vahe rā iyavei ndipoi que ambuae ava omboyeapi iri vahe rā. <sup>16</sup>Ēgüe ehi avei Tūpa remimombehugüer Abraham upe aracahe. Esepia, oñehe ñepeí reseve chupe iyavei ichuindar upe avei. Tūpa Ñehengagüer icuachiapri pipe: “Nde suindareta upe” ndehi, inungar-ra que

ava rehii upe viña. Ēgüe ehi rumo, “Nde suindar upe ité” ehi ñepeí ava’ ohesa pipe, ahe Tūpa Rembiporavo Jesucristo. <sup>17</sup>Co mbahe amombehu pota pēu: evocoi porocuaita Tūpa ombou vahecuer cuatrocientos treinta araviter pare, ndoicatui chietera Tūpa ñepeí reseve Abraham upe omombehu vahecuer iyavei oñehe omboaviye vahe rā mboyeho āgua. <sup>18</sup>Supi eté acoi Tūpa suindar ou vahe rā porerecosa Moisés porocuaita mboaviyesa pipe suise viña, ahese ndahei chiaveira Tūpa remimombehugüer sui. Ahe rumo ñepeí reseve Tūpa remimombehugüer rupi Abraham upendar porerecosa.

<sup>19</sup>¿Mahera pīha evocoyase aviye Moisés porocuaita? Esepia, ava poreroyaēhisa cua āgua Tūpa ombou oporocuaita Moisés upe aracahe. Co porocuaítavrive rumo ava yuvirecoi acoi oyepotase voi Abraham suindar Jesús Tūpa remimombehugüer rupi. Yipindar rumo Tūpa oyocuai güembigui iva pendar oporocuaita mombehu āgua Moisés upe aracahe ‘tomombehu evocoyase Moisés che porocuaita opacatu ava upe’ oyapave. <sup>20</sup>Ñepeí ava rese oñemoñetase, ndipotasai ambuae imoingatú āgua. Tūpa niha ñepeí vahe secoi.

### **Mbahe sui Tūpa ombou oporocuaita**

<sup>21</sup>“Moisés porocuaita co coti tēi Tūpa remimombehugüer imboaviyepirā sui” aipo ndahei eté pēu. Esepia, acoi Tūpa omondose que porocuaita ombou vahe rā tecovesa apirēhi ava upe imboaviyesa pipe, evocoyase porocuaita roroya pipe yande reco catuprira Tūpa rovaque viña. <sup>22</sup>Icuachiapri aracahendar pipe rumo omombehu ité co: opacatu ava inungar mbigui tēi oangaipa pipe yuvirecoi. Evocoi ēgüe ehi, Jesucristo rese yande yeroyasa pipe yasē vahe rā ichui mbahe imombehupri pisi āgua.

<sup>23</sup>Yipindar rumo mbiguai nungar yaico Tūpa nomboyecua viteise Guahir rese yande yeroya āgua. <sup>24</sup>Inungar chihivahemi tēi, ēgüe yahe porocuitavrive yaico yipindar. Ahe porocuita rumo yande mbohe Cristo yu āgua ‘toyeroya Cristo rese güeco catupri āgua curi’ oya yandeu. <sup>25</sup>Cūritei rumo oime Jesucristo rese yeroya āgua cute. Evocoyase ndahe iri ahe porocuitavrive yaico. <sup>26</sup>Pe niha opacatu Tūpa rahir peico Jesucristo rese yeroya pipe. <sup>27</sup>Opacatu pe ñapiramombri peico vahe Jesucristo rupi pe guata āgua, secocuer avei pereco. <sup>28</sup>Iyavei ndipoi eté yemboyahosa Jesucristo rese yaicose, yepera que judío viña, ndahei vahe judío; anise mbiguai, ndahei vahe mbiguai; que cuimbahe, cuña avei. Esepia, opacatu ñepeí vahe nungar ité yaico Cristo rese. <sup>29</sup>Jesucristo rese peicose, pe evocoyase Abraham suindar nungar tupri ité peico. Evocoyase pe avei peipisira Tūpa remimombehu porerecosa yandeundar.

**4** Amboyoapi vitera co che ñehesa pēu: inungar que ava omanose, osey ombahe eta guahir upe chihivahemise. Yepe ahe tahir opacatu mbahe yar secoira viña, ahe rumo inungar tupri mbiguai tēi secoi vahe yepi. <sup>2</sup>Esepia, ahe guārosar povrive secoi imboyeroya āgua. Ocuacuase voi eté, opoira tu remimombehugüer rupi ichui. <sup>3</sup>Ēgüe ehi avei yandeu. Yande chihivahemise, evocoyase mbiguai nungar yipindar vahe co ivi pipendar porocuitavrive yaico. <sup>4</sup>Oyepotase rumo ari imombepupri, Tūpa ombou Guahir, ahe oha cuña sui; evocoyase ahe Moisés porocuitavrive secoi. <sup>5</sup>Ēgüe ehi ou opacatu yande renose āgua evocoi mborocuitavrivi sui Tūpa rahir ité yande reco āgua. <sup>6</sup>Evocoyase Tūpa omboyecua Guahir yande recose ombouse Guahir Espiritu yande

piha pipe, “¡Che Ru!” yande he āgua chupe. <sup>7</sup>Sese yande Tūpa rahir ité yaico, ndahe iri cūritei mbiguai tēi nungar. Tūpa rahir yande reco pipe ahe ombou aveira oporerecosa yande mahera.

### **Pablo ipihañemoñetaño ité Jesús reroyasar rese oico**

<sup>8</sup>Yipindar tūpa angahu rembiguai tēi peico Tūpa ité cuaēhi pipe. <sup>9</sup>Cūritei rumo peicua Tūpa, ēgüe ehi rumo Tūpa ité oicua pe recocuer. Sese niha aipo ahe cheyeupe: “¿Mara ehi piha oyevi iri mborocuita tēi pipe mbiguai tēi güeco iri āgua yuvireco?” ahe pēu. <sup>10</sup>Esepia, pemboetei vite ari, yasi, araviter pieta eta tēi peico. <sup>11</sup>¡Che ayembosiquiye pe rese, “Che porombohesa revo ēgüe ehi tēi vahe ipāhuve yuvireco chupe” ahe pēu!

<sup>12</sup>Iyavei che rivireta, aipota che recocuer moña peye. Esepia, cuese che asē Moisés porocuita povri sui inungar pe yipindar ēgüe ahe vichico pe pāhuve. Ahese ndapeyapoi eté mbahe cheu. <sup>13</sup>Peicua niha che yipindar chembaheasise vichico, ahese amombehu co ñehesa pīsirosa resendar pēu. <sup>14</sup>Yepe co che mbaheasisa yavai etepri pēu viña, pe rumo ndache reroiroi eté peye iyavei ndache momboi peye. Ēgüe ehi rumo aviye acoi Tūpa rembiguai eté che rereco peye viña iyavei aviye Jesucristo itera aico pēu viña no. <sup>15</sup>¡Mahera ru cūritei ndapeyemboviharete vitei che rese peico eipeve! Esepia, supi eté, cuese acoi que pe resa teieté revo pemboura cheu viña. <sup>16</sup>¡Evocoyase cūritei che amotarēhi tie peye acoi pēu mbahe supi tupri vahe mombehusa sui tēi!

<sup>17</sup>Evocoi ava iquerēhi ité pe rese, ndahei rumo mbahe aviye vahe apo āgua yuvireco. Ahe rumo oipota pe mboyepipi āgua tēi ore sui yuvireco pe querēhi āgua supi. <sup>18</sup>Aviye ité niha yande querēhise mbahe apo ambuae ava upe, mbahe

aviye vahe apo āgua rumo. Ndahei chira pe pāhuve che recoseño pereco pe querēhisa. Iyacatu rumo pequerēhiño itera yepi. <sup>19</sup>Che rahireta, che ayembopiharasi ité vichico pe rese. Inungar cuña imembirasi vahe; ēgüe aheño itera ayemombaraisu vichico ‘toico rane ité Cristo sese yuvireco’ che yapave pēu. <sup>20</sup>Cūrítei rāgüer opoepiara viña añehe tupri catu āgua pe rese. Esepia, “¿Mara ahera revo sereco yuvireco?” ahe pēu.

### Agar, Sara recocuer resendar yembohesa

<sup>21</sup>Pe peroya pota vahe Moisés porocuaita pe reco catupri āgua, pemombehumi cheu: ¿Ndapesenducuai tie co mborocuaita aipo ehi vahe? <sup>22</sup>Esepia, aipo ehi: Abraham aipo vireco ñuvirío guahir, ñepehi tahir aipo sembiguai Agar membri, ambuae tahir evocoyase sembireco Sara membri. <sup>23</sup>Evocoi sembiguai membri oha que ava tēi yesu nungar; sembireco membri rumo oha Tūpa remimombehugüer rupi eté. <sup>24-25</sup>Co tecocuer mboyoyasa yaracua vahe ité. Co ñuvirío cuña sui yayembohe ñuvirío Tūpa remimbotar rese. Yipindar sembiguai Agar omboyecua evocoi porocuaita imondopri Arabia pipendar ivitri Sinaí ve aracahe. Ahe cuña mbiguai tēi inungar Jerusalén upendar ava. Esepia, ahe Moisés porocuitavrive yuvirecoi. Ēgüe ehi avei opacatu Moisés porocuaita pipendar, yuviroha mbiguai nungar güeco āgua, opacatu ichuindar ēgüe ehi vite yuvireco. <sup>26</sup>Yande rumo inungar-ra que Jerusalén iva pendar suindar yaico viña ēgüe yahe yaico mbiguaiēhi. <sup>27</sup>Esepia, icuachiapri aracahendar pipe aipo ehi: “Eyemboviahareté, cuña nimembii vahe; esapucái nde rorivetesá pipe, nde ndeiporarai vahe nde membri rasicuer.

Esepia, acoi cuña seyapri imembi ati catura cuña omer vireco vahe sui” ehi.

<sup>28</sup>Che rivireta, inungar Sara membri Isaac, ēgüe yahe avei tahir ité yaico Tūpa remimombehugüer rupi. <sup>29</sup>Co rumo aracahe sembiguai membri oha vahe ava tēi yesu nungar, ahe ndoyambotai sembireco membri acoi Espiritu píratasa pipe sui oha vahe; cūrítei ēgüe ehi tupri avei. <sup>30</sup>¿Mara ehi icuachiapri aracahendar pipe? “Pemboyepipi pe rēta sui cuña mbiguai tēi imembi reseve. Esepia, cuña mbiguai tēi membri ndiyai oyoya cuña ndahei vahe mbiguai membri rese vu mbahe pisi āgua yuvireco” ehi. <sup>31</sup>Sese, che rivireta, yande ndahei sembiguai tēi membri nungar yaico, yande rumo sembireco membri nungar yaico. Esepia, ahe ndahei mbiguai.

### Peyemoviracuaño ité Moisés porocuaita pipe pe recoēhi āgua

**5** Jesucristo niha ombou yandeu mbiguai tēi nungar sui yande sē āgua. Sese peyemoviracua mbiguai tēi pe reco iriēhi āgua.

<sup>2</sup>Pesendu che ñehe. Che, Pablo, aipo ahe pēu: acoi peyembocircuncida ucase, ahese ēgüe ehi tēi vahe Cristo pereco. <sup>3</sup>Che amombehu pota irimi pēu, que ava oyembocircuncida uca vahe, vireco niha ocuaita opacatu Moisés porocuaita mboyeroya āgua. <sup>4</sup>Pe pereco catupri pota tēi vahe Tūpa rovaque evocoi porocuaita tēi reroya pipe, peyepipi ité Cristo sui. Evocoyase Tūpa porovasasa avei pemocañi tēi peyesui. <sup>5</sup>Yande rumo yande querēhisa pipe yayeroya yande reco catupri āgua rese. Ēgüe yahe Espiritu yande pītiviisa pipe iyavei Jesús rese yeroyasa pipe avei. <sup>6</sup>Esepia, acoi yaicose Jesucristo rese, yepe yayembocircuncidase, anise ndayayembocircuncidase, ahe ndayande pītivii eté yande reco catupri āgua Tūpa rovaque.

Co güeraño rumo yande pītīvii Jesús rese yande yeroyasa. Ahe niha yande mboyeaisu uca.

<sup>7</sup>Peico tupri niha yipīndar viña. ¡Ava ru ndoviroya uca iri mbahe supi tupri vahe pēu! <sup>8</sup>Ndahei eté rumo pe poravosar Tūpa ēgüe ehi pēu. <sup>9</sup>¿Ndape-icuai vo acoi aipo ehi vahe: “Chīhimi pan mboapeposa oso panguā rese opacatu rupi oicahopa tupri yepi” ehi? <sup>10</sup>Che rumo ayeroya yande Yar rese pe pīhañemoñeta āgua che pīhañemoñetasa rupi. Tūpa rumo omboura oñemoirosa que ava pe mbopihañemoñeta yoavirati uca vahe upe.

<sup>11</sup>Che rumo, che rivireta, “Iya yayembocircuncida yande reco catupri āgua” ahe vītese Jesús reroyasar upe viña, ahese revo ndipoi chira che amotarēhisar judío pāhuve, ahese avei ndipoi chira ñehesa curusu rese Jesús manosa resendar amotarēhimbar ipāhuve viña. <sup>12</sup>Evocoi ava pe mbopihañemoñeta yoavirati uca vahe circuncisión rese yuvireco, ¡mahera ahe ae ndoyeasiapa voi ñepeí reseve yuvireco!

<sup>13</sup>Esepia, pe ore rivireta, Tūpa niha pe renoi mbiguai tēi nungar pe recosa sui pe renose āgua. Ndahei chira rumo pe remimbotarai tēi apo āgua, iyacatu rumo peñepitiviira pe yeaisusa pipe. <sup>14</sup>Esepia, opacatu evocoi mborocuaíta imboaviyesa yamboaviyese co ñehesa aipo ehi vahe: “Esaisu ambuae ava nde yeaisu nungar” ehi vahe. <sup>15</sup>Peyeseño tetei rene catu; peicua catu, aviyeteramo ēgüe peyese, pe recocuer pemomarapa tiētera.

### **Yagatara Espiritu remimbotar rupi, ndahei yande remimbotar tēi rupi**

<sup>16</sup>Pesendu che ñehes: Espiritu pīratasa pipe catu peico yepi. Iyavei peyapoi rene mbahe pe remimbotarai. <sup>17</sup>Esepia, co pe remimbotarai ndahoyoyai eté Tūpa Espiritu remimbotar rese. Ndayembohe ca-

tui eté. Sese ndapeyapo ucai mbahe pe remimbotar aviye vahe peyeupe. <sup>18</sup>Acoi Espiritu ité pe roguatase, ahese ndahei iri chiaveira Moisés porocuaítavrive peico.

<sup>19</sup>Yande remimbotarai suindar yande rembiapo ai icuasa tupri ité. Ahe: yemboaguasa tēisa, teco quihasa, mbahe tēi aposa; <sup>20</sup>mbahe rahanga upe yerure tēisa, yembopayesa, ñeroirosa, ñehopoepi-episa iyavei ambuae ava mbahe pota raisa; ñemoiro seraisa, yemboyaho-yahosa, pīhañemoñeta yoyaēhisa, <sup>21</sup>iyavei ambuae ava mbahe pota raisa rese ñemoirosa, savaiposa, yembopieta tēisa iyavei ambuae mbahe co nungar tupri aposa. ¡Peicua catu! Esepia, evocoi nungar mbahe aposar ndoyuviroiquei chietera Tūpa mborerecuasave yuvireco curi.

<sup>22</sup>Yayapose rumo Espiritu remimbotar, yande evocoiyase yayeaisura, yande rorivetera, yaicora mbahe tupri pipe, yande reco mbegüera, yaporoaisura yande reco aviyesa pipe, yamboyeuara yande cuaita mboaviyesa, <sup>23</sup>yayemominiñora iyavei yande recorā rese yañearo tuprira. Evocoi nungar yayapose, ndipoi eté que mborocuaíta pipe yande yeamotarēhi āgua. <sup>24</sup>Jesucristo rese ité yuvirecoi vahe rumo, opa ité omombo güecocuerai co ivi pipendar tēi oyesui yuvireco, güemimbotarai, opīhañemoñeta raisa avei no. <sup>25</sup>Yande yaicose Espiritu pīratasa rese, ahese Espiritu rupi eté yagatara.

<sup>26</sup>Ndayayemboivate ai chira. Esepia, ipipe sui yayeamotarēhi, yaipota rai avei yande mboetasas recocuer nungar yande reco āgua.

### **Peñepitívii ñepeí-peí**

**6**Che rivireta, acoi que Jesús reroyasar pe pāhu pendar oyavise güecocuer, pe peico vahe Espiritu rese, peipītívii secocuer moingatu

ãgua pe recocuer mbegüemisa pipe. Peicua catura rumo, aviyeteramo oyoya voi peyemboangaipa uca tiêtera. <sup>2</sup>Peñepitivi-tivii catu que mbahe yavai rai vahe rese. Êgüe peyese, Jesucristo porocuita pemboaviyera.

<sup>3</sup>Amove ava, “Che ivate catu vahe aico” ehi tãi. Êgüe ehi rumo ahe ae oyembopa aipo ohesa pipe oico.

<sup>4</sup>Sese niha ñepei-peí eté yaicua tuprira yande recocuer. Aviyese, evocoyase sese yaviharetera. Ndahei acoi ambuae ava recocuer rese tãi yambooyara yande recocuer. <sup>5</sup>Esepia, ñepei-peí eté yande yacatu yareco yande cuaita imboaviye ãgua.

<sup>6</sup>Acoi oyembohe vahe Tüpa ñehes pïsirosa resendar rese, tomondo ombohesar upe mbahe güembiereco ipïtivii ãgua.

<sup>7</sup>Peyembopa eme catu pe ae. Ndipoi chietera que ava viroïro vahe Tüpa ñemoirosa pisiêhisa pipe. Êgüe ehi eté: yañotise mbahe, ichui avei mbahe yaipisira. <sup>8</sup>Acoi ava rumo oyapo vahe mbahe güemimbotarai pipe, ahe oipisira cañisa apirêhi vahe. Acoi oyapo vahe mbahe Espïritu remimbotar rupi, ahe oipisira tecovesa apirêhi vahe yuvireco. <sup>9</sup>Evocoyase tayandecuerai eme mbahe tupri aposa pipe. Esepia, acoi ndayandecueraise, yaipisira mbahe tupri apo repri. <sup>10</sup>Sese yande catugüer rupi yayapo mbahe icatupri vahe opacatu upe; yande mboetasa Jesús reroyasar upe ité rumo yayapora.

**Pablo, “Peicua catu pe mbocircuncida pota vahe sui” ehi iyavei ñehesa ipa vahe**

<sup>11</sup>¡Pesepia co ñehesa ipa vahe che pove ité aicuachía tuvicha vahe pëu!

<sup>12</sup>Acoi judío Jesús reroyasar pe mbocircuncida uca potaño tãi vahe ‘Co mbia aviye ité, tehi ndahei vahe Jesús reroyasar judío yuvireco yandeu’ ohesa pipe tãi êgüe ehi yuvireco viña. Esepia, ndoipotai evocoi judío oamotarêhi co ñehesa Cristo atica agüer mombehu pipe yuvireco. <sup>13</sup>Acoi oyembocircuncida uca tãi vahe avei rumo nomboaviyei eté opacatu mborocuita yuvireco. Oipota rumo pe mbocircuncida ucara oyemboivate ai ãgua pe cuaise evocoi nungar apo yuvireco. <sup>14</sup>Che rumo ndayemboivate potai eté. Curusu rese yande Yar Jesucristo mano agüer rese güerãño ité ayemboviha. Imano agüer sui co ivi pipendar mbahe pota raisa opa ité che sui. Che evocoyase inungar omano vahe aico chupe. <sup>15</sup>Yepe que yayembocircuncidase revo, anise que ndayayembocircuncidaise viña, ndayande pïtivii eté Cristo rese yaico tupri ãgua. Co rumo aviye vahe ité yandeu: Tüpa yande recocuer mbopiasuse. <sup>16</sup>Opacatu yuvirecoi vahe co ñehesa che remimombehugüer rupi iyavei opacatu Tüpa upendar supi eté vahe toipisi Tüpa suindar teco tuprisa iyavei iporoparaisuerecosa yuvireco.

<sup>17</sup>Aviye, co pipe suive ndaipota iri que ava che mañeco tãi vaheerã. Esepia, che areco che retecuer rese che apicha-picha agüer. Ahe omboyecua Jesús rembiguai che recosa.

<sup>18</sup>Che rivireta, yande Yar Jesucristo tape rovasa opacatu. Aipo rupive.

*PABLO REMBICUACHIA  
EFESO PENDAR UPE*

**EFESIOS**

**Pablo mahenduhasa Jesús  
reroyasar Efeso pendar upe**

**1** Che, Pablo, Jesucristo apóstol aico Tüpa remibotat rupi. Che aicuachía co che ñehe pëu pe Efeso pendar, Tüpa upendar Jesucristo reroyasar peico vahe. <sup>2</sup>Yande Ru Tüpa iyavei yande Yar Jesucristo tombou oporovasasa pe reco tupri ãgua pëu.

**Cristo suindar porovasasa**

<sup>3</sup>Yande Yar Jesucristo Ru Tüpa imboeteipri tasecoi. Ahe ombou opacatu porovasasa iva sui yande Cristo rese yaico vahe upe. <sup>4</sup>Sese niha Tüpa yande poravo yipivé ité ivi apoëhi viteseve 'toyuvirecoi cheu nara ité iyavei tasecomara eme yuvireco che rovaque' oya-pave oporoaisusa pipe. <sup>5</sup>Ipipe avei yipisuive yande pisi guahirguã Jesucristo yande pisirosa pipe güemimbotar rupi. <sup>6</sup>Sese yande yasapucái chupe iporoaisusa porañete vahe rese yepi. Ahe ipipe niha yande rovasa Guahir güembiaisu sui. <sup>7</sup>Tüpa yande raisu eteprisa pipe yande pisiro Guahir ruvi piyeresá pipe yande angaipa rese ñero ãgua. <sup>8</sup>Yande raisu pipe avei ombou opacatu yande aracua ãgua iyavei yande yapisaca ãgua avei yandeu, <sup>9</sup>iyavei oicua uca güemimbotar yipisuive ndicuasai vahe yandeu co güembiaporã mboaviye ãgua. <sup>10</sup>Oyepotase ahe ari imboaviye ãgua, Tüpa opacatu mbahe iva pendar, co ivi pipendar avei opara omoingue ñepeí reseve Guahir Cristo povrive.

<sup>11</sup>Cristo rese yaicose, Tüpa yande poravo yipisuive ichuindar mbahe yandeu-ndar pisi ãgua. Opacatu rumo mbahe

Tüpa remimbotar rupi. Ahe niha oicua ité güemimbotar apo ãgua <sup>12</sup>'tomboetei che mborerecuasa ava yuvireco che Rahir rese yeroyasar yipindar yuvirecoi vahe recocuer repiase' oya oreu. <sup>13</sup>Pe avei niha, pesenduse co ñehesa supi eté vahe pisirosa resendar, Cristo peroya pe piha pipe sese peico vahe-rã. Tüpa ombou güemimombehugüer Espiritu Santo pe piha pipe 'cheundar ité yuvirecoi' oya. <sup>14</sup>Ipisisa pipe niha yaicua yande yaipisi vahe-rã yandeu-ndar mbahe imoingatupri, acoi Tüpa opase oipisiro ava oyeupendar 'ipipe sui tomboetei che reco ivatesa ava yuvireco' oya.

**Pablo oporandu Tüpa  
upe mbahecuasa Jesús**

**reroyasareta upe mondo ãgua**

<sup>15</sup>Ayandu peyeroya tupri yande Yar Jesús rese iyavei pesaisu ité ava opacatu Tüpa upendar. <sup>16</sup>Sese ndapoi eté Tüpa upe, "Aviye ndeu" che hesa sui chema-henduhase pe rese che yeruresa pipe. <sup>17</sup>Che aporandu yande Yar Jesucristo Ru Tüpa seco porañete vahe upe, pe recocuer resape ãgua rese. Ipipe peicua tupri catura semimboyecua iyavei peicua tupri catura yande Yar. <sup>18</sup>Ëgië ahe ité aporandu Tüpa upe pe piha resape ãgua rese. Ipipe peicua catura co pesãro vahe ivave pe reique ãgua; chupe nara ité Tüpa pe peha. Iyavei peicua co mbahe imondopirã iva pendar iporañete vahe Tüpa upendar yuvirecoi vahe upe. <sup>19-20</sup>Ipipe sui peicua tupri aveira Tüpa pĩratasa ndopai vahe yande seroyasar yaico vahe rese. Co pĩratasa ivaté vahe ité. Ahe pĩratasa Tüpa omboyecua, ombogüerayevise Guahir Cristo omano vahe pãhu sui, iyavei omboguapise oacato coti ivave. <sup>21</sup>Osecomboivate catu opacatu iva pendar, ivi pendar seco ivate vahe mborerecuarecuar tēi pĩratasa sui iyavei opacatu cüritein-

dar sui, que oime vaherã sui avei. <sup>22</sup>Opacatu mbahe omondo Guahir Cristo povrive, Tahir upe avei ombou mborerecuar ivate catu vahe seco água opacatu viroyasar upe. <sup>23</sup>Opacatu yande seroyasar yaico vahe recouer rese Cristo secói. Evocoyase yande setecuer nungar yaico. Ahe opacatu rupi secói.

### Tüpa oporovasasa pipe yande p̄siro

**2** Pe rumo, yipindar angaipa pipe pe-icose, inungar omano vahe peico Tüpa upe. <sup>2</sup>Co ivi pipendar pihanemoñetasa rupi t̄i peico iyavei ivate rupindar carugar rerecuar porocuita t̄i avei peroya, ahe Jesús reroysarēhi omböhe vahe. <sup>3</sup>Yipindar opacatu yande avei yaguata yande remimbotar rupi t̄i yande recouerai pipe. Yande pihanemoñeta raisa rupi t̄i avei yayapo mbahe. Sese Tüpa ñemoirosa yaipisira opacatu ambuae ava rupive viña. <sup>4</sup>Tüpa rumo yande paraisuereco ité, yande raisu etepri avei. <sup>5</sup>Yepe angaipa pipe yaico omano vahe nungar viña, ahe rumo ombou Guahir yande recove água. Ahe oporovasasa pipe yande p̄siro. <sup>6</sup>Yande mbogüerayevi iri avei niha sese. Ipare seseve yande moingue oyepiri ivave <sup>7</sup>tamboyecua opacatu iva pendar upe che porovasasa iyavei che poroaisusa tuvicha vahe che Rahir rembiapo pipe sui curi' oya. <sup>8</sup>Esepia, oporovasasa pipe pe p̄siro Jesús rese peyroyase. Ndahei rumo pe recouer sui t̄i peñepisiro, ahe rumo ombou porerecosa p̄u. <sup>9</sup>Ndahei avei ava rembiapo sui t̄i ou vahe. Evocoyase ndiyai chira yayemboivate ai ipipe. <sup>10</sup>Tüpa niha yande recouer mohivi Jesucristo rese yande reco água mbahe icatupri vahe apo água. Ahe mbahe icatupri vahe yipisuive Tüpa omoime yande rembiaporã.

### Cristo ombou yande reco tupri água

<sup>11</sup>Evocoyase peyemomahenduha yipindar pe recouer rese. Ndahei rumo judío suindar peico: “Co ndoicuai vahe Tüpa, ndoyembocircuncidai vahe t̄i yuvirecoi” ehi judío yuvireco p̄u, (ahe judío oyembocircuncida vahe güete rese oyeupe, “Yande Tüpa rembiporavo imbocircuncidapri yaico” ehi yuvireco). <sup>12</sup>Peyemomahenduha yipindar Cristo ndaperecoi vahe rese. Ahese ndapeicoi Tüpa rembiporavo Israel recua pendar iyavei ndapecui Tüpa remimbotar semimombehu avei ombou vahe judío upe ip̄tivii água; ndaperecoi Tüpa iyavei ndaperecoi sãrosa pe ñepisiro água co ivi pipe viña. <sup>13</sup>Esepia, ahese amombri Tüpa sui peico. Cūrtei rumo Jesucristo rese peico. Esepia, ahe vuvi pipe pe reru Vu Tüpa upe. <sup>14</sup>Ahe avei niha teco tuprisa yandeu. Esepia, ahe yande mboyeseha judío, ndahei vahe judío ñepe vahe nungar yande yeamotarēhiēhi iri água oyeupe. Yande ñemoirosa niha opa omocañi yande sui güetecuer mondosa pipe. <sup>15</sup>Cristo omomba opacatu Moisés porocuita. Ahe oipota ñepe va nungar teco piasu pipe yande reco água, judío iyavei ndahei vahe judío. Ēgüe ehi imocañipa yande yeamotarēhisa yande sui yande reco tupri água. <sup>16</sup>Evocoyase ahe ae omanose curusu rese, ombou yandeu yandeyeupe ñero água judío, ndahei vahe judío ñepe va nungar Tüpa rupi yande reco água.

<sup>17</sup>Ahe ou omombehu co tecouer piasu p̄u pe amombri Tüpa sui peico vahe, omombehu avei ore namombrii vahe judío oroico vahe upe ‘tiñero yuvireco oyeupe’ oya. <sup>18</sup>Esepia, Cristo rembiapo pipe sui niha oyoya yande judío iyavei ndahei vahe judío yaico vahe yayemboya vaherã Tüpa rese Espíritu ñepe vahe pipe. <sup>19</sup>Sese pe am-



buae ivi pendar peico vahe, ndahe iri amombri Tūpa sui peico cute. Cūrítei rumo Tūpa upendar ité peico opacatu ambuae seroyasar reseve. Yande evocoyase ñepeí reseve oñemu guasu vahe nungar yaico. <sup>20</sup>Pe inungar tūparo maranehi imopuhambri ihivipirā hari pendar peico; apóstol iyavei Tūpa ñehe mombehusar evocoyase inungar ihivipi yuvirecoi tūparo moviracua āgua. Jesucristo rumo inungar ita yipindar vahe imohivisa yandeu. <sup>21</sup>Ichui Cristo opa yande mboyeseha oyese, inungar oi imopuhambri oyeupi catu-catu iri vahe tūparoguā, ěgüe vahe ipehapri yaico yande Yar upe nara sese ité yande reco āgua. <sup>22</sup>Sese niha, Cristo rese peicose, pe ambuae viroyasar rese avei sētarā nungar peico. Ipípe Tūpa, oEspíritu pípe, secoira.

**Pablo cuaita ñehesa písirosa  
resendar mombehu āgua  
ava ndahei vahe judío upe**

**3** Sese, che Pablo, soquendapri aico cohava Jesucristo recocuer mombehusa sui tēi. Ndahei vahe judío peico vahe pe recocuer aviye āgua rese ěgüe ahe. <sup>2</sup>Peicua tupri revo co che poraviquisa Tūpa ombou vahe cheu oporovasasa mombehu āgua pēu nara. <sup>3</sup>Co ñehesa yipindar ndicuasai vahe güemimbotar resendar Tūpa omboyecua uca vahe cheu, ahe niha aicuachía chíhi pēu. <sup>4</sup>Co rese peyeroquise peicua tupri catura co che aracuasa Cristo recocuer resendar oyecua ramo vahe. <sup>5</sup>Co ñehesa icatupri vahe ndoicuai eté ava yuvireco aracahe. Cūrítei rumo Tūpa oEspíritu pípe omboyecua güembipeha yuvirecoi vahe upe. Ahe sembipeha apóstol, ñehe mombehusar avei yuvirecoi. <sup>6</sup>Evocoi oyecua ramo vahe, ahe co: pe ndahei vahe judío upe avei Tūpa omboura judío upendar nungar tupri porovasasa co ñehesa propísirosa resendar reroy-

asa pípe. Pe avei oñemu nungar tupri peico, oyoya ore judío oroico vahe rese. Pēu nara avei Tūpa remimombehugüer arachendar peyeroyase Jesucristo rese.

<sup>7</sup>Yepe ndiyai cheu viña, Tūpa rumo che moingo opíratasa pípe ñehesa písirosa resendar mombehu āgua. <sup>8</sup>Che recocuer niha ivi coti catu opacatu ambuae Tūpa reroyasar sui viña, ahe rumo ombou oporovasasa co mboraviquisa ñehesa aviyé vahe Cristo recocuer resendar mombehu āgua avandahei vahe judío upe nara cheu. <sup>9</sup>Iyavei ombou che cuaitarā amombehu tupri vaheerā opacatu ava upe opacatu mbahe Aposar pihañemoñetasa yipindar ndicuasai vahe. <sup>10</sup>Ěgüe ehi cūrítei oyesuindar aracuasa cua uca āgua viroyasareta recocuer rese opacatu mborerecuar guasu, seco pírata vahe iva pendar upe. <sup>11</sup>Ěgüe ehi, Tūpa opíhañemoñeta ndopai vahe mboaviye Guahir, yande Yar Jesucristo rese. <sup>12</sup>Sese yande yeroyasa suiño ité yaicatu yande yemboya āgua Tūpa rese yande siquiyēehisa pípe. <sup>13</sup>Sese aní chira, ndapequerēhi iri Cristo rupi pe guata āgua, pe recocuer rese che yemombaraisusa sui. Iyacatu rumo che paraisusa preco pe yemboviha āgua.

**Cristo poroaisusa**

<sup>14</sup>Sese añenopiha yande Ru Tūpa rovaque. <sup>15</sup>Ichui serer pāve víreco yuvireco, opacatu seroyasareta iva pendar, ivi pendar avei ñepeí oñemu yuvirecoi vahe nungar. <sup>16</sup>Che aporandu chupe ‘tombou güeco porañetesa sui opíratasa yuvireco chupe oEspíritu pípe imoviracua āgua’ viya pēu. <sup>17</sup>Ěgüe ahe ayeroqui pe rese pe piha pípe Cristo rereco āgua sese pe yeroyasa pípe. Iyavei pe poroaisusa pípe pe yemoviracua catu āgua peyese <sup>18</sup>‘toicatu opacatu ambuae Jesús reroyasareta reseve Cristo poroaisusa tuvichá vahe ité renducua tupri

catu āgua yuvireco' viya pēu. <sup>19</sup>Che aheroqui ahe poroaisusa peicua tupri catu āgua rese (yepē ndayaicatui icuapa tupri āgua yaico viña). Ipipe sui Tūpa tasecoi pe rese.

<sup>20</sup>Cūrītei yamboetei yande Ru Tūpa. Esepia niha, ahe opīratasa pipe ombouvicha catu itera mbahe yande porandusa sui, yande pihañemoñetasa sui avei yandeu. Esepia, opīratasa pipe oporaviqui yande rese. <sup>21</sup>¡Sese ěgüe tehi imboeteipri Tūpa tasecoi seroyasareta recocuer sui, Jesucristo sui avei apirēhi vaherā!

### Ava Espiritu rese oyoya guasu yuvirecoi vahe

**4** Sese Cristo recocuer mombehusa sui che roquendasa pipe, “Peico tuprira pe cuaita rupi Tūpa pe renoisa pipe” ahe pēu. <sup>2</sup>Peyemominira peico pe reco aviyesa pipe, pe reco mbegüesa pipe aveira iyavei peñemosañō pe yeaisusa pipe peyeupe. <sup>3</sup>Peyapo opacatu pe recocuer pipe peico tupri vite āgua peypāhuve Espiritu Santo pe pītiviisa pipe, pe reco tuprisa pipe avei. <sup>4</sup>Yaico ñepe nungar Cristo rese iyavei yareco ñepe Espiritu. ěgüe ehi avei Tūpa yande poravo ñepe guārosa rereco āgua. <sup>5</sup>Oime ñepe yande Yar, ñepe yande yeroyasa, oime avei ñepe poroāpiramosa. <sup>6</sup>Oime ñepe Tūpa, ahe opacatu yande Ru, opacatu yande cuaisar, ahe oporaviqui opacatu yande rese, secoi avei yande rese no.

<sup>7</sup>Iyavei Cristo niha yande yacatu ñepe-pe mbahecuasa ombou. <sup>8</sup>Sese aipo ehi icuachiapri aracahendar pipe: “Oso ivave, viraso secopipireta oyeupi; omondo avei porerecosa ava upe” ehi.

<sup>9</sup>¡Mara oya aipo ehi: “Oso ivave”? Yipindar ogüeyi co ivi pipe. <sup>10</sup>Acoi ogüeyi vahe co ivi pipe oso ivate catusave ‘taico opacatu rupi’ oya. <sup>11</sup>Ahe

niha ombou amove apóstol seco āgua, ambuae upe ombou Vu ñehe mombehu āgua, ambuae upe ombou ñehesa pīsirosa mombehu āgua, ombou avei ambuae upe viroyasar rāro āgua iyavei iporombohe āgua. <sup>12</sup>Ěgüe ehi ava viroyasar mbohe oyeupe mboraviqui apo ambuae viroyasar moviracua tupri catu āgua. <sup>13</sup>Opacatu yaico tupri rane itera oyese Jesús rese yeroyasa pipe iyavei yaicua tuprira Tūpa Rahir recocuer. Ahese yaico tuprira yande Cristo rese inungar ava ipihañemoñeta tupri catu vahe, ahese yasupitira Cristo recocuer yaico. <sup>14</sup>Evocoyase ndahe iri chira chíhivahe tēi nungar ova-ova tēi vahe yaico inungar-ra que ivitu yande reraso vahe oyeupi. Ndayayembopa uca iri chira ava co coti tēi oporombohe vahe upe, que yande rerova pota vahe upe mbahe tēi pipe. <sup>15</sup>Yande rumo evocoyase yañehera mbahe supi eté vahe rese poroaisusa pipe iyavei yaroya catu-catu irira Cristo opacatu yande recocuer pipe. Ahe niha yande rereciar secoi. <sup>16</sup>Esepia, ahe yande mboya tupri oyese, yande moenda tupri avei yande rereco, ěgüe ehi ahe yande mboyemboya oyese ñepe vahe nungar. Ñepe-pe yaporaviqui tuprise, ahese opacatu yayeroya catu itera, yayemoviracua catu aveira yande yeaisusa pipe.

### Cristo yande recocuer mbopiasu

<sup>17</sup>Che aipo ahe Tūpa rer pipe pēu che pe cuaisa pipe: peico iri eme ava Tūpa cuaparēhi nungar. Ahe yuvirecoi vahe ité opihañemoñeta raisa pipe, <sup>18</sup>ndoicatu mbahe renducua tupri āgua iyavei ndovirecoi tecovesa Tūpa suindar oyese yuvireco. Esepia, ndoicuai Tūpa ñehe opihañemoñetañehisa pipe yuvireco. <sup>19</sup>Ndoyuvinochi iri mbahe tēi apo āgua iyavei oyemondo ité mbahe tēi pipe. Ndosiquiyei eté opacatu

güemimbotarai apo água yuvireco. <sup>20</sup>Pe rumo ndapeyembohei eté evocoi nungar mbahe rese Cristo rese peicose, <sup>21</sup>supi eté pesenduse porombohesa supi tupri vahe Jesucristo resendar iyavei peyembohese secocuer rese. <sup>22</sup>Ahe yande mbohe yande recocuerai yipindar vahe reya água. Esepia, ahe naporai vahe yande mbopa tēi yande pihañemoñeta rai apo água. <sup>23</sup>Pesecuñaro catu pe yapisacasa. <sup>24</sup>Peicoño ité avei pe recocuer piasu pipe. Sese niha Tūpa yande apo yande reco ïvi tupri água yande reco maranehi vahe rā supi tupri vahe pipe, inungar ahe.

<sup>25</sup>Sese ndaperemira iri chira, iya rumo peñehe ñepeï-peï mbahe supi tupri vahe rese peyeupe. Esepia niha, yande opacatu ñepeï ava rete resendar nungar yaico.

<sup>26</sup>Peyemboangaipei rene peñemoirose, iyavei ndiyai peñemoiro ari momba peico. <sup>27</sup>Peipota ucai rene Carugar upe peyeupe mbahe apo água.

<sup>28</sup>Acoi imonda rai vahe, timonda iri eme; toporaviquiño ava iparaisu vahe pītivii água.

<sup>29</sup>Ndapeñehe rai chira, iyacatu rumo peñehe tuprira ñehesa aviye vahe pipe ambuae pe ñehe rendusar monguerēhi catu água yuvireco yande Yar rese. <sup>30</sup>Peyapoi rene mbahe Espiritu Santo mbovihanēhi água. Ahe niha Tūpa ombou yandeu ‘toicua ava co cheundar oipisira ari ipa vahe pipe poropīsirosa ñepeï rese vahe yuvireco’ oya.

<sup>31</sup>Peyepēpi co nungar mbahe sui: piha vīracuasa, mbahe mboasi pīratasa, ñemoirosa, pe rāse aisa, opacatu pe ñehe rai, opacatu ambuae mbahe-mbahe tēi sui avei. <sup>32</sup>Iya rumo peico tupri ambuae upe pe yeaisusa pipe. Peñeroño itera peyeupe yepi inungar Tūpa iñero Guahir Cristo rese pēu.

### Mara ehira ava Tūpa rahir yuvireco

**5** Pe niha Tūpa rahir sembiaisu peico. Sese peyemonguerēhi catu secocuer moña água. <sup>2</sup>Peico pe poroaisusa pipe, inungar Cristo yande raisu iyavei oye-mondo yande recocuer rese, ovesa nungar seropovēhepri Tūpa uve. Ahe aviye ité inungar mbahe siacua vahe chupe.

<sup>3</sup>Pe niha Tūpa upendar ité peico. Sese ndapeyemboaguasai chietera iyavei ndapeicoi chira ambuae mbahe naporai vahe pipe, que yemombotasa opacatu mbahe rese. <sup>4</sup>Ndapeñehe rai chira que poromochisa rese, que ēgüe ehi tēi vahe rese, anise que co coti-coti tēi vahe rese. Esepia, evocoi nungar ndahei mbahe aviye vahe. “Aviye ndeu” peye catuñora rumo Tūpa upe peico. <sup>5</sup>Peicua niha acoi oyemboaguasa vahe, oyapo vahe mbahe naporai vahe, que yemombotasa (esepia, ahe inungar mbahe rahanga mboeteisa), evocoi nungar ndoyuvirecoi chira Tūpa povrive iyavei Tahir Cristo povrive. <sup>6</sup>Ndapeyembopa ucai chira evocoi nungar ñehesa tecocuer ēgüe ehi tēi vahe upe. Esepia, evocoi nungar mbahe apo pipe sui ou Tūpa ñemoirosa ava seroyasarēhi upe. <sup>7</sup>Sese ndapeyemboyai chira evocoi nungar ava rese.

<sup>8</sup>Peicua niha yipindar peico pītumimbisa nungar mbahe-mbahe tēi pipe. Cūrítei rumo peico tesapesa nungar pipe yande Yar rese. Sese peico tupriño ité Tūpa suindar poroesapesa pipe. <sup>9</sup>Esepia, poroesapesa pipe yande recose, yayapo opacatu mbahe tupri ava upe yande reco ïvi tuprisave, mbahe supi tupri vahe pipe. <sup>10</sup>Sese peyembohe catu mbahe Tūpa piha rupindar apo água rese. <sup>11</sup>Peyepēpi ité opacatu pītumimbisa nungar ava rembiapo ai, ēgüe ehi tēi vahe sui. Iya peicua uca voira co nungar mbahe. <sup>12</sup>Esepia, ahe sembiapo yemochisa ñomipri tēi vireco yuvireco. <sup>13</sup>Acoi yamboyecua ucase rumo evocoi

nungar mbahe tesapesa nungar pipe, ahese oyecua tupri secocuer naporai vahe. <sup>14</sup>Esepia, co tesapesa omboyecua tupri opacatu mbahe recocuer yandeu. Sese aipo ehi:

“Peyemopoãse pe oque vahe nungar, peyepipi omano vahe nungar pãhu sui.

Ahes niha Cristo pe recocuer resapera” ehi.

<sup>15</sup>Sese pemahecua tupri pe recocuer rese. Peicoi rene ndayaracuai vahe nungar; peicora rumo pe yapisaca tuprisa pipe. <sup>16</sup>Peiporu catu ñepei-pei ari yande Yar upe nara pe recovesave. Esepia, cūritei tecocuer co ivi pipe mbahe tēi. <sup>17</sup>Sese peico eme ndoyemboaracuai vahe; iya rumo peyembohe catu yande Yar remimbotar apo ãgua. <sup>18</sup>Ndahei chira caguar tēi peico, evocoi mbahe ndoporopoisui mbahe tēi apo uca ãgua. Peico catura rumo Espiritu Santo pe mbohesa pipe. <sup>19</sup>Peñehe catu Salmo pipe, opacatu Tūpa upendar sapucaisa pipe avei peyeupe; pesapucaí, pemboetei avei opacatu pe piha pipe yande Yar. <sup>20</sup>“Aviye” peyera opacatu mbahe rese yande Ru Tūpa upe yande Yar Jesucristo rer pipe yepi.

### Omenda vahe cuaitarã mbiguai reseve

<sup>21</sup>Peyemboyeroya catu ambuae rese Cristo mboeteisa pipe peico.

<sup>22</sup>Cuñã tomboyeroya omer, inungar yande Yar omboyeroya yuvireco. <sup>23</sup>Esepia, imer güembireco cuai ãgua secói, ãgüe ehi avei niha Cristo viroyasar cuai ãgua oico. Viroyasar Pĩsirosar avei secói, inungar güetecuer ité sereco. <sup>24</sup>Evocoiyase inungar seroyasar omboyeroya Cristo yuvireco, cuñã avei niha ãgüe ehira opacatu omer mboyeroya yuvireco.

<sup>25</sup>Iyavei cuimbahe osaisura güembireco, inungar Cristo osaisu

opacatu viroyasar, omondo güecocuer chupe nara. <sup>26</sup>Ëgüe ehi yande recocuer moatiro yande angaipa sui i pipe Tūpa Ñehengagüer rerozasave. <sup>27</sup>Iyavei oyeupe yande rerecora yande reco catuprisa pipe iyavei yande reco quihañhisa pipe ‘tipo eme que mbahe tēi secocuer rese’ oya, ‘toyuvirecoi cheu nara güeraño ité güeco tuprisave’ ohesa pipe. <sup>28</sup>Ëgüe ehi aveira ava güembireco raisu inungar ahe oyeaisu. Acoi ava osaisu vahe güembireco, oyeaisu ité ahe ae. <sup>29</sup>Supi eté, ndipoi eté que ava ndosaisui vahe güetecuer. Ahe rumo ocaruño ité oyemoviracua ãgua, oñearo tupri avei. Ëgüe ehi avei Cristo opacatu viroyasar upe. <sup>30</sup>Esepia, chupendar ité yaico setecuer nungar. <sup>31</sup>“Sese ava osepara vu, osi güembireco rese güeco ãgua; ñuvirío yuvirecoira ñepei ava nungar.” <sup>32</sup>Ahe ñehesa pipe oime mbahe oyecua ramo vahe aviye vahe ité. Ahe Cristo opacatu seroyasareta resevendar ñehesa. <sup>33</sup>Ëgüe ehi eté ñepei-pei pesaisu pe rebireco pe yeaisu nungar. Iyavei cuñã tomboetei tupri omer yuvireco.

**6** Chihivahe, pemboyeroya pe yesupa, pe si avei yande Yar raisu pipe. Esepia, ahe niha pe cuaita. <sup>2</sup>Co porocuaíta yipindar omombehu vahe porovasasa pisi ãgua imboaviyasa pipe aipo ehi: “Pemboeteira pe ru, pe si avei. <sup>3</sup>Ëgüe peyese, pe rorivetera iyavei pe reco pãhumbucu catura co ivi pipe” ehi.

<sup>4</sup>Iyavei pe iyepupa, pemomemoiro ucai rene pe rahir. Iyacatu rumo pemboacua imboaracuasa tupri pipe, imbohesave avei yande Yar upe saisusa pipe.

<sup>5</sup>Pe avei no mbiguai, pemboyeroya catura pe rerecuar co ivi pipe imboeteisave. Ichui pe siquiyepave avei mbahe tupri pipe mbahe peyapora inungar-ra Jesucristo upe ité mbahe peyapo vaherã viña. <sup>6-7</sup>Peaporaviqui tupri catu chupe nara, ndahei chira

rumo pe repiaseño imboviha água tēi; peporaviquirá rumo pe querēhisa pipe Cristo rembiguai pe recosa pipe opacatu pe rorivetesave yande Yar upe pe cuaita mboaviye tupri água. <sup>8</sup>Esepia, peicua Tūpa omboepira opacatu yandeu yayapose mbahe aviye vahe mbiguai yaicose, anise que ndahei vahe mbiguai avei.

<sup>9</sup>Iyavei pe serecuar, peico tupri aveira pe rembiguai upe pe recoasiēhisa pipe. Peicua niha pe opacatu Tūpa pe rerecuar ivave chini vahe povrive peicose. Ahe niha ndayande raisu yoaviratii yande rereco.

### **Ava Cristo rese yuvirecoi vahe yoepisa resendar**

<sup>10</sup>Sese peyemoviracua catu yande Yar rese, ipīratasa rese avei. <sup>11</sup>Peñearo tupri catu Tūpa pīratasa pipe pe yemoviracua água Carugar pe mbopa tēiēhi água. <sup>12</sup>Esepia, yande ndahei ava ité amotarēhisave yayepīhamoviracua. Yande rumo yayepīhamoviracua espíritu naporai vahe ndoyecuai vahe upe iyavei co ivi pipendar Carugar ipīrata vahe pītumimbisa pendar reroyaēhi água. <sup>13</sup>Sese peipisi catu opacatu mbahe Tūpa ombou vahe pēu pe yoepi água. Evocoiyase yepe oime tēira mbahe tēi pēu viña, peyemoviracuaño itera rumo chupe.

<sup>14</sup>Ēgüe peye aveira peyemoviracua catu ñehesa supi tupri vahe pipe. Iyavei peyoepira pe reco ivi tupriisa pipe. <sup>15</sup>Peyemoingatu voi Tūpa Ñehengagüer ñeroisa resendar mombehu água yepi. <sup>16</sup>Iyavei pereco catu Tūpa rese pe yeroyasa peyese. Ahe inun-

gar sundao yoepisa. Ipipe peyoepira carugar uhu tata resendar nungar pe átoisa sui. <sup>17</sup>Poropisirosa inungar sundao áca ndiru, ipipe tapeyoepi; peiporu avei Tūpa Ñehengagüer, ahe niha inungar quise pucu Espiritu vireco vahe. <sup>18</sup>Peyeroqui catu Espiritu pīratasa pipe ari yacatu rupi Tūpa upe opacatu yeruresa pipe. Pemahemoha catuño ité pe yeruresa pipe. Peyeroquiño ité avei opacatu ava Tūpa reroyasar rese yepi. <sup>19</sup>Peyeroqui avei che rese. Evocoiyase Tūpa tombou che ñehes água che siquiyēhisa pipe ñehesa ñepisirosa icuapi ramo vahe cua uca água ava eta upe. <sup>20</sup>Tūpa niha che cuai co ñehesa mombehu água. Ichui tēi cūrítei soquendapri aico. Peyeroqui catu che rese che siquiyēhisa pipe co ñehesa mombehu água.

### **Ñehesa ipa vahe**

<sup>21</sup>Yande rivri Tíquico, yande rembiaisu, che pītiviisar omboaviye vahe ocuaita yande Yar upe mboraviquisa rese, ahe omombehura opacatu che recocuer, mbahe che rembiapo avei pēu. <sup>22</sup>Sese amondo eipeve pēu ore recocuer mombehu água 'ipipe toyemonguerēhi catu yuvireco' viya.

<sup>23</sup>Yande Ru Tūpa iyavei yande Yar Jesucristo tomondo opacatu viroyasar upe teco catupri água, iporoaisu água, oyese yeroya água avei. <sup>24</sup>Tūpa tosovasa opacatu yande Yar Jesucristo raisu par saisusa ñepeí reseve vahe pipe. Aipo rupive.

*PABLO REMBICUACHIA  
FILIPO PENDAR UPE*

**FILIPENSES**

**Pablo mahenduhasa Jesús  
reroyasar Filipino pendar upe**

**1** Che, Pablo, iyavei Timoteo oroico Jesucristo rembiguai. Aicuachía co che ñehe pëu, pe Tüpa upendar Jesucristo rese peico vahe tecua Filipino ve, Jesús reroyasar rãrosar uve, seroyasar rese ihañeco vahe upe avei. <sup>2</sup>Yande Ru Tüpa, yande Yar Jesucristo tape rovasa pe reco tupri ãgua.

**Pablo yeruresa Jesús reroyasar rese**

<sup>3</sup>Pe rese che mahenduhasa pipe, “Aviye ndeu” ahe Tüpa upe yepi. <sup>4</sup>Iyavei che ayerurese, ari rupi ayeroqui opacatu pe rese Tüpa upe che viharetesa pipe yepi. <sup>5</sup>Esepia, oyoya yañepitívii Jesucristo resendar ñehesa icatupri vahe rese, acoi pe seroya ramo suive. <sup>6</sup>Che aicua co Tüpa omboipi mbahe aviye vahe güemimbotar apo pe rese, ahe omboaviye tupri itera acoi ari pipe oyevise yande Yar Jesucristo.

<sup>7</sup>Aviye ité aipo rupi che pihãñemoñeta areco opacatu pe rese. Esepia, che opoaisu ité. Opacatu niha oyoya yaipisi Tüpa porovasasa yepe co che roquendasave añ, anise que co coti rupi aico mborerecuar rovai co ñehesa pĩsirosa resendar repi ãgua iyavei amboyecua vaheerã ahe ñehesa supi tupri vahe yuvireco chupe. <sup>8</sup>Tüpa oicua ité che opoaisu etepri opacatu. Esepia, Jesucristo niha pe raisu uca cheu. <sup>9</sup>Che aporandu vite Tüpa upe che yeruresa pipe: “Toicua tupri oaracuasa pipe oyeaisu catu-catu iri ãgua yuvireco” ahe pëu. <sup>10</sup>Ipipe sui peicuara mbahe aviye catu vahe poravo ãgua yepi; ëgüe peye aveira

pe recocuer moatiro ãgua peico. Evo-coiyase ndipoi chira angaipa pe rese acoi Jesucristo ouse curi. <sup>11</sup>Perecora pe recocuer aviye vahe ité Jesucristo ombou vahe pëu Tüpa mboetei ãgua.

**Cristo Pablo recovesa ité secoi**

<sup>12</sup>Che rivireta, aipota peicuara co mbahe tõi co oyapo vahe yuvireco cheu, ahe ichui setã catu ava osendura Jesucristo resendar ñehesa yuvireco. <sup>13</sup>Evocoyase opacatu mborerecuar guasu poraviquisa pendar iyavei opacatu ambuae ava oicuapa che roquendasas Jesucristo rupi che guata sui tõi yuvireco. <sup>14</sup>Iyavei setã etepri yande rivri che repiase soquendapri che recose yuvireco, oyemonguerëhi catu Tüpa Ñehengagüer mombehu ãgua osiquiyeëhisa pipe. Yande Yar rese evocoyase oyeroyã catu yuvireco.

<sup>15</sup>Supi eté oime ava oñehe angahu tõi vahe Jesucristo rese che roerõrosa pipe tõi. Oime rumo amove ava oñehe tupri Jesucristo rese opihãñemoñeta tuprisa pipe. <sup>16</sup>Evocoi ava oñehe tupri oporoaisusa pipe, ahe oicua cohava che roquendasas yuvireco, “Co ñehesa Tüpa ñehe pĩsirosa resendar, ahe supi eté vahe, ndahei temira tõi” ahese. <sup>17</sup>Evocoi ambuae ava Cristo rese oñehe angahu tõi vahe oyeupe nara tõi oipota mbahe. Ahe che reco momara pota catu co che roquendasave che rõi vitesave. <sup>18</sup>Mara etemo che areco aipo mbahe-mbahe tõi viña. Yepe amove ava ipihãñemoñeta rai yuvireco viña, opacatu rumo ñehesa Cristo rese. Ahe niha che mboviha.

Che mboviha catu aveira. <sup>19</sup>Esepia, che aicua co opacatu mbahe-mbahe tõi sui añepisiora pe yeruresa pipe iyavei che pĩtívira Jesucristo Espiritu. <sup>20</sup>Che aipota ité, asãro avei opacatu che recocuer sui che chĩëhi ãgua añehe vaheerã opacatu che siquiyeëhisa pipe. Evo-coiyase yepe amanora, anise aicovera,

tomboetei catu ava Cristo che recocuer repiase yuvireco. <sup>21</sup> Esepia, Cristo che recovesa ité secói; amanose rumo, aviyeño itera cheu. <sup>22</sup> Aicove vitesse co ivi pipe, aicatura aporaviqui tupri yande Yar recocuer rese. Evocoiyase ndaicuai uma revo aviya cheu. <sup>23</sup> Ndaicatu co ñuvirío che pihañemoñetasa rereco: amove amano pota che so água ivave Cristo piri. Ahe aviye catura cheu viña. <sup>24</sup> Pëu nara rumo aviye catu aicove vitesse co ivi pipe. <sup>25</sup> Sese che aicua aicove vite vaheerã pe pítivii vite água, pe guata tupri vite catu água iyavei pe viharete catu água pe Jesús reroyasa pipe. <sup>26</sup> Evocoiyase che rereco vitera peye pe piri. Ahese pe viharetesa pipe, “Imboetepri Jesucristo tasecoi” aipo peyera che repiase.

<sup>27</sup> Co catu toyoya tupri pe recocuer co ñehesa aviye vahe Jesucristo resendar rese. Evocoiyase asose pe repia, anise amombri aicose pe sui, asendu pota pe resendar ñehesa aviye vahe, pe yemoviracuasa resendar, pe pihañemoñetasa yoyasa resendar iyavei pe poraviqui pīratasa resendar pe poreroyasave co ñehesa poropīsirosa resendar rese. <sup>28</sup> Iyavei ndapeyembosiquiyei chira pe amotarēhimbar sui. Evocoiyase ahe oicuara yuvireco chupe ité Tūpa omondora imocañi água; pe rumo Tūpa pe pīsirora curi. <sup>29</sup> Supi eté ndahei Jesucristo recocuer reroya água güeraño Tūpa oipota pëu, sese pe yemombaraisu água avei oipota. <sup>30</sup> Esepia, pe, che avei oyoya tupri yaporaviqui pīrata yande amotarēhimbar pāhuve yaico. Iyavei acoi pesepia yipīndar che aporaviqui pīrata che amotarēhimbar pāhuve vichico, iyavei cūrítei peyandu mara ahe aporaviqui pīrata vite ipāhuve yuvireco.

### Cristo yemominisa, seco ivatesa resendar avei

**2** Iyavei Cristo pe monguerēhi, pe mboviha oporoaisusa pipe oico, Espiritu avei secói pe rese. Peyeaisu tupri iyavei pe yeaisusa pipe peñepitívii. <sup>2</sup> Sese che mboviha catu peye: perecora pihañemoñetasa ñepeí reseve, oyoya guasu avei peyeaisura, oyoya aveira pe pihañemoñetasa, ñepeí reseve mbahe pe remimbotar rese avei. <sup>3</sup> Ndapeyapoi chira mbahe peyeupe güeraño tēi. Ndapeyapoi chiveira mbahe pe yemboivate aisave. Iyacatu rumo pe reco yemominisa pipe ambuae aviye catu perecora peyesui. <sup>4</sup> Pesecai rene mbahe aviye vahe peyeupe nara güeraño; iyacatu rumo peseca avei mbahe aviye vahe ambuae ava reco tupri água.

<sup>5</sup> Inungar Cristo pihañemoñeta, ēgüe peye tupri aveira.

<sup>6</sup> Yepe ahe Tūpa recocuer vireco, “Taseya eme Tūpa recocuer areco vahe ivive che so água” ndehi.

<sup>7</sup> Opa ité rumo oseya, oyemboava inungar mbiguai tēi ou.

<sup>8</sup> Ēgüe ehi oyemomini.

Vu porocuita reroyasa pipe ou iyavei omano poromochisa pipe curusu rese.

<sup>9</sup> Sese Tūpa omboivate catu, omondo avei sererguã ivate catu vahe opacatu ambuae rer sui.

<sup>10</sup> Evocoiyase ahe terer ivate catu vahe renduse ‘toñenopiha opacatu iva pendar, ivi pipendar, opacatu omano vahecuer avei yuvireco’ oya.

<sup>11</sup> Ichui toicua opacatu, “Jesucristo ité yande Yar” tehi yande Ru Tūpa mboetei água yuvireco.

### Jesús reroyasar tesapesa nungar yuvirecoi co ivi pipe

<sup>12</sup> Evocoyase che rembiaisu, yepe che amombri aico pe sui viña, iya rumo pe che roroya vite ité peye inungar aicose pe pãhuve cuese. Che aipota peicora písrosa pipeño ité Tüpa mboetisave ichui pe siquiyesa pipe. <sup>13</sup> Esepia, Tüpa ombou pe querêhisa semimbotar apo âgua. Güemimbotar rupi avei ombou pîratasa imboaviye âgua pëu.

<sup>14</sup> Peyapo opacatu mbahe pe ñehene ñehene têihisa pipe, pe yepoepi-epiêhisa pipe avei. <sup>15</sup> Sese tipo eme mbahe pe rembiavi que pe reco raisa pe rese. Evocoyase peicora Tüpa rahir ndayangaipai vahe ava mbahe-mbahe têi oyapo vahe pãhuve. Ahe ipãhuve pe recocuer osesapera, inungar tataendi osesape pîtumimbisave. <sup>16</sup> Pemombehuse ñehesa tecovesa resendar yuvireco chupe, acoi ouse Cristo curi, aviharetera pe rese. Esepia, pe rese che poraviquisa êgüe ndehi têi vaherã. <sup>17-18</sup> Jesucristo recocuer rese pe yeroyasa, ahe inungar mbahe seropovêhepri Tüpa upe. Aviyeteramo ichui têi che yucara yuvireco. Ahe omboaviye tupri itera pe porerecosa Tüpa upe. Yepe che yucara yuvireco viña, che rumo ayembovihañora opacatu pe rese. Pe avei, pevihanora che rese.

### Pablo oicuachía Timoteo, Epafrodito recocuer resendar

<sup>19</sup> Che ayeroya yande Yar Jesús rese amondo pihaivi vaherã Timoteo pe repia. Ahe omboyevise ñehesa pe recocuer resendar, ahese che aviharetera. <sup>20</sup> Iyavei ndipoi eté ambuae ava Timoteo nungar che pihañemoñetasa rupi tupri imahenduha vahe pe rese pe reco tupri âgua. <sup>21</sup> Esepia, opacatu oseca güemimbotar têi apo âgua, ndosecai eté Jesucristo remimbotar yuvireco. <sup>22</sup> Pe niha peicua

Timoteo reco tuprisa opacatu upe. Iyavei che pítivii Tüpa Ñehengagüer mombehu âgua, inungar chíhivahe oipítivii oyesupa, êgüe ehi che pítivii oico. <sup>23</sup> Sese che aipota imondo âgua pe repia acoi aicuase mara ehira che rereco yuvireco. <sup>24</sup> Che rumo ayeroya yande Yar rese aso pihaivi vaherã che teieté pe repia.

<sup>25</sup> Iyavei revo aviye catu co yande rivri Epafrodito amboyevira pe piri ahe pembou vahe che pítivii âgua mbahe cheu ipane vahe rese. Ahe che ndugüer oporaviqui pîrata vahe Tüpa upe. <sup>26</sup> Esepia, ahe pe repia pota ité opacatu. Iyavei ahe ehiño oico pëu peicuase imbaheasi. <sup>27</sup> Supi eté imbaheasi oico, seni eté omano viña. Ipare rumo Tüpa oiparaisuereco, ndahei ahe güeraño oipítivii, che avei che paraisuereco co viharêhisa yeapi-apiñoêhi âgua cheu. <sup>28</sup> Sese che amondo pota poyava ité pe piri sese pe yemboviha iri âgua, che mboviha iri âgua avei. <sup>29</sup> Peipisi tupri pëu iye potase pe viharetesa pipe. Esepia, ahe yande rivri yande Yar rese secoi vahe ité. Pesaisu itera evocoi nungar ava yepi. <sup>30</sup> Yande Yar rese oporaviquise che piri seni omano. Ahe niha oyemondo ité mbahe-mbahe têi porara âgua che pítivii pipe. Esepia, pe ité ndapeicatu che pítivii peye.

### Oicoete ai vahe ité

**3** Iyavei, che rivireta, peyembovihaño yande Yar rese peicose. Ndachecuerai eté ñehesa aicuachía vahecuer cuachía iri âgua pëu. Iyavei aviye catu ité pëu nara. <sup>2</sup> Peñearo acoi ava cave nungar têi sui, oyapo vahe mbahe têi iyavei güetecuer omomara têi vahe. <sup>3</sup> Yande rumo imbocircuncidapri nungar supi eté vahe Tüpa mboyeroyasar yaico. Esepia, yayerure Espiritu pipe Tüpa upe; yayemboviha avei Jesucristo reroyasar yande recosa rese. Ndahei



yande retecuer rese tēi yayeroya, <sup>4</sup>yepé che supí eté ayeroya catura ambuae ava sui evocoi nungar mbahe rese viña. <sup>5</sup>Esepia, che imbocircuncidapri aico ocho ari pipe che hare, israelita, Benjamín suindar aico. Iyavei che hebreo, hebreo rahir avei aico no. Che yipindar fariseo recocuer areco. Evocoiyase ayembohe tupri fariseo aracuaa judío porocuaita resendar rese vichico. <sup>6</sup>Ipipe sui tēi eté aseca-seca catu ayapo vaherā mbahe opacatu ava Jesucristo reroyasar upe vichico. Co porocuaita reroyasa rese rumo ndipoi eté ava “mara” ehi vahe yuvireco cheu. <sup>7</sup>Opacatu co mbahe aviye ité cheu aracaco viña. Cūrítei rumo Jesucristo rese aicose, ěgüe ehi tēi vahe nungar areco. <sup>8</sup>Iyavei opacatu que ambuae mbahe aviye cheu viña, areco rumo inungar iti che Yar Jesucristo recocuer cuasa pipe. Opacatu ahe mbahe aseya Cristo rese che reco āgua. Supi eté Cristo rereco āgua areco opacatu ambuae mbahe iti nungar tēi <sup>9</sup>‘taico sese’ che yapave. Ndahei porocuaita mboaviyasa rese tēi aseca che reco catupri āgua, che rumo aseca Jesucristo rese che yeroyasa pipe sui ěgüe ahe vaherā. ěgüe ehi eté Tūpa che pisi seco catupri vahe nungar Cristo rese che yeroyasa pipe. <sup>10</sup>Che aipota ité Cristo cua tupri catu āgua. Iyavei areco pota pīratasa icuerayevi agüer resendar cheyese. Iyavei aipisi pota iparaisu agüer. Iyavei inungar ahe omano, ěgüe ahe pota avei. <sup>11</sup>Ěgüe tahe avei che cuerayevi āgua omano vahe pāhu sui, ahe co che asāro vichico.

**Pablo osupiti pota ité  
güeco maranehi āgua**

<sup>12</sup>“Asupiti ité opacatu co mbahe” ndahei eté. Iyavei, “Ndaseco marai vahe ité aico” ndahe vitei chietera. Che rumo aseca vite ahe tecocuer che recorā. Es-

epia, Jesucristo che pisi ité oyeupe nara. <sup>13</sup>Che rivireta, “Che ae tēi co tecocuer ihīvi vahe opa ité ayapo vichico” ndahei chira pēu. Co rumo mbahe che ayapo, ayemboesarai opacatu che reco agüer sui. Iyavei opacatu che recovesa rese aguata tenondeño ité. <sup>14</sup>Esepia, Tūpa che renoi ivave che so āgua aipisi va-herā iporerecosa iva pendar Jesucristo rese che recose. Ahe niha aipota catu ité cheyeupe nara.

<sup>15</sup>Aipo rupi iya yande pihañemoñetara opacatu yande yaracua tupri vahe. Que revo yande pihañemoñetase que ambuae mbahe rese tēi, ahe Tūpa oicua ucara yandeu. <sup>16</sup>Co rese rumo yaicora yande yembohesa yareco vahe rupi tupriño ité.

<sup>17</sup>Che rivireta, peico che nungar iyavei pemahecua tupri ava ore recocuer moñasar rese. <sup>18</sup>Iyavei amombehu setá yupagüer pēu, cūrítei amboyevi iri che yasehosa pipe imombehu pēu. Setá ité oime ava co ñehesa Cristo mano agüer curusu resendar amotarēhimbar. <sup>19</sup>Ahe rumo imocañipirā yuvirecoira curi. Oyemonguerēhi opacatu mbahe tēi apo āgua rese yuvireco yepi. Ahe niha otūpa nungar ité vireco. Iyavei güeco ivate aisa pipe oyapo mbahe tēi yande mochi ai vahe yuvireco. Co ivi pipendar mbahe-mbahe tēi reseño ité ipihañemoñeta yuvireco. <sup>20</sup>Yande rumo ivave nara ité yaico. Iyavei yasāro ité yaico iva sui ou vaherā yande Pīsīrosar, ahe yande Yar Jesucristo. <sup>21</sup>Ahe opīratasa pipe virecora opacatu mbahe opovrive. Ahe opīratasa pipe avei osecuñaropara yande retecuer ěgüe ehi tēi vahe, ahesse inungar ahe setecuer sendi yai, nimarai vahe, ěgüe yahe aveira yande yaico.

**Yayemboviha yande Yar rese yepi**

**4** Sese che rivireta, che rembiaisu, peyemoviracuara yande Yar rese yepi. Che niha opoepia pota ité. Pe in-

ungar porrecosa imboupri peico cheu. Esepia, che vihasa ité peico.

<sup>2</sup>Ambuae mbahe, Evodia iyavei Síntique toyuvirecoi oyecupihir nungar ité yande Yar reroyasa pipe yuvireco. <sup>3</sup>Nde niha che pítivii tupri vahecuer che poraviquisa rese eve. Eipítivii evocoi cuña. Esepia, ahe niha oyembopihaviracua ité che pítiviise Túpa Ñehengagüer pīsirosa resendar mombehu āgua yuvireco cuese. Oyoya Clemente rese iyavei ambuae oporaviqui vahe rese che rupi yuvireco. Ahe serer opa icuachiapri yuvireco Túpa cuachiar tecovesa apirēhi vahe resendar pipe.

<sup>4</sup>Peyemboviharete ari yacatu rupi yande Yar rese yepi, “¡Peyembovihaño ité!” ahe aipo pēu. <sup>5</sup>Pemboyecua catu opacatu ava upe pe reco mbegüesa. Esepia, cōimi yande Yar yevi iri āgua yandeu.

<sup>6</sup>“¿Mara ahera pīha vichico?” ndapeyei chira que mbahe rese. Iyacatu rumo peyerurera opacatu evocoi nungar mbahe rese Túpa uve, peporandura evocoi mbahe rese iyavei, “Aviye ndeu” peyera chupe. <sup>7</sup>Evocoyase Túpa omondora güeco tuprisa pēu, pe Jesucristo rese peico vahe. Co teco tuprisa niha aviye catu ité opacatu ava pīhañemoñetasa sui. Ipipe sui Túpa osārora pe piha, pe pīhañemoñetasa avei pēu.

#### **Yandepihañemoñetara opacatu mbahe aviye vahe rese**

<sup>8</sup>Co ipa, che rivireta: yande pīhañemoñetara opacatu mbahe supi tupri vahe rese, poromboetei āgua rese, mbahe ihīvi vahe rese, mbahe maranehi rese, mbahe yande mboviha vahe rese, opacatu mbahe aviye vahe icuapri vahe rese. Iyavei yande pīhañemoñetara que ambuae mbahe aviye vahe rese, imboeteipri vahe rese avei.

<sup>9</sup>Iyavei peyapo ité acoi mbahe che opombohe vahecuer, pesendu vahe che aipo ahese, che repia vahecuer yapose peye. Evocoyase Túpa güeco tuprisa reseve secoira pe rese.

#### **Filipo pendar porrecosa Pablo upe**

<sup>10</sup>Aviharete yande Yar rese. Esepia, pemahenduha irimi che rese pe porrecosa mbou āgua cheu. “Sesarai yuvireco che sui” ndahei chira pēu. Pe rumo yipindar ndapeicatu ité che pítivii āgua peye. <sup>11</sup>“Ipane mbahe cheu” ndahei chira pēu. Esepia, ayembohe che viharete āgua mbahe che rembiereco rese. <sup>12</sup>Aicua mara yahe yande paraisusa pipe yaico, aicua avei mara yahe mbahe rereco ati āgua. Ayembohe avei che viha āgua opacatu mbahe oimese cheu, que chehitarose, ndache riepoise, que oimese sumbire vahe mbahe cheu, que mbahe ipanese cheu. <sup>13</sup>Aicatu opacatu mbahe uve che yemoviracua āgua. Esepia, Cristo ombou che pīrata āgua. <sup>14</sup>Pe rumo peyapo mbahe aviye vahe cheu che pítivii etepisave peye mbahe mbahe tēi oimese cheu.

<sup>15</sup>Iyavei pe Filipino pendar peicua avei acoi yipindar peipisise pīsirosa resendar Túpa Ñehengagüer acoi che sose Macedonia sui, ndipoi eté Jesús reroysar ambuae tecua pendar iporereco vahe yuvireco che rese. Pe güeraño pembou pe porrecosa, “Aviye” pe hesa pipe che pítivii āgua. <sup>16</sup>Iyavei aicose Tesalónica ve, pembou pe porrecosa cheu ñuvirío yupagüer che pítivii āgua. <sup>17</sup>Ndachepihañemoñetai mbahe arocuano tēi vaheerā pe sui. Che rumo aipota Túpa omboyevira pēu co pe porrecosa pembou vahe cheu. <sup>18</sup>Che opa aipisi pe porrecosa Epafrodito upe pembou vahe. Evocoyase oimeño ité iyavei sumbire vite cheu. Ahe pembou vahe cheu aviye ité, inungar itaisi siacua vahe, iyavei inungar mbahe seropovēhepri aviye vahe

Tūpa upe. <sup>19</sup> Evocoyase yande Ru Tūpa, ombahe eta porañete vahe sui omondora opacatu mbahe ipane vahe pēu Jesu-cristo rese oime vahe. <sup>20</sup> ¡Ēgüe tehi tim-boeteisa yande Ru Tūpa! ¡Ahe apirēhi vahe secoi yepi!

### Ñehesa ipa vahe

<sup>21</sup> Aviye, pemombehu che mahenduhasa opacatu Tūpa reroyasar Jesu-

cristo rese yuvirecoi vahe upe eipeve. Iyavei opacatu Jesús reroyasar yuvirecoi vahe che rese, ahe avei omondo omahenduhasa yuvireco pēu. <sup>22</sup> Iyavei opacatu ambuae yuvirecoi vahe cohava Jesús reroyasar iyavei acoi mborerecuar guasu rētave yuvirecoi vahe, ahe ité avei omondo omahenduhasa yuvireco pēu.

<sup>23</sup> Yande Yar Jesucristo tape rovasa opacatu. Aipo rupive.

*PABLO REMBICUACHIA  
COLOSA PENDAR UPE*

**COLOSENSES**

**Pablo mahenduhasa Jesús  
reroyasar Colosa pendar upe**

**1** Che, Pablo, Jesucristo apóstol aico Tüpa remimbotar rupi yande rivri Timoteo reseve. <sup>2</sup>Co aicuachía pëu, pe Cristo rese peico tupri vahe Colosa ve, Tüpa upendar peico vahe. Yande Ru Tüpa tape rovasa, tombou pe reco tupri ägua pëu.

**Pablo yeruresa Jesús reroyasar rese**

<sup>3</sup>Ari yacatu ore yeroqui pipe, “Aviye ndeu” orohe yande Yar Jesucristo Ru Tüpa upe pe rese. <sup>4-5</sup>Esepia, oroyandu acoi oyepota ramosé Tüpa ñehe supi eté vahe, aviye vahe pïsirosa resendar pëu, peyapisaca tupri sese. Ipipe sui peyeroya ivave pe reique ägua Tüpa porerecosa pisi ägua. Ahe ichui peyeroya tupri Jesucristo rese iyavei pesaisu opacatu ambuae Tüpa rembiporavo yepi. <sup>6</sup>Co ñehesa imombehusa avei opacatu ivi rupi, setá ava oipisi tupri avei yuvireco. Inungar acoi pesenduse yipindar Tüpa porovasasa resendar ñehesa, ipipe sui peicua tupri catu ahe porovasasa supi eté vahe. <sup>7</sup>Co ñehesa yande rembiaisu yande mboetasa Epafras pe mbohe. Ahe mbia yande Yar Jesucristo rese oporaviqui vahe ore rupi, ocuaita viroya tupri vahe pe pãhuve. <sup>8</sup>Ahe omombehu oreu Espiritu pipe pe ore raisusa resendar.

<sup>9</sup>Sese avei ore aipo nungar rendu ramoséve ndoroyeroquipai pe rese. Oroyeroqui, oroporandu pe rese ‘toicua tupri opacatu Tüpa remimbotar ombahecuasa Espiritu suindar pipe,

senducua tuprisa pipe avei yuvireco’ ore yapave pëu. <sup>10</sup>Ipipe sui tapeguata tupri yande Yar rupi seroyasar tupri pe recosa pipe. Tapemboaviye tupri opacatu semimbotar; mbahe pe rembiapo tupri pereco catu sovaque. Ipipe sui avei tapeicua tupri catu Tüpa recocuer peico. <sup>11</sup>Iyavei tombou catu pe momirata ägua güecocuer pïratasa pipe sui. Evocoiyase oimese que mbahe tēi pëu, peñemosañora pe reco mbegüesa pipe. <sup>12</sup>“Aviye ndeu” peyera pe viharetsa pipe yande Ru Tüpa uve. Esepia, ahe omoingatu pe recocuer peipisi ägua iporerecosa oime vaheerã opacatu sembiporavo upe acoi yuvirecoi vahe Tüpa poroesapesa pipe. <sup>13</sup>Ahe niha yande pïsiro Carugar povri sui. Ëgüe ehi yande reraso Guahir güembiaisu povrive. <sup>14</sup>Ahe Tahir yande pïsiro iyavei yande angaipa rese iñero yandeu.

**Jesús omano curusu rese Tüpa upe  
opacatu mbahe moingatu ägua**

<sup>15</sup>Jesucristo niha omboyecua uca Vu recocuer ndoyecuai vahe güecocuer pipe. Ahe avei niha yipisuive ivate catu vahe opacatu mbahe yapopri sui. <sup>16</sup>Esepia, Tüpa niha opacatu mbahe oyapo uca Guahir upe aracahe: ivive, ivave avei; oyecua vahe, ndoyecuai vahe avei no. Ipipe sui avei yapopri opacatu iva pendar mborerecuar, mborerecuar guasu iyavei mborerecuar ivate catu vahe. Ëgüe ehi ipipe sui opacatu mbahe yapopri, chupe nara avei. <sup>17</sup>Ahe oicove yipisuive aracahe opacatu mbahe reimeēhi viteseve. Ahe avei omoime vite opacatu mbahe yandeu. <sup>18</sup>Iyavei ahe niha yande rerecuar tenonde secoi yandeu opacatu seroyasar yaico vahe. Esepia, ahe rane yipindar vahe iyavei ahe rane avei ocuerayevi. Evocoiyase ahe ivate catu vahe opacatu sui. <sup>19</sup>Esepia, Tu oipota opacatu güecocuer reseve secoi

āgua sese yepi. <sup>20</sup>Iyavei ‘che Rahir recocuer pipe sui taroyevi iri opacatu mbahe cheyeupe ivi pipendar, iva pendar avei’ oya. Ēgüe ehi Jesús oipiyere vuvü curusu rese Tüpa upe opacatu mbahe moingatu āgua.

<sup>21</sup>Yipindar pe pihañemoñeta raisa pipe sui tēi amombri Tüpa sui peico yamotarēhisa pipe mbahe pe rembiapo ai rese. <sup>22</sup>Cūrítei rumo Tüpa iñero pēu pe reroyevi oyeupe Cristo mano pipe. Ahe niha ēgüe ehi Vu rovai ipehapri pe rereco oyeupe nara, pe reco maranehi āgua mbahe aviēhisa pipe ava rovaque. <sup>23</sup>Ēgüe peye āgua rumo peyemoviracuaño itera Cristo rese pe yeroyasa pipe yepi. Ndapeyepēii chiaveira mbahe oime vaherā rese pe yeroyasa sui pesendu vahe co ñehesa ñepisirosa resendar pipe. Ahe imombehusa opacatu ivi rupi. Che niha Pablo, icuapri, aico co ñehesa mombehu āgua.

### **Pablo icuaita Jesús reroyasar rese hañeco āgua**

<sup>24</sup>Cūrítei aviha pe rese che yemomborarasa pipe. Ēgüe ahe iporara che rete rese cohava vichico. Ēgüe ehi avei Cristo oyemomborara vite viroyasar rese. Esepia, yande seroyasar setecuer nungar yaico. <sup>25</sup>Jesús reroyasar pītivii āgua niha Tüpa che cuai. Sese amombehu opacatu iñehengagüer pēu pe reco tupri āgua rese. <sup>26</sup>Ahe ñehesa aracahe suive ndicuaisai vahe ité. Cūrítei rumo Tüpa omboyecua viroyasar upe. <sup>27</sup>Chupe ité omboyecua pota co ñehesa porañete vahe omboyecua ramo vahe ava ndahei vahe judío upe. Co ndicuaisai vahe, ahe Cristo pe rese secoi vahe. Co yande remi-aro yareco vaherā teco ori porañete vahe curi.

<sup>28</sup>Ore niha Cristo recocuer omombehu opacatu ava upe. Orombohe avei ava yaracua tupri āgua ore aracuasa pipe ‘toyuvirecoi tupri ité

Cristo rese Tüpa rovai’ ore hesa pipe. <sup>29</sup>Co rese niha che aporaviqui etepri opacatu Cristo pīratasa pipe.

**2** Che aipota peicua che yemboaquisa pe recocuer rese, Laodicea pendar recocuer rese, setá ambuae ava che cuaparēhi recocuer rese avei <sup>2</sup>‘toyemonguerēhi catu, toyemboyoya guasu oyeaisusa pipe yuvireco’ viya. Iyavei ‘senducua tuprisa pipe toyuvirecoi mbahe tupri pipe’ viya opacatu pēu. Esepia, ichui avei peicua tuprisa co mbahe imboyecuapi ramo, ahe niha Cristo. <sup>3</sup>Ahe vireco opacatu mbahe yande mboaracua āgua, mbahe renducua tupri āgua avei. <sup>4</sup>Aipo mbahe amombehu pēu ava oñehe tupri aisa pipe tēi pe mbopaēhi āgua. <sup>5</sup>Iyavei yepe amombri aico pe sui viña, pe rese chemahenduha pipe rumo aicoveño pe reseve yepi. Aicua peguata tupri aise pe reco ñvisa pipe, ndapeyepēiise co coti rupi Jesucristo reroyasa sui. Sese che mbovihareteño ité peye.

### **Jesús suindar tecocuer piasu**

<sup>6</sup>Evocoiyase inungar acoi peipisi Jesucristo pe Yarā, ēgüe peye aveira peico sese ari yacatu rupi <sup>7</sup>pe yemoviracua pipe. Pe yembohesa rese peyemomirata catura Cristo rese pe yeroyasa pipe. Iyavei, “Aviye ndeu” peye itera Tüpa upe ari yacatu yepi.

<sup>8</sup>Peicua catu, peyembopa ucai rene aracahendar tēi ava aracuasa pipe. Esepia, ahe ēgüe ehi tēi vahe, ava suindar tēi yembohesa, ivi pipendar ava seco ivate catu vahe pihañemoñetasa tēi. Ndahei Cristo suindar porombohesa.

<sup>9</sup>Esepia, Cristo vireco opacatu Vu Tüpa reco oyese. <sup>10</sup>Evocoiyase pe pereco Tüpa reco Cristo rese peicose. Ahe opacatu mborerecuar ivi pipendar iyavei iva pendar rerecuar secoi. <sup>11</sup>Iyavei sese peicose, ahese inungar imbocircuncidapri peico. Ndahei rumo

pe rete rese iyavei ndahei ava rembiapo tēi. Co rumo Cristo oyapo vahe pe recocuer rese. Esepia, ahe virocuva pe recocuerai pe sui. <sup>12</sup>Pe āpiramosa pipe ndoyavii pe recocuerai ñotimbri Cristo reseve. Ēgüe ehi avei ndoyavii pe recocuer ocuerayevi vahe seseve avei, peyeroyase Tūpa pīratasa rese. Ahe niha ombogüerayevi vahe Guahir omano vahe pāhu sui. <sup>13</sup>Pe niha acoi cuese omano vahe nungar peico Tūpa upe pe angaipa pipe, pe ndahei vahe judío peico vahe. Ahe rumo pe recocuer mbogüerayevi Guahir reseve iyavei iñero pe angaipa rese pēu. <sup>14</sup>Ahe yande cañi rāgüer rumo opa omboepi. Esepia, yande iporocuaita pipe yaico imboaviye āgua viña, evocoyase imocañipri tēi yaico ipovrive viña; ombou rumo Guahir curusu rese yatica āgua yande cañi rāgüer sui yande renose āgua. <sup>15</sup>Ēgüe ehi ahe omano pipe curusu rese carugar, ipovri pendar mborerecuareta reseve secopi. Ēgüe ehi seco reroyi, inungar vavasa pendar ipisipri serasosa opacatu ava rembiepiave.

### **Peseca iva pendar mbahe pe recocuer upe nara**

<sup>16</sup>Evocoyase toñehe-ñehe tēi eme que ava pe rembihi rese yuvireco, pe igua rese avei; anise que ndapemboeteise judío pieta, que ari, yasi osē ramomi vahe, anise que judío ari mbituhusa avei no. <sup>17</sup>Esepia, opacatu co mbahe, ahe yipindar vahe, “Ēgüe ehira Cristo ou” hesa tēi yandeu. Co rumo Cristo ité cute. <sup>18</sup>Peyapisacai rene acoi ava “ndapeipisii chira porerecosa iva pendar ndaperoyaise ore ñehe” ehi tēi vahe rese pēu. Acoi ava “Tūpa rembiguai pemboeteira” ehi tēi vahe yuvireco. Ahe avei, “Che seco mbegüe vahe aico” ehi angahu tēi. Iyavei, “Che asepiā che quer nungar pipe iva pendar mbahe” ehi tēi. Esepia, ahe oyemboivate

ai oaracua rai tēisa pipe yuvireco. <sup>19</sup>Evo-coi rumo ndoyuvirecoi yande cuaisar Cristo rese yuvireco. Ahe omoviracua vahe opacatu viroyasar yepi. Evocoyase ahe omboyemboya tupri oyese, ñepe vahe nungar vireco oyeupe Vu Tūpa remimbotar rupi.

<sup>20</sup>Pe omano vahe nungar peico Cristo rese. Evocoyase ndahe iri co ivi pipendar pihañemoñetasavrive peico. ¿Maha herā evocoyase peroya vite co ivi pipendar porocuaita ēgüe ehi tēi vahe, <sup>21</sup>inungar “pepocoi rene co mbahe rese, pehui rene evocoi nungar mbahe” ehi tēi vahe? <sup>22</sup>Opacatu co nungar porocuaita ocañi tēi vahe. Esepia, ahe ava remimbotar tēi yembohesa, iporocuaita tēi avei. <sup>23</sup>Co mbahe aviye angahu aracuasa supi eté vahe. Esepia, seroyasar ahe ehiño oyeruresa uve, oyeecomomini tēi iyavei omombaraisu güetecuer yuvireco viña. Ahe aracuasa rumo ēgüe ehi tēi vahe. Esepia, ndayande pītivii eté yande yepipi āgua yande remimbotarai sui.

**3** Cūrítei rumo ocuerayevi vahe peico Cristo rese. Sese peseca catu co mbahe aviye vahe iva pendar. Aheve ivave Cristo oguapí oī güeco mborerecuasa pipe Vu acato coti. <sup>2</sup>Pepihañemoñeta mbahe iva pendar rese, ndahei chira ivi pipendar mbahe rese tēi. <sup>3</sup>Esepia, cūrítei omano vahe nungar peico pe recocuerai upe. Iyavei Cristo reseve peico Tūpa piri, inungar-ra ivave viña. <sup>4</sup>Cristo niha yande recovesa ité secói. Sese ahe oyeve irise curi, ēgüe peye aveira perecora ipiri seco ori porañetesa.

### **Yande recocuer yipindar iyavei yande recocuer piasu**

<sup>5</sup>Evocoyase pepoi opacatu co mbahe naporai vahe co ivi pipendar tēi pe rese oime vahe sui: ndapeyemboaguasai chira, ndapeyapoi chira mbahe tēi pe recocuer pipe, ndapeipota rai chira pihañemoñeta raisa, ndapeipota rai

chiveira ambuae ava mbahe (esepia, ahe niha oyoya mbahe rahanga tēi mboeteisa rese). <sup>6</sup>Acoi oyapo vahe co nungar mbahe, ahe Tūpa ñemoirosa oipisira seroyaēhisa pipe yuvireco. <sup>7</sup>Ēgüe peye avei yipindar pe recocueraí pipe peico. <sup>8</sup>Cūrítei rumo peseya opacatu co mbahe-mbahe tēi: pe ñemoirosa, pe poroyucaí aisa, pe reco raisa, pe ñehe mara-mara tēisa iyavei pe ñehesa ndayamombehui vahe. <sup>9</sup>Ndaperemirai chira peyese. Esepia, pepoi yipindar pe reco ai sui iyavei pe rembiapo ai sui. <sup>10</sup>Iyavei peipisi tecocuer piasu, aviye vahe. Ipípe peyembohe ari yacatu yande Aposar Tūpa recocuer rese peico, icua tupri catu āgua. <sup>11</sup>Ndahe iri ivate yandeu “che griego aico” ehi vahe; que “che judío aico” ehi vahe. Iyavei “imbocircuncidapri aico”, “nimbocircuncidapri aico” ehi vahe avei. Iyavei que “ahe ambuae tecua pendar secoi”, “ahe chori”, “ahe ava rembiguai tēi secoi” ehi vahe. Aníse que “che ndahei ava rembiguai aico” ehi vahe. Co rumo ivate vahe yandeu: Cristo ivate catu vahe opacatu sui. Iyavei oyoya guasu opacatu yande piha pipe yareco.

<sup>12</sup>Esepia, Tūpa pe raisu etepri iyavei pe poravo ‘toyuvirecoi cheu nara’ oya. Evocoiyase peyapora co nungar mbahe: peporoaisura, peavara peyeupe, peñemominira, pe reco mbegüera iyavei peñemosañora. <sup>13</sup>Ēgüe peyera peñemosa oyeupe, peñero aveira opacatu oyeupe acoi pe pāhu pendar oñemoirose pēu. Inungar Cristo ñerosa ombou yandeu, pe avei ēgüe peyera ambuae ava upe. <sup>14</sup>Iyavei peyeaisu catura. Esepia, ahe yande mboyemboya tupri oyese yepi. <sup>15</sup>Acoi teco tuprisa Cristo ombou vahe pēu, tape mbohe pe pihañemoñeta tupri āgua. Esepia, co rese Tūpa pe renoi

ñepeí ava nungar pe reco āgua. Iyavei, “Aviye ndeu” peyera chupe.

<sup>16</sup>Topita tupri Cristo ñhengagüer pe piha pipe. Pe aracuasa tuprisave peyembohe tupri, peyemonguerēhi catu sapucaisa Tūpa resendar rese. Pesapucái opacatu sapucaisa Tūpa upendar pe pihá pipe, “Aviye ndeu” pe hesave yepi. <sup>17</sup>Iyavei opacatu que mbahe peyapo vahe, que peñehe vahe avei peyapo yande Yar Jesús rer pipe. Jesús rer pipe avei, “Aviye ndeu” peyera Tūpa upe yepi.

### Jesús reroyasar cuaita resendar

<sup>18</sup>Iyavei pe no cuña omenda vahe: pemboyeroyara pe mer. Ahe niha pe cuaita pe yande Yar rese peico vahe. <sup>19</sup>Pe avei no imer: pesaisu pe rembireco. Perecoi rene pihavīracuasa pipe.

<sup>20</sup>Pe avei no chīhivahe: peroya aveira pe yesupa. Esepia, ahe yande Yar oipota. <sup>21</sup>Pe avei no tu: pemoñemoiro ucai rene pe rahir peyeupe. Esepia, avieteramo niquerēhi iri chira ocuaise pēu.

<sup>22</sup>Pe avei no mbiguai: peroya tupri avei pe rerecuar co ivi pipe yepi. Aní chira ahe pe repiaseño pembovihara. Iyacatu rumo pemboyeroyara pe pihañemoñeta tuprisa pipe, Tūpa sui pe siquiyesa pipe avei. <sup>23</sup>Opacatu mbahe peyapo vahe, peyapo pe querēhisave yande Yar mboviha āgua. Ndahei chira ava mboviha āgua tēi. <sup>24</sup>Esepia, peicua tupri co: yande Yar omboura oporecosa yandeundar. Esepia niha, Cristo upe nara ité mbahe peyapo. Ahe niha pe Yar supi tupri vahe. <sup>25</sup>Acoi ava oyapo vahe mbahe naporai vahe, oipisi aveira güembiapo ai repri. Tūpa niha nomboyoaviratí yande raisu.

**4** Pe avei serecuar: peyapo mbahe ihīvi vahe pe pihañemoñeta tuprisa pipe pe rembiguai upe. Peyemomahenduha co rese: pe avei pereco pe rerecuar ivave.

<sup>2</sup>Iyavei no opacatu peyeroqui catu ari rupi pe mahemohasa pipe. “Aviye ndeu” peye Tūpa upe. <sup>3</sup>Peyeroqui avei ore rese. Tore pītivii Tūpa oñhengagüer mombehu vite āgua. Toroñhe vite avei co ñehesa Cristo resendar Tūpa omboyecua ramo vahe rese yandeu. Sese tēi niha co che roquendas. <sup>4</sup>Evocoiyase peyeroqui che rese, tamombehu tupri catu co ñehesa opacatu upe senducua tupri catu āgua. Ēgüe tahe che cuaita mboaviye.

<sup>5</sup>Peico tupri pe aracuasa pipe avandahei vahe Cristo reroyasar rovaque. Peyapo tupri mbahe co tecocuer aviye viteseve. <sup>6</sup>Pe reco aviye tuprisa pipe peñehera yepi. Iyavei peicua tupri ñehesa mboyeve āgua ñepeipei ava uve.

### Ñehesa ipa vahe

<sup>7</sup>Co yande rivri, yande rembiaisu, Tíquico, che pītivii tuprisar, ahe oporaviqui tupri yande Yar recocuer rese che rupi. Ahe omombehura che recocuer resendar pēu. <sup>8</sup>Sese co amondo pēu ore recocuer cua tupri āgua, pe monguerēhi catu āgua avei. <sup>9</sup>Co Onésimo avei osora supi. Ahe avei yande rembiaisu, yande rivri seco tupri vahe pe recua pendar. Ahe ñuvirío mbia omombehura pēu opacatu mbahe oime vahe cohave.

<sup>10</sup>Aristarco, che ndugüer che roquendasave, omondo omahenduhasa pēu iyavei Marcos, Bernabé rihir. Pe revo peicuano Marcos so āgua eipeve; os-

ose pe piri, peipisi tupriñora. <sup>11</sup>Iyavei omahenduhasa omondo Jesús, ahe serer acoi Justo, pēu. Co güerañomi Jesús reroyasar pāhuve judío oporaviqui vahe che rupi yuvireco Tūpa mborerecuasave nara. Ahe niha che mboviha yuvireco yepi. <sup>12</sup>Epafras avei omondo omahenduhasa pēu. Ahe pe recua pendar ité, Jesucristo rembiguai. Ahe oyerokuí vahe pe rese yepi ‘toyemoviracua tupri iyavei toyuvirecoi Tūpa remimbotar rupi yuvireco’ oyapave. <sup>13</sup>Che aicua ité secocuer. Ahe oyemboaquí oyeruresa pipe pe recocuer rese, Laodicea pendar recocuer rese, Hierápolis pendar recocuer rese avei. <sup>14</sup>Iyavei yande rembiaisu Lucas, oporoposano vahe, Demas reseve omondo omahenduhasa yuvireco pēu.

<sup>15</sup>Pemboaviravemi eipeve yande rivri Laodicea pendar oreu, cuña Ninfa serer vahe avei iyavei opacatu oñemonuha vahe Tūpa reroyasar yuvireco. <sup>16</sup>Peyeroquire, pemondo co cuachiar Laodicea pendar Jesús reroyasar upe iyeroqui āgua. Iyavei Laodicea pendar cuachiar rese peyeroqui avei. <sup>17</sup>Iyavei emombehu Arquipo upe aipo ere: “Emboaviye tupri Tūpa nde cuaisa” ere.

<sup>18</sup>Che Pablo aico. Che ité aicuachía co che mahenduhasa pēu. Tapemahenduha vite che roquendasave che rese. Aviye pēu. Yande Aposar tape pītivii. Aipo rupive.



*PABLO REMBICUACHIA YIPINDAR  
VAHE TESALONICA PENDAR UPE*

**TESALONICENSES**

**Pablo mahenduhasa Jesús  
reroyasar Tesalónica pendar upe**

**1** Che, Pablo, Silvano reseve iyavei Timoteo, aicuachía co che ñehe pëu, ore rivireta, peñemonuha vahe Tüpa upe tecua Tesalónica ve, yande Ru Tüpa, yande Yar Jesucristo rese peico vahe. Tape rovasa pe reco tupri ägua yande Ru Tüpa, yande Yar Jesucristo avei.

**Tesalónica pendar yeroyasa  
resendar ñehesa**

<sup>2</sup>Ore, “Aviye ndeu” orohe ari rupi Tüpa upe opacatu pe rese yepi. Iyavei oremahenduha pe rese ore yeruresa pipe. <sup>3</sup>Pe niha yande Yar rese pe yeroya tuprisa pipe peporaviquiño yepi, iyavei pe poroaisusa pipe peyapo mbahe Tüpa upe, iyavei peñemosañõ mbahe tõi upe Jesucristo rãrosa pereco vahe rese. Sese oremahenduha pe rese ari yacatu rupi yande Ru Tüpa rovai. <sup>4</sup>Ore rivireta, Tüpa niha pe raisu, oroicua avei ahe ité pe poravo. <sup>5</sup>Esepia, acoi oromombehuse ñehesa pãsirosa resendar, ndahei ñehesa oreyesuindar tõi oromombehu pëu; Espíritu Santo reco pãratasa pipe rumo oroñehe. Iyavei oroicua ité co ñehesa supi eté vahe. Peicua avei niha acoi pe pãhuve oroicose, oroico tupriño ité, orosecaño avei pe reco tupri ägua.

<sup>6</sup>Ipare pemboyeapí ore recocuer peico iyavei yande Yar recocuer avei no. Iyavei yepe peparaisu mbahe-mbahe tõi pãhuve peico viña, peipisiño ité rumo co ñehesa pe vihasa pipe Espíritu Santo ombou vahe pëu. <sup>7</sup>Evocoya pe reco pipe pemboyecua catu pe reco catuprisa Tüpa reroyasar Macedonia pendar upe, Acaya

pendar upe avei. <sup>8</sup>Esepia, pe Tüpa ñehe peicua uca Macedonia rupi, Acaya rupi avei. Ndahei rumo co rupiño, opacatu rupi avei oicua yuvireco Tüpa reroyasa pereco vahe peyese. Sese ore ndoromombehu iri chira pe recocuer. <sup>9</sup>Esepia, ahe avei omombehu yuvireco oreu acoi ore so agüer pe piri, pe ore pisi tupri agüer avei. Iyavei omombehu mbahe rahanga sui pe poi agüer Tüpa oicove vahe rupi pe guatasa yuvireco, pe chupe nara mbahe apo ägua avei no. <sup>10</sup>Omombehu avei pesãro vahe Tüpa Rahir Jesús iyevi ägua iva sui yuvireco oreu, acoi Tüpa ombogüerayevi vahe omano vahe pãhu sui. Ahe niha yande pãsirora Tüpa ñemoirosa ipãrata vahe ou vaherã sui.

**Tesalónica pendar  
yeroyasa mboyecua**

**2** Ore rivireta, pe niha peicua ore so agüer pe piri ndahei ëgüe ehi tõi vahe. <sup>2</sup>Peicua tupri avei niha acoi cuese yipindar mara-mara tõi ava ore rereco yuvireco tecua Filipo ve. Tüpa rumo ore pãtivii õnehengagüer pãsirosa resendar mombehu ägua opacatu ore siquiyeehisa pipe ore amotarëhimbar pãhuve. <sup>3</sup>Esepia, ndoroyavii eté ore ñehe iyavei ndoroñehei ore pihanemoñeta raisa tõi pipe pëu, ndahei avei ore porombopa ägua oroñehe. <sup>4</sup>Tüpa rumo ore recoãha, ichui ore cuai õnehengagüer pãsirosa resendar mombehu ägua; ëgüe ehi ore ñehe, ndahei ava tõi mboviha ägua. Tüpa yande pihanemoñetasa oicua vahe rumo oromboviha. <sup>5</sup>Peicua niha ore ndoroñehei ñehesa icatupri catu vahe tõi rese pe mbopa ägua, iyavei ndahei guarepochi potasave tõi oroñehe tupri. Tüpa niha oicua. <sup>6</sup>Ore ndorosecai eté ava ore mboetei catu ägua pe, que ambuae ava eta avei no. <sup>7</sup>Ehi oroyandu ucara ore mborerecuasa Jesucristo ore cuaisa pëu viña; oroyemominiño rumo oroico pe pãhuve inungar acoi cuña

osãro tupri vahe omembri imboacua. <sup>8</sup>Ēgüe orohe avei ore pe raisu. Sese ndahei Tūpa Ñehengagüer año oromondo pota pëu, ore recocuer avei no. Esepia, opoaisú ité. <sup>9</sup>Ore rivireta, peyemomahenduha acoi ore paraisu agüer rese, ore poraviqui agüer rese avei ari, pïtu reseve. Ndahei que ñepei mañeco tēi āgua mbahe rese oromombehu Tūpa Ñehengagüer oroico pëu.

<sup>10</sup>Pe niha ore repia peye Tūpa avei oicua, ore reco tupriša, ore rembiapo supi eté vahe, ihivi vahe pe Jesús reroyasar pāhuve. <sup>11-12</sup>Peicua niha, inungar mbia guahir upe, ēgüe orohe pe monguerēhi, pe mbovihasa avei ñepei-pe opacatu. Iyavei oromondo pe cuaitarā pe reco tupri āgua Tūpa remimbotar rupi. Ahe niha oñehe pëu peico vahe rā sese imborerecuasa porañetesave.

<sup>13</sup>Co rese, “Aviye ndeu” orohe Tūpa upe ari yacatu rupi. Esepia, Tūpa Ñehengagüer, oromombehu vahe pëu, peipisi ité, “Co Tūpa ñehe, ndahei ava tēi ñehe” aipo peye ité pe chupe. Supi eté Tūpa ñehe. Ahe niha osecaño ité pe recocuer peroyare. <sup>14</sup>Ore rivireta, acoi cuese peiporara mbahe-mbahe tēi pe mu eta pāhuve peicose; ēgüe ehi tupri avei Jesús reroyasar Judea pendar yuvirecoi vahe Jesucristo recocuer rese. Imu judío ae oseca-seca yamotarēhisave yuvireco. <sup>15</sup>Ahe niha oyuca yande Yar Jesús yuvireco. Ahe avei oyucapa Tūpa ñehe mombehusar yuvireco aracahe. Ore avei opa ore mombo yuvireco. Ndoviroyai Tūpa yuvireco iyavei opacatu ava amotarēhimbar tēi yuvirecoi. <sup>16</sup>Esepia, acoi oroñehe potase ava ndahei vahe judío upe iñepisiro āgua rese, ahe rumo ndoipotai yuvireco oreu. Ipípe sui oyemboangaipa catu yuvireco. Cūrítei rumo Tūpa ñemoirosa ipīrata vahe ou iharive yuvireco cute.

### Pablo oso pota iri Tesalónica pendar repia

<sup>17</sup>Ore rivireta, yepe ndayayoepia iri yayepepi raimise yandeyesui, ore piha pipe rumo, “Ahé” oroheño ité pëu. Iyavei orequerēhiño ité yepi oroso iri vahe rā pe repia. <sup>18</sup>Orosāha tēi ore so āgua pe repia yepi; che Pablo teieté setā yupagüer tēi aso pota. Carugar rumo ndoipotai. <sup>19</sup>¿Ava sui piha orosāro mbahe aviye vahe? ¿Uma ore vihasa? ¿Uma ore mboviharete catura? ¡Peño itera acoi yande Yar Jesucristo yevise curi! <sup>20</sup>Pe ité niha ore mbovihasa peye, iyavei oroviha catura pe rese no.

**3**<sup>1-2</sup>Evocoyase che nañemosa irise pe repiaēhi rese, chepihañemoñeta yande rivri Timoteo mondo āgua pe repia; “Che güeraño tapita Atenas ve” ahe. Esepia niha, ahe oporaviqui vahe Tūpa upe ore rupi, omombehu vahe co ñehesa pīsirosa resendar Cristo suindar ou vahe. Ahe amondo pëu pe moviracua catu āgua, pe monguerēhi catu āgua avei peyeroya catu vahe rā Cristo rese. <sup>3</sup>Evocoyase tipo eme oyembosiquiye vahe co mbahe tēi pe mombaraisuse. Peicua niha yaiporara rane itera co nungar mbahe. <sup>4</sup>Iyavei niha acoi oroico vitesese pe piri, “Yande paraisu rane itera mbahe yavai vahe” orohe voi eté acoi pëu. Ahe niha cūrítei peicua. <sup>5</sup>Evocoyase che nañemosa irise, amondo Timoteo ‘¿yuvirecoiño ité piha Tūpa rese?’ che yapave. Che asiquiye, “Aviyeteramo Carugar omondora mbahe tēi pipe yuvireco” ahe ‘ore poraviqui agüer evocoyase ocañi tēira’ che hesave.

<sup>6</sup>Cūrítei rumo Timoteo oyevi Tesalónica sui, güeru ñehesa aviye vahe pe resendar oreu pe Tūpa reroyasa, iyavei pe poroaisusa resendar avei. Iyavei aipo pemahenduha ore rese pe poroaisusa pipe. Iyavei pe ore repia pota tēi peye no; inungar ore pe repiasa

pota tēi avei. <sup>7</sup>Sese, ore rivireta, ore paraisusa pāhuve ore mboviharere peye, co oroicuase pe reco tupri Tūpa reroyasa pipe. <sup>8</sup>Cūrítei ore mopoase catu iri oroyanduse pe yemoviracua tuprisa yande Yar rese. <sup>9</sup>“¿Mara yahera pīha, ‘Aviye ndeu’ yande he tupri catu āgua Tūpa upe?” orohe pe reco tuprisa rese, iyavei ore yembovīha catusa rese avei no <sup>10</sup>pītu, ari rupi oroporandu Tūpa upe ore so āgua pe repia eipeve iyavei Tūpa reroyasa ipane vite vahe mboaviye tupri āgua pēu.

<sup>11</sup>Iyavei ore oroipota ore pītiviira yande Ru Tūpa, yande Yar Jesucristo avei ore so āgua pe piri. <sup>12</sup>Evocoiyase yande Yar tape moviracua catu, tombou catu avei pe yeaisu āgua, iyavei opacatu raisu catu āgua, inungar ore orovireco pe raisusa. <sup>13</sup>Ipipe sui tape moviracua pe reco maranehi pipe pe mbahe aviēhisave yande Ru Tūpa rovai acoi oyevise yande Yar Jesús opacatu ovoya reseve. Ēgüe tehi pēu.

#### Teco tupri Tūpa oipota

**4** Ore rivireta, cūrítei oroñehe pota pēu pe cuaitarā rese yande Yar Jesús rer pipe: inungar cūrítei pe recocuer pereco, ēgüe peyeño ité catu peico ore pe mbohe agüer rupi Tūpa mboetei āgua.

<sup>2</sup>Pe niha, peicua acoi ore pe mbohe agüer yande Yar Jesús rer pipe. <sup>3</sup>Esepia, Tūpa oipota pe reco maranehi āgua oyeupe. “Tipo eme que ñepeí oyemboaguasa tēi vahe” ehi. <sup>4</sup>Iyavei peico tupri pe rembireco rese pe reco īvisa pipe Tūpa remimbotar rupi, iyavei pemboetei tuprira sereco yepi. <sup>5</sup>Peicoi rene ava Tūpa ndoicuai vahe reco pipe pe remimbotar tēi apo āgua. <sup>6</sup>Tipo eme avei oyapo vahe co nungar angaipa yande rivri reco momara āgua tēi. Esepia, Tūpa omondora oñemoirosa ipīrata vahe evocoi nungar ava upe. Evocoi niha yipisuive oromombehu vahe

pēu. <sup>7</sup>Esepia, Tūpa niha yande poravo yande reco maranehi āgua, ndahei angaipa pipe yande reco āgua tēi. <sup>8</sup>Sese acoi ndosendu potai vahe co yembohesa, ndahei eté ava tēi viroiro, ahe rumo Tūpa ité viroiro yuvireco acoi ombou vahe oEspíritu Santo pēu.

<sup>9</sup>Iyavei co peyepāhuve pe yeaisusa rese, ndaicuachía iri chira pēu. Esepia, Tūpa ité niha pe mbohe pe yeaisu āgua opacatu. <sup>10</sup>Ēgüe peye niha opacatu yande rivireta co Macedonia rupindar raisu peico. Co catu peyapo che rivireta: pe mbouvicha vite catu pe poroaisusa. <sup>11</sup>“Peico tupriño avei pe reco mbegüesa pipe; mbahe pe rembiapo reseño tupri pehañeco; peporaviqui pe po pipe ité” aipo orohe acoi pēu cuese. <sup>12</sup>Evocoiyase pe mboyeroyara ava ndahei vahe Jesús reroyasar yuvireco; iyavei ēgüe peyera mbahe pēu ipaneēhi āgua avei no.

#### Oyevira yande Yar co ivi pipe

<sup>13</sup>Ore rivireta, ore oroipota peicua aveira manosa recocuer; sese ndapeicoi chira pe viharēhisa pipe inungar co ava ndoyeroyai vahe Tūpa rese. <sup>14</sup>Esepia, yande yaroya: Jesús omano, ichui ocuerayevi. Evocoiyase yande avei yaroya Tūpa Guahir Jesucristo reseve ombogüerayevira opacatu acoi seroyasa pipe omano vahe yuvireco.

<sup>15</sup>Sese co oromombehu pēu, ahe niha yande Yar porombohesa: yande yaicove vite vahe co ivi pipe, acoi oyevise yande Yar, ndahei chira yande rane omano vahecuer sui yayemboya yande Yar rese. <sup>16</sup>Esepia, yande Yar ité ogüeyi irira iva sui ou mborerecuar ivate vahe ñehesa pipe; ahese oyeendura Arcangel ñehe iyavei Tūpa remimbī moñehe pīratasa. Ahese seroyasar omano vahecuer rane opūhara yuvireco. <sup>17</sup>Ipare voi yande yaicove vite vahe, serasopri yaicora opacatu iva quiha rese co yande Yar rovaichi āgua ivitu rupi. Ēgüe yahera

yande Yar piri yaico vaherã apirêhi.  
<sup>18</sup>Sese peyemonguerêhi catu co ñehesa pesendu vahe rese.

**5** Iyavei no, acoi ari yande Yar yusa re-sendar ore ndoroicuachiai chira pëu.

<sup>2</sup>Esepia, pe peicua tupri co yande Yar ari oyepotara imohaëhisa pipe, inungar acoi imonda rai vahe oyepota pïtu pipe. <sup>3</sup>Acoi ava aipo ehise yuvireco:

“Opacatu aviye ité yaico, ndipo iri mbahe-mbahe tēi yandeu” ehise, ahese inungar acoi cuña imembirasi aviyeteramo tēi, ēgüe ehi aveira, aviyeteramo tēi icañi oura iharive, ahese ndoicatu chira ichui oñemi yuvireco. <sup>4</sup>Pe rumo, ore rivireta, ndahei pïtumimbisa pendar nungar peico. Evocoyase oyepotase yande Yar ari, ndahei chira imonda rai vahe nungar pe resapiha tēi ou.

<sup>5</sup>Esepia, pe opacatu peico vahe Tüpa poroesapesa pipe, ndahe iri yande pïtumimbi pïpendar yaico. <sup>6</sup>Evocoyase ndayaicoi chira co ambuae yuviroque tēi vahe nungar pïhañemoñetasa pipe; iyacatu rumo yande yayemopoase yande pïhañemoñeta tuprisa pipe. <sup>7</sup>Acoi yuviroque vahe, yuviroque pïtu pipe; iyavei acoi osavaipo vahe, osavaipo avei pïtu pipe yuvireco. <sup>8</sup>Yande rumo yaico vahe Tüpa poroesapesa pipe. Evocoyase yareco tuprira yande pïhañemoñetasa yande reco tupri ãgua yepi. Iyavei yayoepira yande yeroyasa pipe, poroaisusa pipe avei no. Iyavei inungar acoi sundao vireco oãca ndiru guarepochi apopri yuvireco oãca repi ãgua, yande avei tayareco yande remiaro yande ñepisiro ãgua. <sup>9</sup>Esepia niha, Tüpa yande poravo ndahei yaico vaherã iñemoirosa pipe nara; ahe rumo yande poravo yasupiti vaherã ñepisirosa yande Yar Jesucristo rembiapo sui. <sup>10</sup>Esepia, ahe omano yande recocuer rese oyese yande rereco ãgua opacatu yande recove vitese, yamanose avei. <sup>11</sup>Sese peyemonguerêhi

catu, iyavei peyemoviracua catu vite peyeupe inungar co peyapo peico.

**Pablo omboaracua  
 Jesús reroyasar oico**

<sup>12</sup>Iyavei no, ore rivireta, pemboyeroa acoi oporaviqui vahe yuvireco pe pãhuve. Ahe niha pe cuai vahe yuvireco, iyavei pe mboaracua vahe yande Yar uve nara yuvireco. <sup>13</sup>Pemboyeroa iyavei pesaisu tuprira iporaviquisa rese. Peico tupri avei peyepãhuve.

<sup>14</sup>Iyavei ore rivireta, pe cuaisa: pemboaracua acoi ndoporaviqui potai vahe imbohe catu ãgua. Iyavei pemonguerêhi acoi niqerêhi iri vahe. Peipitivi avei acoi ndoyemoviracuai vahe Tüpa rese güeco ãgua. Iyavei peñemosaño opacatu ava uve yepi.

<sup>15</sup>Peicua catu pe rereco megua potasar sui. Ndapemboyevii chira mbahe-mbahe tēi co pe rereco megua potasar upe. Iyacatu rumo peyapo tupri mbahe aviye vahe peyeupe, opacatu ava upe avei no.

<sup>16</sup>Peyembovihañora ari yacatu peico. <sup>17</sup>Iyavei peyeroquirã ari yacatu rupi no. <sup>18</sup>“Aviye ndeu” peyera Tüpa upe opacatu mbahe rese. Esepia, ahe niha Tüpa oipota yandeu Cristo rese yaico vahe.

<sup>19</sup>Iyavei ndapemombituhui chira mbahe Espiritu Santo oyapo pota vahe pe rese. <sup>20</sup>Ndapeyamotarêhii chira Tüpa ñehe imombehupri. <sup>21</sup>Pesãhapa rane opacatu mbahe. Ichui peipisira mbahe aviye vahe peyeupe. <sup>22</sup>Peyepipi opacatu mbahe naporai vahe sui.

<sup>23</sup>Tüpa acoi ombou vahe teco tuprisa yandeu tape pehapa tupri oyeupe nara. Iyavei tosãro tupri opacatu pe espíritu, pe hã, pe rete avei pe reco maranehi ãgua co yande Yar Jesucristo yevi irise. <sup>24</sup>Ahe acoi pe poravo vahe oyeupe

nara seco tupri vahe. Ahe omboaviyera opacatu co mbahe.

**Pablo imahenduha  
Jesús reroyasar rese**

<sup>25</sup> Ore rivireta, peyeroqui ore rese.

<sup>26</sup> Pemboavirave opacatu yande rivri eipe pendar pe yeovaupitesa pipe.

<sup>27</sup> Che opocuai yande Yar rer pipe: peyeroqui co cuachiar opacatu yande rivireta upe.

<sup>28</sup> Yande Yar Jesucristo tape rovasa tupriño pe rereco. Aipo rupive.

*PABLO REMBICUACHIA  
IMOÑUVIRIOSA  
TESALONICA PENDAR UPE*

**TESALONICENSES**

**Pablo mahenduhasa Jesús  
reroyasar Tesalónica pendar upe**

**1** Che, Pablo, Silvano, Timoteo re-seve, aiciuachía co ore ñehe pëu, ore rivireta, peñemonuha vahe Tüpa uve tecua Tesalónica ve, yande Ru Tüpa, yande Yar Jesucristo rese peico vahe. <sup>2</sup>Tombou pëu oporovasasa pe reco tupri ägua yande Ru Tüpa, yande Yar Jesucristo avei.

**Tüpa omombaraisura viroyasarëhi  
Jesucristo yevisa curi**

<sup>3</sup>Ore rivireta, “Aviye ndeu” orohe itera Tüpa upe pe recocuer rese yepi. Esepia, Tüpa rese pe yeroyasa tuvicha-vicha iri, tuvicha-vicha iri avei pe yeaisusa opacatu peyeupe pereco vahe. <sup>4</sup>Evocoiyase, ore oroñehe pe rese ore vihasa pipe Tüpa reroyasar ñemonuhasa rupi. Esepia, acoi ava mbahe-mbahe tēise pëu, peñemosaño chupe pe Cristo rese pe yeroyasa pipe. <sup>5</sup>Co niha omboyecua Tüpa reco ivisa ava upe. Esepia, ipipe pe rereco omborerecuasave pe reique ägua. Sese niha, peparaisu vite tēi peico.

<sup>6</sup>Tüpa omombaraisura acoi pe mombaraisusarer. Iya ité ëgüe ehi vaherã chupe. <sup>7</sup>Pe rumo imombaraisupri peico vahe, Tüpa omondora pe pïtuhu ägua, ore pïtuhu ägua avei, acoi yande Yar Jesús oyevisa tata rendigüer pãhuve iva sui opacatu güembigui seco pïrata catu vahe reseve. <sup>8</sup>Ahe oura opacatu Vu Tüpa reroyasarëhi mombaraisu ägua iyavei oyesuindar ñehesa poropisirosa resendar rendu tēisar mombaraisu avei. <sup>9</sup>Evo-

coi iparaisura yuvireco, imocañpri yuvirecoira apirëhi. Iyavei imboyepepisara amombri yande Yar reco pïratasa porañetesa sui. <sup>10</sup>Acoi ouse ahe ari pipe, yande Yar imboeteiprira opacatu seroyasar pãhuve; ipãhuve pe peicora. Esepia, peroya ité oromombehu vahe pëu.

<sup>11</sup>Co rese oroyeroqui pe rese yepi: oroporandu yande Ru Tüpa upe tapeereco tupri güemienoi pe recosa pipe. Iyavei oroyeroqui chupe, tomoaviye güeco pïratasa pipe opacatu ñepeipei mbahe aviye vahe peyapo pota vahe iyavei opacatu mbahe pe rembiapo aviye vahe sese pe yeroyasa pipe. <sup>12</sup>Evocoiyase yande Yar Jesucristo rer imboeteiprira pe recocuer pipe sui; iyavei pe imboeteiprira peico yande Yar rese peico vahe yande Ru Tüpa, yande Yar Jesucristo pe raisusave.

**Yande Yar Jesús yevisa  
resendar mombehu tuprisa**

**2** Iyavei, ore rivireta, ore oromombehu potami pëu opacatu acoi yande Yar Jesucristo yevisa resendar yande monuha vaherã oyese. <sup>2</sup>Peicua catu, tapepihañemoñeta rerova eme iyavei peyembosiquiyei rene que ava “che añehe Espiritu pipe” ehi vahe sui, que icuachiapri sui, que ñehesa pesendu vahe sui inungar-ra ore ñehesa ité viña “oyepota ari Jesús yevisa” ehi tēi vahe yuvireco pëu. <sup>3</sup>Peicua catu peyembopa ucai rene ñepeipe yepi ava upe. Esepia, yipindar ari Jesucristo yu ägua renonde, yugüerura mbahe-mbahe tēi aposar. Ahe Tüpa amotarëhisar yuvirecoi vahe. Ahese oyemboyecua ava yangaipa guasu vahe. Ahe ocañi tēi vaherã. <sup>4</sup>Oyemboivate aira opacatu Tüpa rer rerecosar amotarëhisave iyavei ndoipotai chira ambuae mboetei. Oique aveira, oguapi Tüpa rēta pipe inungar-ra Tüpa ité viña. “Supi eté che Tüpa aico” ehi tupri tēira oï.

<sup>5</sup>¿Ndapemahenduhai vo acoi che ñehengagüer rese pe pãhuve aico vïtese cuese? <sup>6</sup>Co imombïtasar peicua cüritei. Ihari oyepotase voi, oyemboyecuarã. <sup>7</sup>Co porocuaita amotarëhisar ndoyemboyecua vitei vahe rembiapo oime cüritei. Co güeraño ipane imombïtasar renose ãgua ipãhu sui, <sup>8</sup>ahese voi oyemboyecuarã acoi ava yangaipa guasu vahe. Yande Yar Jesús rumo oyucara oñehe pipe, omocañi itera güendigüer pïratasa pipe oyevisi curi. <sup>9</sup>Yucasa renose rumo, acoi ava yangaipa guasu vahe oura Carugar pïratasa pipe; güerura güeco pïratasa tuvicha vahe; omboyecua angahura poromondiisa. <sup>10</sup>Oyapo angahura opacatu mbahe tõi oporombopa ãgua oico ava ocañi tõi vaheã upe. Esepia, evocoi ava ndosendu potai porombohesa supi eté vahe oñepisiro ãgua yuvireco. <sup>11</sup>Sese Tüpa osevara co porombopasa reroya ãgua yuvireco <sup>12</sup>‘ipipe tocañi tõi co ava, opacatu mbahe supi eté vahe reroyaëhisar, acoi oyemboviha catu vahe mbahe-mbahe tõi rese yuvireco’ oya.

### Iporavopri ipïsiropirã

<sup>13</sup>Ore rumo, “Aviye ndeu” orohera Tüpa upe pe recocuer rese yepi, ore rivireta, yande Yar rembiãisu peico vahe. Esepia, Tüpa niha pe poravo yipi-suipe pe pïsiro ãgua pe reco maranehi ãgua rese Espïritu pipe iyavei porombohesa supi eté vahe reroya ãgua. <sup>14</sup>Sese niha, Tüpa oñehe yandeu yande piha pipe co ñehesa pïsirosa resendar pipe, ore oromombehu vahe pëu ‘tovireco che Rahir Jesucristo reco porañetesa’ oya.

<sup>15</sup>Sese ore rivireta, peyemoviracua iyavei peresarai eme acoi oromombehu vahecuer iyavei oroicuachía vahe acoi pëu. <sup>16</sup>Yande Yar Jesucristo teieté, yande Ru Tüpa avei, yande raisusa yande rovasasa pipe ombou vahe vihasa

apirëhi vahe yandeu iyavei yande reco tupri rãro ãgua, <sup>17</sup>ahé tape monguerëhi, tape moviracua avei opacatu ñehesa aviye vahe rese, opacatu mbahe pe rembiapo aviye vaheã rese avei.

### Pablo oporandu Jesucristo reroyasar yeroquisã rese oyeupenara

**3** Ore rivireta, co mbahe ipa vahe amombehu pota pëu: peyeroqui ore rese. Evocoyase toyepota pihaivi yande Yar ñehengagüer opacatu rupi; tipisisa tupri imboeteisa pipe inungar oyepota pe pãhuve. <sup>2</sup>Peyerure avei ore repi ãgua rese ava ndaseco pörã vahe, ipihañemoñeta rai vahe sui. Esepia niha, ndaopacatui Tüpa rese ipihañemoñeta yuvireco. <sup>3</sup>Yande Yar rumo seco ñvi vahe. Ahe pe recocuer moviracuara iyavei pe rãrora mbahe tõi sui. <sup>4</sup>Ore oroyeroya yande Yar rovã peyapo vahe rese iyavei peyapo viteño vaheã rese acoi ore pe cuai agüer. <sup>5</sup>Yande Yar tape pïtivii pe poroaisu ãgua inungar Tüpa oporoaisu iyavei Cristo ñemosasa rereco ãgua.

### Yande cuaita yande poraviqui ãgua

<sup>6</sup>Ore rivireta, opocuai yande Yar Jesucristo rer pipe: acoi ndoporaviqui potai vahe yande rivri pe pãhuve, peyepipiño ichui, acoi ndoviroya potai vahe avei ore porombohesa oromombehu vahe pëu. <sup>7</sup>Pe peicua mara peyera ore recocuer moña ãgua peico. Ore oroicose pe pãhuve, ndoroico tõi, <sup>8</sup>ndorohu tõi avei ambuae tembihu imboepipirëhi. Ore rumo que ñepeï mañeco tõiëhi ãgua rese oroporaviqui orecurai rane ité ari, pïtu reseve. <sup>9</sup>Iya ité niha mbahe rese ore porandu ãgua pëu ore pïtivii ãgua rese viña; ore rumo oroporaviqui pe ore recocuer rupi pe guata ãgua rese. <sup>10</sup>Acoi oroico vïtese pe pãhuve, oromondo pe cuaitarã: acoi ndoporaviqui potai vahe, ahe tocaru eme. <sup>11</sup>Oroyandu amove

aipo pe pãhu pendar yuvirecoiño tēi ndoporaviqiii vahe. Evocoi omañeco tēi ambuae ava recocuer. <sup>12</sup>Ore oromondo acoi ava upe mborocuaita yande Yar Jesucristo rer pipe: toporaviqii güeco quiririsa pipe; ipipe sui yuvirecovera.

<sup>13</sup>Ore rivireta, pecuerai eme mbahe aviye vahe apo. <sup>14</sup>Oimese ndoviroyai vahe ore remimombehu co cuachiar pipe, peicua tupri evocoi nungar. Peyemboya eme sese. Evocoiyase tochi ahe. <sup>15</sup>Pereco eme catu yamotarēhisa chupe; iyacatu rumo pemboaracua catuñora inungar yande rivri.

### Ñehesa ipa vahe

<sup>16</sup>Aviye, yande Yar ae tombou güeco tuprisa pe reco tupri ãgua pēu ari yacatu rupi opacatu pe reco pipe. Tasecoi pe rese ari yacatu.

<sup>17</sup>Che, Pablo, aicuachía co mahenduhasa che po pipe ité pēu. Che rembicuachía icuapri opacatu che cuachiar pipe. <sup>18</sup>Yande Yar Jesucristo tape rovasa opacatu yepi. Aipo rupive.



**PABLO REMBICUACHIA YPĪNDAR  
VAHE TIMOTEO UPE**

**TIMOTEO**

**Pablo mahenduhasa Timoteo upe**

**1**<sup>1-2</sup>Che, Pablo, aicuachía che ñehe ndeu, Timoteo. Nde niha che rahír Tūpa reroyasa pipe ereico. Che niha Jesucristo apóstol aico, yande Písirosar Tūpa porocuaita rupi iyavei yande Yar Jesucristo porocuaita rupi. Ahe niha yande remiaro. Tombou yande Ru Tūpa, yande Yar Jesucristo oporovasasa, oporoparisuerecosa ndeu nde reco tupri āgua.

**Pablo, “Eicua catu porombohesa co coti tēi vahe sui” ehi Timoteo upe**

<sup>3</sup>Iyavei acoi aipo ahe ndeu cuese che so āgua Macedonia ve: nde epita co tecua Efeso ve. Evocoyase eremboaracuara co ava co coti tēi oporomboaracua vahe, toporomboaracua eme pihanemoñetasa co coti-coti tēi vahe rese yuvireco. <sup>4</sup>Toyapisaca eme avei tecocuer ipapapri tēi vahe rese, tecocuer arachendar ěgüe ehi tēi vahe rese avei. Ahe ichui osē yeacasa naporai vahe yepi; ndayande pītivii rumo Tūpa remimbotar reroya tupri āgua rese.

<sup>5</sup>Sese co amondo porocuaita ndeu yande yeaisu āgua yande pihanemoñeta catuprisa pipe, yande reco yapisaca tuprisave, iyavei yande yeroyasa supi eté vahe pipe. <sup>6</sup>Esepia, amove ava oime ichui oyearacua mocañi oñehēñehe tēisa pipe yuvireco. <sup>7</sup>Oporombohe pota tēi Tūpa porocuaita rese; ndosenducuai rumo oporombohesa yuvireco, “Supi tupri revo yaporombohe” ehi tēi yuvireco viña.

<sup>8</sup>Yaicua niha co porocuaita aviye ai eté yaiporuse Tūpa remimbotar rupi

eté. <sup>9</sup>Yaicua avei acoi porocuaita ndahei ava aviye vahe upe nara. Ahe rumo ndiporeroyai vahe mboaracua āgua, ndayaracua potai vahe upe nara, angaipa viyar upe nara avei, iyavei opacatú mbahe-mbahe tēi aposar upe nara, nombotei vahe Tūpa iyavei chupendar pihanemoñetasa; acoi vu, osi oyuca vahe; opacatu ava oporapichi vahe upendar. <sup>10</sup>Acoi oyemboaguasa tēi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi virocua tēi vahe mbiguai ambuae ava sui, semirañete ai vahe; iyavei acoi, “Che amombehu mbahe supi eté vahe” ehi tēi angahu vahe, chupe nara ité co porocuaita; imondosa avei opacatu porombohesa nimarai vahe amotarēhisar upe nara. <sup>11</sup>Co porombohesa nimarai vahe oyoya tupri ñehesa porañete vahe poropīsirosa resendar rese. Tūpa sovasapri secoi, ahe che cuai vahe sese.

**Pablo oparaisuerecosa rese,  
“Aviye ndeu” ehi Tūpa upe**

<sup>12</sup>“Aviye ndeu” ahe yande Yar Jesucristo upe. Ahe niha ombou pīratasa co che ñehe āgua. Esepia, ahe oyeroya che rese. Sese che mondo oñehengagüer mombehu āgua. <sup>13</sup>Yepe che yipīndar che ñehe-ñehe tēi sese; aseca-secaño mbahe-mbahe tēi che rembiapoguā yamotarēhimbave che yemboivate aisa pipe, Tūpa rumo, che paraisuerecoño. Esepia, che ahese, ndahe vitei Cristo reroyasar aico; ndaicua vitei mbahe ayapo vahe. <sup>14</sup>Ĕgüe ehi yande Yar ombou catu oporovasasa che rese iyavei ombou che oyese yeroya āgua iyavei che poroaisu āgua Jesucristo rese che recosa pipe.

<sup>15</sup>Iya peroya co supi eté vahe, che aipota avei opacatu oyapisacara yuvireco sese: Jesucristo ou co ivi pipe

ava yangaipa vahe pīsiro āgua. Che rumo acoi ivate catu vahe yipindar aico ipāhuve. <sup>16</sup>Sese Tūpa che paraisuereco che rese rane Jesucristo reco mbegüe tuprisa mboyecua āgua. Ēgüe ehi che recocuer upe ambuae ava seroya āgua. Ipīpe sui osupitira tecovesa apirēhi vahe yuvireco. <sup>17</sup>¡Sese yamondo imboeteisa apirēhi yande Rerecuar ndopai vahe upe! ¡Ahe nomanoi vahe, ndayasepiai vahe, ahe ñepehi vahe Tūpa!

<sup>18-19</sup>Che rahir Timoteo, co amondo nde cuaitarā ndeu nde reco moviracua āgua mbahe tēi recopi āgua Cristo rese nde yeroyasa pipe nde pihañemoñeta catuprisa pipe avei. Supi tupri cuese Tūpa reroyasar oñehe yuvireco nde rese serer pipe. Amove ava opihañemoñeta tupri reroyaēhisave, omocañi uca Tūpa rese oyeroyasa <sup>20</sup>inungar vahe Hime-neo rese, Alejandro yuvirecoi. Ahe che amondo Carugar povrive ‘evocoyase toicua tiñehe-ñehe tēi eme Tūpa upe yamotarēhisave yuvireco’ che yapave.

### Ñehesa yeruresa resendar

**2** Iyavei no, co che opomonguerēhi pe yerure āgua, peporandu, pemondo avei “aviye” pe hesa Tūpa upe opacatu ava recocuer rese. <sup>2</sup>Iyavei peyerure opacatú mborerecuar rese. Evocoyase tayareco yande reco tupri Tūpa mboetei tuprisa pipe, yande poromboeteisa pipe avei. <sup>3</sup>Co aviye ité; ahe niha yande Pīsiosar Tūpa remimbotar. <sup>4</sup>Supi eté ahe oipota opacatu ava ñepisiro iyavei co porombohesa supi eté vahe cua tupri āgua. <sup>5</sup>Esepia, ñepeño ité Tūpa, iyavei ñepeño ité ava oicatu vahe yande reraso Tūpa upe: ahe Jesucristo. <sup>6</sup>Esepia, Jesucristo omano opacatu ava yangaipa vahe repirā ipīsiro āgua. Ahe imombehusa chupendar ari iporavopri rupi. <sup>7</sup>Sese che supi eté apóstol, icuaipri aico Tūpa Ñehengagüer mombehu āgua, ava ndahei vahe judío mbohe āgua, co yeroyasa

rese iyavei supi eté vahe rese. Supi eté ndopombopai.

<sup>8</sup>Evocoyase che aipota opacatu rupi ava toyerure yuvireco. Tomopuha opo yuvireco opihañemoñeta catuprisa pipe, ombahe mboasiēhisa pipe, oyeacaēhisa pipe avei. <sup>9</sup>Iyavei cuña toyemonde tupriño turucuarño tēi pipe yuvireco. Aní chira rumo oāca moporañeteisa pipe yuvirecoi; tomondo eme avei mbahe sendí vahe inungar oro oyese yuvireco. Iyavei turucuar sepí rusu vahe tomondo eme yuvireco. <sup>10</sup>Iyacatu rumo yuvirecoi tuprira güembiapo aviye vahe pipe, inungar cuña oyemondo tupri vahe Tūpa upe yuvireco yepi. <sup>11</sup>Iyavei cuña tosendu porombohesa oquiririsa pipe imboyeroyasave. <sup>12</sup>Ndaipotai cuña oporombohe ava rehii pāhuve iyavei toyocuai eme cuimbahe. Iyacatu rumo iquiririñora yuvireco. <sup>13</sup>Esepia, Tūpa oyapo yipindar Adán; ipare Eva oyapo. <sup>14</sup>Adán ndahei imbopapri; cuña rumo oyembopa uca. Ichui oviapi angaipa pipe. <sup>15</sup>Oñepisiora rumo ocuaita mboaviyesa pipe oyese yeroyasa rereco pipe, iporoaisusa pipe, güeco maranehisa pipe avei.

### Tūpa reroyasar rārosar cuaita

**3** Iyavei co supi eté: acoi amove oico pota vahe Tūpa reroyasar rāro āgua, ahe oipota mboraviqui aviye catu vahe. <sup>2</sup>Sese acoi vireco vahe ocuaita Tūpa reroyasar rāro āgua, ahe secoi tuprira mbahe aviye vahe pipe yepi. Ipīpe ava noñehei chira yamotarēhisave. Iyavei omendara ñepehi cuña reseño ité. Toñearo tupri avei yuvireco, toyapo mbahe supi eté vahe, tiporomboetei tupri avei. Iyavei omoinguera oyepiri ava oyepota vahe güetave. Oicua aveira ava mbohe tupri āgua. <sup>3</sup>Iyavei ndahei chira caguar tēi. Ndosecai chiveira ovava āgua. Iyacatu rumo seco mbegüera opacatu ava upe. Ndoipota

rai chiaveira guarepochi. <sup>4</sup>Iyavei oicua tuprira güëta pipendar rãro ãgua. Ombohe aveira guahir iporeroya ãgua, iporomboetei ãgua avei. <sup>5</sup>Esepia, acoi ndoicuai vahe güëta pipendar rãro, ¿mara ehira evocoiyase Tüpa reroyasar rãro? <sup>6</sup>Tüpa reroyasar rãrosar rumo ndahei chira oipisi ramo vahe Tüpa opiha pipe. Esepia, aviyeteramo oyemboivate ai tiëtera. Ipipe sui imocañipri avei secoira Carugar nungar. <sup>7</sup>Iyavei oyecua uca tupri ranera Tüpa reroyasarëhi pâhuve. Ahese ndipoi chira imboeteiëhisa iyavei ndoviapi chira Carugar povrive.

### **Tüpa reroyasar rese ihañeco vahe cuaita**

<sup>8</sup>Iyavei Tüpa reroyasar rese ihañeco vahe yuvirecoira oporomboeteisa pipe. Tomboaviye oñehe. Ndahei chira caguar tõi; ndahei chiaveira guarepochi pota raisar tõi. <sup>9</sup>Iyacatu rumo, porombohesa supi eté vahe rese oyemboya catura opihañemoñeta catuprisa pipe yuvireco. <sup>10</sup>Iyavei secoãhasa ranera. Acoi osë tuprise, ahese toyuvirecoi Tüpa reroyasar rese ihañeco vahe. <sup>11</sup>Iyavei sembireco yuvirecoi aveira oporomboeteisa pipe, nimahechiroi chira, osãro tuprira güecocuer yuvireco, iyavei imboyeroyapri aveira opacatu mbahe rese yuvireco. <sup>12</sup>Iyavei Tüpa reroyasar rese hañecosar ñepeño itera sembireco, oicua aveira guahir rãro tupri ãgua, güëta pipendar rãro ãgua avei. <sup>13</sup>Esepia, Tüpa reroyasar rese hañecosar oyapo tuprise oporaviquisa yuvireco, ipipe sui imboyeroyasara. Osiquiyëëhishave avei secoira Jesucristo reroyasa pipe.

### **Tüpa reco oyecua ramo vahe roroya tuprisa**

<sup>14</sup>Che aso pihaiivi pota nde repia. Aciuahía rumo co che ñehe ndeu <sup>15</sup>acoi che aracahese, ereicuañora rumo pe reco

tupri ãgua ava Tüpa rese yuvirecoi vahe pâhuve; ahe acoi Tüpa oicove vahe upendar yuvirecoi, oyemoviracua tupri vahe yuvireco co porombohesa supi eté vahe mboyecua ãgua. <sup>16</sup>Supi eté tuvichá etepri Tüpa reco oyecua ramo vahe roroya tuprisa:

Cristo oyemoporëhi yande reco nungar pipe yandeu.

Ipare Espiritu pipe imboyecuasa secocuer supi tupri vahe.

Iyavei Tüpa rembiguai rembiepiave secoi.

Ichui imombehusa opacatu ivi rupi; opacatu rupi avei seroyasa.

Iyavei ipisipri secoi ivave nara.

### **Oimera ava oyepipi vahe Tüpa rese oyeroyasa sui yuvireco coiye**

**4** Iyavei Espiritu aipo ehi tupri yandeu: coiye, ari cañi renonde, amove ava oyepipira Tüpa rese oyeroyasa sui yuvireco. Omboyeroyara espíritu oporombopa tõi vahe, porombohesa Carugar suindar avei. <sup>2</sup>Oyapisacara ava aipo ehi tõi vahe rese, semirañete ai vahe ñehe rese avei yuvireco. Ègüe ehira opihañemoñetasa mocañi tõi yuvireco. <sup>3</sup>Co ava niha, “Aní chira yamenda” ehi tõi ava upe yuvireco; “Aní chira yahu opacatu mbahe” ehi avei chupe. Tüpa rembiapo rumo co tembihu pomoviracuasa. Sese Jesús reroyasar iyavei oicua tupri vahe mbahe supi eté vahe yuvirohura ‘aviye ndeu’ ohesa pipe Tüpa upe yuvireco. <sup>4</sup>Esepia, opacatu mbahe Tüpa rembiapo, aviye ité. Ahe ndiyai chira yaroïro yaipisise, “Aviye ndeu” yande hesa pipe chupe. <sup>5</sup>Esepia, Tüpa oñehe pipe yande yeroquise co tembihu rese, osovasa yandeu.

### **Cristo rembiguai aviye vahe resendar**

<sup>6</sup>Acoi erembohese co mbahe rese yande rivireta iyavei ereyemoviracuase ñehesa poreroyasa resendar rese iyavei

porombohesa aviye vahe nde yese erereco vahe rese, ahese Jesucristo rembiguai aviye vahe ericora.

<sup>7</sup>Ndereyapisacai chira rumo acoi mbahe aracahendar co ivi pendar yapisaca tēisa rese. Eyembohe catu yande Yar uveño ité nde reco āgua. <sup>8</sup>Esepia, yepe aviyeño chíhi yande retecuer yamoviracua viña, yande Yar upe yande reco āgua aviye catu opacatu yande reco uve nara. Esepia, ahe yande pítiviira yande recove āgua cūrítei iyavei curi yande recove āgua. <sup>9</sup>Co supi eté vahe, evocoyase yande yaroyara opacatu yepi. <sup>10</sup>Sese niha yaporaviquí etepri. Esepia, yande yayeroya ité Tūpa ndopai vahe rese, ahe opacatu ava Pīsiosar, iyavei viroyasar Pīsiosar catu ité secoi.

<sup>11</sup>Co porombohesa eremombehura ava pāhuve, erembohe aveira sese. <sup>12</sup>Tipo eme ava nde roeroiro vahe chíhivahe catu nde reco rese. Nde rumo ereico tuprira Tūpa reroyasar rovaque. Eñehe Tūpa reroyasave nde reco tuprisa pipe. Esaisu tupri nde yeroyasave nde recocuer maranehi pipe. <sup>13</sup>Che yepota renondeve, eyeroqui catu Tūpa Ñhengagüer rese opacatu ava rovaque. Emonguerēhi catu yande rivireta iyavei erembohe tuprira. <sup>14</sup>Nderepoi chira Tūpa ndeu mbahecuasa ombou vahe sui. Esepia, ava Jesús reroyasar rārosar upe Tūpa omombehuse nde cuaitarā, omondo opo nde harive yuvireco.

<sup>15</sup>Ndehañeco catu co mbahe rese; tosepia catu opacatu ava nde recocuer yemoingatu catusa yuvireco. <sup>16</sup>Iyavei eñearo tupri, eicua catu nde porombohesa rese; eyemoviracua sese ité nde hañeco. Acoi ēgüe erese, ipīsiprori ericora; nde ñehe rese oyapisaca vahe avei ipīsiprori yuvirecoira.

### Mara ehira Jesús reroyasar oyepāhuve yuvireco

**5** Eremboaracua pīrata eme mbia cuacuami. Iyacatu rumo eremboaracuara mbegüe rupi inungar nde yesupa ité sereco. Iyavei mbia chíhivahe upe ereñehe tuprira secocuerā rese inungar nde rivri upe. <sup>2</sup>Cuña otīaro vahe upe avei ereñehe tuprira inungar nde si ité sereco; iyavei cuñatai eremboaracua tuprira inungar nde reindri ité ererecora opacatu nde reco catuprisa pipe.

<sup>3</sup>Acoi imer mano vahecuer ité ereipítiviira que mbahe ipane vahe rese. <sup>4</sup>Que oimese imembri, anise que semiaro, toyembohe rane ocuaita mboaviye āgua yuvireco chupe. Ēgüe tehi guaisu mboyeve chupe, ahe niha Tūpa remimbotar. <sup>5</sup>Iyavei acoi cuña imer mano vahecuer, acoi supi eté ahe ae secoi vahe, ahe oyeroya ité Tūpa rese, iyavei oyeroquiño ité ari, pītu yacatu yepi. <sup>6</sup>Osecase rumo mbahe güemimbotar yuvireco, ahese omano vahe tēi secocuer yuvirecoi. <sup>7</sup>Eyocuai tupri ava co ñehesa rese; ichui ndahei chira ava ñehedora tēi yuvirecoi. <sup>8</sup>Acoi ava rumo nosaroi vahe omu; acoi güeta pipendar nosaroi vahe avei, ahe ndoguata iri Tūpa rese oyeroyasa rupi iyavei mbahe tēi catu Jesús reroyasarēhi sui.

<sup>9</sup>Icuachiasara rumo ambuae cuña imer mano vahecuer pāhuve ivate catu sesenta sui iharaviter vahe, iyavei ñepeño ité omer vireco vahecuer. <sup>10</sup>Icuaprira secocuer icatuprisa rese, omboacua tuprise chíhivahe oyesuindar, omoinguese ava güeta pipe, ihañecose ava Tūpa reroyasar rese ipi sei āgua, oipítiviise ava iparaisu vahe, oyapo tuprise opacatu mbahe aviye vahe.

<sup>11</sup> Ereicuachía eme iharaviter ndosupitii vahe sesenta cuachiar pipe. Esepia, amove güemimbotar pipe tēi oyepepi Cristo sui, omenda yupagüe pota iri vahe. <sup>12</sup> Ipipe oimera Tüpa poronupasa chupe. Esepia, yipindar oyemondo Tüpa upeño ité oyecuchiase. Ipare rumo nomboaviyei eté oñehe. <sup>13</sup> Iyavei oi yacatu rupi tēi oguatase oico, ahese virecora oatēhisa, iyavei imahechiroi tēira, oñangareco tēira opacatu rese, omombehu-mbehu tēi aveira mbahe naporai vahe. <sup>14</sup> Sese co aipota acoi imer mano vahecuer cuñatai vite vahe: tomenda iri, timembi iri avei yuvireco, iyavei tosāro tupri güeta pipendar. Sese yamotarēhimbar secocuer ndahei chira oñheporā tēi vireco yuvireco. <sup>15</sup> Esepia, oime ité amove oyepepi vahe güemimbotar pipe Carugar rupi güeco āgua.

<sup>16</sup> Acoi oimese que cuña Tüpa reroysasar vireco vahe que cuña imer mano vahecuer oyepiri, ahe toipitivi yuvireco. Ahe sese evocoiyase tüparo pendar nihañecoi chira. Ahese oicatura supi eté imu ndipoi vahe rese hañeco āgua yuvireco.

<sup>17</sup> Iyavei acoi Tüpa reroysasar rārosar osāro tupri vahe, ahe toipisi catu ava poropitiviisa imboyeroyasave. Acoi oyemondo vahe Tüpa Ñehengagüer mombehu āgua, ava mbohe āgua avei, ahe co poropitiviisa oipisi catura. <sup>18</sup> Esepia, aracahendar icuachiapri pipe aipo ehi: “Ereiyuru āpichi rene tivi oporaviqui vahe trigo cambesar” ehi. Iyavei aipo ehi: “Mbia oporaviqui vahe iyacatu oipisira oporaviqui repri” ehi.

<sup>19</sup> Iyavei nde, ndereroyai chira mbahe omombehu vahe Tüpa reroysasar osāro vahe yamotarēhisave yuvireco. Oimese que ñuvirío sepiasar, que mbosapi, ahese ramo ereroyara.

<sup>20</sup> Acoi oimese rumo angaipa aposar ipāhuve, ahese eremboaracuara opacatu

ava rovaque. Evocoiyase ambuae osiquiyera angaipa apoēhi āgua yuvireco.

<sup>21</sup> Iyavei che orocuai Tüpa rovaque, Jesucristo rovaque iyavei opacatu Tüpa rembiguai iva pendar rovaque avei: ereyapo tupri ra co mborocuaita, ndere-momahuatii chira ava imboaracua nde remimbotar rupi tēi. <sup>22</sup> Ndahei chira pihai vi ereseno mbia mborocuaita rese ihañeco vahe rā. Aviyeteramo nde rese päve mbahe oimera. Eñearo tupri nde reco marañehisa pipe.

<sup>23</sup> Nde rie mbahe rasisa upe ndereihui chira i güeraño tēi, chíhimi rumo uva ricuer ereihuñomira chupe.

<sup>24</sup> Amove ava angaipa oyecua tupri oyeupe porandu āgua renonde. Oime rumo acoi oñomi vahe oangaipa yuvireco. Ipare tēi icuasa. <sup>25</sup> Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ité nañomisai chira.

**6** Iyavei co ava mbiguai Jesús reroysasar, ahe oyeroya tupri ra güerecuar yuvireco ava oñehe-ñehe tēiēhi āgua Tüpa rer rese, yande porombohesa rese avei no. <sup>2</sup> Acoi co mbiguai virecose güerecuar Tüpa viroya vahe yuvireco, ahese ndovirecoi chira imboyeroyaēhisa Jesús reroysasar recosa rese. Iyacatu rumo omboyeroya tupri catura güerecuar yuvireco. Esepia, serecuar oipisi vahe iporaviquisa, ahe Jesús reroysasar saisupri yuvirecoi yepi.

### **Tüpa rese yande pihañemoñetasa sepirusu vahe nungar**

Eporombohe, emombehu co mbahe: <sup>3</sup> oimese oporombohe vahe oyesuindar pihañemoñetasa co coti tēi vahe rese, ndoyoyai vahe yande Yar Jesucristo porombohesa aviye vahe rese, ndoyoyai vahe avei yande yembohesa Tüpa rese yande yeroya tupri sa rese, <sup>4</sup> ēgüe ehi vahe oyemboivate ai tēi mbahe renducuaēhisave. Iyavei

oporandu-randu tēi ñehesa rese secoãha ãgua inungar imbaheasi vahe. Ichui osē mbahe pota raisa, ñemoirosa, ñehe-ñehe tēisa, yemboyeraãhisa<sup>5</sup> iyavei iporoacasa ndopai vahe ava yaracua rai vahe pãhuve. Ndoicuai rumo mbahe supi tupri vahe yuvireco. Ipihañemoñeta Tūpa rese omahenduhasa pipe mbahe rereco ati ãgua yuvireco viña.<sup>6</sup> Yayembovihanose mbahe yande rembiereco rese, ahese Tūpa rese yande pihañemoñetasa inungar mbahe sepirusu vahe yandeu.<sup>7</sup> Esepia, ndayarui eté niha mbahe yahase co ivi pipe iyavei ndayarasoi chiaveira mbahe yamanose yande yeupi.<sup>8</sup> Iyacatu rumo yarecose yande remihura, yande yemonde ãgua avei, sese yayembovihanora yaico.<sup>9</sup> Amove rumo ava, “Mbahe rerecosar ité taico” ehi tiēte viña, ndoyemoviracuai rumo tecoãhasa upe. Ipare oviapi mbahe tēi pipe, setá mbahe pota raisave, ipipe oyeecomomara. Ipare oyemocañi tēi.<sup>10</sup> Esepia, guarepochi pota raisa sui osē opacatu mbahe naporai vahe. Amove ava ipota raisa pipe oyepepi Tūpa reroyasa sui iyavei omombaraisu güecocuer ipipe ahe ae yuvireco.

### **Tūpa rese yande reco vīracuasa**

<sup>11</sup>Nde rumo, Tūpa rese ereico vahe, eyepēpi opacatu co nungar mbahe naporai vahe sui. Eico nde reco ivisa pipe, ndemahenduhaño ité Tūpa rese. Eroya, esaisu, eñemosa avei eico nde reco mbegüesave.<sup>12</sup> Eyemoviracua ité mbahe tēi uve Tūpa reroyasa rese. Erepoi rene tecovesa apirēhi vahe sui, sese niha Tūpa oñehe ndeu. Iyavei eremombehu ité niha Tūpa reroyasa nde reco ãgua ava eta rovai.<sup>13</sup> Cūrítei Tūpa rovaque, ahe opacatu mbahe moingovesar iyavei Jesucristo rovaque, ahe niha omombehu tupri ité supi eté vahe Poncio Pilato

rovai, che orocuai<sup>14</sup> ndererovai chira che remimombehu ‘tipo eme, mara ehi, ehi tēi vahe yuvireco ndeu’ che yapave. Nderepoi chietera co nde reco tuprisa sui acoi ouse yande Yar Jesucristo.<sup>15</sup> Acoi oyepotase ari imombehupri curi, ahese Tūpa omboyevira Guahir. Ahe niha ñepeí vahaño ité imboetēpri, seco pīrata catu vahe. Aheño ité niha mborerecuar ivate catu vahe rerecur.<sup>16</sup> Aheño ité teco apirēhi vahe, tesapesa secoi; ndipoi oyemboya vahe sese, ndipoi eté que ava osepia vahe. ¡Ēgüe tehi, imboetēpri tasecoi opacatu opīratasa apirēhi vahe rese!

<sup>17</sup>Acoi imbahe eta vahe co ivi pipe eyocuai: toyemboivate ai eme, iyavei toyeroya rai eme ombahe eta rese tēi yuvireco. Esepia, ahe Ēgüe ehi tēi vahe. Iyacatu rumo Tūpa rese oyeroyara yuvireco. Ahe niha opacatu mbahe icatupri vahe ombou yandeu nara yande rembiporugüa.<sup>18</sup> Eyocuai avei evocoi ava: toyuvirecoi mbahe yar nungar mbahe aviye vahe aposa pipe. Iyavei toyemoingatuño acoi mbahe vireco vahe mboyaho ãgua ambuae ava upe yuvireco.<sup>19</sup> Evocoiyase virecora mbahe aviye vahe, apirēhi vahe oyeupe nara yuvireco curi tecovesa supi eté vahe rereco ãgua.

### **Timoteo cuaitarã ipa vahe**

<sup>20</sup>Timoteo, esãro tupri co porombohesa supi tupri vahe Tūpa ombou vahe ndeu. Ereyapisacai rene ava tēi pihañemoñetasa Ēgüe ehi tēi vahe rese, iyavei porombohesa co coti tēi vahe rese avei. Esepia, amove ava aipo ehi co porombohesa rese, “Co ité, yande mboaracuara” ehi tupri tēi vahe yuvireco chupe.<sup>21</sup> Ipipe sui niha amove ava oyavi Tūpa reroyasa yuvireco.

Aviye, yande Aposar tande rovasa. Aipo rupive.

*PABLO REMBICUACHIA  
IMOÑUVIRIOSA TIMOTEO UPE*

**TIMOTEO**

**Pablo mahenduhasa Timoteo upe**

**1** <sup>1-2</sup>Che, Pablo, amondo co cuachiar ndeu, che rembiaisu, che rahir nungar, Timoteo. Che niha Jesucristo apóstol aico Tūpa remimbotar rupi acoi “che amondora teco piasu che reroyasar uve” ehi vahe rupi tupri. Ahe cūrítei oime yandeu Jesucristo rese yande recose. Yande Ru Tūpa iyavei yande Yar Jesucristo tombou oporovasasa, oporoparaisuerecosa nde reco tupri āgua ndeu.

**Pablo oyocuai Timoteo Cristo  
recocuer mombehu āgua**

<sup>3</sup>Che yeroqui pāhuve, chemahenduha nde rese pītu, ari yacatu rupi. “Aviye ndeu” ahe Tūpa upe nde recocuer rese. Che aporaviqui tupri ité Tūpa rese che pihañemoñeta tuprisa pipe yepi inungar che ramoi eta oyapo yuvireco aracahe. <sup>4</sup>Ndacheresaraí eté acoi nde yaseho agüer sui. Iyavei oroepia pota tēi che yemboviharete āgua. <sup>5</sup>Supi eté chemahenduhāño ité nde Tūpa reroyasa supi eté vahe erereco vahe rese. Iyavei nde yari Loida, nde si Eunice, ahe niha yipindar ēgüe ehi yuvireco. Evocoyase ayeroyaño ité nde rese, nde avei ēgüe erese.

<sup>6</sup>Sese che oromonguerēhi embouvichacatu co Tūpa ombou vahe ndeu acoi amondose che po nde harive; ahe erereco ndeyeupe. <sup>7</sup>Esepia, Tūpa nomboui siquiyesa yandeu. Ahe rumo ombou yande reco moviracuasa, poroaisusa, iyavei yande mbopihañemoñeta tupri āgua. <sup>8</sup>Evocoyase eresi quiyee mecatu yande Yar recocuer mombehu. Nderechī chiaveira che roquendasa sui

tēi. Esepia, yande Yar recocuer mombehusa sui tēi niha che roquenda yuvireco. Iyacatu rumo, nde avei ereñemosañora co mbahe-mbahe tēi Tūpa pīratasa pipe. Ahe oura ndeu ñehesa pīsirosa resendar mombehusa sui. <sup>9</sup>Tūpa niha yande pīsiro iyavei yande renoi yande reco tupri āgua sese, ndahei yande rembiapo pipe. Ahe rumo güemimbotar rupi yande raisu Cristo Jesús rese yande recose. Ahe Tūpa ité yande raisu yipisuive ivi apo viteēhiseve. <sup>10</sup>Cūrítei rumo ahe omboyecua oporoaisusa yande Pīsirosar Jesucristo ouse, acoi ou vahe co ivi pipe manosa pīratasa recopi āgua. Iyavei ñehesa pīsirosa pipe avei oicua uca tecovesa ndopai vahe.

<sup>11</sup>Tūpa niha che cuai co ñehesa mombehu āgua. Che cuai avei apóstol che reco āgua iyavei che porombohe āgua. <sup>12</sup>Sese niha che opacatu aiporara co mbahe-mbahe tēi vichico. Nachi eté rumo yande Yar rese che yeroyasa pipe. Esepia, aicua ahe vireco pīratasa acoi ñehesa ombou vahe cheu imocañiēhi āgua acoi Jesús yevi āgua rupi eté.

<sup>13</sup>Erecoveño ité porombohesa aviye vahe che suindar, iyavei eicoño ité Tūpa rese nde yeroyasa pipe iyavei poroaisusa yareco vahe pipe Cristo rese yaicose. <sup>14</sup>Esāro avei co ñehesa aviye vahe Tūpa ombou vahe ndeu Espiritu Santo reco pīratasa pipe yareco vahe yandeyese.

<sup>15</sup>Ereicua niha co ava opacatu Asia pipendar oyepepiño che sui yuvireco. Ipāhuve yuvirecoi mbia ñuvirío, ahe serer: Figelo, Hermógenes. <sup>16</sup>Yande Yar tomondo paraisuerecosa Onesíforo mu upe. Esepia, Onesíforo setá yupagüer che mboviha. Iyavei nochi eté ava rovaque che roquendasa sui. <sup>17</sup>Ouse rumo Roma ve, ndopituhui eté che reca. <sup>18</sup>Yande Yar tomondo oporoparaisuerecosa chupe ahe ari pipe curi. Iyavei nde ereicua tupri ité ahe mbia yande pītívii vahe Efeso ve.

**Jesucristo sundao  
oyemoviracua vahe**

**2** Iyavei nde no, che rahir, eye-moviracua mbahecuasa Jesucristo ombou vahe pipe ndeu. <sup>2</sup>Acoi che porombohesa eresendu vahe ava rehii rovaque amondo vahe ndeu, embohe tupri mbia oyeroya vahe, oicatu vahe avei ambuae mbohe água.

<sup>3</sup>Nde eyemoviracuaño teco asi upe Jesucristo uve nara inungar sundao oye-moviracua vahe ité. <sup>4</sup>Ñepeí yepe sundao ndosirii eté ocuaita sui. Esepia, ahe oye-moingatu voi eté ocuai água güerecuar upe. <sup>5</sup>Iyavei iguayi rai vahe, ndoipisii chira porerecosa oguayi tupriēhi pipe. <sup>6</sup>Iyavei yande inungar que ava oñoti vahe mbahe, ahe rane omonuha güemiti yaviyese oyeupe yepi. <sup>7</sup>Eyapisaca tupri co che ñehe rese. Yande Yar niha os-educua uca tuprira opacatu co mbahe ndeu.

<sup>8</sup>Iyavei no ndemahenduha Jesucristo rese. Ahe niha ocuerayevi vahe. Iyavei aracahendar mborerecuar David suindar secoi. Co niha ñehesa ñepisirosa resendar amombehu vahe vichico. <sup>9</sup>Co ñehesa mombehusa sui tēi che mombaraisu yuvireco. Che roquendasave aviye oporapichi vahe che rereco yuvireco. Tüpa Ñhengagüer mombita rumo ndoicatuí eté yuvireco. <sup>10</sup>Sese che añemosañño opacatu mbahe-mbahe tēi upe opacatu Tüpa rembiporavo recocuer aviye água rese ‘tovireco catu pãsirosa porañete, apirēhi vahe Jesucristo rese yuvireco’ che yapave.

<sup>11</sup>Co niha supi tupri vahe: Yamanose Cristo rese, ahese yaicove aveira sese.

<sup>12</sup>Yañemosase mbahe tēi upe, ahese yande yaicora mborerecuar imborerecuasave ipiri.

“Ndaicuai Jesucristo” yahese, ahese ahe avei,

“Ndopocuai vahe” ehiñora yandeu.

<sup>13</sup>Yepe co coti tēi yarovara yande recocuer seroyaēhisave, ahe rumo ndovirovai chietera güeco ïvisa.

Esepia, ndoicatuí, “Ndahei che ahe aico” ehi vaherã.

**Ava osē tupri vahe  
güecoãhasa Tüpa upe nara**

<sup>14</sup>Emomahenduha yuvireco co ñehesa rese, iyavei eyocuai Tüpa rovaque: topoi ñehepoepi-episa sui yuvireco, co ñehepoepi-episa ēgüe ehi tēi vahe. Esepia, omomara ambuae ava osenduse ñehe rai yuvireco. <sup>15</sup>Eyapo tupri mbahe opacatu nde catugüer rupi nde recocuer mboyecua água Tüpa rovai inungar oporaviqui tupri vahe, nochi vahe. Égüe ere, eporombohe tupri ñehesa supi eté vahe rese. <sup>16</sup>Eyepipi ñehe tēisa, ēgüe ehi tēi vahe sui. Esepia, co nungar ñehesa tēi ombouvicha catu mbahe naporai vahe. <sup>17</sup>Iyavei iporombohesa rai oyembouvicha inungar caracha vai ndocuera catui vahe, oyembouvichavichañño yepi. Égüe ehi Himeneo, Fileto <sup>18</sup>oyavi porombohesa supi eté vahe sui yuvireco. “Opa cuerayevisa. Ndipo iri chira” ehi tēi yuvireco. Ipipe Jesús reroyasar oipihañemoñeta rerova yuvireco. <sup>19</sup>Tüpa rumo omondo mbahe moviracua tupri água, sese icuachiasa aipo ehi vahe: “Yande Yar oicua ité oyeupendar ava” ehi, iyavei, “Opacatu yande Yar rer vireco vahe, toyepipi mbahe naporai vahe sui yuvireco yepi” ehi.

<sup>20</sup>Oi guasu pipe, ndahei guarepochi, oro apopri güeraño oime, oime avei ivirape, ñaihu apopri avei no. Ñepeí iporupirã ari imboeteisa pipe nara, ambuae rumo ari rupi iporupirã. <sup>21</sup>Acoi ava oñemoatiro vahe co tecocuerai sui Tüpa upe nara, ahe ipehasa inungar vaso oro apopri poromboeteisa pipe iporupirã; ahe ava oye-moingatu voi eté oico mbahe icatupri vahe apo água Tüpa upe.



<sup>22</sup>Eyepepi mbia chíhivahe píhañemoñeta rai tēisa sui. Emohivi tupriño ité nde recocuer sereco. Eyeroyaño ité Tūpa rese. Esaisu catu avei ava, eico avei nde reco tupri pipe, inungar Jesucristo reroyasar oyapo opihañemoñeta tuprisa pipe yuvireco. <sup>23</sup>Eremboyeroyai rene ñehesa porandu-randu tēisa, ēgüe ehi tēi vahe. Ereicua niha ichui tēi oime yeamotarēhisa yepi. <sup>24</sup>Iyavei yande Yar rese oporaviqui vahe, ndiyai oyecopi ñehe pipe yuvireco. Iyacatu rumo, aviyea secocuer opacatu upe, oporombohe tuprira, oñemosañora ombahe mboasiēhisa pipe oico. <sup>25</sup>Iyavei omboaracuara güeco asiēhisa pipe acoi ava ndiporeroyai vahe. Esepia, aviyeteramo Tūpa osecañarora ipihañemoñeta raisa oyeupe yevi iri āgua: ipipe sui porombohesa supi eté vahe oicua yuvireco. <sup>26</sup>Ipipe sui avei toyemopoase, toyuvínose Carugar povri sui semimbatar apo iriēhi āgua.

### Mara ehira ava ari ipa vahe pipe curi

**3** Iyavei tereicua ari ipa vahe yepotasa, ahese oimera tecocuer yavai catu vahe. <sup>2</sup>Ahese ava ahe ae tēi oyeaisura yuvireco, guarepochi tēi oipota raira, oyemboivate aira, oyemboetei ai tēi aveira. Oñehe raira Tūpa rese yamotarēhisave. Nomboyeroyai chira oyesupa yuvireco. Setá aveira, “Aviye ndeu” ndehi vahe ava upe. Iyavei nomboetei chira Tūpa rese píhañemoñetasa yuvireco. <sup>3</sup>Ndosaisui chira oyesuindar yuvireco. Niñeroi chiaveira oyeupe yuvireco. Iyavei imahechiroi aira. Noñemosai chira mbahe tēi apo āgua yuvireco. Güeco asi pipe avei yuvirecoira. Iyavei opacatu mbahe aviye vahe oyamotarēhira yuvireco. <sup>4</sup>Iyavei omondora ava yamotarēhimbar upe, ndiporomboetei chira güemimbotar apo yuvireco. Iyavei oyemboivate aira

yuvireco, oseca güemimbotar tēi oyemboviha āgua yuvireco. Ipipe rumo Tūpa ndosaisui chira yuvireco. <sup>5</sup>Ahe inungar-ra Tūpa rese ité yuvirecoi vahe viña. Tūpa píratasa rumo nomboyecuai chietera güembiapo pipe yuvireco oyese.

Sese nde, eyepepiño evocoi nungar ava sui. <sup>6</sup>Esepia, evocoi nungar ava páhuve oime yuviroiqueño tēi vahe oi rupi cuña ndoicatu vahe angaipa rerecosar mbopa āgua. Esepia, ahe cuña opihañemoñeta raisa pipe yuvirecoi vahe. <sup>7</sup>Yepe oyapisaca tupri tēira ñehesa rese yuvireco viña, ndosupitii eté rumo co porombohesa supi eté vahe renducua āgua yuvireco. <sup>8</sup>Inungar co ava ipaye vahe Janes, Jambres serer vahe oyemboyere Moisés amotarēhi yuvireco, ēgüe ehi avei evocoi ava porombohesa supi eté vahe amotarēhisar yuvireco. Ahe oyemomara vahe opihañemoñeta rai pipe yuvireco. Ndoviroyai eté Jesús porombohesa yuvireco. <sup>9</sup>Ndoporombopa iri chira rumo yuvireco. Esepia, opacatu ava oicua yuvireco imbahecuaēhi rese, inungar co ñuvirío mbia Moisés amotarēhimbar yuvirecoi aracahe.

### Timoteo cuaitarā ipa vahe

<sup>10</sup>Nde rumo che reco rupi tupri ité ereico. Esepia, ereroia tupriño ité che porombohesa, che píhañemoñetasa, che Cristo rese yeroyasa, che reco mbegüesa, che poroaisusa iyavei che ñemosasa <sup>11</sup>opacatu mbahe tēi porarasa rese. Nde niha ereicua opacatu mbahe tēi oime vahe cheu co tecua guasu, Antioquía ve, Iconio ve, Listra ve avei no, iyavei che paraisusa mara-mara tēi che rerecose yuvireco. Yande Yar rumo che písiro opacatu evocoi mbahe-mbahe tēi sui. <sup>12</sup>Supi eté opacatu acoi Jesucristo rese güecocuer vireco pota vahe oiporarara mbahe-mbahe tēi yuvireco. <sup>13</sup>Ava sec-

ocuer naporai vahe rumo, iporombopa serai vahe avei ombouvicha catura güecocuerai; oporombopa-mbopa tēira yuvireco. Iporombopasa pipe rumo ambuae omboveyira chupe.

<sup>14</sup>Nde rumo ereyemoviracuaño itera acoi ereyembohe vahe rese. Ahe ereroya tupriño ité. Esepia niha, nde mbohesar ereicua. <sup>15</sup>Iyavei eyemomahenduha co rese: nde chíhivahe suive ité niha ereicua Tūpa ñehesa icuachiapri eico. Ahe niha nde mombahecua vahe nde pīsiro āgua Jesucristo reroyasa pipe.

<sup>16</sup>Opacatu co ñehesa icuachiapri ou vahe Tūpa sui, aviye ai eté porombohe āgua, iyavei poromboyapisaca āgua, poromboaracua tupri āgua iyavei ava upe ñehesa tupri āgua secocuer mohīvi āgua yepi. <sup>17</sup>Ichui, ava Tūpa rese yuvirecoi vahe oyemoingatu voira opacatu tecocuer tupri apo āgua yuvireco.

**4** Iyavei no, co rese che orocuai pota Tūpa rovaque, Jesucristo rovaque avei acoi ou vaherā omborerecuasa reseve oicove vahe, omano vahe recocuer rese porandu āgua. <sup>2</sup>Emombehu Tūpa Ñehengagüer ari rupi. Erova ité ava reco. Eporomboaracua, eporomonguerēhi tupri avei opacatu nde reco asiēhisa pipe. <sup>3</sup>Esepia, coiye ava ndosendu pota iri chira porombohesa aviye vahe yuvireco. Ahese güemimbotar tēi osecara ombohe āgua, güemimbotar tēi avei omombehu ucara oyeupe yuvireco. <sup>4</sup>Iyavei oyepipira co mbahe supi eté vahe sui. Viroyara rumo opacatu ava remimombehu tēi yuvireco. <sup>5</sup>Nde rumo, ererecoveñora nde aracua tuprisa. Eñemosañō mbahe naporai vahe upe. Ndehañeco catu ñehesa pīsirosa resendar mombehu āgua. Emboaviye tupri avei opacatu nde poraviquisa.

<sup>6</sup>Virovi ari che retecuer mondo āgua manosave inungar mbahe seropovēhepri yande Yar upe. <sup>7</sup>Ayapopa che recoeté

pipe che poraviquisa aviye vahe che amotarēhimbar pāhuve. Amboaviye che cuaita. Ndayepēpi eté che yeroyasa sui. <sup>8</sup>Cūrítei che rāro ivave co porerecosa che poraviquí aviye vahe resendar. Yande Yar mborerecuar seco īvi vahe niha omboura cheu ahe ari pipe. Ndahei chira cheu güeraño. Ombou aveira opacatu Cristo raisusa pipe iyevisa osāro vahe upe yuvireco.

### Pablo, “Eyu rane che repia” ehi Timoteo upe

<sup>9</sup>Ndepoyava catu eyu che repia. <sup>10</sup>Esepia, Demas che reya co mbahe ivi pipendar tēi potasave, ichui tēi oso tecua Tesalónica ve. Crescente oso tecua Galacia rupi. Iyavei Tito oso Dalmaçia ve. <sup>11</sup>Lucas güeraño oicove che piri. Eseca Marcos, tou nde rupi che pītivii āgua mboraviquí rese. <sup>12</sup>Tíquico amondo tecua Efeso ve. <sup>13</sup>Acoi ereyuse, eru avirave che yemboyhasa aseya vahe Troas ve Carpo rētave. Iyavei cuachiar guasu, ambuae cuachiar reseve, ahe aipota catu vahe; erupa eyu.

<sup>14</sup>Alejandro, guarepochi mombesar, oyapo mbahe tēi cheu. Yande Yar rumo oicua sembiapogüer rese chupe. <sup>15</sup>Iyavei nde eicua catu ichui. Esepia, ahe yande amotarēhi mbahe yande remimombehu rese oico.

<sup>16</sup>Yipindar añehese che yoepi āgua mborerecuareta rovai, ndipoi eté que che pītivisar; opacatuño ité che reya yuvireco. Tūpa tiñero sese yuvireco chupe.

<sup>17</sup>Yande Yar Jesucristo rumo che pītivii. Che momirata co ñehesa pīsirosa resendar mombehu tupri āgua opacatu ava ndahei vahe judío upe. Ēgüe ehi avei che renose mbahe tēi sui. <sup>18</sup>Ahe che pehara opacatu mbahe-mbahe tēi sui iyavei che pīsirova oyepiri ivave che so āgua. ¡Ēgüe tehi timboeteisa catu yande Yar apirēhi vahe yepi!

**Mahenduhasa opacatu upe**

<sup>19</sup> Emombehu che mahenduha Prisca upe, Aquila upe iyavei opacatu Onesíforo rēta pendar upe avei. <sup>20</sup> Erasto opita Corinto ve, Trófimo rumo imbaheasi, evocoyase aseya Mileto ve.

<sup>21</sup> Ndepoyava catu eyu irohi yu renondeve. Imahenduha yuvireco nde rese Eubulo, Pudente, Lino, Claudia iyavei opacatu yande Yar viroya vahe yuvireco.

<sup>22</sup> Yande Yar Jesucristo toico nde rese. Iyavei Tūpa tape rovasa opacatu pe rereco. Aviye. Aipo rupive.

*PABLO REMBICUACHIA TITO UPE*

**TITO**

**Pablo mahenduhasa Tito upe**

**1** Che, Pablo, Tūpa rembiguai aico iyavei Jesucristo apóstol semim-bou aico Tūpa rese yeroyasa mondo āgua sembiporavo eta upe iyavei Tūpa rese pihañemoñetasa supi tupri vahe cua uca tupri āgua. <sup>2</sup>Esepia, tecovesa apirēhi vahe rārosa pipe sui viroyara, oicua aveira yuvireco. Tūpa ndopombopai vahe niha omombehu co tecovesa mondo āgua ivi apo viteēhi-seve oico. <sup>3</sup>Ichui cūritei ari oyepota yandeu inēhengagüer cua āgua. Sese Tūpa, yande Pīsiosar, che cuai oñehengagüer mombehu. <sup>4</sup>Tito, co che ñehe aicuachía ndeu; nde niha che rahir ité ereico Jesucristo rese yande recosa pipe. Esepia, oyoya yaroya vahe yaico. Yande Ru Tūpa, yande Pīsiosar Jesucristo tombou oporovasasa nde reco tupri āgua ndeu.

**Tito poraviquisa caha pāhu Creta ve**

<sup>5</sup>Che oroeya vitu co caha pāhu Creta ve mbahe opita vite vahe moingatu tupri āgua. Iyavei, “Eiporavo ava, Jesucristo viroya vahe rāro āgua ñepeipei tecua rupindar” ahe acoi ndeu cuese. <sup>6</sup>Evocoi Jesucristo viroya vahe rārosar toyuvirecoi güeco tupri āgua. Tipo eme “co oyapo mbahe” ehi-ehi tēi vahe yuvireco oyeupe. Ñepeño güembireco virecora yuvireco; tahir evocoiyase Jesucristo reroyasar pāvera. Iyavei ndoyuvirecoi chira ndoyemboaracuai vahe nungar opereroyaēhisa pipe ambuae ava ñe-heēhi āgua sese yuvireco. <sup>7</sup>Acoi Jesucristo reroyasar rārosar yuvirecoi vahe, ahe icuaita mbahe Tūpa upendar rese. Sese taseco ivi tupri yuvireco. Iyavei toico eme opereroyaēhisa pipe, toñe-

moiro eme avei, ndahei chiaveira caguar tēi; ndivava serai chiaveira, tiguarepochi pota rai eme yuvireco. <sup>8</sup>Iyacatu rumo omoinguerava oyepota vahe güetave oyepiri. Iyavei aviye aira yepi. Osāro tuprira güecocuer. Iyavei taseco ivi güeco catupri pipe Tūpa upe. Tosāro tupri avei opihañemoñetasa yuvireco. <sup>9</sup>Iya oyemboya catu oyembohesa supi tupri vahe rese yuvireco. Ipipe sui tomonguerēhi catu ambuae yuvireco co ñehesa maranehi pipe iyavei ambuae seroīrosar pihañemoñeta mohivi āgua.

<sup>10</sup>Esepia, oime setá nimbahe roroyai vahe; judío “peyembocircuncida pe ñepisiro āgua” ehi vahe pāhuve oime catu evocoi nungar. Ahe omondo-mondo tēi vahe oñehe, ombopa tēi vahe avei ava yuvireco. <sup>11</sup>Ēgüe ehi vahe iyacatu pemonguiriri. Esepia, ahe niha setá ava oñemu vahe omboyepipi uca porombohesa supi tupri vahe sui yuvireco. Oporombohe mbahe co coti tēi vahe rese guarepochi rereco āgua tēi yuvireco.

<sup>12</sup>Ñepe mbia, otūpa ñehe mombehusar, Creta iguar ae aipo ehi omu rese oñehe: “Co Creta iguar yuvirecoi vahe semirañete ai, mbahe mimba nungar tēi, icaru ai, yangaipa vai yuvireco yepi” ehi oñehe. <sup>13</sup>Supi eté aipo ehi; sese emboaracua pīrata ité. Evocoiyase toviroya tupri Tūpa yuvireco. <sup>14</sup>Iyavei toviroya eme co judío oyesui tēi mbahe omombehu vahe iyavei ava porocuita tēi yuvireco. Esepia, ahe oyemboyere mbahe supi vahe sui yuvireco.

<sup>15</sup>Acoi ava ndaseco marai vahe upe opacatu mbahe nimarai. Ndiporeroyai vahe, ipihañemoñeta rai tēi vahe upe rumo, ndipoi eté mbahe nimarai vahe. Esepia, ipihañemoñeta, yaracuasa avei naporai eté. <sup>16</sup>Iyavei, “Che aicua Tūpa” ehi tupri tēi angahu yuvireco. Mbahe sembiapo rese rumo icuasa seroyaēhisa yuvireco. Ahe niha ava

ndosepia potai vahe, ndiporeroyai vahe yuvireco, ndoicatu mbahe aviye vahe apo yuvireco yepi.

### Porombohesa nimarai vahe

**2** Nde ñehe toyoya tupri co porombohesa nimarai vahe rese yepi. <sup>2</sup>Evocoyase mbia ofiario catu vahe Tüpa reroyasar toñearo tupri, imboyeroyapri toyuvirecoi, tosáro tupri güecocuer, tovíreco tupri avei Tüpa reroyasa, oporoaisusa. Iyavei güeco mbegüesa pipe toñemosa mbahe-mbahe tēi upe. <sup>3</sup>Ēgüe tehi avei cuña ofiario vahe Tüpa reroyasar yuvireco: güeco tupri tovíreco oporomboeteisa pipe yuvireco. Iyavei timahechiroi eme, ndosavaipoi chiaveira. Ahe rumo omboyecuara güecocuer aviye vahe, <sup>4</sup>ombohera cuñatai imer raisu água, imembri raisu água avei. <sup>5</sup>Tombohe avei seco tupri água, iñearo tupri água angaipa sui iyavei sēta pipendar rese hañeco tupri água yuvireco. Tomboaracua avei seco aviye água, imer mboyeroa água avei. Evocoyase noñehe-ñehe tēi chira ava Tüpa Ñehengagüer rese yuvireco.

<sup>6</sup>Ēgüe ere avei emonguerēhi mbia chíhivahe secocuer rese iñearo tupri água. <sup>7</sup>Iyavei emboyecua nde recocuer aviye vahe opacatu mbahe rese yuvireco chupe; nde imbohe tuprisa pipe emboyecua nde reco maranehisa, nde poromboeteisa avei. <sup>8</sup>Iyavei ereñehera nde reco tupri pipe. Ipipe ambuae noñehe rai chira yuvireco nde rese. Evocoyase yande amotarēhimbar yuvinochira ndoicatuise, “Mbahe” ohe água yuvireco yandeu.

<sup>9</sup>Emboaracua avei mbiguai yuvirecoi vahe: tovíroya opacatu mbahe rese güerecuar, tomboyeroa imboeteisave, toiñehepoepi eme avei yuvireco. <sup>10</sup>Iyavei toñomi eme mbahe. Iyacatu rumo seroyapri tupri yuvirecoira.

Evocoyase opacatu osepiase seco tuprisa, omboeteira yande Písirosar Tüpa recocuer resendar yembohesa yuvireco.

<sup>11</sup>Tüpa niha omboyecua oporoaisusa yandeu. Ahe güeru písirosa opacatu ava upe. <sup>12</sup>Co poroaisusa Tüpa suindar yande mbohe mbahe-mbahe tēi iyavei yande remimbotar tēi reya água. Iyavei yande mbohe co ivi pipe yande ñearo tupri água, yande reco ñvi água iyavei Tüpa mboetei água. <sup>13</sup>Iyavei yasáro yande viharetesa pipe Tüpa omboaviye vaherã güemimombehu, ahe Jesucristo yande Tüpa seco ivaté vahe, yande Písirosar yevi irisa oporañetesa pipe. <sup>14</sup>Ahe oyemondo oyeyuca uca yande rese yande písiro água opacatu mbahe-mbahe tēi sui yande reco moatiro tupri água. Evocoyase yande yaico chupe nara güeraño ité yande querēhisave opacatu mbahe aviye vahe apo água.

<sup>15</sup>Evocoi rese erembohera, eremonguerēhira, eremboaracua aveira opacatu nde porocuaite pipe. Sese tipo eme que nde roerōrosar.

### Jesús reroyasar cuaita

**3** Co rese emomahenduha: toyapo ava mborerecuar guasu porocuaite yuvireco iyavei opacatu ambuae mborerecua-recuarmi porocuaite avei. Iyavei toyemoingatu tupri opacatu mbahe aviye vahe apo água yuvireco. <sup>2</sup>Toñehe-ñehe tēi eme ambuae ava rese yuvireco. Iyavei tiñemoiro serai eme, toporoaisu, tomboyecua avei güeco mbegüesa opacatu ava upe yuvireco.

<sup>3</sup>Esepia, yipindar yande avei ndayande mbahecuaí yaico iyavei ndayaroyai Tüpa. Ocañi tēi vahe yaico, iyavei yande mbiguai tēi yaico opacatu mbahe yande remimbotar apo pipe; iyavei yaseca-seca mbahe tēi vahe yande yemboviha água. Iyavei yaicoño mbahe tēi pipe, yaipotaño tēi

ambuae ava mbahe, yamotarēhimbri yaico iyavei yandeyeupe ae-ae yayeamotarēhi. <sup>4</sup>Ipare rumo Tūpa, yande Pīsīrosar, omboyecua güeco tuprisa, oporoaisusa opacatu ava upe. <sup>5</sup>Yande pīsīro, ndahei rumo yande rembiapo aviyesa sui, ahe rumo vireco oporoparaisuerecosa yandeu nara. Ichui omoatiro yande recocuer yande reco mopiasu. Iyavei Espiritu Santo pipe yande recocuer recuñaro tecove piasu rereco āgua. <sup>6</sup>Iyavei yande Pīsīrosar Jesucristo rembiapo sui Tūpa ombou catu oEspiritu Santo yandeu, <sup>7</sup>ipipe yande reco ai sui yande renose yande reco ïvi tupri āgua oporoaisusa pipe ‘toipisi co tecovesa apirēhi güemiaro yuvireco’ oya.

<sup>8</sup>Aipo ñehesa supi eté vahe. Che aipota sese ereporombohera. Ipipe Tūpa reroyasar toyapo mbahe aviye vahe yuvireco. Evocoi ñehesa aviye ité opacatu oiporu vaherā yuvireco. <sup>9</sup>Ereyepēpira rumo opacatu co nungar mbahe sui: yipindar ñehesa yepoepi tēisa sui, ipare aracahendar ava recocuer rese ñehesa sui. Ereyepēpi aveira iporomoñemoiro serai vahe sui, Moisés porocuaite re-sendar sui tēi ñehespoepi-episa sui avei. Esepia, evocoi nungar mbahe ēgüe ehi tēi vahe.

<sup>10</sup>Acoi ava omoimese yemboyahosa Tūpa reroyasar pāhuve, eñehe chupe.

Nande reroyaise, eñehe iri chupe. Nande reroya catu itese, eremosera peyesui. <sup>11</sup>Terecua evocoi nungar ava oyavi vahe güecocuer yepi, ahe ae oyemocañi vahe oangaipa pipe oico.

### **Tito upendar ñehesa**

<sup>12</sup>Acoi amondose Artemas, anise Tíquico ndeu, eyu pihavi che repia tecua Nicópolis ve. Esepia, aheve apita pota sōhisa vahe pituhu rāro. <sup>13</sup>Eipitīvii opacatu nde catugüer rupi ava recocuer moingatusar Zenas, Apolos avei. Ahe chupe emondo mbahe semimbotar. Evocoiyase toyuviraso tupri oguatasa rupi; tipane eme que mbahe chupe yuvireco. <sup>14</sup>Iyavei ambuae Jesús reroyasar eipe pendar toyembohe avei yuvireco mbahe tupri apo āgua iyavei ava mbahe chupe ipane vahe pītīvii āgua. Evocoiyase secocuer aviye itera yuvirecoi.

### **Mahenduhasa iyavei porovasasa ipa vahe**

<sup>15</sup>Opacatu yuvirecoi vahe cohava che piri omondo omahenduhasa yuvireco ndeu. Iyavei emombehu che mahenduhasa yande mboripar iporeroya vahe upe. Tūpa tape rovasa eipeve opacatu. Aipo rupive.

*PABLO REMBICUACHIA  
FILEMÓN UPE*

**FILEMON**

**Pablo mahenduhasa Filemón upe**

**1** Che, Pablo, che roquendasa Jesucristo recocuer sui tēi. Aicuachía co che ñehe yande rivri Timoteo reseve ndeu, Filemón. Nde niha ore rembiaisu iyavei ore ndugüer ité Tüpa upe mboraviqui apo água ereico. <sup>2</sup>Iyavei amondo co cuachiar yande reindri Apia upe, Arquipo upe avei. Ahe avei yande ndugüer mboraviqui apo água Tüpa upe nara yuvirecoi, iyavei opacatu Jesús reroyasar nde rētave oñemonuha vahe upe nara. <sup>3</sup>Yande Ru Tüpa, yande Yar Jesucristo tombou oporovasasa, güeco tuprisa avei pēu.

**Filemón poroaisusa iyavei  
Cristo rese iyeroyasa**

<sup>4</sup>Che niha, “Aviye ndeu” ahe yande Ru Tüpa upe che yeruresa pipe nde rese yepi. <sup>5</sup>Esepia, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar. <sup>6</sup>Aporandu Tüpa upe nde rese nde ereyeroyase yande Yar rese inungar ore ‘toicua tupri opacatu mbahe aviye vahe orovireco vahe nde Rahir Jesucristo reroyasa sui’ viya. <sup>7</sup>Cherorivete, ayemonguerēhi catu opacatu nde poroaisusa rese. Che rivri, nde niha eremonguerēhi catu opacatu yande Yar reroyasar yuvireco.

**Pablo oporandu mbahe aviye  
vahe rese Onésimo upe nara**

<sup>8</sup>Sese yepe che aico Cristo apóstol nde cuai água viña. <sup>9-10</sup>Che rumo aporandu ndeu nde poroaisusa rese mbahe aviye vahe apo água co nde rem-

biguaigüer Onésimo upe nara. Che niha Pablo, acuacuami vichico. Cūrítei rumo aico soquendapri Jesucristo recocuer sui. Co Onésimo secoi che rahir nungar yande Yar reroyasa pipe cohava che roquendasave.

<sup>11</sup>Aracaco co nde rembiguai secoise nde piri, ēgüe ehi tēi vahe secocuer ndeu viña. Cūrítei rumo ēgüe ndehi iri chira oico ndeu, iyavei cheu no. <sup>12</sup>Amboyevi co imondo ndeu eipeve. Eipisi inungarra che itera viña. <sup>13</sup>Che aipota opita vahe rā nde nungar tupri che pītvii água viña, co soquendapri vite che recose Jesucristo ñehengagüer sui. <sup>14</sup>Che rumo ndaipotai mbahe apo nde pihañemoñetasa cuaēhi vitesese. Nde rumo ereyapora co mbahe aviye vahe nde remimbotar rupi, ndahei chira che nde cuaisa pipe. <sup>15</sup>Aviyeteramo Onésimo oyepepi pucu raimi nde sui oyevi iri vahe rā nde piri nara. <sup>16</sup>Ndahe iri chira mbiguai tēi. Ahe rumo aviye catu itera mbiguai güeco agüer sui. Esepia, yande rivri niha yande rembiaisu secoi cūrítei. Che asaisu etepri iyavei nde eresaisu catu irira che sui. Ndererecoi chira ava nungar tēi; erereco tuprira saisusa pipe yande rivri nungar tupri ité yande Yar upe nara.

<sup>17</sup>Inungar nde rivri che rereco eve. Ēgüe ere tupri aveira co mbia pisi. <sup>18</sup>Acoi oyapose mbahe ndeu, anise virocuase que mbahe nde sui, cheu emombehu. Che evocoiyase amboepira ndeu. <sup>19</sup>Che Pablo, aicuachía che po pipe ité seroya tupri água, ahe co amboepira ndeu; che nde mbohesa pipe sui ereroya yande Yar. Ipipe inungar ireve vahe ēgüe ere cheu. Che rumo, “Ndereve cheu” ndahei eté ndeu. <sup>20</sup>Supi eté, che rivri, eyapomi mbahe icatupri vahe cheu che remimbotar yande Yar Cristo reroyasa pipe. Ipipe che mboviha catumi eve.

<sup>21</sup>Che aicuachía ndeu. Esepia, aicua nde ereyapo tuprira aipo che poran-

dusa, iyavei ereyapo catu itera co sui.  
<sup>22</sup>Iyavei amoha Tūpa che renose vaheṛā che roquendasa sui pe yeruresa pipe che so āgua eipeve pe repia. Sese emoingatumi avei che pituhu āgua.

**Mahenduhasa, porovasasa ipa vahe**

<sup>23</sup>Che ndugüer, Epafra, omondo omahenduhasa ndeu. Ahe avei soquendapri

cohove yande Yar Jesucristo recocuer rese. <sup>24</sup>Iyavei Marcos, Aristarco, Demas, Lucas che ndugüer oporaviqui vahe Tūpa uve, ahe avei omondo omahenduhasa yuvireco ndeu.

<sup>25</sup>Yande Yar Jesucristo tape rovasa opacatu eipeve. Aipo rupive.



*ICUACHIAPRI HEBREO  
YUVIRECOI VAHE UPE*

**HEBREOS**

**Guahir Jesucristo pipe Tüpa  
oyemboyecua yandeu**

**1** Aracahe suive setá yupagüer Tüpa omombehu uca yande ramoí eta upe oñehe mombehusar upe. Iyavei ambae mbahe rupi oseca imombehu tupri ãgua yuvireco chupe. <sup>2</sup>Cüritei yandeu omoñehe uca Guahir. Chupe avei oyapo uca opacatu mbahe. Ahe mbahe sembiapo chupe nara ité. <sup>3</sup>Ahe niha Vu Tüpa recocuer porañetesa secoi. Ëgüe ehi eté, ahe Vu recocuer tupri ité. Ahe opacatu mbahe omoviracua oñehe pĩratasa pipe. Yande angaipagüer sui yande moatiro pare oso, oguapi Vu acato coti oĩ ivave cute.

**Tüpa Rahir seco ivate catu Vu  
rembiguai iva pendar sui**

<sup>4</sup>Tüpa Rahir secoi ivate catu vahe Vu rembiguai iva pendar yuvirecoi vahe sui. Ahe vireco omborerecuasa ivate catu vahe ichui. <sup>5</sup>Esepia, Tüpa aipo ndehi eté güembiguai upe:

“Nde che Rahir ereico; co pipe amondo nde recove ãgua” ndehi eté.

Iyavei:

“Che Tu aicora, ahe evocoyase che rahir secoira” ndehi avei chupe.

<sup>6</sup>Ichui rumo ombouse Guahir ñepeí vahe co ivi pipe aipo ehi:

“Tomboetei opacatu che rembiguai yuvireco”

ehi. <sup>7</sup>Evocoyase güembiguai rese oñehe Tüpa aipo ehi icuachiapri aracahendar pipe:

“Ayapo che rembiguai ivitu nungar, tata nungar avei cheu oporaviquí va-herã” ehi.

<sup>8</sup>Tahir rese ñehesa rumo aipo ehi icuachiapri aracahendar pipe:

“Che Yar Tüpa, nde mborerecuasa rumo apirēhi vahe-herã ité.

Ereporocuai nde reco ivi tuprisa pipe yepi.

<sup>9</sup>Mbahe ihīvi vahe raisusar ereico.

Iyavei mbahe naporai vahe raisuēhisar.

Sese nde Yar Tüpa ité, nde poravo, omondo avei torivetesá ndeu ivate catu vahe opacatu nde mboetasa sui” ehi.

<sup>10</sup>Iyavei aipo ehi iri:

“Nde, ore Yar, yipisuive eremoviracua vahe ivi.

Nde ité avei ereyapo iva.

<sup>11</sup>Opacatu co nde rembiapo opa vahe-herã tēi,

inungar turucuar cuacua oyearo vahe opa.

Nde rumo apirēhi vahe-herã ité ereico.

<sup>12</sup>Ipare ereyapara inungar turucuar yapri iyavei eresecuñarora inungar oturucuar osecuñaro vahe.

¡Nde rumo ndereñecuñaroi chietera!

Iyavei nde recocuer ndopai vahe-herã ité” ehi.

<sup>13</sup>Ndahei que ñepeí iva pendar güembiguai upe Tüpa aipo ehi:

“Eguapi che acato coti, ahese che amondora nde amotarēhimbar nde povrive” ehi.

<sup>14</sup>Esepia, opacatu Tüpa rembiguai espíritu yuvirecoi chupe oporaviquí ãgua, icuapri avei ava ipĩsiropirã pĩtivii ãgua.

**Yandemahemoha tuprira  
yande pĩsirosa rese**

**2** Sese iyacatu co ñehesa yasendu vahe rese yayapisaca tupri catu co tecocuer piasu sui yande yepipiēhi ãgua. <sup>2</sup>Esepia, co Tüpa rembiguai remimombehugüer seroyapri ité secoi, iyavei oyemboangaipa vahe, ndoviroyai vahe avei imombaraisupri ité sembiapo rupi yuvirecoi aracahe. <sup>3</sup>¿Mara yahera piha

evocoiyase yande yañemi Tūpa ñemoirosa sui viña acoi ndayandemahe-moha tupriise co yande pīsirosa aviye vahe rese? Esepia, yande Yar ahe rane ité omombehu co ñehesa ñepisirosa resendar. Ipare sendusar, “Supi eté co ñehesa” ehi yuvireco. Ichui ahe avei omombehu yuvireco yandeu. <sup>4</sup>Iyavei Tūpa oyapo setá mbahe yavai rai vahe poromondiisa ndayasepiyai vahe. Iyavei oEspíritu Santo pipe, omboyoavirati mbahecuasa imbou yandeu güemimbotar rupi ‘toicua yuvireco co ñehesa supi tupri vahe’ oyapave.

### Jesucristo ava nungar tupri secoi

<sup>5</sup>Ndahei güembiguai povrive omondo Tūpa ivi oime vaheerã, acoi oromombehu vahe pëu. <sup>6</sup>Oime rumo icuachiapri arachendar pipe omombehu tupri vahe:

“Che Yar, ¿uma vo evocoiyase ava?

¿Mahera ndemahenduha ava tēi rese, iyavei eresãro no?

<sup>7</sup>Ndaseta ariimi erereco ivi coti catu nde rembiguai sui.

Ipare voi rumo eremondo nde porañetesa imboeteisave chupe.

<sup>8</sup>Iyavei opacatu erereco uca mbahe nde rembiapo ipovrive” ehi imombehu.

Ēgüe ehise Tūpa, ndoseyai eté que ñepeipe yepembahe ipo pendarēhi. Cūrítei rumo ndaopacatu tupri vitei mbahe ipovrive.

<sup>9</sup>Yaicua niha Jesús, ahe Tūpa güembiguai sui ndaseta araviter ivi coti catu vireco. Oporoaisusa pipe oipota imano água opacatu ava repirã. Cūrítei rumo iyemombaraisu pare, omondo oporañetesa imboeteisave chupe.

<sup>10</sup>Iyavei opacatu mbahe oime Tūpa upe, ichuindar avei ‘toyuviroique opacatu che rahir che reco porañetesave’ oyapave. Sese omombaraisu uca Guahir Jesucristo ‘tomboaviye tupri rane che remimbotar Poropīsiosar güeco água’ oya. <sup>11</sup>Esepia, opacatu vireco ñepeipe Vu yuvireco co seco

catupri vahe, seco mbocatuprisar avei. Sese Tahir nochi eté, “Che rivireta peico” ohe água viroyasar upe. <sup>12</sup>Ahe aipo ehi icuachiapri arachendar pipe:

“Añehera nde rese che rivireta upe.

Asapucái aveira sapucaisa ndeu opacatu ava ndeu oñemonuha vahe pãhuve” ehi.

<sup>13</sup>Iyavei aipo ehi:

“Che ayeroya itera sese” ehi.

Ichui aipo ehi iri:

“Co oroico Tūpa rahir cheu ombou vahe rese” ehi icuachiapri pipe aracahe.

<sup>14</sup>Inungar ava vireco vahe guahir, oyoya soho, suvi; Ēgüe ehi avei Jesús vireco voho, vuvi yande nungar; omano pipe sui omocañi vaheerã iporoyuca ai vahe pīratasa; ahe Carugar. <sup>15</sup>Opacatu ava manosa sui osiquiyesa pipe mbiguai tēi nungar yuvirecoi vahe güecove vitesese, evocoi nungar sui senose água, Ēgüe ehi Jesús. <sup>16</sup>Esepia, ahe ndoui Tūpa rembiguai pītivii água, ahe rumo ou Abraham suindareta pītivii água. <sup>17</sup>Sese niha tivireta nungar tupri ité oyapo Tūpa, “Toime che rovaque pahir rerecuar ivate catu vahe seco tupri vahe; taseco mbegüe avei, tomondo güetecuer ava angaipa repirã ñeroisa reime água” ehi. <sup>18</sup>Esepia, ahe avei oiporara Carugar poroãtoisa. Sese cūrítei ahe oicatu ité ava Carugar remiatoi pītivii água.

### Jesús ivate catu vahe Moisés sui

**3** Evocoiyase, che rivireta, iporavopri, pe Tūpa remienoi peico vahe chupe nara. Peyapisaca tupri Jesucristo recocuer rese. Ahe secoi yandeu apóstol iyavei pahir ivate catu vahe yande yeroyasa. <sup>2</sup>Ahe ité niha omboaviye tupri Vu remimbotar, osenoise imbou co tecocuer apo água inungar Moisés omboaviye tupri ocuaita Tūpa mbahe rãro aracahe. <sup>3</sup>Jesús rumo imboeteipri catu Moisés sui. Inungar acoi oi aposar imboeteipri catu oi sui secoi. <sup>4</sup>Esepia, ñepeipei oi

vireco oaposar viña. Tūpa rumo opacatu mbahe aposar seci. <sup>5</sup>Supi eté Moisés Tūpa rembiguai güeco pipe omboaviye opacatu oporaviquisa itūparo rese. Esepia, omombehu Tūpa omboyecua pota vahe ava upe yepi. <sup>6</sup>Cristo rumo tahir güeco pipe omboaviye ocuaita Vu tūparo rese. Ahe tūparo yande yaico yayeroyaño itese yande yembovihasa pipe co mbahe aviye vahe oime vaherā yandeu curi.

### Mbituhusa Tūpa upendar yuvirecoi vahe upe

<sup>7</sup>Sese inungar aipo ehi Espíritu Santo icuachiapri aracahendar pipe:

“Co pipeve voi, pesenduse Tūpa ñehe,

<sup>8</sup>peyepihamoatai rene catu chupe, ndapeicoi chira ava ndiava reroyai vahe nungar acoi ivi iporupirēhisa rupi Tūpa recoāhasar yuvirecoi vahe aracahe.

<sup>9</sup>Aheve avei acoi che recoāha tēi pe ramoi mbahe güembiapo pipe, yepe cuarenta araviter rupi osepia tēi mbahe che rembiapo yuvireco viña.

<sup>10</sup>Sese añemoiro ahe ava upe, aipo ahe: ‘Ipihañemoñeta rai co coti tēi vahe rese yepi iyavei ndoicua potai eté che recocuer yuvireco’ ahe chupe.

<sup>11</sup>Sese che añemoiro ahe ava upe, ‘Ñepei reseve ndapepituhui chietera che pituhusa pipe’ ahe yuvireco chupe” ehi aracahe.

<sup>12</sup>Che rivireta, peñearo catu; tipo eme que ñepei ipihañemoñeta naporai vahe Tūpa reroyaēhisa pipe oyepepi vaherā ichui. <sup>13</sup>Iya rumo peyemonguerēhi catu ñepei-peí ari yacatu rupi cūrítei pe recove pipe angaipa upe pe yembopa uca iriēhi āgua, pe mbahe reroya iriēhi āgua rese avei. <sup>14</sup>Esepia, yayemoviracua tuprise Cristo rese yande yeroyasa yipisuive yareco vahe pipe yande mano āgua rupi eté, ahese yaico itera sese.

<sup>15</sup>Supi niha acoi aipo ehi ñehesa:

“Co pipe voi pesenduse Tūpa ñehe, peyepihamoatai rene catu chupe; ndapeicoi chira ava ndiava reroyai vahe nungar” ehi vahe.

<sup>16</sup>¿Ava pīha acoi ava ñehe mara vahe yuvireco Tūpa ñehe rendu pare chupe? Moisés remienose Egipto ivi sui ēgüe ehi yuvireco. <sup>17</sup>¿Ava upe pīha acoi Tūpa oñemoiro cuarenta araviter rupi? Acoi oyemboangaipa vahe omanopa vahe yuvireco ivi iporupirēhisa rupi. <sup>18</sup>¿Uma upe pīha acoi ñepei reseve, “Ndapeiquei chietera che pituhusa pipe pe pituhu āgua” ehi Tūpa? Acoi viroyaēhisar upe aipo ehi. <sup>19</sup>Sese yaicua seroyaēhi pipe ndoicatui yuviroique ipipe.

**4** Oime vite Tūpa remimombehu yande yaique vahe ipiri yande pituhu āgua. Sese iya ité yañearo tupri. Aní chira que ñepei pe pāhu pendar ndoiquei chira. <sup>2</sup>Esepia, yandeu avei imombehusa ñehesa poropisirosa resendar inungar yande ramoi upe ivi iporupirēhi rupi yuvireco aracahe. Co ñehesa rumo ndoipitívii eté ahe ava yuvireco. Esepia, ahe osendu yuvireco seroyaēhisave tēi. <sup>3</sup>Yande rumo yaroya vahe, yaiquera yande pituhu āgua, ahe chupe Tūpa aipo ehi:

“Sese añemoiro ahe ava upe; ñepei reseve,

‘Ndoyuviroiquei chietera che pituhusa pipe opituhu āgua yuvireco’ ahe” ehi.

Tūpa rumo yipive ité opa omboaviye oporaviquisa iva, ivi. <sup>4</sup>Esepia, co imbosietesa ari resendar ñehesa oime icuachiapri aracahendar pipe:

“Tūpa opituhu opacatu oporaviquisa sui imbosietesa ari pipe” ehi.

<sup>5</sup>Iyavei aipo ehi iri icuachiapri pipe:

“Ndoyuviroiquei chietera che pituhusa pipe opituhu āgua yuvireco” ehi.

<sup>6</sup>Ipane vite rumo amove ava yuviroique vahe ahe pituhusave. Acoi yipindar osendu tēi vahe rumo ñehesa

poropĩsirosa resendar, ndoyuvĩroiiquei eté seroyaẽhisa pipe yuvireco. <sup>7</sup>Sese Tũpa omombehu tupri iri ambuae ari, chupe ité, “Co pipe” ehi. Ahe acoi coiyé mborerecuar guasu David upe omombehu ucase aracahe yandeu icuachiapri pipe, aipo ehi vahe:

“Co pipe voi, pesenduse Tũpa ñehe, peyepihamoatai rene catu chupe” ehi vahe.

<sup>8</sup>Ehi revo Josué omondose co pituhusa israelita upe aracahe viña, Tũpa evocoyase noñehe iri chira co ambuae ari rese viña. <sup>9</sup>Evocoyase oimeño itera mbituhusa iporavopri ava Tũpa upendar upe nara: <sup>10</sup>Acoi oi que vahe evocoyase pituhusa pipe, opituhu oporaviquisa sui inungar Tũpa opituhu ombahe mboaviye pare aracahe. <sup>11</sup>Sese yayemoviracua catura yande reique ãgua evocoi mbituhusa pipe. Aní chira ava aracahendar seroyaẽhisar recocuer rupi tupri avei yaicora.

<sup>12</sup>Esepia, Tũpa Ñehengagũer oicove vahe, ipĩrata avei. Ahe inungar avei quise saimbe catu vahe que ambuae quise pucu saimbe yoya vahe sui. Ahe oi que vahe ité yande aviterve; ěgũe ehi avei ñehengagũer oñatoi eté yande hã, yande espĩritu avei. Iyavei omboyecua tupri ité yande pihãemoñeta. <sup>13</sup>Ndipoi eté niha mbahe Tũpa rembiapo ñomipri ichui. Opacatu ité oicua, osepia avei opacatu mbahe. Ahe niha oporandura opacatu yande recocuer rese yandeu curi.

### Jesús niha pahi ivate catu vahe secoi

<sup>14</sup>Jesús, Tũpa Rahir, pahi ivate catu vahe secoi yandeu oi que vahe ivave Tũpa piri. Sese yayemoviracuaño itera sese yande yeroyasa pipe. <sup>15</sup>Esepia, yande pahi ivate catu vahe oicuaño ité yande recocuer pĩrataẽhisa. Ahe avei niha yande nungar aracaco viroparaisu

opacatu mbahe-mbahe tẽi gũecoãhasa. Ahe rumo ndoyemboangaipai eté ipipe. <sup>16</sup>Sese yayemboya catura yande yeroyasa pipe yande Ru Tũpa rese. Esepia, ahe yande raisu ité. Ipipe sui tayande paraisuereco gũeco aviyesa pipe yande pĩtivii ãgua mbahe tẽi oimese yandeu.

**5** Opacatu pahi ivate catu vahe iporavopri secoi ava pãhu sui ava recocuer reropovẽhe ãgua Tũpa upe iyavei porerecosa mondo ãgua chupe, mbahe mimba yucapri reropovẽhe ãgua avei ava angaipa repirã. <sup>2</sup>Ahe pahi niha oiporara avei teco asisa ambuae ava nungar. Sese gũeco asiẽhisa pipe oipĩtivii ava ndayaracuai vahe, oyavi vahe avei. <sup>3</sup>Ahe rumo gũeco pĩrataẽhisa pipe viropovẽhe mbahe mimba yucapri Tũpa upe oangaipa repirã, opacatu ambuae ava angaipa repirã avei. <sup>4</sup>Ndiyai chira que ava oyesui tẽi pahi oyeapo. Tũpa ité rumo osenoira imboetei uca ãgua inungar acoi Aarón upe aracahe. <sup>5</sup>Ěgũe ehi avei Cristo, ahe noñeenoi pahi ivate catu vahe gũeco ãgua oyesui tẽi. Tũpa ité osenoi imboetei uca ãgua acoi aipo ehise:

“Nde che rahir ereico, co pipe amondo nde recove ãgua” ehi.

<sup>6</sup>Aipo ehi avei ambuae icuachiapri pipe: “Nde ereico pahi ivate catu vahe apirẽhi vaherã, inungar tupri mbia Melquisedec serer vahe” ehi.

<sup>7</sup>Co ivi pipe Cristo oicove viteso, oyeroqui pĩrata oyasehosa pipe Vu Tũpa upe yepi. Esepia, ahe oicatu ipĩsiro ãgua manosa sui. Ěgũe ehi iporeroya tuprisa pipe, Tu osendu iyeroqui yepi. <sup>8</sup>Yepe Tahir ité viña, gũeco paraisu pipe rumo oyembohe imboyeroya ãgua; <sup>9</sup>evocoyi gũeco pipe omboaviye gũeco catuprisa. Ipipe sui gũeru poropĩsirosa ndopai vahe opacatu viroyasar upe nara. <sup>10</sup>Esepia, Tũpa niha osenoi pahi ivate catu vahe seco ãgua inungar Melquisedec aracahe.

**Peicua catu, “Ndaroyai eté co tecocuer piasu” pe hesa sui**

<sup>11</sup>Orovireco vite mo setá mbahe ore ñehe água pëu co mbahe tecocuer resendar rese. Yavai etepri rumo imombehu tupri água. Esepia, pe ndapesenducua tupri vitei eté.

<sup>12</sup>Aracacove peporombohera viña; peipota vite rumo pëu mbahe ndayavaimi vahe imombehu iri água yembohesa Tüpa suindar. Ndapeyemoviracuai rumo; peihu iri pota cambi mbahe sáta vahe hu rãgüer sui. <sup>13</sup>Esepia, acoi ëgüe ehi vahe pítani osi rese ocambu vite vahe nungar tēi pe recocuer. Ipipe sui ndapeyembohei eté Tüpa Ñehengagüer rese mbahe tupri pe reco água. <sup>14</sup>Co tembihu sáta vahe rumo ahe ava ocuacua vahe upe nara. Esepia, ahe oyembohe tupri catu ñehengagüer rese güeco tupri água yepi. Ipipe sui oicua ité mbahe aviye vahe poravo mbahe naporai vahe sui.

**6** Sese ndiyai yayembohe yembohesa yipindar vahe Cristo resendar ahe avei-vei vahe rese. Iya rumo yaguata catu tenonde inungar ava oicua catu vahe mbahe. Ipipe sui tayaicua seroyasa pipe ambuae mbahe Tüpa suindar co mbahe rese yembohe iri rãgüer sui. Ahe yipindar vahe co: yande ñecuñarosa, yande reco ai sui yande poisa, manosa apirēhi vahesave yande rera-soēhi água, iyavei Tüpa rese yande yeroyasa, <sup>2</sup>yembohesa poroãpiramosa resendar, po mondose Tüpa reroyasar harive, omano vahe cuerayevisa iyavei ava recocuer rese porandusa resendar avei. <sup>3</sup>Tüpa oipotase yayembohera ambuae mbahe yavai catu vahe rese.

<sup>4</sup>Acoi ava yipindar osenducua vahe Tüpa remimbotar, osáha vahe avei Tüpa suindar porerecosa iyavei oyandu ité Espíritu Santo güecocuer pipe, <sup>5</sup>osáha vahe avei Tüpa Ñehengagüer aviye vahe

iyavei osáha chíhi ipíratasa curi oime vaherã viña, <sup>6</sup>oyepepise rumo ichui, ndayaicatu iri seco reroyevi iri água Tüpa upe. Esepia, yaticapri nungar iri eté vireco Tüpa Rahír iyavei ambuae ava omoñehe-ñehe tēi iri sese. <sup>7</sup>Esepia, ava inungar ivi osupite vahe amar oquise yepi. Iha tuprise mbahe miti oyese oporaviquí vahe upe, evocoyase evocoi nungar ava oipisira porovasasa Tüpa suindar. <sup>8</sup>Ahe ivi rese yu pãve tēi oyese, ahe naporai eté. Evocoi nungar ava Tüpa poromocañisavrive tēi, sapípirã tēi avei yuvirecoira curi.

**Yande remiaro aviye vahe yande moviracua tupri vahe**

<sup>9</sup>Che mboripar saisupri, yepe aipo orohe pëu viña, oromoha ité rumo mbahe aviye catu vahe pëu co ñepisirosa pare. <sup>10</sup>Esepia niha, Tüpa seco aviye vahe, ahe ndasesarai chietera pe rembiapo aviye vahe sui pe poroaisusa pemboyecua vahe peipitiviise seroyasar. Ahe niha co peyapoño vite peico. <sup>11</sup>Ore rumo oroipotaño ité ñepeipei pe pemboyecuaño itera ari cañi rupi eté co pereco vahe pe querēhisa pe remiaro aviye vahe rupiti água. <sup>12</sup>Ndoroiipotai pe atēhisa perecora co tecocuer upe. Oroipota rumo pe saquícue moñara acoi ava yande Yar rese oyeroyasa pipe iyavei güeco ñemosasa pipe oipisi vahe porerecosa imombehupri Tüpa sui.

<sup>13</sup>Peyemomahenduha acoi Tüpa güemimbotar omombehuse Abraham upe: “Che rer pipe amboaviyera co mbahe ndeu” ehise chupe aracahe. Esepia, ndipoi eté ambuae ivate catu vahe ichui ëgüe ehi vaherã. Sese ahe güerer ité osenoi <sup>14</sup>aipo ehi chupe: “Supi eté oroovasa itera, iyavei setara ava nde suindar” ehi. <sup>15</sup>Evocoyase Abraham osáro güeco mbegüesa pipe, ëgüe ehi ipisi oyeupendar Tüpa remimombehu. <sup>16</sup>Ava omoingatu

potase oñehe, ivate catu vahe rer pipe omoingatu yuvireco yepi. Ëgüe ehise yuvireco, ndiya iri eté ipare oñehe vitera sese. <sup>17</sup>Tüpa güerer pipe ité omoingatu oñehe omombehuse güemimbotar aracahe 'toicua tupri che remimombehu pisi ägua che ñehe ñepei reseve vahe yuvireco, iyavei amboaviye itera che remimombehu chupe' oyapave aipo ehi aracahe. <sup>18</sup>Ëgüe ehi oime ñuvirío mbahe imboyepoepipirêhi: Tüpa niha ndoporombopai vahe ité, ipipe avei yande monguerêhi catu yande yaseca vahe iporopïtviisa iyavei yayeroya vahe ñearosa yandeu ombou vahe rese. <sup>19</sup>Co mbahe yasãro vahe omoviracua tupri yande hã, inungar mbahe carite guasu mombïtasa omoviracua tupri carite ivitu sui. Ëgüe ehi yande remiaro oique turucuar guasu tûparo asiasa cupeve oi imaranehi catu vahesave ivave. <sup>20</sup>Aheve Jesús oique yande raperã mboi ägua. Ëgüe ehi ahe apirêhi vahe ité pahi ivate catu vahe güeco ägua, inungar tupri Melquisedec aracahe.

### Jesús pahi Melquisedec nungar tupri ité

**7** Co Melquisedec aipo mborerecuar guasu Salem pendar, iyavei pahi Tüpa ivate catu vahe upendar secoi aracahe. Abraham oyevise peri rupi ovavasa sui ou mborerecuar guasu eta momba pare, ahese aipo osë voi eté oso Abraham rovaichi Tüpa porovasasa mondo ägua chupe. <sup>2</sup>Iyavei aipo Abraham omondo oporerecosa vavasa sui mbahe güeru vahe diez vahe sui ñepei-peï chupe. 'Mborerecuar guasu seco ïvi vahe' oyapave Melquisedec ehi. Iyavei ahe mborerecuar Salem pendar, ahe tecua Salem 'mbahe tupri' oya; sese mborerecuar guasu mbahe tupri vahe secoi. <sup>3</sup>Ahe iyesupa rumo ndicuasai eté iyavei ichi, tamoï, ari iharagüer ndicuasai vahe ité.

Ndicuasai avei imano agüer yuvireco. Secocuer rumo inungar Tüpa Rahir recocuer; ahe pahi apirêhi vahe ité.

<sup>4</sup>Peyapisaca tupri co mbia recocuer rese: ivate ité secoi aracahe. Yande ramoi Abraham teieté avei omondo diez sui ñepei-peï mbahe porerecosa mborecuar guasu eta sui güembierocua chupe. <sup>5</sup>Moisés porocuaita pipe rumo opacatu Leví suindar pahi eta yuvirecoi vahe vireco ité ocuaita opacatu ava sui diez sui ñepei-peï iporaviquimi rerocua ägua yuvireco. Abraham suindar ité niha ëgüe ehi yuvireco. <sup>6</sup>Yepe Melquisedec ndahei Leví suindar viña, ahe rumo oipisi ité Abraham sui evocoi porerecosa; Abraham, ahe acoi oipisi vaheerã mbahe Tüpa remimombehu. Ëgüe ehi Melquisedec Abraham rovasa. <sup>7</sup>Supi eté sovasapri sui oporovasa vahe ivate catu secoi yepi. <sup>8</sup>Evocoi levita suindar oipisi ava poraviqui repri diez sui ñepei-peï. Ahe ava rumo omano vaheerã tēi yuvirecoi. Icuachiapri arachendar pipe rumo Melquisedec serer vahe oicoveño vahe ité. <sup>9</sup>Ndoyavii evocoyase opacatu pahi eta Levi suindar omondo vahe porerecosa Abraham rupive chupe yuvireco viña. <sup>10</sup>Esepiã, Abraham oyevevite Levi oyesuindar vireco, evocoyase ihaēhi viteseve oyeepia Melquisedec rese yuvireco aracahe.

<sup>11</sup>Ava israelita yuvirecoi vahe oipisi mborocuaita pahi levita sui yuvireco; ahe Aarón suindar yuvirecoi. Supi etese rumo ava virecose Tüpa suindar güeco catuprisa evocoi mborocuaita reroya pipe viña, evocoyase ndoyemboyecuai chintera ambuae pahi viña. Ndahei chira rumo ahe Aarón nungar, ahe Melquisedec nungar itera. <sup>12</sup>Esepiã, Tüpa osecuñarose evocoi pahi cuaita, osecuñaro aveira supive mborocuaita; <sup>13</sup>iyavei yande Yar, ahe sese acoi icuachiapri pipe ñehesa, ndahei Levi suindar, ahe rumo ambuae judío ramoi

suindar. Ahe ichui acoi ndipoi eté osē vahe ambuae pahi. <sup>14</sup>Esepia, icuapri ité yande Yar Judá suindar secoise. Iyavei Moisés noñehi ahe ichuindar turi vahe rese oñehese pahi cuaita rese.

<sup>15</sup>Iyavei co oyecua tupri catu itera, oyecuase pahi ipiasu vahe Melquisedec nungar. <sup>16</sup>Ahe rumo ndahei porocuita “uma sui osēra pahiguā” ehi vahe sui oique pahi güeco āgua; güecocuer pírata ndopai vahe reseve oique. <sup>17</sup>Esepia, Tūpa ité aipo ehi oñehese: “Nde pahi apirēhi vaheṛā ité ereico inungar Melquisedec” ehi.

<sup>18</sup>Sese mborocuita arachendar opa ité. Esepia, ahe nipiratai, ndayande pītivii eté. <sup>19</sup>Esepia, Moisés porocuita ndosecocuer mbocatuprii eté ava. Yande rumo yasāro mbahe aviye catu vahe yande recocuer uve nara. Supi niha yayemboya Tūpa rese.

<sup>20</sup>Tūpa rumo oñehi omoingatu ñepeí reseve güerer pipe. Ambuae pahi rumo ndahei ñepeí reseve senoipri yuvirecoi Tūpa rer pipe. <sup>21</sup>Yande Yar rumo Tūpa osenoi ñepeí reseve güerer pipe pahi seco āgua icuachiapri pipe aipo ehise chupe:

“Yar Tūpa osenoi ñepeí reseve, sese nosecuñaroi chietera:

‘Nde pahi apirēhi vaheṛā ité ereico’ ehi” ehi icuachiapri pipe. <sup>22</sup>Sese Jesús rese yaicua Tūpa omboaviyera güemimbotar ipiasu vahe yandeu aviye catu vahe yipindar vahe sui. <sup>23</sup>Yipindar setá pahi yuvirecoi. Opa-opaño rumo omano. <sup>24</sup>Jesús rumo nomanoi vahe ité, sese nomondoi chietera pahi güecosa ambuae upe. <sup>25</sup>Sese ahe oicatu ité ñepeí reseve viroyasar Tūpa rese oyemboya vahe pīsiro āgua apirēhi. Esepia, ahe oicove vaheṛā ité apirēhi oyeroqui vaheṛā Vu Tūpa upe sese.

<sup>26</sup>Supi eté Jesús pahi ivate catu vahe secoi. Evocoi nungar niha ipane ité yandeu yipindar. Ahe ndaseco marai

vahe, ndoyapoi vahe mbahe tēi güeco maranehisa pipe, ndahoyoyai avei ava angaipa viyar rese, iyavei ahe ivate catu vahe iva pendar sui. <sup>27</sup>Ndahei eté ambuae pahi eta nungar secoi, ndoyuca ranei ari yacatu rupi mbahe mimba Tūpa upe seropovēhe āgua yipindar oangaipa rese, ipare opacatu ambuae angaipa rese. Ñepeí reseve ité rumo güete viropovēhe opacatu ava angaipa repirā. <sup>28</sup>Moisés porocuita rupi iporavopri pahi ivate catu vaheṛā ava ndahei seco tupri vahe; Tūpa rumo Moisés porocuita pare osenoi ñepeí reseve Guahir seco catupri vahe ‘tasecoi pahi ivate catu vahe apirēhi vaheṛā ité’ oya.

### Jesús Tūpa remimbotar ipiasu vahe omoime yandeu

**8** Co rupi eté oroyepota ore remimombehu mbahe aviye catu vahe upe. Yareco ité evocoi nungar pahi ivate catu vahe. Ahe uguapi Vu acato coti omborerecuasa pipe ivave oī. <sup>2</sup>Aheve pahi secoi oporaviqui Vu rēta supi eté vahe pipe. Ahe ivave ité yande Aposar rembiapo, ndahei ava tēi rembiapo.

<sup>3</sup>Opacatu pahi ivate catu yuvirecoi vahe senoisa mbahe oporerecosa iyavei mbahe mimba yucapri viropovēhe vaheṛā Tūpa upe yuvireco. Sese Jesucristo avei vireco mbahe viropovēhe vaheṛā Vu Tūpa upe. <sup>4</sup>Ahe secoise co ivi pipe viña, ndahei chietera pahi secoi viña. Esepia, cohave oime vite ité pahi mbahe viropovēhe vahe Moisés porocuita rupi yuvireco. <sup>5</sup>Co ivi pipendar pahi rumo ihañeco iva pendar rahanga rese tēi yuvireco. Yaicua niha ahe sahanga tēi. Esepia, Moisés oyapo potase tūparo, Tūpa aipo ehi chupe: “Emahecua tupri acoi ivitrive amboyecua vahe rese ndeu. Ahe inungar tupri eyapo” ehi chupe. <sup>6</sup>Yande pahi ivate catu vahe rumo, Jesús, vireco ocuaita aviye catu vahe ambuae pahi sui. Esepia, Tūpa remimbotar ipiasu

vahe Jesús güeru vahe yandeu aviye catu vahe ité yipindar vahe sui iyavei sesendar Tüpa remimombehu aviye catu vahe avei.

<sup>7</sup>Esepia, yipindar Tüpa remimbotar oicatusé yande recocuer recuñaro água viña, ndipoi chira ambuae semimbotar ipiasu vahe yandeu viña. <sup>8</sup>Tüpa rembiepiave rumo ava recocuer mbahe tēi eté. Sese aipo ehi icuachiapri pipe co ava rese aracahe:

“Yande Yar aipo ehi:

‘Oimera ari ayapo iri água che remimbotar ipiasu vahe ahe Israel pendar upe, Judá pendar upe avei.

<sup>9</sup>Ndahoyoyai chira rumo acoi tamoi eta rese yipindar ayapo vahe che remimbotar.

Ahese acoi opa anose ivi Egipto sui, nomboaviyei eté rumo che porocuita yuvireco.

Sese apoi ichui’ ehi yande Yar Tüpa.

<sup>10</sup>‘Co ari pare rumo na ahera che remimbotar apo Israel pendareta upe’ ehi yande Yar Tüpa,

‘Amondora che porocuita iyapisacasa pipe,

aicuachía aveira ipihañemoñetasa pipe. Evocoyase che iTüpa aicora; ahe evocoyase cheundar yuvirecoira.

<sup>11</sup>Nombohe iri chira ondugüer, omu avei che cua uca água yuvireco.

Esepia niha, opacatu chíhivahe catu vahe sui, ava ocuacua catu vahe avei che cuara yuvireco.

<sup>12</sup>Iyavei cheñero aveira mbahe tēi sembiapogüer rese yuvireco chupe; ndayemomahenduha iri chiaveira yangaipagüer rese’ ehi yande Yar” ehi icuachiapri pipe aracahe. <sup>13</sup>Oñehese Tüpa güemimbotar piasu rese, omombehu yipindar vahe cañi água; chíhimi tēi ipane icañipa água.

### Tüparo ivi pipendar iyavei tüparo iva pendar

**9** Evocoyase yipindar Tüpa remimbotar vireco ava cuaitarā iñemonuha água Tüpa mboeteisa pipe iyavei vireco tüparo co ivi pipendar. <sup>2</sup>Ahe tüparo pipe na ehi mbahe imoingatusa: yipindar oi Nimarai Vahe serer. Ipipe oime vera renda iyavei mesa pan sovasapri Tüpa upendar reseve. <sup>3</sup>Imoñuvirosa turucuar tüparo asiassa cupeve oime ambuae oi, ahe serer Nimarai Catu Vahe. <sup>4</sup>Aheve oime itaisi rapisa renda oro apopri, aheve avei oime Tüpa porocuita riru oro pipe yaopri. Ahe ipipe oime cambuchi oro apopri ahe tembihu maná riru, ipipe avei oime Aarón pococa ahe sorí vahe, iyavei mborocuita cuachiapri ita ipe vahe rese oime ipipe. <sup>5</sup>Ahe mborocuita riru harive oime Tüpa rembiguai rahanga oyovai yuvínohai, “Tüpa oime ité cohave” he água. Ahe ipepo oyopi tupri Tüpa porocuita riru rovapisa yuvireco. Co rupive revo amombehura co mbahe pēu.

<sup>6</sup>Evocoi nungar mbahe moingatupri pare, pahi eta yuviroiqueño yipindar oi asiapri pipe ari rupi ocuaita apo água. <sup>7</sup>Imoñuvirosa oi pipe rumo pahi ivate catu vaheño oi que ñepeí reseve ñepeí-peí araviter pipe, iyavei güeique yacatu viroique mbahe mimba ruvi viropovēhe vakerā Tüpa upe oangaipa rese, ava icuaēhi pipe angaipa oyapo vahe repirā avei. <sup>8</sup>Co rese Espíritu Santo oicua uca yandeu avañó tēi ndiya vitei eté oi que ipa vahe oi imaranehi catu vahe pipe Tüpa rovai oime vitesé yipindar oi yasiapri. <sup>9</sup>Co opacatu mbahe yande mbohe mbahe cūríteindar rese. Esepia, co porerecosa iyavei mbahe seropovēhepri aheve Tüpa upe, nomoatiroi eté imboeteisar pihañemoñetasa. <sup>10</sup>Ahe rumo carusa, ihusa, ñemoatirosa nungar mbahe resendar tēi;



yande retecuer resendar tēi porocuita. Ahe rumo ēgüe ehiñomi tēi yuvireco Tūpa remimbotar ipiasu vahe yu āgua renonde.

<sup>11</sup> Poropīsiosar rumo ou cute. Iyavei ahe ité cūrítei yande pahi ivate catu vahe secói mbahe aviye vahe güeru vahe yandeu. Ahe pahi reiquesa rumo ndahei ava rembiapo nungar tēi, ahe rumo aviye catu ité iyavei ndahei eté co ivi pipe yapopri. <sup>12</sup> Cristo rumo oique ité imaranehi catu vahesave ivave. Ndahei rumo ovesa iyavei guaca rahir ruvi reropovēhe āgua, ahe rumo viropovēhe vuvi ité opacatu rese; ēgüe ehi ahe ñepeí reseve oique apirēhi vahe ñepisirosa reime āgua yandeu. <sup>13</sup> Supi eté guaca cuimbahe ruvi iyavei ovesa ruvi, guaca cuña tanimbu acoi imondopri vahe ava seco mara vahe rese, ahe avei vireco raimi tēi pīratasa ava rete moatiro āgua. <sup>14</sup> Cristo ruvi rumo vireco catu ité pīratasa. Esepia, Cristo, Espiritu apirēhi vahe pipe, oyemondo ahe ae Tūpa upe inungar mbahe seropovēhepri nimarai vahe, iyavei suvi yande pihañemoñetasa moatiro opacatu yande rembiapo ai manosave yande rereco vahe sui Tūpa oicove vahe upe mbahe apo uca āgua yandeu.

<sup>15</sup> Sese Jesucristo secói Vu remimbotar ipiasu vahe moingatusar ava reru āgua Tūpa upe omano pipe. Ipipe sui oime ñeroisa oyemboangaipa vahe yipindar mborocuitavrive yuvirecoi vahe upe ‘toipisi che rembiporavo yuvireco oyeupendar mbahe apirēhi vahe che remimombehugüer rupi’ oya. <sup>16</sup> Que ava oicua ucase güemimbotar ombahe mondo āgua omano renondeve, icuasa tupri ranera rumo imanosa semimbotar apo āgua renonde. <sup>17</sup> Esepia, ndiya vitei eté omano vaherā recove viteseve mbahe imondosa iyará upe. Imanore voi rumo aviye imondosa. <sup>18</sup> Sese yipindar vahe Tūpa remimbotar

yaposa mbahe mimba ruvi piyere pipe. <sup>19</sup> Esepia, Moisés omombehupase mborocuita opacatu ava upe, oipisi ovesa ragüer pīra vahe iyavei ivira hisopo serer vahe rāca, ahe omoaqui guaca rahir ruvi iyavei ovesa rahir ruvi, i rese oyeseha vahe pipe. Ipipe opa osipii cuachiar mborocuita resendar, opacatu ava avei. <sup>20</sup> Evocoiyase aipo ehi icuachiapri pipe: “Co mbahe ruvi oicua tupri uca co porocuita Tūpa ombou vahe omboyeroya āgua pēu” ehi. <sup>21</sup> Mbahe mimba ruvi pipe avei opa Moisés osipii tūparo iyavei opacatu mbahe ipipendar iporupri. <sup>22</sup> Porocuita rupi eté tuvi pipe seni opacatu mbahe oñemoatiropa Tūpa rovaque; ndipoi eté ñeroisa angaipa upe mbahe ruvi piyerepri porēhise.

### **Tūpa upe güete reropovēhe pipe Cristo omocañi angaipa**

<sup>23</sup> Iyacatu ité imoatirosa evocoi nungar mbahe mbahe mimba seropovēhepri ruvi pipe. Esepia, co mbahe iva pendar nungar tēi sahangaposa; iva pendar ité rumo ipotasa seropovēhepirā mbahe aviye catu vahe evocoi sui. <sup>24</sup> Esepia, Cristo ndoiqueei tūparo oi imaranehi catu vahe ava rembiapo pipe tēi. Esepia, ahe iva pendar rahanga tēi. Egiue ehi rumo ahe oique ité ivave. Aheve cūrítei secói Tūpa rovai yande pítivii āgua oyeroqui pipe. <sup>25</sup> Judío pahi ivate catu vahe niha ñepeí reseve oique araviter yacatu oi imaranehi catu vahe pipe mbahe ruvi tēi reropovēhe āgua; ndahei rumo vuvi ité viropovēhe. Cristo rumo ndoyeeropovēhe pihi Tūpa upe. <sup>26</sup> Egiue ehise rumo, yipisuive omano pihira viña. Cūrítei rumo oyemboyecua co ipa ari rupi ñepeí reseve, apirēhi vaherā viropovēhe āgua güete Tūpa upe ‘tocañipa angaipa’ oya. <sup>27</sup> Supi eté opa rane itera ava omano yuvireco, ipare voi ñepeí reseve oimera poran-

dusa. <sup>28</sup>Indó, Cristo oyeeropovêhe ñepei reseve opacatu angaipa mocañi āgua. Ipare rumo oyevi irise ou, ndahe iri chira angaipa recocuer rese. Ahe rumo oyevira ou guārosar pīsiro āgua.

**10** Esepia, Moisés porocuita mbahe aviye vahe ou vaheṛā rahanga tēi, ndahei ahe eté vahe ité. Sese ahe porocuita ndoicatu eté ava Tūpa rese oyemboya vahe reco mohivi tupri āgua mbahe seropovēhepri araviter yacatundar pipe tēi. <sup>2</sup>Porocuita oicatusse pe angaipa sui pe moatiro tupri āgua, ndapeyandu iri chira pe angaipa viña iyavei pahi ndovirovovēhe iri chiveira mbahe ruvi Tūpa upe yuvireco viña no. <sup>3</sup>Co seropovēhepri rumo yande momahenduha uca āgua tēi yande angaipagüer rese araviter yacatu. <sup>4</sup>Esepia, mbahe mimba ruvi tēi nomocañi eté yande angaipa yande sui.

<sup>5</sup>Sese Cristo co ivi pipe ouse, aipo ehi Tūpa upe:

“Ndereipota iri niha mbahe mimba tēi porerecosa seropovēhepirā ndeyeupe, nde rumo ereyapo che retocuer evocoi nungarā.

<sup>6</sup>Ndahei niha nde piha rupi mbahe rapipri mbahe mimba yucapri ndeu seropovēhepri ñepei reseve angaipa mocañi āgua.

<sup>7</sup>Evocoyase che aipo ahe:

‘Che ayu nde remimbotar apo āgua, che Ru Tūpa, che resendar icuachiapri remimombehu rupi tupri mboaviye āgua’ ahe” ehi.

<sup>8</sup>Yipindar aipo ehi, Tūpa ndoipotai eté, iyavei ndahei ipiha rupi mbahe mimba reropovēhepri, porerecosa mbahe sapipri avei angaipa mboyeho āgua, yepe ahe mborocuita rupi seropovēhesa viña. <sup>9</sup>Ipare aipo ehi: “Che ayu nde remimbotar apo āgua” ehi. Ahe ipipe omombopa yipindar vahe mbahe seropovēhepri co ambuae mbahe ipiasu vahe apo āgua. <sup>10</sup>Tūpa

evocoyase yande peha angaipa sui oyeupe nara. Esepia, Jesucristo oyapo ité semimbotar mbahe ñepei reseve apirēhi vaheṛā güete mondo pipe.

<sup>11</sup>Opacatu judío pahi eta ari yacatu oyapo ocuita iyavei mbahe mimba avei-vei viropovēhe Tūpa upe yuvireco. Yepe ahe viropovēhe tēi yuvireco viña, nomocañi catui eté rumo angaipa. <sup>12</sup>Jesucristo rumo oyeeropovēhe ñepei reseve angaipa repirā apirēhi vaheṛā. Ipare oso ivave, oguapi oī Vu acato coti. <sup>13</sup>Aheve osāro oī Vu Tūpa opase voi omondo yamotarēhimbar ipovrive. <sup>14</sup>Esepia, ñepei reseve oyeeropovēhe pipe osecomohivi tupri Vu Tūpa rembipeha apirēhi vaheṛā. <sup>15</sup>Iyavei Espiritu Santo aipo ehi tupri avei icuachiapri aracahendar pipe yandeu:

<sup>16</sup>“Co ari pare rumo na ahera che remimbotar apo chupe’ ehi yande Yar Tūpa, ‘Coiye amondora che porocuita ipihañemoñetasa pipe, amondo aveira iyapisacasa pipe’ ehi.

<sup>17</sup>Ndayemomahenduha iri chietera yangaipagüer rese iyavei mbahe tēi sembiapogüer rese yuvireco” ehi aracahe.

<sup>18</sup>Ēgüe ehi angaipa rese oimese ñeroisa, ahese ndiya iri seropovēhesa mbahe angaipa repirā.

### Yayemboya catura Tūpa rese

<sup>19</sup>Sese che rivireta, iya ité cūrítei yande reique āgua Tūpa rovai yande siquiyeēhisa pipe Jesucristo ruvi pipe sui. <sup>20</sup>Yaicoveño itera ipiasu vahe tecocuer tecovesa yandeu ombou vahe pipe. Ahe niha omboi tūparo pipe asiasa turucuar yande reique āgua Tūpa rovai. Ahe turucuar inungar Jesús rete. <sup>21</sup>Iyavei ahe yande pahi ivate catu vahe ité secói Vu Tūpa rēta rārosar; <sup>22</sup>sese yayemboya catura Tūpa rese yande pihañemoñeta tuprisa

pipe iyavei yande yeroyasa ipa voi vahe pipe. Supi eté ahe opa yande reco mbocatupri yande pihañemoñeta raisa sui iyavei omoatiro yande rete i maranehi pipe. <sup>23</sup>Yayemoviracua catura mbahe aviye vahe yande remiaro pipe yamombehu vahe ava upe yande pihañemoñeta roveraehisa pipe. Esepia, Tüpa omboaviye itera mbahe güemimobehugüer yandeu. <sup>24</sup>Iyavei yasecañora ñepeí-peí yañepitivii vaheerã yande yeaisu catu ägua iyavei mbahe tupri apo ägua yandeyeupe. <sup>25</sup>Ndayamopanei chira yande ñemonuhasa Tüpa upe. Ndayaicoi chira omopane vahe nungar, iya rumo yayemonguerëhi catura ñepeí-peí yandeyeupe. Esepia, virovi ari yande Yar yevi iri ägua.

<sup>26</sup>Acoi, “Tayemboangaipaño ité” yahese mbahe supi tupri vahe cua pare yaico, ndipo iri ambuae seropovëhepirã evocoi yande angaipa repirã yandeu; <sup>27</sup>Tüpa ñemoirosa ipirata vahe güeraño oimera yandeu iyavei tata guasu apirëhi vahe opara omocañi Tüpa amotarëhimbar yuvirecoi vahe. <sup>28</sup>Ava Moisés porocuaita ndoviroyai vahe que ñuvirío, anise mbosapi rembiepiave, ahe secocuer mombehuse, ahe yucapri ité saisuëhisa pipe yuvirecoi. <sup>29</sup>Peyapisaca tupri co rese: ipirata catu oimera Tüpa ñemoirosa tahir roeroirosar upe curi iyavei acoi ava vireco vahe suvi inungar mbahe ëgüe ehi tõi vahe iyavei viroiro tõi vahe guaisusar Espiritu, chupe avei oimera Tüpa ñemoirosa ipirata catu vahe. Esepia, co tuvi rese niha seroyapri ité Tüpa remimbotar. Ipipe avei niha ahe ava Tüpa rembipeha yuvirecoi. <sup>30</sup>Yaicua niha yande Yar aipo ehise: “Che ité asepira, sembiapo ai amboevira chupe” ehi aracahe. Iyavei ambuae ñehesa aipo ehi vahe: “Yar oporandura mbahe sembiapogüer rese ava oyeupendar upe” ehi.

<sup>31</sup>¡Mbahe tõi eté yaiquese Tüpa oicove vahe ñemoirosa pipe!

<sup>32</sup>Peyemomahenduha acoi aracaco co tesapesa nungar supi eté vahe pisi ramose, peyemoviracuaño ité pe recoãhasa upe pe yemombaraisusa pipe. <sup>33</sup>Esepia, acoi amove pe pãhu pendar rese iñeche-ñeche tõi yuvireco, mara-mara tõi avei pe rereco opacatu ava rovaque. Ambuae pe pãhu pendar evocoyase peipitívii pe yemombaraisusa rese. <sup>34</sup>Pesaisuño ité avei ambuae soquendapri yuvireco. Opase pe mbahe virocuia yuvireco pe sui peñemosaño avei pe viharetesa pipe peico. Esepia, peicua ivave perecoa mbahe aviye catu vahe iyavei apirëhi vahe. <sup>35</sup>Sese pemo-cañi tõi eme Tüpa rese pe yeroyasa. Esepia, evocoyia pe recosa pipe omoime ucara mbahe tupri pëu curi. <sup>36</sup>Pe rumo peyemoviracuaño itera mbahe-mbahe tõi upe Tüpa remimbotar apo ägua semimobehugüer oime vaheerã pisi ägua curi. <sup>37</sup>Supi eté icuachiapri pipe Tüpa aipo ehi:

“Pihavi eté oura acoi ou vahevi.

Ndiaracahe chietera.

<sup>38</sup>Acoi cheundar seco catupri vahe rumo che rese oyeroyasa pipe oicovera.

Acoi oyepepise rumo che sui, che evocoyase ndavihai chira sese” ehi aracahe.

<sup>39</sup>Yande ndahei oyepepi vahe nungar yaico. Evocoi nungar niha ocañi tõi vaheerã yuvireco. Yande rumo yayeroya sese; ipipe yañepisiro.

### Tüpa rese yeroyasa

**11** Supi eté yarecose yande yeroyasa Tüpa rese, ahese yaicua ahe ombou itera mbahe yasãro vahe yandeu, iyavei yaicua ité oime mbahe ndayasepai vahe. <sup>2</sup>Supi eté amove yande ramoí aracahendar upe, “Aviye ité” ehi Tüpa oyese yeroyasa pipe sui.

<sup>3</sup>Tüpa rese yande yeroyasa pipe yaicua ahe oñehe pipe ité oyapo opacatu mbahe. Sese yaicua cüriteindar mbahe yasepia vahe mbahe ndayasepia vahe apopri.

<sup>4</sup>Sese oyeroya pipe Abel viropovêhe oporerecosa aviye catu vahe Caín porerecosa sui chupe. Sese, “Co ava seco catupri vahe che rovaque” ehi iyeroyasa rese oipisi tuprise iporerecosa. Yepe Abel omano viña, oimeño vite rumo Tüpa rese yeroya agüer resendar ñehesa.

<sup>5</sup>Enoc avei Tüpa rese oyeroyasa pipe serasosa co ivi pipe sui, “Tomano rane” ndehi eté chupe. Ava ndoseca iri eté yuvireco. Esepia, Tüpa ité viraso secove reseve. Yipindar rumo Tüpa virasoêhi viteseve, “Enoc recocuer aviye ai rane ité chupe” ehi icuachiapri aracahendar. <sup>6</sup>Ndahei eté rumo Tüpa piha rupi yaico ndayayeroyase sese. Esepia, oyemboya pota vahe sese, “Oime ité Tüpa” ehi rane itera, iyavei, “Oime itera mbahe secasar upe nara” ehi aveira.

<sup>7</sup>Noé avei oyeroya Tüpa rese. “Oimera mbahe tēi co ivi pipe ndapesepia vitei vahe” ehise chupe, viroya voi eté. Evocoyase seroyasave oyapo arca oyesuindar pīsiro āgua. Iyavei sese oyeroya pipe omombehu ava co ivi pipendar cañi āgua. Ahe rumo Tüpa rese oyeroya pipe oñepisiro.

<sup>8</sup>Abraham avei oyeroya Tüpa rese. Esepia, Tüpa, “Eso ambuae ivi ndeu amboyecua vaheṛā vahesave, ahe amondora ndeu” ehise, omboyeroñaño ité. Yepe ahe ivi ndoicuai viña, osēño ité rumo oivi sui oso. <sup>9</sup>Ipare Tüpa rese oyeroya pipe avei secoiño ité ahe ivi pipe. Ndoyavii ambuae ivi pendar secoi vahe; oi mbahe pīrer apopri pipe tēi aheve secoi. Ēgüe ehi tupri avei tahir Isaac iyavei sumino Jacob. Ahe avei oipisi vaheṛā Tüpa remimombehu ivi yuvireco. <sup>10</sup>Esepia, aipo Abraham osāroño

ité tecua ivave ovīracua vahe. Tüpa niha ahe tecua rāhasar, yaposar avei.

<sup>11</sup>Yepe Sara nimembii vahe viña iyavei Abraham ocuacuami, Tüpa rese oyeroyasave rumo oipisi pīratasa Tüpa sui guahi āgua. Esepia, viroyaño ité Tüpa oñehe omboaviye āgua chupe. <sup>12</sup>Evocoyase yepe Abraham ocuacuami viña, vireco rumo guahir. Ahe ichuindar sehii eteanga coiyे inungar yasitata iyavei inungar ivi cuhi para gasu popi rupindar ndayaipapa catui vahe ité.

<sup>13</sup>Ahe ava rumo opacatu omanopa tēi; ndoipisii eté mbahe semimombehugüer oyeupendar. Ahe mbahe amombri rupi osepiāñomi tēi yuvireco oyeroyasa pipe, soriveteño avei sese. Ēgüe ehi oicuaño ité ndahei co ivi pipendar güecosa; ahe rumo yuvirecoveño raimi tēi co ivi pipe. <sup>14</sup>Aipo ehi vahe oicua uca tupri yandeu oseca vite oyeupendar ivi yuvireco. <sup>15</sup>Ipihañemoñetase rumo ivi güeco agüer rese yuvireco viña, oyevi iriño itera aheve avei yuvireco viña. <sup>16</sup>Ahe rumo oipota ambuae ivi aviye catu vahe yuvireco, ahe iva pendar. Sese Tüpa nochii eté, “Che Ru Tüpa” oyeupe hese. Esepia, vireco ité tecua imoingatupri chupe.

<sup>17</sup>Tüpa rese yeroyasa pipe avei Abraham oyemoingatu voi guahir ñepe vahe Isaac reropovêhe āgua Tüpa upe güecoāhasa pipe. Yepe Tüpa aipo ehi chupe aracahe viña: <sup>18</sup>“Nde rahir Isaac sui setá oimera nde suindar” ehi. <sup>19</sup>Esepia, oicua ité Tüpa vireco pīratasa ava omano vahe mbogüerayevi iri āgua. Evocoyase imano rāgüer sui eté oipisi iri guahir aracahe. Ahe evocoyase omboyecua mbahe yandeu.

<sup>20</sup>Tüpa rese oyeroya pipe avei Isaac osovasa Jacob, Esaú avei mbahe oime vaheṛā pisi āgua.

<sup>21</sup>Iyavei Tüpa rese oyeroya pipe avei Jacob omano pota āgua, osovasa ñepepei José rahir. Ahese opococa rese tēi eté

oyemoviracua oyerogui āgua Tūpa upe imboeteisa pipe.

<sup>22</sup>Tūpa rese oyeroya pipe avei José, omano āgua renonde, aipo ehi: “Yande mu israelita opara yuvinose ivi Egipto sui curi” ehi. Ipare oyocuai omu oitacuer rovera āgua aracahe.

<sup>23</sup>Tūpa rese oyeroya pipe avei, ohase Moisés, iyepia oñomi mbosapī yasi rupi yuvireco. Esepia, ahe pītani icatupri ai, iyavei ndoyembosiquiyei eté mborerecuar guasu porocuita yuca āgua sui.

<sup>24</sup>Tūpa rese oyeroyasa pipe avei, ocuacuase Moisés, ndoipotai eté, “Egipto pendar mborerecuar guasu rayri membri” oyeupe he āgua. <sup>25</sup>Ahe rumo oipota catu mara-mara tēi güereco āgua Tūpa reroyasar reseve chíhi rupive mbahe tēi rese yemboviha rāgüer sui. <sup>26</sup>Aviye catu ité chupe Tūpa rembiporavo upe nara mbahe tēi porara āgua Egipto pendar mbahe eta sepīrusu vahe rereco rāgüer sui. Esepia, ahe oicuaño ité oyeupe nara porerecosa Tūpa ombou vaheṛā.

<sup>27</sup>Tūpa rese oyeroya pipe avei osē ivi Egipto sui osiquiyeēhisa pipe mborerecuar guasu roriēhise. Oyemoviracuaño ité oyese mbahe apo āgua; aviye osepia vahe ité Tūpa acoi ndoyecuai vahe.

<sup>28</sup>Tūpa rese oyeroya pipe avei oyapo Pascua pieta. Opa uca oipichi ava upe oquenda rese mbahe mīmba ruvi Tūpa rembiguai oporoyuca vahe ava israelita rahir ipi yucaēhi āgua.

<sup>29</sup>Tūpa rese oyeroya pipe avei ava israelita osasa para guasu Pīra Vahe ivi ipiru vahe hari rupi yuviraso. Ipare yamotarēhimbar Egipto pendar, “Ēgüe yahe avei” ehi yuvireco viña, i rumo opaño oyopi.

<sup>30</sup>Tūpa rese oyeroya pipe avei israelita oyerese siete ari rupi tecua Jericó rese, opa ñachisa onduru. <sup>31</sup>Tūpa rese oyeroya pipe avei Rahab, oyemondo-mondo tēi vahecuer, nomanoi eté am-

buae ava mbahe-mbahe tēi vahe rupi. Esepia, ahe oipisi tupriño güetave israelita Jericó ivi repiasar.

<sup>32</sup>¡Setá vite ambuae ava recocuer oime amombehu vaheṛā pēu! Ipane ité rumo ari imombehupa āgua: Gedeón, Barac, Sansón, Jefté, David, Samuel iyavei opacatu Tūpa ñehe mombehusar recocuer. <sup>33</sup>Evocoi avei Tūpa rese oyeroya pipe osecopi ité ambuae ivi pendar, oporocuai tupri güeco ivisa pipe, oipisiño ité Tūpa suindar mbahe semimombehugüer yuvireco, oiyurumboyaño avei jaguar, <sup>34</sup>ombogüe avei tata ipīrata vahe, oyeepi avei quise pucu pipe oyuca rāgüer sui; ava nipiratai vahecuer rumo oyemomirata yuvireco, oyemoviracua ité vavasave oyese; opaño ité oamotarēhisar sundao osecopi yuvireco. <sup>35</sup>Oime amove cuña ipāhuve vireco iri vahecuer omu manosa sui imbogüerayevipri.

Ambuae rumo omanopaño ité teco rasisa pipe, “Yasē catu co nungar mbahe sui” ndehi eté yuvireco cuerayevisa aviye catu vahe pipe güeco āgua. <sup>36</sup>Ambuae iparaisu catu ava upe oñeeroirosa pipe, onupasa pipe, oapīchichisa pipe, voquendasa pipe avei yuvireco. <sup>37</sup>Ambuae ita pipe oapi-apisave omano, amove imombitesa ivira asiasa pipe, anise ambuae yucasa quise pucu pipe, amove ipāhu pendar oguata tēi, ovesa, cavara pīrer añomi tēi iyemondesa, iparaisu mbahe porēhi yuvireco nombohe catui ava ipihañemoñetasa pipe sereco iyavei mara-mara tēi vireco yuvireco no. <sup>38</sup>Evocoi seco catupri vahe yuvireco ndiyai co ivi pipendar Tūpa cuaparēhi upe vireco vaheṛā oyepāhuve, ahe oguata tēi ivi iporupirēhisa rupi, ivitri rupi, mbahecuar rupi avei yuvireco.

<sup>39</sup>Yepe ahe opacatu aviye ité Tūpa upe oyeroyasa rese yuvireco viña, ndoipisii eté rumo oyeupe Tūpa

remimombehugüer yuvireco. <sup>40</sup>Esepia, Tüpa omoime mbahe aviye catu vahe yandeu ‘oyoya tupri toipisi güecocuer ihivi tupri água che remimombehugüer rupi yuvireco’ ohesa pipe chupe, yandeu opacatu avei.

**Yamahecua tuprira yande  
yeroyasa pipe Jesús rese**

**12** Sese yande, yaicuase setá ité evocoi ava oime omboyecua vahe Tüpa rese oyeroyasa, iyacatu ité yaseyapa opacatu mbahe ndayande mbohe catui vahe Tüpa upendar mbahe rese iyavei yande angaipa yande mboha tupri vahe. Ichui yayemoviracuaño itera yande cuaita Tüpa ombou vahe rese yandeu inungar ivava catu vahe. <sup>2</sup>Yamahe tupri itera Jesús rese. Ahe ichui niha yareco yande yeroyasa Tüpa rese. Ahe avei oyese yande mboporeroya tupri catu. Oiporara curusu rese omano ochiêhisa pipe. Esepia, ahe oicua ité oparaisu pare virecora oviharetasa, oguapise omborerecuasave Vu acato coti oî.

<sup>3</sup>Pe avei catu, pepihañemoñeta Jesús recocuer rese; ahe oiporara ité mbahe rasicuer ava yangaipa vahe mara-mara tēi güerecose. Sese pecuerai eme Cristo rese peico água iyavei, “Ndorequerēhi iri” ndapeyei chira. <sup>4</sup>Esepia, pe ndape-mano vitei eté angaipa upe pe yembopihaviracuasa pipe. <sup>5</sup>Peresarai eté Tüpa pe mboaracuasa sui tahir ité pe recosa pipe; icuachiapri aracahendar pipe aipo ehi:

“Che rahir, eyemoingatu voño Yar nde mombaraisusa upe nde reco mohivi tupri água, iyavei, ‘Ndachequerēhi iri’ nderei chiaveira chupe ndeu oñehe pīratase.

<sup>6</sup>Esepia, Tüpa osecomohivi tupri ava güembiaisu iyavei omombaraisu rane guahir sereco água” ehi.

<sup>7</sup>Peñemosañe catu pe mombaraisusa upe pe reco mohivi água. Esepia, Tüpa êgüe ehise pēu guahir ité pe rereco. ¿Oime piha que ñepeí ava guahir upe noñehe pīratái vahe secocuer mohivi água? <sup>8</sup>Tüpa ndape recocuer mohivise inungar oyapo ambuae guahireta upe yepi, pe evocoiyase inungar-ra chíhivahe ndiyesupai vahe, êgüe peye tēi peico chupe. <sup>9</sup>Iyavei, chíhivahe tēi vite yaicose, yande yesupa co ivi pipendar yande nupa yande recocuer mohivi água, ahese yamboetei. Sese yamboetei catura yande Ru Tüpa iva pendar tecovesa rereco água. <sup>10</sup>Yande yesupa co ivi pipendar opihañemoñetagiuer rupi tēi yande nupa yaicove raimi tēise co ivi pipe; Tüpa rumo yande mombaraisu yandeu mbahe tupri água rese yande reco maranehi água inungar ahe ndaseco marai vahe. <sup>11</sup>Supi eté yipindar, poronupasa yaipisi ramose, tasi yandeu. Coiye rumo yande imboyeroyasa pipe yayapo catura mbahe ihivi vahe. Ahe evocoiyase yande recocuer rerecora mbahe tupri pipe.

**Peicua catu Tüpa ñehe  
rendu potaēhi sui**

<sup>12</sup>Sese pemopoase iri pe reco pīratasa iyavei peyemonguerēhi iri pe guata água yande Yar rupi. <sup>13</sup>Ipare peseca peri ihivi vahe pe recocuer uve nara ‘toingatu che pi ndoguatai vahe’ pe yapave ‘timara catu iri eme’ pe hesa pipe.

<sup>14</sup>Peico catu opacatu ava upe mbahe tupri pipe, peico avei pe reco maranehi pipe. Esepia, ava ndovirecoi vahe güeco maranehi, ndosepai chietera yande Yar. <sup>15</sup>Peñearo tupri catu, tipo eme ava ndoipisii vahe Tüpa porovasasa pe pāhuve, iyavei tipo eme mbahe tēi que ava piha pipe; aviyeteramo opacatu rese ova tiētera. <sup>16</sup>Tipo eme catu pe pāhu pendar oyemboaguasa tēi vahe. Tipo eme avei ava Tüpa upendar mbahe

viroïro vahe pe pãhuve inungar Esaú aracahe. Ahe omondo Tüpa porovasasa oyeupendar tahir ipi güecosa resendar mimoi repirã tãivi vivri upe. <sup>17</sup>Iyavei peicua, ipare acoi Esaú oipisi pota Tüpa porovasasa vu sui viña. Ahe rumo ndiya iri eté sovasapirã secói. Yepe oyasehó iteanga viña, ndiya iri eté rumo mbahe sembierecovi rãgüer mboyevi ägua chupe.

<sup>18</sup>Peyemboyase Tüpa rese, ndahei inungar pe ramoi israelita aracahendar. Esepia, ahe ivitri Sinaí sese yapoco vahe rese tãivi oyemboya vahe yuvireco; ahe ivitri rese sendí ité inungar tata rendigüer; oime pïtu, pïtumimbi vahe, ivitu ai avei sese. <sup>19</sup>Iyavei ndapesendui mimbi imoñehepri, Tüpa ñehe avei. Aracahendar rumo osendu ité yuvireco. Iñehe renduse rumo, osiquiyepave ndoipota iri ahe oyeupe ñehe yuvireco. <sup>20</sup>Esepia, ahe oyembosiquiye ité evocoi porocuaita aipo ehi vahe sui: “Acoi opïro vahe ivitri rese, yepe que mbahe mimba tãivi viña, ahe peyapi-yapi yuca ita pipe, anise lanza pipe avei” ehi. <sup>21</sup>Ahe mbahe oyecua vahe aipo oporombosiquiye vahe ité. Evocoiyase Moisés teieté aipo ehi: “Che siquiyepave aririi eté” ehi.

<sup>22</sup>Pe rumo peyemboya iva pendar ivitri Sión ve, Tüpa oicove vahe recuave. Ahe tecua Jerusalén iva pendar. Aheve Tüpa rembiguai setá iteanga vahe oñemonuha imboetei ägua yuvireco yepi. <sup>23</sup>Iyavei peyemboya opacatu ava Tüpa rahir ipi Cristo reroyasar rese, ahe serer icuachiapri ivave. Peyemboya avei Tüpa rese, ahe niha yande recocuer rese oporandu vahe secói; iyavei peyemboya ava seco aviye vahe espïritu yuvirecói vahe rese. Ahe niha Tüpa osecomohivi tupri sereco. <sup>24</sup>Peyemboya avei Jesús rese, ahe omoime yandeu Tüpa remimbotar ipiasu vahe, ahe suvi yande moatiro

vahe. Ahe aviye catu yandeu Abel ruvi sui.

<sup>25</sup>Sese peicua catu, “Ndoroviroyai” peye vaheã acoi pëu oñehe vahe upe. Esepia, Moisés reroyaehisa pipe pe ramoi noñemi eté Tüpa ñemoirosa sui yuvireco, oyeupe, “¡Peicua catu!” ehise co ivi pipe aracahe. Ègüe ehise chupe yuvireco aracahe, ègüe ehi catu iri tiëtera yandeu. Nayañemi chietera ichui cute ndayaroyaise co iva pendar, “Peicua catu” ehise yandeu. <sup>26</sup>Tüpa oñehe pipe omboririi eté ivi aracahe; cüritei rumo yandeu aipo ehi: “Che amboriri irira ivi, ndahei chira rumo ivi güeraño, iva avei amboririira” ehi. <sup>27</sup>‘Amboriri irira’ aipo oyapave aipo ehi: “Opara mbahe omii vahe omocañi güembiapo Tüpa ‘topita apirëhi mbahe nomii vahe’ oyapave” ehi. <sup>28</sup>Tüpa mborerecuasa ombou vahe yandeu ahe nomii chietera. “Aviye ndeu” yahera evocoiyase sese chupe; ipipe sui yayerure catu yande piha pipe chupe imboeteisave semimbotar rupi. <sup>29</sup>Esepia niha, ahe inungar tata ñepeï reseve mbahe omocañipa vahe.

### Mara yahera Tüpa mboviha

**13** Ndapepoi chietera pe yeaisusa sui ñepeï-peï oyeivri nungar pe recosa pipe. <sup>2</sup>Iyavei peresaraï eme pe avasa sui ava oyepotase pe piri. Esepia, co nungar apo pipe amove ava omoingue Tüpa rembiguai güëtave icuaehi pipe.

<sup>3</sup>Peyemomahenduha avei soquendapri rese inungar-ra pe avei supive soquendapri peico vahe viña. Iyavei peyemomahenduha ava mara-mara tãivi serecopri rese. Esepia, aviyeteramo ègüe ehi aveira pëu.

<sup>4</sup>Pe opacatu pemboetei avei mendasa, iyavei peico pe reco maranehisa pipe mendasa rese. Esepia, Tüpa oicuaa oyemboaguasa tãivi vahe upe.

<sup>5</sup>Ndahei guarepochi tãivi peipota raira. Iya rumo peyembovihaño mbahe

pereco vahe rese. Esepia, Tūpa aipo ehi: “Ndooroyai chietera, ndapoi chietera nde sui” ehi aracahe. <sup>6</sup>Evocoiyase aipo yahera Yar rese yande yeroyasa pipe:

“Che Yar che pītivii, ndasiquiyei chietera ava tēi sui oyapo potase mbahe cheu” yahera.

<sup>7</sup>Peyemomahenduha pe reroquatasar rese, pēu Tūpa Ñehengagüer mombehusar rese avei. Pepihañemoñeta tupri secocuer rese, seco apri rese avei; iTūpa reroya agüer rupi tupri avei peico.

<sup>8</sup>Jesucristo recocuer noñecuñaroi vahe ité, yipisuive secoi apirēhi vahe.

<sup>9</sup>Peyembopa ucai rene yembohesa co coti tēi vahe upe. Aviye catu yayemomirata Tūpa poroaisusa rese que mborocuita tembihu resendar sui. Esepia, co nungar mbahe ndovireco ucai mbahe aviye vahe ohusar upe.

<sup>10</sup>Yande rumo yareco ambuae ité Tūpa upe seropovēhepri. Ahe niha ndiyai eté pahi tūparo yipindar yuvirecoi vahe pendar yuvirohu. <sup>11</sup>Supi eté judío pahi ivate catu vahe viroique mbahe ruvi tēi Tūpa rēta oi imaranehi catu vahe pipe seropovēhe ava angaipa rerocua āgua; ahe mbahe mimba rete rumo osapī tecua ivii yuvireco yepi.

<sup>12</sup>Ēgüe ehi avei niha Jesús iparaisu, omano tecua ivii ava reco mbocatupri āgua vuvī pipe. <sup>13</sup>Ēgüe yahe aveira yasora Jesús upe yande paraisu āgua supi ava yande roerōrosa pipe yaico.

<sup>14</sup>Supi eté, co ivi pipe ndayarecoi eté tecua apirēhi vahe. Yande rumo yaseca evocoi tecua oime vaherā yandeu curi.

<sup>15</sup>Sese Jesús rembiapo rese iyacatu yamboeteira apirēhi vaherā yande Yar Tūpa. Co imboeteisa inungar mbahe seropovēhepri ari rupi chupe. ¡Ēgüe yahera imboetei yande ñehe pipe! <sup>16</sup>Peresarai eme catu ambuae ava upe mbahe tupri aposa sui. Iyavei pemondoño ité mbahe pereco vahe ambuae ava upe. Esepia, evocoi nungar inungar mbahe

seropovēhepri Tūpa upe. Ahe niha Tūpa oipota.

<sup>17</sup>Pemboyeroya pe cuaisar, peyapo semimbotar. Esepia, ahe ndopituhui eté pe recocuer rāro yuvireco. Esepia, oicua Tūpa oicuara mbahe sembiapo rese chupe curi. Sese pemboyeroya catu ‘tayavai eme iporaviquisa chupe; tasorivete oporaviquisa rese yuvireco’ pe yapave. Pemboavaise rumo, nosei chietera mbahe aviye vahe ichui pe recocuer upe nara.

<sup>18</sup>Peyerure Tūpa upe ore rese. Supi eté, ore oroyandu ité mbahe aviye vahe oroyapo ore pihañemoñeta pipe yepi. Esepia, oroyapo pota mbahe aviye vahe opacatu mbahe rese ava rembiepiave. <sup>19</sup>Che yevi pihaiivi āgua rese ité aporandu pe yeruresa rese pēu Tūpa remimbotar rupi.

### Mahenduhasa ipa vahe

<sup>20</sup>Tūpa mbahe tupri rerecosar, ahe niha ombogüerayevi vahe yande Yar Jesucristo yande rārosar ivate catu vahe, suvi pipe omboyecua güemimbotar piasu ndopai vahe imbou yandeu, <sup>21</sup>tombou pe reco mohivisa iyavei pe reco aviyesa opacatu pe semimbotar apo āgua; iyavei ahe toyapo mbahe opacatu güemimbotar yande rese Jesucristo rembiapo sui. ¡Ēgüe tehi imboeteipri apirēhi tasecoi Cristo yepi!

<sup>22</sup>Che rivireta, peñemosañō co che opomboaracua vahe rese, moviro tēi niha co ñehesa aicuachía pēu. <sup>23</sup>Aipota pe peicua yande rivri Timoteo imosesa soquendasa sui. Oyepota pihaiivise, arasora cheyeupi che sose pe repia.

<sup>24</sup>Pemombehu che mahenduhasa opacatu ava pe cuaisar upe, opacatu ambuae Tūpa upendar ava upe avei. Ivi Italia rupindar avei ombou omahenduhasa yuvireco pēu.

<sup>25</sup>Aipo rupive, yande Ru Tūpa tape rovasa opacatu.



## SANTIAGO REMBICUACHIA

### SANTIAGO

#### Mahenduhasa

**1** Che, Santiago, Tūpa, yande Yar Jesu-cristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

#### Mbahecuaa ou vahe Tūpa sui

<sup>2</sup> Che rivireta, pevihareteñora peico acoi oimese tecoãhasa pëu yepi. <sup>3</sup> Esepia, peicua niha pe poreroyasa rese oimese mbahe tecoãhasa, ahe ipipe peyembohe pe ñemosasa água rese peico. <sup>4</sup> Peicoño ité pe reco ñemosasa pipe pe reco mohivi tupri catu água. Evocoiyase nipane iri chira mbahe Tūpa suindar pëu.

<sup>5</sup> Iyavei acoi ipanese que ava pe pãhu pendar upe yaracua água, toporandu Tūpa upe. Evocoiyase ahe omboura chupe. Esepia, ahe opacatu upe mbahe ombou güecatëhiëhisa pipe iyavei ombahe mboasiëhisa pipe avei. <sup>6</sup> Iyacatu rumo evocoi ava oporandura Tūpa upe sese oyeroyá pipe, ndahei chira opihañemoñeta rerova-rova tëisa pipe inungar acoi ivitu i ombohito-hitu tëi vahe. <sup>7</sup> Acoi ëgüe ehi-ehi tëi vahe ava ndoipisii chira mbahe yande Yar sui yuvireco. <sup>8</sup> Esepia, ñepe ari ipihañemoñeta ñepe mbahe rese, ambuae ari ambuae rese. Ndoymoviracuai güeco tupri água rese yuvireco.

<sup>9</sup> Iyavei que Jesús reroysar seco mbegüe vahe toyembovihareteño yepi Tūpa omboeco ivate água rese. <sup>10</sup> Iyavei mbahe yar secoi vahe pe pãhuve, toyemboviha viteño Tūpa viroyise seco ivatesa sui. Esepia, mbahe yar yuvirecoi vahe inungar caha potri ëqüe ehi raimi tëi vahe yuvireco. <sup>11</sup> Evocoiyase acoi ari os-

ëse, sacú iteangase, ahese caha opa ipiru; ipotri avei opa oviapi ichui iyavei iporañetes a opa ichui. Ëgüe ehi aveira ava mbahe yar; omanora oporaviquisa sui.

#### Tecoãhasa, poroãtoisa resendar

<sup>12</sup> Acoi ava oyemoviracua vahe poroãtoisa upe oyembovihara oico. Esepia, osasa tuprise evocoi poroãtoisa, oipisira porerecosa, ahe tecovesa apirëhi vahe Tūpa ombou vahe guaisupar upe. <sup>13</sup> Acoi ava oyanduse poroãtoisa oyeupe mbahe tëi apo água, “Tūpa revo ëgüe ehi cheu” ndehi chira. Esepia niha, Tūpa ãtoisar ndipoi eté mbahe tëi oyapo uca vaherã chupe. Iyavei ahe noñatoi avei mbahe tëi apo água ava. <sup>14</sup> Co rumo ava opihañemoñeta rai upe oñeato uca mbahe tëi apo água yepi. <sup>15</sup> Güemimbotarai pipe evocoiyase oyapo angaipa. Ipare angaipa apo pipe sui ou manosa chupe.

<sup>16</sup> Che rivireta, che rembiaisu, peyembopai rene. <sup>17</sup> Esepia, opacatu mbahe aviye vahe ahe Tūpa ombou vahe yandeu. Ahe niha opacatu iva rese mbahe aposar. Ndahei rumo güembiapo nungar secoi. Esepia, sembiapo oñecuñaro vahe. <sup>18</sup> Ahe rumo ombou ité tecovesa yandeu co ñehesa supi eté vahe pipe ‘toyuvirecoi inungar yipindar mbahe miti ha seropovëhepri cheu opacatu che rembiapo sui’ ohesave yandeu.

#### Tūpa rese yande

#### pihanemoñetasa supi tupri vahe

<sup>19</sup> Iyavei che rivireta, che rembiaisu, peyemomahenduha co che ñehe rese: peyapisaca tupri voir ambuae ava ñehe rese, mbegüe rupi rumo peñehera chupe iyavei ndapembahemboasi voi tëi chiaveira. <sup>20</sup> Esepia, yambahemboasi voi tëise, ndayayapoi Tūpa remimbotar. <sup>21</sup> Evocoiyase peseya teco raisa, opacatu ambuae oime vahe mbahe naporai vahe pe pãhuve. Co catu pe yeminisave peroya catu vite Tūpa ñehe

omoiingue vahe pe piha pipe. Ahe niha viresco pīratasa pe pīsiro āgua.

<sup>22</sup> Pe rumo pemboaviyera co pe mbohe vahe ñehesa; ndahei acoi pesenduño tēira. Esepia, pesenduño tēise, pe ae peyembopara. <sup>23</sup> Supi eté acoi ava osenduño tēise Tūpa Ñehengagüer, ipare rumo ndoviroyai, ahe inungar acoi ava osepiaño tēi vahe vova yepiasa pipe. <sup>24</sup> Ipare rumo oyepépise ichui, cūrteimi sesaraiño ichui. <sup>25</sup> Acoi ndasesarai vahe ité rumo güemiendu sui iyavei oyapisaca tupri vahe co mborocuita maranehi mbahe-mbahe tēi sui yande rerocua vahe rese iyavei oyemoviracuaño ité vahe oyapo vahe rā iporocuita, ahe oviharetera opacatu güembiapo tupri rese.

<sup>26</sup> Amove ava, “Che aguata tupri Tūpa rupi” ehi tēi. Ndoicuai rumo oñehe monguiriri āgua. Evocoyase ahe ae oyembopa oico. Sembieroya evocoyase ēgüe ehi tēi vahe. <sup>27</sup> Yarecose rumo yande rembieroya icatupri, nimarai vahe yande Ru Tūpa rovai, ahese yaipītivira co tirēhi, imer mano vahecuer avei iparaisusa rese. Iyavei ndayayapoi chira mbahe naporai vahe.

### **Ndayamboyoaviratīi chira ava mboeteisa sereco**

**2** Iyavei no, che rivireta, pe peroya vahe yande Yar Jesucristo seco porañete vahe peico, ndapeyaisu yoavii chira. <sup>2-3</sup> Inungar-ra que ava mbahe yar oiquese pe ñemonuhasave viña, ahe icuã penda oro vahe, iturucuar catupri ai vahe. Sese pehañeco tupri, “Eguapi co tenda aviye catu vahesave” peyera chupe. Ahe pipeve avei co oiquese pe pāhuve iparaisu vahe oturucuar cuacua vahe reseve, “Eipe peve nde epita, anise eguapi ivive” aipo peyeñora co chupe viña. <sup>4</sup> Evocoyase ēgüe peyese, peyapo mbahe ndoyoyai vahe, naporai vahe pe pāhuve ae iyavei peyepo ava poravosar

nungar peico pe pihañemoñeta raisa pipe.

<sup>5</sup> Che rivireta, che rembiaisu, pesendu aipo ñehesa: Tūpa oiporavo ava iparaisu vahe co ivi pipe ‘toyuvirecoi mbahe yar nungar che roeyasa rereco’ oya, iyavei ‘toipisi che remimombehugüer rupi che mborerecuasa oyeupe nara’ oyapave guaisupar upe. <sup>6</sup> Pe rumo seroñosa pipe pemochi ava iparaisu vahe. ¿Ndahei vo mbahe yar mara-mara tēi pe rereco yuvireco yepi? Ahe niha pe mbotiriri mborerecuar rovai pe reraso yuvireco yepi. <sup>7</sup> Ahe avei niha oñehe-ñehe tēi seroñosa pipe yande Yar yaroya vahe rer imboyeroyapri rese yuvireco.

<sup>8</sup> Supi eté yayapo mbahe aviye vahe yamboaviyese mborocuita ivate catu vahe icuachiapri aipo ehi vahe: “Pesaisu ava pe yeaisu nungar” ehi vahe. <sup>9</sup> Acoi yayeaisu yoavirati tēise rumo, ahese yayapo angaipa, yayavi mborocuita Tūpa rovai. <sup>10</sup> Esepia, acoi ava viroya vahe opacatu mborocuita, ipare rumo oime que ñepe nomboaviye tupri vahe, ahe oyavi opacatu mborocuita. <sup>11</sup> Esepia, Tūpa ité niha aipo ehi: “Ndapeyemboaguasai chira” ehi. Ahe avei aipo ehi: “Ndapeporoyucaí chira no” ehi. Yepe acoi ndapeyemboaguasai chira viña, pe poroyuca pipe rumo, peyavi mborocuita. <sup>12</sup> Evocoyase peñehe tupri vahe iyavei peico tupri aveira. Esepia, oporandura yande recocuer rese yande Yar oporocuita pipe güeru vahe yande reco tupri āgua. <sup>13</sup> Supi eté acoi ndoiparaisuerecoi vahe ava, ahe chupe ndipoi chiaveira poroparaisuerecosa mborandusave. Oporoparaisuereco vahe rumo, ahe soriveté catura yuvireco ahe ari pipe mborandusave curi.

### **Yamboaviye itera mbahe; ndahei chira yande ñehe tēi**

<sup>14</sup> Che rivireta, çaviyera piha acoi ava, “Ayeroya yande Yar rese” ehi tēi vahe,

ndoyapoise mbahe aviye vahe yuvireco? ¿Oicatura p̄ña ahe oñepisiro aipo ohe pipe t̄i yuvireco? <sup>15</sup>Inungar-ra oimese que yande r̄ivri, anise yande reindri upe ipanera iturucuar̄a, semihura ari yacatu rupindar viña. <sup>16</sup>Evocoyase que pe aipo peyeñora chupe viña: “Aviye, eso tupri eico. Eyeao eso s̄ohisaḡüer sui, ecaru tupri” peyera. Ipare rumo ndapemondoise mbahe ipane vahe chupe, ¿aviyera p̄ña ava upe aipo yande he t̄i viña? <sup>17</sup>Ēḡüe ehi avei, “Ayeroya yande Yar rese” yande hesa; ndayayapoise rumo mbahe aviye vahe aipo yande hesa pipe, aipo vahe t̄i yaico.

<sup>18</sup>Aviyeteramo ava pe p̄ahu pendar aipo ehira cheu: “Nde ereyeroya yande Yar rese, che rumo ayapo mbahe tupri” ehi. Che evocoyase aipo ahera chupe: “Emboyecua ru nde yeroyasa mbahe nde rembiapoēhi pipe. Evocoyase che amboyecua che yeroyasa oime vahe che rembiapo pipe ndeu” ahera. <sup>19</sup>Nde niha aipo, “Che aicua oime ñepe T̄upa” ere. Supi et̄e aipo ere. Co rumo carugar avei oicua. Ichui osiquiyepave rumo ahe orir̄i et̄e yuvireco. <sup>20</sup>¡Mbia, tapeico eme ndayaracuai vahe! ¿Ereicua vo co nde mbahe apoēhisa nde yeroyasa ēḡüe ehi t̄i vahe? <sup>21</sup>Esepia, T̄upa oip̄isi yande ramoi Abraham seco tuprisa pipe oicuvēhese porerecosa nungar guahir Isaac chupe aracahe. <sup>22</sup>Indó, Abraham yeroyasa omboyecua it̄e güembipapo catupri reseve. Evocoyase ēḡüe ehi ahe güembipapo tupri pipe omboaviye tupri oyeroyasa oico aracahe. <sup>23</sup>Ēḡüe ehi yaviye icuachiapri aipo ehi vahe: “Abraham viroya it̄e T̄upa, evocoyase, ‘Co seco catupri vahe’ ehi T̄upa ip̄isi” ehi. Ahese ava, “Abraham T̄upa mboripar it̄e” ehi yuvireco chupe.

<sup>24</sup>Indó, T̄upa, “Co seco catupri vahe” ehi ava upe sembiapo tupri repiase yepi, ndahei iyeroyasa rese güeraño. <sup>25</sup>Ēḡüe ehi tupri avei cuña ndipihai vahe Ra-

hab upe. Esepia, ahe omoingue ñuvirío ava ivi repiasar imondopri güeta pipe, ipare oñomi imondo ambuae perirupi yamotarēhisar sui. Ipipe sui T̄upa oip̄isi inungar-ra seco ivi tupri vahe viña. <sup>26</sup>Ēḡüe ehi yande rembiapo catupri ndayamboyecuaise yande yeroyasa pipe, ahe inungar avei Esp̄iritu ndasecoise yande rese, yande yeroyasa evocoyase omano t̄i et̄e oico.

### Yande ñehe resendar

**3** Che rivireta, yipindar ndapeyepaipo chira setá etepri oporombohe vahe peyep̄ahuve. Esepia, peicua niha yande oporombohe vahe yaicose, T̄upa oporandu catu itera ambuae ava sui yande porombohe aḡüer rese yandeu curi. <sup>2</sup>Opacatu yande yayavi setá mbahe rese yepi. Oimese que ava ndoyavii vahe oñehe, ahe ava seco ivi tupri vahe. Iyavei oicua tupri opacatu güeco rereco tupri āgua. <sup>3</sup>Inungar acoi yamondose cavayu yuru penda sese seroguata āgua. Ahese opacatu cavayu retecuer yaicatu imboyahuva āgua. <sup>4</sup>Inungar tupri avei carite guasu, yepe tuvicha iyavei yepe ivitu omoañi op̄irataḡüer pipe viña, serovasa rahimi pipe rumo seroguatasar omohivihiviño seraso güemimbotar rupi. <sup>5</sup>Ēḡüe ehi avei yande āpecu, yepe ch̄ihimi t̄i viña, ipipe rumo yayapo t̄i mbahe tuvicha vahe ava upe. Inungar avei que tata ch̄ihimi vahe sui t̄i yuvi guasu opa ocai. <sup>6</sup>Ēḡüe ehi yande ñehesa tata nungar. Iyavei yande āpecu pipe opacatu mbahe-mbahe t̄i yamombehu. ¡Evocoi mbahe-mbahe t̄i mombehusar yande resendar it̄e! Ahe amove ovireco mara opacatu yande recocuer. Inungar tata ova-ova vahe mbahe rese. Evocoi yande ñehe t̄esa carugar suindar. <sup>7</sup>Ava oicatu opacatu mbahe mimba nimasoi vahe mboaracua āgua, v̄irai, mboi iyavei mbahe ipi para guasu pipendar avei no. <sup>8</sup>Ndipoi et̄e rumo que ava oipopei va-

herā oñeche. Yandeu ndiyai eté ipoepi āgua. Yande ñehesa oporoyuca vahe nungar ité yepi, mbahe tēi eté. <sup>9</sup>Co yande āpecu pipe yamboetei yande Yar Tūpa, ipipe avei rumo yamomara ava, ahe ava rumo Tūpa oyapo onungar. <sup>10</sup>Ēgüe ehi eté, yande ñeche pipe yamboetei Tūpa, ipipe avei yaroïro ava. Che rivireta, ndiyai evocoi nungar mbahe yayapo yepi. <sup>11</sup>¿Oicatura pīha osē ñepei i ohē vahe sui sēhe vahe, iro vahe avei viña? <sup>12</sup>¿Ihara pīha higuera ivira rese aceituna viña? ¿Iyavei oicatura pīha uva hi rese oha higo viña no? ¡Aní, ndoicatu eté! Iyavei ndoicatu ñepei i ohē vahe sui osē i, sēhe vahe sēhe asi vahe reseve.

### Mbahecuasa supi eté vahe

<sup>13</sup>Acoi oimese pe pāhuve yaracua vahe, oyapisaca vahe, tomboyecua catu güeco catuprisa, güeco mbegüesa avei ombahecu tuprisa pipe. <sup>14</sup>Oimese rumo pe pīhave pe poroamotarēhisa mbahe pota raisa pipe, iyavei peyeupe nara tēi mbahe peseca, ahese ndiyai peyemboviha tupri tēi ‘che yaracua vahe aico’ pe yapave. Esepia, peremira tēira supi eté vahe mbahe rese. <sup>15</sup>Ēgüe ehi eté evocoi nungar aracuasa ndahei Tūpa suindar. Ahe rumo co ivi pipendar tēi vahe, ava pīhañemoñeta sui tēi osē vahe iyavei carugar suindar tēi avei. <sup>16</sup>Esepia, poroamotarēhisa yande mbahe pota raisa pipe yarecose iyavei yaipotase mbahe yandeyeupe nara tēi, ichui osē ñehepoepisa iyavei opacatu mbahe tēi. <sup>17</sup>Acoi vireco vahe rumo Tūpa suindar aracuasa, ahe vireco itera opacatu ava rovaque güeco maranehisa iyavei secoira güeco mbegüesa pipe. Ahe ndaseco asii chiaveira. Iyavei oyemoingatu voi vahe, ahe oporoparisuereco vahe, nomboyoaviratīi vahe güecocuer. Ahe ipīhañemoñetasa ñepei reseve vahe iyavei oyapo tupri vahe mbahe.

<sup>18</sup>Iyavei acoi oseca vahe mbahe tupri yepi, oipisi itera opiha pipe teco ñvisa.

### Co ivi pipendar mbahe raisusa

**4** ¿Que sui pīha ou vavasa iyavei ñehepoepi-episa pe pāhuve? Ahe ou pe mbahe pota raisa sui pereco vahe pe pīhañemoñetasa pipe. <sup>2</sup>Pe peipota rai mbahe. Ipape rumo ndapeicatu sereco āgua. Evocoiyase peporoyuca pe mbahe pota raisa pipe. Ndiyai eté rumo pēu sereco āgua. Ipape sui peyeecoāha, pevava avei no. Ndapeyosui eté rumo mbahe pe remimbotar. Esepia, ndapeporandui Tūpa upe. <sup>3</sup>Acoi peporanduse rumo sese, ndapeipisii. Esepia, peporandu rai tēi, peipota pe yemboviha āgua rese nara tēi. <sup>4</sup>¡Pe mbia, peyavi vahe pe recocuer! ¿Ndapeicuai vo acoi ava Tūpa cuaparēhi mboripar tēi yuvirecoi vahe, ahe Tūpa amotarēhimbar yuvirecoi? Ēgüe ehi eté acoi oipota vahe co ivi pipendar mbahe mbahe tēi pipe güeco āgua, ahe oyeapo Tūpa amotarēhimbar. <sup>5</sup>Supi eté Tūpa Ñehengagüer aipo ehi: “Tūpa osaisu güecatēhisa pipe o Espiritu omondo vahe yande pīha pipe” ehi. <sup>6</sup>Ahe rumo yande pītivii catu oporoaisusa pipe. Esepia, icuachiapri aracahendar pipe aipo ehi: “Tūpa oyamotarēhi ava oyeecomboivate ai vahe. Oipītivii rumo seco mbegüe vahe saiskusave” ehi. <sup>7</sup>Sese pemboyeroya catu Tūpa. Peyemoviracua carugar remimbotar apoēhi āgua. Ahese ahe oyepepira pe sui. <sup>8</sup>Peyemboya Tūpa rese, ahe evocoiyase oyemboyara pe rese. Pe, angaipa viyar, ¡peñemoatiro mbahe peyapo vahe sui! ¡Iyavei pemoatiro pe pīhañemoñetasa ñuvirío pereco vahe sui! <sup>9</sup>¡Tatasi pēu, tapeyaseho, perorivete iri eme, pemboasi pe angaipa pe yemboviharēhisave! <sup>10</sup>Peñenopiha Yar rovai imboyero-asa pipe. Ahe evocoiyase pe reco mboivatera.

### Peroiro eme pe mboetasa

<sup>11</sup>Che rivireta, aní chira peñehe mara peyeupe. Acoi oñehe rai vahe iyavei viroiro vahe ambuae Jesús reroyasar, ahe oñehe rai tēi aveira mborocuaita rese seroīrosave. Ēgüe peyese, evocoyase seroyaēhisa pipe peyemboivate catura mborocuaita sui viña. <sup>12</sup>Oime rumo ñepeño ité ombou vahe mborocuaita yandeu iyavei oporandu vahe yande recocuer rese. Ahe güeraño avei oicatu oporopīsiro iyavei oporomocañi āgua no. Evocoyase pe, ¡ndiyai pe cotindar roeroiro āgua pēu!

### Ndayaicuai mbahe oime vaherā yandeu ayihive

<sup>13</sup>Pesendu pe aipo peye vahe: “Cūrítei, anise ayihive yasora que tecuave, anise que tecua guasuve revo. Aheve yaicora ñepeí araviter yande poraviqui āgua. Ahese yamogana catura guarepochi” aipo peye vahe. <sup>14</sup>¡Ndapeicuai rumo mbahe oime vaherā pēu ayihive! ¿Mara ehi pīha yande recocuer? Ahe inungar ívichi oyecua raimi tēi vahe, ipare opaño ocañi. <sup>15</sup>Iyacatu aipo peyera viña: “Oipotase yande Yar yande reco āgua, yayapora co nungar mbahe, que ambuae mbahe” peyera yepi. <sup>16</sup>Pe rumo peñeheño pe yemboivate aisa pipe mbahe pe rembiaporā rese. Opacatu evocoi nungar mbahe rumo naporai. <sup>17</sup>Esepia, acoi oicua vahe mbahe tupri apo āgua, ipare rumo ndoyapoi eté, ahe oyapo angaipa.

### Imbahe eta vahe paraisusa resendar

**5** ¡Pe mbahe yar, pesendu co: peyaseho iyavei perāse! Esepia, peiporarara mbahe tēi peico. <sup>2</sup>Opacatu pe mbahe eta ocañi tēi vaherā. Esepia, pe mbahe pe reco ati vahe opa ituyu.

Iyavei pe turucuar yayi vahe opa avei ohu sasoi. <sup>3</sup>Pe oro, pe guarepochi opa opochi ati-ati no. Ahe niha pe recoāha āgua, omboyecua vahe mbahe tēi pēu. Iyavei pe mbahe pota raisa ndoyavii pe roho ocai vahe vireco. Esepia, pemonuha guasu tēi mbahe pereco ati vahe sereco co ari ipa vahe pipe. <sup>4</sup>Peyapisaca, acoi oipoho vahe mbahe pēu nara yuvireco, chupe ndapemboepii eté. Sese sāsé tēi yuvireco. Ahe rumo yande Yar ipiratá vahe, ivate catu vahe oicua. <sup>5</sup>Co ivi pipe tēi pe peyecomendiyai peico iyavei peyemboviha co ivi pipendar mbahe rese inungar guaca imonguirapri yuca āgua. Ipipe peyemoingatu pe cañi āgua. <sup>6</sup>Pe ñehe pipe pemombaraisu ava ndoyapoi vahe mbahe yuvireco; yepe, “Mara” ndehi yuvireco pēu viña, pe rumo peyucaño.

### Ñemosasa iyavei yeroquisa resendar

<sup>7</sup>Che rivireta, peñemosañi yande Yar yevi iri āgua rese. Inungar ava omaheti vahe osāro rane güemiti poho āgua. Esepia, ahe osāro yipindar oquí vahe iyavei ipa oquí vahe mbahe miti aviye āgua. <sup>8</sup>Pe avei peñemosañi, peyemonguerēhi catu. Esepia, cōimi eté yande Yar yevi āgua cute.

<sup>9</sup>Iyavei che rivireta, peñemoiroi rene peyeupe. Evocoyase Tūpa ndoporandui chira co mbahe rese pēu. Esepia, mborerecuar guasu iva pendar oyemoingatu voi ohā yandeu porandu āgua. <sup>10</sup>Che rivireta, peico catu inungar Tūpa ñehe mombehusar arachendar yuvirecoi vahe. Ahe oñemosañi mbahe rasicuer upe yande Yar rer pipe oñehe āgua yuvireco. <sup>11</sup>Yande rumo yaicua sovasapri ava oñemosa vahe mbahe rasicuer upe yuvireco. Pesendu niha pe acoi mbīa Job serer vahe ñemosasa. Ipare peicua avei mbahe aviye vahe

yande Yar oyapo chupe. Yande Yar niha oporoparaisuereco vahe.

<sup>12</sup>Che rivireta, peyapisaca tupri catu co che ñehe rese. Pe ñehe água ndapeiporui chietera que iva rer iyavei que ambuae mbahe pe ñehe reroya uca água. Iyacatu rumo, “Supi eté” peyese, supíño itera; “Aní” peyese, aní chiño itera Tūpa poronupasa pisiēhi água.

<sup>13</sup>Aviyeteramo que pe pāhu pendar iparaisura oico; toyerogui. Aviyeteramo oimera que sorivete vahe oico; ahe tosapucaí Tūpa upe. <sup>14</sup>Aviyeteramo que ava imbaheasira oico, toñehe evocoyase Jesús reroyasar rārosar upe. Ahe tomondo aceite yande Yar rer pipe yuvireco sese. Ipare toviroyerogui yuvireco. <sup>15</sup>Acoi oyeroguise oyeroyasa pipe sese yuvireco, imbaheasi vahe evocoyase ocuerara; yande Yar avei omopuhara. Acoi angaipa virecose,

oime aveira ñerosa chupe. <sup>16</sup>Sese pemombehu pe angaipa peyeupe, peyerogui avei peyese pe yembogüera tupri uca água. Ava aviye vahe oyeroguise oquerēhisave opacatu güecocuer pipe, ahe iyeroquisa ipīratá ité. <sup>17</sup>Acoi Tūpa ñehe mombehusar Elías yande nungar avei. Ahe oporandu oyeroguise pipe Tūpa upe, “Toqui eme” ehi. Aipo ehise, ndoqui eté ivi harive mbosapi araviter imombitesa rupi. <sup>18</sup>Ipare oyerogui iri, ahese oqui iyavei mbahe miti iha iri.

<sup>19</sup>Che rivireta, acoi oimese oyahuva vahe supi eté vahe sui pe pāhuve, ipare ambuae viroyevise Jesús upe, <sup>20</sup>tapeicua pe acoi viroyevi vahe angaipa viyar secocueraí sui, oipīsiro ihã imano rāgüer sui. Iyavei omoime ñerosa tuvichá vahe yangaipa upe. Aipo rupive.

*PEDRO REMBICUACHIA  
YPINDAR VAHE*

**SAN PEDRO**

**Pedro mahenduhasa Jesús reroyasar  
opacatu rupi oñemosai vahe upe**

**1** Che, Pedro, Jesucristo apóstol aicuachía co che ñehe pëu, pe Tüpa rembiporavo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe. <sup>2</sup>Supi eté pe yande Ru Tüpa rembiporavo yipisuive peico semimbotar rupi. Evocoiyase oEspíritu Santo pipe pe peha oyeupe nara viroyasar pe reco água ‘imoatiropri toyuvirecoi che Rahir ruvi pipe oangaipagüer sui’ oya. Peipisi catu Tüpa porovasasa pe reco tupri água.

**Tüpa suindar mbahe  
aviye vahe rãrosa**

<sup>3</sup>¡Imboeteipri tasecoi Tüpa, yande Yar Jesucristo Ru! Ahe niha oporoparaisuerecosa pipe yande recocuer mbopiasu. Ëgüe ehi yandeu Guahir Jesucristo ocuerayevise. Ipipe sui yaicuaño ité oimera mbahe aviye vahe Tüpa suindar yandeu. <sup>4</sup>Ipipe sui avei Tüpa oipisi ucara pëu pe mombahesa ivave yapocatupri nocañii vaherã, ndituyui vaherã iyavei ndopai vaherã ité. <sup>5</sup>Pe peyeroya ité Tüpa rese. Sese niha ahe opíratasa pipe pe repi mbahe tēi sui poropĩsirosa pe reco água. Ahe vireco vahe imoingatupri ari ipa vahe mboyecua água pëu.

<sup>6</sup>Co rese peyembovihareteño peico, yepe cūrítei pe reco pipe peparaisu pucu raimi tēi setá pe recoãhasa pipe peico viña. <sup>7</sup>Esepia, pe yeroyasa Tüpa rese aviye oro, ahe sãhasa tata pipe yepi. Ëgüe ehi aveira pe recocuer sãhambri

tata nungar mbahe yavai vahe pipe, “¿Aviye vahe ité pĩha?” hesave. Yañemosase evocoi mbahe yavai vahe upe, ahese yande yeroyasa aviye catura oro ocañi tēi vaherã sui. Ëgüe yahese, “Che rese pe yeroyasa aviye ité” ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevise curi.

<sup>8</sup>Pe niha pesaisu yande Yar Jesucristo, yepe ndapesepiai viña; cūrítei rumo sepiãhi pipe peyeroya sese. Sese pereco ité pe viharetesa tuvichá, aviye catu vahe, ndapeicatu vahe ahe imombehu. <sup>9</sup>Esepia niha, pesupiti pe remiaro poropĩsirosa apirēhi vahe peico pe yeroyasa pipe.

<sup>10</sup>Aracahe suive ava Tüpa ñehe mombehusar oicua tupri pota ité co poropĩsirosa resendar yuvireco ‘¿mara ehi eté pĩha co tecocuer?’ oyapave yuvireco. Iyavei oñemoñeta yuvireco Tüpa oporoaisusa pipe pëu mbahe ombou vaherã rese. <sup>11</sup>Cristo Espiritu senondeve oicua uca mbahe Tüpa ñehe mombehusar upe aipo ehi: “Poropĩsirosar oyemombaraisu ranera, ipare rumo teco orisa porañete vahe oimera” ehi chupe aracahe. Sese, “¿Umara pĩha evocoi mbia?” ehi; “¿Mbahesera vo oimera co Espiritu remimombehu yandeu?” ehi yuvireco. <sup>12</sup>Tüpa rumo omboyecua chupe, ndahei chupe nara ité imombehupri yuvireco, pëu nara ité rumo. Ahe avei niha poropĩsirosa resendar ñehesa mombehusar omombehu pëu cūrítei, Espiritu Santo pĩratasa pipe imboupri iva pendar yandeu. ¡Tüpa rembiguai avei oicua tupri pota tēi cūrítei yuvireco viña!

**Tüpa yande poravo yande  
reco maranehi água**

<sup>13</sup>Sese pe pĩhañemoñeta tuprisa pipe pemahemoha tuprira peyese Tüpa

porovasasa pëu ombou vaheṛā rese pe yeroya catu āgua acoi Jesucristo oyeveise curi. <sup>14</sup>Tahīr iporeroya vahe pe recosa pipe ndapeicoi chira mbahe pe remimbotarai pipe, acoi pereco vahecuer peyese Tūpa recocuer cuaēhi viteseve. <sup>15</sup>Peicora rumo pe reco maranehisa pipe ité. Esepia, Tūpa pe poravo oyeupe nara; ahe ndaseco marai vahe ité. <sup>16</sup>Supi eté icuachiapri aracahendar pipe aipo ehi imombehu: “Pe tapeico seco maranehi vahe. Esepia, che ndaseco marai vahe aico” ehi.

<sup>17</sup>Tūpa niha opacatu ava upe secocuer rese nomboyoviratī chira oporandu curi, sese pe, “Che Ru” peye vahe chupe peyembosiquiyera mbahe tēi apoēhi āgua imboeteisave co ivi pipe peico vitese. <sup>18</sup>Esepia, Tūpa pe pīsiro aracahendar pe ramoī suindar aracuasa ēgüe ehi tēi vahe sui. Peicua tupri ité niha co poropīsirosa repri nimboepisai eté que mbahe ocañi tēi vaheṛā pipe inungar oro, anise guarepochira viña. <sup>19</sup>Imboepisa rumo Cristo ruvi maranehi pipe. Ahe seropovēhepri, inungar ovesa nimarai vahe. <sup>20</sup>Ahe Tūpa oiporavo aracahe ivi, iva apoēhi viteseve ēgüe ehi vaheṛā. Cūrītei rumo oyemboye-cua pëu mbahe tupri āgua. <sup>21</sup>Secocuer sui niha peroya Tūpa peico, ahe ombogüerayevi vahe omano vahe pāhu sui, ipare omondo oyemboeteisa, güeco porañetesa avei chupe. Ipipe sui peyeroya Tūpa rese iyavei pesāro co mbahe aviye vahe pisi āgua ichui.

<sup>22</sup>Cūrītei Tūpa Ñehengagüer supi tupri vahe mboyeroyasa pipe imoatirosa pe recocuer pesaisu vaheṛā ambuae Jesús reroyasareta. Evocoyase ēgüe peyera peyeaisu catu opacatu pe pihañemoñeta tuprisa pipe, iyavei opacatu pe pīratasa pipe. <sup>23</sup>Pe niha pereco tecovesa piasu, ndahei pe yesupa omano tēi vahe suindar. Ahe rumo Tūpa Ñehengagüer supi tupri apirēhi

vahe reroya pipe. <sup>24</sup>Esepia, icuachiapri aracahendar pipe aipo ehi:

“Opacatu ava inungar caha, iyemboeteisa evocoyase inungar ipotri.

Ipare ahe caha opa omano, ipotri avei opa oviapi;

<sup>25</sup>Tūpa Ñehengagüer rumo apirēhi vaheṛā ité yepi” ehi.

Ahe co ñehesa imombehupri poropīsirosa resendar pëu nara.

**2** Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar. <sup>2</sup>Inungar pītanimi ocuacua āgua oipota cambi; ēgüe peye aveira pe querēhisa pipe Tūpa Ñehengagüer rese pe yembohe catu iri āgua, peico tupri āgua poropīsirosa pipe, <sup>3</sup>que peicua itese yande Yar reco aviyesa.

### **Cristo inungar ita ndopai vahe**

<sup>4</sup>Peyemboya catu yande Yar rese. Ahe inungar ita ndopai vahe. Ava rumo oviroiroño yuvireco. Tūpa rumo ahe ita oiporavo aviye catu vahe. <sup>5</sup>Ēgüe ehira pe rereco oyeupe inungar ita ndopai vahe; ipipe sui omopuhara otūparoguā pe rese. Iyavei pahī ndaseco marai vahe nungar peicora semimbotar rupi chupe. Pe evocoyase Jesucristo rembiapo pipe sui peyapora Espiritu upendar mbahe aviye vahe. Ahe inungar mbahe seropovēhepri aviye vahe Tūpa upe. <sup>6</sup>Esepia, icuachiapri aracahendar pipe aipo ehi:

“Che amondo ñepeī ita nungar ava aviye vahe tecua Sión ve imoviracua āgua. Ahe che rembiporavo iporañete vahe, imboeteipri.

Acoi oyeroyá vahe sese, ahe nochī chietera ichui” ehi.

<sup>7</sup>Pe seroyasar peico vahe upe evocoi ita aviye vahe ité. Seroyasarēhi upe



rumo imboaviyesa co ñehesa aipo ehi vahe:

“Oï aposar rumo viroïroño co ita yuvireco.

Ahe ita rumo coiye vīracuasa aviye catu vahe”

ehi. <sup>8</sup>Iyavei omboaviye aipo ñehesa:

“Co ita oipihapi oiti uca ava” ehi. Esepia, Tūpa suindar ñehesa reroyaēhi pipe sui oyemondo uca mbahe tēi pipe yuvireco. Ēgüe ehi vaherā ité rumo ahe secocuer yuvireco.

<sup>9</sup>Pe rumo ava oyesuindar nungar iporavopri peico Tūpa uve nara, imborerecuasa upendar pahi, iyavei chupendar ava seco maranehi vahe peico. Ēgüe peye Tūpa reco pīratasa mombehu āgua peico. Esepia, ahe pe renose pītumimbisa nungar pe recocuerai sui tesapesa aviye vahe pipe pe reique āgua. <sup>10</sup>Yipindar ndahe vītei eté Tūpa upendar ava peico, cūrītei rumo ahe ité peico; yipindar ndaperecoi Tūpa poroparaisuerecosa, cūrītei rumo pereco ité cute.

### Peico catu Tūpa mboetei āgua

<sup>11</sup>Che rivireta, che rembiaisu, peico raimi tēi vahe co ivi pipe, pepoi opacatu co ivi pipendar pe pīhañemoñeta raisa sui. Esepia, pemomara uca tēi pe recocuer ipipe. <sup>12</sup>Pereco tupri pe recocuer aviye vahe ava Tūpa ndoicua vītei vahe rovaque. Yepe ava remieroïro peico inungar-ra mbahe tēi aposar viña, osapiase rumo pe rembiapo catupri, omboteira Tūpa yuvireco ahe ari pipe acoi yande Yar oporanduse opacatu ava recocuer rese curi.

<sup>13</sup>Yande Yar raisusa pipe pemboyeroya opacatu pe rerecuar co ivi pipe: que mborerecuar guasu ivate catu vahe, <sup>14</sup>anise yivirindar. Ahe pe recua pipendar rārosar imondopri ava naporai vahe mombaraisu āgua, iyavei ava seco catupri vahe upe, “Aviye nde recocuer” he āgua. <sup>15</sup>Esepia, Tūpa oipota pe

peyapora mbahe aviye vahe ava mbahe ndoicuai vahe upe, ndayaracuai vahe upe pe rese iñehe-ñehe tēiēhi āgua.

<sup>16</sup>Peico tupri ava rovaque mbiguai tēi nungar sui senosepri pe recosa pipe. Ndiyai rumo ipipe peyapo iri mbahe tēi. Peico tupri rumo Tūpa rembiguai pe recosa pipe. <sup>17</sup>Pemboeteira opacatu ava. Pesaisu catu pe rivireta Jesús reroyasar; pemboetei Tūpa; pemboyeroya avei mborerecuar guasu.

### Yembohesa yande Yar Jesucristo mombaraisu agüer resendar

<sup>18</sup>Pe, ava rembiguai, pemboyeroya catu pe rerecuar imboeteisa pipe que seco catupri vahe, que ndaseco pōrai vahe avei. <sup>19</sup>Esepia, aviye catu yañemosase mbahe-mbahe tēi ava rembiapo upe Tūpa mboyeroya tuprisa pipe. <sup>20</sup>Mbahe tēi aposa pipe rumo pe mombaraisuse yuvireco, ndipoi eté evocoyase ichui mbahe aviye vahe peñemosase evocoi nungar mbahe upe. Co rumo acoi mbahe tupri aposa pipe pe mombaraisuse yuvireco, ipare peñemosase chupe, ahe rumo aviye catu itera Tūpa upe. <sup>21</sup>Pe paraisu āgua rese niha Tūpa pe poravo. Esepia, Cristo oyemombaraisu pe recocuer rese. Ahe rane ēgüe ehi pe rese pe secocuer moña āgua. <sup>22</sup>Ahe ndoyapoi vahe ité angaipa iyavei ndoporombopai vahe ité. <sup>23</sup>Acoi ava iñehe mara-mara tēise yuvireco chupe, nomboyevii eté iñehe raisa. Iyavei acoi omombaraisuse yuvireco, “Ayepira sese” ndehi eté. Ahe rumo, “Che Ru Tūpa seco ivi vahe oicuara chupe yuvireco” ehiño oyeupe mbahe-mbahe tēi aposar upe. <sup>24</sup>Cristo teieté viraso yande angaipagüer güete pipe curusu rese ‘toyepipi angaipa sui yuvireco. Ipipe sui toyuvirecoi teco iñisave’ oyapave yandeu. Ahe niha yapichapri secoci pe recocuer moingatu āgua. <sup>25</sup>Esepia, pe niha yipindar inungar ovesa ocañi

têi vahe peico viña. Cūrítei rumo peyevi Cristo upe. Ahe pe recocuer osāro cūrítei inungar ovesa rārosar.

**¿Mara ehira ava omenda vahe recocuer yuvireco?**

**3**<sup>1-2</sup>Ēgüe peye aveira cuña, pemboyeroya itera pe mer. Esepia, amove ndoviroya vitei Tūpa Ñehengagüer yuvireco; pemboyecuase rumo pe reco tuprisa imboeteisa avei chupe, aviyeteramo ahe avei viroyara, yepe ndapeñehi chira chupe viña. <sup>3</sup>Acoi pemboyecua potase pe yemoporañetesa ndahei chira pe rete rese inungar oāca rese mbahe omoporañete ai vahe, ndahei chiaveira pe yemondesa sendi yai vahe oro nungar, que turucuar porañete catu vahe. <sup>4</sup>Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiēhisa pipe. Evocoi nungar aviye catu ité Tūpa rovaque. <sup>5</sup>Ēgüe ehi avei cuña seco catupri vahe güeco porañetesa imboyecua aracahe. Ahe oyeroya Tūpa rese yuvireco, omer avei omboyeroya yuvireco. <sup>6</sup>Inungar Sara aracahe, omboyeroya ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyeēhisa pipe.

<sup>7</sup>Iyavei pe imer, pereco mbegüera pe rembireco upe. Pemboeteira sereco. Esepia, ahe nipirata tuprii, iyavei Tūpa omboura güeco tuprisa pipe tecovesa apirēhi vahe oyoya voi pēu. Ēgüe peyese, Tūpa osendu itera pe yeruresa.

**Paraisusa mbahe tupri aposa rese**

<sup>8</sup>Iyavei na peyera pe opacatu peyese inungar ñepeí oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe. <sup>9</sup>Oyapose ava que mbahe tēi pēu, anise que oñehe raise, ndapemboyevii chira

chupe. Iyacatu rumo mbahe tuprisa pipe pemboyevira chupe. Evocoi nungar mbahe apo āgua niha Tūpa pe poravo ‘toipisi che porovasasa’ oyapave.

<sup>10</sup>Esepia,

“Peipotase pe recocuer aviye tupri āgua pe yemboviharetesa pipe, pemombituhu pe ñehe raisa iyavei ndapeporombopai chira.

<sup>11</sup>Pepoi aveira mbahe tēi sui, pesecara mbahe aviye vahe.

Peseca teco tuprisa peyeupe nara, peguata supi.

<sup>12</sup>Esepia, supi eté, yande Yar osāro ava seco catupri vahe iyavei osendu oyeupe yeruresa.

Ava mbahe tēi aposar rumo ndoipisii eté” ehi.

<sup>13</sup>Ndipoi chira revo que ava mbahe tēi oyapo vahe pe recocuer upe yuvireco, pequerēhise mbahe aviye vahe apo. <sup>14</sup>Peparaisuse rumo mbahe pe rembiapo aviye vahesa rese, ¡sovasapri peico! Peyembosiquiyei rene que ava sui.

<sup>15</sup>Pemboeteñora rumo Cristo pe Yar secosa rese pe piha pipe. Peyemoin-gatu voira ava pe remiaro rese oporanduse pēu pe querēhisa pipe imombehu tupri āgua. <sup>16</sup>Ēgüe peyera rumo pe reco mbegüesa pipe imboeteisave. Peico tupriira pe pihañemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

<sup>17</sup>Tūpa oipotase pe yemombaraisu, aviye catu mbahe aviye vahe apo pipe yepi mbahe tēi apo rāgüer sui. <sup>18</sup>Esepia niha, Cristo teieté omano yande angaipa repirā ñepeí reseve. Güeco marañehi pipe ēgüe ehi ava recocuerai rese opacatu pe reraso āgua Vu Tūpa upe. Ahe omano güete rese. Ipare rumo ocuerayevi güeco espíritu pipe. <sup>19</sup>Güeco espíritu pipe avei oso, omombehu Vu Tūpa remimbotar ava hā soquendapri yuvirecoi vahe upe. <sup>20</sup>Ahe ava Noé

recosendar ndiporeroyai vahe yuvireco aracahe. Tūpa osāro güeco mbegüesa pipe secocuer moingatu āgua viña Noé oyapo viteseve arca oico. Ahe ipipe oñepisiro ochomi tēi yuvireco amarusu sui. <sup>21</sup>Ahe i osāhangapo i poroāpiramosa, ahe omboyecua yande ipisiro-pri yande recosa. Poroāpiramosa rumo i pipe ndahei yande rete moatiro āgua. Co rumo yaporandura Tūpa upe, yande pihanemoñetasa moatiro āgua. Ipipe sui evocoyase yañepisiro yande Yar Jesucristo cuerayevisa pipe. <sup>22</sup>Ahe oso ivave oguapi oñ Vu acato coti. Opacatu sembiguai eta, mborerecuareta, opacatu imborerecuasa ipirata vahe avei ipovri pendar yuvirecoi.

### **Yandehañeco yandeyese mbahecuasa Tūpa suindar yaipisi vahe pipe**

**4** Cristo oiporara mbahe rasicuer güete rese. Pe avei evocoyase peyemoingatu voi ěgüe peye vaherā peico chupe nara. Esepia, acoi ava oyemomborara vahe güete pipe oseya angaipa yuvireco. <sup>2</sup>Ipipe sui ndoyuvireco iri chira arī rupi ava tēi pihanemoñetasa pipe. Tūpa remimbotar rupi eté rumo oyapo pota mbahe co ivi pipe yuvirecoi vitese. <sup>3</sup>Ěgüe peye pucu rane niha pe rembiapo ai pipe peico ava Tūpa reroyasarēhi recocuer nungar rupi tupri. Ahese mbahe-mbahe tēi peyapo pe pihanemoñeta raisa pipe, savaiposa, pietasave pe rāse tēi pipe pe aracuasa pemocañi pe ihu tēisa pipe, pemboetei avei mbahe rahanga tēi peico. <sup>4</sup>Cūrítei rumo pe mboriparer, ndoyembovihai tēi pe rese, ndapeico irise supi semimbotarai apo āgua. Ahe oñehe-ñehe tēi yuvireco pe recocuer piasu rese. <sup>5</sup>Ahe chupe rumo oimera porandusa. Esepia, yande Yar oyemoingatu opacatu ava recocuer rese oporandu āgua omano vahe upe, oicove vite vahe upe avei curi. <sup>6</sup>Sese niha co

ñehesa pīsirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirā, iespíritu rumo yuvirecoi apirēhi inungar Tūpa.

<sup>7</sup>Virovi rumo ari ipa vahe oico, sese pe yapisacasa pipe pepihanemoñeta tupri iyavei peyerure catuño ité pe yeroya tuprisa pipe. <sup>8</sup>Co catu opacatu tupri ité peyeaisura pe piha pipe. Esepia, ěgüe yahera poroaisusa pipe yande ñero voira seta ava yangaipa vahe upe. <sup>9</sup>Peipisi tupri ava yuviraso vahe pe rētave; “¿Mbahe rese piha co ou?” peyei rene pe pihanemoñeta pipe pe piri ou vahe upe. <sup>10</sup>Ñepeipei yande yaiporura Tūpa suindar mbahecuasa yareco vahe ambuae Jesús reroyasar rese hañeco tupri āgua. Yaiporu tuprira co Tūpa porovasasa setá vahe yande cuaita mboaviye tupri āgua. <sup>11</sup>Acoi pemombehuse Tūpa suindar mbahe, pemombehura inungar iñehe ité; acoi peporopitívii potase, peyapoño opiratasa pēu Tūpa ombou vahe pipe. Opacatu mbahe peyapo vahe peyapo ‘tomboetei ava yuvireco Tūpa yande Yar Jesucristo rembiapo pipe sui’ pe hesa pipe. Esepia, chupendar ité imboeteisa iyavei imborerecuasa. Ěgüe tehi apirēhi vaherā ité.

### **Yemombaraisusa Cristo reroyasar yande recosa pipe**

<sup>12</sup>Che rivireta, che rembiaisu, ndapeyesapiha ucai chira, acoi oimese mbahe-mbahe tēi yande recoñhasa pēu ‘ndoyavii, ndipoi chietera evocoi nungar mbahe cheu viña’ pe hesa pipe. <sup>13</sup>Yayembovihareteñora rumo ipipe. Esepia, yande rereco yande Yar yemombaraisu agüer nungar pipe yuvireco. Evocoyase yayemboviharete itera acoi yande Yar oyevise güeco pīratasa pipe. <sup>14</sup>Iñehe marase yuvireco pēu Cristo reroyasar pe recosa rese, sovasapri peico. Esepia, Tūpa Espíritu

güeco porañetesa pipe secoi eté pe rese. <sup>15</sup>Acoi pe pāhu pendar omombaraisuse yuvireco, ndahei chira rumo iporapichisa rese, ndahei chiveira imondasa sui, que mbahe tēi aposa rese. Ndahei chiveira que ambuae ava mbahe rese iñemañeco tēisa sui ēgüe ehira serecosa. <sup>16</sup>Co rumo acoi peparaisuse Cristo reroyasar pe recosa pipe, ndapechī chietera. Pesapucaira rumo Tūpa upe imboeteisa pipe serer pereco vahe rese.

<sup>17</sup>Esepia, oyepota ité ari Jesús reroyasar upe rane ité tecocuer rese porandu āgua. Ēgüe ehise yandeu, mbahe tēi catu itera Jesús reroyasarēhi upe. <sup>18</sup>Yavaise seco catupri vahe upe iñepisiro āgua, ¿mara ehira pīha ava ndaseco pōrai vahe ava angaipa viyar yuvirecoi vahe upe? <sup>19</sup>Sese peyemomborarase Tūpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hā rāro āgua. Esepia, ahe niha yeroyasa ité secoi.

### Aracuasa Jesús reroyasar upe

**5** Che amboaracua pota pe pāhu pendar Jesús reroyasar rārosar. Inungar avei niha che aico iyavei asepia vahe ité yande Yar mombaraisu agüer. Inungar ahe vireco teco orisa, ēgüe ahe aveira acoi yande Yar oyevise curi. <sup>2</sup>Pesāro tupri catu Tūpa upendar ava eta pe remiaro co omondo vahe pēu inungar ovesa rese yangarecuar osāro tupri vahe ovesa; peyapora pe querēhisa pipe ité. Ahe niha Tūpa oipota, ndahei ambuae yande cuaisa pipe tēi, ndahei avei guarepochi pota raisave yayapo. Yayapora rumo mboraviqui yande querēhisa pipe ité. <sup>3</sup>Ndapeicoi chira pe remiaro upe inungar que mborerecuar güeco ivatesa pipe oporocuai pīrata vahe. Pemboyecua rumo pe recocuer aviye vahe chupe imbohesa tupri pipe. <sup>4</sup>Evocoyase acoi oyevise yande Yar, yande rārosar ivate

catu vahe, ahese peipsisira mbahe porerecosa, teco ori porañete apirēhi vahe.

<sup>5</sup>Iyavei no pe mbia chīhivahe, pemboyeroyara ava pe rārosar peico. Iyavei opacatu peyemboyeroyara pe reco mbegüesa pipe peyeupe peico. Esepia, “Tūpa ava oyeecomboivate ai vahe amotarēhimbar secoi; ava seco mbegüemi vahe upe rumo ombou oporovasasa” ehi.

<sup>6</sup>Peyecomombegüe catu peico Tūpa pīratasa povrive. Evocoyase pe reco mboivatera curi. <sup>7</sup>Opacatu mbahe rese pe pihañemoñeta atisa pemombehura Tūpa upe. Esepia, ahe pe rārosar ité secoi.

<sup>8</sup>Pearacua cañii rene peyesui, pema-hemoha ari rupi peyese. Esepia, pe amotarēhimbar Caruguar pe reco momara pota yepi inungar yaguar oñaro vahe oguata tēi oporoeca ‘tamomara ava’ oyapave. <sup>9</sup>Sese peyemoviracuara Tūpa rese pe yeroyasa pipe Caruguar upe. Esepia, peicua niha opacatu rupi avei yande rivireta Tūpa rese yuvirecoi vahe iparaisu co nungar mbahe pipe. <sup>10</sup>Peparaisumi pare rumo, Tūpa teieté pe reco mohivi tupri, iyavei pe reco moviracuara, pe momirata aveira pe yepepi iriēhi āgua ichui. Ahe niha oporovasasa pipe yande poravo oyeupe nara, yande yaso vaherā supi teco ori ndopai vahesave yande Yar rese yande recosa pipe. <sup>11</sup>Ēgüe tehi tasecoi güeco pīratasa apirēhi vahe pipe.

### Mahenduhasa ipa vahe

<sup>12</sup>Yande rivri Silvano omboaviye tupri vahe ité ocuaita yepi, ahe che pītiviisa pipe co ayapo imondo che rembicuachía ndipucuiimi vahe pe mboaracua catu āgua ‘ipipe toicua tupri catu yuvireco co porovasasa oipisi vahe, supi eté omboyecua vahe Tūpa poroaisusa’ che hesave. ¡Peyemoviracua tupri ité sese!

<sup>13</sup>Iyavei Babilonia pendar Jesús reroy-  
asar yuvirecoi vahe oyoya vahe pe rese  
iporavopri, ahe ombou omahenduhasa  
yuvireco pëu. Marcos, che rahir nun-

gar avei imahenduha pe rese. <sup>14</sup>Peyeo-  
vaupite “avirave” apo pe yeaisusa pipe.

Tapereco tecocuer tupri yande Yar Je-  
sucristo rese peico vahe. Aipo rupive.

*IMOÑUVIRIOSA  
PEDRO REMBICUACHIA*

**SAN PEDRO**

**Pedro mahenduhasa  
Jesús reroyasar upe**

**1** Che, Simón Pedro, apóstol, Jesucristo rembiguai aico. Co aicuachía che ñehe pëu nara, pe peipisi vahe yande Yar rese pe yeroyasa aviye vahe inungar ore. Esepia, yande Yar Tüpa, yande Písirosar Jesucristo seco ñvi vahe yuvirecoi. <sup>2</sup>Tapeipisi catu porovasasa iyavei teco tuprisa Tüpa, yande Yar Jesús cua tupri pipe.

**Jesús reroyasar recocuer**

<sup>3</sup>Tüpa ombou güeco pīrata pipe opacatu mbahe ipane vahe yande recove āgua, sese yande pihañemoñeta catu āgua avei yande secocuer cua tupri pipe. Ahe yande poravo güeco porañetesa pipe, güembiapo porañete vahe pipe avei. <sup>4</sup>Ipīpe avei oseya oñehe imboaviyepirā yandeu; ahe ñehe ēgüe ndehi tēi vahe, aviye catu vahe ité. Co yandeu ñehesa pipe sui percora Tüpa reco aviye vahe peyese pe yepēpi āgua mbahe tēi sui. Ahe acoi oime vahe co ñvi pipe ava remimbotar tēi sui. <sup>5</sup>Sese pe peyeroya vahe Jesús rese, peyemomirata catu aveira peyapo vahērā mbahe aviye vahe. Peseca aveira Tüpa remimbotar cua tupri catu āgua. <sup>6</sup>Iyavei peñearo tuprira. Ipāre peñemosañe aveira mbahe tēi upe. Ipīpe sui peyemondo tupri catura Tüpa upe. <sup>7</sup>Ipāre peyeaisura peyeivri nungar pe recosa pipe. Ipīpe sui peseca catu vītera ava raisu tupri āgua.

<sup>8</sup>Esepia, perecose evocoi nungar mbahe pe recocuer pipe, pembouvicha catuse avei, ahese pe recocuer ēgüe

ndehi tēi chira, peicua tupri catu aveira yande Yar Jesucristo. <sup>9</sup>Acoi ndovirecoi vahe rumo evocoi nungar mbahe oyese, ahe oyeapo inungar ndasesapisoi vahe, anise mbahe ndosepia tupri vahe, sesaraiño oangaipa rese ñero agüer sui. <sup>10</sup>Sese che rivireta, peyemoviracua catu Tüpa pe renoisa mboyecua āgua iporavopri pe recosave. ēgüe peyese, ndapeviapi chīetera mbahe tēi pipe. <sup>11</sup>Evocoi nungar pipe sui pe piši tuprira omborerecuasa ndopai vahe pipe yande Yar, yande Písirosar Jesucristo.

<sup>12</sup>Sese niha opomomahenduhaño itera evocoi nungar mbahe rese, yepe peicua, peicoveño avei mbahe supi tupri vahe rese. <sup>13</sup>Aviyeño itera revo che recove vīteseve opomomahenduha vīte co aracuasa rese. <sup>14</sup>Esepia, yande Yar Jesucristo oicua uca cōimi che mano āgua cheu. <sup>15</sup>Opombohera rumo opacatu che catugüer rupi co tecocuer rese che manore pe mahenduha āgua.

**Co osepia vahe ité Jesús  
mborerecuasa yuvireco**

<sup>16</sup>Co porombohesa oromombehu vahe pëu yande Yar pīratasa resendar, iyēvi iri āgua resendar avei, ndaheī oreyesui tēi. Ore rumo orosepia vahe ité ore resa pipe yande Yar mborerecuasa. <sup>17</sup>Orosepia niha yande Ru Tüpa omboeteise Guahir iyavei omondose chupe seco porañete iri āgua aipo ehise oñehe güeco porañetesa pipe: “Co che Rahir, che rembiaisu ité, sese niha che ayemboviharete vichico” ehise. <sup>18</sup>Ore ité niha aipo ñehesa orosendu iva suindar oroicose yande Yar rupi ivitri imboeteipri vahesave.

<sup>19</sup>Ahe ñehesa omboyecua catu ñehesa aracahendar Tüpa ñehe mombehusar remimombehugüer supi tupri vahe Cristo resendar. Iya ité pëu pe yapisaca tupri āgua sese; inungar que tataendi pītusave osesape vahe oico acoi osēse

voi cõhe rerusar yasitata guasu ou, ãgüe ehi co ñehesa pe piha pipe sesape. <sup>20</sup>Peicua catu co mbahe, co ñehesa aracadendar icuachiapri Tüpa suindar ité, ndahei yandeyesui tõi yaicua imombehu água. <sup>21</sup>Esepia, ndahei ñehe mombehusar oyesui tõi omombehu yuvireco. Ahe rumo ava seco catupri vahe ité. Tüpa ité omombehu uca õñehe chupe Espíritu Santo píratasa pipe aracahe.

### Oporombopa vahe porombohesa

**2** Yuvirecove rumo aracahe porombohesar oporombopa tõi vahe Israel ivi rupi. Oime aveira niha pe pãhuve co nungar oporombopa tõi vahe yuvireco. Ahe ñemisa pipe oporombohera co coti tõi vahe ava reco momara tõi água; evocoiya güeco pipe oicuacuñora oyar opísirosar. Co rumo güecocuer momba pihaivi água tõi ãgüe ehira yuvireco. <sup>2</sup>Setá ava oguatara secocuerai rupi. Ipípe sui ambuae ava õñehe rai tẽira porombohesa supi tupri vahe rese yuvireco. <sup>3</sup>Mbahe pota raisa pipe pe mbopara yuvireco co porombohesa co coti tõi vahe rese. Icañi rumo oimeño itera yuvireco chupe. Yipisuive ité niha ahe imocañipirã yuvirecoi.

<sup>4</sup>Esepia, aracahe Tüpa niñeroi eté güembiguai oyemboangaipa vahe upe. Ahe opa ité omondo mbahe tẽisave. ãgüe ehi seyapa pĩtumimbisave, inungar ñapichimbrĩ carena pipe yapocatupri yuvireco cañisave nara. <sup>5</sup>Iyavei acoi Tüpa niñeroi avei ava aracadendar ndaseco põrai vahe ivi pipe yuvirecoi vahe upe. Omocañi ité amarusu pipe ahe ava yuvireco. Noé acoi omombehu vahe tecocuer ihĩvi vahe resendar iyavei ava siete yuvirecoi vahe supindar, ahe güeraño ité oipísiro. <sup>6</sup>Iyavei opa omocañi tata pipe tecua Sodoma, Gomorra avei; ãgüe ehi imbotanimbu tupri ‘na ahe aveira niha ambuae ava che reroy-

aẽhisar upe curi’ ohesave. <sup>7</sup>Lot güeraño rumo ahesa oipísiro. Ahe mbia aviye vahe secocuer; ndoyembovĩhai tõi ambuae ava recocuer mbahe-mbahe tõi yuvirecoi vahe repiase.

<sup>8</sup>Co mbia aviye vahe secoise ahe ava pãhuve ari rupi, tasi tõi ipihañemoñeta pipe osepiase, osenduse avei mbahe tõi yuvirecoi vahe rembiapo. <sup>9</sup>Indó, yande Yar oicua viroyasar renose água mbahe tõi sui; oicua avei mbahe tõi pipe yuvirecoi vahe rereco imombaraisu água ari cañise curi. <sup>10</sup>Tüpa omombaraisu catu itera acoi ndopoi vahe güemimbotarai sui, viroĩro vahe yande Yar mborerecuasa, oyecomboivate ai vahe güemimbotar aposa pipe, acoi osiquiyeeñhisa pipe õñehe rai vahe seco ivate, ipĩrata vahe rese. <sup>11</sup>Tüpa rembiguai eta iva pendar rumo yepe ipĩrata catu vahe, omborerecuasa vireco catu vahe avei yuvireco viña, niñehe-ñehe tõi rumo Yar rovai yuvireco sese.

<sup>12</sup>Co ava mbahe mimba nungar tõi ndovirecoimi eté opihañemoñetasa yuvireco. Opoco voiño tõi mbahe rese; evocoi nungar yuviroha yucapirã tõi eté. Ahe õñehe rai tõi vahe mbahe güemienducuaẽhi rese. Mbahe mimba nungar tupri avei rumo omanora yuvireco güecocuerai pipe. <sup>13</sup>Oyemombaraisu uca ambuae ava mombaraisusa pipe sui tõi, “Yayembovĩha mbahe yande rembiapo ai rese” ehi tõi eté yuvireco viña. ¡Oporomochi pipe tõi rumo yuvirecoi, yuviraose pe pietasave pe piri, güeco rai reseve oyembovĩha oporombopasa tõi pipe yuvireco!

<sup>14</sup>Osepiase cuña, oipota voiño tõi; ndaporambai avei iyemboangaipasa chupe. “Yayapoño mbahe” ehiño ndoyembohe catui vahe upe. Evocoi nungar oyembohe-mbohe catu mbahe pota raisa reca água oyeupe yuvireco. Ava ocañi tõi vaherã yuvirecoi. <sup>15</sup>Ocañi tõi secocuer yuvireco Tüpa

ñehe mombehusar Beor rahir Balaam recocuerai nungar pipe. Esepia, oyepepi tecocuer aviye vahe sui mbahe tēi apo āgua guarepochi pota raisa pipe yuvireco. <sup>16</sup>Tūpa rumo oyaca yangaipa rese guaricu omoñehe ucase ava ñehe pipe chupe. Ahese ramo opoi oaracuaēhisa sui.

<sup>17</sup>Co ava oporombohe vahe inungar ivicuar ipiru vahe. Iva quiha ivitu remimombo nungar tēi avei. Apirēhi vahe itē imombopirā yuvireco pītumimbi catu vahesave nara. <sup>18</sup>Esepia, oñehe tupri ai angahu tēi ava monguerēhi āgua ava pihañemoñeta raisa rupi seroyevi āgua. Ipipe sui ombopa tēi ahe ava seco catupri pota vahe yuvireco evocoi nungar mbahe tēi pipe iyeve iri āgua. <sup>19</sup>“Opacatu mbahe apo yaicatu yande reco pipe” ehi tēi yuvireco. Ahe ae rumo mbiguai tēi nungar yuvirecoi güecocuerai apo pipe. Esepia, noyuvinose catui eté ichui. Supi eté, yayapoño itese que mbahe tēi, ahe evocoyase mbiguai nungar ité yande rereco uca. <sup>20</sup>Esepia, acoi oicua vahe yande Yar, yande Pīsīrosar Jesucristo yuvireco, ipipe oyepepi co ivi pipendar mbahe mbahe tēi sui, oyeiti uca irise rumo co nungar mbahe tēi pipe, ichui ndoicatu iri yuvinose. Ipare mbahe tēi catu yipindar secocuer sui yuvireco chupe. <sup>21</sup>Oyeupe Tūpa porocuita imondopri aviye vahe cua pare oyepepise ichui, aviye catura revo ndoicuaise co tecocuer ihīvi vahe yuvireco viña. <sup>22</sup>Supi tupri ité yaviye ñehesa sesendar: “Cave rumo ohu iri ogüēhe. Iyavei cuchi oyasu pare, oyeve iri tuyuve oyemboavaete āgua” ehi vahe.

### Yande Yar yevisa

**3** Che rivireta, che rembiaisu, co aicuachía iri che ñehe pēu. Ipipe opomopihañemoñeta tupri uca pota che pe mboaracuasa pipe. <sup>2</sup>Peyemomahenduha aracahendar Tūpa ñehe mombe-

husar seco catupri vahe ñehengagüer rese, yande Yar Poropīsīrosar porocuita rese avei acoi apóstol pe mbohe vahecuer yuvireco.

<sup>3</sup>Peicua ranera co ari imombehupri ipa vahe virovise, oimera ava ahe oviroirora co tecocuer aviye vahe Tūpa suindar güemimbotarai pipe yuvireco <sup>4</sup>aipo ehira, “¿Marase tēi vo aipo oura Tūpa Rembiporavo imombehupri ou va herā curi? Esepia, yande ramo i opa tēi omano yuvireco. Cūrítei opacatu ahe tupriño tēi tecocuer aracahe ivi apo suive” ehi tēira yuvireco. <sup>5</sup>Ahe nima-henduha potai yuvireco co aracahendar rese. Esepia, Tūpa oyapo oñehe pipe iva, ivi avei, ahe ivi osē vahe i sui, i pāhuve avei secoi. <sup>6</sup>Coipe i pipe avei opa omocañi ivi, ombouse amarusu aracahe. <sup>7</sup>Cūríteindar rumo iva, ivi imoingatupri tata uve nara Tūpa porocuita rupi. Evocoi tata pipe avei ocañi tēira ava mbahe tēi aposar yuvirecoi vahe curi.

<sup>8</sup>Che rivireta, che rembiaisu, pearsarai rene co mbahe sui: yande Yar upe ñepei ari inungar mil araviter; mil araviter evocoyase inungar ñepei arimi tēi chupe. <sup>9</sup>Esepia, yande Yar ndiaracachei eté oñehe mboaviye āgua; inungar amove ava, “Iharacahe tēi” ehi yuvireco viña. Ahe rumo aviye etepri güeco mbegüesa pipe yandeu. Esepia, ndoipotai que ñepei yepe yande cañi tēi āgua; ahe rumo oipota opacatú tupri ité yande recocuer ñecuñaro āgua.

<sup>10</sup>Yande Yar ari yande resapiha tēira inungar imonda rai vahe ou pītu pipe yepi. Ahese iva ocañi tupri tēira viapugüer ipirata vahe pipe curi. Opacatu mbahe yapopri opara yuvirocai. Ipipe sui co ivi opacatu ipor reseve ocañi tēi etera.

<sup>11</sup>Opacatu ité niha co mbahe yapopri ocañi tēi va herā. Sese, ipeyemoviracuaño itera pe reco maranehisa rese Tūpa rese pe



pihañemoñetasa pipe! <sup>12</sup>Pesãroño Tūpa yepotasa resendar ari, iyavei peyapo opacatu peicatugüer rupi ‘toyepota poyava voi’ pe yapave. Ahe ari pipe iva opara ocañi tēi eté tata pipe. Ipipe sui opacatu mbahe yapopri ticupa tuprira curi. <sup>13</sup>Yande rumo yasãro ité iva, ivi ipiasu vahe Tūpa remimombehu. Aheve opacatu ava yuvirecoira güeco aviyesa pipe.

<sup>14</sup>Sese che rembiaisu, pesãro vite-seve co tecocuer, ěgüe peyera opacatu peicatugüer rupi pe reco tupri āgua pe angaipāhi pipe, pēu Tūpa, “Peyavi mbahe” ehiēhi āgua. <sup>15</sup>Tapeicua co: yande Yar seco mbegüe yandeu yande pĩsiro āgua. Ěgüe ehi avei yande rembiaisu Pablo icuachía oyeupe Tūpa ombou vahe mbahecuaasa pipe pēu. <sup>16</sup>Opacatu

ocuachiar pipe omombehu evocoi nungar mbahe pēu, yepe amove yavai senducua āgua yuvireco viña. Sese amove ndoyemoviracua tuprii vahe yande Yar rese iyavei ndoyemboaracua tuprii vahe, ahe co coti tēi virova ñehesa, inungar oyapo ambuae ñehesa icuachiapri Tūpa suindar rese. Ipipe güecocuer omocañi tēi ahe.

<sup>17</sup>Che rivri, che rembiaisu, peicua ité niha evocoi mbahe; sese peñearo tuprira pe yembopa ucaēhi āgua ava ndiporeroyai vahe upe Tūpa rese pe recocuer yemoviracuasa sui pe yepepiēhi āgua. <sup>18</sup>Peicua tupri catura rumo yande Yar Poropĩsirosar Jesucristo iyavei peicoveño itera iporovasasa pipe. ¡Ěgüe tehi imboeteipri tasecoi cūrítei apirēhi vaherã! Aipo rupive che ñehe pēu.

*JUAN REMBICUACHIA  
YPINDAR VAHE*

**SAN JUAN**

**Ñehesa tecovesa resendar**

**1** Co cuachiar pipe oromombehu pëu co yipisuive secói vahe. Ahe orosendu, orosepia avei ore resa pipe ité iyavei oropoco ité sese. Ahe niha Tüpa Ñehesa tecovesa resendar. <sup>2</sup>Co tecovesa oyemboyecua, orosepia iyavei ahe secocuer oromombehu. Ahe tecovesa apirëhi oromombehu vahe pëu. Ahe Vu rese secói vahe oyemboyecua vahe oreu. <sup>3</sup>Oromombehu co orosepia vahe, orosendu vahe ñepeí vahe nungar pe reco água ore rese inungar ore oroico yande Ru Tüpa rese, Tahir Jesucristo rese avei. <sup>4</sup>Evocoyase cüritei oroicuachía evocói mbahe pëu yande yembovîharete catu água.

**Tüpa tesapesa secói**

<sup>5</sup>Iyavei Jesucristo ore mbohe co ñehesa rese, ahe oromombehu pëu: yande Ru Tüpa niha tesapesa secói; ndipoi eté pîtumimbisa sese. <sup>6</sup>“Che aico tupri Tüpa rese” yahese, yaicoño rumo angaipa pipe, ahe inungar pîtumimbi vahe, ahese yande remira tēi iyavei ndayayapoi mbahe supi tupri vahe. <sup>7</sup>Yaicose rumo tesapesa pipe inungar yande Ru Tüpa secói tesapesa, evocoyase yaico tuprîra yandeyupe. Iyavei suví yande moatiro opacatu angaipa sui.

<sup>8</sup>Iyavei, “Ndarecoi angaipa che piha pipe” vahe tēise, yande ae yayembopa ipipe. Evocoyase mbahe supi eté vahe ndayarecoi yandeyese. <sup>9</sup>Acoi yamombehuse yande angaipagüer Tüpa upe, ahese ahe omboura oñeroisa yande angaipa rese yandeu iyavei omoatîrora opacatu mbahe-mbahe tēi yande sui. Esepia, ahe

seco ïvi vahe. <sup>10</sup>Iyavei, “Che ndacheangaipai eté” vahe tupri tēise yaico, evocoyase Tüpa semirañete ai vahe nungar yareco. Ipipe ndayaroyai ñehengagüer.

**Jesucristo yande reco moingatusar**

**2** Che rahireta, co aicuachía pëu pe angaipañi água. Que revo ava oime oyemboangaipa vahe pe pâhuvé, yareco rumo yande Pîtiviisar yande Ru rovai. Ahe Jesucristo, seco ïvi vahe. <sup>2</sup>Ichui oime avei ñeroisa yande angaipa rese yandeu iyavei opacatu ava uve. Esepia, ahe omano curusu rese yande angaipa mocañi água yande sui.

<sup>3</sup>Acoi yayapo tuprise Tüpa porocuita, ahese supi eté yaicua Tüpa. <sup>4</sup>Oime amove ava “che aicua Tüpa” ehi vahe; nomboaviyei rumo iporocuita. Ahe semirañete ai vahe, ndovirecoi mbahe supi tupri vahe oyese. <sup>5</sup>Acoi yamboaviyese ñehengagüer, ahese supi eté yasaisu Tüpa. Ipipe sui yaicua yande reco tupri Jesucristo rese. <sup>6</sup>Acoi “aico tupri Tüpa rese” ehi vahe, ahe secoira Jesucristo nungar.

**Mborocuita ipiasu vahe resendar**

<sup>7</sup>Iyavei, che rivireta, ndaicuachiai mborocuita ambuae ipiasu vahe pëu. Aheño ité mborocuita pereco vahe yipisuive. Ahe acoi yipîndar pesendu vahe. <sup>8</sup>Co aicuachía vahe rumo ogüeru mborocuita ipiasu vahe. Ahe supi eté tesapesa Jesucristo vireco vahe iyavei pereco vahe avei. Esepia, pîtumimbi opara. Tesapesa evocoyase osesape.

<sup>9</sup>Oime amove ava “che aico tesapesave” ehi angahu tēi vahe; oyamotarëhiño rumo ambuae omboetasa Tüpa reroyasar. Evocói nungar recocuer pîtumimbisave tēi vite. <sup>10</sup>Acoi osaisu vahe ambuae omboetasa Tüpa reroyasar, ahe secói tesapesave. Sese nomboangaipa ucai omboetasa. <sup>11</sup>Acoi ndoyambotai vahe omboetasa, pîtumimbisa pipe tēi

secoi, ndoicuai avei que rupi güecocuer virecora. Esepia, pītumimbi vahe nomboesapisoi.

<sup>12</sup> Che rahireta, co aicuachía pēu nara. Esepia, Tūpa iñero pe angaipa rese pēu Jesucristo recocuer pipe. <sup>13</sup> Pe, yesupa peico vahe upe co aicuachía. Esepia, peicua yipisuive oicove vahe. Aicuachía avei pēu, mbia chíhivahe. Esepia, pesecopi Car guar. <sup>14</sup> Iyavei pe tahireta aicuachía opacatu pēu. Esepia, peicua vahe niha yande Ru Tūpa. Aicuachía avei pēu, pe iyesupa. Esepia, peicua yipisuive oicove vahe. Aicuachía avei pēu, mbia chíhivahe. Esepia, peyemoviracua etepri, peipisi avei Tūpa Ñehengagüer pe piha pipe. Ipípe pesecopi Car guar.

<sup>15</sup> Evocoyase pesaisu eme co mbahe tēi ivi pipendar. Acoi ava co mbahe tēi osaisu vahe, ahe ndosaisui yande Ru Tūpa yuvireco. <sup>16</sup> Esepia, opacatu co mbahe tēi ndahei yande Ru Tūpa suindar; ahe rumo co ivi pipendar suindar. Ahe niha opacatu yande pihañemoñeta raisa, yaipota vahe sese yamahese, iyavei opacatu yande rembiereco rese yande yemboivate ai tēisa. <sup>17</sup> Co ivi pipendar mbahe tēi iyavei ava mbahe pota raisa opa pota ité ocañi. Acoi ava oyapo vahe rumo Tūpa remimbotar, yuvirecoira apirēhi vahe ité.

### Mbahe supi eté vahe iyavei mbahe ndahei vahe supi

<sup>18</sup> Che rahireta, co ari ipa vahe ité yandeu. Iyavei acoi pesendu “oura Jesucristo amotarēhimbar” ehi vahe, ahe cūrítei setá oyemboyecua yamotarēhimbar yuvireco. Sese yaicua ari ipa vahe yepota água. <sup>19</sup> Ahe oyepipi yande pāhu sui; ndahei eté rumo yande rivri yuvireco Tūpa rese. Esepia, acoi yande rivri itese, ahese opítara yande piri yuvireco viña. Ēgüe ehi oyecua ndahei opacatu yande rivri yuvirecoi.

<sup>20</sup> Cristo omondo Espiritu Santo pēu. Sese opacatu pe peicua mbahe supi tupri vahe. <sup>21</sup> Pe niha peicua co mbahe supi eté vahe. Sese aicuachía co pēu. Esepia, mbahe supi eté vahe sui ndoui temira. <sup>22</sup> Acoi “Jesús ndahei Poropīsiosar imboupri” ehi vahe, ahe semira tēi vahe, yamotarēhimbar yuvirecoi. Ahe niha ndoviroyai Tu, Tahir avei yuvireco. <sup>23</sup> Acoi ava “evocoi ndahei Tūpa Rahir” ehi vahe, ndovirecoi Tu oyese yuvireco. Acoi “evocoi niha Tūpa rahir” ehi vahe rumo, ahe vireco yande Ru Tūpa oyese yuvireco.

<sup>24</sup> Sese yipisuive pesendu vahe ñehesa peyapocatu pe piha pipe. Ēgüe peyese, ahese peico tupriira Jesucristo rese, Tu rese avei. <sup>25</sup> Esepia, Jesucristo aipo ehi: “Pe perecora co tecovesa apirēhi vahe peyese” ehi yandeu.

<sup>26</sup> Sese co ava pembopa pota vahe re-sendar aicuachía pēu. <sup>27</sup> Pe pereco Espiritu Santo Jesucristo ombou vahe pēu. Sese ndiyai eté ambuae pe mbohera. Espiritu ae pe mbohe opacatu mbahe rese oico. Iporombohesa supi eté, ndoporombopai vahe. Sese peicoño Jesucristo rese Espiritu Santo pe mbohesa rupi.

<sup>28</sup> Iyavei che rahireta, peicoño ité Cristo rese yareco vahe ité vahe yandeu. Acoi ogüeyise iva sui curi, ahese nayachī chietera sovai ichui. <sup>29</sup> Pe niha peicua Jesucristo seco ivi vahe. Iya peicua avei opacatu oyapo vahe mbahe ihivi vahe, ahe Tūpa rahir ité yuvirecoi.

### Tūpa rahir yuvirecoi vahe

**3** Mara ehi rutei Tūpa yande raisu. Ahe aipo ehi yandeu: “Pe niha che rahireta peico” ehi, ahe supi eté aipo ehi. Sese niha co ava ndoviroyai vahe Tūpa, ndoicatui eté yande recocuer cua água. Esepia, ndoicuai Tūpa recocuer yuvireco. <sup>2</sup> Che rivireta, yaico ité Tūpa rahir. Yande rumo ndayaicua tupri vitei yande reco água ipare. Cūrítei

rumo co mbahe yaicua: acoi oyemboye-  
cuase Jesucristo, yaicora inungar. Es-  
epia, yasepia itera opacatu seco reseve.  
<sup>3</sup>Iyavei opacatu osāro vahe Jesucristo  
yuvireco, oyepepiño ité opacatu angaipa  
sui güeco catupri āgua, inungar ahe  
secoi.

<sup>4</sup>Opacatu ava oyemboangaipa vahe,  
ahe oyavi Tūpa porocuaita. Esepia, an-  
gaipa Tūpa porocuaita mboaviyeēhisa  
yepi. <sup>5</sup>Pe rumo peicua Jesucristo ou  
co ivi pipe yande angaipagüer mocañi  
āgua. Ahe niha ndovirecoi eté angaipa  
oyese. <sup>6</sup>Opacatu ava sese yuvirecoi vahe  
ndoyapoi angaipa. Acoi ava yangaipa  
vahe rumo ndosepai, ndoicuai avei sec-  
ocuer yuvireco. <sup>7</sup>Che rahireta, peyem-  
bopa uca eme ambuae ava upe, acoi  
oyapo vahe mbahe aviye vahe yepi,  
ahe secocuer aviye vahe ité inungar  
Jesucristo. <sup>8</sup>Acoi oyapo vahe angaipa,  
ahe Carugar suindar. Esepia, Carugar  
yipisuiwe ité oyapo angaipa. Sese ou  
Tūpa Rahir Carugar rembiapo mo-  
cañipa āgua.

<sup>9</sup>Opacatu yuvirecoi vahe Tūpa rese  
ndoyapoi angaipa. Esepia, ahe vireco  
ité Tūpa recocuer oyese yuvireco. Sese  
ndoicatu iri angaipa apo āgua yu-  
vireco. Esepia, ahe Tūpa rahir ité yu-  
virecoi. <sup>10</sup>Icuapri ité Tūpa rahir yu-  
vireco, icuapri avei Carugar rahir yu-  
virecoi vahe. Esepia, acoi ndoyapoi vahe  
mbahe tupri iyavei ndosaisui vahe Tūpa  
reroyasar, ahe ndahei eté Tūpa rahir  
yuvirecoi.

### Yayeaisura ñepei-pei yande yacatu

<sup>11</sup>Co niha ñehesa, acoi pesendu vahe  
yipisuiwe, ahe co yayeaisura ñepei-pei.  
<sup>12</sup>Ndayaicoi chira inungar Cañ, ahe  
Carugar remimbohe oyuca vivri. ¿Ma-  
hera piha oyuca? Esepia, tivri oyapo  
mbahe aviye vahe; Cañ rumo oyapo  
mbahe naporai vahe.

<sup>13</sup>Che rivireta, pepihañemoñetai rene  
Tūpa ndoicuai vahe pe roeroïrose yu-  
vireco. <sup>14</sup>Yande rumo yaicua aracacon-  
dar yande hā cañi tēi agüer. Cūrítei rumo  
yasē evocoi nungar sui tecovesa apirēhi  
vahe pipe yande reco āgua. Esepia,  
yande niha yasaisu yande rivireta Tūpa  
rese yuvirecoi vahe. Acoi ndosaisui vahe  
rumo ahe ihā ocañi tēi vite ité yuvireco.  
<sup>15</sup>Opacatu ava ndoyambotai vahe yande  
rivri, ahe iporapichi serai vahe nun-  
gar. Pe rumo peicua ava iporapichi serai  
vahe ndovirecoi tecovesa apirēhi vahe  
oyese. <sup>16</sup>Jesucristo niha omondo güe-  
cocuer manosave yande recocuer repirā.  
Ichui yande yaicua poroaisusa. Sese  
yande avei ēgüe tayahe yande rivireta  
rese. <sup>17</sup>Acoi ava vireco tēi vahe mbahe  
eta oyeupe nara, osepiaño tēi rumo  
vivri upe mbahe ipane vahe, iyavei  
ndoipitivii, ahe ndovirecoi Tūpa poroi-  
susa oyese yuvireco. <sup>18</sup>Che rahireta,  
yande poroaisusa rumo ndahei chira  
yande ñehe pipe tēi, iyacatu rumo yam-  
boyecua mbahe yande rembiapo pipe.

### Yande yeroyasa yareco vahe Tūpa rovai

<sup>19-20</sup>Ēgüe yahese, yande yaicua yande  
recocuer supi eté vahe pipe yaico. Acoi,  
“Ndahei revo Tūpa rahir aico” yah-  
ese, ahese Tūpa rovaque yayemoma-  
henduhara evocoi nungar rese: “Tūpa  
niha tuvichá catu yande pihañemoñe-  
tasa sui. Ahe opacatu mbahe oicua.”  
Sese yayeroyara. <sup>21</sup>Supi eté che rivireta,  
yaicua itese yande piha pipe yande  
reco tupri Tūpa rese, ahese yayeroy-  
año itera sovai. <sup>22</sup>Ahe avei niha ombou  
opacatu mbahe yandeu yaporanduse  
chupe. Esepia, yamboyeroya iporocuaita  
iyavei yayapo semimbotar yaico. <sup>23</sup>Co  
ité iporocuaita: yaroyara Tahir Jesu-  
cristo iyavei yayeaisura ñepei-pei Tūpa  
yande cuaisa rupi tupri. <sup>24</sup>Acoi yaroy-  
ase iporocuaita, ahese yaicora Tūpa rese;

ahe avei secoira yande rese. Iyavei ahe ombou Espíritu yandeu. Ichui yaicua Tūpa secoi yande rese.

### **Espíritu Tūpa suindar iyavei espíritu Cristo amotarēhimbar**

**4** Che rahireta, aní chira peroya opacatu “Espíritu pipe añehe” ehi vahe. Iyacatu rumo pesāha rane ‘¿Tūpa suindar ité piha?’ pe hesa pipe. Esepia, setá vai oporombohe angahu tēi vahe oguata opacatu ivi rupi yuvireco. <sup>2</sup> Co rese peicuara ava Espíritu Tūpa suindar vireco vahe: “Jesucristo ou opacatu güete reseve” ehise, aipo ehi vahe vireco Espíritu Tūpa suindar ité. <sup>3</sup> Acoi aipo ndehi vahe rumo, ndovirecoi eté Espíritu Tūpa suindar oyese. Ahe rumo vireco espíritu Cristo amotarēhimbar tēi. Aracaco niha pesendu ñehesa acoi yamotarēhisar espíritu ou vaherā resendar. Ahe cūrítei secoi co ivi pipe.

<sup>4</sup> Che rahireta, pe rumo Tūpa suindar peico. Iyavei pesecopi ité acoi semira tēi vahe peico. Esepia, Espíritu secoi vahe pe rese, ahe ipírata catu Carugar sui. <sup>5</sup> Evocoi co ivi pipendar tēi yuvirecoi vahe. Esepia, oñehe mbahe ivi pipendar rese tēi yuvireco. Iyavei ava supindar ae ité oyapisaca ñehe rese yuvireco. <sup>6</sup> Yande rumo Tūpa suindar yaico. Acoi oicua vahe Tūpa oyapisaca yande ñehe rese yuvireco. Acoi ndahei vahe Tūpa rahir, ahe yande ñehe ndosendu potai yuvireco. Sese yande yaicuara vireco vahe Espíritu supi eté vahe, yaicua aveira vireco vahe espíritu oporombopa tēi vahe.

### **Tūpa oporoaisu vahe**

<sup>7</sup> Che rivireta, che rembiaisu, yayeaisu ñepeipei. Esepia, yeaisusa Tūpa suindar. Opacatu osaisu vahe ava, ahe Tūpa rahir, oicua ité avei Tūpa yuvireco. <sup>8</sup> Acoi ndosaisui vahe ava, ahe ndoicuai Tūpa yuvireco. Esepia, Tūpa yeaisusa

secoi. <sup>9</sup> Ēgüe ehi omboyecua oporoaisusa yandeu. Ahe niha, ombou Guahir ñepeipei vahe co ivi pipe ichui yande recove āgua. <sup>10</sup> Ndahei yande rane yasaisu Tūpa. Ahe rane rumo yande raisu iyavei ombou Guahir imano āgua yande angaipa repirā. Ahe niha poroaisusa supi eté vahe.

<sup>11</sup> Che rivireta, che rembiaisu, ēgüe ehi Tūpa yande raisu. Evocoyase ēgüe yahe aveira yande yayeaisu ñepeipei yepi. <sup>12</sup> Ndipoi eté ava osepia vahe Tūpa. Yayeaisuse rumo, Tūpa secoi yande rese. Iporoaisusa evocoyase oime ité yande rese. <sup>13</sup> Ahe ombou oEspíritu yandeu; ipipe sui yaicua sese yande reco iyavei yaicua ahe secoise yande rese. <sup>14</sup> Iyavei orosepia vahe, oromobehu: yande Ru ombou Guahir ava ivi pipendar pīsiro āgua. <sup>15</sup> Acoi ava “Jesús niha Tūpa Rahir” ehi vahe, ahe secoi eté Tūpa rese; Tūpa evocoyase secoi sese.

<sup>16</sup> Ēgüe yahe icua, seroya tupri āgua co Tūpa yande raisusa. Ahe niha yeaisusa. Acoi vireco vahe oporoaisusa, yuvirecoi avei sese; ahe avei secoi sese. <sup>17</sup> Ēgüe yahe Tūpa poroaisusa mboaviye tupri ichui yande siquiyeehi āgua acoi oyepotase ari cañi yandeu. Esepia, yande yaico co ivi pipe inungar Jesucristo. <sup>18</sup> Yasaisu tupri itese Tūpa, ndipoi chira siquiyesa yandeu. Ēgüe yahese, opara siquiyesa yande sui. Esepia, cañisa sui oime siquiyesa yandeu. Sese acoi ava osiquiye ai vahe, ndoporoaisu tuprii eté.

<sup>19</sup> Yipindar Tūpa yande raisu. Sese cūrítei yande avei yasaisu Tūpa. <sup>20</sup> Amove ava aipo ehi tēi: “Che asaisu Tūpa” ehi. Ahe ramoseve rumo viroiro omboetasa Tūpa reroyasar. Evocoyase ahe semira tēi vahe. Esepia, acoi ndosaisui vahe omboetasa Tūpa reroyasar sepiase, ndoicuai Tūpa ndayasepiai vahe raisu āgua. <sup>21</sup> Jesucristo ombou co porocuaita

yandeu: acoi osaisu vahe Tūpa, tosaису avei omboetasa seroyasar yuvireco.

**Yande mbahe-mbahe tēi co  
ivi pipendar recopisa**

**5** Opacatu viroya vahe Jesús Tūpa Rembiporavo Poropīsīrosar seco rese, ahe Tūpa rahir yuvirecoi. Iyavei osaisu vahe ava, osaisu avei tahir yuvireco. <sup>2</sup>Yande yasaisuse Tūpa, yayapose avei iporocuaita, ahese yaicua yasaisu avei ava Tūpa rahir yuvirecoi vahe. <sup>3</sup>Yamboaviyese Tūpa porocuaita, ahese yamboyecua Tūpa raīsusa yaico. Iyavei iporocuaita ndahei yavai etepri yapo āgua. <sup>4</sup>Esepia, opacatu Tūpa rahir yuvirecoi vahe osecopī mbahe-mbahe tēi ivi pipendar Cristo rese yeroyasa pipe yuvireco. <sup>5</sup>Acoi oyeroya vahe Jesucristo Tūpa Rahir secosa rese, ahe oicatu co ivi pipendar mbahe-mbahe tēi recopī āgua yuvireco.

**Tūpa rahir recouer resendar ñehesa**

<sup>6</sup>Co Jesucristo yusa icuasa i pipe ñapiramombrise: ndahei i reseño, suvi rese avei icuasa. Espīritu avei oseco mombehu. Esepia, ahe omombehu mbahe supi eté vahe yepi. <sup>7</sup>Evocoyase oime mbosapī imboyecuar: <sup>8</sup>Espīritu, i, iyavei suvi. Ahe mbosapī oyoya tupri. <sup>9</sup>Yaroya revo ava remimombehu; Tūpa remimombehu rumo aviye catu vahe ité ichui. Esepia niha, ahe Guahir omombehu. <sup>10</sup>Acoi viroya vahe Tūpa Rahir vireco ité ahe semimombehu opīha pipe. Acoi ndoviroyai vahe rumo Tūpa, semirañete ai vahe nungar tēi vireco. Esepia, ndoviroyai Tūpa ñehē Tahir resendar. <sup>11</sup>Co Tūpa remimombehu: ahe ombou yandeu

tecovesa apirēhi vahe. Co tecovesa Tahir rese secoi. <sup>12</sup>Acoi oipīsi vahe Tūpa Rahir opīha pipe, ahe vireco avei co tecovesa. Acoi ndoipīsī vahe rumo, ndovirecoi eté tecovesa oyese.

**Poromboaracuasa ipa vahe**

<sup>13</sup>Co aicuachía pēu, pe pereco vahe Tūpa Rahir, peicua āgua pe supi eté pereco tecovesa apirēhi.

<sup>14</sup>Yande rumo yayeroya co rese: yaporanduse mbahe rese Tūpa remimbotar rupi chupe, ahese ahe yande ñehē osendu. <sup>15</sup>Evocoyase yaicua ahe osendu yande yeruresa, yaicua avei mbahe yande porandusa ombou vahe rā yandeu.

<sup>16</sup>Acoi osepia vahe yande mboetasa Tūpa reroyasar oyemboangaipa vahe, ahe rumo ndahei manosave nara, oyeroquirā sese. Evocoyase Tūpa omondora secove āgua chupe. Oime rumo angaipa ahe güeru manosa. Che, “Peyeroqui evocoi nungar angaipa rese” ndahei pēu. <sup>17</sup>Opacatu mbahe-mbahe tēi ahe angaipa. Oime rumo angaipa ndayande rerasoi vahe manosave.

<sup>18</sup>Yaicua Tūpa rahir ndoyapoi angaipa yuvireco. Esepia, Tahir osāro evocoi nungar. Ichui Carugar ndopocoi sese. <sup>19</sup>Sese yaicua yande Tūpa rahir yaico. Iyavei opacatu ava ndoviroyai vahe Tūpa, ahe Carugar povri pendar tēi yuvirecoi. <sup>20</sup>Iyavei yaicua Tūpa Rahir ogüeru oaracuasa yandeu Tūpa supi eté vahe cua āgua iyavei yaico co supi eté vahe rese. Ahe niha Tahir Jesucristo, ahe avei Tūpa supi eté vahe iyavei tecovesa apirēhi vahe. <sup>21</sup>Che rahireta, peñearo tupri tūpa angahu tēi sui. Aipo rupive co che ñehesa amombehu pēu.

*IMOÑUVIRIOSA JUAN  
REMBICUACHIA*

**SAN JUAN**

**Mbahe supi eté vahe iyavei yeaisusa**

**1** Che, icuapri, aicuachía co che ñehe pëu pe Tüpa rembiporavo peico vahe opacatu eipeve peico vahe upe. Che niha supi eté opoaisu. Ndahei rumo che güeraño opoaisu, opacatu oicua vahe porombohesa supi eté vahe avei pe raisu yuvireco. <sup>2</sup>Opoaisu ité mbahe supi eté vahe yande piha pipe yareco vahe rese. Ahe ndopai chivaherã ité. <sup>3</sup>Yande Ru Tüpa, yande Yar Jesucristo, Tüpa Rahir, tombou oporovasasa, oporoparisuerecosa pëu nara. Tombou avei güeco tuprisa, güeco supi eté vahe pipe oporoaisusa pipe avei pëu.

<sup>4</sup>Che mboviharete aicuase pe pãhu pendar yuvirecoi vahe güecocuer aviyesa pipe. Esepia, ahe viroya porombohesa supi eté vahe yuvireco. Ahe niha yande Ru Tüpa porocuita yandeu. <sup>5</sup>Iyavei, che rivireta, che rembiaisu, tayayeaisu catu ñepeipei. Co aicuachía vahe ndahei porocuita ipiasu vahe. Ahe niha acoi yipindar icuachiapri pëu. <sup>6</sup>Co yande yeaisusa, yande guata tupri água Tüpa porocuita rupi. Co Tüpa porocuita yipisuive

pesendu vahe, ahe omombehu yande yeaisu tupri água yandeu.

**Iporombopa serai vahe resendar**

<sup>7</sup>Setá vai oguata ivi yacatu rupi oporombopa tēi vahe yuvireco. Ahe, “Jesucristo ou güete reseve” ndehi eté yuvireco. Ahe oporombopa tēi vahe Jesucristo amotarēhimbar yuvirecoi. <sup>8</sup>Peñearo catu pe poraviqui repri mocañi tēiēhi água. Tapeipisi catu opacatu Tüpa porerecosa peyeupe nara.

<sup>9</sup>Oime ava oyepipiño vahe Cristo porombohesa sui. Ahe Tüpa ndovirecoi opiha pipe yuvireco. Acoi oyapisaca tupri vahe Cristo porombohesa rese, ahe vireco Tüpa, Tahir avei oyese. <sup>10</sup>Acoi oyepotase ava oporombopa tēi vahe pëu, ndovirecoi vahe co porombohesa, ndapeipisii chira pe rētave. Iyavei ndapemboaviravei chiveira. <sup>11</sup>Acoi pemboaviravese, pe avei pehara sembiapo pipe.

**Ñehesa ipa vahe**

<sup>12</sup>Che niha amombehu pota setá mbahe pëu. Namombehu potai rumo cuachiar pipe. Che teieté aso pota pëu che ñehe água. Ahese yayemboviharetera oyese.

<sup>13</sup>Iyavei Tüpa rembiporavo oñemonuha vahe cohove opacatu omondo omahenduhasa yuvireco pëu. Aipo rupive co che ñehesa amondo pëu.

*IMOMBOSAPISA JUAN  
REMBICUACHIA*

**SAN JUAN**

**Gayo recocuer aviye vahe resendar**

**1** Che, icuairi, aicuachía co che ñehe ndeu, che mboripar, che rembiaisu, Gayo. Che supi eté oroisu yepi.

<sup>2</sup>Che rembiaisu, che rivri, cūrítei nde recocuer erereco tupri Tūpa rese. Che ayeroqui nde rese opacatu nde reco tupri āgua iyavei tipo eme mba-herasisa ndeu. <sup>3</sup>Che aviharete asenduse yande rivri ñehe nde recocuer resendar yugüeruse cohava. Ahe aipo ehi yuvireco cheu: “Evocoi Gayo oye-moviracua tupri mbahe supi eté vahe pipe” ehi yuvireco ndeu. <sup>4</sup>Ndipoi eté niha ambuae ñehesa asendu vahe che mboviharete catu vahe que che rahireta oguatase co porombohesa supi eté vahe rupi yuvireco.

<sup>5</sup>Che rivri, che rembiaisu, ereyapo tupri opacatu mbahe yande rivireta upe iyavei ambuae tecua pendar oye-pota vahe upe avei. <sup>6</sup>Ahe omombehu ore ñemonuhasave opacatu nde poroai-susa resendar yuvireco oreu. Eyapo catu mbahe icatupri vahe; eipītivii catu chupe mbahe ipane vahe rese iguataño āgua Tūpa remimbotar rupi yuvireco. <sup>7</sup>Esepia, ahe oguata yuvireco Jesucristo rer pipe. Ndoipisii eté rumo mbahe ipane vahe opītivii āgua yuvireco ava Tūpa reroyasarēhi sui. <sup>8</sup>Sese yande ēgüe ya-hera yaico evocoi nungar upe ñehesa supi eté vahe rese ipītivii āgua.

**Diótrefes recocuerai iyavei  
Demetrio recocuer aviyesa**

<sup>9</sup>Che aicuachía che ñehe eipeve Tūpa upe oñemonuha vahe upe cuese. Diótrefes rumo ndoviroyai ore mborerecuasa. Esepia, ahe oipota rai mborerecuar güeco āgua ipāhuve. <sup>10</sup>Evocoiyase asose eipeve, amboaracuara opacatu Tūpa viroya vahe rovai semiapo ai rese. Esepia, ahe oñehe-ñehe tēi ore rese, nda-hei ahe güeraño, ndoipisii potai avei güetave yande rivireta oye-pota vahe. Iyavei ndoipotai ambuae upe ipisi āgua sētave. Acoi oipisise, omombo voño ité ñemonuhasa sui. <sup>11</sup>Che rivri, che rembiaisu, ereicoi rene evocoi ava recocuer nungar. Ereicora rumo ava aviye vahe recocuer rupi. Esepia, oyapo vahe mbahe aviye vahe, ahe Tūpa suindar. Acoi oyapo vahe rumo mbahe naporai vahe, ahe ndoicuai vahe Tūpa.

<sup>12</sup>Opacatu, “Demetrio aviye ité” ehi yuvireco. Ahe supi eté aipo ehi; aipo avei ore oromombehu. Pe niha peicuaño ore oromombehu mbahe supi eté vahe.

**Ñehesa ipa vahe**

<sup>13</sup>Che niha amombehu pota setá mbahe ndeu. Namombehu potai rumo cuachiar pipe tēi ndeu. <sup>14</sup>Esepia, aso pota ité nde repia. Ahese voi yañemoñe-tara oyeovai eté.

<sup>15</sup>Eico tupri. Yande mboripar coha pendar omondo omahenduhasa yuvireco ndeu. Iyavei, eyapo mbahe icatupri vahe, emombehu nde teiet che mahenduhasa ñepeipei yande mboripareta upe eipeve. Aipo rupive.



## JUDAS REMBICUACHIA

### SAN JUDAS

#### Judas mahenduhasa Jesús reroyasar upe

**1** Che, Judas, aico Jesucristo rembiguai, Santiago rivri. Che aicuachía co che ñehe pëu. Pe niha yande Ru Tüpa rembiaisu semienoi peico. Jesucristo niha pe rãro opacatu mbahe-mbahe tēi sui. <sup>2</sup>Tüpa tombou catu pëu pe paraisuerecosa pe reco tupri ãgua pe raisusa pipe.

#### Oporombohe vahe ava mbopa tēi ãgua resendar

<sup>3</sup>Che rivireta, che rembiaisu, yipindar chepihañemoñeta ité yande pñsirosa resendar cuachía ãgua pëu viña. Ipare rumo chepihañemoñeta iri: iyaño revo che aicuachía pe yemoviracua tupri catu ãgua yembohesa yaroya vahe rese. Ahe yembohesa yaroya vahe ñepeí reseve imondopri opacatu yandeu Jesucristo rese yaico vahe. <sup>4</sup>Esepia, amove ava iporombopa serai vahe yuviroique mbegüe angahu pe pãhuve. Aracahe suive rumo Tüpa Ñehengagüer icuachiapri pipe omombehu evocoi nungar ava imocañisa tēira yuvireco. Ahe ava ndaseco pōrai vahe, “Tüpa aviye ité, ndoyapoi chietera mbahe yandeu” ehi tiēte yuvireco. Sese oyapoño mbahe tēi. Iyavei, “Jesucristo ndahei yande Rerecuar” ehiño tēi vahe yande Yar ñepeí vahe upe yuvireco.

<sup>5</sup>Che opomomahenduha pota iri acoi peicua tupri vahe rese. Yipindar yande Yar Tüpa vinose yande ramoí eta Egipto sui. Ipare rumo opa omocañi viroyasarēhi. <sup>6</sup>Inungar avei Tüpa rembiguai yipindar vahe yuvirecoi, nomboaviyei vahe ocuaita. Ipipe sui Tüpa osoquenda

pītumimbi ndopai vahesave ari cañise nara.

<sup>7</sup>Iyavei ava Sodoma pendar, Gomorra pendar iyavei ahe tecua ivirindar avei inungar acoi Tüpa rembiguai oyemondo mbahe tēi pipe, ahe avei oyemondo vahe oyemboaguasa-guasa tēi ãgua yuvireco. Iyavei cuimbahe, cuimbahe rese; cuña, cuña rese no. Ipipe sui oiporara tata guasu apirēhi vahe yuvireco. Ahe opita opacatu yande yembosiquiye ãgua.

<sup>8</sup>Ēgüe ehi avei niha evocoi nungar ava pe pãhu pendar. Esepia, ahe oqueraisa nungar reroyasa pipe sui tēi omonguiha viteño güecocuer oangaipa pipe. Iyavei ndoviroyai vahe yande Yar mborerecuasa. Ahe avei oñehe-ñehe tēi vahe iva pendar rese yuvireco. <sup>9</sup>Aracahe Tüpa rembiguai ivate vahe Miguel oyepoepi-epi Carugar rese yuvireco Moisés retecuer rese. Yepe ahe Tüpa rembiguai rerecuar viña, ndiyai rumo chupe iñehe mara ãgua Carugar upe. Evocoiyase aipo ehi chupe: “¡Tüpa oicuara co rese ndeu!” ehiño. <sup>10</sup>Evocoi ava pe pãhu pendar rumo oñehe tēiño vahe que mbahe ndosenducuai vahe rese yuvireco. Iyavei co mbahe oicua vahe oyesui tēi inungar mbahe mimba ndipihañemoñetai vahe oyesui tēi imbahecua, ahe oiporu yuvireco oyemocañi ãgua tēi.

<sup>11</sup>¡Iparaisu yuvireco! Cañin recocuer rupi tupri avei oyapo mbahe yuvireco. Inungar Balaam guarepochi pota raisave tēi oyavi güeco yuvireco. Inungar Coré omano oporeroyaēhisa pipe.

<sup>12</sup>Pe peñemonuhase pe yeaisusa pipe pe caru ãgua, ahese ahe avei yuviroique pe pãhuve; noyuvinochi eté ocaru ãgua pe piri. Ndapeicuai rumo ahe pe recocuer monguiha ãgua tēi yuviroique vahe pe pãhuve. Evocoi inungar ovesa rãrosar oyese tēi ihañeco vahe yuvireco. Iyavei ahe inungar iva quiha ndovirecoi vahe i, ivitu remimombo tēi. Ahe avei inungar ivira ndihai vahe ohasa

rupi, ipiru vahe, evocoyase ahe sapohopri. <sup>13</sup>Inungar avei acoi iai pipe itu omombo tiyui vahe oyesui yepi. Ēgüe ehi avei evocoi mbia rembiapo poromochisa. Iyavei inungar yasitata amove omocañi vahe guaper co coti tēi oso pītumimbisave, ēgüe ehi aveira ava Tūpa sui oyepepi vahe pītumimbisa apirēhive secocuer yuvirecoi.

<sup>14</sup>Iyavei Enoc, Adán raquicuerindar imboseisa rupi oyesu vahe, ahe oñehe evocoi nungar ava naporai vahe recocuer resendar rese aracahe aipo ehi: “Co che asepia che queraisa nungar pipe yande Yar turi iva pendar rehii reseve <sup>15</sup>opacatu ava recoña ģgua iyavei icañi mombehu ģgua opacatu mbahe-mbahe tēi aposar upe, opacatu oñehe-ñehe tēi yamotarēhisave yuvirecoi vahe upe avei” ehi. <sup>16</sup>Ahe mbia niha oporoviroiro yuvireco. Iyavei oseca oyeupe nara mbahe güemimbotar tēi apo ģgua. Ahe oyemboivate ai vahe oñehe pipe tēi yuvireco. Iyavei oñehe tupri ai angahu tēi ambuae ava upe imbahe recocua ģgua ichui.

### **Jesús reroyasar upendar poromboaracua**

<sup>17</sup>Pe rumo, che rivireta, che rembiaisu, peyemomahenduha acoi yande Yar Jesucristo apóstol ñehengagüer rese <sup>18</sup>aipo ehi vahe: “Co ari cañi renonde

oimera ava viroiro ai vahe Tūpa rembiapo yuvireco. Iyavei oyapoño itera güemimbotarai yuvireco” ehi vahe. <sup>19</sup>Ahe ava niha omboyaho-yaho ucara ava Jesús reroyasar yuvireco. Güecocuer ivi pipendar tēi vireco vahe. Ahe niha ndovirecoi Tūpa Espiritu yuvireco.

<sup>20</sup>Pe rumo, che rivireta, che rembiaisu, peyemoviracua pe poreroyasa maranehi vahe rese. Iyavei peyeroqui Espiritu Santo pe rārosa pipe. <sup>21</sup>Peñearo tupri Tūpa pe raisusa pipe. Iyavei pesāro viteño yande Yar Jesucristo yande paraisuerecosa pipe tecovesa ndopai vahe mondo ģgua yandeu.

<sup>22</sup>Pesaisu ava ndoviroya tupri vahe Jesús. <sup>23</sup>Amove ava pesecoreroyevi voi icañi rāgüer sui. Ambuae peiparaisuereco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepepi yangaipa pipe pe viapiēhi ģgua.

### **Tūpa mboetei tupri**

<sup>24-25</sup>Tūpa yande Pisirosar ñepepi vahe vireco pīratasa pe rāro angaipa pipe pe viapiēhi ģgua. Ahe avei pe rerecora güecocuer porañetesave pe reco angaipaēhisa pipe. Ichui peicora pe viharetasa pipe. Ahe imboeteipri tasecoi. Ēgüe tehi timboyeroyasa seco pīratasa iyavei imborerecuasa yande Yar Jesucristo sui, yipisui, cūritei apirēhi vahe.

*TŪPA REMIMBOYECUA JUAN UPE*

**APOCALIPSIS**

**Jesucristo yemoporēhisa**

**1** Che, Juan, aikuachía mbahe imboaviye pihaiVIPirā pēu acoi Tūpa omboyecua vahe Guahir Jesucristo upe ‘tomboyecua oviroyasar yuvirecoi vahe upe’ oyapave. Ahe niha Jesucristo oicua uca Vu rembiguai pipe imboyecua uca āgua güembiguai che recose cheu. <sup>2</sup>Che supi eté amombehu opacatu mbahe asepia vahecuer iyavei amombehu evocoi Tūpa Ñehengagüer acoi Jesucristo oicua uca tupri vahe mbahe supi eté vahe.

<sup>3</sup>Sorivete catura acoi ava oyeruqui vahe co Tūpa suindar ñehesa rese, acoi ava oyapisaca tupri vahe sese, viroya vahe avei icuachiapri pipendar yuvireco. Esepia, ari cañi virovi ité yandeu.

**Juan oicuachía siete tecua pendar Jesús reroyasar ñemonuhasa upe**

<sup>4</sup>Che, Juan, aikuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tuprisa Tūpa suindar, ahe yipivé vahe ité, cūrteindar apirēhi vahe avei; siete espíritu suindar avei no, ahe senda rovai yuvinochai vahe, <sup>5</sup>iyavei Jesucristo suindar, evocoi omombehu tupri vahe ñehesa supi vahe. Ahe acoi yipindar ocuerayevi vahe iyavei mborerecuar ivate catu vahe secoi opacatu ambuae-ae tēi mborerecuar sui. Ahe yande raisu iyavei yande pīsiro yande angai pa sui vuvi pipe, <sup>6</sup>iyavei yande rereco mborerecuarā, pahiguā avei no Vu Tūpa upe yande poraviqui āgua. ¡Ēgüe tehi imboeteipri tasecoi opīratasa pipe apirēhi vaheerā!

<sup>7</sup>¡Esepia, Cristo iva quiha rese oura curi!

Ahese opacatu ava osepiara yuvireco, yamotarēhisarer, oicutu vahecuer avei. Iyavei opacatu tecua ivi pipendar ahese oyaseho tēira yuvireco sepiase.

Ēgüe ehi etera curi.

<sup>8</sup>“Che aico yipindar iyavei ipandar” aipo ehi yande Yar Tūpa opacatu mbahe mboavaisarēhi evocoi yipivé vahe ité, cūrteindar apirēhi vahe avei.

**Juan osepia oquer nungar pipe Jesucristo porañetesa**

<sup>9</sup>Che, Juan, pe riquehir aico, iyavei che pe nungar Tūpa povri pendar aico, cheparaisu avei vichico Jesucristo rese che recosave che ñemosasa pipe. Che roquendasa vichico caha pāhumi para guasu aviterve Patmos serer vahesave Tūpa Ñehengagüer mombehusa pipe sui tēi, Jesucristo recocuer mombehusa pipe sui tēi avei no. <sup>10</sup>Acoi yande Yar ari pipe Espíritu povrive aicose, asendu che raquicuei oñehe pīrata vahe aviye acoi mimbī ñehe <sup>11</sup>aipo ehi: “Eicuachía mbahe eresepia vahe. Ipape emondopa siete tecua pendar che reroyasar ivi Asia rupindar upe: Efeso ve, Esmirna ve, Pérgamo ve, Tiatira ve, Sardis ve, Filadelfia ve, ipa Laodicea ve” ehi cheu.

<sup>12</sup>Che evocoiyase ayemboyere sese ‘¿ava piha oñehe cheu?’ che yapave. Ahese asepia siete tupri vera hi oro apopri, <sup>13</sup>iyavei asepia ipāhuve mbia aviye tupri ava ité viña, iturucuar pucucuer ipi rupi tupri ité sese, sumbicuasa evocoiyase oro apopri ipochiha rupi tupri ité oyepota. <sup>14</sup>Iha morochí inungar acoi mbahe saviyu vahe, inungar avei yesapi ñapīrata morochí vahe, sesa evocoiyase aviye tupri ité tata rendigüer. <sup>15</sup>Ipi evocoiyase sendi yayi eté, aviye acoi bronce ocai vahe horno pipe, iyavei iñehe ipīratá iteanga inungar itu riapugüer. <sup>16</sup>Oacato coti vireco siete tupri yasitata, iyavei iyuru sui osé

quise pucu saimbe yoya vahe. Sova evocoyase aviye ari rendigüer ipiratá vahe.

<sup>17</sup> Sepia ramoseve, aviapi ipive inungar omano vahe. Ahe rumo omondo opo oacato coti che rese aipo ehi cheu: “Nderesiquiyei chira. Esepia, che yipindar ité aico, ipandar avei. <sup>18</sup> Aicove vahe ité; yepe amano viña, cūrítei rumo aicove iri ndopai chivaherá ité aico. Che areco che mborecuasa ava recocuer mocañi água. <sup>19</sup> Sese eicuachía co mbahe eresepia vahe: cūríteindar oime vahe mbahe iyavei mbahe oime vaherá curi. <sup>20</sup> Co acoi ndereicuai vahe eresepia vahe siete yasitata che acato coti, ahe yuvirecoi Tūpa rembiguai siete tecua rupindar che reroyasar rārosar; evocoyase vera hi oro apopri, ahe yuvirecoi siete tupri tecua pipendar che reroyasar” ehi.

**Ñehesa siete tupri tecua-tecua pendar Jesús reroyasar upe.**

**Ñehesa Efeso pendar upe**

**2** “Eicuachía Tūpa rembiguai Efeso pendar che reroyasar rārosar upe: ‘Acoi vireco vahe oacato coti siete yasitata, ahe acoi oguata vahe siete vera hi yacatu rupi, aipo ehi imombehu: <sup>2</sup> Che aicua opacatu mbahe pe rembiapo, pe poraviqui pīratasa iyavei pe yemoviracuasa. Aicua avei ndapeipotai ava naporai vahe pe pāhuve yuvirecoi vaherá. Pesecoāha avei ava, ore apóstol oroico, ehi tēi vahe; ipare pe icua iporombopa tēisa yuvireco. <sup>3</sup> Che aicua peñemosañi peyemombaraisu peico che raisupave; ndapecuerai eté ipipe. <sup>4</sup> Che rumo aicua oime mbahe ndahei vahe che piha rupi pe recocuer: ndapeyeaisu iri inungar yipindar. <sup>5</sup> Sese peyemomahenduha yipindar pe recocuer aviye vahe rese; pemboasi mbahe pe rembiapo, peyevi Tūpa upe; peyeaisu iri catu inungar yipindar. Anise ayevira pēu, arocuapara pe vera hi senda sui acoi ndapeyeviise Tūpa upe.

<sup>6</sup> Co rumo mbahe pe rembiapo aviye cheu: ndapeipotaise nicolaítas rembiapo mbahe. Che avei niha ndaipotai eté. <sup>7</sup> ¡Acoi osendu pota vahe, toyapisacaño Espíritu omombehu vahe rese opacatu che reroyasar upe! Acoi oyemoviracua vahe mbahe-mbahe tēi apoēhi água, itohu amondora ivira ha tecovesa resendar oime vahe teco orisave che Ru piri, ehi’ erera icuachía chupe.

**Ñehesa Esmirna pendar upe**

<sup>8</sup> “Eicuachía avei Tūpa rembiguai Esmirna pendar che reroyasareta rārosar upe: ‘Acoi yipindar vahe, ipandar avei; ahe acoi omano vahe viña, ocuerayevi iri rumo. Ahe ombou co ñehesa pēu aipo ehi: <sup>9</sup> Che aicua pe yemombaraisusa, pe paraisusa avei; pe rumo mbahe yar nungar ité peico iva pendar mbahe rese. Aicua avei pe rese ava semira tēi vahe, ore Tūpa rembiporavo judío oroico, ehi tēi vahe. Ndahei rumo ahe yuvirecoi. Esepia, Carugar reroyasar tēi evocoi yuvirecoi. <sup>10</sup> Ndapesiquiyei chira pe paraisu água sui. Esepia, Carugar osoquenda ucara amove pe pāhu pendar secoāha água; pe paraisu rane itera niha diez ari rupi peico. Acoi peyemoviracua tuprise ité chupe, Cristo rese ité amanora, pe hesave, ahese amondora porerecosa tecovesa pēu. <sup>11</sup> ¡Acoi osendu pota vahe, toyapisacaño Espíritu omombehu vahe rese opacatu che reroyasar upe! Acoi ava oyemoviracua vahe mbahe-mbahe tēi apoēhi água, ahe imanore ihā ndoiporarai chira imoñvīriosa manosa pipe, ehi’ erera icuachía chupe.

**Ñehesa Pérgamo pendar upe**

<sup>12</sup> “Eicuachía avei Tūpa rembiguai Pérgamo pendar che reroyasareta rārosar upe: ‘Aipo ehi acoi vireco vahe quise pucu saimbe yoya vahe: <sup>13</sup> Che aicua pe recosa. Aheve acoi

Carugar oguapí oĩ; mborerecuar guasu nungar imboyeroyapri secoi. Pe rumo peyemoviracuaño ité chupe che recocuer rese peico. Ndapeseyai eté che rese pe yeroyasa yepe oyuca tēi che recocuer mombehu tuprisar Antipas evocoi tecua Carugar recosave. <sup>14</sup> Che rumo aicua mbahe pe resendar: eipeve amove ava ndoyepēpi potai eté Balaam porombohesa sui yuvireco. Ahe omboaracua Balac israelita mboangaipa uca āgua, toyuvirohuño mbahe roho seropovēhepri mbahe rahanga upendar tēi, oya, iyavei, toyemboaguasaño yuvireco, oyapave avei. <sup>15</sup> Iyavei amove ava pe pāhuve ndoyepēpi potai eté nicolaíta porombohesa sui yuvireco. <sup>16</sup> Sese pemboasi pe recocuerai, peyevi Tūpa upe, anise che aso poyava voira pēu, ahese avavara chupe yuvireco che yuru pipe sui osē vahe quise pucu pipe, ehi. <sup>17</sup> ¡Acoi ava osendu pota vahe, toyapisacaño Espíritu omombehu vahe rese che reroyasar yuvirecoi vahe upe! Acoi ava oyemoviracua vahe mbahe-mbahe tēi apoēhi āgua, semihura amondora ndasepiasai vahe maná. Iyavei amondora ita morochi vahe chupe. Ahe ita rese icuachiasara terer ipiasu vahe oĩ, evocoi ava oipisi vahe güeraño oicuara, ehi' erera icuachía.

### **Ñehesa Tiatira pendar upe**

<sup>18</sup> “Eicuachía avei Tūpa rembiguai Tiatira pendar che reroyasareta rārosar upe: ‘Tūpa Rahir acoi vireco vahe güesa inungar tata rendigüer, ipi avei inungar acoi bronce rapipri aipo ehi imombehu: <sup>19</sup> Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosa iyavei pe yemoviracuasa. Aicua avei yipindar sui mbahe peyapo catú aviye vahe. <sup>20</sup> Oime rumo mbahe pe rembiavi: peñemosañño evocoi cuña Jez-

abel pe pāhu pendar upe, ahe acoi oñehe tēi angahu vahe Tūpa rese viña. Ahe rumo ombopa tēi oporombohesa pipe che rembiguai iyemboaguasa-guasa tēi uca āgua sereco iyavei ohu uca mbahe roho mbahe rahanga tēi upe seropovēhepri yuvireco chupe. <sup>21</sup> Che amondo vite tēi ari chupe, tomoasi oangaipa Tūpa upe oyevi āgua, che yapave viña. Ahe rumo ndopoi potai eté oyemboaguasa tēisa sui. <sup>22</sup> Evocoiyase cūrítei che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñaro potaise ité yuvireco. <sup>23</sup> Ipare ayucapara imembri ichui. Ēgüe ehi opacatu che reroyasar oicuara yuvireco che aicua tupri ité opacatu ava pihanemoñetasia iyavei ñepeipei pe yacatu amondora pe rembiapogüer repri pēu. <sup>24</sup> Pe rumo opacatu Tiatira pendar ndaperoyai vahe co porombohe raisa iyavei ndapeyembohei vahe Carugar suindar aracuasa, ndicuasai yavai vahe, ehi vahe rese, pēu ndarecoi que ambuae che porocuaita. <sup>25</sup> Peyemoviracuañora rumo evocoi mbahe pereco vahe rese, acoi che ayevise voi vitu curi. <sup>26</sup> Acoi ava oyemoviracua vahe mbahe-mbahe tēi apoēhi āgua, oyapo vahe che remimbotar mano rupi eté, chupe amondora mborerecuar seco āgua opacatu ivi rupi <sup>27</sup> inungar che Ru ombou che mborerecuarā cheu; ēgüe ehi aveira oporocuai opacatu tecua rupi inungar acoi vara guarepochi, mbahe riapiipa uca āgua, aviyera acoi mahemoinda ñaihu apopri viña. <sup>28</sup> Iyavei amondora yasitata cōhe rerusar chupe. <sup>29</sup> ¡Acoi ava osendu pota vahe, toyapisacaño Espíritu omombehu vahe rese opacatu che reroyasar yuvirecoi vahe upe! ehi' erera icuachía.

### **Ñehesa Sardis pendar upe**

**3** “Eicuachía avei Tūpa rembiguai Sardis pendar che reroyasareta

rãrosar upe: ‘Acoi ava vireco vahe siete tupri Tüpa espíritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepe amove ava, Co mbia yuvirecoi vahe ité Tüpa upe nara, ehi pëu viña; omano vahe nungar tēi rumo peico. <sup>2</sup>Peyemopoase catu peico iyavei pemonguerēhi catu acoi viroya vite vahe. Esepia, oyepepipa pota ité yuvireco viña. Supi eté mbahe pe rembiapo che Ru rovaque, ndahei supi tupri vahe. <sup>3</sup>Peyemomahenduha acoi porombohesa peipisi vahe rese; pepoi rene ichui. Peyevi catu Tüpa upe. Ndapeyemopoaseise rumo, asora pëu inungar imonda rai vahe, ēgüe ahera vicho pe resapiha. <sup>4</sup>Oime rumo amove ava pe pãhu pendar ndoyapoi eté angaipa yuvireco, evocoiyase inungar ava oguata vahe oturucuar morochi vahe rese, ēgüe ehi aveira ahe güeco maranehi pipe oguata che rupi yuvireco. Esepia, ahe chupe iya ité. <sup>5</sup>Acoi ava oyemoviracua vahe mbahe-mbahe tēi apoēhi āgua, ahe sese imondesara turucuar morochi vahe. Ahe serer namboyehoi chira cuachiar tecovesa resendar pipe sui, asenoira rumo che Ru rovai iyavei sembuguai eta rovaque avei curi. <sup>6</sup>¡Acoi ava osendu pota vahe, toyapisacaño Espíritu omombehu vahe rese che reroysar yuvirecoi vahe upe! ehi’ erera icuachía.

### **Ñehesa Filadelfia pendar upe**

<sup>7</sup>“Eicuachía avei Tüpa rembuguai Filadelfia pendar che reroysareta rãrosar upe: ‘Co seco maranehi vahe, supi tupri vahe ité, vireco vahe mborerecuasa aracahendar mborerecuar guasu David nungar, acoi omboise que oquenda, ñepe yepi que ava nomboyai chietera; iyavei acoi omboyase, ñepe yepi que ava nomboi chiete aveira, ahe aipo ehi:

<sup>8</sup>Che rumo aicua mbahe opacatu pe rembiapo. Esepia, che amondo pe rovaque inungar oquenda imboipri pëu pemombehu vahe rã che recocuer. Ahe que ñepe yepi ava nomboyai chietera yuvireco. Esepia, yepe pe nipirata tupri vahe, peroia ité rumo che ñehe iyavei ndacheñomi eté ava sui peye. <sup>9</sup>Co Carugar reroysar semira tēi vahe, ore Tüpa rembiporavo judío oroico, ehi tēi vahe, ndahei rumo ahe eté vahe yuvirecoi. Ahe amoñenopihapa ucara pe rovai, toicua yuvireco che pe raisusa, che yapave. <sup>10</sup>Esepia, peroia ité che porocuita, peyemoviracua ité evocoi mbahe tēi upe peico. Evocoiyase che opoepira acoi ari tecoãhasa ouse opacatu ivi rupindar upe curi. <sup>11</sup>Ayevi poyavara. Peyemoviracua catu Tüpa reroyasa pereco vahe rese. Evocoiyase ñepe yepi que ava ndovirocui chietera Tüpa suindar porerecosa pe sui. <sup>12</sup>Acoi oyemoviracua vahe mbahe-mbahe tēi apoēhi āgua yuvireco, ahe che Ru piri nara ité yuvirecoira. Ahe evocoiyase inungar-ra che Ru Tüpa rēta vīracuasa ndopai vahe yuvireco. Sese arova ucara che Ru Tüpa rer iyavei che Ru Tüpa recua rer avei no, ahe Jerusalén piasu, evocoi ou vahe rã iya pendar che Ru Tüpa sui, iyavei che rer ipiasu vahe ité arovara sese no. <sup>13</sup>¡Acoi ava osendu pota vahe, toyapisacaño Espíritu remimombehugüer rese che reroysareta upe! ehi’ erera icuachía.

### **Ñehesa Laodicea pendar upe**

<sup>14</sup>“Eicuachía avei Tüpa rembuguai Laodicea pendar che reroysareta rãrosar upe: ‘Evocoi seco tupri vahe, omombehu vahe mbahe supi tupri vahe ité, ahe ichui oime opacatu Tüpa rembiapo, ahe aipo ehi: <sup>15-16</sup>Che aicua mbahe opacatu pe rembiapo. Pe inungar i ndahei sōhisa vahe iyavei ndahei sacu vahe. ¡ sacu raimi tēi vahe nungar

peico pe rembiapo pipe. ¡Ñepeí reseve vahe rumo aipota, ndahei iguayí tēi vahe! Pe recocuer rumo iguayí tēi vahe nungar, sese opomboyevĩñora cheyesui. <sup>17</sup>Esepia, pepiñañemoñeta: Che mbahe yar ité, opacatu mbahe areco, nipanei eté mbahe cheu, peye viña. Pe rumo ndapeicuai pe paraisusa che Ru rovaque inungar ndasesapisoí vahe peico. Iyavei ndapeyavii nditurucuai vahe peico. <sup>18</sup>Sese opomboaracua; peseca iva pendar oro tatave imoatĩropri nungar che sui pe paraisuēhi iri āgua che Ru rovaque; peseca avei turucuar morochi vahe teco tupri sa peyeupe che suindar nani tupri vahe nungar pipe pe recoēhi āgua, pe chíēhi āgua avei iyavei inungar ava oseca mosa güesa upe nara osareco iri āgua, ēgüe peye aveira. <sup>19</sup>Che añehe pĩrata seco mohivi āgua che rembiaisu upe yepi. Peyemonguerēhi catu, pemboasi ité pe recocuer che Ru Tũpa upe pe yevi āgua. <sup>20</sup>Esepia, inungar que ava oquenda omotara oquendipive ohā viña, ēgüe ahe pe pihave vichico; pesenduse che ñehe, pemboira cheu. Che evocoyase aikuera pe piri, yacarura oyepiri. <sup>21</sup>Acoi ava oyemoviracua vahe mbahe-mbahe tēi apoēhi āgua yuvireco, ahe amboguapi ucara che ipive imoi che porocuaisave, inungar che mbahe tēi reco reroyi pare, aguapi che Ru ipive vĩte. <sup>22</sup>¡Acoi ava osendu pota vahe, toyapisacaño Espĩritu remimombehugũer rese che reroyasareta upe! ehi imombehu pēu' erera icuachía" ehi Jesús cheu.

### Tũpa mboeteisa ivave

**4** Ipare asepia mbahe inungar oquenda oyemboi vahe ivave. Ahese evocoi ñehesa ipĩrata vahe mimbi nungar yipĩndar oñehe vahe cheu, ahe asendu iri: "Eyeupi ave. Che evocoyase mbahe amboyecuara ndeu mbahe imboaviyepirā curi" ehi.

<sup>2</sup>Ahe pipeve voi, Espĩritu pĩratasa pipe aico iyavei asepia tenda ivave, ahe iharive ñepeí oguapi oĩ. <sup>3</sup>Co oguapi vahe ndoyavii eté ita jaspe porañetesa iyavei ndoyavii cornalina porañetesa no. Iyavei oime oyere tupri vahe tenda rese inungar arco iris sendí vahe, inungar esmeralda. <sup>4</sup>Iyavei asepia evocoi rese oyere tupri ambuae veinticuatro tenda, ahe iharive oguapi yuvinoi veinticuatro avei icuaipri yuvirecoi vahe; iturucuar morochí vahe yuvireco iyavei oāca rese omboyere tupri oro apopri yuvireco. <sup>5</sup>Evocoyase Tũpa renda sui yuvinose overavera vahe, iyavei siapu guasu vahe, osunu vahe no; iyavei siete tupri tataendi sendipa yuvireco evocoi tenda rovai, ahe co siete tupri Tũpa espĩritu. <sup>6</sup>Evocoi tenda rovai oime avei ndoyavii tupri para guasu tĩpiu vahe oyecua tupri vahe mbahe ipipe.

Ambuae tenda pāhu rupi oyere tupri Tũpa renda rese irungatu iva pendar yuvirecove vahe, ahe sesa oyere tupri vahe sese, ahe osareco tupri vahe güenonera, guaquicuei coti avei no. <sup>7</sup>Yipĩndar yuvirecove vahe pāhu pendar ahe ndoyavii tupri yagua pĩta; saquicuerindar ndoyavii tupri guaca cuimbahe; imombosapisa ndoyavii eté ava; imoirungatusa cute ndoyavii vira guasu oveve vahe. <sup>8</sup>Evocoi iva pendar irungatu yuvirecove vahe vireco oyacatu seis tupri opepo yuvireco iyavei vireco opacatu güete rese güesa. Ndopituhui eté ari, pĩtu rupi aipo ehi yuvireco:

"¡Santo, santo, santo ité secoi, yande Yar Tũpa ité, ahe mbahe mboavaisarēhi, yipivé vahe ité, cūrĩteindar, apirēhi vahe!"

ehi yuvireco.

<sup>9</sup>Evocoi yuvirecove vahe omboetei yuvireco, "Aviye ndeu" ehi co oguapi vahe oĩ tenda harive ndopai vahe upe. <sup>10</sup>Ēgüe ehise evocoyase veinticuatro tupri icuaipri yuvirecoi vahe, ahe

oñenopiha imboeteisa pipe sovai yuvireco. Ipare osequi oāca resendar oyere tupri vahe omborerecuasa resendar sovai aipo ehi:

<sup>11</sup>“Ore Yar Tūpa, iya ité nde mboeteisa, ndeu sapucaisa nde pīratasa rese.

Esepia, nde ereyapo vahe mbahe opacatu; nde remimbotar rupi niha oime opacatu mbahe”

ehi yuvireco chupe.

### Ovesami upe güeraño iyacatu cuachiar imboyapri mboi āgua

**5** Che asepia cuachiar Tūpa vireco vahe oacato coti, icuachiapri ipipe coti, ocar coti avei no, imboyapri sietete sello pipe. <sup>2</sup>Ipare asepia Tūpa rembiguai seco ivate vahe, ahe oporandu pīrata oico aipo ehi: “¿Ava upe vo iya cuachiar mboi āgua iyavei sello imboyeroyapri mondoro āgua no?” ehi.

<sup>3</sup>Ndipoi eté rumo que iva pendar, ivi pipendar, ivivri pendar oicatu vaherā cuachiar pipira sepia āgua viña. <sup>4</sup>Evocoyase che ayasehó iteanga. Esepia, ndipoi eté que ñepei yepe oime angara aviye vahe cuachiar pipira sepia āgua viña. <sup>5</sup>Ahese icuaipri pāhu pendar ñepei aipo ehi cheu: “Ereyaseho iri eme. Esepia niha, evocoi ava yagua pīta yahe vahe chupe, Judá suindar, acoi mborerecuar guasu David suindar avei, ahe niha Carugar osecoreroi. Sese iya ité chupe siete sello mondoro cuachiar pipira āgua” ehi.

<sup>6</sup>Evocoyase, asepia Tūpa rovai iva pendar irungatu yuvirecove vahe pāhuve, icuaipri yuvirecoi vahe mbiterve, ñepei ava Ovesami nungar ihāi, aviye seropovēhepri. Ahe niha vireco siete tupri sāchi, siete tupri avei sesa; sesa evocoyase siete tupri Tūpa espíritu yuvirecoi opacatu ivi rupi imboquatapri. <sup>7</sup>Ipare evocoi Ovesami oso, oipisi cuachiar evocoi tenda harive uguapi vahe yacato coti sui; <sup>8</sup>ipisi

pare, evocoi irungatu yuvirecove vahe, iyavei veinticuatro tupri icuaipri, ahe oñenopiha Ovesami rovai yuvireco. Oyacatu ñepei-peí vireco arpa yuvireco, itaisi riru oro apopri, ahe avei vireco yuvireco, ahe itaisi niha Tūpa reroyasar yeruresa. <sup>9</sup>Osapucaí ipiasu vahe sapucaisa pipe aipo ehi yuvireco:

“Ndeu iyacatu ité cuachiar pisi āgua, imboyapri mondoro āgua avei no.

Esepia niha, nde yucapri seropovēhepri ereico.

Evocoyase nde ruvi pipe eremboepipa Tūpa upe nara opacatu ava ambuae-ae tēi vahe, ñehe ambuae-ae tēi vahe avei, ñepei-peí tecua yacatu rupindar, ivi rupindar avei yuvireco.

<sup>10</sup>Iyavei eremborerecuca uca Tūpa upe nara,

erembopahi uca avei no, ipare ahe oporocuirā opacatu ivi rupi yuvireco” ehi osapucaí

yuvireco.

<sup>11</sup>Ipare asepia, asendu avei Tūpa rembiguai rehii ñehe evocoi oyere tupri vahe tenda rese yuvireco, iyavei evocoi yuvirecove vahe ñehe, icuaipri ñehe avei asendu setá iteanga yuvirecoi. <sup>12</sup>Ahe aipo ehi pīrata yuvireco no:

“¿Co Ovesami yucapirer, ahe chupe iyacatu ité mborerecuasa pisi āgua, opacatu Tūpa suindar porerecosa pisi āgua, mbahecuasa,

pīratasa, mboyeroyasa, poromboeteisa, iyavei sapucaisa pisi āgua avei no!” ehi.

<sup>13</sup>Ahese asendu avei opacatu Tūpa rembiapo ivave yuvirecoi vahe, ivi pipendar, ivivri rupindar iyavei para guasu pipendar, aipo ehi yuvireco:

“¿Toime sapucaisa, Tūpa upendar mboyeroyasa,

imboeteisa, iyavei pīratasa, ahe timondosa apirēhi vaherā Tūpa acoi güendave uguapi vahe upe, Tahir Ovesami nungar upe avei no!” ehi.



<sup>14</sup>Evocoi irungatu ava yuvirecove vahe, “¡Ēgüe tehi eté!” ehi yuvireco. Iyavei icuapri veinticuatro tupri yuvirecoi vahe, ahe oñenopiha yuvireco sovai imboeteisave.

### Siete sello

**6** Ipare asepia acoi Ovesami omondoro yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe pāhu pendar oñehe pīrata. Ñehe ndoyavii osunu vahe, “¡Erio!” ehi cheu. <sup>2</sup>Ahese asepia cavayu morochi vahe, ahe ava ihari pendar vireco virapar. Chupe omondo yeguaca yuvireco. Ēgüe ehi ahe osē seco pīrata catu vahe ava reco reroyi āgua.

<sup>3</sup>Omondorose acoi Ovesami imoñuviriosa sello, ahese asendu imoñuviriosa yuvirecove vahe pāhu pendar ñehe, “¡Erio!” ehi vahe cheu. <sup>4</sup>Ipare osē cavayu pīra vahe, ahe ava ihari pendar oipisi pīratasa mbahe tuprisa rerocua āgua ivi pīpendar ava sui ‘toyeyuca-yuca tēi yuvireco’ oyapave. Ipare imondosa quise pucu chupe.

<sup>5</sup>Omondorose acoi Ovesami imombosapisa sello, ahese asendu imombosapisa yuvirecove vahe pāhu pendar ñehe, “¡Erio!” ehi vahe cheu. Amahe sese, ipare asepia cavayu sū vahe, ahe ava ihari pendar vireco opo pipe mbahe rāhasa. <sup>6</sup>Ipare asendu yuvirecove vahe cotindar ñehe, ahe aipo ehi: ‘Nēpei kilo trigo serocuasa guarepochi ñepeí ari resendar mboraviqui repri pipe, mbosapi kilo cebada evocoiyase serocuasa avei ñepeí ari resendar mboraviqui repri pipe no. Pemocañi eme mbahe quira iyavei uva ricuer avei no’ ehi.

<sup>7</sup>Evocoi Ovesami omondorose imoirungatusa sello, ahese asendu ava imoirungatusa ñehe aipo ehi: “¡Erio!” ehi cheu. <sup>8</sup>Amahe, ipare asepia cavayu iyu rasi vahe, ahe ava ihari pendar

serer Tehōgüer. Ipare saquicuei ou vahe oico ahe serer Omano-vahe-recosa. Ahe chupe yuvireco imondosa teco pīratasa ivi imoirungatusa yahocuer rupi iguata āgua ava yuca āgua vavasa pipe, tieporēhi pipe, mbaherasi pipe, mbahe ipi pipe avei no.

<sup>9</sup>Evocoi Ovesami omondorose imbopoyandeposa sello, ahese asepia mbahe seropovēhepri rendavrive ava hā, ahe yucasa vahe yuvireco Tūpa Ñehengagüer mombehusa sui tēi iyavei Jesús reroyasa sui tēi avei no. <sup>10</sup>Ahe aipo ehi pīrata yuvireco: “Ore Yar Tūpa seco maranehi, supi tupri vahe, ¿mbahese vo eremombaraisura ore yucasarer yuvirecoi vahe ivi pipendar ore repisave?” ehi yuvireco. <sup>11</sup>Ipare imondosa iyacatu turucuar morochi vahe chupe, ahese aipo ehi: “Pepituhu vite rane, tayaviyepa rane pe rivireta retacuer Cristo upendar mbahe aposa pipe yucapri pe nungar yuvireco” ehi.

<sup>12</sup>Ipare Ovesami omondorose imoñepeí ovasa sello, ahese oime ivi rirí ipīratá vahe. Ari evocoiyase sū, aviye acoi turucuar sū vahe mano sendar yemondesa iyavei yasi pīrá inungar tuvi, <sup>13</sup>yasitata evocoiyase opa oviapi iva sui ivi rese yuvireco no inungar acoi higo hacri ombosururu vahe ivitu ai yepi. <sup>14</sup>Ahese iva ndoyecua iri cute inungar acoi cuachiar yeapoapipri vahe, opacatu tupri avei ivitri, caha pāhu avei no osiri güenda sui yuvireco. <sup>15</sup>Mborerecuareta avei co ivi pipendar yuvirecoi vahe opa tēi oñemi mbahecuar pipe yuvireco, ita guasu pāhu rupi avei yuvireco no, oyoya guasu seco ivate vahe, sundao rerecuareta, mbahe yar seco pīratá vahe, iyavei opacatú tupri mbiguai eta, ava ndahei vahe mbiguai avei; <sup>16</sup>iyavei aipo ehi yuvireco ivitri upe, itape guasu upe avei no, “¡Eviapi ore harive, toroñemipa tēi Tūpa sui iyavei Ovesami

sui acoi ombou vahe co poronupasa ipīrata vahe oreu! <sup>17</sup>Esepia, oyepota ité Tūpa ñemoirosa oreu. Ndipoi chietera ava oyemoviracua tupri vahe oyese chupe” ehi yuvireco.

### Israel suindar iporavopri yuvirecoi vahe

**7** Ipare asepia irungatu tupri Tūpa rembiguai iva pendar yuvino hai vahe irohi coti, norte coti, ari sēsa coti, caharu coti avei no omombituhu tupri vahe irungatu ivitu yuvirecoi vahe ivi hari rupi ipeyuēhi āgua, que para guasu pipe angara viña, que ñepei yepe ivira ro angara viña no. <sup>2</sup>Ipare asepia avei ambuae Tūpa rembiguai iva pendar ou vahe ari sēsa coti sui, ahe vireco oyese Tūpa oicove vahe rer mondosa. Ahe niha osapucaí pīratá evocoi irungatu tupri Tūpa rembiguai iva pendar yuvirecoi vahe upe, oipisi vahe pīratasa ivi, para guasu momara āgua yuvireco, aipo ehi: <sup>3</sup>“¡Ndapemomara vitei chira rumo ivi, para guasu avei, ivira avei no, co ndoromondo viteiseve ava Tūpa rembiguai eta upe isiva rese Tūpa rer icuachiapri!” ehi.

<sup>4</sup>Ipare asendu Tūpa rer oipisi vahe retacuer: ciento cuarenta y cuatro mil tupri, evocoi opacatu doce judío ramoi suindar pāhu sui iporavopri yuvireco. <sup>5</sup>Doce mil tupri yuvirecoi iporavopri Judá suindar, doce mil tupri Rubén suindar, doce mil tupri Gad suindar, <sup>6</sup>doce mil tupri Aser suindar, doce mil tupri Neftalí suindar, doce mil tupri Manasés suindar, <sup>7</sup>doce mil tupri Simeón suindar, doce mil tupri Leví suindar, doce mil tupri Isacar suindar, <sup>8</sup>doce mil tupri Zabulón suindar, doce mil tupri José suindar, ipa evocoiyase doce mil tupri Benjamín suindar.

### Ava rehii iturucuar morochi vahe

<sup>9</sup>Ipare asepia setá iteanga ava, opacatu ivi rupindar, ambuae-ae tēi vahe, ambuae-ae tēi vahe iñehe yuvireco iyavei secua ambuae vahe avei no. Ahe opūhapa vahe Tūpa rovai Ovesami rovai avei yuvireco no, ahe ndayaicatui eté ipapapa āgua. Esepia, setá etepri yuvireco iyavei iturucuar morochí vahe pāve; pindo-pindomi vireco opove yuvireco no. <sup>10</sup>Ipare opacatú guasu oñehe pīrata yuvireco aipo ehi:

“¡Poropīsirosa yande Ru Tūpa suindar, ahe oguapí vahe oĩ güendave, iyavei Ovesami suindar avei no!” ehi.

<sup>11</sup>Iyavei opacatu Tūpa rembiguai iva pendar yuvirecoi vahe oyere tupri Tūpa renda rese, icuaiipri rese avei yuvino ha iyavei irungatu yuvirecove vahe rese avei no; ahese oyeaivi omboya ité osiva ivi rese senda rovai Tūpa mboeteisave yuvireco, <sup>12</sup>aipo ehi:

“¡Ēgüe tehi!

Sapucaisa, poromboeteisa, mbahecuasa, ‘¡Aviye ndeu’ hesa, poromboyeroyasa, mborerecuasa,

teco pīratasa avei tasecoi yande Ru Tūpa upe!

¡Ēgüe tehi apirēhi vaherā ité yepi!” ehi.

<sup>13</sup>Ahese icuaiipri ipāhu pendar aipo ehi cheu cute: “¿Ereicua vo co ava rehii iturucuar morochi vahe pāve yuvirecoi, ereicua que sui pīha yugüeru?” ehi. <sup>14</sup>Che evocoiyase, “Nde rumo ereicua” ahe chupe. Ipare ahe aipo ehi cheu: “Co acoi yuvino se tupri vahe ité teco asisa sui yuvireco, inungar oyosei, omomorochi vahe oturucuar, Ēgüe ehi avei güecocuer imomorochi Ovesami ruvi pipe yuvireco.

<sup>15</sup>“Sese Tūpa renda rovai yuvirecoi, chupe mbahe apo āgua ari, pītu rupi avei sēta pipe.

Güendave oguapi vahe oĩ, güecocuer pipe osepira.

<sup>16</sup> Evocoi ndiyumbiasi iri chira yuvireco, ndihusei iri chiaveira, iyavei ari ndoyope iri chira, ndasacuvasi iri chiaveira chupe no.

<sup>17</sup> Esepia, evocoi Ovesa secoi Vu renda rovai, ahe osārora ava rehii sereco inungar ovesa rārosar.

Ipare opara víraso tecovesa resendar i ndopai vahesave imboihu āgua.

Tūpa evocoiyase omombituhupara imboyasehosa sui yuvireco” ehi.

### **Imoñuvirío ovasa sello iyavei itaisi rapisa oro apopri**

**8** Ipare coiye cute co Ovesami omondorose imoñuvirío ovasa sello cuachiar mboyasa ichui, ahesa sũ tupri ivave ñepeí hora yemombitesa rupive. <sup>2</sup> Ichui asepia siete tupri Tūpa rembiguai iva pendar yuvinochai vahe Tūpa rovai, chupe opa imondosa siete tupri mimbi. <sup>3</sup> Ipare ou ambuae Tūpa rembiguai iva pendar oro itaisi rapisa reseve, iyavei ou ohā itaisi rapisa renda rovai; ipare imondosa tuvichá itaisi chupe oicuavêhe vaherā oyoya tupri opacatu ava Tūpa upendar yeruresa rese oro mbahe reropovêhepri renda harive; ahe Tūpa renda rovai chini vahe. <sup>4</sup> Itaisi rātachí evocoiyase oso Tūpa rembiguai iva pendar po sui. Ēgüe ehi oyepota oso Tūpa recosave, oyoya tupri chupendar yeruresa rese. <sup>5</sup> Ipare evocoiyase Tūpa rembiguai iva pendar opoco itaisi rapisa rese, omboapipo mbahe reropovêhepri renda pendar tātapii pipe. Ipare opa omombo ivi hari rupi. Aheseve voi osunu vahe opororo-roró, overa-vera iyavei ivi oririi.

### **Siete vahe mimbi**

<sup>6</sup> Evocoiyase siete tupri Tūpa rembiguai iva pendar oyemoingatu voi güemimbi moñehe āgua yuvireco.

<sup>7</sup> Yipindar vahe Tūpa rembiguai omoñehe güemimbi, ahesa imombosa ivi hari rupi amanda iyavei tata oyeseha vahe tuvi rese. Ipare opa ocai ivi mombosapisa yahocuer. Oyoya tupri ivira mombosapisa yahocuer rese iyavei capihi reseve avei opa yuvirocai.

<sup>8</sup> Imoñuviriosa Tūpa rembiguai omoñehe güemimbi. Ahesa imombosa para guasu pipe inungar tupri acoi ivitri sendi vahe tata pipe; ipare para guasu mombosapisa yohacuer oyeapo tuvi. <sup>9</sup> Iyavei para guasu mombosapisa yahocuer pipendar ava omano yuvireco. Ipare carite guasu mombosapisa yahocuer pipendar opa tupri avei imocañisa.

<sup>10</sup> Ipare imombosapisa Tūpa rembiguai iva pendar omoñehe güemimbi, ahesa yasitata tuvichá vahe oviapi iva sui ou. Sendi guasu inungar acoi ivira rese tata sendi guasu vahe. Ahe oviapi iai mombosapisa yahocuer pipe iyavei ivi sui i ohē vahe mombosapisa yahocuer pipe avei no. <sup>11</sup> Yasitata rer evocoiyase Iro-vahe. Ipare i mombosapisa yahocuer iró iteanga. Evocoi i pipe setá ava omano yuvireco.

<sup>12</sup> Imoirungatusa Tūpa rembiguai omoñehe güemimbi. Ipare ari mombosapisa yahocuer imegua, yasi mombosapisa yahocuer, iyavei yasitata mombosapisa yahocuer avei no. Ichui imombosapisa yahocuer ndosesape iri yuvireco ari mombosapisa yahocuer pipe, pĩtu mombosapisa yahocuer pipe avei no.

<sup>13</sup> Ipare asepia, asendu avei no vira guasu ovevese iva mbiter rupi, aipo ehi pucu oñehe oico: “¡Too, too! ¡Iparaisu

catura moco ava yuvirecove vite vahe ivi pipe yuvireco acoi omoñehese ambuae mbosapî Tûpa rembiguai güemimbi yuvireco!" ehi.

**9** Tûpa rembiguai imbopoyandeposa omoñehese güemimbi, ahese asepia yasitata oviapi vahe iva sui ou ivive. Ipare chupe imondosa ivicuar picucu pîtumimbi vahe mboisa. <sup>2</sup>Ipare omboise ivicuar rovapisa, ichui opûha tâtachi, inungar acoi horno guasu pipe sui osê vahe. Evocoiyase evocoi tâtachi ndosesape uca iri arî upe, nîporêhi iri eté mbahe. <sup>3</sup>Iyavei evocoi tâtachi sui opa yuvínose tucru guasu rehîi oñemosai opacatu ivi rupi; chupe avei imondosa seco pîrata âgua inungar acoi mbaherumbiquiâpe. <sup>4</sup>Icuaisa rumo opacatu capihi mbahe rocîi iyavei ivîra momaraêhi âgua, êgüe ehi rumo acoi ava nomboyecuai vahe osiva rese Tûpa rer, chupe nara ité. <sup>5</sup>Nimondosai rumo mborocuita chupe ava yuca âgua. Êgüe ehi rumo 'tomombaraisu pucu rane poyandepo yasi rupi sereco' oyapave têi, inungar tupri acoi mbaherumbiquiâpe rasicuer.

<sup>6</sup>Evocoi arî rupi ava oipota têira omano âgua yuvireco viña. Imanosa rumo que vîtera yuvireco ichui.

<sup>7</sup>Tucru guasu rehîi inungar cavayu imoingatupri vavasave nara yepi; oâca rese evocoiyase vîreco ndoyavîi yeguaca oro apopri, iyavei sova aviye tupri ité ava repiaca. <sup>8</sup>Iha ndoyavîi cuña ha, sâi evocoiyase ndoyavîi tupri yagua pîta râi. <sup>9</sup>Setecuer evocoiyase oyopia tupri guarepochi apopri, iyavei ipepo riapugüer aviye tupri ité acoi cãreto riapugüer cavayu vinoña vahe vavasave. <sup>10</sup>Vîreco vuguai rese opopiar aviye mbaherumbiquiâpe popiar. Ahe niha vîreco opîratasa poyandepo yasi rupi ava momara âgua têi. <sup>11</sup>Evocoi tucru guasu rerecuar, ahe icuairî ivicuar ipicucu vahe mboi âgua. Ahe serer hebreo ñehe

pipe Abadón; griego ñehe pipe evocoiyase Apolión ehi.

<sup>12</sup>Opa yipîndar vahe mbahe-mbahe têi; oime vite rumo co pare ñuvirîo mbahe tasi vahe.

<sup>13</sup>Imoñepeî ovasa Tûpa rembiguai omoñehese güemimbi, ahese asendu ñehesa itaisi rapisa renda oro apopri Tûpa rovaindar irungatu sâchi vahe pâhu sui. <sup>14</sup>Ahe aipo ehi evocoi imoñepeî ovasa Tûpa rembiguai upe: "Eyorapa evocoi irungatu Tûpa rembiguai ñapichimbrî iai guasu Eufrates ivirindar" ehi. <sup>15</sup>Evocoiyase opa yorasa ava mombosapisa yahocuer yuca âgua yuvireco. Esepia, evocoi imoingatupri co arî rupi tuprise nara yuvireco. <sup>16</sup>Ipare asendu sundao rehîi cavayu harîve yuvirecoi vahe, ahe setacuer doscientos millones tupri.

<sup>17-18</sup>Êgüe ehi asepia cavayu rehîi che quer nungar pipe, iharî pendar evocoiyase vîreco opochiha rupi tupri oyoeplsa guarepochi apopri yuvireco, ahe iparagüer pîra vahe tata nungar, sovi vahe, iyu vahe avei no. Cavayu rehîi âca evocoiyase aviye tupri yagua pîta âca, iyuru sui evocoiyase yuvínose-nose tata, tâtachi iyavei azufre. Ipipe sui ava mombosapisa yahocuer opa tupri omano yuvireco. <sup>19</sup>Esepia niha, cavayu pîratasa iyuru rese chini, suguai rese avei no; ahe suguai ndoyavîi tupri ité mboi âca, ipipe avei ava omomara.

<sup>20</sup>Ava rumbîrer rumo nomanopa vitei vahe co mbahe têi sui yuvireco, nosecuñaroi eté güecocuerei yuvireco. Ndopoi potai eté caruguar mboetei aisa sui, iyavei opacatu mbahe rahanga têi oro apopri, guarepochi, bronce, ita, anise ivîra apopri mboeteisa sui avei yuvireco. Evocoi mbahe apopri rumo ndosarecoi vahe, ndosendui vahe ité mbahe, ndoguatai vahe avei. <sup>21</sup>Iyavei noñecuñaro potai eté oporapichisa sui yuvireco, opaye aisa sui, que cuña, que

cuimbahe ambuae rese angaipa aposa sui, omonda raisa sui avei.

**Tūpa rembiguai iva pendar vireco vahe icuachiapri cuachiarmi**

**10** Ipare asepia ambuae Tūpa rembiguai iva pendar ipirata vahe ogüeyise iva sui ou mbahe pītu pāhuve; ahe ñaca rese arco iris oyere tupri. Sova sendí aviye ari, setima evocoyase ndoyavii tata rendigüer opūha tupri vahe. <sup>2</sup>Cuachiarmi oyemboi vahe vireco opove. Opi oacato cotindar pipe opīro para guasu rese, ambuae opive evocoyase opīro ivi rese. <sup>3</sup>Evocoyase sāse pīratá, inungar yagua pīta rāse; sāse, evocoyase siete tupri osunu vahe ñehe oyendu yuvireco. <sup>4</sup>Oñehepase, ahese ñehe che aicuachiara viña; asendu rumo iva sui ñehesa aipo ehi vahe: “Eremboyecuai rene acoi siete tupri osunu vahe ñehe, ndereicuachiai chietera” ehi cheu.

<sup>5</sup>Evocoyase Tūpa rembiguai asepia vahecuer, ahe acoi opīro vahe para guasu rese, ivi rese avei opo oacato cotindar omopuha iva coti. <sup>6</sup>Ichui Tūpa ndopai vahe rer pipe evocoi oyapo vahe iva, ivi, para guasu iyavei opacatu mbahe ipor reseve, omoingatu oñehe aipo ehi: “Nasarosa iri chietera; <sup>7</sup>oyepotase rumo imoñuvirío ovasa Tūpa rembiguai upe güemimbi moñehe āgua, ahese imboaviyesara Tūpa remimbotar yipindar ndicuasai vahe, ahe acoi mombehu vahe güembiguai oñehe mombehusar upe aracahe” ehi.

<sup>8</sup>Ñehesa asendu vahe iva sui oñehe iri cheu aipo ehi: “Eso, tereipişi cuachiarmi imboipri Tūpa rembiguai vireco vahe evocoi opīro vahe para guasu rese ohā, ivi rese avei no” ehi. <sup>9</sup>Evocoyase aso Tūpa rembiguai upe, aporandu cuachiarmi rese, ahese ahe aipo ehi cheu: “Ndo co, eipisi, ehu. Nde yuru

pipe evocoyase sēhera eiri nungar, nde aviterve rumo irora” ehi cheu.

<sup>10</sup>Ahese aipişi cuachiarmi cute Tūpa rembiguai sui, ipare ahu; yipindar sēhé che yuru pipe inungar eiri, amocopase rumo, che aviterve iró cheu. <sup>11</sup>Evocoyase aipo ehi yuvireco cheu: “Nde ereñehe irira Tūpa aipo ehi vahe rese ambuae-ae tecua pipendar rese, ivi rupindar rese, ambuae-ae ñehe vahe rese, mborerecuar rese avei no” ehi.

**Ñuvirío ava Tūpa recocuer mombehusar**

**11** Ipare ombou vara mbahe rāhasa yuvireco cheu, ichui aipo ehi yuvireco cheu no: “Erio, teresāhapa tūparo, mbahe reropovēhepri renda avei, ipare opara ereipapa ipipendar Tūpa mboeteisar retacuer” ehi. <sup>2</sup>“Nderesāhai chira rumo ñachimbri pipe tūparo rocar rupi. Esepia, evocoi opa imondosa ava Tūpa ndoicuai vahe upe, ahe opīroa tecua nimarai vahe rese yuvireco cuarenta y dos yasi rupi” ehi. <sup>3</sup>“Ipare ñuvirío ava amondora che recocuer mombehu āgua opacatu ava upe mil dosciento sesenta ari rupi. Ahe omondera turucuar ipo guasu vahe yuvireco” ehi.

<sup>4</sup>Co ava ñuvirío, ahe inungar ñuvirío ivira Olivo iyavei inungar ñuvirío vera hi yuvinoha vahe ivi Yar rovai. <sup>5</sup>Acoi que oimese ovireco mara pota vahe, ahese che reco mombehusar yuru sui osēra tata sapipa āgua; ēgüe ehira ava omano que che reco mombehusar reco momara potasar. <sup>6</sup>Co ñuvirío vireco opīratasa oqui vahe mombita āgua, acoi ari rupi che reco mombehu viteseve yuvireco; iyavei vireco pīratasa i recuñaro āgua tuvi pipe yuvireco, imombaraisu uca āgua avei ivi opacatu-catu tēi mbaherasi pipe güemimbotar rupi.

<sup>7</sup>Omboaviyepase rumo Tūpa reco mombehusa yuvireco, ahese osēra

ivicular guasu ipicucu vahe sui mbahe ipi vai. Ahe ovavara sese, osecopira, ichui oyucara. <sup>8</sup>Sehögüer evocoyase yangarecuavêhi tēi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amove ava, “Sodoma pendar nungar yuvirecoi” ehi yuvireco; “Egipto pendar nungar yuvirecoi” ehi avei yuvireco no. <sup>9</sup>Ipare mbosapi ari yemombitesa rupi, ava-ava tēi tecua rupindar, ava ambuae-ae tēi vahe, ñehe ambuae vahe iyavei ambuae-ae ivi rupindar osepiãno tēira sehögüer yuvireco iyavei ahe noñoti ucai chietera ava upe yuvireco. <sup>10</sup>Ava yuvirecove vahe ivi pipe, ahe oviharetera yuvireco imano rese. Ëgüe ehira sorivete, iporrecora oyese yuvireco. Esepia, evocoi ñuvirío ava Tüpa ñehe mombehusar imombaraisupirer yuvirecoi.

<sup>11</sup>Mbosapi ari yemombite pare rumo, Tüpa opa ombogüerayevi, ahese opühapa yuvireco. Evocoyase ava opacatu osepia vahe osiquiyé iteanga yuvireco ichui. <sup>12</sup>Ipare ahe ñuvirío osendu yuvireco ñehesa ipirata vahe iva suindar aipo ehi vahe: “¡Peyeupipa ave ivate!” ehi. Evocoyase opa oyeupi ivave yuvirasos iva quiha pāhu rupi oamotarēhisareta rembiepiave. <sup>13</sup>Aheseve voi oime ivi ririi tuvichá vahe, ichui tecua guasu imbodiesa yahocuer opa onduru; ahese siete mil tupri ava opa omano yuvireco. Evocoyase ava rumbirer, osiquiyepave tēi osapucai Tüpa iva pendar upe imboeteisa pipe yuvireco.

<sup>14</sup>Opa mbahe-mbahe tēi moñuviriosos cute; ou poyava irira rumo imombosapisa.

### Imoñuvirío ovasa Tüpa rembiguai omoñehe güemimbi

<sup>15</sup>Imoñuvirío ovasa Tüpa rembiguai omoñehese güemimbi, ahese oyeendu ñehesa ipirata vahe iva suindar aipo ehi vahe:

“Yande Yar Tüpa, Sembiporavo Poropisirosar avei vireco co ivi pipendar mborerecuasa opovrive yuvireco cute.

Ahe evocoyase mborerecuar apirēhi va-herã itera secos” ehi.

<sup>16</sup>Evocoyase veinticuatro tupri icuaipri, evocoi oguapi vahe yuvinoi Tüpa renda rovai, ahe oyeaivi omboya ité osiva ivi rese imboeteisa pipe yuvireco, <sup>17</sup>aipo ehi:

“Aviye ndeu ore Yar, Tüpa mbahe mboavaisarēhi, nde acoi yipisuive vahe ité,

ereicoveño avei cūrítei.

Esepia, nde pīratasa tuvichá vahe pipe ereporocuai eico.

<sup>18</sup>Ambuae tecua rehii pendar nde amotarēhi ité yuvireco.

Nde ñemoirosa rumo cūrítei oyepota, iyavei nde porandusa oime voira ava omano vahe upe.

Iyavei eremondora mbahe porerecosa nde rembiguai eta nde ñehe mombehusar upe,

ndeundar seco catupri vahe upe, iyavei acoi nde rer mboeteisar upe no, que seco ivate vahe upe, que seco ivi coti catu vahe upe avei no; iyavei eremocañira co ivi pipe mbahe tēi rerusar” ehi yuvireco.

<sup>19</sup>Ahese oyemboi tüparo iva pendar, iyavei oyecua tupri cuachiar porocuita resendar riru. Ipare overa-vera, siapu guasu, osunu, ivi oririi, amanda osururú avei no.

**Cuña iyavei mbahe ipi  
oporomocañi vahe**

**12** Evocoyase iva rese oyecua mbahe poromondiisa tuvichá vahe ambuae mbahe mboyecua água: oime cuña iturucuar inungar ari rendigüer, aviye opïro vahe yasi rese ohã, oãca yeguaca rese doce tupri yasitata vireco. <sup>2</sup>Co cuña ipuruha oico, sãsé tēi omembri iha pota água oyesui. Esepia niha, oiporará ité tasicuer. <sup>3</sup>Ipare coiye oyecua iva rese ambuae mbahe mboyecua tuprisa: mbahe ipi pïra vahe, ahe ñaca siete tupri, sãchi evocoyase diez iyavei vireco yeguaca oãca yacatu. <sup>4</sup>Suguai evocoyase ombotiriri yasitata iva pendar imombosapisa sui ñepeiyahocuer seraso. Ipare opa omombo ivive. Ahe evocoyase opïta osãro cuña imembira pota vahe rovai ohã, “Tahupaño voi imembri oha ramoseve” ehi viña. <sup>5</sup>Ipare co cuña membri oha cuimbahemi, ahe mborerecuar virecora mbococa guarepochi apopri, ipïrata catu vahe secoira opacatu ava ivi rupindar upe. Ichui serocuasa voi serasosa Tüpa rovai. <sup>6</sup>Cuña evocoyase oñemi ivi iporupirēhisave oso. Aheve omoingatu Tüpa iyemboerecua água, eipeve icaru água mil dosciento sesenta ari rupi.

<sup>7</sup>Oime avei vavasa ivave; ahese Tüpa rembiguai iva pendar ivate catu vahe Miguel güeru ovoya eta ovava água mbahe ipi oporomocañi vahe upe ivoya upe avei yuvireco. <sup>8</sup>Ndoicatui eté rumo Miguel recopi água yuvireco. Sese ndipoi eté ivave seco água yuvireco chupe. <sup>9</sup>Ēgüe ehi imboyepepisa mbahe ipi oporomocañi vahe reco pïratasa sembiguai eta reseve; opa imombosa ivi pipe yuvireco. Evocoi mboi vai, “Carugar” ehi vahe yuvireco chupe; “Satanás” ehi avei yuvireco chupe.

Evocoi niha ava ombopa-mbopa tēi vahe opacatu ivi pipe yuvireco.

<sup>10</sup>Evocoyase asendu ñehesa ipïrata vahe ivave, aipo ehi vahe:

“Cüritei oime poropïsirosa, pïratasa iyavei yande Tüpa mborerecuasa, Poropïsirosar mborerecuasa avei no.

Esepia niha, imboyepepisa iva sui acoi oseca-seca vahe yande rivri Tüpa reroyasareta recocuer momara água pïtu, ari yacatu rupi yande Ru Tüpa rovai.

<sup>11</sup>Yande rivri osecoreroyi Ovesami ruvi piyere pipe sui yuvireco iyavei acoi secocuer mombehu tuprisa pipe sui avei no.

Esepia niha, ndosiquiyei eté güietecuer mocañi água yuvireco.

Ahe rumo oyemoingatu voi eté omano água.

<sup>12</sup>¡Peyemboviha catu pe iva iguar peico vahe!

Pe rumo, ¡peparaisu catura ivi pipe, para guasu pipe avei peico vahe!

Esepia niha, Carugar ogüeyi pēu oñemoirosa pipe, oicuse güeco pucüehi água” ehi.

<sup>13</sup>Ipare mbahe ipi oporomocañi vahe oicuse imombopri güecose ivi rese, ahese omoña cuña imembri cuimbahemi reseve yamotarēhisa pipe. <sup>14</sup>Evocoi cuña upe rumo imondosaño ñuvirío vira guasu pepo iveve água chupendar ivi imoingatupri ava porēhisave seco água, amombri mbahe ipi oporomocañi vahe sui. Aheve oyopoi mbosapi araviter yemombitesa rupive. <sup>15</sup>Ipare mbahe ipi oporomocañi vahe oyuru rupi ombotipimacua cuña raquicuei iai apo ‘tocañi tēi’ oyapave viña. <sup>16</sup>Ivi rumo oime co cuña pïtiviisa, ahe oyeca. Ipare opa omoco iai evocoi mbahe ipi oporomocañi vahe rembiapo. <sup>17</sup>Evocoyase, oñemoiró iteanga cuña rese, ipare oso ovava ambuae ichuindar rehii rese, ahe

omboyeroya vahe ité Tūpa porocuita yuvireco iyavei yuvirecoi tupri vahe Jesucristo remimombehu rupi. <sup>18</sup>Ipare mbahe ipi oporomocañi vahe opita para guasu popive ohā.

### Ñuvirío mbahe ipi vai

**13** Ipare asepia para guasu pipe sui osése mbahe ipi vai, ahe siete tupri ñaca vahe iyavei diez tupri sáchi. Guāchi yacatu evocoyase vireco ñepeipei oyeguaca, iyavei oāca yacatu rese vireco terer Tūpa upe mbahe tēi vahe. <sup>2</sup>Co mbahe ipi vai aviye tupri acoi yaguar iparañi vahe; iyavei ipi aviye tupri oso pi, iyuru evocoyase aviye yagua pīta yuru. Mbahe ipi oporomocañi vahe evocoyase omondo opīratasa iyavei omborerecuasa chupe. <sup>3</sup>Ñepe mbahe ipi vai āca oyeapicha guasu vahe ndoyavii omano vaheerā ité viña; ahe rumo ocuera tupri iriño evocoyase opacatu guasu ava sepiase, ndoyembovihai. Ichui viroya catu yuvireco. <sup>4</sup>Omboetei guasu mbahe ipi oporomocañi vahe sereco yuvireco. Esepia, omondo omborerecuasa mbahe ipi vai upe. Ipare ahe avei omboetei ai yuvireco no, aipo ehi yuvireco: “Ndipoi eté mbahe ipi vai nungar, iyavei ndipoi eté ava oicatu vahe ovava vaheerā sese” ehi yuvireco.

<sup>5</sup>Iyavei mbahe ipi vai upe ipotasa iyemboivate ai āgua oñehe pipe ava rovaque iyavei Tūpa reroñro āgua avei no, iyavei mborerecuar guasu seco āgua cuarenta y dos yasi rupi. <sup>6</sup>Ēgüe ehi ñehe mara-mara tēi Tūpa rese, ñehe-ñehe tēi avei serer maranehi rese, sēta rese, iva pendar rese avei no. <sup>7</sup>Imondosa avei chupe vavasa apo uca āgua Tūpa upendar ava eta upe secopi āgua. Ipare imondosa avei mborerecuar seco āgua chupe ava ambuae-ae tēi vahe upe, secua ambuae vahe upe, ambuae-ae tēi ñehe vahe upe, iyavei ambuae ivi rupin-

dar upe avei no. <sup>8</sup>Ipare omboetei ai sereco yuvireco opacatu ava ivi pipendar acoi ivi apoēhi suive ndovirecoi vahe güerer Ovesami cuachiar tecovesa re-sendar pipe, ahe niha acoi yucapirer.

<sup>9</sup>Que amove osendu pota vahe, toyapisacaño co rese:

<sup>10</sup>“Acoi ava oyeoquenda uca vaheerā, oyeoquenda ucaño itera; iyavei acoi ava omano vaheerā quise pucu pipe, ipipeño ité omanora.”

Co pipe oyecua Tūpa rese yeroyasa iyavei ipīratasa ava chupendar rese.

<sup>11</sup>Ipare asepia ambuae mbahe ipi vai osē vahe ivivri sui. Co vireco ñuvirío guāchi ndoyavii tupri Ovesa rāchi, mbahe ipi oporomocañi vahe ñehe pipe rumo oñehe oico. <sup>12</sup>Ahe vireco opacatu evocoi yipindar vahe mbahe ipi vai mborerecuasa sovaque, iyavei ava ivi pipendar yuvirecoi vahe upe omboetei uca yipindar mbahe ipi vai, ahe acoi ocuera tupri vahe oyeapichasa oyuca rāgüer sui. <sup>13</sup>Iyavei oyapo setá mbahe poromondiisa mbahe mboyecua āgua. Iva sui eté niha oiti uca tata ivive imbou opacatu ava rembiepiave. <sup>14</sup>Om-bopa tēi ava ivi pipendar yuvirecoi vahe mbahe poromondiisa pipe evocoi imondosa vahe yapo āgua chupe yipindar mbahe ipi vai rovai. Ipare oporocuai yapichapri ocuera tupri vahe rahangapo āgua imboeteisave. <sup>15</sup>Ipare imondosa evocoi sahanga upe ‘toñehe, toyuca uca avei ava opacatu omboeteiēhisar’ oyapave. <sup>16</sup>Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava ni-mañecoprii vahe upe, mbiguai tēi upe, ahe chupe, “Toyecuachía opo oacato cotindarve yuvireco, anise osivave” ehi. <sup>17</sup>Ahese ava ndipoi eté oicatu vahe mbahe rerocua, anise que mbahe mondo āgua acoi ndovirecoise mbahe ipi vai



rer, anise serer retacuer ndovirecoise oyese no.

<sup>18</sup>Iya pereco mbahecuasa co renducua tupri āgua. Acoi osenducua vahe toicua tupri mbahe ipi vai rer retacuer. Evocoi niha ava rer retacuer. Ahe seiscientos sesenta y seis.

#### 144,000 ava iporavopri sapucaisa

**14** Ipare asepia Ovesami ivitri Sión rese imoha. Ahe supi yuvirecoi ciento cuarenta y cuatro mil tupri ava evocoi oicuachía vahe Ovesami rer, Tu rer avei osiva rese yuvireco. <sup>2</sup>Ipare asendu mbahe riapu iva sui ou vahe; ndoyavii acoi itu guasu riapugüer iyavei ndoyavii eté acoi osunu vahe oporororó iteanga vahe; ndoyavii avei acoi ava setá vahe omoñehese arpa yuvireco, ěgüe ehi siapugüer. <sup>3</sup>Ipare osapucaí sapucaisa ipiasu vahe yuvireco Tüpa rovai iyavei iva pendar irungatu yuvirecove vahe rovai, icuaipri eta rovai avei no. Ñepeí yepe que iva pendar ndoicatuí eté evocoi sapucaisa rese oyembohe vaheerā. ěgüe ehi rumo ava ciento cuarenta y cuatro mil tupri yuvirecoi vahe, evocoi oñepisiro vahe ivi pipendar pāhu sui, ahe güeraño tupri ité oicatu osapucaí yuvireco. <sup>4</sup>Co ava ndoyapoi vahe ité mbahe co coti tēi cuña rese. Esepia, oñearo tupri güeco catuprisa pipe yuvireco; iyavei osaquicue moñaño ité Ovesami que iguatasa rupi. Opa serocuasa ava pāhu sui iyavei inungar yipindar mbahe seropovēhepri Tüpa upe, Ovesami upe avei. <sup>5</sup>Ndipoi eté que temira sese. Esepia niha, ndipoi eté mbahe oyavi vahe yuvireco.

#### Mbosapi Tüpa rembiguai omombehu iñehe ava upe yuvireco

<sup>6</sup>Evocoiyase asepia ambuae Tüpa rembiguai iva pendar oveve vahe iva mbiter rupi iyavei vireco Tüpa Ñehengagüer pīsirosa resendar ndopai

vahe imombehu āgua opacatu ava co ivi pipendar upe: opacatu ivi rupindar upe, ava ambuae-ae vahe upe, iñehe ambuae-ae vahe upe, opacatu tecua rupindar upe avei no. <sup>7</sup>Ipare oñehe pīrata aipo ehi: “Pesiquire Tüpa sui iyavei pesapucaí seco ivatesa rese chupe no. Esepia niha, cūrítei oyepota ari chupe ava recocuer rese iporandu āgua. Pemboetei catu oyapo vahecuer iva, ivi, para guasu, i ohē vahe avei no” ehi.

<sup>8</sup>Ambuae Tüpa rembiguai iva pendar raquicuerindar aipo ehi oico: “¡Oviapi Babilonia guasu cute! ¡Esepia niha, evocoi opa ombosavaipo opacatu ambuae tecua pendar ohigua yemboaguasa tēisa resendar pipe!” ehi.

<sup>9</sup>Ipare ambuae Tüpa rembiguai iva pendar imombosapisa, saquicue moña aipo ehi pīratá iri oico: “Acoi que ava omboetei vahe mbahe ipi vai sereco, sahanga avei no, iyavei acoi oyembohe catu vahe oyecuachía āgua osiva rese, que opo rese no, <sup>10</sup>oipisí itera Tüpa ñemoirosa ipīrata vahe ité; ipare omombaraisura setecuer azufre ocai vahe pipe güembiguai iva pendareta reco maranehi rovaque, Ovesami rovaque avei no. <sup>11</sup>Tātachi icaigüer pendar evocoiyase oyeupira ndopai vaheerā, ahese ndipoi chietera pītuhusa pītu, ari pipe evocoi mbahe ipi vai mboeteisar upe, sahanga mboeteisar upe avei no, iyavei acoi vireco vahe serer cuachiapri oyese yuvireco no” ehi.

<sup>12</sup>Ěgüe ehira Tüpa rese ité yuvirecoi vahe yeroyasa oyecua ahe acoi iporocuita mboaviye tuprisar, Jesús reroya tuprisar avei yuvireco!

<sup>13</sup>Ahese asendu ñehesa iva pendar aipo ehi vahe cheu: “Eicuachía co: Co pipe suive sorivete catura acoi ava omano vahe yande Yar rese yuvireco” ehi.

“Ěgüe ehi eté —ehi Espiritu imombehu—, opituhura oporaviquisa

sui yuvireco. Esepia, mbahe sembiapo rerācua osora ivave supi” ehi.

### Ivi pipendar recoñhasa

<sup>14</sup>Ahese asepia iva quiha morochí vahe; iharive ndoyavii ava oguapi vahe oí. Vireco niha oyeguaca oro apopri oāca rese iyavei mbahe miti asiasa saimbé vahe vireco opove. <sup>15</sup>Ipare osē ambuae Tūpa rembiguai tūparo sui. Ahe osapucái pīrata evocoi iva quiha harive chini vahe upe: “¡Eyasía nde remiti iyavei emonuha nde rembiasia! ¡Esepia, nde remiti ivi pendar yaviye ité!” ehi ava recocuer uve chupe. <sup>16</sup>Evocoiyase evocoi chini vahe oyasia güemiti ivive oico, ahese opa omonuha güembiasia.

<sup>17</sup>Ipare osē ambuae Tūpa rembiguai tūparo sui, ahe avei vireco mbahe miti asiasa saimbé vahe. <sup>18</sup>Ipare ambuae Tūpa rembiguai osē mbahe reropovēhepri renda sui, ahe tata rese hañecosar secoi. Iyavei oñehe pīrata evocoi vireco vahe mbahe miti asiasa upe aipo ehi: “¡Eyasía uva ha apacuar, evocoi oime vahe ivi pipe! ¡Esepia niha, opa yaviye!” ehi. <sup>19</sup>Evocoiyase co Tūpa rembiguai inungar oyasia vahe uva ha ěgüe ehi opa ava ipeha ivi pipendar. Ipare opa oyapocatu Tūpa ñemoirosa raro āgua. <sup>20</sup>Ipare inungar uva ha icambepri tecua cupeve, ěgüe ehi co ava imombaraisu; ichui osē tuvi evocoi tipigüer oyepota ité cavayu yuru penda rupi eté sese, ahe ipucucuer trescientos kilómetros tupri ité.

### Ipa siete tupri Tūpa rembiguai güeru mbaherasi yuvireco

**15** Ipare asepia ivave ambuae mbahe mboyecuasa tuvichá vahe poromondiisa: siete Tūpa rembiguai, siete tupri mbaherasi ipa vahe vireco vahe, ahe ipá vahe ité Tūpa ñemoirosa.

<sup>2</sup>Iyavei asepia para guasu ndoyavii yepiasa oyeseha vahe tata rese.

Ahe ipopive yuvinoha ati mbahe ipi vai recopisar, sahanga recopisar iyavei nomondo uca potai vahe serer cuachía āgua yuvireco oyese. Ahe vireco Tūpa upendar arpa yuvireco. <sup>3</sup>Ipare osapucái Tūpa rembiguai Moisés sapucaisa yuvireco, iyavei Ovesami sapucaisa aipo ehi:

“Tuvichá opacatu mbahe nde rembiapo, che Yar Tūpa opacatu mbahe mboavaisarēhi; nde recocuer supi tupri vahe ité; seco ivi vahe.

¡Too, nde mborrecuar guasu opacatu ivi rupindar ereico!” ehi.

<sup>4</sup>“Yar, nde sui opacatu ité osiquiyera yuvireco nde mboetei āgua.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvireco. Esepia niha, sepiasa nde rembiapo supi tupri vahe” ehi.

<sup>5</sup>Ipare asepia ivave oyemboise Tūpa rēta imaranehi vahe. Aheve acoi yapocatusa mborocuaita resendar. <sup>6</sup>Evocoiyase ichui yuvinosepa evocoi siete Tūpa rembiguai vireco vahe siete tupri mbaherasi vai yuvireco. Ahe iturucuar secose vahe, ndiquihai vahe, sendí iteanga. Vumbicuasa ipe vahe oro apopri pipe evocoiyase oyeumbicua opochiha rupi tupri yuvireco. <sup>7</sup>Ipare ñepeí evocoi irungatu iva pendar yuvirecove vahe pāhu pendar omondo siete tupri Tūpa rembiguai upe siete Tūpa ñemoirosa riru oro apopri, ahe oicove vahe ité, ndopai vahe. <sup>8</sup>Ipare Tūpa rēta omboapipo tātachi, evocoi ou vahe Tūpa reco porañetesa iyavei ipīratasa sui. Aheve ndiyai eté que ava upe seique āgua acoi opase voi eté omomba siete tupri mbaherasi vai vireco vahecuer siete Tūpa rembiguai.

### Siete Tūpa ñemoirosa riru

**16** Evocoiyase asendu ñehesa ipīrata vahe osē vahe Tūpa rēta pipe sui.

Ahe aipo ehi siete Tūpa rembiguai yuvirecoi vahe upe: “Peso, tapeipiyerepa ivi hari rupi evocoi siete tupri mbahe riru pipendar Tūpa ñemoirosa” ehi.

<sup>2</sup>Yipindar vahe Tūpa rembiguai opa oipiyere igua riru pipendar ivi hari rupi; evocoi opacatu ava vireco vahe mbahe ipi vai rer oyese sahanga mboeteisar tēi avei, ahe chupe oime setá caracha vai tasi vahe.

<sup>3</sup>Tūpa rembiguai imoñuviriosa opa oipiyere igua riru pipendar para guasu pipe. Ahe evocoiyase oyeapo omano vahe ruvi nungar; ichui opa omano opacatu mbahe yuvirecove vahe ipipe.

<sup>4</sup>Tūpa rembiguai imombosapisa opa oipiyere igua riru pipendar iai pipe, i ohē vahe pipe avei no. Ipare opa ahe oyeapo tuvī yuvireco. <sup>5</sup>Co pare asendu Tūpa rembiguai i rese ihañeco vahe ñehesa aipo ehi:

“Nde seco tupri vahe ité ereico evocoi  
ava upe eremouse nde ñemoirosa,  
che Yar Tūpa,  
seco maranehi vahe.

Nde yipisuivendar ité ereico.

<sup>6</sup>Esepia, ahe opa oyuca ndeundar ava iyavei nde ñehe mombehúsar yuvireco.

Cūritei rumo eremboihu uca tuvī pipe.  
¡Evocoi nungar upe aviyesa rupi eté!”  
ehi.

<sup>7</sup>Asendu avei ambuae ñehesa mbahe reropovēhesa renda sui aipo ehi vahe: “Supi eté, che Yar Tūpa, opacatu mbahe mboavaisarēhi, nde ava recocuer mombaraisusa supi tupri vahe ité iyavei nde reco ñvi vahe ité no” ehi.

<sup>8</sup>Tūpa rembiguai imoirungatasa, opa oipiyere mbahe riru pipendar ari rese, ipare ari upe imondosa pīratasa ava rapipa āgua. <sup>9</sup>Ipare opacatu ité ava yuvirocaipa tupri; ndoyevii eté rumo Tūpa upe iyavei nomboteiño ité yuvireco. Ēgüe ehi rumo ñehe mara-mara tēiño mbaherasi rerecose Tūpa upe yuvireco.

<sup>10</sup>Tūpa rembiguai imbopoyandeposa oipiyere mbahe riru pipendar mbahe ipi vai renda rese. Ahese aviyeteramo tēi serecuar ipovri pendar avei pītumimbisave yuvirecoi. Ava evocoiyase oñeapecusuhu-suhu tēi yuvireco mbahe rasicuer pāhuve; <sup>11</sup>ndopoiño ité rumo mbahe-mbahe tēi aposa sui yuvireco, ahe rumo ñehe mara-mara tēiño Tūpa ivate vahe rese oyeupe mbahe tasi vahe pāhuve yuvireco.

<sup>12</sup>Tūpa rembiguai imoñepe i ovasa oipiyere mbahe riru pipendar iai guasu Eufrates pipe. Ahe evocoiyase opa ipiru peri apo āgua añihivei coti sui mborerecuareta yu āgua.

<sup>13</sup>Ipare asepia mbahe ipi oporomocañi vahe, mbahe ipi vai, ndahei vahe Tūpa ñehe mombehúsar supi vahe avei, ahe yuvirecoi vahe yuru rupi yuvínose mbosapi carugar vireque nungar. <sup>14</sup>Co Carugar suindar yuvirecoi, ahe oyapo poromondiisa mbahe mboyecuaa yuvireco. Ipare opa yuvínose opacatu ivi rupi mborerecuareta monuha āgua vavasave nara, acoi ari cañi pipe Tūpa mbahe mboavaisarēhi amotarēhisave.

<sup>15</sup>“Peyapisaca tupri che ñehe rese, che aviyeteramo tēi ayura imonda rai vahe nungar curi. Sorivetera acoi ava imahe-moha vahe oyemonde tupri vahe güembiaapo aviye vahe pipe. Ahese nochí chietera oico che sui” ehi.

<sup>16</sup>Ipare opa omonuha mborerecuareta hebreo ñehe pipe serer Armagedón ve.

<sup>17</sup>Evocoiyase imbosietesa Tūpa rembiguai oipiyere ñemoirosa mbahe riru sui ivitu rupi. Ipare iva pendar Tūpa rēta pipe sui osē ñehesa ipīrata vahe evocoi ou vahe senda sui: “¡Opa ité yaposa cute!” ehi. <sup>18</sup>Ahese oime overa vahe, mbahe siapu guasu vahe iyavei osunu vahe. Ipare ivi oririi ipīrata catu vahe opacatu ivi ririi sui ava yuvirecove vite-seve ivi pipe. <sup>19</sup>Tecua guasu oyeca-yeca mbosapi rupi, opacatu tecua evocoiyase

opa onduru ivi pipendar. Ipare Tūpa oyemomahenduha evocoi tecua guasu Babilonia pendar rembiapo ai rese, evocoyase omondo oñemoirosa ipīrata catu vahe chupe. <sup>20</sup>Opacatu caha pāhu, ivitri avei ocañipa ité yuvireco. <sup>21</sup>Iyavei yuviroviapipa iva sui ava harive amanda guasu, ahe iposiigüer cuarenta kilos rutei. Ava rumo ñehe mara-mara tēño vite ité Tūpa upe yuvireco amanda sui tēi. Esepia niha, evocoi Tūpa poronupasa ivaté catu vahe.

### Cuña oyemondo-mondo tēi vahe mocañisa

**17** Siete Tūpa rembiguai vireco vahecuer mbahe riru yuvireco, ipāhu pendar ñepeu ou aipo ehi cheu: “Erio, amboyecua co cuña yaguasa serai vahe upe ñemoirosa ndeu, ahe evocoi uguapi i harive oī” ehi. <sup>2</sup>“Co cuña rese yaguasa-guasa tēi mborerecuareta ivi pipendar yuvireco iyavei ava ivi pipendar inungar osavaipo vahe ndopoi potai eté oyemboaguasasa sui yuvireco” ehi cheu.

<sup>3</sup>Ipare che quer nungar pipe Espiritu omboyecua vahe cheu, Tūpa rembiguai iva pendar che reraso ava porēhisave. Aheve asepia cuña mbahe ipi vai pīra vahe harive chiní. Evocoi mbahe ipi vai opacatu rupi oyapete tupri ñehesa vai Tūpa amotarēhisa sereco oyese, iyavei vireco siete tupri oāca, diez tupri guāchi. <sup>4</sup>Co cuña turucuar, suendi vahe, pīra vahe avei no, iyavei oyemoendi yai oro pipe oico, ita iporañete ai vahe pipe, opohir pipe avei no. Vireco igua riru oro apopri. Ipipe omboapipo mbahe yavaeté vahe sereco oyemboaguasa-guasa tēisa; <sup>5</sup>iyavei icuachiapri isiva rese terer ndicuasai vahe aipo ehi vahe: “Co Babilonia guasu, cuña yaguasa-guasa tēi vahe si, opacatu ava ivi pipendar secocuer yavaeté vahe si avei no” ehi.

<sup>6</sup>Ipare aicua evocoi cuña osavaipo vahe oī Tūpa reroyasar ruvi pipe iyavei acoi Jesús recocuer mombehusa sui tēi yucapri vahe ruvi pipe avei no.

Co asepiase che quer nungar pipe, ndache mbovihai eté. <sup>7</sup>Ahese ahe Tūpa rembiguai iva pendar aipo ehi cheu: “¿Mahera vo nderevihai eico? Aicua ucara mo ndeu co imombehusa ndicuasai vahe cuña resendar, iyavei acoi mbahe ipi vai vireco vahe siete tupri oāca, diez tupri avei acoi sāchi” ehi. <sup>8</sup>“Acoi mbahe ipi vai eresepia vahe ahe yipive secoi vahe, cūrítei rumo ndipo iri; osēra rumo ivicuar guasu ipicucu vahe sui omano āgua renonde curi. Acoi ava ivi pipendar ndovirecoi vahe güerer cuachiar tecovesa resendar pipe yuvireco yipive ivi apoēhiseve, ahe ndovihai chira yuvireco osepiase evocoi mbahe ipi vai yipive oicove vahe viña, ndoicove iri rumo, oyevi irira curi.

<sup>9</sup>“Co rese icuasara uma vireco mbahecua senducua āgua: Co siete tupri vahe ñaca ahe omombehu ‘siete tupri ivitri’ oyapave. Ahe iharive evocoi cuña uguapi oī iyavei ahe siete ñaca avei omoporēhi ‘siete tupri mborerecuar’ oyapave. <sup>10</sup>Cinco tupri mborerecuar evocoi ipāhu pendar ndipo iri yuvireco, ñepeño evocoyase oporocuai cūrítei oico, ambuae rumo ndou vitei. Ouse rumo ipandar, ou raimi tēira. <sup>11</sup>Mbahe ipi vai secoi vahe yipindar, ndoicove iri cūrítei, ahe imbohochosa secoira mborerecuarā, yepe siete tupri vahe mborerecuar guasu mboetasa viña, ahe rumo ocañi tēi vaherā secocuer” ehi.

<sup>12</sup>“Evocoi diez tupri vahe sāchi, ahe mborerecuar diez tupri ndoyuviroique vitei vahe oporocuai vaherā yuvireco. Oyoya rumo oporocuai raimi tēira mbahe ipi vai reseve yuvireco curi. <sup>13</sup>Co diez tupri mborerecuar yuvirecoi vahe oyoya guasura ipihañemoñeta evocoi mbahe ipi vai upe omondo

vaherã pîratasa iporocuai âgua yuvîreco. <sup>14</sup>Ipare ovavara Ovesami rese yuvîreco; Ovesami rumo osecoreroyîra. Esepia niha, ahe yande Yar opacatu ava Yar iyavei mborerecuar guasu secoi no opacatu mborerecuareta rerecuar, iyavei acoi ava yuvîrecoi vahe sese, ahe senoi pri yuvîrecoi iyavei iporavopri oye-movîracuaño vahe ité supî oguata âgua yuvîreco” ehi.

<sup>15</sup>Iyavei Tûpa rembiguai aipo ehi cheu: “Evocoi para guasu eresepia vahe, îharive cuña yaguasa-guasa tõi vahe oguapî oî, ahe ‘ava rehîi tecua yacatu rupindar, înehe ambuae-ae vahe iyavei opacatu ambuae tõi vahe ivî rupindar’ oyapave. <sup>16</sup>Evocoi eresepia diez tupri vahe sãchi mbahe ipi vai rese, ahe ndoy-ambotai chira cuña yaguasa-guasa tõi vahe; iyavei osequiî tuprîra seya; ohu-para soho, ipare opara osapî. <sup>17</sup>Tûpa niha omondo ipiha pipe mbahe güemimbotar apo âgua ‘ahe toyemongerêhi yuvîreco omborerecuasa mondo âgua mbahe ipi vai upe; tomboaviye rane ité che remimombehugüer yuvîreco’ oyapave. <sup>18</sup>Iyavei evocoi cuña yaguasa-guasa tõi vahe eresepia vahe, evocoi niha tecua guasu ivî pipendar mborerecuareta vîreco vahe opovrive yepî” ehi Tûpa rembiguai cheu.

### Babilonia viapi agüer

**18** Ipare asepiã ambuae Tûpa rembiguai ipîrata vahe ogüeyî vahe iva sui. Vîreco omborerecuasa ivate vahe, ahe sendigüer osesape tupri ivî rupi. <sup>2</sup>Iyavei oñehe pîrata oico aipo ehi: “¡Oviapi tecua Babilonia cute! Carugar yuvîroique sese, opacatu carugar naporai vahe iyavei vîrai vai nungar yuvîroique sese.

<sup>3</sup>Esepia niha, opacatu ambuae ivî rupindar inungar osavaipo vahe ndopoi potai eté yemboaguasasa sui, evocoyase mborerecuareta ivî pipen-

dar oyapo mbahe tõi yuvîreco sese, iyavei mbahe mboepisar ivî pipendar oyemombahe eta imbahe porañete ai vahe pota raisa pipe sui yuvîreco” ehi.

<sup>4</sup>Evocoyase asendu ambuae ñehesa iva sui ou vahe, ahe aipo ehi:

“Peyepipi evocoi tecua guasu sui, pe pico vahe cheundar evocoi yangaipã rese imboyoyaêhi âgua.

Iyavei ñepeî yepe taperupiti eme imbaherasisa.

<sup>5</sup>Esepia niha, yangaipagüer oyepota ité ivave.

Tûpa evocoyase oyemomahenduha mbahe-mbahe tõi sembiapogüer rese chupe.

<sup>6</sup>Inungar ahe ambuae upe, êgüe peye tupri avei chupe; pemboepi ñuvirío rupi mbahe sembiapogüer chupe; pemomirata catu mbahe igua ñuvirío rupi pemboyeseha imondo chupe;

<sup>7</sup>pemondo setecuer mombaraisusa chupe, tiparaisu tahoyoya iyemondo-mondo tõi agüer iyemboetei ai agüer rese avei no.

Esepia niha, ahe aipo ehi opiha pipe oico:

‘Cohave che aguapî vîte mborerecuar che reco nungar pipe.

Ndahei imer mano vahecuer che aico, iyavei ndacheparaisui chietera’ ehi viña.

<sup>8</sup>Sese niha aviyeteramo tõi oura mbaherasisa chupe:

paraisusa, tieporêhi, manosa; ipare sapisara.

Esepia niha, yande Yar Tûpa mbahe mboavaisarêhi secoi, ahe, ‘Tomano’ ehi chupe” ehi.

<sup>9</sup>Evocoyase mborerecuar ivî pipendar yuvîrecoi vahe co cuña resendarer, chupe oyemondo-mondo tõi vahecuer imbahe eta rese, oyaseho tẽira yuvîreco iyavei ndoyembovîhai chira sese osepi-

ase evocoi cuña rātachi yuvireco curi.

<sup>10</sup> Opitañora amombrive osiquiyepave, iparaisusa sui aipo ehi tēira yuvireco:

“¡Ndeparaisu catu, tecua guasu Babilonia, nde reco pīrata vahe tie viña!

Esepia niha, co aviyeteramo tēi ou nde mombaraisu catusa” ehira yuvireco.

<sup>11</sup> Evocoiyase ava mbahe mboepisar ivi pipendar yuvirecoi vahe, ahe avei oyaseho tēira iyavei ndoyembovihai chintera evocoi tecua rese yuvireco. Esepia niha, ndipo iri chintera que virocua vaherā imbahe yuvireco ichui, <sup>12</sup> co opacatu mbahe sepi vaherā ahe: oro, guarepochi, ita iporañete ai vahe, mbohir sendi vahe, turucuar secose vahe, turucuar sendi vahe, iyavei pīraumbi vahe, pīra vahe no; iyavei opacatu-catu tēi ivirape siacua vahe; mbahe-mbahemi marfil apopri, ivira icatupri vahe apopri, bronce apopri, guarepochi apopri, mármol avei; <sup>13</sup> mbahe serocuapri yahu vahe canela, tembihu moiacuasa; itaisi, mirra, mbahe siacua vahe; uva ricuer, mbahe quira, trigo cuhi aviye vahe, trigo avei; iyavei mbahe mimba ovosii vahe no, ovesa, cavayu, cāretomi iyavei mbiguai no. <sup>14</sup> Aipo ehi tēira yuvireco co tecua guasu upe:

“¡Nderereco iri acoi mbahe ha ereipota etepri vahe; iyavei eremocañi tēi apirēhi opacatu nde mbahe eta nde yemboeteisa avei!” ehira.

<sup>15</sup> Evocoiyase evocoi mbahe mboepisareta oyemombahe eta vahecuer co mbahe rese tecua guasu sui, ahe opitañora amombrive osiquiyepave iparaisusa repiase yuvireco. Oyaseho tēira iyavei ndoyembovihai tēi chira yuvireco no, <sup>16</sup> iyavei aipo ehi tēira yuvireco:

“¡Too! ¡Iparaisú iteanga tecua guasu pendar!

Inungar tie cuña acoi oyemonde tupri vahecuer secoi cuese viña iyavei iturucuar suendi,

pīra vahe; oro pipe oyemboetei vahecuer,

itami iporañete vahe pipe iyavei mbohir sendi vahe pipe oyemboetei vahe no.

<sup>17</sup> ¡Aviyeteramo tēi rumo opa ocañi imbahe eta ichui!” ehi.

Evocoiyase opacatu ava carite guasu pipendar rerecuar, ava imbehi ivirindar carite guasu roguatasar, i rupi oporaviqui vahe oyeupe nara mbahe rereco āgua, ahe opaño opita amombrive yuvireco ichui <sup>18</sup> iyavei co tecua rātachi repiase, ahese osapucaí pīrata tēi yuvireco: “¡Ndipoi eté niha yipisui tecua na ehi vahe!” ehi yuvireco. <sup>19</sup> Ipare imboasipave omondo ivi cuhi oācave yuvireco, oyaseho iyavei ndoyembovihai tēi, ipare osapucaí tēi yuvireco aipo ehi: “¡Too! ¡Iparaisu catu tecua guasu pendar!

Esepia niha, evocoi tecua guasu mbahe eta pipe sui ava i rupi oporaviqui vahe oyemombahe yar yuvireco viña.

¡Aviyeteramo tēi rumo opa ocañi!” ehi.

<sup>20</sup> Peyembovihaño evocoi tecua rese, pe iva pendar, iyavei opacatu chupendar peico vahe, pe no Jesús apóstol peico vahe,

opacatu Tūpa ñehe mombehúsar peico vahe avei no.

Esepia niha, co tecua omocañisa pipe Tūpa oyapo mbahe tupri pēu nara.

<sup>21</sup> Ahese Tūpa rembiguai iva pendar seco pīrata vahe osupi ita inungar mbahe mbocuhisa, ipare omombo para guasu pipe aipo ehi:

“Na ehi aveira tecua guasu Babilonia mocañisa.

Imombopri secoira.

Ipare ndapesepia iri chintera apirēhi vaherā” ehi.

<sup>22</sup> “Ndasendusa iri chintera ocar rupi arpa moñehesar, mimbí moñehesar, iyavei mimbí guasu moñehesar,

sar avei no; ndererecoi chietera  
ava oporaviqui vaheṛā, ndasendusai  
iri chiaveira ita mbahe mbocuhisa  
monarasa nde suindar.

<sup>23</sup> Iyavei ñepe yepe que tataendi ndos-  
esapei chietera ndeu, ndasendusai  
chiaveira ava aivu mendasa rupi,  
yepi niha nde ava upe mbahe  
mondosar seco pīrata etepri vahe  
opacatu rupi ereico viña.

Iyavei erembopa-mbopa tēi opacatú am-  
buae tecua rupindar eico nde payesa  
pipe” ehi

Tūpa rembiguai chupe.

<sup>24</sup> Esepia niha, evocoi tecua guasu  
pipe oyecua Tūpa ñehe mombehusar  
ruvi, Tūpa upendar ava ruvi, iyavei  
opacatu ava yucapri vahe ivi pipendar  
ruvi avei.

**19** Co pare, asendu ava rehii ñehe  
pīrata ivave aipo ehi vahe:

“¡Imboeteipri yande Yar tasecoi!

Poropīsirosa, teco porañetesa iyavei  
ipīratasa ahe yande Ru Tūpa  
suindar.

<sup>2</sup> Esepia niha, ahe oyapo mbahe supi  
eté vahe,

‘Tocañi’ ehise co cuña oyemboaguasa-  
guasa tēi vahe nungar tecua guasu  
upe evocoi niha oseco momara tēi  
vahe ava ivi pipendar güeco rai  
pipe; ichui Tūpa osepi oyeupendar”  
ehi.

<sup>3</sup> Ipare aipo ehi iri yuvireco no:

“¡Imboeteipri yande Yar tasecoi!

Esepia niha, evocoi tecua rātachi ndopai  
chietera” ehi.

<sup>4</sup> Evocoiyase veinticuatro tupri iva  
pendar icuaiipri yuvirecoi vahe iyavei  
irungatu iva pendar yuvirecove vahe,  
ahe Tūpa mboeteisa pipe oyeaivi ivi  
rese yuvireco. Ipare aipo ehi yuvireco  
no: “¡Ēgüe tehi! ¡Imboeteipri yande Yar  
tasecoi!” ehi. <sup>5</sup> Evocoiyase Tūpa renda  
sui tupri oyeendu ñehesa aipo ehi vahe:

“¡Pemboetei yande Ru Tūpa opacatu  
peroya vahe, que seco ivi coti  
catumi vahe, que seco ivate vahe  
avei, pe pesiquiye vahe imboyeroya  
āgua!” ehi.

### Pieta mendasa Ovesami resendar

<sup>6</sup> Asendu avei ava rehii ñehe, inungar  
acoi itu guasu riapu, ndoyavii avei osunú  
guasu vahe aipo ehi:

“¡Imboeteipri yande Yar tasecoi!

Esepia niha, yande Yar Tūpa opacatú  
mbahe mboavaisarēhi omboipi  
oporocuai.

<sup>7</sup> Tayayemboviha catu yaico iyavei taya-  
mondo yande viharetesa, yande sa-  
pucaisa yande Ru Tūpa upe.

Esepia niha, cūrítei oyepota mendasa ari  
Ovesami upendar.

Sembireco evocoiyase opa oyemoingatu  
oico:

<sup>8</sup> chupe ipotasa iyemonde āgua turucuar  
secose vahe, ndiquihai, sendi vahe  
pipe.

Esepia niha, co turucuar secose vahe  
‘Tūpa rese yuvirecoi vahe recocuer  
ihīvi vahe’ oyapave aipo ehi” ehi.

<sup>9</sup> Evocoiyase Tūpa rembiguai, “Na ere  
icuachía: ‘Sorivete catu acoi ava men-  
dasave ichohopri yuvireco’ ere” ehi  
cheu. Iyavei aipo ehi cheu no: “Co niha  
Tūpa ñehesa supi tupri vahe ité” ehi.

<sup>10</sup> Ipare añenopiha Tūpa rembiguai  
rovai imboetei āgua. Ahe rumo aipo  
ehiño cheu: “Ēgüe erei rene. Esepia,  
che Tūpa rembiguai tēi aico nde nun-  
gar iyavei nde rivireta nungar oguata  
vahe Jesús ñehengagüer rupi. Emboetei  
Tūpa” ehi.

Esepia niha, evocoi Jesús recocuer  
mombehusar moñehe ucasar, ahe niha  
acoi omombehu uca vahe Tūpa ñehe  
mombehusar upe.

### Cavayu morochi vahe reroguatasar

<sup>11</sup> Evocoiyase asepia iva oyemboi vahe. Aheve aviyeteramo tēi cavayu morochi vahe oyemboyecua, evocoiyase ava sese oyeupi vahe rer: “Ocuaita-omboaviye-tupri-vahe iyavei Supi tupri vahe” ehi. Esepia, güeco ïvisa pipe oporocuai iyavei oyapo vavasa. <sup>12</sup> Sesa evocoiyase ndayaviyei eté acoi tata rendigüer; iyavei oāca rese setá vireco oyeguaca, iyavei vireco terer icuachiapri oyes; ahe güeraño ité oicua. <sup>13</sup> Iturucuar evocoiyase imopirapri tuvi pipe; serer evocoiyase, “Tüpa Ñehe” ehi. <sup>14</sup> Sundao rehii iva pendar saquicuerive yuvirecoi. Iturucuar secose vahe pāve morochí vahe, ndiquihai vahe avei. Ahe cavayu morochi vahe harive yuvirecoi. <sup>15</sup> Iyuru pipe sui osē quise pucu saimbe vahe opacatu ambuae-ae tecua rupindar momara āgua. Ahe oyocuiria oamotarēhisar guarepochi apopri opo pendar pipe. Iyavei osecoāhara inungar uva opive otiamii vahe yuvireco iyavei ombohura evocoi uva ricuer paraisu catusa resendar pipe. Ahese Tüpa mbahemboavaisarēhi oñemoiro itera chupe. <sup>16</sup> Oturucuar popi rese vireco icuachiapri ohivipi rese avei aipo ehi vahe: “Mborerecuareta rerecuar guasu iyavei ava Yar ivate catu vahe” ehi.

<sup>17</sup> Ipare asepia Tüpa rembiguai opūha vahe arisave. Ahe osapucui pírata opacatu vīrai mbahe rohoguar upe oveve vahe iva rese: “¡Perio! ¡Peñemonuha Tüpa suindar carusa guasusave; <sup>18</sup> pehu co mborerecuareta roho, sundao eta rerecuar roho iyavei ava oico eté vahe roho, cavayu roho, ihari pendar roho avei, opacatu ava roho ava nimañecosai vahe roho, mbiguai roho, seco ivi coti catumi vahe roho, seco ivate vahe roho avei!” ehi.

<sup>19</sup> Ahese asepia mbahe ipi vai iyavei mborerecuareta ivi pipendar osundao reseve-seve. Ahe oñemonuha yuvireco ovava āgua evocoi cavayu hari pendar rese iyavei isundao rese avei no. <sup>20</sup> Co mbahe ipi vai yipindar vahe soquendasa, oyoya evocoi Tüpa ñehe mombehugar angahu tēi rese. Ahe acoi oyapo vahe mbahe yavai rai vahe yipindar mbahe ipi vai rovaque, evocoi mbahe yavai rai vahe apo pipe ombopa-mbopa tēi ava, acoi seroyasar vireco vahe mbahe ipi vai rer oyes iyavei omboetei vahe sahanga yuvireco. Evocoiyase co mbahe ipi vai iyavei Tüpa ñehe mombehugar angahu tēi, ahe opa imombosa secove reseve ipa azufre ocái vahe pipe yuvireco. <sup>21</sup> Ambuae evocoiyase evocoi cavayu morochi vahe hari pendar yuru pipe sui osē vahe quise pucu pipe opa omano yuvireco. Evocoiyase opacatu vīrai mbahe rohoguar opa soho pipe oyemohitaro yuvireco.

### Mil araviter resendar ñehesa

**20** Ipare asepia Tüpa rembiguai ogüeyi vahe ou iva sui ivicuar guasu ipicucu vahe mboyasar iyavei carena ipo guasu vahe opove vireco. <sup>2</sup> Ipare oipisi mbahe ipi oporomocañi vahe mboi nungar arachendar, ahe niha Caruguar secoi, Satanás serer vahe; ahe oicuhacua carena pipe mil araviter rupi imoi. <sup>3</sup> Ahese omombo ivicuar guasu ipicucu vahe pipe. Aheve osoquenda. Omondo sello soquenda rese opacatu ambuae-ae tecua rupindar mbopa-mbopa tēi iriēhi āgua rese acoi osupitise voi mil araviter. Coiye rumo mil araviter pare, imosesa raimi tēira.

<sup>4</sup> Ipare asepia tenda, iharive setá ava uguapi yuvinoi evocoi oipisi vahe omborerecuasa yuvireco ava upe mbahe rese porandu āgua. Iyavei asepia ava hā evocoi opa vahecuer oyasia ñaca yuvireco Jesús recocuer mombehuga sui



tēi iyavei Tūpa Ñehengagüer mombehusa pipe sui tēi avei. Ahe ava nomboetei vahe mbahe ipi vai yuvireco; sahanga avei nombotei yuvireco no; iyavei nomondo ucai vahe avei osiva rese serer yuvireco, opo rese avei. Ahe asepia opa ocuerayevi yuvireco. Ipare oporocuai Cristo rese mil araviter rupi yuvireco. <sup>5</sup>Ahe co yipindar vahe cuerayevisa. Ambuae ava omano vahe rumo ndocuerayevi iri eté yuvireco osupitise voi mil araviter. <sup>6</sup>¡Sorivete catu acoi ava vireco vahe yipindar cuerayevisa yuvireco! ¡Esepia niha, ahe Tūpa upendar ité yuvireco! Imoñuviriosa manosa evocoyase chupe ndipo iri eté. Ëgüe ehira rumo ahe Tūpa upe naraño ité pahi yuvirecoira, Cristo upe avei. Ipare mborerecuar yuvirecoira sese mil araviter rupi.

### Carugar recopisa

<sup>7</sup>Acoi osupitise rumo mil araviter cute, ahese Carugar yorasara soquendasa sui. <sup>8</sup>Ichui osëra opacatu ava ivi pipendar mbopa-mbopa tēi oico; osëra ivi Gog mbopa tēi água, ivi Magog mbopa tēi água avei. Ipare omonuhara vavasave nara isundao eta. Esepia niha, ahe sehii etepri yuvireco inungar ivi cuhi para guasu popi rupindar.

<sup>9</sup>Ëgüe ehi yugüeru ati amombri sui, oyerepa tupri Tūpa recua rese yuvireco no, evocoi tecua Jerusalén sembiaisu rese avei. Tūpa rumo ombou tata iva sui, ahe ipipe opa tupri ité osapi. <sup>10</sup>Carugar evocoyase, ava mbopa-mbopa tēisar, ahe opa imombosa ipa azufre ocai vahe pipe. Aheve acoi opa imombosa mbahe ipi vai iyavei Tūpa ñehe mombehusar angahu tēi vahe avei no. Aheve iparaisura pītu, ari yuvireco apirēhi vaherã.

### Tūpa oguapira güendave ava recocuer rese porandu água ari ipa vahe pipe

<sup>11</sup>Evocoyase asepia tenda imboeteipri, morochi vahe. Iharive oime ava oguapi vahe oī. Sovai ivi iyavei iva opa ocañi tupri tēi. Ndoyecua iri eté co coti rupi yuvireco. <sup>12</sup>Ipare asepia omano vahecuer seco ivate vahe, seco mbegüemi vahe avei no opūha yuvinoha Tūpa rovai; ahese cuachiar opa ipipirasa yuvireco, iyavei ambuae cuachiar. Ahe cuachiar tecovesa resendar. Omano vahecuer upe evocoyase porandusa evocoi cuachiar pipendar mbahe sembiapogüer rese. <sup>13</sup>Omano vahecuer opa yuvinose para guasu pipe sui, iyavei tehögüer recosa sui opa yuvinose; ichui opacatu mbahe sembiapogüer rese porandusa yuvireco chupe no. <sup>14</sup>Ipare manosa recua opa imondosa tata nungar ipa pipe. Evocoi ipa niha imoñuviriosa manosa. <sup>15</sup>Aheve opa imondosa acoi ndovirecoi vahe güerer icuachiapri cuachiar tecovesa resendar pipe.

### Iva piasu iyavei ivi piasu

**21** Ipare asepia iva piasu iyavei ivi piasu. Esepia niha, yipindar vahe mbahe opa ité ocañi yuvireco, para guasu avei no. <sup>2</sup>Che asepia tecua nimarai vahe, ahe Jerusalén piasu, evocoi ogüeyi vahe Tūpa sui ou. Opacatu imoingatusa tupri vahe, inungar acoi cuña omenda água oyemboetei tupri omevi upe. <sup>3</sup>Ipare asendu ñehesa pīrata tenda suindar aipo ehi vahe: “Tūpa cūrítei oicove ava rehii pāhu rupi oico. Ahe oicove vaherã ité sese yuvireco yepi, ahe ava evocoyase chupe nara ité yuvirecoira. Ahe teieté niha sec-oira yuvireco chupe. <sup>4</sup>Ahe niha omom-bituhura opacatu ava resai; iyavei ava nomanoi chiera; ndoyasehoi chira yu-

vireco; ndipoi chira viharēhisa, tecoasisa avei chupe. Esepia niha, opacatu mbahe oime vahecuer yipindar, ndipo iri eté” ehi.

<sup>5</sup>Ahese evocoi oguapí vahe tenda harive oí, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esepia niha, co ñehesa sui tupri vahe ité, evocoiyase iya ité peyeroya sese” ehi.

<sup>6</sup>Ipare aipo ehi cheu: “Opa ité yaviye. Che aviye acoi letra omboipi vahe A sui yepi, Z rupi. Esepia, che yipive vahe ité, ipandar avei. Acoi ava ihusei vahe amboihuño tēira i tecovesa resendar ndasepii vahe pipe. <sup>7</sup>Acoi ava oyemoviracua vahe ité mbahe-mbahe tēi apoēhi āgua, ahe oipisira co mbahe opacatu omahera yuvireco. Evocoiyase che aicora chupendar ité, ahe evocoiyase che rahir ité yuvirecoira. <sup>8</sup>Acoi ava osiquiye ai vahe rumo che recocuer sui, ndache reroyai vahe, ava ndiporoepia potai vahe, oporoyuca vahe, acoi ava oyemboaguasa tēi vahe, ipaye serai vahe, mbahe rahanga mboeteisar tēi iyavei opacatu ava semira-mira tēi vahe, ahe opara yuviraso ipa nungar azufre ocai pīrata vahe pipe. Ahe niha imoñuvirío manosa” ehi.

### Tecua Jerusalén piasu

<sup>9</sup>Evocoiyase ou ñepeí siete Tūpa rembiguai pāhu pendar acoi siete tupri igua riru, siete mbaherasi ipa vahe vireco vahecuer ipipe, ahe aipo ehi cheu: “Erio, amboyecua cuña omenda vahēvi ndeu, Ovesami rembirecovi” ehi. <sup>10</sup>Evocoi che quer nungar pipe Espiritu osepiya uca vahe cheu, che reraso ivitri guasu ivate vahesave. Aheve omboyecua tecua guasu Jerusalén nimarai vahe cheu, ogüeyi vahe Tūpa sui. <sup>11</sup>Ahe tecua sendí iteanga Tūpa rendigüer pipe. Sendigüer evocoiyase oyoya tupri ita iporañete vahe rese, oyoya avei ita jaspe,

serer vahe ipīrerimi vahe rese. <sup>12</sup>Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoiyase ñepeipei Tūpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese. <sup>13</sup>Vireco niha mbosapi oquenda añihivei coti, mbosapi norte coti, mbosapi irohi coti iyavei mbosapi caharu coti no. <sup>14</sup>Tecua guasu āchisa vireco doce tupri ita imoviracuasa. Ahe sese evocoi doce tupri yuvirecoi vahe Ovesami apóstol rer icuachiasa yuvireco.

<sup>15</sup>Evocoi Tūpa rembiguai oñehe vahe cheu vireco vara oro apopri tecua rāha āgua, opacatu soquendipi rāha āgua, ñachisa rāha āgua avei no. <sup>16</sup>Tecua guasu pucucuer oyoya tupri ipigüer rese. Evocoiyase Tūpa rembiguai osāha tecua guasu ruvichagüer; osāhase ipucucuer dos mil dos cientos kilómetro tupri ité; ipucucuer, ihivategüer iyavei ipigüer oyoya pāve tupri ité no. <sup>17</sup>Ipare osāha ñachisa: osāhase ipigüer sesenta y cinco metro tupri. Evocoi Tūpa rembiguai osāha ava rembiporu pipe.

<sup>18</sup>Tecua āchisa ahe ita porañete vahe Jaspe serer vahe apopri; tecua evocoiyase oro pāve tupri, aviye vidrio secose catu vahe. <sup>19</sup>Ñachisa moviracuasa vireco opacatu ambuae ita-ita tēi iporañete vahe pāve: yipindar ivīracuasa jaspe, imoñuviriosa zafiro, imombosapisa ágata; imoirungatusa esmeralda; <sup>20</sup>imbopoyandeposa ónice; imoñepeí ovasa, cornalina; imoñuvirío ovasa, crisólito; imombosapi ovasa, berilo; imoirungatu ovasa, topacio; imbopoyandepo ovasa, crisoprasa; co opoyandepo yovaivesa ahe jacinto; imoñuvirío yovaivesa, amatista. <sup>21</sup>Doce tupri vahe oquenda guasu ahe doce tupri mbohir; ñepeí-peí oquenda ñepeí mbohir sui yapopri. Calle guasu tecua aviter rupindar evocoiyase oro pāve,

inungar vidrio yande porēhi tupri vahe pipe.

<sup>22</sup> Ndasepiai eté evocoi tecua guasu pipe ñepi yepe tūparo. Esepia niha, yande Yar Tūpa mbahe mboavaisarēhi, Ovesami reseve yuvirecoi aheve.

<sup>23</sup> Evocoi tecua guasu ndovireco iri eté ari, yasi güesape āgua. Esepia niha, Tūpa ité osesape güendigüer pipe, iyavei Ovesami tataendi nungar secoi aheve yuvirecoi vahe upe.

<sup>24</sup> Sendigüer osesapera opacatu tecua rupindar iguatasa rupi, iyavei ava mbahe yar mborereciar ivi pipendar opara güeru ombahe eta porañete vahe yuvireco chupe.

<sup>25</sup> Evocoiyase soquendipi nimboyasai chietera ari yacatu rupi. Pītu ndipoi chiaveira aheve.

<sup>26</sup> Ipare opara aheve ambuae tecua mbahe eta, porañete vahe omoingue yuvireco; <sup>27</sup> ava angaipa viyar rumo, Tūpa remimbotarēhi oyapo vahe, iporombopa serai vahe, ahe ndoyuviroiquei chietera aheve. Ēgüe ehi rumo acoi ava vireco vahe güerer icuachiapri Ovesami cuachiar tecovesa resendar pipe yuvireco, ahe güeraño yuviroiquera aheve.

**22** Ipare Tūpa rembiguai omboyecua iai tecovesa resendar cheu, tīpi, oyecua tupri, osē vahe Tūpa iyavei Ovesami renda porañete vahe sui. <sup>2</sup> Calle guasu mbiter rupi oso. Iyavei iai ique yacatú oime ivira tecovesa resendar, iha vahe doce yupagüer rupi ñepi araviter pipe. Iyavei evocoi ivira ro aviye ai ava opacatu rupindar mbogüera āgua. <sup>3</sup> Ndipoi chietera aheve que mbahe tēivri pendar. Tūpa renda porañete vahe iyavei Ovesami renda avei chinira evocoi tecua guasu pipe. Aheve sembiguai eta omboeteira yuvireco. <sup>4</sup> Osepiara sova iyavei virecora serer osiva rese yuvireco. <sup>5</sup> Aheve ndipoi chietera pītu, iyavei ava aheve yuvirecoi vahe ndosecai chietera tataendi. Ndosecai chiaveira que ari güe-

sape āgua yuvireco. Esepia niha, yande Yar Tūpa teieté osesapera. Ipare ahe ava mborereciar apirēhi vaherā ité yuvirecoira sese.

### Cōimi eté Jesucristo yevi āgua

<sup>6</sup> Ipare Tūpa rembiguai aipo ehi cheu: “Co ñehesa supi tupri vahe ité, sese iya ité peyeroya. Iyavei yande Yar Tūpa acoi omboyecua tupri vahe mbahe oyesuindar oñehe mombehugar upe, ahe ombou güembiguai iva pendar mbahe omboaviye poyava voi vaherā mboyecua āgua viroyasareta upe” ehi.

<sup>7</sup> “¡Ayevi poyava voira curi! ¡Sorivete catura acoi ava viroya vahe ñehesa Tūpa suindar mbahe oime vaherā resendar co cuachiar pipe!” ehi.

<sup>8</sup> Che, Juan, asepia iyavei asendu ité co mbahe. Sendu pare voi, añenopiha evocoi Tūpa rembiguai rovai imboetei āgua viña. <sup>9</sup> Ahe rumo aipo ehiño cheu: “Aní ereñenopiha che rovai. Esepia niha, che Tūpa rembiguai tēi aico, nde nungar, nde rivireta nungar avei evocoi oñehe vahe Tūpa Ñhengagüer rese yuvireco, iyavei inungar opacatu viroya vahe co cuachiar pipendar icuachiapri yuvireco no. Tūpa catu pemboetei” ehi.

<sup>10</sup> Aipo ehi avei cheu no: “Ereicuacui rene co ñehesa Tūpa suindar mbahe oime vaherā resendar sereco, evocoi icuachiapri cuachiar pipe. Esepia niha, ari cōimi secoi imboaviye āgua. <sup>11</sup> Acoi ava mbahe tēi aposar, toyapoño mbahe tēi; iyavei acoi ava seco rai vahe, taseco raño ité oico; acoi ava seco tupri vahe rumo, ahe toyapoño mbahe tupri oico; iyavei acoi ava Tūpa upe oyemondo tupri vahe ité, ahe taseco tupriño avei oico chupe” ehi.

<sup>12</sup> “Supi eté ayevi poyavara, iyavei arura mbahe porerecosa ñepi-peí ava rembiapogüer rupi-rupi amondo vaherā chupe. <sup>13</sup> Che aico inungar letra A iyavei

Z, yipindar vahe, ipandar vahe avei no; yipive vahe ité apirēhi vaheṛā” ehi.

<sup>14</sup>“Sorivete catura acoi ava omoatiro vahe güecocuer. Esepia, ahe oipisira ivira ha tecovesa apirēhi vahe resendar. Ipípe sui oiquera tecua guasu pipe. <sup>15</sup>Ava rehii ndiporeroyai vahe rumo opitapara ocarve tēi yuvireco, iyavei ava ipaye serai vahe, oyemboaguasa-guasa tēi vahe, oporoyuca vahe, mbahe rahanga upe tēi oyeróqui vahe, iyavei opacatu ava oipota rai vahe oporombopa-mbopa tēi āgua yepi” ehi.

<sup>16</sup>“Che, Jesús, amondo che rembiguai íva pendar mbahe mombehu āgua opacatu che reroyasar upe oñemonuha vahesa rupi-rupi. Che aico mborerecuar guasu David suindar. Iyavei aico inungar yasitata guasu sendi vahe añihiveindar no” ehi cheu.

<sup>17</sup>Espíritu Santo iyavei Ovesami rembireco aipo ehi: “¡Perio!” ehi ava upe yuvireco. Iyavei acoi ava osendu vahe ñehe, “¡Perio!” tehi ambuae ava upe

yuvireco. Iyavei acoi ava ihusei vahe, toyugüeruño; acoi ava oipota vahe, toipisi i tecovesa resendar ndasepii vahe yuvireco.

<sup>18</sup>Opacatu acoi ava osendu vahe co ñehesa Tūpa suindar mbahe oime vaheṛā resendar icuachiapri co cuachiar pipe yuvireco, ahe chupe, “Peicua catu” ahe. Amove que ava co mbahe resendar omboyeapí iri vahe, ahe chupe Tūpa omboyeapí aveira co cuachiar pipendar mbahe-mbahe tēi imombehupri. <sup>19</sup>Amove que ava virocua vahe co cuachiar pipe sui ñehesa Tūpa suindar, Tūpa avei evocoyase ndoipotai chira chupe co cuachiar pipe imombehupri ivira ha tecovesa resendar rereco āgua iyavei co tecua maranehi pipe seique āgua.

<sup>20</sup>Acoi co mbahe mombehusar aipo ehi: “Supi eté ayevei poyavara” ehi.

Ēgüe tehi ayase. ¡Erio, che Yar Jesús!

<sup>21</sup>Yande Yar Jesucristo tape rovasa opacatu. Avíye, aipo rupive.